


Etulo NT



Portions of the Holy Bible in the Etulo language of Nigeria

Etulo NT

Portions of the Holy Bible in the Etulo language of Nigeria

copyright © 2024 Initiative for the Translation and Development of African Languages

Language: (Etulo)

Contributor: The Seed Company

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 26 Jul 2025 from source files dated 9 Jul 2025
156b6685-3a62-5375-95ed-97245882cc90

Contents

iMatiu	1
iMaki	33
iLuku	54
ijɔn	89
Okyyɔkyɔ	115
Emi iRoma	148
1 Emi iKorinti	162
2 Emi iKorinti	176
Emi iGalatia	185
Emi Efesu	190
Emi iFyilipi	195
Emi iKolose	199
1 Emi iTesalonika	203
2 Emi iTesalonika	206
1 iTimoti	208
2 iTimoti	212
iTaitusu	215
iFylimɔn	217
Emi iHibru	218
ijɛnsi	228
1 iPyita	232
2 iPyita	236
1 ijɔn	239
2 ijɔn	243
3 ijɔn	244
ijudu	245
Iba	246

Eso Osuse mi abo mgbi iMatiu

Eto mgbi iYesu

¹ Odze eto mgbi iYesu iKrestu Ongwe iDevedi, ongwe Abraham.

² Abraham li otso Adziki, Adziki li otso ijeko, ijeko li otso iJuda beyi emi ong-wunon.

³ iJuda li otso iPeredzi beyi iDzera, ono ma li iTama, iPeredzi li otso iHezron, iHerizon li otso iRama,

⁴ iRama li otso Aminada, Aminada li otso iNashon; iNashon li otso iSamon,

⁵ iSamon li otso iBoadzi, ongwu onon li iRaha, iBoadzi li otso Obedi, ongwu onon li iRutu, Obedi li otso ijese;

⁶ ijese li otso Uto iDevedi; iDevedi li otso iSolomu ongwu onon li owa Uria,

⁷ iSolomu li otso iRehobuan, iRehobuan li otso Abyija, Abyija li otso Asa,

⁸ Asa li otso iJehoshafa, iJehoshafa li otso iJoran, iJoran li otso Udzia;

⁹ Udzia li otso iJotan, iJotan li otso Ahadzi, Ahadzi li otso iHedzekia;

¹⁰ iHedzekia li otso iManase, iManase li otso Amon, Amon li otso iJosia,

¹¹ iJosia li otso iJekonia beyi emi ong-wunon. Taman a kwu ma ofyee lu ese iBabylon.

¹² Ngwi egbe mgbi ama mi iBabylon wa ngye ne; iJekonia mba iShetie, iShetie mba iDzerubabe,

¹³ iDzerubabe mba Abyidu, Abyidu mba Eliakin, Eliakin mba Azo;

¹⁴ Azo na di mba iDzadoku, iDzadoku mba Akin, Akin mba Elidu,

¹⁵ Elidu mba Eliadza, Eliadza mba iMatan, iMatan mba ijeko;

¹⁶ ijeko mba iJose oba iMeri; li iMeri ongwu nmba iYesu ongwu a li kwun di iKrestu nani.

¹⁷ Eto nwita mbi Abraham nghataa ke mbi iDevedi li iwiyodene; Wita mbi iDevedi nghataa ke ono ngwi a gbe ma lu iBabylon li eto iwiyodene yi ono ngwi a to abo ofyee mi iBabylon nghataa ba ono mgbi iMedzaya na kpaa li eto iwiyodene.

Ombaamba mgbi iYesu iKrestu

¹⁸ Nene li nga ngwi ombaamba mgbi iYesu iKrestu dze aani: Onon iMeri, ngwu iJose tsikwon dze ese, kpaa duuse no kyon yo, a din yi ifewo mi mfye mgbi Onodzi Osaan.

¹⁹ Nghaduu iJose oban li inggise osuse, i minan onun ayiwi mi ododa ba ne, o kye weka gbee ongwu ka gha yan fyee.

²⁰ Dafi o le tsewodze ne nga ne, ongyeso mgbi Otse wa tsetun mi elela, nyan gbee, <<IJose ongwe iDevedi, ka mio okyi kyelu iMeri lu ude abu gbee no li owa abu ba, ikyesine ifu ngwi o byi na li mi Onodzi Osaan.

²¹ O ka wa mba ongwongyulo, ta abu ka kwun iyi gbee iYesu, lubana o ka dula emidan to mi ali ibwubwe mgbi ama.>>

²² Ungwo ntone duu kyo ikye ombwo ondu odzeedze mgbi Otse ongwu o gbo nye mbi oyegbo gbee,

²³ <<Ongwongyaa ibidrua ka wa byifu mba ongwongyulo, a ka kwun iyi di Imanue,>> itan gbee, <<Imgbasho dze yi eyi nani.>>

²⁴ Ngwi iJose kye una neta, o kyo dafi ongyeso mgbi Otse nyan nani, o kyi kyelu iMeri lu ude mban yee owon.

²⁵ Kpaa o gbewo yan ba nghataa iMeri wa mba ongwongyulo, o si kwun iyi gbee iYesu.

2

Ama oyodze mi onosa

¹ Ngwi a mba iYesu mi iBetlehen mi iJudia duu neta, iHerude li uto mi ono nani, inggise ama oyodze mi onosa wa kaka iJerosalin,

² le byita gbee, <<Ongwe ongwu a mba nli Uto mgbi emi iJuda ne, a kyon ladze ole? Lubana eyi di mce mban mi onosa, ngwi eyi ba owa sunun aani.>>

³ Ngwi uto iHerude fwo odze ne nga ne, i kakan ewo beyi emi iJerosalin duu.

⁴ O kwu engyukwo ama ofife mgbi Imgbasho beyi ama otso ola duu kwakye, o byi ma gbee li mi ole ngwi a ka mba iMedzaya ma?

⁵ A nyan gbee: <<Li mi iBetlehen mi iJudia, Lubana li ungwu ngwi oyegbo tsekise lo gbee:

⁶ <<Kpaa abu, iBetlehen, mi ikpese mgbi iJudia,

o ka yama li igeli oyeikpa mi iJudia ba; lubana li mbi abu ngwi inggise ogbe inggise teyi ka to

nka ngyo emidan iIsrai.> >>

⁷ Ta iHerude kwu ama oyodze ntona ela daada di byi ma ita klekle ni ongwu ye ono ngwi mce na tsetu ma mani.

⁸ O si nu ma ofe lu iBetlehen di nya ma gbee, <<Lu ka pitan saan na. Ni ema ka din taman ye wa nya ani, adzi ni ani kpaa ka su nun.>>

⁹ Ngwi a fwo odze ngwi uto gbo ne, a tase lu ta mce ongwu a di mi onosa ma gbe ma teyi nghataa ka kwulese mi imbe ngwi ongwu na ladze mani.

¹⁰ Ono ngwi a di mce na ma, a dze yi atsa kwuba.

¹¹ Ta ama oyodze kaka ozu di ongwē yi onon iMeri, a kwesē su nun, nē a kwulu igbē mgbi ama dūlu abashi, engyie ogbungbē yi iMire* gbe ghan umba.

¹² Nē ama oyodze ntona yē nyē ofe oka lu esē ude ma, lubana Imgbasho tsekise woma elela kwo ma adō gbēē nu ma ka yē nyē mbi iHerude wuba.

A tsinya lu Igyibiti

¹³ Ono ngwi ama oyodze lu dzita emi iMeri nē, ongyesō mgbi Otse wa tsetu iJose mi elela owoowo nyan gbēē: <<i>Herude ka wa pita ongwē nē gbēē ni ongwu ngwōn. Nghane kyato, kyelu ongwē yi onon tsinya lu Igyibiti, to ele na nghataa ni ani wa nya ema gbēē ni ema kyēē yē se.>>

¹⁴ IJose kyato una mi otu na, kyi kyelu ongwē yi onon, lu Igyibiti.

¹⁵ O dze ele nghataa ba ono ngwi iHerude wa kwulu. Ungwōnē kyō ikye onu odze ngwi Otse Imgbasho gbo nyē mbi oyegbo gbēē, <<Ani kwu Ongwani ela tase mi Igyibiti,>> ma yēē otsitsi.

Engbē ongwōngwō

¹⁶ Ono ngwi iHerude difwi dafi ama oyodze ntona kyon ikwangha ewo nē, eka kplokō lon. O noola gbēē nu ma kye ngwōlu ali ongwongyulo ama mme onova efa yeyikpa sini mi iBetlehen beyi agwō ama nwatse dōn duu. O gbodze nē mi ikye odze ngwi ongwu fwo mbi ama oyodze ntonani.

¹⁷ Ta odze ngwi oyegbo iJeremia teyi gbo ma yēē otsitsi gbēē:

¹⁸ <<A fwo ela akwō mi iRama, akwō ikwu otsetse kpakpa iRace le makwō ikye engbē mgban, o fwa onu ma gyilan, ikyesine a kwulu.>>

Oye lu iNadzareti

¹⁹ Ngwi iHerude kwulu nyē nē, ongyesō mgbi Otse kē mbi iJose mi elela owoowo mi Igyibiti

²⁰ ka gbēē, <<kyato, kyelu ongwē yi onon, yē lu esē Israi, ikyesine ama nle fya ongwō ongwē nē ma kwulu wa.>>

²¹ Man iJose kyato, kyi kyelu ongwē yi onon yē luba Israi.

²² Nghaduu ngwi iJose fwo gbēē Acelusi gyuto gihkye otsōn iHerude mi iJudia nē, o wimio oka kaka ele, a di won elela kwon adō neman, o yē lu ayēsē iGalalia

²³ ka dze igeli ngwi a kwun di iNadzareti nani. Nē odze ngwi oyegbo tsekise gbōgbēē: <<A ka kwun di inggisē iNadzareti,>> na mbwumbwo.

3

Esō ogbōgbo mgbi iJōn okyō iBatisima

¹ Mi ono na iJōn okyō iBatisima badze okwēsē mi iJudia le gbēsō.

² O gbēē, <<Kyata mi ali ibwubwe mgbi ema na ikyekyē Esuto ongwī esho dze kwēkwē.>>

³ IJōn li ongwu oyegbo Adzaya tsekise gbōdzan mi ono ngwi o gbēē:

<<Inggisē le kweela mi okwēsē gbēē, <melu ofe ikye Otse, no byi yēyē na.>>

⁴ A mē angwuto mgbi iJōn mi andu ilakwumyi; o kye okpa bwa oshi, ungwogye mgban li okpa yi enewo.

⁵ Inggisē tkye iJerosalin tole ba mbon beyi ali agwō mgbi iJudia yi ayēsē nto kwēkwē yi ekyoo mgbi iJōdan duu.

⁶ A fwi ali ibwubwe mgbi ama man iJōn kyō ma iBatisima mi ekyoo iJōdan.

⁷ Ngwi iJōn di emi iFarasi yi emi iSadusi kwuba le ba mbon owa kyō iBatisima nē, o nya ma gbēē: <<Ema engwē ogidzi ntonē! Li emē wē ema odze gbēē ni ema tsinya itingga mgbi Imgbasho nka wa ba na?

⁸ Wa owaawa ntso ambē itukwu okyata-kyata mani.

⁹ Dika tsēsē gbēē ema ka gbo yi ewema gbēē, <Abrahan li otseyi ba.> Ani le nya ema gbēē Imgbasho ka yagba kyata akwutse ntonē nu ma yēē eto mgbi Abrahan!

¹⁰ Onēē kpaa Imgbasho kye ika ladze akpekwo le fē odzēdzē, ali ekwō nwa owaawa osuse ba duu a ka kye dzelu ngwuta di kye wokē ola.

¹¹ <<Ani le kyō ema iBatisima yi eni otso ambē itukwu okyata-kyata. Kpaa ongwu nka wa ba mi iyikpa ani ma shewo ngha ani, ani mē ogben okpafō ba. O ka kyō ema iBatisima mi Onodzi Osaan beyi ola.

¹² Okwuga mgban ofo ungwō byidzē abo, o ka folu eto mgban kyi gbelu osuse duu wokē oba, ikpaflo yō, o ka gbe toola mi ola nka myunu ba mani.>>

IJōn kyō iYēsu iBatisima

¹³ Mi ono na iYēsu kye mi iGalalia wa kaka si ba mbi iJōn mi ekyoo iJōdan owa kyō iBatisima mbon.

¹⁴ Kpaa iJōn fwa yan gbēē, <<Li ani ngwu abu kika kyō ani iBatisima, ma kyōnē ngwi abu ba mbi ani?>>

¹⁵ Nghaduu iYēsu nun uka gbēē, <<Onēē yō no dze ngha; lubana li kyēmē ngwi eyi ka kyō oweka mgbi Imgbasho.>> Man iJōn gbela.

¹⁶ Ntunto ngwi iYēsu kyō iBatisima di kyēē mi eni neta, esho kwulu. Ta o di Onodzi Imgbasho kye le ba dafi anyama wa dōnkē ewo.

¹⁷ Ta ela tō mi esho gbēē, <<Nēnē li Ongwani, ongwī itukwu-itukwu; li mbon ngwi ani dze yi atsa.>>

* 2:11 2:11 iMire li otse onu ungwō bwa ba.

4

Igyila mgbi iYesu

¹ Ta Onodzi Osaan kye iYesu lu okwese ni iSatan ka mbadin.

² Dafi iYesu tukwundu egbe ngwusefa yi otu ngwusefa nye ne, enbwa don.

³ Ta iSatan ba mbon wa nyan gbæ, <<Kini abu li ongwe Imgbasho yo, wo akwutse ntone ola nu ma kyata yæ ibredi.>>

⁴ Kpaa iYesu nun uka gbæ: <<Afe lo gbæ, inggise ka dze oshishe mi ibredi ta ba, kpaa li mi ali elodze nto mi ondu mgbi Imgbasho mani.>>

⁵ Ta iSatan di kyon lu ogalu osaan, kyon ka dæke ikyikye ozu osunu Imgbasho, ⁶ o nyan gbæ, <<Ni abu li ongwe Imgbasho yo, bulu lu ese. Lubana Afe lo gbæ, <<Imgbasho ka wo engyeso mgban ola ikye abu,

a ka kye gbelu abu mi abo mgbi ama, ikyegbæ ni abu ka kye afõ tse akwutse ba.>>

⁷ IYesu nyan gbæ, <<Afe di lo gbæ, <ka mbadi Otse Imgbasho mgbi abu ba.> >>

⁸ ISatan di kyon lu ka tæke unggwo nshigbo kpakpa di tson esuto mgbi ese duu beyi okwõkwõ mgbi ese. O nyan gbæ:

⁹ <<Kini abu kwese sunu ani yo, unggwo ntone duu n ka gbe nu abu.>>

¹⁰ Nghaduu iYesu nyan gbæ, <<Ye enggenga iSatan! Lubana Afe lo gbæ: <Sunu Otse Imgbasho mgbi abu, di li ongwo ta kyon ido.> >>

¹¹ Ta iSatan lu dzanta, man engyeso mgbi Imgbasho ba wa tobyun.

IYesu wita ogbeeso

¹² Ngwi iYesu fwo gbæ a kye iJon woke obawi ne, o ye lu iGalalia.

¹³ O dzata iNadzareti si lu ka dze iKape-nahun ndze mi ewuuto iGalalia mi aye mgbi iDzebulun beyi iNaftali

¹⁴ ikye ombwumbwo odze ngwi oyegbo Adzaya tsekise gbo mani gbæ:

¹⁵ <<Ese iDzebulun yi iNaftali, ofe olu ekyoo okwukwo, mi olu ijodan,

iGalalia mgbi emi agwese

¹⁶ inggise ama nlato iifu

a di osa okwukwo;

ama nlato iwulu ikwongye osa gbosa tu ma.>>

¹⁷ Wita mi onõ na nghataa lu iyayi iYesu wita ogbeeso gbæ <<kyata mi ali ibwubwe mgbi ema na, lubana esuto ongwi esho dze kwækwe.>>

IYesu kwu engwafõon emi ababo ela

¹⁸ Dafi iYesu le kyikye nye ewekyoo okwukwo mgbi iGalalia ne, o di engwuneka

ngbi efa, iSaimon nli iPyita nani beyi ong-wunon Andru. A tole ngwi uke mi utõ lubana a li ama okwu mmwbeni.

¹⁹ IYesu nya ma gbæ, <<Ba, wa kyedõ ani na, ta ani ka kyata ema ye ama okwu inggise.>>

²⁰ A byakpa dzata uke mgbi ama kyedon.

²¹ O gble kiyayi ne, o di engwunõ angbeka efa, iJensi beyi ongwanon iJon emi ongwe iDzebedi. A woto uwaa yi otsõma, le me ake. IYesu kwu ma ela,

²² ple neta a dzita otsõma beyi uwaa si kyedon.

IYesu ngyelu emi ootse ootse

²³ IYesu kyikye kpatse iGalalia, le tso mi ozu okwakye mgbi emi iJuda, le gbo Eso Osuse mgbi esuto, dile ngyelu inggise ootse idzidza-dzidza.

²⁴ Odze mgban si gbofwe kpatse ali imbe mi iSiria, ta inggise gbe ama ndotse ita idzidza-dzidza ba mbon, ama nle gyadze yi owulu-wulu, yi ama ngwu ese dõ ma ikye, ama odzekwulu yi ama ogbyikye tukwu ese, kpaa iYesu ngyelu ma ele duu.

²⁵ Ijiji inggise mi iGalalia yi iDekapoli yi iJerosalin yi iJudia beyi ayese nto oyombo ekyoo ijodan duu kyedon.

5

Eso atsa

¹ Mi onõ ngwi iYesu di ibyi inggise ne, o tæke ewunggwõ ka sæke ese. Engwafõon ba mbon,

² o si wita otso ma gbæ:

³ <<Atsa dze yi ama ndze adze mi onodzi, lubana esuto ongwi esho li mgbi ama.

⁴ Atsa dze yi ama ndze yi etse ine oneneni, lubana Imgbasho ka gylla ma!

⁵ Atsa dze yi ama nsulu itukwu iyu, lubana a ka gyokwude ese.

⁶ Atsa dze yi ama enbwa dõ ma ngwi ek-weni di kwu ma ikye osaan mani, lubana Imgbasho ka nu ma tolo.

⁷ Atsa dze yi ama odi elela, lubana Imgbasho ka di ma elela.

⁸ Atsa dze yi ama itukwu gbosa mi ifun, lubana a ka di Imgbasho.

⁹ Atsa dze yi ama oba yi iyu, lubana a ka kwu ma di engwe Imgbasho.

¹⁰ Atsa dze yi ama nli gbiiso ikye osaan mani,

lubana esuto ongwi esho li mgbi ama.

¹¹ <<Atsa dze yi ema ngwu a fya ema ito di nu ema iso di mwonya ibwubwe be ema ewo mi ikye ani mani.

¹² Dze yi atsa kpakpa na, ikyekye umba mgbi ema shewo mi esho, bana li ngha ngwi a nu ama ogbæse ama nteyi ema ma kpaa iso aali.

Mmwaa yi osa

¹³ <<Ema li mmwaa mgbi ese. Kpaa kini mmwaa fyumfya wuba ma, a ka kynosinese non ye fyumfya? Ungwo ntishi ngwi a ka kyo yan yo, se li okye yangwuta ni inggise kye afo dzin.

¹⁴ <<Ema li osa mgbi ese. Ogalu okwukwo ndodze undo ka yagba dze daada ba.

¹⁵ Naadi inggise ka kye ipitila do di yile mgboko tukwun ba. Kpaa a ka kye dake mi ododa, no nu osa mbi ali inggise duu mi ifoozu.

¹⁶ Mi ito ofe ne yeye, ni osa mgbi ema gbosa mbi inggise, ikye nu ma di okyockyo mgbi ema osuse diye tse Otsema onghi esho.

Ola mbwumbwo

¹⁷ <<Ka tsewe gbese ani ba owa ndelu Ola naadi elodze mgbi emi Oyegbo ba; ani ba owa ndelu ma ba kpaa li owa nu ma mbwumbwo.

¹⁸ Ani nya ema otsitsi, esho yi ese ka nye, kpaa ambe olo ungwo nnghao shanye hona nnghao yeyikpa ngwi a lo mi Ola onyi kpaa ka byulu ba. Nghataa alungwo duu ka wa mbwumbwo.

¹⁹ Ali inggise nfoola onyi nnghao shanye mi ola ntone diye tso angbeka okyo nga yo, a ka kwun di olele mi esuto onghi esho, kpaa ali inggise nkyo mi ola diye tso ola ntone, a ka kwun di ogbagbadzidzi mi esuto onghi esho.

²⁰ Lubana ani nya ema gbese sede osaan mgbi ema ka nga mgbi emi iFarasi beyi etsetse mgbi ola mgbi iMose bayo, ema kpaa ka kaka esuto onghi esho na ba.

Inggise ongwongwo

²¹ <<Ema teyi fwo a gbo yi inggise tugbe gbese, <Ka ngwo inggise ba, ma ali inggise nngwo inggise tayo a ka gbon ikwo.>

²² Nghaduu ani le nya ema gbese inggise nkyitingga yi ongwunon yo, me ogbon ikwo. Ali inggise ndi kwu ongwunon gbese, <Im-buu,> ka nu uka mi opiikwo okwukwo. Kpaa inggise ta nkwu ongwunon gbese, <Abu ikwangha inggise yo!> ka dze inoola mgbi udola.

²³ <<Nghane, ni abu le nu umba mi iwashi wa we gbese ongwunabu dze yi okakewo yi abu yo,

²⁴ dzita umba na mi iwashi. Teyi lu ka yile ide gye yi ongwunabu; ta ye wa nu umba mgbi abu.

²⁵ <<Yile ide gye ple yi ongyikyili mgbi abu ongwu nkye abu le ke opiikwo. Kyo nga yan ngwi abu ka kye yan mi ofe mani, bana o ka kye abu wo inggise ogbiikwo abo, inggise ogbiikwo na dika kye abu wo adrubo abo, man o ka kye abu woke obawi.

²⁶ N nya abu otsitsi, abu ka to ba sede abu ka kpa mkpa ngwi abu dzezan ma klekle olifo onyi kpaa ka sisi ba.

Amah

²⁷ <<Ema teyi fwo a gbogbese, <Ka kyo amah ba.>

²⁸ Kpaa n nya ema gbese inggise ta ndi ongyaa ine mbe anggwo yo, tsekise kyo amah yan mi itukwu mghan.

²⁹ Kini ine mgbi abu abugye nu abu kyungwo obube, kyi todulu ngwuta. I tatase ni alewo mgbi abu onyi nyanya nga onu ma kye ewo mgbi abu ololo ngwuta woke udola.

³⁰ Ni abo abugye mgbi abu di nu abu kyungwo obube yo, kye dzelu ngwuta. Bana ka tatase ni alewo mgbi abu onyi nyanya nga onu ma kye ewo mgbi abu ololo ngwuta woke udola.

Eba oghaagha

³¹ <<A tsekise gbogbese, <Ali inggise nlo owan onya yo, li kyeme ngwi o ka nun afe ogheeba.>

³² Nghaduu ani nya ema gbese inggise ta nlo owan onya, ni li mi itodze mgbi amah bayo, o non yee ongyaa amah, inggise ndi kye ongyaa ngwu a lon onya kyo amah.

Ofaafa

³³ <<Ema di fwo a nya inggise tugbe gbese, <Ka ndelu ofaafa mgbi ema ba, kpaa ngwo ondu odzedze ngwi ema dze yi Otse mani.>

³⁴ Kpaa n nya ema, ka fa ba duudu: ni li mi esho kpaa, lubana li itsuuto mgbi Imgbasho;

³⁵ hona mi ikpese, lubana li imbe okye atafu mghan do ele; naadi mi iferosalin, lubana li ogalu okwukwo mgbi Uto Ogbagbadzidzi.

³⁶ Dika fa mi ikye mgbi abu ba, lubana abu ka yagba onu alotu onyi mi ikye mgbi abu kpaa yee onzundze hona onbyinbyi ba.

³⁷ Ungwo nli adze bayo, <Een> mgbi ema no li <Een,> <Ei,> mgbi ema no li <Ei>; ungwo nnghaabo ne duu kye mbi owape olodu.

Ine yi ine

³⁸ <<Ema teyi fwo a gbogbese, <Ine yi ine, aba yi aba.>

³⁹ Kpaa n nya ema, ka kpumkpa obube mi ikye obube ba. Kini inggise ta abu afe mi atado abugye, kyata agya oka na kpaa nun.

⁴⁰ Ni inggise di mina okwu abu elikwo kye gbelu angwuto mgbi abu owoowo onghi ifun yo, kye angwuto mgbi abu onghi ese kpaa banke ele.

⁴¹ Kini inggise si abu gbese ni abu ke afokyee onyi yan yo, ke yan afokyee efa.

⁴² Inggise nbo abu ungwo nun, dika fashi iyikpa tse inggise nmina ogbe mkpa mbi abu ba.

Odi engyikyili kpitukwu

⁴³ <<Ema teyi fwo a gbogbɛɛ, <Di inggise nwotsuude do abu kpa abu itukwu ye di ongyikyili mgbi abu lanyɛ.>

⁴⁴ Nghaduu n nya ema: engyikyili mgbi ema nu ma kpa ema itukwu di bibo mi ikye ama nle nu ema iso,

⁴⁵ adzi ni ema li engwe mgbi Otsema ongwɛ esho. O li nu onɔ mgban tse emi obube yi emi osuse, di li kya mmbwo mbi emi osaan beyi emi ibwubwe kpaa.

⁴⁶ Kini ema tso okpitukwu mbi ama nkpa ema itukwu ta ma, li ali oyabo ema ka tu? Li ali ngwi ama ogbe udza ifyee kpaa li kyo daabaa?

⁴⁷ Ni ema di ta engwunema ta angba ma, idzidza mgbi ema yi inggise angbeka li ekye? Li ngha ngwi ama o sunu Imgbasho ba kpaa li kyo daabawe?

⁴⁸ Wane, dze yeye na, dafi Otsema ongwɛ esho kpaa le yeye neni.

6

Onu emi abubo

¹ <<Gbewebyi ka kyo ali osuse mgbi ema mi ine inggise ikyegbɛɛ nu ma di ema ba. Ni ema kyo ngha, ema ka tu umba mbi Otsema ndze esho na ba.

² <<Nghane ni abu gha inggise abubo umba yo, ka fo agba mi ele dafi emi ikpala li kyo mi ozu okwakyɛ mgbi emi ijuda beyi ingɔfɛ ikye ni inggise nu ma mmwe na ba. N nya ema otsitsi, a kyi gbelu umba mgbi ama ngye wa.

³ Ni abu gha inggise abubo umba yo, ka nu abo abube mgbi abu ye ungwɔ ngwi abugye le kyo ma ba.

⁴ Ikye ni umba mgbi abu oghaagha no dze mi odaada. Ta Otsabu, ongwu nli di mi odaada na, ka yilen kpa abu.

Ibo obɔɔbo

⁵ <<Ni ema di bibo yo, ka kyo dafi emi ikpala ba, lubana li kpa ma obibo kwuzunto mi ozu okwakyɛ mgbi emi ijuda beyi mi okwokyiikwokyi mgbi ingɔfɛ ikye ni inggise di ma. Ani nya ema otsitsi, a kyi gbelu umba mgbi ama ngye wa.

⁶ Yeba ni abu ka bibo yo, lu ifoozu mgbi abu, kye ofɛ tukwu man bibo mbi Otsabu, ngwu a li din ba nani. Ta Otsabu, nli di mi odaada na, ka nu abu umba.

⁷ Nghaduu ni ema le bibo, ka kwondukwo dafi ama oye Imgbasho ba li kyo na ba, lubana a tsewe gbɛɛ li mi odze mgbi ama ogbɔgbɔ kwuba ma ngwi a ka fwo ma aali.

⁸ Ka dze dafi ama ba na, lubana Otsema teyi ye ungwɔ ama ngwi ema mina duuse ema wa bon.

⁹ <<Ne, ka li ofɛ ngwi ema kale bibo aani: << <Otseyi ndze esho,

nu ma nu mmwe mi iyi mgbi abu,

¹⁰ esuto mgbi abu no ba, nu ma kyo owitukwu mgbi abu mi ese ne dafi a li kyo mi esho mani.

¹¹ Nu eyi ungwogye mgbi eyi ine ongwɛ alegbe-alegbe.

¹² Dze eyi ta yi obube mgbi eyi, dafi eyi kpaa li dzita ama nkɔy eyi obube mani.

¹³ Dika kye eyi kaka imbadi ba, kpaa dula eyi to mi abo inggise obube*.>

¹⁴ Lubana ni ema dzata inggise nkɔy ema obube yo, Otsema ongwɛ esho kpaa ka dzata ema.

¹⁵ Kpaa ni ema dzata inggise yi obube bayo, Otsema kpaa ka dzata ema yi obube mgbi ema ba.

Ondu otukwu-tukwu

¹⁶ <<Alono ngwi ema tukwondɔ yo, ka mbiine ikye dafi emi ikpala li kyo na ba, bana a li mbiine ikye otso inggise gbɛɛ ama le tukwondɔ. N nya ema otsitsi a kyi gbelu umba mgbi ama ngye wa.

¹⁷ Nghaduu ni abu tukwondɔ yo, ngwune di kye engyie juwo ikye.

¹⁸ Ikye ni inggise ka difwi gbɛɛ abu le tukwondɔ ba, kpaa no li mbi Otsabu kyoon, ongwu a li din ba; Otsabu nli di mi odaada na, ka kpa abu mkpa.

Aludu mi esho

¹⁹ <<Ka kye aludu mgbi ema da mi ese ne ba! Mi ese ne ewa yi mnkpe ka mbelu ma, emumyi dika gbobu kaka kye yili.

²⁰ Kpaa kye aludu mgbi ema da mi esho, imbe ngwi ewa beyi mnkpe ka yagba mbe ba, ngwi emumyi kpaa ka yagba gbobu kaka kye yili ba nani.

²¹ Bana li imbe ngwi aludu mgbi abu dze ma ngwi itukwu mgbi abu kpaa li dze aali.

Osa mgbi ewo

²² <<Inɛ li osa mgbi ewo. Ni ine mgbi abu tishi, ewo mgbi abu duu ka mbwo yi osa.

²³ Kpaa ni ine mgbi abu tishi bayo, ewo mgbi abu duu ka mbwo yi iifu. Kini osa nwodze mbi abu yifu yo, iifu na ka she saan!

²⁴ <<Inggise onyi ka kyo engyukwo efa ido ba. Kyayina o ka di oka lanyɛ, diyɛ di oka kpan itukwu, hona o ka nghao sunu oka di kwu oka shanye. O ka yagba sunu Imgbasho yi awuya onɔ onyi ba.

Ka dze yi okakewo ba

²⁵ <<Nghane n nya ema, ka dze yi okakewo mi oshishe mgbi ema mi ungwɔ ngwi ema ka gye hona wa naadi ewo mgbi ema mi ungwɔ ngwi ema ka wo ba. Oshishe

* **6:13** Lubana esuto li mgbi abu yi mfyɛ beyi okwokwo gyegwu. No dze ngha.

dze yi oyabo nga ungowgye, ewo di dze yi oyabo nga angwuto baa?

²⁶ Di mbi ingwuno emi esho, a li kya naadi she hona gbe da mi oba ba, nghaduu kpaa Otsema mi esho li nu ma ungowgye. Ema dze yi oyabo nga ma bana?

²⁷ Li eme mbi ema mi itukwu ofeesho ka yagba ombwo ewon obyi onyi mi oshishe?

²⁸ <<Ne kyosine ngwi ema dze yi okakewo mi odze angwuto? Di ongaanga mgbi afutse dafi li she mani. A li kyido naadi gho angwuto ba.

²⁹ Nghaduu n nya ema gbee iSolomu yi okwakwo mgban duu kpaa wo angwuto kwo dafi onyi mbi afutse ntona ba.

³⁰ Ni li nga ngwi Imgbasho li to afutse nkwo dze mmene ine ekeka a ka kye dzelu ngwuta woke ola angwuto ma, kyosine ngwi o ka nghao to ema angwuto ba? Ema ama oye sheema anye ne?

³¹ Nghane ka dze yi itukwu ofeesho gbee, <Li alungwo ngwi eyi ka gye? > Naadi <Li alungwo ngwi eyi ka wa? > Hona <Li alungwo ngwi eyi ka wo? > Ba.

³² Lubana ama oye Imgbasho ba kpaa li le kyedo ungow ntoneni, kpaa Otsema ongi esho ye gbee i wo ema yi ungow ntoneni.

³³ Tatase teyi pita esuto mgbi Imgbasho yi osaan mgban, ta ungow ntona duu a ka gbe be ema ke ele.

³⁴ Dududu yo ka kye itukwu feesho mi ungow ongi ekeka ba, ni ekeka kye ine byi ewon. Alegbe dze yi okakewo ngo mi ikye ewon.

7

Ofwo angbeka ikwo

¹ <<Ka fwikwo ba na, di ema kpaa a wa fwo ema ikwo.

² Lubana li mi ito ofe ngwi ema fwo angbeka ikwo ma, ngwi ema kpaa a ka fwo ema ikwo, di li ito ofe ngwi ema kye ofwo angbeka ikwo ma, ngwi a ka kye fwo ema ikwo aali.

³ <<Kyosine ngwi abu di ofufu ekwo mi ine mbi ongwunabu kpaa ngwi abu gbewebyi otsokpla nwodze ine mbi abu na ba?

⁴ Ka kyosine abu ka nya ongwunabu gbee, <Detse nin dulu abu ofufu ekwo mi ine,> ngwi alono duu otsokpla wodze ine mbi abu?

⁵ Ema emi ikpala, ababo kyi dulu otsokpla nwodze ine mbi abu, ta abu ka dine saan odulu ofufu ekwo nwodze ine mbi ongwunabu nani.

⁶ <<Ka kye ungow nle saan nu obwe ba na, dika kye itagwude mgbi ema ngwuta la obya ba, kini ema kyo nga yo, a ka kye atafu todo ma, di kyata kye ema kye nghalu ambulu-ambulu.

Ba, pita, tsaabo

⁷ <<Ba ta a ka kye nu ema, pita ta ema ka tu, tsaabo ta a ka kwulu ema ofe.

⁸ Bana ali inggise nbo duu li gbe, inggise npita li tu, inggise ndi tsaabo, ofe ka kwulu mi ikye mgban.

⁹ <<Li eme mbi ema, kini onghan bon ibredi, se o ka kye ikwutse nun?

¹⁰ Naadi kini o bon mmbweni, ngwi o ka kye ifa nun?

¹¹ Kini ema, ama nli obube, kpaa ye okye umba osuse nu engwe ema ma, ka kyosine ngwi Otsema ongi esho ka kye umba osuse nu ama nbon ba!

¹² Nghane mi alungwo duu, kyo yi inggise angbeka dafi ema mina gbee a ki kyo yi ema mani, bana li mi ungowne ngwi Ola beyi emi Oyegbo kwulu ngwuo aani.

Ofe okpenge yi ogbada

¹³ <<Kaka onufe ogalu okpenge. Lubana onufe ogalu otsee yi ofe ogbada-ghada li ofe olu imbe odzili-dzili, inggise kwuba le nye ele.

¹⁴ Kpaa onufe ogalu ogyengye yi ofe okpenge na le lu imbe oshishe, ma li inggise gwee ta kpatse ofe nani.

Ekwo yi owawan

¹⁵ <<Gbewebyi oyegbo emi atsika. A li ba mbi ema kye okpa mmala tukwu ewo, kpaa mi idzidze a li emi idukwlebe obube.

¹⁶ Mi owawa mgbi ama ema ka difwi ma. Inggise ka yagba she mntsa mi olumu, naadi she olumu mi ato gbee?

¹⁷ Li nga ngwi ekwo osuse duu li wa owawa osuse aali, kpaa ekwo obube yo li wa owawa obube.

¹⁸ Ekwo osuse ka yagba wa owawa obube ba, ekwo obube dika wa owawa osuse gbe ba.

¹⁹ Ali ekwo ta nwa owawa osuse bayo, a ka kye dzelu di kye ngwuta woke ola.

²⁰ Nghane, li mi owawa mgbi ama ngwi ema ka difwi ma.

²¹ <<Li ali inggise nkwo ani gbee, <Otse, Otse,> ta ka kaka esuto mgbi Imgbasho ba, kpaa sede li ongwu nkyo mi itukwu mgbi Otsani ongwu ndze esho nani.

²² Inggise kwuba ka nya ani mi egbe na gbee, <Otse, Otse, eyi yegbo mi iyi mgbi abu, di lo onodzi emese onya to di kyungwo ama okwulewo angbeka kwuba mi iyi mgbi abu baa?>

²³ Ta ani ka nya ma mi ododa gbee, <Ani ye ema ba. Lu enggenga na, ema emi ali ibwubwe ntoneni!>

Inggise efa ama ombe ozu

²⁴ <<Nghane ali inggise nfwo elodze mgbi ani ntona di kyo mi ele dze dafi inggise okwiine ngwu mbe ozu mgban mi ikye ikwutse mani.

²⁵ Mmbwo kya, akpeni kyee, awo di fa tseke ozu nani, nghaduu i yagba gbobu ba, ikyesine a wo itan mi ikye ikwutse.

²⁶ Nghaduu ali inggise nfwo odze mgbi ani ntone di kyo mi ele bayo, o dze dafi ikwangha inggise ngwu mbe ozu mgban mi ikye mfyan mani.

²⁷ Mmbwo kya, akpeni kyee, awo di fa tseke ozu nani, i yulu tukwu ese.>>

²⁸ Ono ngwi iYesu ngyelu ogbo ungwo ntone ne, i kwulu ibyi inggise ntona ewo mi otsootso mgban,

²⁹ ikyesine o tsungwo dafi inggise ndze yi mfye, li dafi mgbi etsetse mgbi ama, ama otso ola ba.

8

Inggise otsoma

¹ Ono ngwi o tashulu mi ewungwo ne, ibyi inggise kyedon.

² Ongyulo ndze yi otsoma ba wa kwonke iyayi si nyan gbée, <<Otse, ni abu gbela yo, o ka nu ani yee saan.>>

³ IYesu naabo gbon ewo nyan gbée, <<Ani gbela, yee saan.>> Ple neta otsoma mgban gbosa.

⁴ Ta iYesu nyan gbée, <<Di gbée abu nya inggise onyi kpaa ungwone ba. Kpaa lu, ka kye ewabu tso mbi ama ofife mgbi Imgbasho di nu umba ngwi iMose wo ema ola mani, otso obwende mboma.>>

Oyeye onuunu mgbi ongyukwo oblakwutse

⁵ Ono ngwi iYesu kaka iKapenahun ne, ongyukwo oblakwutse ba mbon, wa mina oyabo.

⁶ O gbée, <<Otse, ongbido mgbi ani kwulu afo yi abo ladze ude le gyadze kpakpa.>>

⁷ IYesu nyan gbée, <<N ka ke ka ngyelun ootse.>>

⁸ Ta ongyukwo oblakwutse na si gbée, <<Otse, ani me abu ka kaka iwulu endu mgbi ani ba. Gbogo odze ta, ewo mgbi ongbido mgbi ani sika ngye.

⁹ Lubana ani abuen li ongyulo nbyidze abo mfye, yi ama oblakwutse byito abo ani. Nin nya ongwune gbée, <Lu>, O li lu, nin nya oka na gbée, <kwa!> O di li ba. Ani li gbo yi ongbido mgbi ani gbée, <Kyungwonenili!> O di li kyon.>>

¹⁰ Ono ngwi iYesu fwo odze ne ne, i kwulun ewo man o si gbo yi ama nkyedon ntona gbée, <<N nya ema otsitsi, ani tu inggise onyi kpaa mi Israi yi ito oyeye onuunu okotondzi ne ye ba.

¹¹ N nya ema gbée inggise kwuba ka kye mi onosa yi onode ba, dika kwu imbe mgbi ama mi oga yi Abraham, Adziki beyi ijeko mi esuto ongywi esho.

¹² Kpaa a ka lo ama esuto dze ikye ma tase lu iyifu, mi imbe ngwi ikwu otsetse yi aba ogyeegye ka dze mani.>>

¹³ Ne iYesu nya ongyukwo oblakwutse na gbée, <<Lu! Ka dze yeye dafi abu noyeye nani.>> Ta ootse ngye lo ongbido mgban na mi ono na yeye.

IYesu ngyelu ibyi inggise ootse

¹⁴ Ngwi iYesu kaka ude iPyita ne, o di awo bwa onowa iPyita ladze akwulo.

¹⁵ O kye abo gbon ta awo ngye lon, o si kyato wita ogbe ungowgye to ma.

¹⁶ Mi ononode ne, a gbe inggise kwuba ama ese do ma ikye ba mbon, ne o lo onodzi ntona to mi elodze onyi ta di nu emi ootse duu yee saan.

¹⁷ Nene li ombwumbwo odze ngwi oyegbo Adzaya tsekise gbon mani gbée: <<O kyi kyelu okakewo mgbi eyi di kyi kyelu ootse mgbi eyi duu.>>

Ama nka me okyedo iYesu

¹⁸ Ngwi iYesu di ibyi inggise ntona to yan ne, o nondu gbée nu ma foye uto lu agya oka.

¹⁹ Ta otsetse mgbi ola mgbi iMose oka ba mbon wa gbée, <<Otsetse, ani ka kyedo abu mi ali imbe ngwi abu le ke duu.>>

²⁰ IYesu nyan gbée, <<Ogbalinya gbeka to yi ishe ingwuno emi esho kpaa to yi ude, nghaduu Ongwe Inggise dze yi imbe okye ikye da ba.>>

²¹ Ongwafu oka nyan gbée, <<Otse, ungwo ongwu ababo yo, detse nin ka kye Otsani ndzi se.>>

²² Nghaduu iYesu nyan gbée, <<Kyedo ani, dzata emi ikwukwo nu ma ndzi ewoma.>>

IYesu nu akpeni kwulu

²³ IYesu si kaka uwaa man emi ongwafon kyedon.

²⁴ Vla neta, onikyo awo gbokyee mi uto nani, nghane akpeni le kadu yaoke uwaa. Nghaduu iYesu le nuna.

²⁵ Emi ongwafon ke ka kyilen, nyan gbée, <<Otse, dula eyi to! Di eyi le dzili!>>

²⁶ O nya ma gbée, <<Ema ngwu oyeye onuunu mgbi ema shanye ne, i kyosine ema dze yi imio kpakpa ngha?>> Ta o si kyato kyokyo yi awo beyi akpeni nani, i si kwulu tsiin.

²⁷ I kwulu inggise ntona ewo man a byita gbée, <<Nene li ali ito inggise den? Ngwi awo yi akpeni kpaa li fwon!>>

Engyulo efa ama ndze yi ese ikye

²⁸ Ngwi iYesu foye dake ayese iGadarene ne, engyulo efa ama nto yi ese ikye tokye imbe endzi wa tun. A sulu imoga ewo nghane inggise onyi kpaa li nye ofe na ba.

²⁹ A kweela gbée, <<Li alungwo wo abu yi eyi, Ongwe Imgbasho? Abu ba owa nu eyi iso duuse ni ono ma wa gyoo?>>

³⁰ Ibyi obyia kwuto le gye ungwɔ, fyata yi ama gwee.

³¹ Eneɛ ntona tekye yi iYesu gbɛɛ, <<Kini abu lɔlu eyi tɔ yɔ, nu eyi ofe ni eyi ka kaka ibyi obyia ntonani.>>

³² IYesu nya ma gbɛɛ, <<Lu!>> Ta a si tɔ lu ka kaka ibyi obyia ntonani, man obyia ntona duu tsinya ka ngwuta mi agobo yaoke utɔ si kwulu mi eni.

³³ Ama ongyo obyia ntona si tsinya lu ka kaka igeli kye odze ne gbɔfwe kpatse duu yi ungwɔ nkyɔ yi engyulo ama nto yi ese ikye ntonani.

³⁴ Ne emi igeli na duu tase ka tu iYesu. Ngwi a din ne, a tekye yan gbɛɛ non lu dzata ayese mgbi ama.

9

*IYesu ngyelu inggise nkwalu
afɔ yi abɔ ootse*

¹ IYesu kaka uwaa, foye luba igeli mgban.

² Engyulo angbeka kye inggise nkwalu afɔ yi abɔ ba mbon, ladze amukwu. Ngwi iYesu di oyeye onuunu mgbi ama ne, o nya inggise otummya na gbɛɛ, <<Ka teeyi ba, ongwani; a dzita abu yi ali ibwubwe.>>

³ Mi ungwɔne ne, etsetse mgbi ola mgbi iMose angbeka gbɔ yi ewoma gbɛɛ, <<Inggise ne le fya Imgbasho ito!>>

⁴ Ngwi iYesu ye ewodze mgbi ama ne, o gbɛɛ, <<Kycsine ngwi ema le tsewodze ibwubwe mi itukwu nghaa?>>

⁵ Li ole nghao sunɔ ba: li ogbɛɛ, <A dzita abu yi ali ibwubwe,> naadi ogbɛɛ, <Kyato kyi kye?>

⁶ Kpaa li ikye ni ema ye gbɛɛ Ongwe Inggise dze yi mfye mi ese ne odze inggise ta yi ali ibwubwe...>> Ta o nya inggise ntummya ma gbɛɛ, <<Kyato, kye amukwu mgbi abu lu ude.>>

⁷ Ongyulo ma si kyato lu ude.

⁸ Ngwi ibyi inggise ntona di ungwɔne ne, imio wo ma; man a si tse Imgbasho, ongwu nkye itɔ mfye na nu inggise mani.

Ela okwu-kwu mgbi iMatiu

⁹ Dafi iYesu dzata imbe na kiyayi ne, o di ongyulo ngwu a li kwun gbɛɛ iMatiu sodze imbe mgbi ama ogbe udza ifyee. O nyan gbɛɛ <<Kyedɔ ani,>> ta iMatiu si kyato kyedɔn.

¹⁰ Ngwi iYesu le gye oga ongyi onɔde mi ude iMatiu ne, ama ogbe udza ifyee gwuba yi <<emi ali ibwubwe>> ba wa gye ungwogye yan beyi engwafɔn.

¹¹ Ngwi emi iFarasi di ungwɔne ne, a byi engwafɔn gbɛɛ, <<Kycsine otsetse mgbi ema le gye ungwogye yi ama ogbe udza ifyee beyi <emi ali ibwubwe?>>

¹² Ngwi iYesu fwo odze ne ne, o gbɛɛ, <<Inggise ama nle saan mina inggise obwe ootse ba, kpaa li ama ndotse ta.

¹³ Nghaduu lu na ka kpai ungwɔ ngwi odze ne tso mani: <Ani mina elela odiidi, yama li ife ofe-fe ba.> Ikyesine ani ba owa kwu ama osaan ela ba, kpaa li emi ali ibwubwe.>>

*A byi iYesu ita mi odze
ondu otukwu-tukwu*

¹⁴ Ne engwafɔ iɔn ba wa byi iYesu gbɛɛ, <<Kycsine ngwi eyi yi emi iFarasi li tukwondɔ, kpaa engwafɔ abu li tukwondɔ ba?>>

¹⁵ IYesu nu uka gbɛɛ, <<Ka kycsine ngwi ingyoga mgbi obongyaa ofufe ka kyelele ngwi o ka dze yi ama? Onɔ ka wa ba ngwi a ka kyi kyelu obongyaa ofufe mboma; ta a ka tukwondɔ.

¹⁶ <<Inggise onyi kpaa li kye aye angwuto ofufe tukwu ishngli ba. Ikyesine otukwu-tukwu na ka kwodze von.

¹⁷ Naadi inggise li kye enee kwɔ ofufe yaoke ikpɔkpɔ enee kwɔ ogbugbe kpaa ba. Kini otsungwɔ kyɔ ngha, ikpɔkpɔ na ka gbobu, enee kwɔ na ka yangwuta man ikpɔkpɔ na ka nyanya. Ei, a li kye enee kwɔ ofufe yaoke ikpɔkpɔ ofufe man ama duu ka nyanya ba.>>

*Ongwongyaa ikwukwɔ beyi ongyaa
ndotse*

¹⁸ Dafi iYesu le gbɔdze ne, ongye ogbe inggise teyi ba wa gbe akwafɔ kwese mi iyayi mbon si gbɛɛ, <<Ongwani ongwu ongyaa kuma kwulu ta aani. Nghaduu ba wa kye abɔ mgbi abu gbon, ta o ka dze oshishe.>>

¹⁹ IYesu si kyato yi engwafɔn ke yan.

²⁰ Mi onɔ mata ongyaa nle ye eyi me onova iwyodefa ba mi iyikpa mgbi iYesu wa kye abɔ gbon ondu angwuto.

²¹ O gbɔ yi ewon gbɛɛ, <<Ni ani kye abɔ gbon gbo-gbo angwuto kpata, ootse mgbi ani ka ngye.>>

²² IYesu kyata din, si gbɛɛ, <<Fyum-fye itukwu, ongwani; oyeye onuunu mgbi abu ngyelu abu ootse.>> Man ootse mgbi ongyaa na si ngye mi onɔ nani.

²³ Ngwi iYesu kaka ude ongye ogbe inggise teyi wa di ama ofo elete yi ibyi inggise tole wulu ne,

²⁴ o gbɛɛ, <<Lu enggengga na, ongwongyaa ne kwulu ba kpaa o le nanuna.>> A si shan isha.

²⁵ Ngwi a nu ibyi inggise ntona tase ne, iYesu kaka ifoozu ka byi ongwongyaa na mi abɔ, man o kyato.

²⁶ Odze ne si gbɔfwe kpatse ayese na duu.

IYesu kwulu obine efa ine

²⁷ Dafi iYesu dzata imbe na le lu ne, obine nghi efa kyedɔn, le kweela gbɛɛ, <<Di eyi elela, Ongwe iDevedi!>>

²⁸ Ngwi o ye lu onufozo ne, obine ntona si ba mbon, man o byi ma gbɛɛ, <<Ema noyeye

gbɛɛ ani ka yagba kwulu ema inɛ?>> A gbɛɛ, <<En, Otɛ.>>

²⁹ Nɛ o kye abɔ gbo ma inɛ si gbɛɛ, <<No kyo dafi oyeyɛ onuunu mgbi ema dze mani>>

³⁰ ta inɛ mgbi ama kwulu. IYɛsu kwo ma adɔ kpɔklɔ gbɛɛ, <<Di gbɛɛ ema nu inggise onyi ye odzɛ mi ungwɔnɛ ba na.>>

³¹ Nghaduu a tase ka kye odzɛ mgban gbo kpatɛɛ ɛsɛ na duu.

³² Ngwi iYɛsu yi engwafɔn le tase nɛ, a kye inggise ngwu onodzi ibwubwe bwan non yɛɛ ikplima ba mbon.

³³ IYɛsu lo onodzi emɛɛ na onya tɔ ta, inggise ikplima na si gbɔdzɛ. I kwulu ibyi inggise ntona ewo ta a gbɛɛ, <<Nkonyonyi itɔ nɛ kpaa kyo mi ɛsɛ Israi ye waba.>>

³⁴ Nghaduu emi iFarasi gbɛɛ, <<Li ongyukwo mgbi emɛɛ nun mfye se ngwi o le dɔlu onodzi emɛɛ tɔ aali.>>

Elela kyo iYɛsu wo inggise ntonani

³⁵ IYɛsu kaka igeli yi agwudɛ duu le tsungwo mi ozu okwakye mgbi emi iJuda, le gbo ɛsɔ Osuse mgbi ɛsuto dile ngyɛlu ali ootɛ yi ama ngwu i sisi loma ewo duu.

³⁶ Ngwi o di ibyi inggise nɛ, elela kyon wo ma, ikyekye a dze yi okakewo di yɛɛ elela, inggise ogbe ma teyi dzema ba, dafi mmala ndzɛ yi inggise ongyo ma ba mani.

³⁷ Ta iYɛsu nya engwafɔn gbɛɛ, <<Etɔ oshɛ-shɛ le gwuba, kpaa emi idɔ le gwee ta.

³⁸ Bɔ Otɛ mgbi etɔ oshɛ-shɛ no gbe emi idɔ ba okwɔ mgban.>>

10

IYɛsu dɔ ama ogbikyon ntona ɛsɔ

¹ IYɛsu kwu ama ogbikyon iwyodefa ntona ela ba mbon si kye mfye nu ma gbɛɛ nu ma lo onodzi ibwubwe onya di ngyɛlu ali inggise ngwu i sisi lon ewo yi ali itɔ ootɛ duu.

² Nɛnɛ li iyi mgbi ama ogbikyon iwyodefa ma aani: Ababɔ li, iSaimɔn (ongwu a li kwun di iPyita nani) yi ongwunɔn Andru beyi ijensi ongwɛ iDzɛbedi yi ongwunɔn iɔn

³ beyi iFyilipi yi iBatlomi yi iTɔmɔsu yi iMatiu inggise ogbe udza ifyɛɛ beyi ijensi ongwɛ Alfɛɔ yi iTedusu

⁴ yi iSaimɔn Ogbodami beyi iJuda iSkarɔti ongwu nkyɛ iYɛsu gya nani.

⁵ Emi iwyodefa ntɔnɛ iYɛsu dɔ ma ɛsɔ wo ma ola ntɔnɛ gbɛɛ: <<Ka kɛ mbi Udzenyɛ ba na dika kaka igeli mgbi emi iSamaria onyi ba.

⁶ Kpaa kɛ mbi mmala mgbi emi Israi nbyulu mani.

⁷ Ni ema kɛ yɔ, gbɛɛsɔ nya ma gbɛɛ: <ɛsuto ongwɛ ɛsho ma dze kwekwɛ wa.>

⁸ Ngyɛlu ama ndotɛ duu ootɛ, kyile emi ikwukwɔ, nu emi otsoma yɛɛ saan na, dɔlu

onodzi emɛɛ tɔ. Ema gbe ayayi, di kye nu ayayi na.

⁹ Ka yama kye abashi naadi iyudza onyina-nyina naadi itigbla mi igbe mgbi ema ba;

¹⁰ ka kye igbe byi mi okyɛɛ nɛ ba, naadi angwuto oka hona okpafɔ naadi okwuta ba, ikyesinɛ inggise idɔ mɛ ogyɛ adzɛ mgban.

¹¹ <<Ali igeli naadi agwudɛ ngwi ema kaka duu, pita inggise ngwu mɛ di gbɛla ogbe ema dafi ingyoga mani, di dze udan nghataa ni ema dzata imbe nani.

¹² Ono ngwi ema kaka uɛ yɔ, kye angba kwu ma.

¹³ Ni uɛ ma gbe ema yɔ, ni iyu mgbi ema tila mi ele; non gbe ema bayɔ, iyu mgbi ema no yɛ lu mbi ema.

¹⁴ Ni inggise onyi gbɛɛ ema naadi fwo elodzɛ mgbi ema bayɔ, gbolu onbulu mi afɔ mi ono ngwi ema dzata uɛ na hona igeli na mani.

¹⁵ N nya ema otsitsi, ka tatase lo iSodon yi iGomora mi egbe ikwɔ ma ngha igeli nani.

¹⁶ Ani le dɔ ema ɛsɔ tase dafi mmala mi idzidzɛ emi idukwɛbe mani. Nghane kwiine dafi ifa dika dze yi obube ba dafi anyama mani.

¹⁷ <<Gbɛwebyi inggise na, a ka gbe ema wo ama ogbiikwɔ abɔ di gbo ema ibe mi ozu okwakye mgbi ama.

¹⁸ Ikɛ odzɛ mgbi ani, a ka gbe ema ba wa kyo obwendɛ inai emi iGɔna yi emi utɔ beyi mbi emi Agwɛɛ.

¹⁹ Kpaa ono ngwi a bwa ema ma, ka teeyi mi odzɛ ngwi ema ka gbo naadi dafi ema ka gbɔn ba. Mi ono na Imgbasho ka nu ema elodzɛ ngwi ema ka gbo mani.

²⁰ Ikɛkyɛ li ema kale gbɔdzɛ ba, kpaa li Onodzi mgbi Otɛsɛma kale gbɔdzɛ nye mbi ema.

²¹ <<Inggise ka kye ongwunɔn nu mi abɔ ikwongye nu ma ngwɔn, otsɔngwɛ kpaa dika kyo ngha yi ongwɔn; engbɛ ka kye afɔ twɛɛɛ yi otsoma di nu ma tu ikwongye.

²² Inggise duu ka di ema taanyi mi ikɛɛ ani, nghaduu inggise nkɛwɛɛsɛ kpɔklɔ ka dondu ma ka watɔ.

²³ Ni a nu ema adzɛ mi imbe oka yɔ, tsinya lu imbe oka. N nya ema otsitsi, ema ka kpatɛɛ ogalu ama nto ɛsɛ Israi duu bata Ongwɛ Inggise ka yɛ.

²⁴ <<Inggise okpayi ungwɔ li ngha otsetɛ mgban ba, hona ongbidɔ li ngha ongyukwo mgban ba.

²⁵ Ni inggise okpayi ungwɔ wa yɛɛ dafi otsetɛ mgban yɔ, i gyo, ni ongbidɔ kpaa wa yɛɛ dafi ongyukwo mgban yɔ, i gyo. Ni otungwudɛ kpaa a kwun gbɛɛ iBɛdzɛbu ma, emidan ma a ka kwu ma sinɛ tsatso!

Ongwu a ka mio

²⁶ <<Nghane ka mio ma ba. Ungwɔ onyi ngwi a kye tukwu se ngwi a ka kye dɛɛ ba dzɛma ba, naadi kye da ngwi a ka nu ma ye ba dzɛma ba.

²⁷ Ungwɔ ngwi ani nya ema mi iyifu ma, gbon mi osa na; ungwɔ ngwi ani di nya ema mi odaada yɔ, dɔke ikyendu gbon tase na.

²⁸ Ka mio ama nka ngwɔ ikpewo kpaa ka yagba ngwɔ oshishe ba na ba. Tatase, mio ongwu nka dzili oshishe bɛyi ikpewo mi udola nani.

²⁹ A li kye ifyilo efa gya mi anini onyi baa? Nghaduu onyi mboma kpaa ka ngwuta ba ese ba sede li mi oweka mgbi Otsema.

³⁰ Alotu mi ikye mgbi ema duu a ye umbwon.

³¹ Nghane ka wimio ba; ema dze yi oyabo ngha ifyilo.

³² <<Ali inggise ngbela ani mi ine inggise yɔ, ani kpaa ka gbelan mi ine Otsani ndze esho nani.

³³ Nghaduu ali inggise nfwa ani mi ine inggise yɔ, ani kpaa ka tangwan mi ine Otsani ndze esho nani.

³⁴ <<Ema tsewe gbɛɛ ani ba owa kye iyu ba esɛɛ? Ani ba yi iyu ba, kpaa li okwusunkli.

³⁵ Ani ba owa kyata
<< <ongyulo yile afo twese yi otsɔn,
ongwongyaa oyile afo twese yi onɔn

owongwe ka kye iga fyi yi onoban

³⁶ engyikyili mgbi inggise ka li mi eto mgban.>

³⁷ <<Ali inggise ngwu otsɔn naadi onɔn kpan itukwu ngha ani yɔ, o mɛ oli ongwafɔ mgbi ani ba; ali inggise ngwu ongwɔn ongyulo naadi ongyaa kpan itukwu ngha ani yɔ, o mɛ oli ongwafɔ mgbi ani ba;

³⁸ ali inggise ndi kye ekwatsi mgban kyɛdɔ ani bayo, o mɛ oli ongwafɔ mgbi ani ba.

³⁹ Ali inggise nfya odulu oshishe mgban to, oshishe na ka byulu lon, inggise ngwu oshishe mgban byulu lon mi ikye ani ma ka tun.

⁴⁰ <<Inggise ngbɛ ema yɔ gbɛ ani, ongwu ndi gbɛ ani gbɛ ongwu ndɔ ani esɔ mani.

⁴¹ Ali inggise ngbɛ oyegbo ikyegbɛɛ o li oyegbo yɔ, ka gbɛ umba mgbi oyegbo, inggise ndi gbɛ inggise nle saan ikyegbɛɛ o le saan yɔ, ka gbɛ umba mgbi inggise nle saan.

⁴² Ma ni inggise kye eni oyuyu mi ibwe kpata kye nu onyi mbi engbɛ ama oshilele ntone ikyegbɛɛ o li ongwafɔ mgbi ani yɔ, n nya ema otsitsi, umba mgban ka yama byulu lon ba duudu.>>

11

IYesu yi iɔn okyɔ iBatisima

¹ Ngwi iYesu ngyelu owo ama ogbyikyon iwyodefa ola nɛ, o dzata imbe na lu le tsungwɔ dile gbɛɛsɔ mi igeli emi iGalalia.

² Dafi iɔn fwo mi obawi ungwɔ ngwi iYesu le kyɔ nɛ, o dɔ engwafɔ mgban esɔ

³ oka byi iYesu gbɛɛ, <<Abu li ongwu nka ba ma naadi ni eyi kye ine byi inggise oka idzidza?>>

⁴ IYesu nu uka gbɛɛ, <<Ye lu ka nya iɔn ungwɔ ngwi ema fwo diye di neni:

⁵ Ama nbine le di, ama ntummya le kyikye, ama ndze yi otsoma, otsoma le ngye loma, ama nkyado le fwo, emi ikwukwɔ le kyɛɛ luba oshishe, a di gbo Esɔ Osuse nya emi adze.

⁶ Imgbasho ka kye mse bɛ ali inggise nfwa ani ba duu ewo mi ikye ungwɔ ngwi ani le kyɔ neni.>>

⁷ Dafi engwafɔ iɔn le lu nɛ, iYesu si wita ogbɔdze mgbi iɔn nya inggise ntona gbɛɛ: <<Li ekyɛ ngwi ema kɛ okwɛsɛ le ka di? Li atakwu ngwi awo le fan maa?

⁸ Ni li ngha ba ma, li ekyɛ ngwi ema tase le ka di? Li inggise nwo angwuto osusee? Ei, ama nwo angwuto osuse to ude emi utɔ ma.

⁹ Nɛ li ekyɛ ngwi ema tase oka di? Li oyegbɔɔ? Eɛn, n nya ema, o nghaangha oyegbo.

¹⁰ Nɛnɛ li ongwu a lo mi ikyen gbɛɛ:

<< <N ka dɔ ongyesɔ

mgbi ani teyi abu,

nka teyi ka mɛ abu ofɛ.>

¹¹ N nya ema otsitsi: Mi idzidze ama ngwu engyaa mba mi esɛ nɛ duu, inggise onyi kpaa shewo ngha iɔn okyɔ iBatisima ba; nghaduu ongwu n yeyikpa mi esuto ongwɔ esho ma, shewo nghan.

¹² Kye mi egbɛ mgbi iɔn okyɔ iBatisima ng-hataa ba oneneni, esuto ongwɔ esho gyadze mi anglama, emi anglama di kye gbelu mi oglijo.

¹³ Ikyesine Oyegbo duu yi Ola mgbi iMose yegbo nghataa ba onɔ mgbi iɔn nani.

¹⁴ Ma ni ema dze yi oweka ogbela yɔ, o li Elaija ongwu nkika ba mani.

¹⁵ Inggise ndze yi adɔ yɔ, no fwo.

¹⁶ <<Li ekyɛ ngwi ani ka kye inggise ongwu onenɛ mba yan? A to dafi engbɛ soto mi ifyidu dile kwu angbeka ela gbɛɛ:

¹⁷ << <Eyi fo oca mi ikye ema kpaa ema shufwe ba,

eyi shashi ibɔ kpaa,

ema tsukwu ba.>

¹⁸ Lubana iɔn ba le gye naadi le wa ba, nɛ a gbɛɛ, <O dze yi onodzi emese.>

¹⁹ Ongwe Inggise ba le gye dile wa, nɛ a gbɛɛ, <Inggise nɛ li inggise okyɔ nggwɔ di fyebye, uka mgbi ama ogbɛ udza ifyɛɛ yi <<emi ali ibwubwe.>> > Kpaa ozoyeye tso to yɛyɛ mi okyɔokyɔ mgban.>>

Ikamba ikye ogalu ama nnoyeye ba

²⁰ Ne iYesu wita ogbodze agya yi ogalu ama ngwi ongwu kyungwo okwulewo angbeka mi efu mani, ikyekye a kyatitukwu ba.

²¹ <<Ahoi ikye abu, iKoradzin! Ahoi ikye abu, iBetsaida! Ni ungwo okwulewo ngwi a kyo mbi abu na ki li mi iTiru yi iSidon ngwi a kyon yo, a ki kyatitukwu gbege gbe ishangli wo ewo di mwa uto tukwu ewo.

²² Kpaa n nya ema Imgbasho ka di iTiru yi iSidon elela nga ema mi egbe ikwo mani.

²³ Ma abu, iKapenahun, a ka kyile abu esho we? Ei, abu ka lu ese mi udola. Ungwo okwulewo ngwi a kyo mbi abu na, ki li mi iSodon yo, kika tila dze nghataa ba ine.

²⁴ Nghaduu n nya ema gbee Imgbasho ka nghao di iSodon elela nga abu mi egbe ikwo mani.>>

Ba mbi ani wa tonya

²⁵ Mi ono na iYesu gbee, <<Ani tse abu, Ot-sani, Otse mgbi esho yi ese, ikyekye abu kye ungwo ntona da ama oyodze yi ama okpayi afe, di kye ma tso engbe ama oshilele.

²⁶ Een, Otso, li nga ngwi abu mina gbee no dze aali.

²⁷ <<Alungwo duu Otsani kye wo ani abo. Inggise onyi kpaa ye Ongwe ba li Otson ta, inggise onyi kpaa di ye Otsongwe ba se li Ongwe ta beyi ama ngwu Ongwe sadu okyon tso ma mani.

²⁸ <<Ba mbi ani na, ema ama ngwu nde ngwi okye di lo ema mani, ta n ka nu ema onya.

²⁹ Kyelu onogblo mgbi ani di kpayi mbi ani na, ikyena ani le dumwo di yile ewo ese mi itukwu, ta ema ka tu onya mi oshishe mgbi ema.

³⁰ Ikyekye onogblo mgbi ani suno ba, okye mgbi ani kpaa le pee.>>

12

Otse mgbi egbe otonyewo

¹ Mi ono na emi iYesu kyikye nye okwo ungwogyowe. Enbwa do engwafon ta a sile wulo ekwu le ngwunu bukwu.

² Ngwi emi iFarasi di ungwone ne, a nyan gbee, <<Dii! Engwafu mgbi abu le kyungwo nli ola ba mi egbe otonyewo.>>

³ IYesu nu ma uka gbee, <<Ema gbo ungwo ngwi uto iDevedi kyo mi ono ngwi ongwu beyi ama nkye yan ngwi enbwa do ma na ye wa lo?

⁴ O ka kaka ozu Imgbasho, kyi kyelu ibredi ongwu a kye nu Imgbasho umba, nli ola gbee se li ama ofife mgbi Imgbasho ta ka gye mani. Kye gye di kye nu ama nkye yan ma duu.

⁵ Naadi ema gbo mi afe mgbi ola gbee mi egbe otonyewo ama ofife mi ozu okwukwo

osunu Imgbasho mi iJerosalin li kyido kpaa ola li kye wuuta ba lo?

⁶ N nya ema ongwu nshewo nga ozu okwukwo osunu Imgbasho mi iJerosalin na dze mmeneni.

⁷ Ni ema ki ye ito elodze ngbee, <N mina elela odiidi, yama li ife ofe-fe ba,> na yo, ema kika ngwo emi emyemye ikwo ba.

⁸ Ikyena Ongwe Inggise li Otse mgbi egbe otonyewo.>>

⁹ IYesu dzita imbe na lu ka kaka ozu okwakye mgbi ama,

¹⁰ ne inggise nwaawaa abo dze imbe nani. Ngwi a le pita itodze okye abo byi efu dulu ongwufabo mbi iYesu ne, a byun gbee, <<Li ola ongyelu inggise ootse mi egbe otonyewoo?>>

¹¹ IYesu nya ma gbee, <<Kini inggise mgbi ema onyi dze yi mmala, ma i gbeese woke ishe mi egbe otonyewo ma, o ka dulun to lo?

¹² Nghane inggise nghao dze yi oyabo nga mmala! Li ola okyo osuse mi egbe otonyewo.>>

¹³ Ta o nya inggise na gbee, <<Na abo mgbi abu.>> Ne o na abo man i yee saan dafi oka nani.

¹⁴ Kpaa emi iFarasi tase le ka tsewe dafi ama ka ngwo iYesu mani.

Ongbido ngwu Imgbasho dulun

¹⁵ Ngwi iYesu difwi ungwone ne, o dzata imbe nani. Ibyi inggise kyedon, o di ngylu ama nto yi ootse duu ootse,

¹⁶ wo ma ola gbee nu ma ka gbodze mgbi ongwu nya inggise onyi ba.

¹⁷ Ungwone li ombwumbwo odze nto ikpewo oyegbo Adzaya mani gbee,

¹⁸ <<Nene li ongbido mgbi ani ngwu ani dulun,

o kpa ani itukwu, n di dze yi atsa yan;

n kye Onodzi mgbi ani woke mbon, o dika gbo otsisi nya ese.

¹⁹ O ka shodze hona feela ba;

inggise onyi kpaa ka fwo ela mgban mi ingofe ba.

²⁰ O ka gbikye engga

nkle ba,

naadi andekwo nle diwu

ma kpaa, o ka myunon ba,

nghataa ngwi o ka nu emyemye fwi to.

²¹ Mi iyi mgban ese duu ka gbewebyi.>>

IYesu beyi iBedzebu

²² Ta a kye inggise ngwu ese don ikye bine di li ikplima ba mbi iYesu, ne iYesu ngylun ootse, man o gbodze ye di.

²³ I kwulu inggise ntona duu ewo, a si gbee, <<Nene ka li Ongwe iDevedi ma hoo?>>

²⁴ Kpaa ngwi emi iFarasi fwo odze ne mata, a si gbee, <<Li mi mfyee mgbi iBedzebu

uto emese ta, ngwi inggise ne lo onodzi emese onya to aali.>>

²⁵ IYesu ye ewodze mgbi ama, ne o gbæ, <<Ali esuto n gha yi ewon ka bulu, ali ogalu hona eto ndi gha yi ewon ka yagba kwudze ba.

²⁶ Ni iSatan lo iSatan onya to, o gha yi ewon. Nghane ka kyonese esuto mgban ka kwudze?

²⁷ Ne ni ani lo onodzi emese to mi mfye mgbi iBedzebu ma, emidema ma, li lo mi ali mfye? Ngyese li ama ka fwo ema ikwo.

²⁸ Kpaa ni ani lo onodzi emese to mi Onodzi mgbi Imgbasho yo, esuto mgbi Imgbasho ba mbi ema sewaani.

²⁹ <<Naadi inggise ka kyosine ka kaka ude inggise enepe gbelun okye gbe, sede o ka bwa inggise enepe na adi baa? Duuse o ka gben okye.

³⁰ <<Ongye ndze yi ani bayo, kye afo twese yi ani. Ongwu ndi gbe ngwikwo yi ani ba le bulu-bulu.

³¹ Nghane n nya ema, alobube yi ito duu, a ka kye to inggise mkpa, kpaa ito ofya Onodzi yo, a ka yama kye to inggise mkpa ba.

³² Ali inggise ngbodze mi ikpewo Ongwe Inggise duu, a ka dzanta yi obube. Kpaa ongwu ngbodze mi ikpewo Onodzi Osaan yo, a ka yama dzanta yi obube ba, mi ono ongwu onene yi ono ongwu iyayi kpaa.

³³ <<Ekwo osuse li wa owawa osuse, ekwo obube di li wa owawa obube. A li difwi ekwo mi owawa mgban.

³⁴ Ema emi ongwe ogidzi ntone, ka kyosine ngwi ema nli ibwubwe ne ka gbodze osuse? Bana ewodze ongwu itukwu li fwi to mi ondu.

³⁵ Inggise osuse li to yi ewodze osuse mi itukwu mgban, inggise obube di li to yi ewodze obube mi itukwu mgban.

³⁶ Nghaduu n le nya ema gbæ ali inggise duu ka nu uka mi ali elodze onbwaa ngwi a gbo ma mi egbe ikwo.

³⁷ Bana mi elodze mgbi abu o ka gye emyemye, mi elodze mgbi abu, a dika ngwo abu ikwo.>>

Ambe mgbi iJona

³⁸ Neta emi iFarasi angbeka yi etsetse mgbi ola nyan gbæ, <<Otsetse, eyi mina odi ambe okwulewo mbi abu.>>

³⁹ O nu uka gbæ, <<Eto imbali yi eto amah li byita ambe okwulewo! Kpaa a ka nun onyi ba sede li ambe mgbi oyegbo iJona ta.

⁴⁰ Dafi iJona nose la ifu mmbweni okwukwo egbe eta na, li nga ngwi Ongwe Inggise ka la mi ikpese egbe eta aali.

⁴¹ Emi iNinive ka kyato mi egbe ikwo yi eto ne di ngwo ma ikwo; ikyesine a k yatitukwu mi eso ogboogbo mgbi iJona,

ma onene ongwu nshewo nga iJona dze mmeneni.

⁴² Apodza ongwu agwudu ka kyato mi egbe ikwo yi eto ne di ngwo ma ikwo; ikyena o tokye imbe ngwi ese dondu owa fwo ozoyeye mgbi iSolomu, ma onene ongwu nshewo nga iSolomu dze mmeneni.

⁴³ <<Ono ngwi onodzi obube to mbi inggise ma, o li le ga mi imbe ongwongwo le pita imbe ngwi o ka tonya, kpaa non ka tu bayo,

⁴⁴ o si li gbæ, <N ka yido lu imbe mgben ogbugbe.> Ni o ye wa to, di ozu na la ayayi, a fyan di kye melu saan yo.

⁴⁵ O ka ye lu ka gbe angbeka ntimbali nga ongwu nghi egyafa, man a ka ba wa soke ele. Nghane odzeedze mgbi inggise na li timbi ngaabo ogbugbe. Li nga nka dze yi eto imbali ne aali.>>

Ono iYesu yi engwunon

⁴⁶ Ngwi iYesu kale gbodze yi ibyi inggise ne, onon yi engwunon kwudze to ese, le mina ogbodze yan. [

⁴⁷ Inggise oka nyan gbæ, <<Onabu yi engwunabu to ese, a mina ogbodze yi abu.>>]*

⁴⁸ IYesu byita gbæ, <<Li eme li onani, di li ele li emi ongwunani?>>

⁴⁹ O tso abo mbi engwafoon si gbæ, <<Li onani yi ongwunani aani.

⁵⁰ Bana ali inggise nkyo mi oweka mgbi Otsani ongwu esho yo, o li ongwunani ongwu ongyulo yi ongyaa beyi onani.>>

13

Utsa mgbi inggise ofwe eto

¹ Mi egbe na kpoo iYesu tase mi ozu dika soke onduuto.

² Ibyi inggise kwuba kwutoke yan ne o kaka ka sise mi ifu uwaa, ta inggise angbeka duu toke agobo.

³ Nghane o gbodze kwuba yi ama mi itaodze gbæ: <<Inggise okwo tase oka fwe eto mgban.

⁴ Dafi o le fwe eto ne, angbeka yangwuta mi ofe, man ingwuno ba wa kyi salu gye.

⁵ Angbeka yangwuta mi imbe akwutse, mi imbe ngwi ekye le kwuba ba. I lumbye vla, ikyekye ekye she mi ele ba.

⁶ Kpaa ngwi ono wa tse ne, ungwogye ntona ndzili, ikyekye a taakpa ba.

⁷ Eto angbeka yangwuta mi ato, ato she yi ama nu ma gbufyo.

⁸ Eto angbeka kpoo di yangwuta mi ekye osuse wa owawa nga ongwu a teyi kya ma akpe ideli, ngwuseta naadi osudiwoyo.

⁹ Inggise ndze yi ado yo, no fwo.>>

¹⁰ Ta engwafu mgban ba mbon wa byita gbæ, <<Kyonese ngwi abu le gbodze yi inggise mi itaodze ngaa?>>

* 12:47 12:47 Ambulu ne dze mi oloolo angbeka ba.

¹¹ IYesu nu uka gbɛɛ, <<Ozoyeye mgbi ungwɔ ama odaada mgbi esuto ongwɔ esho ma, a kye nu ema, kpaa ama yɔ, a kye nu ma ba.

¹² Ali inggise ndzeyan yɔ, a ka mbwon mmbwo o dika dzeyan kpakpa. Kpaa ali inggise ndze yi ungwɔ bayɔ, ogyɛngyɛ ngwi o dzeyan ma kpaa a ka kye gbelu mbon.

¹³ Li ikyengha ngwi ani le gbɔdze yi ama mi itaodze aali,

<<Bana a le di, kpaa a le difwi ba;
a dile fwo kpaa, le gbosa loma ba.

¹⁴ Ungwɔ ntone mbwumbwo odze ngwi oyegbo Adzaya gbo ma yeye gbɛɛ,

<< <Ema kale fwo kpaa ka yama gbosa lo ema ba;

Ema kale di kpaa ema ka yama difwi ba.

¹⁵ Bana itukwu mgbi inggise ntone tiishu, li fyima mfyɛ ofwo mi ado mgbi ama kpaa,

a di kye ine mgbi ama kpaa tukwu.

Bana a ki di mi ine,

di fwo mi ado,

di difwi mi itukwu mgbi ama,

di kyata yɔ,

ani kika ngyelu ma ootse.>

¹⁶ Nghaduu mse dze yi ema ikyekye ine mgbi ema di, ado mgbi ema di fwo.

¹⁷ Bana n nya ema otsitsi, i mina oyegbo kwuba beyi inggise ama osaan odi ungwɔ ama ema di ne, kpaa a di ba, odi nu ma fwo ungwɔ ngwi ema fwo ntone kpaa, a fwo ba.

¹⁸ <<Nghane gadɔ mi ungwɔ ngwi itaodze mgbi inggise ofwe eto ne tso mani:

¹⁹ Mi onɔ ngwi inggise fwo esɔ mgbi esuto ma di difwi bayɔ, olodu li ba wa lafwa ungwɔ ngwi a kye kya mbon mani. Nene li eto ngwi a fwe mi ondoofɛ ma aani.

²⁰ Ongwu ngbɛ eto n yangwuta mi imbe akwutse ma li inggise nfwo elodze na di gban vla yi atsa.

²¹ Kpaa ngwi o dze yi akpa bayɔ, o la mi ongwɔnɔ gwee ta. Ngwi okakewo hona adze ba mi ikye elodze na man, o gbese vla.

²² Ongwu ngbɛ eto ama n yangwuta mi ifu ato ma li inggise nfwo elodze na kpaa okakewo ongwɔ esɛ ne beyi okpagyewo mgbi awuya loka wo elodze na, non wa owawa wuba.

²³ Nghaduu ongwu ngbɛ eto ama n yangwuta mi ekye osuse ma li ongwu nfwo elodze na di difwin. O wa owawa mɛ dafi ideli, ngwuseta naadi akpe osudiwyo mgbi ungwɔ ngwi a kye kya mani.>>

Utsa mgbi eto obube

²⁴ IYesu nya ma utsa oka gbɛɛ, <<Esuto ongwɔ esho dze dafi inggise nkye eto osuse ka kya mi okwɔ mgban.

²⁵ Kpaa mi onɔ ngwi ali inggise duu nuna mata, ongyikyili mgban ba wa kya eto obube mi ifu ekwu, si ye lu.

²⁶ Mi onɔ ngwi ekwu na she dile fwe neta, eto obube ntona kpaa fwe.

²⁷ <<Engbido mgbi otsungwɔ okwɔ na ba mbon wa gbɛɛ, <Ongyukwo, li eto osuse ngwi abu kya mi okwɔ mgbi abu baa? Li mi ole ngwi eto obube ntona kye se ba?>

²⁸ <<O nu uka gbɛɛ, <Li ongyikyili kyungwɔnɛni.>

<<Engbido ntona si byun gbɛɛ, <I mina abu ni eyi ka kyi kwɔlu maa?>

²⁹ <<O gbɛɛ, <Ei, ikyekye ni ema le kwɔ eto obube ntona, ema ka kwɔlu ekwu tablikyi yi ama.

³⁰ Dzata ma duu nu ma she yi ewoma nghataa ba mi onɔ oshe-she. Mi onɔ na se ani ka nya ama oshe eto gbɛɛ, <Teyi kyi gbelu eto obube ntona kyi bwalu mi indinde gbe toola; di kyi gbelu ekwu ntona kwakye gbe wa wo ani ke oba.>>

Utsa inene unkwodzi beyi okwuna

³¹ IYesu di nya ama utsa oka gbɛɛ: <<Esuto ongwɔ esho dze dafi inene unkwodzi ngwi inggise kye kya mi okwɔ mgban.

³² Ngwi le gyɛngyɛ nga ali eto ungwɔ duu ne kpaa, no lumbye yɔ, li she nga ali ekwɔ duu man li yɛ ekwɔ okwukwo, nghane ingwunɔ emi esho li ba wa lude mi abɔn.>>

³³ O di nya ma utsa oka kpɔɔ gbɛɛ: <<Esuto ongwɔ esho dze dafi okwuna ngwi ongyaa kye takye yi ofumbu ngwi ganyan kpatse ele mani.>>

³⁴ IYesu gbo ungwɔ ntone duu nya ibyi inggise mi utsa; ungwɔ onyi ngwi o nya ma mi utsa ba dzema ba.

³⁵ Nghane i mbwumbwo yeye mi ungwɔ ngwi a gbo nye mbi oyegbo gbɛɛ:

<<N ka kwulu ondu mgbi ani gbɔdze mi utsa,

n ka gbo ungwɔ ama nto daada wita kye onɔ ngwi a ta esɛ majo.>>

Osa mi utsa mgbi eto obube

³⁶ Ta o dzata ibyi inggise di lu ifoozu. Engwafɔɔn ba mbon wa gbɛɛ, <<Nu eyi osa mi utsa mgbi eto obube mi okwɔ neni.>>

³⁷ O gbɛɛ, <<Ongwu nkya eto osuse ma li Ongwe Inggise.

³⁸ Okwɔ na li esɛ duu, eto osuse na kwudze mi ikye mgbi emi ongwɛ esuto. Eto obube ntona li engwe mgbi onodzi ibwubwe,

³⁹ ongyikyili ongwu nkya eto ntona ma li olodu. Onɔ oshe-she na li egbe ngwi esɛ ka ngye, ama oshe eto ntona li engyɛso.

⁴⁰ <<Dafi a kwɔlu eto obube ntona gbe toola na, li nga nka dze mi egbe ongwɔ olele aali.

⁴¹ Ongwe Inggise ka do engyeso mgbán esó tase, man a ka wa kyi kwólu alungwó ama nle nu ungwó obube kyo býi ama nle kyungwó ibwubwe duu tase mi esuto mgbán.

⁴² A ka ngwi ma woke amoola, li imbe na ngwi a kale tsukwu diye gyaaba aali.

⁴³ Neta ama osaan ntona ka kwó dafi onó mi esuto mgbí Otsoma. Inggise ndze yi ado yo, no fwo.

Utsa mgbí aludu odaada

⁴⁴ <<Esuto ongwi esho dze dafi aludu da dze okwó. Onó ngwi inggise oka wa tu neta, o yilen kye da si yidó lu yi atsa ka gbelu ungwó mgbán duu gbe gya, kye udza ma ka gyalu okwó nani.

⁴⁵ <<Esuto ongwi esho di dze dafi inggise okyummya le pita itagwude ama osuse mani.

⁴⁶ Ngwi o ka di ongwi ndze yi oyabó kpakpa neta, o lu ka salu ungwó mgbán duu gbe gya yile udza ma ka gyalu itagwude nani.

Utsa mgbí uke

⁴⁷ <<Esuto ongwi esho di dze dafi uke ngwi a kye wo mi uto di kwu ali ito mmbweni duu mani.

⁴⁸ Onó ngwi mmbwé mbwo uke ma, ama otutse li kwon luba ese. Ta a li sise salu mmbwé ama osuse gbe yaoké uya, kpaa ama obube ntona yo, a li gbe ma yangwuta.

⁴⁹ Li ngha nka dze mi onó ngwi ese ka dondu aali. Engyeso ka ba wa ghalu emi imbali mbi emi osaan

⁵⁰ di ngwi ma woke amoola, imbe ngwi ikwu otseetse yi aba ogyeegye ka dze mani.

⁵¹ IYesu byi engwafón gbée, <<Ema difwi ungwó ntone duu wé?

A nu uka gbée, <<Een.>>

⁵² O nya ma gbée, <<Nghane ali otsetse mgbí ola ngwu a tson ungwó mgbí esuto ongwi esho dze dafi otsungwude ngbe ungwó ama ofufe yi ogbugbe mi oba mgbán ba ese mani.>>

A kwu iYesu shanye mi ogalu mgbán

⁵³ Ngwi iYesu tsuutsa ntone ngye né, o dzata imbe nani.

⁵⁴ Ngwi o luba ogalu mgbán né, o wita otso inggise ungwó mi ozu okwakyé mgbí ama, i di kwulu ma ewo. Ta a gbée, <<Li mi ole ngwi inggise né tu ozoyeye yi mfyé ama okwulewo ntone ngha?>>

⁵⁵ <<Nene li ongwe inggise ogbokwo ungwó né lo? Li ongwu onón li iMeri, ngwu emi ongwunón li ijensi yi iJose yi iSaimón býi iJuda né baa?

⁵⁶ Emi ongwunón emi engyaa duu to yi eyi mmene den baa? Nghane li mi ole ngwi inggise né tu ungwó ntone duu nghaa?>>

⁵⁷ Man i kpa ma yan wuba.

Nghaduu iYesu nya ma gbée, <<Oyegbo dze yi mmmwe mi igeli mgbán býi ude mgbán ba.>>

⁵⁸ Ta o kyungwó ama okwulewo kwuba mi imbe na wuba ikyekye a noyeye ba nghao.

14

A dze ijón okyo iBatisima ikye

¹ Mi onó na iHerude uto mgbí emi iGalalia fwo odze mgbí iYesu,

² ta o nya emi ido mgbán gbée, <<Nene li ijón okyo iBatisima mani, o kyato mi ikwu! Li ngha ngwi mfyé okyungwó okwulewo le to mbon aani.>>

³ Lubana iHerude nu ma bwa ijón di bwan adi kyon woke obawi mi ikye mgbí iHerodia, owa ongwunón iFyilipi, ⁴ ikyena ijón teyi nyan gbée, <<Li ola ba onu abu kyon.>>

⁵ iHerude mina ongwó ijón, kpaa o mio ibyi inggise, ikyekye a kyon wuuta dafi oyegbo mani.

⁶ Ngwi egbe oga owé egbe ngwi a mba iHerude kwokyi né, ongwe iHerodia ongwu ongyaa ba wa shufwe nu ma di man i kpa iHerude kpakpa

⁷ ta o zondú ye fa gbée alungwó ngwi ongwongyaa na mina duu ongwu ka kye nun.

⁸ Nghaduu onón tunwo, man o gbée, <<Kye ikye mgbí ijón okyo iBatisima mi akpete wa nu ani mmeneni.>>

⁹ I kaka uto iHerude ewo, kpaa ikyegbée o teyi zondú mi iné ingyoga mgbán né, o woala gbée nu ma kyo ngha

¹⁰ si nu ma ka dzelu ijón ikye mi obawi.

¹¹ A kye ikye ma mi akpete kaka wa nu ongwongyaa nani, o kyi kye ka nu onón.

¹² Engwafó ijón ba wa kye ikwó mgbán ka ndzi. Ta a lu ka nya iYesu.

IYesu nu inggise idubu eda ungwogye

¹³ Ngwi iYesu fwo ungwó nkýo neta, o dzata imbe na kaka uwaa lu imbe ndede ka dze yuon. Ngwi ibyi inggise fwo ungwone né, a to mi ifu igeli mi aféese kyedón.

¹⁴ Ngwi iYesu ka kaka dili ibyi inggise né, elela kyon wo ma, o di ngyelu ma ootse.

¹⁵ Dafi onó dze kwékwé ogbese né, engwafón ba mbon wa gbée, <<Imbe né li ifoshe, onó di gbese wa, nu ibyi inggise ntone ofe nu ma lu, zukwu nu ma lu emi agwude ka gya ewoma ungwogye.>>

¹⁶ IYesu gbée, <<Dze mbiso a ka lu ba. Nu ma ungwogye nu ma gye na.>>

¹⁷ A gbée, <<Eyi dze yi ibredi nghi eda ta yi abatsa efa.>>

¹⁸ O gbée, <<Kye wa nin na.>>

¹⁹ Ta o woala ni ibyi ntona sise mi oshe. O kyelu ibredi eda býi abatsa efa ntona si kyile iné esho, ta Imgbasho angba man

kye mwalu ibredi ntona kye nu engwafɔ mgban, engwafɔn si kye gha ibyi inggise ntonani.

²⁰ Ama duu gye tolo, engwafɔ iYesu di sa ambulu ama nsisi ma mi uya nghi iwyo-defa.

²¹ Mmbwo inggise ama ngye ungwogye ma me dafi engyulo idubu eda hini, a kye engyaa yi engbe wele ba.

IYesu kyikye mi ikye eni

²² Mina neta iYesu nu emi ongwafɔn kaka uwaa teyi ongwu fooye, ikye ni ongwu nu ibyi inggise ntona ofe lu se.

²³ Ngwi o wa nu ibyi inggise ofe nye neta, o tɔke unggwo ongwu yuon oka bibo, ngwi ono wa gbese ne, o dze imbe na yuon,

²⁴ Nghaduu uwaa teyi fyata yi agobo wa, akpeni le ngwin ikyekye awo le fa shaye.

²⁵ Mi ikyegbe ne, iYesu lu le ka tu ma, le kyikye mi ikye eni.

²⁶ Ngwi engwafɔn din le kyikye mi ikye eni ne, i kwulu ma ewo. A gbɛ, <<Li onodzi ikwukwo,>> a si makwo to yi imio.

²⁷ Kpaa iYesu nya ma vla gbɛ: <<Fyum-fye itukwu na! Li ani. Ka mio ba na.>>

²⁸ Ta iPyita si kwun ela gbɛ, <<Otse, ni li abu yo, nya ani nin kyikye mi ikye eni ka tu abu.>>

²⁹ O si gbɛ, <<Ba.>>

Ta iPyita tase mi uwaa, kyikye mi ikye eni le ka tu iYesu.

³⁰ Kpaa ngwi iPyita di awo ne, imio won man o wita osu lu iteeni, o makwo to gbɛ, <<Otse, dulin to!>>

³¹ Mina ta iYesu na abo byun. O gbɛ, <<Abu ndze yi oyeye onuunu gyengye ne, kyone ngwi itukwu dze abu efefa ngha?>>

³² Ngwi a kaka uwaa mata, awo si kwulu.

³³ Ta ama nwoto uwaa na sunun, le gbɛ, <<Otsitsi otsitsi abu li Ongwe Imgbasho.>>

³⁴ Dafi a fooye ne, a kye afo dɔke ikpese iGenesareti.

³⁵ Ngwi emi imbe na difwi iYesu ne, a deso kpatse imbe na duu. Ta inggise gbe emidama ama ndotse duu ba mbon

³⁶ di tekye nun gbɛ no nu emi ootse ntona kye abo gbon ondu angwuto ta, ng-hane ama nkye abo gbon duu, ootse gbosa loma.

15

Osaan beyi okpekpe

¹ Ta emi iFarasi angbeka yi etsetse mgbi ola kye mi iJerusalem ba mbi iYesu wa byin gbɛ,

² <<Kyone ngwi engwafɔ mgbi abu le mbelu aleto ngwi engyukwo tso eyi nghaa? A li sabo duuse gye ungwogye ba!>>

³ IYesu nu uka gbɛ, <<Kyone ngwi ema li mbe ola mgbi Imgbasho mi ikye ungwɔ eto mgbi ema?>>

⁴ Bana Imgbasho gbɛ, <Sunu otsabu yi onabu> ma <Ali inggise nfyia otson yi onon ito yo, o ka kwulu kyeme.>

⁵ Nghaduu ema li gbɛ li ayin ni inggise nya ama omba ma gbɛ, <Gyen aba, n ka yagba tobyi ema ba. Ikyesine n tsekise zondɔ okye ungwɔ ngwi ani kika kye nu ema ma, nu Imgbasho.>

⁶ Mi ito ofe ne ema li gbɛ, dze mbiso ngwi a ka sunu ama omba ma ba. Nghane ema kyi ndelu elodze Imgbasho ikye aleto mgbi ema.

⁷ Ema emi ikpala ntonɛ! Oyegbo Adzaya teyi gbo ayin mi ikpewo ema gbɛ,

⁸ <<Inggise ntonɛ li sunu ani mi ikpondɔ mgbi ama ta, kpaa itukwu mgbi ama yo, dze mbombo yi ani.

⁹ A le sunu ani ayayi; bana otsootso mgbi ama duu kpaa li ola mgbi inggise ta.>>

¹⁰ IYesu kwu ibyi inggise ela ba mbon wa nya ma gbɛ, <<Gado no di gbosa lo ema na.

¹¹ Li ungwɔ nkaka ondu mbi inggise ma li nu otsungwon <tsiidza> ba, kpaa li ungwɔ ntase mi ondu mbon ma, li non <tsiidza> aali.>>

¹² Ta engwafɔn wa byun gbɛ, <<Abu ye dafi itukwu wulu emi iFarasi ntona ngwi a fwo odze ne ma we?>>

¹³ O nu uka gbɛ, <<Ali ekwo ngwi li Otsani ongi esho kye ye ba duu, a ka kye todulu yi akpa.

¹⁴ Dzata ma; a li ama ogbe obine teyi. Kini obine kye obine oka teyi yo, ama duu ka gbese woke ishe.>>

¹⁵ IPyita gbɛ, <<Nu eyi osa mi utsa neni.>>

¹⁶ IYesu byi ma gbɛ, <<Nghataa ba onene kpaa ema difwi odze ne wa lo?

¹⁷ Ema di dafi alungwo nkaka ondu li nye lu ifu a di li kye nyalu ngwuta mi inene ma baa?

¹⁸ Kpaa ungwɔ ama nli to mi ondu ma li kye mi itukwu, di li ungwɔ ntona li nu inggise <tsiidza> aali.

¹⁹ Bana li mi itukwu ngwi ewodze ibwubwe, ongwɔ inggise yi amah okyɔkyɔ yi ine okyeekye yi mmyi yi obwendɛ atsika beyi ito li to aali.

²⁰ Li ungwɔ ntonɛ li nu inggise <tsiidza> aali, kpaa osabo bata gye ungwogye, ka nu inggise <tsiidza> ba dududu.>>

Oyeye onuunu mgbi ongyaa iKana

²¹ Ngwi iYesu dzata imbe na ne, o lu ayese mgbi iTiru yi iSidon.

²² Ta ongyaa iKana ndze ayese na ba mbon wa makwo gbɛ, <<Otse, Ongwe iDevedi, di ani elela! Ese do ongwani ongwu ongyaa ikye she.>>

²³ IYesu gbo elodze onyi ba. Ne engwafoon ba mbon wa tekye yan gbɛɛ, <<Nu ongyaa ne ofe no lu, bana o le makwo kye eyi iyikpa.>>

²⁴ O gbɛɛ, <<A do ani eso mbi mmala mgbi Israi nbyulu ma kyoona.>>

²⁵ Ongyaa ma ba wa kwese mi iyayi mbon, o gbɛɛ, <<Otse, ya ani abo!>>

²⁶ IYesu nu uka gbɛɛ, <<Li ayin okye ungowgye mgbi engwe ngwuta to obwe ba.>>

²⁷ Ongyaa na gbɛɛ, <<Een, Otse, obwe kpaa li gye ambulu ungowgye ama n yangwuta mi adinyatse mgbi otsungwude mani.>>

²⁸ Man iYesu nu uka gbɛɛ, <<Ongyaa, oyeye onuunu mgbi abu shewo! Ungwo ngwi abu mina ma a kyo abu ele wa.>> Ta ewo gbosa lo onngwan ongwu ongyaa na mi oby na yeye.

IYesu byi inggise idubu ene enbwa

²⁹ Ne iYesu dzata imbe na ye lu ekyoo mgbi iGalalia. Ta o toke unggwo ka sise mi ele.

³⁰ Man ibyi inggise kpakpa ba mbon, yi inggise ogbyikyie tukwu ese yi obine yi inggise okwukwu yi ikplima beyi angbeka kwuba, gbe ma wa lakiyayi iYesu; man o ngyelu ma duu ootse.

³¹ I kwulu inggise ntona ewo mi onɔ ngwi a di ikplima le gbodze, inggise okwukwu ye saan yi inggise ogbyikyie tukwu ese le kyikyie beyi obine le dine mani. A si tse Imgbasho mgbi Israi.

³² Nghane iYesu kwu engwafoon ela ba mbon di gbɛɛ, <<Elela kyo ani wo inggise ntoneni; bana a to yi ani me egbe eta waani yi unkonyi ogyeegye ba. N mina owo ma ofe lu yi enbwa ifu ba, adzi nu ma ka kwu anadza mi ofe ba mani.>>

³³ Engwafu mgban nu uka gbɛɛ, <<Li mi ole eyi ka tu ibredi mi ifoshe ne me oby i ibyi inggise ntona enbwa?>>

³⁴ IYesu si byita gbɛɛ, <<Ema dze yi ibredi emine?>>

A gbɛɛ, <<Li nghi egyafa beyi engwe abatsa bwɛɛ.>>

³⁵ O nya ibyi inggise nu ma sise mi ombulu.

³⁶ Ta o kyi kyelu ibredi egyafa yi engwe abatsa ntona, ngwi o ta Imgbasho angba ne, o kye mwalu di kye nu engwafu mgban, man a yilen kye gha ibyi inggise ntonani.

³⁷ Ama duu gye di tolo. Ngwi nye neta, engwafoon kyi gbelu ambulu ama nsisi ma mbwo uya egyafa.

³⁸ Mmbwo inggise ama ngye ungowgye ma li idubu ene, engyaa yi engbe wele ba.

³⁹ Ngwi iYesu wa nu ibyi inggise ofe lu neta, o kaka uwaa lu ayese iMagadan.

16

A mina ambe

¹ Emi iFarasi yi emi iSadusi ba mbi iYesu wa mbadin, a byun gbɛɛ non tso ama ambe onghi esho.

² Nghane iYesu nu uka gbɛɛ, * <<Ni onɔ le gbese ta, ema li gbɛɛ, <Imbe ka kwulu, ikyekye akpesho ma,>

³ mi egbegbe ema li gbɛɛ, <Ine mmbwo ka kya, ikyekye akpesho ma i di yifu.> Ema li yagba ogbo ambe mgbi akpesho, kpaa ema ka yagba difwi ambe mgbi odzeedze onghi onene ba.

⁴ Eto obube yi eto amah li le pita ambe okwulewo, nghaduu a ka nun onyi ba, se li ambe mgbi ifona na ta.>> IYesu si dzata ma lu.

Okwuna mgbi emi iFarasi

yi emi iSadusi

⁵ Ngwi engwafu iYesu foye uto ne, a gblimo okye ibredi byi.

⁶ Ne iYesu nya ma gbɛɛ, <<Gbɛwɛbyi di ngyo ewoma mi okwuna mgbi emi iFarasi yi emi iSadusi na.>>

⁷ A le gbo yi ewoma gbɛɛ, <<Li ikyegbɛɛ eyi kye ibredi onyi kpaa byi ba mani.>>

⁸ Ngwi iYesu ye ewodze mgbi ama ne, o gbɛɛ, <<Ema ngwu oyeye onuunu shanye mbi ema ne, kyonese ema le gbo yi ewema kye gbɛɛ li ikyegbɛɛ ema dze yi ibredi ba?

⁹ Ema difwi walo? Ema we ibredi eda mi ikye inggise idubu eda, yi onghi ema gbe mbwo uya kwuba na lo?

¹⁰ Naadi ibredi nghi egyafa mi ikye inggise idubu ene, yi onghi ema gbe mbwo uya kwuba na lo?

¹¹ Ani le gbodze yi ema mi ikye ibredi ba, i wita sine ngwi ema difwi ba? Kpaa ngyo ewema mi okwuna mgbi emi iFarasi yi emi iSadusi.>>

¹² Ta a difwi gbɛɛ o le nya ama gbɛɛ ni ama ngyo ewoma mi ikye okwuna owo ibredi ba, nghaduu li ikye otsootso mgbi emi iFarasi yi emi iSadusi.

IPyita gbo odzeedze mgbi iYesu

¹³ Dafi iYesu ba ayese mgbi iSisiria iFyilipi ne, o byi engwafoon gbɛɛ, <<Inggise li gbɛɛ Ongwe Inggise li eme?>>

¹⁴ A gbɛɛ, <<Angbeka gbɛɛ o li ifon okyo iBatisima, angbeka yo gbɛɛ o li Elaija, angbeka di gbɛɛ o li iferemia hona onyi mbi ama ogbɛɛ.>>

¹⁵ IYesu byita gbɛɛ, <<Nghane ema ma, ema gbɛɛ ani li eme?>>

* **16:2 16:2** Ololob angbeka emi ababo dze yi ambulu efa yi eta ne ba. † **16:16 16:16** Ngwi li iKrestu mi ondu iGriki nani.

¹⁶ Ne iSaimon iPyita nu uka gbɛɛ, <<Abu li iMedzaya,[†] Ongwɛ Imgbasho oshishe.>>

¹⁷ IYesu nyan gbɛɛ, <<Mse no bɛ abu ewo, iSaimon ongwɛ iJona, bana li inggise nya abu ungwɔnɛ ba, kpaa kye mbi Otsani ongwɛ esho.

¹⁸ Nghane n kwu abu gbɛɛ iPyita,[‡] ma li mi ikye ikwutse nɛ n ka mbɛ okwakye mgbi emi iKrestu mgbi ani, ma onufozu udola ka yagba tukwu ofɛ ba.

¹⁹ N ka gbe ungwɔ okwulu ofɛ esuto ongwɛ esho duu nu abu; alungwɔ ngwi abu kyi bwalu mi esɛ nɛ duu, a ka kye bwalu mi esho, alungwɔ ngwi abu di kye shelu mi esɛ nɛ duu, a ka kye shelu mi esho.>>

²⁰ Ta o kwo engwafɔɔn adɔ gbɛɛ nu ma ka nya inggise onyi gbɛɛ ongwu li iMedzaya ma ba.

IYesu yegbo ikwu ewon

²¹ Mi onɔ na lu iyayi iYesu wita onya engwafɔɔn gbɛɛ li kyeme ngwi ongwu ka kɛ iJerusalem ka gbiiɔ mi ungwɔ kwuba mi abɔ engyukwo emi Israi yi engyukwo ama ofiɛɛ beyi etsetse mgbi ola, a dika ngwɔ ongwu kyeme, nghaduu mi egbe ongwu ta ma ongwu ka kyɛ mi ikwu.

²² Nɛ iPyita kyon lu enggengga ka wita okyɔkyɔ yan gbɛɛ, <<Imgbasho no tukwu ofɛ nani, Otse! Ungwɔnɛ ka yama kyo abu ba!>>

²³ IYesu kyata yɛ nya iPyita gbɛɛ, <<Yɛ iyikpa mbi ani, iSatan! Abu li ungwɔ onu ani esɛ ogboogbo; bana abu kye ungwɔ ama nli mgbi Imgbasho ma wuuta ba, se li mgbi inggise kyoona.>>

²⁴ Ta iYesu nya engwafɔɔn gbɛɛ, <<Kini inggise mina okyedɔ ani yɔ, li kyeme ngwi o ka tangwɛ ewon yɛ kye ekwatsi mgban kyedɔ ani.

²⁵ Lubana ali inggise nmina ona oshishe mgban tɔ yɔ, oshishe mgban ka byulu, kpaa inggise nnu oshishe mgban byulu ikye ani duu ka tun.

²⁶ Ni inggise tu alungwɔ mi esɛ duu kpaa ni oshishe mgban nyanya lon ma, oyabɔ li ekye? Naadi li ekye ngwi inggise ka kye nu gbikye oshishe mgban?

²⁷ Lubana Ongwɛ Inggise ka wa ba mi okwɔkwɔ mgbi Otson yi engyesɔ mgban, nɛ o ka nu ali inggise umba mi okyɔkyɔ mgbi otsungwɔn.

²⁸ N nya ema otsitsi, ema angbeka kwudze mmene ma, nka di ikwu ine ba nghataa wa di Ongwɛ Inggise kye le ba mi esuto mgban.>>

17

Okwɔkwɔ mgbi iYesu

¹ Ngwi i wa nye egbe egyin nɛ, iYesu kyelu iPyita yi iJensi beyi ongunon iJɔn, si teyi ma ofɛ lu ka dɔkɛ ungwɔ oshigbo to efu yuoma.

² Mi imbe na a kyatan mi inai ma. Ine mgban kwɔkwɔ dafi onɔ, angwuto mgban tundze kplodede dafi osa mani.

³ Labolabɔ nɛ iMose beyi Elaija mblegba tu ma, le gbɔdze yi iYesu.

⁴ Nɛ iPyita si nya iYesu gbɛɛ, <<Otse, i tishi ni eyi dze mmeneni. Ni abu gbela yɔ, n ki kle afu ngbi eta, onyi ikye abu, onyi ikye iMose aka ikye Elaija.>>

⁵ Dafi o kale kiyayi yi odze ogbɔɔgbɔ neta, akpa okwɔkwɔ gbiiwulu tukwu ma, ela si tɔ mi akpa na gbɛɛ, <<Nene li Ongwani itukwu-tukwu; i kpa Ani yan saan. Fwon na!>>

⁶ Ngwi engwafɔ mgbi iYesu fwo ungwɔnɛ nɛ, a si lake esɛ kye ine tukwu esɛ, yi imio.

⁷ Neta iYesu si ba wa kye abɔ gbo ma ewo. O nya ma gbɛɛ, <<Kyato, ka wimio ba na.>>

⁸ Ngwi a kyile ine esho nɛ, a yama di inggise onyi wuba se iYesu ta.

⁹ Dafi a tashulu mi ungwɔ le luba esɛ nɛ, iYesu wo ma ola gbɛɛ, <<Ka yama gbɔ ungwɔ ngwi ema di nɛ nya inggise onyi ba, nghataa se ni a wa kyile Ongwɛ Inggise mi ikwu.>>

¹⁰ Engwafɔ mgbi iYesu byun gbɛɛ, <<Kycɔsine ngwi etsetse mgbi ola lile gbɔgbɛ Elaija ka wa ba ababɔ kyeme?>>

¹¹ Man iYesu nu uka gbɛɛ, <<Li otsitsi, Elaija ka ba wa yile alungwɔ mɛ dzeke yeye.

¹² Nghaduu n nya ema, Elaija ba wa, kpaa a yama difwin ba nɛ a kyon alungwɔ ngwi a mina duu. Mi itɔ ofɛ na kpɔɔ Ongwɛ Inggise ka wa gyadze mi abɔ ma.>>

¹³ Ta engwafɔɔn si difwi gbɛɛ li iJɔn okyɔ iBatisima ngwi o le gbɔdze mgban nya ama aali.

Ongwongyulɔ ngwu a dulun onodzi emese

¹⁴ Dafi a yidɔ wa tu ibyi inggise nɛ, ongyulɔ oka ba wa kwokiyayi iYesu.

¹⁵ O nyan gbɛɛ, <<Otse, di ongwani ongwu ongyulɔ nɛ elela. O li dzɛkwulu pɔyipyii mi onɔ ngwi i wa dzesin, o li gye onikyo adze oshewo saan. O li gbese tseke ola hona mi eni alonɔ ngwi i dzesun duu.

¹⁶ N kyon ba mbi engwafɔ mgbi abu, kpaa a yagba ongyelun ootse nɛ ba.>>

¹⁷ Nɛ iYesu gbɛɛ, <<Kpei, etɔ ndze yi oyɛye onuunu ba di dze kpenye-kpenye nɛ! Ka kye onɔ sine ngwi ani ka dze yi ema? Ka kye onɔ sine ngwi ani ka kyungwɔ yi ema? Kye ongwongyulɔ ma ba mbi ani mmeneni!>>

¹⁸ Ta iYesu kyokyo yi onodzi obube nani, man onodzi ma tase mbi ongwongyulɔ nani, mi onɔ na jo ootse mgban ngye.

[†] 16:18 16:18 Iyi iPyita na itan di ikwutse mi ondu iGriki.

¹⁹ Ne engwafu mgbi iYesu si ba mbon fyee wa byun gbæ, <<Kyosinése ngwi eyi yagba lo onodzi obube ne onya to gbæ ba?>>

²⁰ Man iYesu nya ma gbæ, <<Li ikyegbæ ema dze yi oyeye onuunu shanye mani. N nya ema otsitsi, kini ema dze yi oyeye onuunu ndze tsiklimbi dafi inene unkwodzi hini yo, ema ka nya unggwo gbæ, <Kyato mmene lu mbo> ka yagba kyo nga. Nkonyi ka nde ema okyokyo ba.>>

²¹ (Kpaa ito ne li yama to nga ba, sede li mi ibo beyi ondu otukwu-tukwu kpokoko!)*

²² Ngwi a wa kwakye yi ewoma mi iGalalia ne, iYesu nya ma gbæ, <<A ka wa kye Ongwe Inggise wo inggise ke abo.

²³ A ka ngwon, ta mi egbe ongwu ta ma Imgbasho ka kyilen mi ikwu.>> Neta engwafon si yee elela.

Udza IDracama

²⁴ Ngwi iYesu yi engwafon wa kaka iKapenahun ne, ama ogbe udza IDracama† ba mbi iPyita wa byun gbæ, <<Otsetse mgbi ema ne li kpa udza ifyee mgbi ozu okwukwo osunu Imgbasho mi iJerosalin lo?>>

²⁵ O gbæ, <<Een, o li kpa.>> Ngwi iPyita wa kaka ozu neta, iYesu li inggise ongwu ababo ogbodze. O byita gbæ, <<Abu tsewe sine, iSaimon? Li mbi ele ngwi uto emi ese li gbæ udza ifyee, li mbi engwe ma engyulo naadi li mbi inggise angbeka?>>

²⁶ Ne iPyita nu uka gbæ, <<Li mbi inggise angbeka.>> Ta iYesu gbæ, <<Ngyese emi ongwæ ma wele ba.>>

²⁷ <<Nghaduu ni eyi ka foala mgbi ama bayo, lu uto ka ngwi alii. Kye mmbweni ongwu ababo ngwi abu kwu ma; kwulun ondu ta o ka tu iwai awuya. Kyelu kye wa nu ma mi ikye udza ifyee mgbi ani yi abu.>>

18

Ongwu nshewo nga mi esuto ongwu esho

¹ Mi ono na engwafu iYesu ba mbon wa byun gbæ, <<Li emeni shewo nga mi esuto ongwu esho?>>

² Ne iYesu kwu ongwæ ogyengye ela ba wa non dzeke mi idzidze ma.

³ O gbæ, <<N nya ema otsitsi, sede ni ema kyata di yee dafi engbæ ama oshilele bayo, ema ka kaka esuto ongwu esho ba.

⁴ Nghane, ali inggise n yile ewon ese dafi ongwæ ne yo, ka shewo nga mi esuto ongwu esho.

⁵ <<Ali inggise ndi gbæ ongwongbæ dafi ongwu ne mi iyi mgbi ani yo, gbæ ani.

⁶ Kpaa ni inggise onyi nu onyi mbi ama oshilele ntone ngwu noyeye mbi ani ne kyo alobube yo, ka tatase nu ma kye onikyikwo okpinangwo shaan onbukwo kye na ngwuta mi ole ozunubyi mi idzidze ekyoo okwukwo.

⁷ <<Ahoo ikye ese mi ikye unggwo nnu inggise kyo alobube mani! Iti unggwo ntona ka wa dze kyeme-kyeme, nghane ikamba ka wa dze mi ikye inggise ngwu iti unggwo ntona ka kye ikpewon ba mani!

⁸ Ni abo naadi afu mgbi abu nu abu kyungwo obube yo, kye dzelu ngwuta. Ka tatase ni abu kaka oshishe yi mmya otaata hona ogbyikye-gbyikye nga onu abu dze yi abo efa beyi afu efa nu ma kye abu ngwuta woke ola nka gye gyegwu nani.

⁹ Kini iné mgbi abu nu abu kyungwo obube yo, kye todulu ngwuta. Ka tatase ni abu kaka oshishe yi iné onyi nga odze yi iné efa nu ma kye abu ngwuta woke udola.

Utsa mgbi mmala nbyulu

¹⁰ <<Ka di gbæ engbæ ama oshilele ntone li unkaba ba na. Bana n nya ema gbæ engyese mgbi ama mi esho li di iné Otsani ongwu esho alono duu.

¹¹ (Bana Ongwe Inggise ba owa nagbe inggise ama nbyulu mani.)*

¹² <<Ema tsewe sine? Kini inggise dze yi mmala ideli onyi, ma onyi mi efu byulu lu mbeka ma, o ka dzata ngwusene don iwyo diwyegyane ntona mi unggwo lu oka pita onyi nbyulu wooshe na baa?

¹³ Ki non ka kpakyon yo, n nya ema otsitsi, o ka tsatsa kpakpa ikye mmala onyi nbyulu na nga ngwusene don iwyo diwyegyane nbyulu wooshe ba ntonani. ¹⁴ Mi ito ofe ne kpoo Otsema ndze esho dze yi oweka gbæ onyi mbi engbæ ama oshilele ntone nu ma byulu ba.

Ongwunonkyo abu obube

¹⁵ <<Kini ongwunabu kyo abu obube yo, ke ka non difwi obube mgban, mi idzidze ema efa ta. Ki non gado mi elodze mgbi abu yo, abu yilen dze ofe waali.

¹⁶ Nghaduu non yama gbela fwo bayo, kye inggise onyi naadi efa beke yo wafu ke mbon, ikyegbæ nu ma yile odze me mi obwænde mgbi inggise efa hona eta mani.

¹⁷ Ki non fwa ofwo ma yo, nya okwakye mgbi emi iKrestu, non di fwa ofwo okwakye mgbi emi iKrestu kpaa yo, kyo yan dafi abu kika kyo yi inggise ola angwula naadi inggise ogbe udza ifyee mani.

¹⁸ <<N nya ema otsitsi, alungwo ngwi ema kye bwalu mi ese ne duu a teyi kye bwalu mi esho wa, alungwo ngwi ema di

* **17:21 17:21** Ambulu ne dze mi ololo angbeka ba. † **17:24 17:24** IDracama li udza ifyee mgbi ozu okwukwo osunu Imgbasho mi iJerosalin, ngwi ali ongyulo iJuda li kpaa akpe efa mi onova mani. * **18:11 18:11** Ambulu ne dze mi ololo angbeka ba.

kye sheli mi ese ne duu a teyi kye sheli mi esho wa.

¹⁹ <<N di nya ema gbee ni ema efa mi ese bwundu bo ungewo yo, Otsani ndze esho na ka kyo ema ele.

²⁰ Bana imbe ngwi inggise efa naadi eta kwakye mi iyi mgbi ani ma, Ani dze ele yi ama.>>

Utsa mgbi ongbido odi elela ba

²¹ Ta iPyita wa byi iYesu gbee, <<Otse, li akpe emine ngwi ani ka dzata ongwunani ki non kyo ani obube? No li akpe egyafa hinii?>>

²² IYesu nyan gbee, <<N nya abu, akpe egyafa ta ba, kpaa li akpe ngwuseta don iwyo diwyegeyafa.

²³ <<Nghane, esuto ongwi esho dze dafi utu oka nkwo engbido mgbani ama ngbe mkpa mbon ela ba gbee nu ma nya ongwu mmbwo mkpa ngwi a dze yi ongwu efu mani.

²⁴ Dafi o wita okyungwone ne, a kye ongyulo oka ba mbon ndzeyan mkpa me imilion ibiyibi.

²⁵ Ngwi o yagba okpa mkpa na gbe ba ne, ongyukwo na si noola gbee ongwu yi owani yi engbe yi alungwo ngwi o dzeyan tsatsadu ni a gbe ma gya kpa mkpa nani.

²⁶ <<Ongbido na si gbe akwafu kwese tekye nun gbee, <Shitukwu yi ani, n ka wa kpa abu alungwo duu.>

²⁷ Ongyukwo mgbani si din elela. O dzanta yi mkpa nani di non lu.

²⁸ <<Ta ongbido na tase lu ese, o ka kpatse yi odon ongbido oka ndzeyan mkpa me dafi idubu ngwusefa don iwyo sini. O kpaklin kye abo fyan onbukwo gbee, <Kpa ani mkpa ngwi abu dze yi ani efu mani!>

²⁹ <<Ongbido odon na si gbe akwafu kwese di tekye nun gbee, <Shitukwu yi ani, n ka wa yile udza mgbi abu kpa abu.>

³⁰ <<Nghaduu o fwa. O ke ka nu ma bwa ongyulo na woke obawi gbee sede no kpan mkpa.

³¹ Ngwi engbido angbeka di ungewo nkwo ne, i wulu ma ewo saan man a ke ka nya ongyukwo mgbi ama ungewo nkiyayi duu.

³² <<Ta ongyukwo ma kwu ongbido na ela ba mbon nyan gbee, <Abu ongbido ndze yi imbali ne, n dzita abu yi udza ngwi abu dze yi ani ele duu ikyegbee abu tekye nu ani.

³³ Abu kpa ki di odo oka na elela dafi ani di abu na baa?>

³⁴ Ongyukwo na nye yi itingga kyan wo ama odi mi obawi abo gbee nu ma nun adze saan, nghataa se non yile mkpa ngwi o gye na kpa klekle.

³⁵ <<Ne li ngha ngwi Otsani ongwi esho ka kyo yi ali inggise mgbi ema, se ni ema dzita ongwunema yi obube itukwu onyi.>>

19

Eba oghaagha

¹ Ngwi iYesu ngyelu odze ntonde ogboogbo beyi ama ne, o lu dzata iGalalia di kaka mi ayese mgbi ifudia lu oyombo ifodan.

² Ibyi inggise tukwun iyikpa kye, man o ngyelu ma ootse mi imbe nani.

³ Emi iFarasi angbeka ba mbon ikye owa mbadin. A byin gbee, <<Li ola ni ongyulo gheeba yi owani mi ali itodze duu?>>

⁴ IYesu nu uka gbee, <<Ema gbo ye walo? Gbee mi owita-wita ma Atta <ta ongyulo yi ongyaa,>

⁵ di gbee, <Mi itodze ne, ongyulo ka dzita otsan beyi onon ye kwokyi yi owani, ta ama efa ka ye ikpewo onyi.>

⁶ Ne a li efa wuba, kpaa a li onyi. Ikyenghane ungewo ngwi imgbasho kye kwokyi yi eka yo, ni inggise onyi ka yama ghalu ma ba.>>

⁷ A byita gbee, <<Nghama kyosine ngwi iMose woola gbee ongyulo no dze afe ogheeba nu owani di lon onya lu?>>

⁸ IYesu gbee, <<iMose nose nu ema ofe ogheeba yi owema ikyegbee itukwu mgbi ema tiishu. Nghaduu li ngha ngwi i dze mi owita-wita ma ba.

⁹ N nya ema gbee ali inggise n gheeba yi owani, ni li ikye amah ba di kye ongyaa oka yo, kyo amah.>>

¹⁰ Ta engwafon nyan gbee, <<Ni li ngha ungewo dze yi ongyulo yi owani yo, i tatase okye ongyaa ba.>>

¹¹ Nghaduu iYesu gbee, <<Li ali inggise duu ka gbela odze ne ba, kpaa li ama ngwu a kye nu ma mata.

¹² Lubana angbeka li adumongyaa ikyesine li ngha ngwi a mba ma aali; angbeka li inggise kyo ma nu ma ye ngha aali; angbeka di fwa okye ongyaa ikye esuto ongwi esho. Inggise nka gbela yi odze ne yo no gbela.>>

¹³ Neta a gbe engbe ama oshilele ba mbi iYesu gbee no kye abo gbo ma ewo di bibo wo ma. Kpaa engwafon kyokyo yi ama ngbe ma ba mani.

¹⁴ IYesu gbee, <<Nu engbe ama oshilele ofe nu ma ba mbi ani, ka yama kwu ma ba, bana esuto ongwi esho dze ikye ito ntoneni.>>

¹⁵ Ngwi o kye abo gbo ma ewo ne, o lu dzita imbe nani.

Mmafa inggise aludu

¹⁶ Nghane ongyulo oka ka ba mbi iYesu wa byita gbee, <<Otsetse, li alungwo osuse ngwi ani ka kyo kyeme se tu oshishe ogyegwu?>>

¹⁷ IYesu nyan gbee, <<I kyosine ngwi abu byi ani ita ungewo nli osuse? Inggise li Onyi ta nli osuse. Ni abu mina otu oshishe yo, ngyo ola duu.>>

¹⁸ Ongyulo na gbɛɛ, <<Li ole?>>

IYesu gbɛɛ, <<Ka ngwɔ inggise ba, ka kyo amah ba, ka yimi ba, ka kyo obwende atsika ba,

¹⁹ sunu otsabu yi onabu, di di inggise owatse do abu kpa abu itukwu dafi ewabu mani.> >>

²⁰ Ongyulo mmafa na gbɛɛ, <<Ola ntone duu n li ngwo ma. Li ekye sisi ngwi ani ka kyo?>>

²¹ IYesu nyan gbɛɛ, <<Ni abu mina odze nyaan yo, lu ka gbe alungwo ngwi abu dzeayan duu gya kye udza ma nu emi adze, ta o ka dze yi aludu mi esho. Ta o si ye wa kyedo ani.>>

²² Ngwi ongyulo mmafa na fwo ungwone ne, o lu yi mtse obaaba, ikyena o dze yi aludu shewo.

²³ Nghane IYesu nya engwafoon gbɛɛ, <<N nya ema otsitsi, ka fyumfye kpakpa ni inggise udza kaka esuto ongyi esho.

²⁴ N di nya ema, ka fyumfye ba onu ilakwumyi nye to ifeedi nga onu inggise udza kaka esuto mgbi Imgbasho.>>

²⁵ Ngwi engwafon ntone fwo ungwone ne, i kwulu ma ewo kwuba ta a byita gbɛɛ, <<Li eme tsatso ka wato?>>

²⁶ IYesu di ma ine si gbɛɛ, <<Mbi inggise owamye yo ito ungwone ka kyo gbe ba, kpaa yi Imgbasho yo, alungwo duu li kyeme.>>

²⁷ Neman iPyita gbo yan gbɛɛ, <<Eyi dzita alungwo duu kyedo abu! Nghane li ekye ka dze ikye eyi?>>

²⁸ IYesu nya ma gbɛɛ, <<N nya ema otsitsi, ono ngwi Ongwe Inggise ka soke itsuuto mgban okwokwo mi ese ongyi iyayi ma, ema ama nkyedo ani duu ka soke itsuuto iwyodefa, le gbo eto mgbi Israi iwyodefa ikwo.

²⁹ Ali inggise ndi dzata ude hona emi ongwunon ongyulo yi engyaa naadi otson yi onon hona engbe beyi okwo mi ikye ani duu ka tun akpe ideli-ideli, a dika gyokwude oshishe igyegwu.

³⁰ Nghaduu emi ababo kwuba ka yee emi olele, emi olele ma ka yee ababo.

20

Utsa mgbi ama okyido mi okwo

¹ <<Lubana esuto ongyi esho dze dafi otsungwo okwo ntase mi egbegbeegbe oka gbe inggise nu ma wa kyon ido mi okwo awawekwo mgban mani.

² O si gbela okpa ma awuya ngwi a li kpa emi ido mi egbe ololo man nu ma lu okwo mgban ka wita ido.

³ <<Mi obyi egyane ongyi egbegbe o di tase ka di angbeka gbeka to ifyidu le kyo unkonyi ba.

⁴ O nya ma gbɛɛ, <Ema kpaa lu ka kyo ani ido mi okwo na, ta n ka kpa ema awuya ngwi i wogyo okpa mani.>

⁵ Neta a si lu.

<<O di wa tase mi obyi iwyodefa yi obyi ongwu ta dika kyo nga.

⁶ Ba obyi eda ongyi onode, o tase dika di angbeka kpoo to imbe nani. O byi ma gbɛɛ, <Kycsine ngwi ema to mmene kye egbegbe le kyo unkaba?>

⁷ A nu uka gbɛɛ, <<Ikyekye inggise onyi kpaa kye eyi ido ba.>

<<O gbo yi ama gbɛɛ, <Ema kpaa lu ka kyo ani ido mi okwo na.>

⁸ <<Ngwi ono wa gbese ne, otsungwo okwo ma nya inggise nkye ine le byi emi ido mgbi ongwu ma gbɛɛ, <Kwu emi ido ela kpa ma awuya mgbi ama, wita mbi ama ani kye ma ido olele lu mbi emi ababo.>

⁹ <<Ama ngwu a kye ma ido mi obyi eda ma, a kpa ma udza ido mgbi egbe ololo.

¹⁰ Ono ngwi ama a kye ma ido ababo ba owa gbe awuya mgbi ama ne, a tsewe gbɛɛ ama ka nghao gbe. Nghaduu ama kpaa a kpa ma udza ido mgbi egbe ololo.

¹¹ Ngwi a kye gbelu ne, a wita okwu otsungwo okwo ondukwo.

¹² A gbɛɛ, <Inggise ama ngwu a kye ma ido olele ntone kyido obyi onyi ta, ma abu kpa ma ungwonyi yi eyi ngwu tsigege kyido ni ono tse eyi nghataa egbe ololo.>

¹³ <<Nghaduu o nu onyi mi ele uka gbɛɛ, <Ano, ani kyo ema ogye ba. Ema gbela okyido egbe ololo mi udza ngwi a teyi li kpa ma baa?>

¹⁴ Kye awuya mgbi ema lu na. I mina ani okpa inggise ngwu ani kyon ido olele ne udza ungwonyi dafi ani kpa ema neni.

¹⁵ Ani dze yi ofe okyungwo ani mina yi awuya mgbi ani baa? Naadi le wulu ema ewo ikyegbe di ani kyo osuse yi angbeka?>

¹⁶ <<Nghane emi olele ka li ababo, emi ababo dika li olele.>>

IYesu di gbodze ikwu ewon

¹⁷ Ngwi IYesu le ke IJerosalin ne, o gbe engwafon mgban iwyodefa ntona lu enggengga si nya ma gbɛɛ,

¹⁸ <<Eyi le lu iJerosalin, ma a ka kye Ongwe Inggise wo engyukwo ama ofife beyi etsetse mgbi ola abo. A ka ngwon ikwo ikwongye

¹⁹ dika yilon nu emi agwese, a ka nyan agya di gbon onitse ye ngwon mi ekwatsi. Mi egbe ongwu ta ma a ka kyilen mi ikwu!>>

Imina mgbi onongwe

²⁰ Ne owa iDzebedi ba mbi IYesu yi emi ongwon ongyulo, ngwi o gbe akwafon kwese ne, o si mina abo oyaaya mbon.

²¹ IYesu byun gbɛɛ, <<Li ekye ngwi abu mina?>>

O gbɛɛ, <<Zondu yi ani gbɛɛ engwe ani efa ntone, oka ka so abu abugye oka dika so abube mi esuto mgbi abu.>>

²² Nghaduu iYesu nya ma gbɛɛ, <<Ema ye ungwɔ ngwi ema le bo ma ba. Ema ka wa mi ibwe ngwi ani ka wa ma gbɛɛ?>>

A nu uka gbɛɛ, <<Eyi ka wa.>>

²³ IYesu nya ma gbɛɛ, <<Ema ka wa mi ibwe mgbi ani otsisi. Nghaduu oso mi abugye hona abube mgbi ani yo, li ido mgbi ani onu ofe ba. Imbe ntone dze ikye mgbi ama ngwu Otsani me ikye ma mani.>>

²⁴ Ono ngwi iwoyɔ ntona fwo ungwone ne, a kyitingga yi engwuneka efa ntonani.

²⁵ Man iYesu si kwu ma ela kwakye gbɛɛ, <<Ema ye ama ngwu a di gbɛɛ a me ogbe Udzengye teyi li kyo mfye mboma, engyukwo ama oshewo mi idzidze ma li kyo mfye mi ikpewo ma.

²⁶ Dze ngha yi ema ba. Tatase yo, ali inggise nmima oyee angbodzi mi idzidze ema yo, no li ongbido mgbi ema kyeme-kyeme,

²⁷ ali inggise ndi mina oli ababo yo, no li ofyee mgbi ema kyeme-kyeme,

²⁸ dafi Ongwe Inggise kpaa ba gbɛɛ nu ma kyon ido ba, kpaa owa kyo-kyo inggise ido, di kye oshishe mgban nu ikye odulu inggise ibiyibi wato neni.>>

A kwulu obine efa ine

²⁹ Ngwi emi iYesu le dzata iJeriko ne, ijiji inggise kyedon.

³⁰ Inggise ama obine efa soto ondoofe, ngwi a fwo gbɛɛ iYesu le nye ofe na ne, a kweela gbɛɛ, <<Otse, Ongwe iDevedi, di eyi elela!>>

³¹ Ijiji inggise ntona kyokyo yi ama di nya ma gbɛɛ nu ma dede, kpaa a nghao kweela duu gbɛɛ, <<Otse, Ongwe iDevedi, di eyi elela!>>

³² IYesu kwulese di kwu ma ela, si byi ma gbɛɛ, <<Li alungwo mina ema gbɛɛ ni ani kyo ema ele?>>

³³ A nu uka gbɛɛ, <<Otse, i mina eyi odine.>>

³⁴ IYesu si di ma elela man kye abo gbo ma ine. Labolabo mata ine kwulu loma man a kyedon.

21

Okakaakaka onghaangha

¹ Ngwi iYesu yi engwafoon dze kwekwe yi iJerosalin wa kaka iBetifege mi Unggwɔ Olivi ne, iYesu si do engwafoon efa eso,

² nya ma gbɛɛ, <<Ke ogalu ndze ema iyayi nani, ni ema kaka jo ema ka di itaklimyi shadze yi onghan. Kyi shelu ma wa nin na.

³ Kini inggise byi ema ita yo, nyan gbɛɛ odze wo Otse yi ama ta inggise ma ka

byakpa nu ema ofe ni ema kye shelu luba.>>

⁴ Ungwone kiyayi ikye onu elodze ngwi oyegbo gbo ma dondu yeye gbɛɛ:

⁵ <<Gbo nya ogalu mgbi iDzayon gbɛɛ,

<Di utɔ mgbi abu,

nkye le ba mbi abu na,
o le dumɔɔ di kye le ba mi ikye itaklimyi,

mi ikye ongwɛ itaklimyi.>>>

⁶ Engwafɔ ntone ka kyo yeye dafi iYesu do ma eso mani.

⁷ A kye itaklimyi yi ongwɛ itaklimyi ongyulo na ba, gbe angwuto mgbi ama tukwu ma ke ekpo man iYesu dake ele.

⁸ Ibyi inggise kwuba gbe angwuto mgbi ama take ofe, angbeka dze afutse gbe take ofe.

⁹ Ibyi inggise ama nteyin beyi ama nkyan iyikpa gbakwo gbɛɛ,

<<Osana, mbi Ongwe iDevedi!

Mse dze yi ongwu nba

mi iyi mgbi Otse mani!>>>

¹⁰ Ngwi iYesu kaka iJerosalin ne, ogalu tsatsa yee yayaaya, a sile byita gbɛɛ, <<Nene li eme lo?>>

¹¹ Ibyi inggise ntona nu uka gbɛɛ, <<Nene li iYesu, oyegbo nkye iNadzareti mi iGalalia mani.>>

IYesu mi ifoou okwukwo osunu Imgbasho

mi iJerosalin

¹² IYesu kaka ozu okwukwo osunu Imgbasho mi iJerosalin man kye lolu ama okyumya mi imbe na tase. O kyi kyata adinyatse mgbi ama onyine awuya tukwuke ese, beyi itse otunto mgbi ama okye anyama gya.

¹³ O nya ma gbɛɛ, <<Afe lo gbɛɛ, <Ozu mgbi ani ka li ozu ibo,> kpaa ema kye kyata yee imbe mgbi <ama ozoofe.>>>

¹⁴ Emi obine yi ama otumya ba mbon mi ozu okwukwo osunu Imgbasho mi iJerosalin, ta o ngyelu ma ootse.

¹⁵ Kpaa itingga kyo engyukwo ama ofife yi etsetse mgbi ola ngwi a di ungwɔ ama okwulewo ngwi iYesu kyo di fwo engbe tole gbakwo mi ozu okwukwo osunu Imgbasho mi iJerosalin gbɛɛ, <<Osana mbi Ongwe iDevedi mani.>>

¹⁶ A byun gbɛɛ, <<Abu fwo odze ngwi engbe ntone le gbo ne we?>>

IYesu gbɛɛ, <<En, abu teyi gbo imbe ngwi Afe gbɛɛ,

<< <Engbe yi engweyeyi

kale shashi otsetse na lo?>>>

¹⁷ O si dzata ma tase mi ogalu na lu ka la iBetani.

Andundu ngweeni

¹⁸ Mi egbegbeegbe ngwi iYesu ye le luba ogalu neta enbwa don.

¹⁹ O dili andundu mi ondoofe, si ke kwekwe kpaa tu unka mi ele ba sede afe ta. O si gbo yan gbæ, <<Abu ka wa owawa wuba!>> Labolabo mata ekwo na ngweeni.

²⁰ Ngwi engwafon dili ungwone ne, ewo waa loma man a byita gbæ, <<I kyosinase andundu ne ngweeni vla nga?>>

²¹ IYesu nu uka gbæ, <<N le nya ema otsitsi, ni ema noyeye di dze yi itukwu efefa bayo, ema ka kyungwo ngwi a kyo yi ekwo andundu ne ta ba, kpaa ema ka yagba nya unggwo gbæ, <kye ewabu lu ka ngwuta woke ekyoo okwukwo> o dika kyo nga yeye.

²² Alungwo ngwi ema bo mi ibo di noyeye yo, a ka nu ema.>>

A byita odze mi odze

mfye mgbi iYesu

²³ IYesu kaka akangga ozu okwukwo osunu Imgbasho mi ijerosalin, dafi o le tso neman engyukwo ama ofife beyi engyukwo emi Israi ba mbon wa byun gbæ, <<Li mi ali mfye ngwi abu le kyungwone, li eme nu abu mfye ne?>>

²⁴ IYesu gbæ, <<Ani kpaa ka byi ema ita onyi. Ni ema nu ani uka yo, n ka nya ema mfye ngwi ani le kyungwo ntone mani.

²⁵ IBatisima mgbi iJon kye mi ole? Li mi esho mbi Imgbasho naadi li mbi inggise?>>

A kponya yi ewoma mi odze ne si gbæ, <<Kini eyi gbæ, <Li mi esho yo,> o ka byita gbæ, <Nghane kyosine ngwi ema nun oyeye ba?>

²⁶ Kpaa ni eyi gbæ, <Li mbi inggise yo> eyi le pyio inggise, lubana inggise duu gbela gbæ iJon li oyegbo.>>

²⁷ Nghane a si nu iYesu uka gbæ, <<Eyi ye ba.>>

O gbæ, <<Ngyese ani kpaa ka nya ema mfye ngwi ani le kyungwo ntone ba.>>

Utsa engwe nghi efa

²⁸ <<Ema tsewe sine? Ongyulo oka nose dze, o dze yi engwengyulo efa. O ke mbi ongwu ongyukwo ka nyan gbæ, <Ongwani, lu ka kyido ine mi okwo.>

²⁹ <<O fwa gbæ, <N ka ke ba,> nghaduu o wa kyatitukwu ye ke.

³⁰ <<Ne otsoma ye ke mbi ongwani oka na dika nyan nga yeye. O nya otson gbæ, <N gbela, otsani,> kpaa o ke wuba.

³¹ <<Mi idzidze ama efa ntone ma, li ole kyo itukwu otson?>>

A gbæ, <<Ongwu ongyukwo nani.>>

IYesu nya ma gbæ, <<N le nya ema otsitsi, ama ogbe udza ifyee yi owagbai engyaa ka kaka esuto mgbi Imgbasho kise ema.

³² Lubana iJon ba mbi ema owa tso ema ofe mgbi osaan, kpaa ema nun oyeye ba, nghaduu ama ogbe udza ifyee yi owagbai

engyaa ntona nun oyeye. Ngwi ema di ungwu ntone ne kpaa ema yagba kyata noyeye ba.

Utsa mgbi ama ogbiine byi okwo awawekwo

³³ <<Gado mi utsa oka: Otsungwo ikpese oka nose ye ekwo. O loka won, o tishe ogbe eni awawekwo, di ta otila ongyo okwo. O kye okwo ma wo emi okwo angbeka abo si lu agaba.

³⁴ Ngwi ono osheeto wa dze kwekwe ne, o do engbido mgban eso mbi ama ngwu o kye okwo wo ma abo ntona gbæ nu ma ka gbæ owawekwo mgban wa nun.

³⁵ <<Emi okwo ntona kye bwalu engbe ntone; a gbo oka ibe, ngwolu oka, di tse ongwu ta ma ikwutse.

³⁶ Nghane o diye do engbido eso ngaaboo ogbugbe, emi okwo ntona di kyo yi ama nga yeye.

³⁷ O do ongwani abuon eso olele, o gbæ, <a ka nu ongwani mmwe.>

³⁸ <<Nghaduu ngwi emi okwo ntona dili ongwani neta, a gbo yi ewoma gbæ, <Nene li ongwu nka gyokwude ma aani, ba ni i tawon azukwu ni okwude yee mgbi eyi.>

³⁹ A bwan kyon ngwi nye ikyiishi mgbi okwo ekwo na lu ese di ngwon.

⁴⁰ IYesu byi ma gbæ, <<Itso ungwone ma, ni otsungwo okwo na wa ba ma, o ka kyo yi emi okwo ntona sine?>>

⁴¹ A nu uka gbæ, <<O ka dzili emi imbali ntona mi ikwu elela, di yile okwo na wo emi okwo angbeka abo, ama nkale nun awawekwo mgban mi alono osheeto duu mani.>>

⁴² IYesu gbo yi ama gbæ, <<Ema gbo mi Afe ngbæ,

<< <Ikwutse ngwi ama ombe ozu fwan ma li ongwu

ye kwulu ikye ozu mi esho na ye wa lo; Ungwone li ungwu ngwi Otse kyo, ma i kwulewo mi ine mgbi eyi badeen?>

⁴³ <<Nghane n le nya ema gbæ a ka kyi kyelu esuto mgbi Imgbasho mbi ema yilen kye nu inggise ama nka ba yi owawan mani.

⁴⁴ (Inggise ngyeke ikwutse ne ka fwa ambulu-ambulu, kpaa ongwu ikwutse ne gyan yo o ka jiye.>>)*

⁴⁵ Ono ngwi engyukwo ama ofife beyi emi iFarasi fwo utsa mgbi iYesu ne, a yeta gbæ o le gbodze ne ikye mgbi ama.

⁴⁶ A pita ofe ni ama kpaklin, nghaduu a pyio ibyi inggise ntonani, ikyekye inggise noyeye gbæ o li oyegbo.

* 21:44 21:44 Olololo angbeka dze yi ambulu ne na.

22

Utsa oga eba okwokyiikwokyi

¹ IYesu diye gbodze yi ama mi utsa kpoo gbɛɛ:

² <<Esuto mgbi Imgbasho dze dafi uto nwewo oga eba okwokyiikwokyi ikye ongwon ongyulo mani.

³ O do engbido mgban eso mbi ama ngwu a bo ma oga ma gbɛɛ nu ma ba, nghaduu a fwa obaaba.

⁴ <<Ne o diye do engbido angbeka eso kpoo gbɛɛ, <Nya ama ngwu ani bo ma oga ma gbɛɛ ani ngyelu ungwogye okyoo kyoo wa: Mnda mgbi ani ongyulo yi mnda olubu-lubu a ngwo di kye fwalu ma wa, ne alungwo duu dze le fe-fe. Ba oga eba okwokyiikwokyi na.>

⁵ <<Kpaa a nu itukwu mi ele ba di lu ungwɔ ma, oka lu okwo mgban, oka lu mmya mgban.

⁶ Angbeka ama nsisi ma kpali engbido ntona nu ma iso di ngwɔlu ma.

⁷ Uto na si nye yi itingga. O do ogbakwu mgban eso ka dzili ama ongwɔ inggise ntona di kye ma ogalu toala.

⁸ <<Neman o nya engbido mgban gbɛɛ, <Oga eba okwokyiikwokyi ne gyo wa, ama ngwu ani bo ma ma, a me oba ba.

⁹ Lu imbe ngwi ofe gha, ka bo ali inggise ngwu ema tu duu oga neni.>

¹⁰ Ta engbido ntona tase lu emi ingofe ka wulu inggise ngwu ma tu duu, ama osuse yi obube wa yaoke, ozu oga byakpa flengba yi ingyoga.

¹¹ <<Nghaduu ngwi uto ba owa kpadi ingyoga neta, o dili ongyulo oka n wo angwuto oga ba mi ele.

¹² O byita gbɛɛ, <Uka, abu nye ole kaka mmene ngwi abu wo angwuto oga ba?> Ongyulo na byakpa nde wifwe.

¹³ <<Ne uto nya ama ogbe ine byi oga gbɛɛ, <Bwalun abo yi afo, kyon ngwuta lu ese mi iifu, imbe ngwi ikwu otsetse beyi aba ogyeegye ka dze mani.>

¹⁴ <<Lubana a bo inggise kwuba, kpaa li gwee ta ngwi a sadu.>>

Okpa iSidza udza ifyee

¹⁵ Nghane emi iFarasi tase ka tsewe ofe ngwi ama ka non gbo mi elodze ni ama bwan.

¹⁶ A do engwafɔ mgbi ama beyi emidi iHerude eso mbon. A gbɛɛ, <<Otsetse, eyi ye abu li inggise oyeye, abu di li tso ofe mgbi Imgbasho mi otsitsi. Inggise li yagba tu abu wo ba ikyekye i kwokyi abu yi odzeedze mgbi ama ba.

¹⁷ Nya eyi ka, abu di sine? Li ola ni eyi kpa iSidza udza ifyee naadi li ola ba?>>

¹⁸ Nghane iYesu difwi owitukwu mgbi ama obube, ne o gbɛɛ, <<Ema emi ikpala

ntone, kyosine ngwi ema le mina okya ani ukya?

¹⁹ Tso ani iwai awuya ngwi ema li kpa ifyee ele ma na.>> A kye ikobo mgbi ama ba wa tson,

²⁰ O byi ma gbɛɛ, <<Li onodzi beyi olɔɔlo mgbi eme den?>>

²¹ A nu uka gbɛɛ, <<Li mgbi iSidza.>>

O si nya ma gbɛɛ, <<Kye ungwɔ nli mgbi iSidza nu iSidza, di kye ungwɔ mgbi Imgbasho nu Imgbasho.>>

²² Ngwi a fwo odze ne mata ewo fwe loma. Man a dzatan lu imbe oka.

Okye ongyaa mi onɔ okyee mi ikwu

²³ Mi egbe na kpoo, emi iSadusi, ama nli gbɛɛ okyee mi ikwu dzema ba ma, ba mbon yi ita.

²⁴ A gbɛɛ, <<Otsetse, iMose nya eyi gbɛɛ ni ongyulo tu ongwɛ ba ta kwulu yo, ni ongwunon yile owakwade na kyeme-kyeme mban engbe.

²⁵ Engwuno ewoma engyulo nghi egyafa to yi eyi. Ongwu ababo kye ongyaa kpaa kye okwude dze ba man kwulu dzata owan nu ongwɔ fan.

²⁶ Ongwu na beyi ongwɔ ta nghataa lu mbi ongwɔ gyafa duu a tu ongwɛ ba.

²⁷ Mi ongyeengye yo ongyaa na kpaa wa kwulu.

²⁸ Nghane mi onɔ okyee mi ikwu ma, o ka li owa eme yeye mi idzidze ama egyafa na, ngwi ama duu kyon?>>

²⁹ IYesu nu uka gbɛɛ, <<Ema le wende, ikyekye ema ye odze ngwi Afe gbo hona mfyem mgbi Imgbasho ba.

³⁰ Mi onɔ okyee mi ikwu ma, inggise ka kye ongyaa hona kye ongwɛ nu eba ba; a ka to dafi engyeso emi esho mani.

³¹ Kpaa mi odze okyee mi ikwu yo, ema gbo ungwɔ ngwi Imgbasho nya ema ngwi o gbɛɛ,

³² <Ani li Imgbasho ngwu Abraham, Adziki, yi ijeko le sunun mani.> O li Imgbasho mgbi emi ikwukwo ba kpaa mgbi emi oshishe.>>

³³ Ngwi inggise ntona fwo otsootso mgban ne, i kwulu ma ewo.

Ola onghaangha

³⁴ Ngwi emi iFarasi fwo gbɛɛ iYesu gbodze dze emi iSadusi umye ne, a wa kwakye yi ewoma.

³⁵ Onyi mboma, n ye Ola mgbi emi iJuda saan, mbadin yi ita ne gbɛɛ:

³⁶ <<Otsetse, li Ola ole nghaangha mi Ola duu?>>

³⁷ IYesu nu uka gbɛɛ, << <Otse Imgbasho mgbi abu no kpa abu yi eka mgbi abu duu, yi oshishe mgbi abu duu, beyi itukwu mgbi abu duu.>

³⁸ Nene li ola ongwɔ ababo di nghaangha joni.

³⁹ Ongwu fan ndze dafi ongwune yo, inggise nwatse do abu no kpa abu itukwu dafi ewabu mani.

⁴⁰ Ola yi emi Oyegbo duu kye abo byi ola efa ntoneni.>>

IKrestu ma li Ongwe eme

⁴¹ Ngwi emi iFarasi kwakye to mbonyi ne, iYesu byi ma gbɛɛ,

⁴² <<Ema tsewe sine mi odze iMedzaya? O li ongwɛ emɛ?>>

A gbɛɛ, <<O li Ongwɛ iDevedi.>>

⁴³ O gbo nya ma gbɛɛ, <<I wo sine ngwi iDevedi nose le gbɔdze mi Onodzi se kwun gbɛɛ <Otse?> Bana o gbɛɛ,

⁴⁴ << <Otse Imgbasho gbo nya *Otse mgbi ani gbɛɛ:

<<Sɔke abugye mgbi ani nghataa nin wa nu engyikyili mgbi abu,

yɛɛ itse mgbi abu ogbe afo to ele.>> >

⁴⁵ Ni iDevedi kwun di <Otse iMedzaya> wali, kyɔsine ngwi o dika li ongwan?>>

⁴⁶ Inggise onyi yagba dula elodze nun uka gbe ba, wita mi egbe na lu iyayi inggise onyi fya-fya byun ita wuba.

23

Ikamba nghi egyafa

¹ Neta iYesu si nya ibyi inggise ntona beyi engwafɔn gbɛɛ:

² <<Etsetse mgbi ola ntɔnɛ beyi emi iFarasi li sise mi itse mgbi iMose.

³ Nghanɛ ama ka kyɛdo elodze mgbi ama, di kyungwo ngwi a nya ema gbɛɛ ni ema kyɔ duu. Kpaa ka kyɛdo okyɔkyɔ mgbi ama ba na, ikyekye a li kyungwo ngwi ama li gbɔn ma ba.

⁴ A li kwu okye kpakpa do inggise ikye, kpaa ama abuoma li wewo okye ongwufabɔ gbo ele ba.

⁵ <<Alungwo ngwi a kyɔ duu li ikyegbɛɛ ni inggise di ama: A li lo ambulu ibyibyilo woke ongwiiimu kye bwake ebeshu beyi alubo, a di li nu ondu angwuto mgbi ama tunto ikye ni inggise di gbɛɛ di ama le sunu Imgbasho.

⁶ Li kpa ma osɔ imbe mmwɛ mi oga, beyi itse onghaangha mi ozu okwakye mgbi emi iJuda;

⁷ A li mina gbɛɛ a kile ta ama angba kye ifyidu ni a di kwu ama gbɛɛ <Etsetse okwukwo.>

⁸ <<Nghaduu tishi nu ma kwu ema di <Etsetse okwukwo> ba, lubana ema dze yi ongyukwo onyi ta, ema duu li ongwuno ewema.

⁹ Dika kwu inggise onyonyi mi ɛɛ ne di <Otsema> ba, bana ema sulu Otsema Onyi ta, o dze esho.

¹⁰ Li ayin ba nu ma kwu ema gbɛɛ <otsetse,> ikyena ema sulu Otsetse Onyi kyoon, o li iMedzaya.

¹¹ Ongwu nshewo ngha mi idzidze mgbi ema ma ka li ongbido mgbi ema.

¹² Lubana ali inggise nkyile ewon esho yo a ka yilen ese, kpaa inggise n yile ewon ese yo a ka kyilen esho.

¹³ <<Ikamba ikye ema etsetse mgbi ola beyi emi iFarasi, ema emi ikpala ntoneni! Ema tukwu inggise ofe okaka esuto ongyi esho, ema abuema kpaa kaka ba, ama nle fya okaka ma kpaa ema le nu ma ofe okaka ba.

¹⁴ (<<Ahoo ikye ema, etsetse mgbi ola yi emi iFarasi, ema emi ikpala ntoneni! Ema li kyɔ emi owakwade ogye di tso osaan mi ibo obo tunto. Nghanɛ Imgbasho ka kwo ema adɔ kpakpa.>>)*

¹⁵ <<Ahoo ikye ema, etsetse mgbi ola yi emi iFarasi, ema emi ikpala ntoneni! Ema li ga kwo ekyoo okwukwo yi ɛɛ tsatsa ikye otu inggise onyi ongwu nka kyɛdo ema, ni ema wa tun yo, ema di li non yɛ ongbɛ mgbi udola dze ema wo akpe efa.>>

¹⁶ <<Ikamba ikye ema, obine ama ngbe inggise teyi! Ema li gbɛɛ, <Ni inggise fa yi ozu okwukwo osunu Imgbasho yo li itɔdze ba; kpaa ni inggise fa yi abashi mgbi ozu okwukwo osunu Imgbasho yo, o ka kyɔn kyeme-kyeme.

¹⁷ Ema ikwangha obine ntone! Li ole ngha: abashi, naadi ozu okwukwo osunu Imgbasho ngwi nu abashi yɛ saan na?

¹⁸ Ema di li gbɛɛ, <Kini inggise fa mi iwashi yo li itɔdze ba; kpaa ni inggise fa yi umba ndɔdze ele na yo, o ka kyɔn kyeme-kyeme.>

¹⁹ Ema obine ntone! Li ole ngha: umba na, naadi iwashi ngwi nu umba na yɛ saan na?

²⁰ Nghanɛ, inggise nfa yi iwashi yo, o fa yi iwashi beyi alungwo ndɔdze ele duu.

²¹ Inggise ndi fa yi ozu okwukwo osunu Imgbasho yo, o fa mi ele beyi Imgbasho ndze ele na kpaa.

²² Inggise nfa mi esho yo, o fa mi it-suuto mgbi Imgbasho beyi ongwu nsɔdze ele nani.

²³ <<Ahoo ikye ema, etsetse mgbi ola yi emi iFarasi, ema emi ikpala ntoneni! Ema li nu onyi ikye iwyo mi alungwo ama nli nu ungwogye gbungbe duu. Nghaduu ema li kye ola nghao wuuta ma wuuta ba, emyɛmyɛ yi elela odiidi oyeye okyɔkyɔ. Ema ki nghao le kyɔ ama nwuuta ntone duuse angbeka ntonani.

²⁴ Ema obine ama ogbe inggise teyi ntone! Ema li selu imatso mi eni mgbi ema

* 22:44 22:44 Otse ongwu fan ne li iMedzaya.

* 23:14 23:14 Ambulu ne dze mi olɔɔlɔ angbeka ba.

owaawa yangwuta kpaa kye ilakwumyi mbe.

²⁵ <<Ikamba mi ikye ema, etsetse mgbi ola yi emi iFarasi, ema emi ikpala ntonē! Ema li salu ewo inumbē yi inungaa, kpaa mi ifun yɔ li mbwo yi nggwɔ yi ofu.

²⁶ Emi iFarasi ama obine! Teyi kyi salu inumbē yi inungaa mi ifun, ta esaan kpaa ka yee saan.

²⁷ <<Ahoo ikye ema, etsetse mgbi ola yi emi iFarasi, ema emi ikpala ntoneni! Ema dze dafi endzi ngwi a gbon enotse onzundze, ngwi i tishi odiidi mi ese kpaa mi ifun yɔ akpukpu mgbi emi ikwukwɔ li mbweele beyi alungwɔ ama okpekpe duu mani.

²⁸ Mi ito ofe ne kpɔɔ, ema li tso inggise gbēe ema le saan kpaa mi idzidze yɔ, ema mbwo yi oshu yi imbali.

²⁹ <<Ahoo ikye ema, etsetse mgbi ola yi emi iFarasi, ema emi ikpala ntoneni! Ema li mbe endzi mgbi ama ogbēese diye mē endzi mgbi inggise ama osuse ingwida.

³⁰ Ema di gbēe, <Ni ema ki dze mi onɔ mgbi otsikyema tugbe mayɔ, ema kika wo abo mi ikwu mgbi ama ogbēese ba.>

³¹ Nghane ema kyo ewema obwende obube dafi ema gbēe di ema li engwiba mgbi ama nngwɔ ama ogbēese mani.

³² Kiyayi ngyelu ungwɔ ngwi emi ot-sikyema wita nani!

³³ <<Ema ifa! Emi ongwē ogidzi ntonē! Ema ka kysinēse ngwi a ka ngwɔ ema ikwɔ ni ema lu udola ba?

³⁴ Nghane ani le kye ama ogbēese yi ama oyodze beyi etsetse dɛsɔ nu ema. Angbeka mboma ema ka ngwɔ di gbokwo ma; angbeka yɔ ema ka gbo ma onitse mi ozu okwakye mgbi emi ijuda dika lo ma to mi igeli oka lu igeli oka.

³⁵ Ikyenghane, a ka bwa ema mi ikye ikwu mgbi inggise ama osaan ngwu a ngwɔ mi ese ne duu, wita mi ikwu inggise osaan Ebel lu mi ikwu iDzakaria ongwē iBēlekia ngwu ema ngwɔ mi idzidze ozu okwukwo osunu Imgbasho beyi iwashi ofife nani.

³⁶ N nya ema otsitsi, ungwɔnē duu ka dɔ eto ne ikye.

³⁷ <<Ekyi! iJerosalin, iJerosalin, abu nngwɔ ama ogbēese di tse ama ngwu a dɔ ma eso mbi abu akwutse ne, onɔ ke ngwi ani gbili ogbe emi ongwabu kwakye mbonyi dafi onogbi li kwulu engwaan wo asha neni, nghaduu abu gbela ba.

³⁸ Dika, a dzata ozu okwukwo mgbi ema osunu Imgbasho yee okwude waana.

³⁹ Lubana n nya ema, ema ka din wuba se ni ema wa gbēe, <Mse dze yi ongwu nba mi iyi mgbi Otse na se.> >>

24

Ambe mgbi ese ongyeengye

¹ IYesu dzata ozu okwukwo osunu Imgbasho mi iJerosalin le lu imbe oka man engwafɔ mgban gbile tun ikye onyan odze idabo mgbi ozu nani.

² O byi ma gbēe, <<Ema di ozu ntonē duu wɛ? N nya ema otsitsi a ka wa dzata akwutse onyi kpaa dɔ ikye oka ba; a ka bulu ma duu kwutokē ese.>>

³ Dafi iYesu sɔdze unggwɔ Olivi nē, engwafɔn ba mbon fyee, a gbēe, <<Nya eyi, li alono ngwi ungwɔnē ka kyo, ma li alungwɔ ka tso ambe mgbi obaaba mgbi abu yi mgbi ongyeengye ese?>>

⁴ IYesu nu uka gbēe, <<Gbēwebyi saan na, ni inggise wa kpagya ema wo ba.

⁵ Lubana inggise kwuba ka ba mi iyi mgbi ani, le gbēe, <Ani li iMedzaya,> a dika kpagya inggise kwuba wo.

⁶ Ema ka fwo ika yi a gbēe mgbi ika, kpaa ka tsaatsa ewo ba na. Itɔ ungwɔ ntonē ka kyo kyemē, nghaduu ongyeengye ka kye iyayi.

⁷ Eɛe oka ka kyee ika yi ese oka, esuto oka ka kyee ika yi esuto oka. Obyoyanu (enbwa) yi ese osuusu ka dze mi imbe idzidza-dzidza.

⁸ Ungwɔ ntonē duu li owita-wita mgbi iso.

⁹ <<Neta a ka bwa ema lu ka nu ema iso di ngwɔ ema, ese duu ka di ema lanyi mi ikye ani.

¹⁰ Mi onɔ na inggise kwuba ka yeyikpa mi oyeye onuunu ye kye ewoma dakwɔ diye di ewoma lanyi,

¹¹ oyegbo atsika kwuba ka to di kpagya inggise kwuba wo.

¹² Ikyegbēe ali ibwubwe ka wa gbɔfwē nē, okpitukwu mgbi inggise kwuba ka yuyu,

¹³ nghaduu inggise nkwulēse kpoklɔɔ ba ongyeengye yɔ, o ka wato.

¹⁴ Eso Osuse mgbi esuto nē a ka gbon mi ese tsatsa dafi obwende mbi ayese duu mani, taman ongyeengye mgbi ese sika ba.

¹⁵ <<Onɔ ngwi ema di <Ungwɔ Idza> ye wa dze mi ozu okwukwo osunu Imgbasho mi iJerosalin dafi oyegbo iDanie teyi gbo na yɔ, inggise ogbo afe no difwi

¹⁶ nē ama nto mi ijudia duu nu ma tsinya lu unggwɔ.

¹⁷ Ni inggise onyi ndɔdze endoozu mgban tashulu o wa kye unkonyi tase mi ozu ba.

¹⁸ Ni inggise onyi mi okwɔ ka yidɔ ke iyikpa oka gbe angwuto mgban ba.

¹⁹ Egbe ntona ka li egbe obube kpakpa mbi engyaa emi ifu beyi enengwē ama nbyi engwē abo!

²⁰ Bibo na, ni onɔ otsinya mgbi ema na no wa li owa hona egbe otonyewo ba.

²¹ Lubana ono na ka li ono adze yi omani ito ngwi a ta ese inose nghataa ba nene lu iyayi kpaa a di ye waba mani.

²² Ni Imgbasho ki kye mwalu egbe ntona bayo, inggise onyi ki wato ba, kpaa mi ikye ama ngwu a ple sadulu ma ma yo, Imgbasho ka kyi mwalu egbe ntonani.

²³ Mi ono na ni inggise nya abu gbɛɛ, <Dii, iMedzaya dzana!> Hona, <O dzali!> Ka noyeye mi ele ba.

²⁴ Lubana Imedzaya atsika yi oyegbo emi atsika ka wa gbofwe di tso ambe okwukwo yi ungwo ama okwulewo ikye okpagya ama ngwu a sadu ma kpaa wo, ni li kyeme-kyeme yo.

²⁵ Dika, n ple nya ema duuse ni ono ma wa gyo.

²⁶ <<Nghane ni inggise nya ema gbɛɛ, <O to dze imbe okplagada aali,> ka tase ba, hona, <O wodze ifoozu ana,> ka noyeye mi ele ba.

²⁷ Lubana dafi mmbwo li naabo mi onosa ngwi a li di to onode ne, li ngha ngwi obaaba mgbi Ongwe Inggise ka dze aali.

²⁸ Li imbe ngwi ikwo la ma ngwi mmpo li kwakye aali.

²⁹ <<Ni egbe okakewo okwukwo wa nye gwee taman,

<< ono ka yifu,
ofyia kpaa ka fya wuba,
mce ka yangwuta mi esho,
a ka su mfyeme emi esho.>

³⁰ <<Mi ono na ambe mgbi Ongwe Inggise ka to mi esho, man ali ayese mi ese ne duu ka nye yi ikwu. A ka di Ongwe Inggise kye le ba mi akpa emi esho, yi mfyeme beyi okwokwo oshewo.

³¹ O dika do engyeso mgban eso nu ma fo agba okwukwo kweela, a dika gbe emidan ama ngwu a teyi sa ma ma kwakye mi ayese ene ntone duu, mi owita-wita mgbi agya esho oka nghataa lu oka.

³² <<Onene kpayi ozoyeye ne mbi andundu na: Labolabo ngwi abon kyinda ngwi afe to mi ele mata, ema li ye gbɛɛ akyonova dze kwekwe wa.

³³ Nghane, ni ema di ungwo ntone duu, ema li ye gbɛɛ dze kwekwe yi onufozu wa.

³⁴ N nya ema otsitsi, eto ne ka nye waba sede ungwo ntone ka kyo se.

³⁵ Esho yi ese ka nye, kpaa elodze mgbi ani ka yama nye ba.

*Inggise onyi ye egbe hona
obyi ma ba*

³⁶ <<Inggise onyi ye odze egbe hona ono ma ba, engyeso emi esho hona Ongwe kpaa ye ba sede li Imgbasho yuon.

³⁷ Dafi ndze nose mi egbe mgbi iNua mani, li ngha nka dze mi obaaba mgbi Ongwe Inggise kpaa aali.

³⁸ Lubana duuse ni onikyo eni-ayo wa ba yo inggise tole gye ye wa, le kye engyaa dile kye engwe nu eba, nghataa ba egbe ngwi iNua kaka uwaa mani;

³⁹ a yama ye ungwo onyi nka ba ma ese ba nghataa onikyo eni-ayo wa kyi gbelu ma lu. Li ngha nka wa dze mi obaaba mgbi Ongwe Inggise aali.

⁴⁰ Ne inggise efa ka to okwo a ka kyi kyelu onyi lu dzata oka.

⁴¹ Engyaa efa kale kpinangwo mi ikwo, a ka kyi kyelu onyi lu dzata oka.

⁴² <<Nghane ngyo le fe na, lubana ema yama ye egbe ngwi Otse mgbi ema ka ye ma ba.

⁴³ Ungwone no gbosa lo ema; ni otsungwude ki ye ono ngwi emumyi kye le ba mi otu yo, o ki ngyo le fe, o kika gbela nu ma gbobun ozu kaka ba.

⁴⁴ Nghane abu kpaa ka wewo dzeedze kyeme, lubana Ongwe Inggise ka ye mi ono ngwi abu tsewe ba mani.

⁴⁵ <<Li eme tsatso li ongbido oyeye di kwiine? Li ongwu ongyukwo gbe engbido mi ude mgban won abo gbɛɛ no le nu ma ungwoye mi ono yeye mani.

⁴⁶ Ka to tishi lo ongbido na kini ongyukwo mgban ye wa tun le kyo ngha yo.

⁴⁷ N nya ema otsitsi o ka gbe alungwo mgban duu don ubo.

⁴⁸ Kpaa kini ongbido na timbali di nya ewon gbɛɛ, <Ongyukwo mgbi ani ka dze imbe na ono ka she,>

⁴⁹ man wita ogbo engbido emidan ibe, le gye diye wa yi ama ofeybye yo,

⁵⁰ Ongyukwo mgbi ongbido na ka yido mi egbe hona ono ngwi o ye ba mani.

⁵¹ O ka nun adze di kyon woke mbonyi yi emi ikpala, imbe ngwi ikwu otseetse yi aba ogyeegye ka dze mani.

25

Utsa ibidrua iwyo

¹ Mi ono na esuto ongyi esho ka dze dafi ibidrua engwengyaa iwyo ama nkye ipitila mgbi ama ke oka kpatse obongyaa ofufe mani.

² Eda mboma li imbuu eda diye kwiine.

³ Imbuu ntona gbe ipitila mgbi ama byi kpaa engyie yo a byi ba.

⁴ Kpaa ama okwiine ntona gbe ipitila beyi engyie mi ikpokpo byi.

⁵ Obongyaa ofufe mbe ono obaaba kwuba, man a nde sile mwuna.

⁶ <<Mi idzidze otu neta a wita ogbaakwo gbɛɛ, obongyaa ofufe kaka wa! To wa kpatsan na!>

⁷ Neman ibidrua ntona duu kyato una kyile ipitila mgbi ama esho.

⁸ Emi ikwangha ntona nya ama oyodze gbee, <Mwa engyie mgbi ema gwee nu eyi na; di ipitila mgbi eyi le myunu.>

⁹ A gbee, <<Ei, kaba ka me eyi yi ema ba. Tatase ke mbi ama okye engyie gya ka gya mgbi ema na.>

¹⁰ <<Kpaa dafi a kale keeke ofe oka gya engyie neta, obongyaa ofufe si kaka. Ibiidrua ama nwewo ntona si kaka ifun mi imbe oga eba okwokyiikwokyi ma yan. Man a si yile ofe tukwu.

¹¹ <<Ono gwee ta angbeka ntona kpaa yido. A gbee, <Ongyukwo! Ongyukwo!> Kwulu eyi ofe!>

¹² <<Nghaduu o nu uka gbee, <N nya ema otsitsi, ani ye ema ba.>

¹³ <<Nghane ngyo le fe na, ikyena ema ye egbe hona ono ba.

Utsa mgbi iwai awuya

¹⁴ <<Dika dze dafi inggise nle ke agaba, kwu engbido mgban ela gbe okye mgban wo ma abo.

¹⁵ O nu onyi ma igbe efa yi isule iwyo, oka igbe onyi, oka ma o nun isule iwyo, ali inggise duu dafi mmye mgban me mani. Ta o si lu agaba mgban.

¹⁶ Inggise ngbe igbe efa yi isule iwyo ma lu akponyi ka kye mgban fashabo diye tu igbe efa yi isule iwyo mbwoke ele.

¹⁷ Li nga yeye ngwi ongwu ndze yi igbe onyi na kpaa diye tu onyi mbwoke ele aali.

¹⁸ Nghaduu ongwu ngbe isule iwyo na, ngwi o lu ma jo ka tise mi ese kye udza mgbi ongyukwo mgban da mi ele.

¹⁹ Ono wa ke gblagodo ne ongyukwo mgbi engbido ntona ye wa kyo okwakye yi ama mi odze mmya mani.

²⁰ Inggise ngbe igbe efa yi isule iwyo na di kye igbe efa yi isule iwyo mbwoke ele wa gbee, <Ongyukwo, abu nu ani oyeye yi igbe efa yi isule iwyo. Dii, n tu igbe efa yi isule iwyo mbwo ikyen aana.>

²¹ <<Ongyukwo mgban gbo nyan gbee, <N nuu abo, ongbido osuse oyeye! Ngwi abu tso oyeye mi ungwogwee ne; n ka nu abu gbinebyi ani ungwokwuba. Ba wa tsatsa yi ongyukwo mgbi abu!>

²² <<Inggise ngwu o nun igbe onyi na kpaa ba. O gbee, <Ongyukwo, Abu nu ani oyeye yi igbe onyi; dii, n tu onyi mbwoke ele aana.>

²³ <<Ongyukwo mgban nyan gbee, <N nuu abo, ongbido osuse oyeye! Ngwi abu tso oyeye mi ungwogwee ne; n ka nu abu gbinebyi ani ungwokwuba. Ba wa tsatsa yi ongyukwo mgbi abu!>

²⁴ <<Ta inggise ongwu ngbe isule iwyo na ba. O gbee, <Ongyukwo, ani teyi ye dafi abu li inggise ofyumfyie ali mani, abu li she mi imbe ngwi abu kya ba di li gbe ngwikwo mi imbe ngwi abu fwe eto ba mani.

²⁵ Nghane ani mio tase lu ka kye awuya mgbi abu da mi ese. Dii, ungwodzani.>

²⁶ <<Ongyukwo mgban nun uka gbee, <Abu ongbido ntimbali di wo ewewa ne! Ngwi abu ple ye gbee ani li she mi imbe ngwi ani kya ba, di li gbe ngwikwo mi imbe ngwi ani fwe eto ba ne,

²⁷ i tishi se waali, abu ki kye ani udza da mi ozu awuya, ikyegbee nin wa ye yo, n ki dudu udza mgben yi eni owaawa.

²⁸ <<Gbelu isule iwyo na mbon na di yilen nu ongwu ndze yi igbe efa yi isule iwyo nani.

²⁹ Lubana ali inggise nsulun yo a ka mbwon ele, o dika sulun dzii. Ali inggise nsulun bayo, ungwogwi o sulun ma kpaa a ka kyi gbelun ele.

³⁰ Di kye ayayi ongbido na ngwuta lu ese, mi iifu, imbe ngwi ikwu otseetse yi aba ogyeegye ka dze mani.>

Mmala beyi mndo

³¹ Ono ngwi Ongwe Inggise ka ba mi okwokwo mgban yi engyeso duu yan ma, o ka so itsuuto mgban mi okwokwo ongwisho.

³² Ese duu ka kwakye mi iyayi mbon, ta o ka kyi ghalu inggise yi ewoma dafi inggise ongyo ifyungwo li kyi ghalu mmala yi mndo neni.

³³ O ka gbe mmala toke abugye di gbe mndo toke abube.

³⁴ <<Ta uto ka gbo yi ama nto mi abugye ma gbee, <Ba na, ema ngwu Otsani kye mse be ema ewo ntoneni; gyokwude mgbi ema na, esuto ngwi a kyi melu dzeke ikye ema wita mi ono ngwi a ta ese mani.

³⁵ Lubana enbwa do ani ema nin ungwogwi nin gye, ekweni kwin ema di nin ungwogwi nin wa, ani li ingyoga ema di gbe ani,

³⁶ ibiba angwuto kwin ema ten angwuto, ootse den ema gbeka byin, n wo obawi ema di wa kpadi ani.>

³⁷ Ta ama anyaan ka nun uka gbee, <Otse li engga ngwi eyi di abu dze enbwa se byi abu enbwa, hona kwu ekweni di kye ungwogwi nu abu wa?>

³⁸ Li engga ngwi abu li ingyoga se eyi gbe abu, naadi dze ibiba angwuto se to abu angwuto?

³⁹ Li alono ngwi eyi di abu dotse hona wo obawi se ka kpadi abu?

⁴⁰ Uto na ka nu uka gbee, <N nya ema otsitsi, alungwogwi ema kyo yi inggise onyi ama ngwu i nghama ewo mi idzidze emi ongunani ntone yo, li ani ngwu ema kyo yi ani.

⁴¹ Ta o sika nya ama nto mi abube mgban ntona gbee, <Noofe mmene na, ema ama a wo ema ikamba ne, lu ifu ola ngwi a mewo ikye olodu yi engyeso mgban nani.

⁴² Lubana enbwa den kpaa ema nin unkonyi nin gye ba, ekweni kwin kpaa ema nin unkonyi nin wa ba,

⁴³ n li ingyoga kpaa ema ghen ba, ibiba angwuto kwin kpaa i ten angwuto ba, n dotse di wodze obawi kpaa i gbeka byin ba.>

⁴⁴ <<Ama kpaa ka byita gbæ, <Otse, li alono ngwi eyi di enbwa naadi ekweni kwu abu, hona li ingyoga hona dze ibiba angwuto naadi dotse hona wo obawi, se ya abu abu ba?>

⁴⁵ <<O ka nu uka gbæ, <N nya ema otsitsi, ekyekye ngwi ema kyo yi inggise onyi mi idzidze ama ngwu i nnga ma ewo ntone ba duu, li ani ngwu ema kyo yi ani ba aali.

⁴⁶ <<Ta a sika ye atata lu mi ado okwookwo ogyegwu, ngghadu ama onyaan ntona sika kaka oshishe ogyegwu.>>

26

A wibu iYesu

¹ Ngwi iYesu gbodze ntone ngye duu ne, o nya engwafon gbæ,

² <<Dafi ema ye gbæ oga owe owato-wato mgbi emi Israi sisi egbe efa ne, a ka kye Ongwe Inggise wo engyikyili abu nu ma gbokwon ngwon.>>

³ Ne engyukwo ama ofife yi emi obotse mgbi ama kwakye mi ude okwukwo inggise ofife, ngwu iyin di iKayafa mani,

⁴ a si tsæwe obwa iYesu daada lu ka ngwon.

⁵ A gbæ, <<ngghadu no ka li mi ono oga ba, kpakpana inggise ntona ka kyo ablodze.>>

A kye engyie kyi iYesu ikye mi iBetani

⁶ Ngwi iYesu ka dze iBetani mi ude iSaimon inggise otsoma ne,

⁷ ongyaa ba mbon yi ikpokpo alabasta ogbungbe nfyumfyummya kpakpa, wa kye yawon ikye ngwi o kwodze ongongo mi ewo adinyatse.

⁸ Dafi engwafon iYesu di ungwone ne, itingga kyo ma. A byita gbæ, <<Li ali engyie ombeembe nnga?>>

⁹ <<A ki kye engyie ne gya mi mmya okwukwo kye awuya na nu emi adze.>>

¹⁰ Ngwi iYesu ye ungwone ne, o gbo yi ama gbæ, <<Kyon ngwi ema le nu ongyaa ne okakewo? O kyungwo nsunse yi ani.

¹¹ Emi adze ka dze yi ema alono duu, kpaa ani ka dze yi ema alono duu ba.

¹² Ono ngwi o kye engyie ogbungbe ne kyi ani ewo na, o kyon ikye omelu ani ni a wa kye ani ndzi.

¹³ N nya ema otsitsi, ali imbe ngwi a gbo Eso Osuse ne mi ese ololo duu, ungwone ngwi o kyo ne kpaa a ka gbôn, ikye owe odze mgban.>>

Ijuda gbela okye iYesu gya

¹⁴ Ne onyi mbi emi iwiyodefa ntona, ongwu a li kwun di ijuda Iskaroti, ke mbi engyukwo ama ofife

¹⁵ ka byita gbæ, <<Ni ani kyon wo ema abu ma li ekye ngwi ema weka onu ani?>> Neta a kyi gbolu isule osudiwyo kye nun.

¹⁶ Wita mi ono na ijuda le pita ofe ni ongwu kyon wo ma abu.

Ungwogye mgbi Otse ongwile olele

¹⁷ Mi egbe ongwile ababo mgbi oga ibredi ngwi a kye okwuna wele ba ma, emi ongwafon iYesu ba mbon wa byita gbæ, <<Li mi ole ngwi abu mina gbæ ni eyi me abu imbe ni abu wa gye oga owe owato-wato mgbi emi Israi?>>

¹⁸ O nya ma gbæ, <<Ke mbi inggise oka mi ifu ogalu ka nyan gbæ, <Otsetse gbæ: ono ngwi a kye dze ani ma dze kwekwe. N ka ka gye oga owe owato-wato mgbi emi Israi mi ude abu yi engwafon mgbi ani.>>

¹⁹ Nghane engwafon ntona si kyo dafi iYesu tso ma mani man a si wewo oga owe owato-wato mgbi emi Israi.

²⁰ Ngwi ono gbæse ne, iYesu kwo ongongo le gye ungwogye mi adinyatse yi emidan iwiyodefa ntonani.

²¹ Ngwi a le gye ungwogye ne, o gbæ, <<N nya ema otsitsi, onyi mbi ema ka kye ani gya.>>

²² Engwafon si ye elela wita ogbo yan onyonyi gbæ, <<Otse, mi otsitsi li ani ba lo?>>

²³ IYesu nu uka gbæ, <<Li onyi mi idzidze ema nle gye ungwogye yi ani ne ka kye ani gya.

²⁴ Ongwe Inggise ka lu dafi Afe lo ikyon ma yeye. Kpaa ahoo mi ikye inggise nkye Ongwe Inggise gya mani! Tatase a ki mban ba.>>

²⁵ Ne ijuda nka kyon gya ma gbæ, <<Otsetse, mi otsitsi li ani ba lo?>> IYesu nu uka gbæ, <<O gbo wali.>>

²⁶ Ngwi a le gye ungwogye ne, iYesu kyi kyelu ibredi, kye angba nu Imgbasho man kye mwalu, di kye nu engwafon mgban, gbæ, <<Gbæ gye na; nene li ewo mgbi ani.>>

²⁷ Ne o kyi kyelu ibwe yi eneekwu mi ele, kye angba nu Imgbasho di kye nu ma, si gbæ, <<Ema duu, wa na.

²⁸ Nene li eyi mgbi ani mgbi ondu odzædzæ, ngwi a kye kyi ikye okye ali ibwubwe ta ibyi inggise mkpa.

²⁹ N nya ema, wita onene nghataa lu iyayi n ka weni awawa ekwo ne wuba nghataa ba egbe ngwi ani ka wa wan ofufe yi ema mi esuto mgbi Otsani mani.>>

³⁰ Ono ngwi a shashi onyi otse Imgbasho ngye ne, a tase lu unggwo olivi.

IYesu teyi gbo angwe ota-ta mgbi iPyita

³¹ Ta iYesu nya ma gbæ, <<Mi otu inè neni ema duu ka yeyikpa mi ikye odze ani, lubana Afè ló gbæ: <<N ka kwudowo inggise ongyo ifyungwɔ, man ifyungwɔ mmala ka ganya.>

³² Nghaduu onɔ ani wa kyato yɔ, n ka teyi ema lu iGalalia.>>

³³ IPyita nyan gbæ, <<Ni inggise duu yeyikpa mi ikye odze abu kpaa, ani ka ye ba.>>

³⁴ IYesu gbɔ yi iPyita gbæ, <<N nya abu otsitsi, mi otu inè neni, duuse ni ogbigbi teela, abu ka tangwɛ ani akpe eta.>>

³⁵ Nghaduu iPyita biibe gbæ, <<Yeba ni ani ka kwulu yi abu kpaa, n ka tangwe abu ba.>> Man engwafɔ angbeka ntona kpaa gbɔ elodze onyi.

IYesu bibo mi iGesemani

³⁶ IYesu kɛ imbe ngwi a li kwun di iGesemani yi engwafɔ mgban, o si nya ma gbæ, <<Sɔ mmene na, ni ani kɛ mmama ka bibo.>>

³⁷ O kye iPyita yi emi ongwɛ iDzebedi ngbi efa wafɔ yan, o kyelela saan di dze mi okakewo.

³⁸ O nya ma gbæ, <<Ani kyelela she jo kɛ ikwongye kpaa. Dze mmene, di ngwo yi ani na.>>

³⁹ Ngwi o gblekɛ iyayi gwee nɛ, o lake esɛ kye inɛ tukwu esɛ bibo gbæ, <<Otsani, ni li kyemɛ yɔ, kyi kyelu ibwɛ adze nɛ mbi ani. Nghaduu nɔ ka li oweka mgbi ani ba, kpaa oweka mgbi abu nɔ kyɔ.>>

⁴⁰ Nɛ o yidɔ luba mbi engwafɔn si wa di ma le nuna. O byi iPyita gbæ, <<Ema ka yagba ngwo yi ani mi obyi onyi kpaa lo?

⁴¹ <<Ngwo di bibo ikye ni ema ka gbæse mi imbadi ba mani. Onodzi le mina, kpaa ewo yɔ dzatsi.>>

⁴² O diyɛ lu akpe ongwɔ fan ka bibo gbæ, <<Otsani, ni li kyemɛ okyelu ibwɛ adze nɛ ba, sɛ ni ani wan yɔ, owitukwu mgbi abu nɔ kyɔ.>>

⁴³ Ngwi o di ye nɛ, o di tu ma le nuna, ikyekyɛ akwukwɛ mgbi ama sundo.

⁴⁴ Nghane o diyɛ dze ma ta kpɔɔ dika bibo akpe ongwɔ ta, le gbɔ elodze na kpɔɔ.

⁴⁵ O ye ba mbi engwafɔ mgban di gbɔ yi ama gbæ, <<Ema kale nuna dile tonya maa? Dii, obyi ma dze kwekwɛ, ngwi a ka kye Ongwe Inggise wo emi ibwubwe abɔ wa.

⁴⁶ Kyato, i kɛ na! Inggise nkɛ ani gya ma o dze na!>>

A bwa iYesu

⁴⁷ Ngwi o kale gbɔdze nɛ, iJuda, onyi mbi emi iwiyodefa ntona, wa to. Ibyi inggise byi okwusunkli beyi okwuta ama osundo kye

yan kyɛ, ngwi li engyukwo ama ofifɛ beyi emi obɔtsɛ mgbi ama dɔ ma esɔ.

⁴⁸ IJuda nkyon gya na teyi bwondu yi ama gbæ: <<Ongwu ani kye ondu kwon ataka ma li ongyulo ma aali; bwan na.>>

⁴⁹ IJuda kwɔkɛ mbi iYesu akponyi, si gbæ, <<N tangba, Otsetse!>> Man kye ondu kwon ataka.

⁵⁰ IYesu nyan gbæ, <<Oya, kyungwɔ abu ba ikyon mani.>> Ta inggise ntona gbleba, dze iYesu wo bwan.

⁵¹ Labɔlabɔ neta, emidi iYesu onyi kye ngwalu okwusunkli mgban kye kwɔdze ongbidɔ mgbi okwukwo inggise ofifɛ adɔ.

⁵² IYesu nyan gbæ, <<Yile okwusunkli mgbi abu wɔkɛ mbi ikwukwun, ikyesine ama nngwa okwusunkli duu ka kwulu mi okwusunkli.

⁵³ Ema tsewe gbæ ani ka kwu Otsani ela, ta o ka byakpa gbe engyesɔ ngha obyi* engyesɔ iwiyodefa dɛsɔ nu ani lo?

⁵⁴ Nghama ka kyɔsinɛ ngwi Afɛ ngbæ ungwɔnɛ ka kyɔ mi ito ofɛ nɛ kyemɛ na mbwumbwo?>>

⁵⁵ Mi onɔ na iYesu gbɔ yi ibyi inggise ntona gbæ, <<Ani gbe ama onghaadɔ teyi se, ngwi ema kye yi okwusunkli beyi okwuta ama osundo owa bwa anii? Alegbe ani li sɔ akangga ozu okwukwo osunu Imghasho mi iJerosalin le tsungwɔ kpaa ema bwa ani ba.

⁵⁶ Nghaduu ungwɔnɛ kyɔ ikye ni ungwɔ ngwi ama ogbɛsɛ lɔ ma mbwumbwo.>> Neta engwafɔ mgbi iYesu duu dzanta tsinya lu.

IYesu mi inai okwakye

⁵⁷ Ama nbwa iYesu ma kyon kɛ mbi iKayafa, okwukwo inggise ofifɛ, imbe ngwi etsetse mgbi ola beyi engyukwo kwakye mani.

⁵⁸ Nghaduu iPyita kyan iyikpa mbombo, nghataa kaka ifyude okwukwo inggise ofifɛ. O kaka ka sise yi ama ongyoongyo ntona ikye odi ungwɔ nka kiyayi mani.

⁵⁹ Engyukwo ama ofifɛ beyi okwakye duu le pita itɔdɛ atsika ni ama kye abɔ byi ele ngwɔ iYesu.

⁶⁰ Ama okyɔ obwendɛ atsika kwuba tɔ ba esɛ, nghaduu a tu itɔdɛ onyi ba, owa ngye-nyɛ inggise efa tɔ ba

⁶¹ wa gbæ, <<Inggise nɛ gbæ, <Ani ka yagba kyi gbobu ozu okwukwo osunu Imghasho mi iJerosalin di yilen mbe mi egbe eta.> >>

⁶² Nɛ okwukwo inggise ofifɛ kyato di byi iYesu gbæ, <<Abu ka nu uka mi odze ngwi a le gbɔ kwu iyi abu nɛ lo?>>

⁶³ Kpaa iYesu dze shili. Okwukwo inggise ofifɛ na nyan gbæ, <<Ani gbabɔ nu abu mi

* 26:53 26:53 Obi ongyesɔ onyi li engyesɔ idubu egyin.

iyi mgbi Imgbasho ndze oshishe nani: Nya eyi ni abu li iMedzaya, Ongwe Imgbasho ma ya.>>

⁶⁴ IYesu gbɛɛ, <<Ɛɛn, dafi abu gbɔ mani. Kpaa n nya ema duu gbɛɛ naa: Mi iyayi ema ka di Ongwe Inggise sɔdze abugye mgbi Ongwu nngha yi mfye kye akpa mi esho.>>

⁶⁵ Neta okwukwo inggise ofife na si fawa ewon angwuto di gbɛɛ, <<O fya Imgbasho ito! Kyosine ngwi eyi dika mina obwende angbeka? Dika, onene ema fwo ito neni.

⁶⁶ Ema tsewe sine?>> A gbɛɛ, <<O me ondu ikwongye.

⁶⁷ Neta a kyanggwo kyin ine di gbon. Angbeka tan afe

⁶⁸ di gbɛɛ, <<Yegbo nya eyi ka, abu iKrestu. Li eme kwudowo abu okwuta?>>

IPyita tangwe iYesu

⁶⁹ Mi onɔ na iPyita sɔdze ifyude uto, man ongwongyiido ba mbon. O gbɛɛ, <<Abu kpaa li onyi mbi ama nkye yi iYesu onggi iGalalia.>>

⁷⁰ Kpaa iPyita tangwe mi inai ma duu. O gbɛɛ, <<Ani ye odze ngwi abu le gbɔ na ba.>>

⁷¹ Ne o tase lu onufoka, imbe ngwi ongwongyaa oka din di nya inggise ama nto mmana ma gbɛɛ, <<Inggise ne dze yi iYesu onggi iNadzareti.>>

⁷² O di tangwe, yi ofaafa gbɛɛ: <<Ani ye inggise na ba!>>

⁷³ I kye onɔ bwee ne, ama nto mmana ma ke mbi iPyita ka gbɛɛ, <<Mi otsitsi abu li onyi mboma, ikyesine ela mgbi abu mi ikye kye abu gya.>>

⁷⁴ Ta o si wita owo ewon ikamba di fa gbɛɛ, <<Ani ye inggise na ba!>> Labolabo mata ogbigbi si teela.

⁷⁵ Man iPyita we elodze ngwi iYesu teyi gbɔ yan mani gbɛɛ: <<Duuse ni ogbigbi teela, abu ka tangwe ani akpe eta.>> Ta o tase ka tsukwu kpakpa.

27

IJuda kye ewon widɔkwo

¹ Mi egbegbe byibyibi, engyukwo ama ofife mgbi Imgbasho beyi engyukwo emi ese na duu bwalu ondu okyi ngwolu iYesu.

² A bwan adi, kyon lu ka nu mi abo mgbi iPlatu, iGona mani.

³ Mi onɔ ngwi iJuda, ongwu nkyon gya na, di gbɛɛ iYesu le lu ondu ikwu ne, itukwu mgban kyata man o yile isule osudiwo na lu ka nu engyukwo ama ofife beyi engyukwo mgbi emi iJuda.

⁴ O gbɛɛ, <<Ani kyungwo obube, dafi ani kye inggise nkyo obube ye ba gya mani.>>

A nun uka gbɛɛ, <<Mgbi eyi dikye? Nana li okakewo mgbi abu,>>

⁵ Nghane iJuda kye udza na fwe toma ke ozu okwukwo osunu Imgbasho mi iJerosalin man lu. Ta o si lu ka kye ewon widɔkwo.

⁶ Engyukwo ama ofife mgbi Imgbasho kye salu isule ntonani si gbɛɛ, <<Li ola ba okye udza ne woke imu mgbi eyi, bana li udza eyi.>>

⁷ Nghane a gbela okye udza na gya ikpese yi inggise ombɛ ishe no li imbe ogbe ingyoga ndzi mi ele.

⁸ Li ikyengha ngwi a li kwu imbe na gbɛɛ ikpese mgbi eyi nghataa ba ine aani.

⁹ Ta odze ngwi Oyegbo iJeremia gbɔ ma mbwumbwo gbɛɛ: <<A kyi salu isule osudiwo ntonani, mmya ngwi emi Israi gbela kpa mi ikye iYesu mani,

¹⁰ man a kye udza ma gya ikpese yi inggise ombɛ ishe, dafi Otse Imgbasho teyi wo ani ola mani.>>

IPlatu byi iYesu ita

¹¹ Mi onɔ na iYesu kwudze iyayi iGona, iGona si byun gbɛɛ, <<Abu li uto mgbi emi iJudaa?>> IYesu nyan gbɛɛ, <<Dafi abu gbɔ mani.>>

¹² Onɔ ngwi engyukwo ama ofife mgbi Imgbasho beyi engyukwo mgbi emi iJuda maayi ban ne, o kwondu onyi ba.

¹³ Ne iPlatu byun gbɛɛ, <<Abu fwo obwende ngwi a gbe ba mi ikye abu ne lo?>>

¹⁴ Kpaa iYesu kwondu ba, di nu uka mi itɔdze onyi kpaa ba, i kwulu iGona ewo kpakpa.

¹⁵ Onɔ ne i teyi li aletɔ mgbi iGona mi onɔ oga owe owato-wato mgbi emi Israi, odulu inggise onyi mi obawi ongwu emi Israi gbela won mani.

¹⁶ Mi onɔ na a dze yi ibwubwe inggise oka mi obawi, iyin di iBaraba.

¹⁷ Dafi emi Israi kwakye duu neta, iPlatu byi ma gbɛɛ, <<Li eme ngwu ema mina gbɛɛ ni ani dula nu ema; li iBaraba naadi iYesu ngwu a li kwun di iMedzaya na?>>

¹⁸ Lubana o ye dafi li mi ikanyi ngwi a kye iYesu ba mbi ongwu mani.

¹⁹ Dafi iPlatu ka sɔdze itse ogbiikwo ne, owan deso ne gbɛɛ, <<Ka dze yi unkonyi okyo yi inggise ndze yi obube ba ne ba, lubana ani gyadze kwuba ine mi elela mi ikye mgban.>>

²⁰ Nghaduu engyukwo ama ofife beyi engyukwo mgbi emi iJuda tu ibyi inggise ntona wo gbɛɛ nu ma bo iBaraba kpaa iYesu yo nu ma ka ngwon.

²¹ iGona byi ma gbɛɛ, <<Li eme mi idzidze inggise efa ntone ngwi ema mina gbɛɛ ni ani dula nu ema?>>

A wulu gbɛɛ, <<IBaraba.>>

²² IPlatu byi ma gbɛɛ, <<Nghanɛ nin kyosine yi iYesu ngwu a li kwun di iMedzaya nɛ?>>

Ama duu wulu gbɛɛ, <<Gbokwon mi ekwatsi.>>

²³ IPlatu byita gbɛɛ, <<dikye? Li alungwo obube ngwi o kyo?>>

Kpaa a nghao feela okwukwo gbɛɛ, <<Gbokwon mi ekwatsi.>>

²⁴ Ngwi iPlatu di gbɛɛ odzɛ mgbi ongwu le kaka ma adɔ ba, eye kpaa dile fya okyɛɛ nɛ, o mweni di sabo mi inai ma. O gbɛɛ, <<Ani dze yi obube mi eyi mgbi inggise nɛ ba, li idɔ mgbi ema!>>

²⁵ Inggise ntona duu nu uka gbɛɛ, <<Ni eyi mgban dikye eyi yi engwɛ eyi duu!>>

²⁶ Ta o dulu iBaraba nu ma: Kpaa iYesu yo, o nu ma gbon onitse ngyɛ taman, kyon wo ma abɔ gbɛɛ nu ma ka gbokwon mi ekwatsi.

Eblakwutse nya iYesu agya

²⁷ Ta ama oblakwutse mgbi iGɔna na kye iYesu lu agya oka mi ifyude utɔ di gbe obyɛ oblakwutse duu kpakeke won.

²⁸ A dulun angwuto di gbe awulu omuma jaan won ewo,

²⁹ diye fulu akata mi ato tukwun ikye. A di kye okwuta won kɛ abugye, yɛ kwɛsɛ mi iyayi mgban nyan agya gbɛɛ, <<Eyi ta abu angba, utɔ mgbi emi ijuda!>>

³⁰ A kyanggwo kyin, di kye gbelu okwuta na mi abɔ mgban yilen gbon mi ikye dudo-dudo.

³¹ Ngwi a nyan addi ngyɛ nɛ, a kye dulun awulu na mi ewo yɛ gbe angwuto mgban won. Man a tawon lu oka gbokwon mi ekwatsi ngwon.

A gbokwo iYesu mi ekwatsi

³² Dafi a le tase nɛ, a kpatɛ ongyulo ongwɛ iSirini, iyin di iSaimon, neman a siin gbɛɛ non kye ekwatsi nani.

³³ A wa kaka imbe ngwi a li kwun gbɛɛ iGogota (Ngwi itan di idingbo nani.)

³⁴ Mi imbe na a kye eneekwɔ ngwi a kye takye yi mɛɛ nu iYesu gbɛɛ non wa, kpaa ngwi o mbadi nɛ, o fwa owan.

³⁵ Ngwi a gbokwon mi ekwatsi nyɛ nɛ, a kye ghalu angwuto mgban mi efa og-boogbo.

³⁶ Man a sɔke, le ngyon mmanani.

³⁷ Mi onye ikye mgban kɛ esho gwee, a kye itɔdze ngwi a kye won ewo ma kyɛ lɔlu beke ele gbɛɛ: NENE LI IYESU, UTɔ MGBI EMI IJUDA.

³⁸ Emunyi ama ofofɛ nghi efa kpaa a gbokwo ma yan, onyi mi abugye mgban yi oka mi abubɛ mgban.

³⁹ Ama nnye kwɛkwɛ gbe ito tukwun ewo, dile ngwi ikye,

⁴⁰ yɛ le gbɛɛ, <<Abu nka gbobu ozu okwukwo osunu Imgbasho mi iJerusalem di

yilen mbe mi egbe eta ta nɛ, dulu ewabu tɔ! Tashulu mi ekwatsi, kini abu li Ongwɛ Imgbasho yo!>>

⁴¹ Li ito ofɛ nɛ kpɔɔ ngwi engyukwo mgbi ama ofɛɛ mgbi Imgbasho yi etsetse mgbi ola mgbi iMose beyi engyukwo mgbi emi ijuda mwibwa nyan aali.

⁴² A gbɛɛ, <<O dulu angbeka tɔ kpaa o yagba dulu ewon ba! Non li utɔ mgbi emi Israi yo! Non tashulu mi ekwatsi, ta eyi ka nun oyeyɛ.

⁴³ O nu Imgbasho oyeyɛ. Ni Imgbasho dulun oneneni ki non kpan itukwu yo, lubana o gbɛɛ <Ani li Ongwɛ Imgbasho.>>

⁴⁴ Li ito ofɛ nɛ kpɔɔ ngwi emunyi ama ngwu a gbokwo ma yan mi ekwatsi ntona kpaa yawon ito aali.

Ikwi iYesu

⁴⁵ I wita mi obyɛ iwyodefa nghataa ba obyɛ eta ongwɛ onɔde imbe yifu kpatɛ ese duu.

⁴⁶ Dafi obyɛ eta hini iYesu makwɔ tase mi ela okwukwo gbɛɛ, <<Elio, Elio, lama sabatani?>> -Itan gbɛɛ, <<Imgbasho mgbi ani, Imgbasho mgbi ani, kyɔnɛ ngwi abu dzani ta?>>

⁴⁷ Onɔ ngwi angbeka nkwardzɛ mmana fwo akwɔ nɛ ma a gbɛɛ, <<O le kwu Elaija ela.>>

⁴⁸ Labɔlabɔ mata onyi mi idzidzɛ mgbi ama tsinya ka kye isoso. O kye tswokɛ eneekwɔ onunɔ, kye bwake anggekwo, di kye nu iYesu gbɛɛ non wa.

⁴⁹ Kpaa inggise ama nsisi duu gbɛɛ, <<Kwulesɛ na, ni eyi di kana Elaija kyema ka wa dulun tɔ.>>

⁵⁰ Ngwi iYesu diye makwɔ tɔ mi ela okwukwo neman, o si yulu.

⁵¹ Mi onɔ na mata angwuto ntsɛdze ozu okwukwo osunu Imgbasho mi iJerusalem na gbua efa wita kye esho nghataa to esɛ. Ikpesɛ suusu man unggwo kadzɛ.

⁵² Endzi gbeka kwulu lake asisa man ikpewo mgbi inggise ama osaan nteyi kwulu ma a kyile ma yɛɛ oshishe.

⁵³ A tase mi endzi, ngwi iYesu kyɛɛ mi ikwu nyɛ duu nɛ, a lu kaka ogalu osaan nani di tsetu inggise ibyibi.

⁵⁴ Dafi okwukwo ogbakwu beyi ama nto yan le ngyo iYesu di esɛ osuusu beyi ungwɔ ama nkɔ duu nɛ, i kwulu ma ewo, a diye gbɔ to gbɛɛ, <<Otsitsi o li Ongwɛ Imgbasho!>>

⁵⁵ Engyaa kwuba to imbe na, le di kɛ mbotunto. A kyedɔ iYesu kye iGalalia ikye oyan abɔ mi imina mgban.

⁵⁶ Mi idzidzɛ mgbi ama li iMeri iMagidalin, iMeri onɔ ijensi yi ijose, beyi owa iDzebedi.

A ndzi iYesu

⁵⁷ Dafi onɔ le gbɛsɛ nɛ, inggise aludu oka mi Arimatia, iyin di iJose, o teyi kye ewon yɛɛ ongwafɔ mgbi iYesu.

⁵⁸ O kɛ mbi iPlatu ka bɔn ikwɔ mgbi iYesu, man iPlatu nondu gbɛɛ nu ma kye nun.

⁵⁹ IJose kye lu ikwɔ nani, kye angwuto ofufe ndiwon,

⁶⁰ kye ka ndzi mi endzi mgbi ongwu ofufe ngwi o cɛfo mi unggwɔ. O mulu ikwutse okwukwo kye tukwukɛ ondendzi si di ofan nyɛ.

⁶¹ iMeri iMagidalin yi iMeri oka na sɔto fashi inɛ tse endzi nani.

Inggise ongyo endzi

⁶² Tegblifan ma, li egbe otonyewo, engyukwo mgbi ama ofife mgbi Imgbasho beyi emi iFarasi kɛ mbi iPlatu.

⁶³ A gbɛɛ, <<Ongyukwo eyi wɛ gbɛɛ onɔ ngwi inggise ogbatsika na ka dze oshishe ma, o gbɛɛ, <Ni i wa nyɛ egbe eta ani ka kyeɛ mi ikwu.>

⁶⁴ Nghane noola ikye nu ma ngyo endzi na saan nghataa ba egbe eta nani. Bana, emi ongwafɔɔn ka wa kye yili ikwɔ na diye nya ibyi inggise gbɛɛ o kyeɛ mi ikwu. Okpagyewo ongwɔ olele nɛ ka wa timbi ngha ongwɔ ababɔ.>>

⁶⁵ iPlatu nya ma gbɛɛ, <<Kye ama ongyoongyo na, lu, ka ngyo endzi na dafi ema yagba mani.>>

⁶⁶ Nghane a lu ka kye kwobɛ ondendzi na mi ikwutse nani di gbe ama ongyoongyo le ngyo.

28

Okyeɛ-kyeɛ mi ikwu

¹ Ngwi egbe otonyido wa nyɛ nɛ, mi egbe otutu mi egbe iladi, iMeri iMagidalin yi iMeri oka na kɛ oka di endzi.

² Vla neta ikpɛsɛ suusu kpakpa, ta Ongyesɔ mgbi Otse tashulu kye esho ba ese, wa munu ikwutse na lu iyikpa di sɔkɛ ele.

³ Odzɛɛdzɛ mgban dze dafi mmbwo on-aabɔ, angwuto mgban di gbosa dafi ofufu itu.

⁴ Ama ongyoongyo ntona imio wo ma yan kpakpa man a shigakwu diye gbɛsɛ lake ese dafi a kwulu mani.

⁵ Ongyesɔ na nya engyaa ntona gbɛɛ, <<Ka mio ba na, lubana ani ye li iYesu ngwu a gbokwon mi ekwatsi na ngwi ema le pitan.

⁶ O dze mmɛnɛ ba; o kyeɛ mi ikwu, dafi o teyi gbo mani. Ba wa di imbe ngwi a kyon la ma na.

⁷ Nghane ye lu ple-ple ka nya engwafɔɔn gbɛɛ: <O kyeɛ mi ikwu di teyi ema le lu iGalalia ma. Li mi imbe na ema ka din.> Li ongwɔ ngwi ani ba owa nya ema aani.>>

⁸ Ta imio wo engyaa ntonani, nghaduu a dze yi atsa kpakpa, man a dzata endzi tsinya lu ple-ple ka nya engwafɔɔn.

⁹ Vla neta iYesu kpatse ma. O nya ma gbɛɛ, <<Iyu no dze yi ema.>> A ye ba mbon, wa kpaklin afɔ di sunun.

¹⁰ iYesu si nya ma gbɛɛ, <<Ka mio ba na. Lu ka nya emidani nu ma lu iGalalia; a ka di ani mi imbe nani.>>

Odze ogbɔɔgbɔ mgbi ama ongyo endzi

¹¹ Dafi engyaa ntona kpatse ofɛ le lu nɛ, angbeka mi idzidze mgbi ama ongyoongyo ntona kaka ifu ogalu ka gbo nya engyukwo ama ofife mgbi Imgbasho alungwɔ nkyɔ duu.

¹² Onɔ ngwi engyukwo ama ofife kwakye yi engyukwo mgbi emi iJuda ma a tsɛwodze si kye awuya kpakpa nu ama oblakwutse,

¹³ nya ma gbɛɛ, <<Ema ka gbɔgbɛɛ, <Engwafɔɔn ba mi otu wa kye yili ikwɔ mgban lu mi onɔ ngwi eyi le nuna mani.>

¹⁴ Kini odze nɛ to adɔ mgbi iGɔna yɔ, eyi ka nyan odze nka man dika dulu ema tɔ mi okakewo mani.>>

¹⁵ Nghane ama oblakwutse ntona gbelu udza na di kyɔ dafi a nya ma ma yɛyɛ. Ta utsa nɛ a gbɔn kpatse mbi emi iJuda nghataa ba inɛ.

Idɔ okwukwo

¹⁶ Ta engwafɔ iwyodonyi ntona lu iGalalia, mi unggwɔ ngwi iYesu teyi nya ma gbɛɛ nu ma lu ele mani.

¹⁷ Ngwi a din nɛ, a sunun, kpaa angbeka tangwe.

¹⁸ Nɛ iYesu ba mboma wa gbɛɛ, <<Ali mfye mi esho yi ese duu a kye nu ani.

¹⁹ Nghane lu dika nu inggise mi ese duu yɛɛ engwafɔ mgbi ani, kyɔ ma iBatisima mi iyi mgbi Otse yi Ongwe beyi Onodzi Osaan,

²⁰ di tso ma ongyo alungwɔ ngwi ani wo ema ola mi ele duu. N dika dze yi ema alono duu, nghataa kɛ ongyɛngye ese.>>

Eso Osuse mi abo mghi iMaki

IJon okyo iBatisima me ofe

¹ Owita-wita mghi Eso Osuse mi ikpewo iYesu iKrestu, Ongwe Imgbasho.

² A tsekise lo mi afe mghi oyegbo Adzaya gbee:

<<N ka do ongyeso mghi ani no teyi abu, ka me abu ofe>>

³ <<Ela inggise le kwu mi okwese gbee, <Me Otse ofe,

man ofe no byi klididi.> >>

⁴ Ta iJon okyo iBatisima ba, le kyo iBatisima mi okwese dile gbeeso mghi iBatisima okyatitukwu nu ma dzata inggise yi ali ibwubwe.

⁵ Ese iJudia duu beyi inggise emi iJerosalin to ke mbon. Le fwi ali ibwubwe mghi ama, iJon dile kyo ma iBatisima mi ekyoo mghi iJodan.

⁶ IJon wo angwuto ngwi a me mi andu ilakwumyi, yi okpa mmbwaba mi oshi mgban, ma o li gye okpa yi enewo.

⁷ Nene li eso mgban nose aani: <<Inggise oka kye ani iyikpa, O fyumfye ngha ani, odi okpafu mgban kpaa ani me oshe ba.

⁸ Ani le kyo ema iBatisima yi eni, ng-haduu ongwu ka kyo ema iBatisima yi Onodzi Osaan.>>

Ibatisima yi igyila mghi iYesu

⁹ Egbe oka ne iYesu kyato mi igeli iNadzareti mi ayese iGalalia wa to ta, iJon si kyato iBatisima mi ekyoo iJodan.

¹⁰ Dafi iYesu le kyato mi eni ne, o di esho kwulu man Onodzi kye esho ba mbon dafi anyama mani.

¹¹ Ta ela kye esho gbee: <<Abu li Ongwe Ani mghi itukwu-itukwu; i kpa ani yi abu saan.>>

¹² Onodzi byakpa kyon deso lu okwese akponyi,

¹³ o dze okwese egbe ngwusefa, ngwi iSatan le gyilan. O dze yi emi mmbwaboshe, engyeso dile tobyun.

IYesu kwu engwafu emi ababo ela

¹⁴ Ngwi a wa kye iJon woke obawi ne, iYesu kaka ifu iGalalia, le gbo Eso Osuse mghi Imgbasho.

¹⁵ O gbee, <<Ono ma gyo wa. Esuto mghi Imgbasho dze kwekwe. Kyatitukwu mi ali ibwubwe mghi ema di noyeye mi Eso Osuse ne na!>>

¹⁶ Dafi iYesu nose le kyikye mi ewuuto mghi iGalalia ne, o di iSaimon yi Andru ongwunon le ngwi uke mi uto, ikyena a li ama otuntse.

¹⁷ O nya ma gbee, <<Kyedo ani na, ta n ka nu ema yee ama okwu inggise, ka li mmbweni wuba.>>

¹⁸ Ntunto neta a dzata uke mghi ama kyedon.

¹⁹ Ngwi o gbleke iyayi gwee ne, o di iJensi ongwes iDzebedi beyi ongwunon iJon mi uwaa, tole me uke mghi ama.

²⁰ O mbe ono ba ta kwu ma ela, ta a dzata otsoma mi uwaa yi ama ngwu a kye ma ido untse si kyedo iYesu.

IYesu lo onodzi obube onya

²¹ A lu iKapenahun, man ngwi egbe otonyido wa ba ne, iYesu kaka ifoozu okwakyemghi emi iJuda si wita otsungwo.

²² I kwulu inggise ntona ewo mi ungwos otsootso mgban, ikyekye o tso ma dafi inggise ongwu ndze yi mfyemani, dze dafi mghi etsetse mghi ola ntona ba.

²³ Mi ono ma ta, inggise oka mi ozu okwakyemghi emi iJuda ngwu ese don ikye teela gbee,

²⁴ <<Li alungwo ngwi abu mina yi eyi, iYesu ongwu iNadzareti? Abu ba owa dzili eyii? Ani ye inggise ngwu abu dze mani, Ongwe Osaan mghi Imgbasho!>>

²⁵ iYesu kyokyo yan gbee, <<Yile ondu tukwu! Tase mbon!>>

²⁶ Onodzi obube na siin mfyumfye yi ela otaata man si to dzanta.

²⁷ I kwulu inggise ntona ewo kpakpa ta a byi ewoma gbee, <<Li ekye den? Otsootso ofufe nkye yi mfyem! O li wo onodzi ibwubwe kpaa ola ta a li fwon.>>

²⁸ Odze mgban si gbafwe vla kpatse ayese iGalalia duu.

IYesu ngyelu inggise gwuba ootse

²⁹ Ngwi a dzata ozu okwakyemghi emi iJuda mata, a lu yi iJensi beyi iJon mi ude mghi iSaimon yi Andru.

³⁰ Awo bwa Onowa iSaimon ladze ese, man a nya iYesu odze mgban.

³¹ Nghane o ke mbon, yan abo kyilen skunto. Awo na dzanta man o si wita ogbe ungwogye nu ma.

³² Mi onode na ngwi ono kaka ese neta, inggise ntona gbe emi ootse beyi ama ese do ma ikye ba mbi iYesu.

³³ Emi igeli na duu kwakye mi onufe,

³⁴ man iYesu ngyelu inggise gwuba ootse idzidza-dzidza. O di lo onodzi emese gwuba onya, kpaa o gbela ni onodzi emese gbodze ba ikyekye a ye ito inggise ngwu o dze mani.

IYesu gbeeso mi iGalalia

³⁵ Mi egbegbe ototu ngwi imbe ka yifu ne, iYesu kyato dzata ude lu imbe ngwi o ka dze yuon, bibo mi ele.

³⁶ Ne iSaimon yi angbeka ntona lu le pitan,

³⁷ Ngwi a tun ne, a nyan gbæe, <<Ali inggise duu le pita abu!>>

³⁸ Ne iYesu nya ma gbæe, <<I ke agwo angbeka ama nto kwækwæ neni, zukwu nin ka gbeeso mi ele kpaa, lubana li ikye ungwo ngwi ani ba ma aali.>>

³⁹ Nghane o dzagaba kpatse iGalalia, le gbeeso mi ozu okwakye mgbi emi iJuda dile lo emi onodzi emese to.

IYesu ngyelu inggise otsoma

⁴⁰ Inggise ndotsoma ba mbi iYesu wa kwakwafæ ese tekye nun gbæe, <<Ni abu mina yo, o ki nu ani yæe saan.>>

⁴¹ Ngwi iYesu li di elela kpakpa neman o na abo mghan gbo inggise na ewo di nyan gbæe, <<Ani mina; yæe saan!>>

⁴² Ple neta otsoma dzanta man ootse mghan ngye.

⁴³ IYesu si byakpa nun ofæ no lu di kwon ado saan gbæe:

⁴⁴ <<Di gbæe abu nya inggise onyi odzæ ne ba. Kpaa lu ka kye ewabu tso inggise ofife mgbi Imgbasho di fife dafi iMose nose woola ikye oyæe saan mani, no li obwende mboma.>>

⁴⁵ Nghaduu o lu le ka gbodze ele dzii, dile gbæfwe utsa nani. Ikyenghane, iYesu yagba kaka igeli na mi ododa wuba kpaa lu ka dzæke imbe oklii. Jokpaa inggise ntona dile ba mbon mi ali agya duu.

2

IYesu kyile inggise ngbikye tukwu ese

¹ Ngwi egbe wa sisi gwee ne, iYesu si yido lu iKapenahun, inggise ntona si fwo gbæe o ye kaka ude.

² Ta inggise kwuba kwakye mbonyi, ng-hane imbe dzema wuba, onufe mi ese kpaa imbe dze ba. IYesu sile gbeeso nya ma.

³ Ta inggise angbeka ngbi ene wa to, kye inggise ngbikye tukwu ese le ba mbi iYesu.

⁴ Dafi a yagba kyon kaka mbi iYesu ba ikye ibyi inggise ne, a ka fle ikpendu mi ikye mgbi iYesu yeye man kyon tashulu yi amukwu wa lakiyayi iYesu.

⁵ Ngwi iYesu di oyeye onuunu mgbi ama ne, o nya inggise ngbikye tukwu ese na gbæe, <<Ongwe, a dzita abu yi ali ibwubwe mgbi abu.>>

⁶ Etsetse mgbi ola mgbi iMose angbeka soto mmanani, a le tsewe mi itukwu mgbi ama gbæe,

⁷ <<Kysinese inggise ne gbodze nga? O le kwu Imgbasho shanye! Li eme ka dze inggise ta yi obube se Imgbasho yuon ta baa?>>

⁸ Ple neta, iYesu ka ye mi onodzi mghan gbæe li ungwo ngwi a le tsewe mi itukwu mgbi ama joaali, man o nya ma gbæe, <<I kysine ngwi ema le tsewe ito ungwo ntona?

⁹ Li ole nghao suno ba: onya inggise ngbikye tukwu ese na gbæe, <A dze abu ta yi ali ibwubwe,> naadi o gbæe, <Kyato, kyelu obutu mgbi abu kyikye?>

¹⁰ Nghaduu li onu ema ye gbæe Ongwe Inggise dze yi mfye mi ese ne odze inggise ta yi ali ibwubwe...>> O nya inggise ogbikye tukwu ese na gbæe,

¹¹ <<N nya abu, kyato, kyelu obutu mgbi abu lu ude.>>

¹² O kyato, kyelu obutu mghan si kyikye mi inai ma duu. Ungwone kwulu ali inggise duu ewo man a si tse Imgbasho, le gbæe, <<Eyi yama di ito ungwone ye ba!>>

IYesu kwu iLevi ela

¹³ Ne iYesu di yido ke ondu uto mgbi iGalalia. Ibyi inggise ba mbon, ta o si wita otso ma.

¹⁴ Dafi o kyikye le ke ne, o di inggise ogbe udza ifyæe, iLevi ongwe Alfeæ sodze opo ogbe udza ifyæe. Man iYesu nyan gbæe, <<Kyedæ ani,>> ta iLevi kyato kyedon.

¹⁵ Dafi iYesu le gye ungowgye ongwi onode mi ude iLevi ne, ama ogbe udza ifyæe kwuba yi <<emi ali ibwubwe angbeka>> tole gye ungowgye biyan beyi engwafæon, lubana inggise kwuba kyedon.

¹⁶ Ngwi etsetse mgbi ola mgbi iMose ama nli emi iFarasi din le gye ungowgye yi <<emi ali ibwubwe>> yi ama ogbe udza ifyæe ne, a byi engwafæon gbæe: <<Kysine ngwi ongyukwo mgbi ema le gye ungowgye yi ama ogbe udza ifyæe yi <emi ali ibwubwe? >>

¹⁷ Ngwi iYesu fwo ungwone ne, o nya ma gbæe, <<Li ama nle saan ma li mina inggise obwe ootse ba, kpaa li emi ootse. Ani ba owa kwu ama nle saan ela ba, kpaa li emi ali ibwubwe.>>

A byi iYesu ita mi odze ondu otukwu-tukwu

¹⁸ Ono oka ne ama okye yi iJon okyo iBatisima beyi emi iFarasi tole tukwondu. Inggise angbeka si ba wa byi iYesu gbæe, <<Kysinese ngwi engwafæ mgbi iJon okyo iBatisima beyi engwafæ mgbi emi iFarasi tole tukwondu, kpaa engwafæ mgbi abu le tukwondu ba?>>

¹⁹ IYesu nya ma gbæe, <<Ingyoga emi oga mgbi eba ka tukwondu ono ngwi obongyaa dze yi ama maa? Ungwo ka dze nga ba du. Ngwi a ka dze yi obongyaa tayo, a ka yama tukwondu ba.

²⁰ Nghaduu ono kyema ngwi a ka kyi kyelu obongyaa mi idzidze ma ta a ka tukwondu.

²¹ <<Inggise onyi li kye aye angwuto ofufe kye tukwu ogbugbe ba. Ki non kyo nga, aye ofufe na ka kyi kwolu di fawa angwuto ogbugbe nani, dika nu ifo na yæe von.

²² Inggise onyi dika kye eneekwo ofufe yaoke ikpokpo eneekwo ogbugbe ba, ikyekye eneekwo na ka nu ikpokpo gbobu, man eneekwo beyi ikpokpo duu ka nyanya. Kyeme yo a ka kye eneekwo ofufe yaoke ikpokpo ofufe.>>

Otse mgbi egbe otonyewo mgbi emi iJuda

²³ Egbe otonyido mgbi emi iJuda oka ne, iYesu le kyikye nye okwo ungowogyowe, dafi engwafoon wafu yan le ke ne, a wita ole ngwunu ungowogyowe.

²⁴ Emi iFarasi gbo yan gbæ, <<Dika, kysine ngwi a le kyungwo nli ola ba mi egbe otonyewo nga?>>

²⁵ IYesu si nya ma gbæ, <<Ema gbo ungowo ngwi iDevedi yi emi ibugen nose kyo mi ono ngwi enbwa do ma ngwi a di dze mi imina na baa?

²⁶ Mi ono ngwi Abiata nose li okwukwo inggise ofife mgbi Imgbasho mani, iDevedi kaka ozu mgbi Imgbasho ka gye ibredi ngwi a kye mse be ele kye dzeke kyoon, ngwi ola gbæ li ama ofife mgbi Imgbasho ta ka gye mani. O di kye nu emi ibugen kpaa.>>

²⁷ Ne iYesu nya ma gbæ, <<A ta egbe otonyewo mi ikye inggise, li inggise ngwi a ta mi ikye egbe otonyewo ba.

²⁸ Nghane Ongwe Inggise li Otse mgbi egbe otonyewo kpaa.>>

3

Inggise nkwulu abo

¹ Onoka ne iYesu ke ozu okwakye mgbi emi iJuda, man inggise nkwulu abo dze ele.

² Angbeka mi ele le pita itodze ni ama kye abo byi efu nun obube, nghanè a gbe ine fyakwun ikye odi non ka ngyelu inggise na ootse mi egbe otonyewo yo.

³ Ne iYesu nya inggise okwulu abo na gbæ, <<Kyato dzekunto mi inai ali inggise duu.>>

⁴ Ta iYesu byi ma gbæ, <<Li ole nghao li ola mi egbe otonyewo: okyo osuse naadi okyo obube, odulu oshishe wato naadi ongwongwo?>> Kpaa a gbodze onyi ba.

⁵ O kyidi ma kpatse yi itingga man i kakan ewo lu byulu mi itukwu otishu mgbi ama nani, iYesu nya inggise na gbæ, <<Na abo mgbi abu.>> O nan to, man abo mgban byakpa ye saan.

⁶ Man emi iFarasi ntona tase lu ka tsewe yi emidi iHerude dafi ama ka kyo duse ngwo iYesu mani.

Ijji inggise kyedo iYesu

⁷ Man iYesu tase yi engwafoon lu uto iGalalia, ne ibyi inggise mi iGalalia kyedon.

⁸ Ngwi a fwo alungwo ngwi o le kyo ne, inggise kwuba mi iJudia, iJerosalin, iIdumia

yi imbe angbeka mi oyombo ekyoo iJodan beyi imbe angbeka kwekwe yi ogalu iTire yi iSidon ba mbon.

⁹ Ikyegbæ inggise mbwo lamyè ne, iYesu nya engwafoon gbæ nu ma pita ongwuwaa dze fæfe ongwu, di a wa dzi ongwu beke ese.

¹⁰ Lubana o ngyelu inggise kwuba ootse, nghanè ama nto yi ootse idzidza-dzidza le na kiyayi ikye ni ama kye abo gbon.

¹¹ Alono ngwi onodzi okpekpe din yo, a li gbese lakiyayi mbon dile makwo gbæ, <<Abu li Ongwe Imgbasho.>>

¹² Nghadu o wo ma ola kpakpa gbæ nu ma ka gbo nya inggise onyi ito inggise ngwi ongwu dze ba.

IYesu sadu ama ogbikyon iwyodefa

¹³ IYesu to lu esho mi ewungwo si kwu ama ongwu mina ma ela, ta a ba mbon.

¹⁴ Ne o sadu iwyodefa mboma gbæ nu ma li ama ogbikye ongwu, ikyegbæ nu ma dze yi ongwu, ni ongwu di do ma tase ka gbeeso

¹⁵ odi dze yi mfye ngyelu ootse di lo onodzi ibwubwe to.

¹⁶ Ntone li iwyodefa ama o sadu ma aani: iSaimon (ongwu o nun iyi di iPyita)

¹⁷ iJensi ongwè iDzebedi beyi ongwunon iJon (mboma o nu ma iyi di iBonege, ngwi itan gbæ emi ongwè akpala),

¹⁸ Andru, iFyilipi, iBatlomi, iMatu, iTomçusu, iJensi ongwè Alfeo, iTedusu yi iSaimon Ogbodami

¹⁹ beyi iJuda Iskaroti, ongwu nkye iYesu gya nani.

IYesu beyi uto mgbi onodzi emese

²⁰ Ne iYesu kaka ude, ta ibyi inggise di kwakye kpoo, man iYesu yi engwafoon yagba ogye ungowoye kpaa gbæ ba.

²¹ Ono ngwi eto mgban fwo odze ne ne, a lu ikye oka gbekabyin, ikyekye a gbæ, <<O dze mi odzeedze mgban wuba.>>

²² Man ama otso ola mgbi iMose nkye mi iJerosalin gbæ, <<Onodzi iBedzebu wodze mbi inggise nen! O dile lo onodzi emese to mi mfye nani.>>

²³ Nghane iYesu kwu ma ela gbodze yi ama mi utsa gbæ: <<ISatan ka lo iSatan onya to sine?

²⁴ Ni esuto gha yi ewoma, esuto na ka yagba kwudze gbe ba.

²⁵ Ni ude gha yi ewoma, ude na ka yagba kwudze gbe ba.

²⁶ Ma ni iSatan kye afo twese yi ewon di ye gha, o ka kwudze gbe ba; ongyeengye mgban ba sewaali.

²⁷ Mi odzimo yo, inggise onyi kpaa ka yagba kaka ude inggise mfye gben okye ba, sede o ka tsekise bwa inggise mfye na adi. Duuse o ka gben okye.

²⁸ N nya ema otsitsi, ali ibwubwe yi ito ngwi inggise le fya Imgbasho duu a ka kye toma mkpa.

²⁹ Nghaduu inggise ta nkwi Onodzi Osaan fyito, a ka dzanta yi obube ba; ikyekye o kyo alobube nli gyegwu.>>

³⁰ IYesu gbodze ne ikyekye a le gbæ, <<O dze yi onodzi obube mbon.>>

Ono iYesu yi emi ongwunon

³¹ Ne ono iYesu yi emi ongwunon wa to. A kwulese mi ese si do inggise oka ke ifun oka kwun ela.

³² Ibyi inggise sise kpakeke won, a si nyan gbæ, <<Onabu yi engwunabu to ese le pita abu.>>

³³ IYesu si byita gbæ, <<Li angbele li emi onani yi engwunani?>>

³⁴ Ta o ndine mbi ama nso kpakeke won ma si gbæ, <<Dii, ntone li emi onani yi engwunani aani!

³⁵ Ali inggise nkwo owitukwu mgbi Imgbasho li ongwunani ongyulo yi ongyaa beyi onani.>>

4

Utsa mgbi inggise ofwe eto

¹ IYesu di wita otso ma mi ondu uto. Ibyi ama nkpaceke won ma mbwo nyese neta, o kaka soka ifu uwaa nbedze uto mani, inggise ntona duu kwutoke agobo.

² O tso ma ungwo kwuba mi utsa, mi otsootso mgban ma o gbæ:

³ <<Gado! Inggise okwo tase oka fwe eto.

⁴ Dafi o le fwe neta, angbeka ngwuta mi ofe, ingwunon wa kye salu gye.

⁵ Angbeka ngwuta mi akwutse, imbe ngwi ekye me ma saan ba, a ndzili labo-labo, ikyekye ekye na le hilehile.

⁶ Ngwi ono wa tse ne, a gbuffyo, kwulu ikyekye a sulu akpa ba.

⁷ Eto angbeka yaoke ato, ato ntona she tukwu ma, man a yagba fwe ba.

⁸ Nghaduu eto angbeka yangwuta mi ekye osuse, lu to, i she diye wa kwuba, ngha ongwu ababo na akpe osudiwoyo, ngwuseta, hona akpe ideli kpaa.>>

⁹ Ta IYesu gbæ, <<Inggise nsulu ado ofwoofwo yo, no fwo.>>

¹⁰ Ngwi o kwudze yuon ne, emi iwiyodefa beyi ama nkpaceke won ma byun ita mi utsa nani.

¹¹ O nya ma gbæ, <<A kye ungwo odaada mgbi esuto mgbi Imgbasho kye gbo nya ema. Kpaa ama nto ese yo, alungwo duu sede ka li mi utsa ngwi a ka gbôn nya ma

¹² ikye,
<<Nu ma di kpaa,

a ka sakwulun ba,
nu ma fwo kpaa,

ka gbosa loma ba;
kana a ka wa kyata

nu ma dzita ma yi ali ibwubwe!>>

¹³ Ta iYesu byi ma gbæ, <<Utsa ne gbosa lo ema lo? Nghama ka kyosine ngwi utsa oka ka gbosa lo ema?

¹⁴ Inggise okwo kye elodze Imgbasho fwe.

¹⁵ Inggise angbeka to dafi eto n yangwuta mi ofe nani. Labo-labo ngwi a fwo mata, iSatan wa kye gbelu elodze ngwi a kye fwe mboma mani.

¹⁶ Angbeka to dafi eto n yangwuta mi imbe akwutse mani, a fwo elodze na akponyi ta a kye gbelu yi atsa.

¹⁷ Nghaduu ngwi a dze yi akpa ba ne, a dze ono gwee ta. Ngwi okakewo hona iso wa ba mi ikye elodze na neta, a byakpa ye atata.

¹⁸ Angbeka di to dafi eto ngwi a fwe yaoke ato mani, a fwo elodze neni;

¹⁹ kpaa okakewo mgbi ese ne, okpagyewo mgbi aludu, yi imina mgbi ungwo angbeka wa kaka, di dze elodze ne mmye, no wa wuba.

²⁰ Angbeka to dafi eto ngwi a fwe mi ekye osuse, a fwo elodze na kye gbelu, i wa ngha ungwo ngwi a kye fwe na akpe osudiwoyo, ngwuseta, ideli jokpaa.>>

IPitila mi ikye adinyatse

²¹ O di byi ma gbæ, <<Ema li kye ipitila kaka ikye okye mgboko tukwun, hona kye woke ifagwudoo? Li mi ikye adinyatse ngwi ema li kye doka baa?

²² Lubana ungwo ndze mi odaada duu ka ye gedee, alungwo ngwi a di kye tukwulu kpaa ka do ese mi ododa.

²³ Inggise ndze yi ado ofwoofwo yo, no fwo.>>

²⁴ O kiyayi gbæ, <<Kye eka byi saan mi ungwo ngwi abu fwo mani, li ombaamba ngwi abu mba ma ngwi a ka mba nu abu aali, jo nghaangha kpaa.

²⁵ Ali inggise nsulun yo a ka ye mbwon, ongwu nsulun ba ma, ogwee ngwi o dzeayan ma kpaa a ka kye gbelu mbon.>>

Utsa mgbi eto osheeshe

²⁶ O diye gbæ, <<Esuto mgbi Imgbasho dze sini: dze dafi inggise kye eto ungwo fwe mi ikpese mani.

²⁷ Otu yi ono, ki non lasisa hona le nuna kpaa, o ye dafi i kyo se eto na le she ba.

²⁸ Li ikpese li nu ungowogye lumbye, ababo itan li to, man li wa ngwiide, se wo inene.

²⁹ Labo-labo ngwi eto na mye mata, o li kye agebe doka ele, ikyekye ono ongwa eto gyo.>>

Utsa mgbi inene unkwodzi

³⁰ IYesu diye gbæ, <<Li alungwo ngwi eyi ka gbæ esuto mgbi Imgbasho lun, naadi li ali utsa ngwi eyi ka kye tso ambe mi ele?

³¹ Dze dafi inene unkwodzi, nshanye nga inene ali ekwo ngwi abu kye ye mi ikpese mani.

³² Nghaduu ni a kye ye, li she di yee gbagbadzidzi nga ali ekwo mi ekwo duu, li tsaabo okwukwo jo ingwuno emi esho kpaa li ba wa lude mi abon.>>

³³ Yi utsa mbito ntone, iYesu gbo elodze ne yi ama, o gbon kwuba gyo nu ma difwi mani.

³⁴ O li dzedze gbodze yi ama ba sede mi utsa. Nghaduu non wa to yuon yi engwafu mgban yo, o li nu ma osa mi alungwo duu.

IYesu nu awo kwulu

³⁵ Onode mi egbe nani, o nya engwafuon gbeye, <<I ke oyombo na.>>

³⁶ Ngwi a dzata ibyi inggise mi iyikpa ne, a kye iYesu wafu yi ama, mi uwaa ngwi o tsekise sodze efu mani. Uwaa angbeka kpaa kyedon.

³⁷ Onikyawo gbokyee, gbe akpeni le yaoke uwaa jo uwaa dze kwekwe osulu.

³⁸ IYesu ladze ifu uwaa kye ikye dodze ungwokye ikye do efu le nuna, engwafuon kyilon, a byun gbeye, <<Otsetse, ni eyi mbe eni kwulu kpaa li itodze mbi abu ba lo?>>

³⁹ O gbokyee, feela yi awo diyee nya akpeni gbeye, <<Dede! Dze shilididi!>> Man awo kwulu, imbe yee tsiin!

⁴⁰ O nya engwafuon gbeye, <<Kysine ngwi ema tsimio nga? Ema sulu oyeye onuunu walo?>>

⁴¹ Idzidzi kwulu ma, a ye byi ewoma gbeye, <<Nene li eme? Ngwi awo beyi akpeni kpaa li fwon?>>

5

IYesu lo onodzi emese to mbi inggise

¹ A foyombo uto lu ayese iGeraseni nani.

² Ngwi iYesu tase mi uwaa mata, ongyulo oka yi onodzi okpekpe to mi imbe endzi wa tun.

³ Inggise ne li la imbe endzi, inggise onyi dzema nka bwan adi gbe ba, kwoba yi ashi kpaa.

⁴ Bana a li teyi bwan afu yi abo, kpaa o li byi ashi yi iyudza ntona kye gbodze dula afu to. Inggise onyi fyumfye me osin bese ba.

⁵ Otu yi ono mi imbe endzi beyi undo ntona o li le teela diyee dze ewon ifwa mi akwutse.

⁶ Ngwi o dili iYesu mbombo mata, o tsinya ka gbe akwafu kwoke ese mfumfye mi iyayi iYesu.

⁷ O feela kpakpa, <<Li ekye wo abu yi ani. Iyesu, Ongwe Imgbasho ngwu nga mi esho? Fa mbi Imgbasho gbeye abu ka nu ani adze ba!>>

⁸ Ikyesine iYesu teyi nyan gbeye, <<Abu onodzi ibwubwe tase mbi inggise neni!>>

⁹ Ta iYesu byun gbeye, <<Iyi abu di eme?>>

O nu uka gbeye, <<Iyi ani gbeye ibyibyi, ikyekye eyi le kwuba.>>

¹⁰ O si tekye diyee gbabo nu iYesu gbeye, no ka lo ama onya dzata imbe ne ba.

¹¹ Obyia ibyibyi tole gye ungwogye kwekwe mi undo mi imbe nani.

¹² Onodzi ibwubwe ntona tekye nu iYesu gbeye, <<Lolu eyi kaka obya ntoneni; noofe ni eyi kaka mboma.>>

¹³ O nu ma ofe, man onodzi ibwubwe ntona tase lu ka yaoke mbi obya ntonani. Obyi obya na me dafi idubu efa sini, a tashulu mi agblo yaoke uto si dzili.

¹⁴ Ama ongyo obya ntona tsinya lu ka gbo mi igeli beyi ayese nani. Inggise gbe ewoma tase le wa di ungwokiyayi mani.

¹⁵ Ngwi a ba mbi iYesu ne, a si di inggise ngwu ese gbeka don ikye nani, sodze mmama, wo angwuto, itukwu mgban yee saan, man a tsimio.

¹⁶ Ama ndi mani a gbo nya inggise ungwokiyayi ngwu ese don ikye nani, beyi odze mgbi obya ntona kpaa.

¹⁷ Nghane inggise ntona wita ottekye nu iYesu gbeye no dzata ayese mgbi ama.

¹⁸ Dafi iYesu le kaka ifu uwaa ne, inggise ngwu ese don ikye na tekye gbeye ongwu ki lu yan.

¹⁹ IYesu gbela ba, kpaa o gbeye, <<Lu ude mbi eto mgbi abu dika nya ma ungwokwukwo ngwi Otse Imgbasho kyo yi abu, beyi ito elela ngwi o di abu neni.>>

²⁰ Inggise na si lu ka wita le gbo mi iDekapoli (ogalu iwyo ntona) ungwokwukwo ngwi iYesu kyo mi ikye mgbi ongwu nani. I si kwulu inggise duu ewo.

Ongwongyaa Ikwukwo beyi Ongyaa Odotse

²¹ Ono ngwi iYesu diyee fa mi uwaa dake oyombo uto ne, ibyi inggise kwuba kpakeke won ngwi o kwudze ondu uto mani.

²² Man onyi mi idzidze mgbi ama oteyi mi ozu okwakye mgbi emi ijuda, iyin di iJaru badze imbe nani, ngwi o dili iYesu neta o si lanke ese mi iyayi,

²³ diyee tekye nun saan gbeye, <<Ongwani ongyaa ongwu ongbungbe le kwulu, tsuutsu ba wa kye abo mgbi abu gbon ewo azukwu ni ewo mgban gbosa no dze os-hishe.>>

²⁴ Nghane iYesu wafu yan.

Ijiji inggise kyan iyikpa kwuba, imbe flengba lon.

²⁵ Ongyaa oka kpaa dze mmama ngwu teka ogyiye onova iwyoodefa.

²⁶ O gyiso kwuba mi abo mgbi ama obwe ootse, di kye mbelu ungwokwukwo ngwi o sulun duu, ngwi ewo kika gbosa ne ootse ng hao keekiyayi.

²⁷ Ngwi o fwo odze iYesu ne, o si gbuoke idzidze inggise wa kye abo gbon angwuto mi iyikpa,

²⁸ ikyekye o tsewe gbæ, <<kini ani kye abo gbon angwuto kpaa ta, ootse mgben ka ngye.>>

²⁹ Labolabo ne eyi odeede mgban dze man o si difwi mi idzidze ewo mgban dafi iso na gbosa mani.

³⁰ IYesu jakpa difwi akponyi dafi mfye to lo ongwu mi ewo mani. O kyata ine byi ibyi inggise ntona si byita gbæ, <<li eme kye abo gbo ani angwuto?>>

³¹ Emi ongwafo mgban nun uka gbæ, <<Abu di inggise tsiiby wo abu, kpaa abu dile byita gbæ, <Li eme kye abo gbo anii?>>

³² Nghaduu iYesu kiyayi ondine inggise nkyc ngya mani.

³³ Ngwi ongyaa na difwi ungw nkyon ne, o si ba wa lake ese mi iyayi iYesu, ewo le shiishi lon yi imio, o si nyan otsitsi ungw ndze duu.

³⁴ O nyan gbæ, <<Ongyaa, oyeye onuunu mgbi abu ngyelu abu ootse. Ke ise diye to mi iso mgbi abu neni.>>

³⁵ Ngwi iYesu kale gbodze neta, engyulo angbeka tckye ude ijaru, inggise oteyi mi ozu okwaky mgbi emi ijuda. A gbæ, <<Ongwabu kwulu ma li ekye ngwi abu kale kaka otsetse ewo?>>

³⁶ IYesu gbadikye mi odze ngwi a gbo na man, O si nya ongye oteyi ozu okwaky mgbi emi ijuda na gbæ, <<ka tsimio ba, noyeye ta i ngye.>>

³⁷ O nu inggise onyi kyan iyikpa ba sede iPyita, ijensi yi jlon ongwuno ijensi ta.

³⁸ Ngwi a ba ude ongye oteyi ozu okwaky mgbi emi ijuda ne, iYesu di imbe yee yuu yi akwo beyi ikwu otsetse mi ela okwukwo.

³⁹ O kaka ifun di nya ma gbæ, <<I kyosine ngwi ema nu imbe suusu yi ikwu otsetse ngya? Ongwe ne kwulu ba kpaa o nanuna ta.>>

⁴⁰ Nghaduu a shan isha.

O no ngwi o nu ma tase neman, o kyi kyelu ama omban beyi engwafo mgban ngbi eta ntona kaka ifoozu imbe ngwi ongwæ se ladze mani.

⁴¹ O kpalun abo nyan gbæ, <<Italita kumi!>> (Itan gbæ, <<Ongwongyaa ongbunge, ani le nya abu gbæ, kyato!>>).

⁴² Labolabo neta ongwongyaa na kyee dzekunto le kyikye yilili kpatse (o li onova iwyodefa). Mi ungwæ i kwulu ma ewo saan.

⁴³ O wo ma ola kpoklwo gbæ nu ma ka nu inggise onyi ye odze ele ba, o diye nya ma gbæ nu ma nun ungwogye no gye.

6

A fwa iYesu mi iNadzarati

¹ IYesu dzata imbe na ye lu igeli mgban, emi ongwafo wafu yan.

² Ngwi egbe otonyido mgbi emi ijuda wa gyo ne, o wita otso mi ozu okwaky mgbi emi ijuda, i kwulu ibyi inggise ama nfwo ma ewo.

A byita gbæ, <<Li mi ole ngwi ongyulo ne tu ungw ntone? O tu ito ozoyeye ne mi ole jo le kyungwo ama okwulewo ne ngya lo!

³ Nene li inggise ogbokwo ungw n baa? Ongwe iMeri ongwuno yi ijensi, ijosisi, ijuda beyi iSaimon ne ba na? Emi ongwunon engyaa to yi eyi den baa?>> Man itukwu wulu ma yan.

⁴ IYesu nya ma gbæ, <<Oyegbo li dze yi mmwe mi igeli, yi eto beyi ude mgban ba.>>

⁵ IYesu gbela kyungwo okwulewo mi imbe na wuba, sede li inggise emi ootse gwee ta ngwi o kye abo gbo ma ewo nu ootse mgbi ama ngye.

⁶ I kwulu iYesu ewo yi okwoba-kwoba oyeye onuunu mgbi ama nani.

IYesu do engwafoon iwyodefa ntona eso

Ta iYesu kyikye kpatse le tso mi agwo agwo.

⁷ Ngwi o kwu iwyodefa ntona ela ba mbon ne, o si kwu ma be efa efa do ma eso, diye nu ma mfye ongha onodzi ibwubwe.

⁸ Li ola ama ngwi o woma aani: <<Mi agaba ne, ka kye unkonyi byi ba na, ibredi ba, igbe ba, awuya mi ashiko ba sede okwuta ta.

⁹ Gbe okpaf wo na, kpaa ka gbe abu ngbi efa byi ba.

¹⁰ Ali ude ngwi ema ka kaka duu, dze ele nghataa mbiso ngwi ema ka dzata igeli nani.

¹¹ Ali imbe ngwi a gbæ ema hona fwo ema bayo, kye gbolu ombulu mi afu mi ono ngwi ema le lu mani, no yee obwende obube mi ikye ma.>>

¹² A tase ka gbeeso gbæ inggise nu ma kyatitukwu.

¹³ A lo emese onya to mbi inggise kwuba, di kye engyie kyi inggise ama ndotse kwuba ikye di ngyelu ma ootse.

A dze jlon okyo iBatisima ikye

¹⁴ Uto iHerude fwo odze neni, dafi iyi mgbi iYesu gbafwe kpatse mani. Angbeka tole gbæ, <<Ijlon okyo iBatisima kyee mi ikwu, li ngya ngwi mfye ama okwulewo le kyido nye mbon aali.>>

¹⁵ Angbeka gbæ, <<O li Elaija.>>

Angbeka kiyayi gbæ, <<O li oyegbo, ndze dafi onyi mi idzidze oyegbo emi tugbe ntanani.>>

¹⁶ Nghaduu ngwi iHerude fwo ungwone ne, o gbæ, <<Ijon inggise ngwu ani dzan ikye na, ye kye mi ikwu!>>

¹⁷ Bana iHerude abuon noola nu ma bwa ijon, nu ma bwan adi di kyon ka wo ke obawi. O kyungwone nghan mi ikye iHerodia, owa iFyilipi ongwunon ngwu o gbelun ye owan nani.

¹⁸ Bana ijon teyi le nya iHerude gbæ, <<Li ola ba ni abu gbelu ongwunabu ongyaa.>>

¹⁹ Neman iHerodia sulu owitukwu obube yi ijon jo i minan ongwon kpaa o yagba ba,

²⁰ ikyekye iHerude le mio ijon dile ngyon, ikyesine o yon dafi o li inggise onyaan dile saan mani. Ngwi iHerude fwo ijon neta ewo fwe lon, jokpaa i kpan ole fwon.

²¹ Mi ongyeenggye ne onco osuse wa ba. Mi egbe ombaamba mghan, iHerude kyo oga mi ikye mgbi emi ido mghan ama okwukwo yi oblakwutse ama onoola beyi engyulo ama oteyi ese iGalalia.

²² Ngwi ongwæ iHerodia ongwu ongyaa ba idzidze wa shufwe ne, i nu iHerude beyi ingyoga oga mghan atsa.

Uto nya ongwongyaa na gbæ, <<Bo ani ungwõ ngwi abu mina duu ani ka kye nu abu.>>

²³ Man o zondy yan mi ofaafa gbæ, <<Alungwõ ngwi abu bo duu n ka nu abu, ka me anggai esuto mgbi ani.>>

²⁴ Ongwongyaa tase ka byi onon gbæ, <<Li kye ngwi ani ka bo nu ma kye nu ani?>>

Onon gbæ, <<Ikye mgbi ijon okyo iBatisima.>>

²⁵ Ongwongyaa byakpa yewo lu ifun mbi uto yi ibo nani: <<Ani mina ikye mgbi ijon okyo iBatisima mi akpete oneneni.>>

²⁶ Itukwu wulu uto kpakpa, nghaduu, ikyegbæ o teyi fa mi inai ingyoga mghan ne, o yagba kwon gbæ ba.

²⁷ O byakpa wo ongye ongwõ inggise ola gbæ no ba yi ikye mgbi ijon akponyi. Inggise na ka kye dzelu ijon ikye mi obawi,

²⁸ si ye yi ikye ma mi akpete. Wa nu ongwongyaa se, ta o kye ka nu onon.

²⁹ Nghan a fwo ungwone nghan, engwafõ mgbi ijon wa kye ikwõ mghan ka ndzi.

IYesu byi inggise idubu eda enbwa

³⁰ Ama ogbikye iYesu ye wa kpakeke won le nyan ungwõ ngwi ama kyo diye tso tsatsa.

³¹ Ne ikyegbæ ibyi inggise angbeka tole ba ba angbeka tole lu lu ngwi a tu onco ogye ungwõ kpaa ba ne, o nya ma gbæ, <<Bake yi ani mi imbe ndede ni ema ka tonya na.>>

³² Nghan a wafõ yi ewoma mi uwaa dzekyo lu mbi imbe dede mani.

³³ Nghaduu ibyi inggise di dafi a le lu ne, a difwi ma di ye imbe ngwi a le ke mani ta a tsinya to mi igeli duu kye mwaamwa teyi ma ka kaka.

³⁴ Ngwi iYesu tase mi uwaa diye dili ibyi inggise ne, elela kyon wo ma, ikyekye a ye dafi mmala ama ndze yi inggise ongyo ma ba mani. Ta o di tso ma ungwõ kwuba.

³⁵ Mi onco na, dafi onco le gbæ wa, ne engwafõ mghan ba mbon, wa nyan gbæ, <<Imbe ne li ifoshe, onco di ke byulu.

³⁶ Nu inggise ntonc ofe zukwu nu ma lu ogalu ama nto kwekwæ ka gya ungwogye abuoma gye.>>

³⁷ Nghaduu o gbæ, <<Ema kye ungwõ nu ma gye na.>>

A nyan gbæ, <<Nana ka me udza ofyia egyata mgbi inggise ido onyi! Ni eyi ka mbe ito udza na kpakpa ogya ibredi nu ma gyee?>>

³⁸ O byita gbæ, <<Ema sulu ibredi ololo nghi emine? Ke ka kyidi na.>>

Ngwi a ke ka kye gbõlu ne, a gbæ, <<IBredi ololo nghi eda yi abatsa efa.>>

³⁹ Nghan iYesu nu ma elodze gbæ, nu ma nu inggise ntonc duu sise ibwi-ibwi mi oshe indinda neni.

⁴⁰ Man a si sise mi otsotsa, ideli ideli beyi ngwusefa don iwyiwo.

⁴¹ Ngwi o kyi kyelu ibredi eda yi abatsa efa ntona, di kyile ine esho ne, o kye angba nu Imgbasho man kye mwalu ibredi ntonani. Kye nu engwafõn gbæ nu ma kye gha ibyi inggise ntonani. O di kye ghalu abatsa efa ntona gyaakye ma duu.

⁴² Ama duu gye tolo.

⁴³ Engwafõ mghan kye salu ambululu ibredi yi abatsa nsisi ma mbwo uya iwyo-defa kye-kye.

⁴⁴ Mbwo engyulo ama ngye ma li idubu eda.

IYesu kyikye mi ikye eni

⁴⁵ Ngwi iYesu le wo ibyi inggise ntona ofe ne, o nu engwafõn ple kaka uwaa teyun lu iBetsaida,

⁴⁶ Ngwi iYesu dzata ma ne, o toke lu ewungwõ le ka bibo.

⁴⁷ Mi oba onode ne, uwaa kye ama ntona ka to idzidze uto, ongwu tila dze ese yuon.

⁴⁸ O di engwafõ mghan tole gbili yi akpeni, ikyekye awo le nu ma okakewo, mi obyie ene ongwõ ikyegbe o to ka tu ma, le kyikye mi ikye eni. O ba dafi o ka wa nye ma mani,

⁴⁹ kpa ngwi a di dafi o le kyikye mi ikye eni ne, a tsewe gbæ o li onodzi inggise ikwukwõ. Man a gbobakwõ,

⁵⁰ ikyekye ama duu din tismio.

Mi onco nata, o si nya ma gbæ, <<Fyumfye itukwu na! Ka yama mio ba na, li ani.>>

⁵¹ Ne o kaka uwaa yi ama man awo kwulese akponyi. Ta ewo fwe loma tsatsa,

⁵² ikyesine ungwõ okwulewo mgbi ibredi na gbosa loma ba; lubana a kye itukwu tiishu.

⁵³ Ngwi a dzekyo ne, a ka beese mi iGene-sareti di kye uwaa shadi mi ele.

⁵⁴ Labolabo ngwi a to mi uwaa neman inggise byakpa dilifwi iYesu.

⁵⁵ A wulu onya mi ayese na duu gbe emi ootse mi obutu lukwun ke imbe ngwi a fwo gbee o dze duu.

⁵⁶ Ali imbe mi agwo ngwi o ke duu, igeli hona agya ese, a li gbe emi ootse wa lake ifyidu. A gbabo nun gbee o ki nu ama kye abo gbo-gbo ondu angwuto mgban kpaa ta, ama nkye abo gbon duu ewo gbosa loma.

7

Osaan beyi okpekpe

¹ Emi iFarasi beyi etsetse mgbi ola mgbi iMose angbeka ama nkye mi iJerosalin kpakeke wo iYesu man

² a di engwafu iYesu angbeka le gye una yi abo <<oshimbi-shimbi>> ali ma, a sabo ba.

³ (Emi iFarasi yi emi iJuda duu a li dze-dze ta gye ungowye ba, a li sabo mbiso ola mgbi ama ma se, okyo aletu mgbi ama.

⁴ Kini a ye yi ungowye mi idu, a li nye-nye gye ba sede a ka san. A di li kyo aletu mgbi ama angbeka kwuba, dafi osa ibwe yi okye ama okyo ungowye beyi emi uga sini.)

⁵ Nghane emi iFarasi yi etsetse mgbi ola mgbi iMose byi iYesu ita gbee: <<Kysine ngwi engwafu mgbi abu li dze mi aletu mgbi engyukwo ba, ngwi a li gye ungwo yi abo oshimbi-shimbi ngha?>>

⁶ O gbee: <<Adzaya gbo li ayin mi onu ngwi o gbo ela oyegbo mi odze ewe mgbi ema; dafi a tsekise lo mani gbee:

<< Inggise ntone li nu ani mmwe
mi ikpokpoundu ta,
nghaduu itukwu mgbi
ama dze mbombo yi ani.

⁷ A li sunu ani li ayayi,
Otsootso mgbi ama
li ola mgbi inggise owamyee.>

⁸ Ema kye ola mgbi Imgbasho ngwuta yile abo byike ola eto mgbi inggise owamyee.>>

⁹ Man iYesu nya ma gbee: <<Ema li dze yi ofe nkpa ema okye abo byike ele kye ola mgbi Imgbasho ngwuta ye kyedo otsootso mgbi ema!

¹⁰ Lubana iMose gbee: <Nu otsabu yi onabu mmwe,> ma <Ali inggise ndi fya otson hona onon ito yo, nu ma ngwon kyeme.>

¹¹ Nghaduu ema li gbee li ayin ni inggise nya ama omba ma gbee, <Gyen aba, n ka yagba tobyi ema ba. Ikyesine n tsekise zondou okye ungwo ngwi ani kika kye nu ema ma, nu Imgbasho,

¹² nghane ema li non kyo unkonyi kpaa mi ikye otson naadi onon wuba.

¹³ Ikyenghane ema kye ngwolu elodze Imgbasho mi aletu mgbi ema ngwi ema gbeto emidema ese nani. Ema di li kyungwo kwuba ito nani.>>

¹⁴ IYesu diye kwu ibyi inggise ela ba mbon di gbee, <<Ema duu gadu mbi ani, di difwi ungwone na.

¹⁵ Nkonyi nka kaka mbi inggise se ka non tsiidza dzema ba. Kpaa li ungwo ama nto mbi inggise ba ese mani. Li ama li non tsiidza aali.>>

¹⁶ (Inggise ndze yi ado yo non fwo.)*

¹⁷ Mi onu ngwi o dzita ibyi inggise lu ka kaka ozu ne, engwafon byun ita odze mi utsa neni.

¹⁸ IYesu byita gbee, <<Ema yama difwi odze ani le gbo ne walo? Ema ye saan dafi ungowye ngwi abu kyi gye lu ifu ka nu abu <tsiidza> ba lo?

¹⁹ Lubana li lu itukwu mgban ba kpaa li lu ifu, di li yido to mi ewo mgban luba ese.>> (Mi odze ngwi iYesu gbo ne, o tso gbee ali ungowye duu <<Me ngwi a ka gye.>>)

²⁰ O kiyayi gbee: <<Li ungwo nto mbi inggise ma li non <tsiidza aali.>

²¹ Lubana li mi itukwu mgbi inggise mi idzidze, li ba yi ewe otsetse ibwubwe, amah-ibwubwe, mmyi, inggise ongwongwo, amah,

²² nggwo, okye inggise wo itukwu, okpagyewo, imina mgbi ali ibwubwe, odi tanyi, agya, ohaha beyi ikwangha.

²³ Ungwo ibwubwe ntone duu li mi itukwu ngwi a li to di li nu inggise <ye kpekpe aali.>>

Oyeye onuunu mgbi ongyaa mi iSarofonisha

²⁴ IYesu lu dzata imbe nani ye lu ewo igeli iTiru. O kaka ozu kpaa i minan gbee inggise onyi no ka ye ba; nghaduu kpaa o yagba kye ewon da ba.

²⁵ Dafi ongyaa ngwu ongan dze yi onodzi ibwubwe ka fwo odze mgban ne, o ba wa gbese lanke iyayi.

²⁶ Ongyaa na li iGriki, a mban mi ayese iSiafonishia mi iSiria. O tekye nu iYesu gbee non lolu emese na to mbi ongan ongwu ongyaa.

²⁷ Nghaduu iYesu nyan gbee, <<Ababo ni engbe nu ma gye ungowye dafi a mina duuse, lubana li ayin ba okye ungowye ndze mi ikye engbe ngwuta nu obwe.>>

²⁸ Ongyaa na nun uka gbee, <<Een, Otse iYesu, obwe ama nlato ifo adinyatse ogye ungowye mgbi engbe kpaa, li gye ambulu ama nngwuta mani.>>

* 7:16 7:16 Ambulu ne dze mi ololo angbeka ba. Ololo angbeka kwuba kye dzeke enggenga.

²⁹ IYesu si nyan gbæe, <<Mi ito uka ngwi abu nu ani ne, ye lu ude abu; emese na dzita ongwabu ngwi ongyaa na wa.>>

³⁰ O lu ude ta o ka di ongwani ladze akwulo, dafi emese na teyi to mbon lu wa.

IYesu ngyelu inggise ikplima

³¹ Ta iYesu dzata ewo igeli iTiru ye nye iSidon, lu uto iGalalia to lu ayese mgbi iDekapoli, igeli iwyo ntonani.

³² Inggise angbeka kye inggise nkyado di li fyonmfye ogbodge ba mbon, si tekye nun gbæe no kye abo gbon ewo.

³³ Nghane o kyon lu enggenga, dzata ibyi inggise ntonani, iYesu gbe ongwufabo wonke ado. Man o kyanggwɔ toke ongwufabo di kye be inggise na mi ide.

³⁴ Ta iYesu ndine ke esho diye sandu man o nyan gbæe, <<Efata!>> (Itan gbæe, <<kwulu!>>).

³⁵ Mi ungwo ngwi iYesu kyo ne, ado mgbi inggise na kwulu, ide mgban di sheta ta o wita ogbodge to saan.

³⁶ IYesu kwo ma ado gbæe nu ma ka nya inggise onyi ba. Nghaduu ngwi o le kwunewo okwo ma ado ne, a nghao le kiyayi ogbodge mi ele.

³⁷ Ne ama duu ungwo okwulewo na kyi gbelu ma so. A gbo gbæe, <<O kyo alungwo duu saan, o nu ama okyado fwo di nu emi ikplima gbodge.>>

8

IYesu byi inggise idubu ene enbwa

¹ Mi egbe ntona ibyi inggise angbeka di kwakye. Dafi a dze yi unkonyi kpaa ngwi a ka gye ba ne, IYesu kwu engwafoon ela ba mbon si nya ma gbæe,

² <<Elela kyo ani wo inggise ntoneni; a to yi ani mmene egbe eta waani, ma a dze yi unkonyi ogyeegye ba.

³ Kini ani nu ma ofe gbæe nu ma lu ude yi enbwa ifu yo, a ka kwanadza mi ofe, ikyesine angbeka kye imbe otunto.>>

⁴ Emi ongwafoon byun gbæe, <<Nghane li mi ole mi ifoshe ne ngwi inggise ka tu ibredi me obyi ma enbwa?>>

⁵ IYesu byi ma gbæe, <<Li ibredi emine ngwi ema dzeyan?>> A gbæe, <<Egyafa.>>

⁶ O nya ibyi inggise ntona gbæe nu ma sise mi ombulu. Ngwi o kye gbelu ibredi egyafa ntona di ta Imgbasho angba ne, o kye mwalu gbe nu engwafoon gbæe nu ma gha ibyi inggise ntonani, a si kyo ngha.

⁷ A di dze yi engwe abatsa kpaa gwee, iYesu di ta Imgbasho angba mi engwe abatsa ntonani di nya engwafoon nu ma kye gha ma.

⁸ Inggise ntona gye di tolo. Ngwi a gye nye ne, engwafoon kye salu ambulu ama nsisi ma mbwo uya egyafa.

⁹ Inggise me dafi idubu ene to mi ono nani. Ngwi iYesu nu ma ofe nu ma lu neta,

¹⁰ o kaka uwaa yi engwafoon lu ayese iDamanuta.

Emi iFarasi mina ambe okwulewo

¹¹ Emi iFarasi ba mbi iYesu wa wita obyun ita. Ikye ombadin, a pita ambe ongyi esho mbon.

¹² O sandu lu byulu si gbæe, <<Kycsine ngwi eto ne le mina ambe okwulewo? Ot-sitsi ani le nya ema, ambe onyi kpaa a ka kye nu ma ba.>>

¹³ Ta iYesu lu dzamata, yido lu ka kaka uwaa si foyombo uto na lu agya oka.

Okwuna mgbi emi iFarasi yi iHerude

¹⁴ Engwafoo iYesu gblimo okye ibredi byi, sede li onyi ongyi a kye yan mi uwaa mata.

¹⁵ IYesu kwo ma ado gbæe, <<Gbæwebyi ewema na. Gbinebyi okwuna mgbi emi iFarasi beyi mgbi iHerude nani.>>

¹⁶ A kpunya odze ne yi ewoma si gbæe, <<Li ikyegbæe eyi dze yi ibredi ba mani.>>

¹⁷ IYesu difwi odze ngwi a tole gbo yi ewoma ne, o byi ma gbæe: <<Kycsine ngwi ema le gbodge gbæe ema dze yi ibredi ba? Ema kale dine ba naa kale gbosa lo ema ba maa? Itukwu mgbi ema tiishuu?

¹⁸ Ema dze yi ine kpaa li yagba di lo, di dze yi ado kpaa li yagba ofwo lo? Ema we wulo?

¹⁹ Mi ono ngwi ani gha ibredi nghi eda mi ikye inggise idubu eda ma, ema gbe ambulu mbwo uya emine?>>

A nun uka gbæe, <<Iwyodefa.>>

²⁰ <<Ngwi ani di gha ibredi nghi egyafa mi ikye inggise idubu ene ma, li uya emine ngwi ema gbe ambulu mbweele?>>

A gbæe, <<Egyafa.>>

²¹ IYesu byi ma gbæe, <<Kale gbosa lo ema ba maa?>>

IYesu kwulu ongyulo obine ine mi iBetisaida

²² A ba iBetsaida, man inggise angbeka kye ongyulo obine ba wa tekye nu iYesu gbæe no kye abo gbon.

²³ O byi ongyulo obine na abo di kyon tase dzata ogalu. Ngwi o kyanggwɔ kyon ine di kye abo ban ne, iYesu byun gbæe, <<Abu di ungwɔɔ?>>

²⁴ Obine na ndine ke esho si gbæe, <<Ani di ibyi inggise, a to dafi ekwo mani le kyikye kpatse.>>

²⁵ IYesu diye kye abo gbon ine. Ta ine mgban kwulu, ine mgban ye, man o di alungwo duu saan.

²⁶ Ne iYesu won ofe lu ude, di won ola gbæe, <<Ka ye ke ogalu na wuba.>>

IPyita fwi iKrestu

²⁷ IYesu yi engwafoon lu kaka agwo ama nto kwekwe yi iSisiria iFyilipi. Mi ofe ma o byi ma gbɛɛ, <<Inggise li kwu ani di eme?>>

²⁸ A nyan gbɛɛ, <<Angbeka li gbɛɛ iJon okyo iBatisima, angbeka gbɛɛ Elaija; angbeka yo li gbɛɛ, onyi mi idzidze ama ogbɛɛse.>>

²⁹ Ne o byita gbɛɛ, <<Nghanɛ ema ma! Ema li kwu ani di eme?>>

IPyita nun uka gbɛɛ, <<Abu li iKrestu mani.>>

³⁰ IYesu kwo ma ado gbɛɛ nu ma ka nya inggise onyi odze mgbi ongwu ba.

IYesu gbodze ikwu ewon

³¹ Ta iYesu wita otso emi ongwafoon gbɛɛ Ongwe Inggise ka gyadze ungwo kwuba kyeme, engyukwo dika fwan, engyukwo ama ofife, beyi etsetse mgbi ola mgbi iMose. A ka ngwon mi egbe ongwu ta o dika kyɛɛ mi ikwu.

³² O gbodze ne mi ododa yi engwafoon, man iPyita kyen lu enggenga sika wita okyokyo yan.

³³ Kpaa ngwi iYesu kyata ine di engwafoon ne, o fwa yi iPyita. O nyan gbɛɛ, <<Kwleke mmeneni iSatan! Abu dze yi ungwo mi itukwu ama nli mgbi Imgbasho ba, kpaa li mi ewe otsetse mgbi inggise.>>

³⁴ Man o kwu ibyi inggise ntona ela beyi emi ongwafoon ba mbon si nya ma gbɛɛ: <<Ni i mina inggise o kyedo ani yo, o ka tangwe ewon dika kye ekwatsi mgban kyedo ani.

³⁵ Lubana ali inggise nmina odulu oshishe mgban to yo, ka byulu lon, kpaa ali inggise nnu oshishe mgban byulu mi ikye ani yi Eso Osuse yo, ka dula oshishe mgban to.

³⁶ Li ali oyabo inggise ka tu kini a kye ese duu nun, kpaa oshishe mgban nyanya?

³⁷ Naadi li alungwo ngwi inggise ka kye nu ikye onyine yi oshishe mgban?

³⁸ Kini inggise kwayiwi ani yi eso mgbi ani mi ese amah yi eto ali ibwubwe ne yo, Ongwe Inggise kpaa ka kwayiwi otsungwon mi ono ngwi o ka ba mi okwokwo mgbi Otsɔn yi engyeso ama osaan mani.>>

9

¹ Ta iYesu nya ma gbɛɛ, <<Ani nya ema ot-sitsi, inggise angbeka kwulese to mmeneni a ka kwulu ba nghataa a ka di obaaba mgbi esuto mgbi Imgbasho yi mfyɛ.>>

Okwokwo mgbi iYesu

² Ngwi i wa nye egbe egyin ne, iYesu kyelu iPyita, iJensi yi iJon wafɔ yan kye ma toke lu ungwo mi esho, ka to ele yuoma. Mi imbe na odzeedze mgban kyata mi inai ma.

³ Angwuto mgban kyata tundze kpiledede, i tundze nga ngwi inggise ka kye enotse san no dze nga gbɛɛ.

⁴ Ta Elaija yi iMose wa mblegba tu ma, sile kponya yi iYesu.

⁵ IPyita gbo yi iYesu gbɛɛ, <<Otsetse, i tishi ni eyi to mmeneni. Ni eyi kle afu nghi eta, onyi ikye abu, onyi ikye iMose, oka ikye Elaija.>>

⁶ (O ye odze ngwi o ka gbo ba, ikyena imio wo ma kpakpa.)

⁷ Ta akpa to mi esho wa gbiiwulu tukwu ma, ela si to mi iwulu na gbɛɛ: <<Nene li Ongwani itukwu-itukwu. Gado mbon na!>>

⁸ Labolabo mata a ndine kpatse, kpaa a di inggise onyi yi ama wuba se li iYesu yuon.

⁹ Dafi a le tashulu mi ungwo luba ese ne, iYesu wo ma ola gbɛɛ nu ma ka nya inggise onyi ungwo ngwi a di ne ba nghataa se ni Ongwe Inggise wa kyɛɛ mi ikwu.

¹⁰ A kye odze ne da mi itukwu mgbi ama, a ye le kponya ungwo ngwi <<okyɛɛ mi ikwu>> tso mani.

¹¹ Ta a byun gbɛɛ, <<Kysine ngwi etsetse mgbi ola mgbi iMose gbogbɛɛ Elaija ka teyi iKrestu ba?>>

¹² IYesu nu ma uka gbɛɛ, <<Mi otsitsi, Elaija teyi ba, wa yile alungwo duu me le fe-fe. Kpaa li Afe ma kpoo di teyi lo gbɛɛ Ongwe Inggise ka gyadze kpakpa a dika fwan baa?

¹³ Nghaduu ani le nya ema, Elaija teyi ba wa, kpaa a kyo yan dafi a mina, yeye dafi Afe lo ikyon mani.>>

IYesu dula onodzi obube to

mbi ongwongyulo

¹⁴ Ngwi iYesu yi engwafoon eta ntona ye wa tu angbeka ntona ne, a di ibyi inggise kpakeke wo ma beyi etsetse mgbi ola mgbi iMose tole tangwodze yi ama.

¹⁵ Ngwi ine mgbi inggise ntona gbo yi iYesu ne, i kwulu ma ewo man a tsinya ke mbon ka tan angba.

¹⁶ IYesu byi emi ongwafoon gbɛɛ, <<Li alungwo ngwi ema le tangwe yi ama mi ele?>>

¹⁷ Ongyulo oka mi ibyi na nun uka gbɛɛ, <<Otsetse, ani kye ongwani ongyulo ba mbi abu, o dze yi onodzi obube li non gbodze gbe ba.

¹⁸ Alono ngwi i dzesin duu, li kyon ngwuta lake ese. O li mbwuuvu ondu, le gyaaba, di li ngwafwa kpoklɔɔ. Ani nya engwafɔ abu gbɛɛ nu ma lo onodzi na to, kpaa a yagba ba.>>

¹⁹ IYesu gbɛɛ, <<Kpei, ema eto ama onoye ba ntone, ani ka dze yi ema ono ka tunto sine? Ani ka shitukwu yi ema ono ka tunto sine? Kye ongwɛ ma ba mbi ani.>>

²⁰ A si kyon ba mbon. Ngwi onodzi na di iYesu labolabo mata, o kye ongwɛ na gyɛɛ le kwokwo. O gbese lake ese dile myini kpatse, le tsuuvu ondu.

²¹ IYesu byi otsongwe na gbæe, <<I kye ono sine ngwi o dze ngha?>>

O gbæe, <<Kye ese mgban.

²² Li kyon ngwuta woke ola naadi eni ikye ongwon. Nghane ni abu ka yagba kyungwo mi ele yo, di eyi elela ya eyi abo.>>

²³ IYesu gbæe, <<Li ungwo ogbæe kini abu yagbaa? Alungwo duu ka yagba kyo kyeme mbi inggise nnoyeye.>>

²⁴ Labolabo ne otsongwe na kweela gbæe, <<Ani noyeye; tobyi ani ni ani kekiyayi mi oyeye onuunu.>>

²⁵ Ngwi iYesu di gbæe ibyi inggise tsinya le wa di ne, o fwa yi onodzi obube na gbæe, <<Abu onodzi okyado beyi ikplima ne, ani wo abu ola, tase mbon dika ye kaka mbon wuba.>>

²⁶ Onodzi na teela di nu ongwæ na tsa si to dzanta. Ongwe na lake dafi inggise ikwukwo man ali inggise duu gbæe, <<O kwulu.>>

²⁷ Nghaduu iYesu byin abo kyilen esho ta o si dzeakunto.

²⁸ Ono ngwi iYesu wa kaka ifoozu ne, engwafon byin ita daada gbæe, <<Kyosinese ngwi eyi yagba lon to ba?>>

²⁹ O nya ma gbæe, <<Ita ne ka to mi ibo kyoon ta!>>*

IYesu di gbodze mi ikye ikwu ewon

³⁰ A lu dzata imbe nani, nye ifu iGalalia. IYesu mina gbæe ni inggise onyi kpaa ye imbe ngwi ama to ba,

³¹ ikyekye o le tso engwafon mgban gbæe, <<A ka wa kye Ongwe Inggise gya mi abo inggise. A ka ngwon, ni i wa nye egbe eta ta o ka kyee mi ikwu.>>

³² Nghaduu a difwi owitukwu mgban ba, i di wo ma imio obyun ita mi ele.

Li eme shewo ngha?

³³ A ba iKapenahun. Ono ngwi o wodze ozu ne, o byi ma gbæe, <<Li alungwo ngwi ema le tangwe ikyen mi ofe?>>

³⁴ Kpaa a kwondu ba ikyekye mi ofe ma a teyi tangwodze gbæe li eme shewo ngha.

³⁵ IYesu si soke ese, kwu iwyodefa ntona ela nya ma gbæe, <<Kini inggise mina oli ababo yo, li kyeme o ka li olele dika li ongbido mgbi angbeka duu.>>

³⁶ O nu ongwæ ongbungbe wa kwudzeke idzidze mgbi ama. O kye abo don alubo, si nya ma gbæe,

³⁷ <<Inggise ta ngbe onyi mi idzidze engbe ntone mi iyi mgbi ani yo, o gbe ani; ma inggise ta ngbe ani yo, gbe ani ta ba kpaa li ongwu ndo ani eso mani.>>

Inggise nkyili eyi ba duu li emideyi

³⁸ IJon gbæe, <<Otsetse, eyi di inggise oka le lo onodzi emese onya to mi iyi mgbi abu kpaa eyi nyan gbæe non nya, ikyekye o li onyi mbi eyi ba.>>

³⁹ Ne iYesu gbæe, <<Ka non nya ba, inggise onyi nkyungwo okwulewo mi iyi mgbi ani se ka ye kyata gbodze oka obube ikpewo ani dzema ba,

⁴⁰ lubana ali inggise nkye iga fyi yi eyi bayo dze yi eyi.

⁴¹ N nya ema otsitsi, inggise ta nnu abu eni mi ibwe mi iyi mgbi ani ikyegbæe ema li emi iKrestu yo, li kyeme-kyeme umba mgban ka nyan ba.

Onu inggise gbese mi obube

⁴² <<Ma kini inggise onyi nu onyi mi ito engbe ama oshilele ama nnoyeye mbi ani ntone gbese mi alobube yo, ka tatase lon nu ma kye onikwao shan onbukwo kyon ngwuta woke ekyoo okwukwo.

⁴³ Kini abo mgbi abu onyi li nu abu le gbese mi alobube yo, kye dzelu ngwuta. I tatase ni abu kaka oshishe yi mmya ngha onu abu kaka udola yi abo efa.

⁴⁴ (Imbe ngwi awi mgbi ama li kwulu ba, ngwi ola na kpaa li gye myunu ba nani.)†

⁴⁵ Ma kini afo mgbi abu onyi nu abu gbese mi alobube yo, kye dzelu ngwuta. I tatase ni abu kaka oshishe yi afo onyi odzedze ngha ngwi abu ka dze yi afo efa nu ma di kye abu ngwuta woke udola mani.

⁴⁶ (Imbe ngwi awi mgbi ama li kwulu ba, ngwi ola na kpaa li gye myunu ba nani.)‡

⁴⁷ Ma kini ine mgbi abu li nu abu le gbese mi alobube yo, kye todulu ngwuta. I tatase ni abu kaka esuto mgbi Imgbasho yi ine onyi ngha odze yi ine efa nu ma kye abu ngwuta woke udola,

⁴⁸ imbe ngwi

<< <awi mgbi ama li kwulu ba,

ngwi ola na kpaa li gye myunu ba nani.>

⁴⁹ Ama nkyedo ani duu ka nye mi iso dafi inggise li kye mmwaa dzi ungwo ofife mgbi ama se kye toola mani.

⁵⁰ <<Mmwaa tishi, nghaduu ni mmwaa dze yi mfya wuba, ema ka kyosinese non ye dze yi mfya? Fyumfya dafi mmwaa yi ewema, di dze mi iyu yi ewema na.>>

10

IYesu tsungwo mi odze eba oghaagha

¹ Neta iYesu si lu dzata imbe na ka kaka ayese iJudia di fa ekyoo iJodan. Ibyi inggise di ba mbon, ta dafi o teyi li kyo mani, o tso ma.

* 9:29 9:29 Olololo angbeka gbæe li mi ibo yi ondu otukwu-tukwu.

† 9:44 9:44 Ambulu ne dze mi olololo angbeka ba.

‡ 9:46 9:46 Ambulu ne kpaa dze mi olololo angbeka ba.

² Emi iFarasi angbeka ba wa mbadin yi ita gbɛɛ, <<Li ola ni ongyulo gheeba yi owaan?>>

³ IYesu byi ma gbɛɛ, <<iMose wo ema ola sine?>>

⁴ A gbɔgbɛɛ, <<iMose gbela gbɛɛ ni ongyulo dɛɛ afɛ ogheeba duuse lo ongyaa onya lu.>>

⁵ IYesu si nya ma gbɛɛ, <<IMose wo ema ola nɛ ikyɛkyɛ ema fyumfyɛ nu ma tso ema ungwo.>>

⁶ Kpaa mi owita-wita mgbi ɛsɛ ma Imgbasho <Mɛ ongyulo yi ongyaa kyoona.>

⁷ <Ikɔyɛghane ongyulo ka dzata otson yi onon yido kwokyi yi owan,

⁸ ta ama efa ka yɛɛ ikpewo onyi.> Hinine a yama li ikpewo efa wuba, kpaa a yɛɛ ewo onyi.

⁹ Nghane ungwo ngwi Imgbasho kye kwokyi yi eka yo, ni inggise ka gha ma ba.>>

¹⁰ Ngwi a yido lu ozu nɛ, emi ongwafɔ IYesu byun ita mi ikyɛ ungwonɛni.

¹¹ O nu uka gbɛɛ, <<Ali ongyulo ngheeba yi owan yɛ lu ka kye ongyaa oka yo, le kyo amah biyan.

¹² Ma kini ongyaa to mi ude oban yɛ lu ka bongyulo oka yo, o kyo amah.>>

Engbe ama ogyengye yi iYesu

¹³ Ibyi inggise gbe engbe ama ogyengye le ba mbi iYesu onon kye abɔ gbo ma ewo, nghaduu engwafɔn fwa yi ama.

¹⁴ Ngwi iYesu di ungwonɛ nɛ, o kyitingga. O nya ma gbɛɛ, <<Dzata engbe ama oshilele nu ma ba mbi ani, ka yama kwɔ ma ba, bana esuto mgbi Imgbasho dɛɛ mi ikyɛ ama ntone sini.

¹⁵ N nya ema otsitsi, ali inggise nka gbe esuto mgbi Imgbasho dafi ongwɛ ogyengye bayo, ka yagba kaka ele ba.>>

¹⁶ Nɛ o si kyɛlu engbe ama ogyengye ntone byike abɔ mgban, kye abɔ do ma kye mse be ma ewo.

Mmafi inggise awuya

¹⁷ Dafi iYesu kye ofɛ dikye le lu nɛ, ongyulo oka tsinya kɛ mbon ka kye akwafɔ kwoke ɛsɛ mi iyayin. O byita gbɛɛ, <<Otsetse osuse, li ekɔyɛ ngwi ani ka kyo kyɛmɛkyɛmɛ otu oshishe igyegwu?>>

¹⁸ IYesu nyan gbɛɛ, <<Kyɔsine ngwi abu kwu ani di osuse? Inggise onyi yama li osuse ba sede li Imgbasho yuon ta.

¹⁹ Abu ye ola: <Ka ngwo inggise ba, gbaamah ba, ka yimi ba, ka yama kyo obwende atsika ba, ka kyo inggise ogye ba, sunu otsabu yi onabu.> >>

²⁰ O nya iYesu gbɛɛ, <<Otsetse, ungwo ntone duu ani kyo ma nye ngwi ani ka li ongbɛ mani.>>

²¹ Ta iYesu din inɛ si dɛɛ yi okpitukwu mbon. O nyan gbɛɛ, <<Ungwo onyi sisi mbi abu, lu, ka kye alungwo ngwi abu dzeyan

duu gya kye awuya ma nu emi adɛɛ, ta abu ka dɛɛ yi aludu mi esho. Taman ye, ba wa kyɛdo ani.>>

²² Mi elodɛɛ nɛ inɛ mgbi inggise na si kyata mi ikyɛ yɛɛ tsikitsiki. O tase yi mtse lu, ikyena o dɛɛ yi aludu shewo kpakpa.

²³ Nɛ iYesu si kyata inɛ kyidi nya emi ongwafɔn gbɛɛ, <<Ka fyumfyɛ kpakpa ni inggise aludu kaka esuto mgbi Imgbasho!>>

²⁴ I kwulu engwafɔn ewo mi elodɛɛ mgban. Kpaa iYesu di yile odɛɛ nɛ gbo gbɛɛ, <<Engbe, dafi i suno okaka esuto mgbi Imgbasho maa!

²⁵ Ka nghao suno ba onu ilakwumyi kaka ifo edi fato ngha onu inggise udza kaka esuto mgbi Imgbasho.>>

²⁶ Nɛ i nghao kwulu emi ongwafɔn ewo, ta a gbo yi ewoma gbɛɛ, <<Nghama li emɛ tsatso ka watɔ?>>

²⁷ IYesu di ma inɛ si gbɛɛ, <<Mbi inggise yo ungwo ka yagba dɛɛ ngha gbe ba, nghaduu mbi Imgbasho yo ka yagba dɛɛ ngha; bana mbi Imgbasho yo alungwo duu dɛɛ kyɛmɛkyɛmɛ.>>

²⁸ IPyita si nyan gbɛɛ, <<Eyi dzata alungwo duu kyɛdo abu!>>

²⁹ IYesu nu uka gbɛɛ, <<N nya ema otsitsi, inggise onyi ngwu dzata ude naadi emi ongwunon engyulo yi engyaa naadi onon yi otson hona engbe naadi okwo mi ikyɛ ani beyi Eso Osuse yo,

³⁰ ka yama ndan owa yido tuun mi onɔ ngwi eyi wodɛɛ ele nɛ beyi onɔ ongwɛ iyayi ba.

³¹ Nghaduu emi ababo gwuba ka wa yɛɛ emi olele, emi olele dika yɛɛ emi ababo.>>

IYesu di gbɔdɛɛ ikwu ewon

³² A kye ofɛ dikye le lu iJerosalin, iYesu teyi ofɛ, man i kwulu emi ongwafɔn ewo, ama nkyɛ ma iyikpa kpaa imio wo ma. Ta o di gbleke enggengga yi emi iwyodefa ntona nya ma ungwo nka wa kyo ongwɛ mani.

³³ O gbɔgbɛɛ, <<Eyi le lu iJerosalin, nɛ a ka kye Ongwɛ Inggise wo engyukwo ama ofife yi etsetse mgbi ola abo. A ka ngwon ikwo ikwongye di kyon wo Udzengye abo,

³⁴ a ka nyan agya di kyanggwɔ kyin ye gbon ibe di ngwon. Ni i wa mɛ egbe eta, o ka kyato mi ikwu.>>

Ibo mgbi ifensi beyi ifon

³⁵ Ta ifensi yi ifon, emi ongwɛ iDzɛbedi, ka ba mbi iYesu. A nyan gbɛɛ, <<Otsetse, eyi mina gbɛɛ abu ki kyo eyi alungwo ngwi eyi mina duu.>>

³⁶ IYesu byita gbɛɛ, <<Li ekɔyɛ ngwi ema mina gbɛɛ ni ani kyo ema ele?>>

³⁷ A gbɛɛ, <<Ni onyi mbi eyi so abugye mgbi abu oka mi abube mi okwokwo mgbi abu.>>

³⁸ Ne iYesu gbɛɛ, <<Ema yama ye ungwo ngwi ema tole mina na ba. Ema ka yagba wa mi ibwe ngwi ani ka wa naadi kyo iBatisima ngwi a kyo ani ma gbɛɛ?>>

³⁹ A nu uka gbɛɛ, <<Eyi ka yagba.>> Man iYesu si nya ma gbɛɛ, <<Ema ka wa mi ibwe ngwi ani wa di kyo iBatisima ngwi ani kyo mani,

⁴⁰ nghaduu oso abugye hona abube mgbi ani yama li ani ka nu ofe ba. Imbe ntone dze mi ikye mgbi ama a kye dze ma mani.>>

⁴¹ Ngwi iwyo ntona fwo ungwone ne, itingga kyo ma kpakpa yi ifensi beyi ifon.

⁴² Man iYesu si kwu ma ela kwakye gbogbɛɛ, <<Ema ye ama ngwu a di gbɛɛ a me ogbe Udzengye teyi li kyo mfye mboma, engyukwo ama oshewo mi idzidze ma li kyo mfye ikpewo ma.

⁴³ Mbi ema yama li nga ba. Kini inggise onyi mbi ema mina oyee ongbodzi inggise yo, li kyeme-kyeme no yee ongbido mgbi angbeka,

⁴⁴ ma ali inggise nmina oli ongwɛ ababo yo, li kyeme-kyeme no yee ofyee mgbi ema duu.

⁴⁵ Bana Ongwe Inggise abuan ba ikyegbɛɛ nu ma wa kyon ido ba, kpaa owa kyokyo, odi kye oshishe mgban nu ikye onagbe ibyi inggise.>>

IYesu kwulu iBatimayo ine

⁴⁶ Ne a si luba ijeriko. Dafi iYesu yi engwafoon yi ibyi inggise wafu ungwonyi le tase dzata igeli ne, inggise obine ngwu a li kwun di iBatimayo (itan di, Ongwe iTimayo), sodze ewo ofe le bibo.

⁴⁷ Ngwi o fwo gbɛɛ li iYesu ongwɛ iN-adzareti ne, o wita kweela gbɛɛ, <<iYesu, Ongwe iDevedi, di ani elela!>>

⁴⁸ Ibyi inggise kwon di nyan gbɛɛ non yile ondu tukwu shili-shili, kpaa o kweela ngaabo ogbugbe gbɛɛ, <<Ongwe iDevedi, di ani elela!>>

⁴⁹ Ta iYesu si kwulese gbogbɛɛ, <<Kwun ela na.>> A si kwu obine na ela gbɛɛ, <<Dze yi atsa! Kyato nto! O le kwu abu ela.>>

⁵⁰ O si gbe angwuto mgban ngwuta mi agya oka, kyato vla ke mbi iYesu.

⁵¹ Ne iYesu byun gbɛɛ, <<Li alungwo ngwi abu mina gbɛɛ ni ani kyo abu ele?>>

Inggise obine na gbɛɛ, <<Otsetse, ani mina gbɛɛ n ki dine.>>

⁵² Ta iYesu gbɛɛ, <<Lu, oyeye onuunu mgbi abu ngyelu abu ootse.>> Vla-vla ma jo ine mgban kwulu o di diye kyedo iYesu mi ofe le lu.

11

IYesu kaka iJerosalin mi onghaangha

¹ Dafi a dze kwɛkwɛ okaka iJerosalin di ba iBetifege beyi iBetani mi Ungwo Olivi ne, iYesu do engwafoon efa eso,

² o gbo yi ama gbɛɛ, <<Ke agwo ndze ema iyayi nani, ni ema kaka ele yo, ema ka di ongwɛ itaklimyi shadze ele, ngwi inggise onyi toon ye waba. Shan kye ba mmeneni.

³ Kini inggise byi ema gbɛɛ, <<Kysine ngwi ema le kyungwone nga yo?>> Nyan gbɛɛ, <<Odze wo Otse iYesu mi ele o ka wa yllen mi ono gwee.>>

⁴ Ta a si ke ka tu ongwɛ itaklimyi shadze onufe kye ine byi ofe. Dafi a le shan neta,

⁵ inggise angbeka nkwulese to imbe na byi ma gbɛɛ, <<Li alungwo ngwi ema le kyo, ema le she ongwɛ itaklimyi ne?>>

⁶ Ne a nu uka dafi iYesu tsekise nya ma mani, man inggise ntona si dzamata nu ma kye lu.

⁷ Ngwi a kye ongwɛ itaklimyi ma ba mbi iYesu ne, a kye angwuto mgbi ama tukwun ekpo man iYesu todde ke.

⁸ Ibyi inggise gbe angwuto mgbi ama tase mi ofe, angbeka dze afe otse mi ondu okwo ngwuta toke ese mi ofe.

⁹ Ama nteyi tole kiyayi yi ama nkyedo ma ma, kweela gbɛɛ,

<<Osana!*

Mse no dze yi ongwu nba

mi iyi mgbi Otse Imgbasho neni!>>

¹⁰ <<Mse no dze yi

esuto mgbi otseyi iDevedi nka ba nani!

Osana mi onghaangha!>>

¹¹ Ne iYesu wa kaka iJerosalin si lu mi ozu okwukwo osunu Imgbasho mi iJerosalin nani. O kyidi alungwo tsatsadu, nghaduu ngwi ono gbese wa ne, o tase lu iBetani yi iwiyodefa ntonani.

IYesu lo inggise onya

to mi ozu okwukwo osunu Imgbasho mi iJerosalin

¹² Tegblifan dafi a le dzata ogalu mgbi iBetani ne, enbwa do iYesu.

¹³ O di andundu kwo mbombo yi afe mi efu yugu-yugu, o si ke oka kyidi kaba awawa to ele. Ngwi o ka to itan ne, o yama tu unkonyi ba se afe ta, ikyena li ono mgban owa owawa ba.

¹⁴ O si nya ekwo na gbɛɛ, <<Inggise onyi ka yama tu awawa mbi abu gye wuba.>> Emi ongwafoon fwo dafi o gbo nga mani.

¹⁵ Ngwi a kaka iJerosalin ne, iYesu kaka ozu okwukwo osunu Imgbasho mi iJerosalin na man wita olo ama nle kyummya beyi ama nle gya mi imbe na onya to. O tsamu adinyatse mgbi ama nle nyine udza beyi itase oso efu mgbi ama nle kye ingyakpa gya,

* 11:9 11:9 Osana li iyi mi ondu iHibru itan di Nagbe! I yee iyi ungwo otsetse

¹⁶ di nu inggise onyi ofe gbɛɛ non kyum-mya mi idzidze ozu okwukwo osunu Imgbasho na ba.

¹⁷ Man o si le tso ma ungwɔ, o gbɔgbɛɛ, <<Afe lo gbɛɛ:

<< A ka kwu ozu mgbi ani gbɛɛ

ozu ibo mgbi ese duu baa>?

Nghaduu ema kyatan yɛɛ <imbe mgbi emumyi ama oblofe.> >>

¹⁸ Ngwi engyukwo ama ofife beyi etsetse mgbi ola fwo ungwɔne neta a si wita opita ofe ngwi a ka ngwɔn, bana a mion, ikyekye le kwulu inggise duu ewo mi otsootso mgban.

¹⁹ Ngwi onɔ gbɛɛ nɛ, a to dzata ogalu.

Andundu ongwɔngwɔ

²⁰ Mi egbegbe, ngwi a le lu nɛ, a di andundu na ngwɔ wita kye akpa lu ikyen.

²¹ Ta iPyita wɛ di nya iYesu gbɛɛ, <<Otsetse, dii! Ekwo andundu ngwi abu won ikamba nɛ ngwɔ!>>

²² iYesu si nyan gbɛɛ, <<Dzɛ yi oyɛyɛ onuunu mbi Imgbasho.

²³ N nya ema otsitsi, yeba ni inggise nya unggwɔ nɛ gbɛɛ, <Lu, kye ewabu ka ngwuta mi ekwoo okwukwo,> di yama dzɛ yi angwɛ mi itukwu ba di noyɛyɛ gbɛɛ ungwɔ ngwi ongwɔ gbo na ka kyo ngha yo, a ka kyon ele.

²⁴ Nghane n nya ema, alungwɔ ngwi ema bo mi ibo yo, noyɛyɛ gbɛɛ ema tun wa, ta dika li mgbi ema.

²⁵ Mi onɔ ngwi ema kwulese le bibo yo, dzata angbeka ama nkyo ema obube. Ta Otsema ndze esho na ka dzita ema yi ali ibwubwe mgbi ema.>> [

²⁶ kpaa ni abu dzata inggise yi obube bayo, Otsabu ndze esho kpaa ka dzita abu yi obube mgbi abu ba.][†]

Ita mi odze mfye mgbi iYesu

²⁷ A di ba wa kaka iJerosalin, ta ngwi iYesu le kyikyɛ kye mi aye ozu okwukwo osunu Imgbasho nɛ, engyukwo ama ofife yi etsetse mgbi ola beyi engyukwo emi iJuda ba mbon.

²⁸ A byita gbɛɛ, <<Li mi ali mfye ngwi abu le kyungwɔ ntone? Di li eme nu abu mfye okyungwɔ ntone?>>

²⁹ Nɛ iYesu si gbɛɛ, <<Ani kpaa ka byi ema ita onyi ta. Nu ani uka na, ta n ka nya ema imbe ngwi ani tu mfye le kyungwɔ ntoneni.

³⁰ Nyen na, iBatisima mgbi iJɔn nɛ tokye mi esho naadi mbi inggise?>>

³¹ A si gbo yi ewoma gbɛɛ, <<Kini eyi gbɛɛ, <Kye mi esho,> o ka byita gbɛɛ, <Ma kyosine ngwi ema nun oyɛyɛ ba?>

³² Kpaa ni eyi gbɛɛ, <Kye mbi inggise yo>....>> (A tsmio ibyi inggise, bana ali inggise ye jo gbɛɛ iJɔn li oyegbo.)

³³ Nɛ a nu iYesu uka gbɛɛ, <<Eyi ye imbe ngwi i tokye ba.>>

Man iYesu gbɔgbɛɛ, <<Ngyese ani kpaa ka nya ema ito mfye ngwi ani le kyungwɔ ntone ba.>>

12

Utsa mgbi emi ibwubwe ngwu

a kye okwɔ wo ma abo

¹ O si wita ogbɔdze yi ama mi utsa gbɛɛ: <<Inggise shi okwɔ awawekwo*. O mbe ogalu kpakeke won, di tishe ogbe eni owawa ekwɔ di tuo otila ikye ongyo. Ta o kye okwɔ na wo emi okwɔ angbeka abo si lu agaba.

² Mi onɔ oshe eto mani, o do ongbido mgban eso mbi ama ngwu o kye okwɔ wo ma abo ma gbɛɛ non ka gbe owawa ekwɔ ongyi okwɔ na mboma.

³ Kpaa a kpaklin, gbon lon onya lu abubo.

⁴ Ta o di do ongbido oka eso mboma; a kye ungwɔ zudɔn ikye onun ayiwi.

⁵ Otsungwɔ okwɔ na diyɛ do oka, ongwu na a kyon kye ngwɔlu. O di do angbeka kwuba, angbeka ma, a gbo ma, angbeka yo, a ngwɔ ma.

⁶ <<Otsungwɔ okwɔ sisi yi inggise onyi ta odeso, ongwɔn ongwu ongyulo, ongwu nkpan itukwu saan. O dɔnsɔ olele gbɛɛ, <A ka nu ongwani mmwe.>

⁷ <<Nghaduu ama odi mi okwɔ ntona gbo yi eka gbɛɛ, <Nene li ongwɛ nka gyokwude ma aani. Ba na, ni eyi ngwɔlu, ta okwude ka yɛɛ mgbi eyi.>

⁸ Nɛ a si kyon kye ngwɔlu, di kye ikwɔ mgban ngwi tase mi okwɔ.

⁹ <<Li alungwɔ ngwi otsungwɔ okwɔ na ka kyo? O ka ba wa ngwɔlu ama ngwu o kye okwɔ wo ma abo ntona di yile okwɔ nu angbeka.

¹⁰ Ema gbo Afe nɛ walo:

<< <Akwutɛ ngwi ama ombɛ ozu fwan ma i yɛɛ okwulu ikye ozu;

¹¹ li Otɛ Imgbasho kyungwɔneni, nekpaali ungwɔ okwulewo mbi eyii?>>

¹² Ta a pita ofe obwan ikyekye a ye dafi o gbo utsa na ikye mgbi ama. Nghaduu a le mio ibyi inggise; nɛ a si dzanta lu.

Okpa udza ifyɛɛ nu iSida

(Uto mgbi emi iRoma)

¹³ A do emi iFarasi angbeka eso mi iyikpa yi emi iHerude mbi iYesu ikye oka bwan mi elodze mgban.

[†] 11:26 11:26 Ambulu nɛ dzɛ mi olobo angbeka ba.

ungwɔ owawa yan.

* 12:1 12:1 Ekwo nɛ li wa owawa ngwi emi Israi nose li kye mɛ

¹⁴ A ba mbon wa gbæ, <<Otsetse, eyi ye abu li inggise otsitsi. Abu li mio inggise ba, ikyekye abu li kye oshewo nu inggise mi odzædzæ mgbi ama ba; kpaa abu li tso ofe mgbi Imgbasho imbisôn-mbisôn yi otsitsi. Nê li ola ni eyi kpa udza ifyæ nu iSidza naadi li ola ba?

¹⁵ Ni eyi kpa naadi ni eyi ka kpa ba?>>

Nghaduu iYesu ye ewæ mgbi ama, o nu ma uka gbæ, <<Kyôn ngwi ema le mina okya ani ukya? Kye isule ma wa nin di.>>

¹⁶ A kye isule ma ba, man o byi ma gbæ, <<Nenê li onodzi mgbi emæ dædzæ ele? Di li olcôlo mgbi emæ?>>

A gbæ, <<Li mgbi iSidza.>>

¹⁷ IYesu si nya ma gbæ, <<Kye ungwô mgbi iSidza nu iSidza di kye mgbi Imgbasho nu Imgbasho.>>

Man i kwulu ma ewo biyan.

Eba mi onô okyæ mi ikwu

¹⁸ Nghænê emi iSadusi, ama ngbæ okyæ-kyæ mi ikwu dzema ba ma, ba mbi iYesu yi ita.

¹⁹ A gbæ, <<Otsetse, iMose lo gbæ ni ongwunô inggise kwulu dzata ongyaa kpaa mba engbæ bayo, inggise na no yile owakwædê na kyemê-kyemê di mba engbæ mi ikyê ongwunô ongwu nkwalu nani.

²⁰ Engwuneka nghi egyafa nose to. Ongwu ababô kye ongyaa kwulu dzata ongwæ onyi ba.

²¹ Ongwu fan yile owakwædê na, kpaa o di kwulu dzata ongwæ onyi ba. Ongwu ta kpaa li ngha.

²² Mi otsitsi, onyonyi mbi engyulo egyafa ntônê dzata eto onyi ba. Ongyængyæ duu, ongyaa na kpaa wa kwulu.

²³ Mi egbê ngwi inggise ka kyæ mi ikwu ma li emæ ngwu ongyaa nê ka li owan, ngwi ama egyafa duu kyon?>>

²⁴ IYesu nu uka gbæ, <<Ema boofê ikyegbæ di ema ye ungwô ngwi Afê lo ba di ye mfyæ mgbi Imgbasho kpaa ba.

²⁵ Bana mi onô ngwi inggise ka kyæ mi ikwu mani, a ka kye ongyaa hona kye ongwæ nu eba wuba; a ka to dafi engyêsô emi esho mani.

²⁶ Mi ikyê odzæ okyæ mi ikwu nê, ema gbô mi Afê mgbi iMose, mi odzæ mgbi oshe na walo? Dafi Imgbasho nyan gbæ, <Ani li Imgbasho mgbi Abraham, Imgbasho mgbi Adziki di li Imgbasho mgbi ijeko ma baa?>

²⁷ O li Imgbasho mgbi emi ikwukwô ba, kpaa Imgbasho mgbi emi oshishe. Ema le boofê timbi saan!>>

Ola onghaangha

²⁸ Onyi mi etsetse mgbi ola mgbi iMose ba wa fwo ma le tangwodzê. Dafi o di gbæ iYesu nu ma uka osuse neta, o si byun gbæ, <<Mi ola duu ma, li ole nghao wuuta?>>

²⁹ IYesu nu uka gbæ, <<Ongwu nnghao wuuta ma, li ongwu aani: <Fwo na, ema emi Israi, Otse Imgbasho mgbi eyi, Otse na li onyi.

³⁰ Otse Imgbasho mgbi abu no kpa abu itukwu yi itukwu mgbi abu duu yi oshishe mgbi abu duu beyi mfyæ mgbi abu duu.>

³¹ Ongwu fan yô: <Inggise nwatse dô abu no kpa abu itukwu dafi ewabu mani.> Ola oka dzema nshewo ngha ola ntônê ba.>>

³² Otsetse mgbi ola na nu iYesu uka gbæ, <<Otsetse, abu gbô tishi. Abu li ayin oghôgbæ Imgbasho li onyi oka dzema ba se ongwu ta mani.

³³ Onon kpa abu itukwu, yi itukwu mgbi abu duu yi oyeye mgbi abu duu beyi mfyæ mgbi abu duu, inggise ongwu nwatse dô abu no di kpa abu itukwu dafi ewabu na, li ungwô nwuuta ngha umba ama otoola beyi ama ofifê duu.>>

³⁴ Ngwi iYesu di gbæ o nu uka mi ozoyeye nê, o nyan gbæ, <<Abu dzæ mbombo yi esuto mgbi Imgbasho ba.>> Ta mi onô na lu iyayi inggise onyi kpaa yagba byun ita angbeka wuba.

IKrestu nê li Ongwæ eme?

³⁵ Ngwi iYesu le tso mi ozu okwukwô osunu Imgbasho mi ijerosalin nê, o si byita gbæ, <<Kysinê ngwi etsetse mgbi ola mgbi iMose gbôgbæ Ongwu Imgbasho zondû gbæ o ka wa dule ese wato (iKrestu) ma li Ongwæ iDevedi?

³⁶ Onodzi Osaan kye iDevedi abuan kpaa teyi non gbæ:

<<Otse Imgbasho nya Otse mgbi ani gbæ:

<<Sokê mi abugyæ mgbi ani nghataa ni ani wa nu engyikyili mgbi abu yæ itse mgbi abu ogbê afô dô efu.>> >

³⁷ iDevedi abuan kwun di <Otse.> Nghænê ka kysinê ngwi o ka li ongwân?>>

Ibyi inggise ntônê fwo otsootso mgbi iYesu yi atsa mi itukwu mgbi ama.

IYesu kwo adô mi otsootso mgbi etsetse mgbi ola

³⁸ Mi otsootso mgbi iYesu ma, o gbæ, <<Kye inê byi etsetse mgbi ola na. A li mina okyikyê yi angwuto owulu-wulu nu ma dile ta ma angba mi ifyidu,

³⁹ odi sô itse ngwi a nghao kye wuuta mi ozu okwakye mgbi emi ijuda yi imbe okpôngô mi oga.

⁴⁰ A li gye mmgbê mi udê mgbi emi owakwædê di li bibô tunto otso gbæ ama tishi. Itô inggise ntônê Imgbasho ka kwo ma adô she kpakpa.>>

Umba mgbi owakwædê

⁴¹ Man iYesu sise mi agya imbe ngwi a gbe umba le woke, le di ibyi inggise kye udza mgbi ama le woke mi ashiko mgbi ozu okwukwô osunu Imgbasho mi ijerosalin.

Ama odze yi udza kwuba kpaa kye udza mgbi ama le woke ele.

⁴² Nghaduu ongyaa owakwade adze ba wa nu anini efa, ngwi me ikobo onyi ta.

⁴³ Ne iYesu si kwu engwafoon ela ba mbon nya ma gbɛɛ, <<N nya ema otsitsi, ongyaa owakwade adze ne nghao kye woke mi ashiko ngha angbeka duu.

⁴⁴ Ama duu a nu mi odzɛɛdze mgbi aludu mgbi ama; kpaa owakwade ne yo, li mi adze mban ngwi o nu, li ungwɔ ngwi o dze biyan duu onon dze oshishe mani.>>

13

Ambe mgbi ese ongyeengye

¹ Dafi iYesu le tase mi ozu okwukwo osunu Imgbasho mi iJerosalin neta, onyi mbi engwafoon nyan gbɛɛ, <<Dii, Otsetse! Li ali ito akwutse osugbo-osugbo den! Li ali ito ozu ogbosine nghalo!>>

² IYesu nyan gbɛɛ, <<Abu di ozu ama oshewo ntone we? Ikwutse onyi mmene kpaa ka sisi do ikye oka ba; ali ikwutse duu a ka wa kye gbobu tukwu ese.>>

³ Ngwi iYesu sise mi Unggwɔ Olivi mi agya ozu okwukwo osunu Imgbasho mi iJerosalin ne, iPyita yi ifensi yi ifon beyi Andru byun daada gbɛɛ,

⁴ <<Nya eyi, li alono ngwi ungwɔ ntone ka wa kyo? Dika li ali ambe ka tso gbɛɛ ungwɔ ntone le ka mbwumbwo?>>

⁵ IYesu nya ma gbɛɛ: <<Gbewebyi na, ka nu inggise kpagya ema wo ba.

⁶ Inggise kwuba ka ba mi iyi mgbi ani, le gbatsika gbɛɛ, <Li ani li iKrestu mani,> dika kpagya inggise wo kwuba.

⁷ Mi ono ngwi ema fwo ika beyi odze a gbɛɛ mgbi ika yo, ka teeyi ba na. Bana ungwɔ ntone duu ka kyo kyeme-kyeme, kpaa li ongyeengye ese wa daaba.

⁸ Ese ka kyee ika beyi ese oka, esuto ka kyee ika beyi esuto oka. Ese osuusu ka dze mi imbe idzidza-dzidza, beyi enbwa. Ungwɔ ntone li owita-wita mgbi iso.

⁹ <<Gbewebyi ewema kyeme-kyeme na. A ka kye ema nu mi abo okwakye mgbi ama ogbiikwo nu ma gbo ema ibe mi ozu okwakye mgbi emi iJuda. Mi ikye mgbi ani a ka kye ema ba ine emi iGona yi emi utɔ dafi obwende mboma.

¹⁰ Ma Eso Osuse ne a ka teyi gbɔn kyeme-kyeme mi ese duu.

¹¹ Kini a bwa ema kye ba owa gbo ema ikwo yo, itukwu no ka teyi kaka ema ewo mi odze ngwi ema ka gbo ba. Nghaduu gbo ali odze ngwi a kye ba mbi ema mi ono na mani, bana li ema kale gbɔdze ba, elodze mgbi ema ka kye mbi Onodzi Osaan.

¹² <<Inggise ka kye ongwunon nu ikwu, otsongwe kpaa ka kye ongwunon nu. Engbe ka ngha ama omba ma ado di nu ma kwikwu.

¹³ Inggise duu ka kyili ema mi ikye ani, nghaduu inggise nkwlɛse kpoklɔ ba ongyeengye ka watɔ.

¹⁴ <<Mi ono ngwi ema di ungwɔ <idza nka nu odzili-dzili> kwulɛse dze imbe ngwi i wogyo gbɛɛ ki dze bayo, inggise nle gbo ungwɔ olɔɔɔ ma no difwi, ne ama nto iJudia nu ma tsinya lu ungwɔ.

¹⁵ Ni inggise onyi ndɔdze ikyendu mban ka tashulu ba ese naadi kaka ozu oka kye ungwɔ onyi tase ba.

¹⁶ Ni inggise onyi nkɛdze okwo kpaa ye ba ude owa gbe angwuto mban ba.

¹⁷ Nghaduu odze ka tu engyaa ama nto yi ifewo yi ama nle nu engbe abe mi egbe ntonani!

¹⁸ Ema bibo gbɛɛ ungwone no ka kyo mi owa ba,

¹⁹ ikyekye egbe ntona ka li egbe adze ngwi Imgbasho ta ese jo ito adze na yama dze ngha ye ba, ma dika dze ngha ono onyi kpaa wuba.

²⁰ Kini Ote Imgbasho kye mwalu egbe ntona bayo, inggise onyi kika watɔ ba. Kpaa mi ikye ama ngwu o sadu mayo, o kye mwalu egbe nani.

²¹ Mi ono na kini inggise nya ema gbɛɛ, <Dii, Ongwu Imgbasho zonu gbɛɛ o ka dulu ese watɔ ma (iKrestu) dzana!> Hona, <Dii, o dze aali!> Ka noyeye mi ele ba.

²² Bana emi iKrestu atsika beyi oyegbo emi atsika ka tole kyo ambe beyi ungwɔ ama okwukwo ikye okpagya ama a sadu ma ma wo, ki no li kyeme-kyeme yo.

²³ Nghane gbewebyi ewema na; ani teyi nya ema alungwɔ duuse ni ono na wa gyo.

²⁴ <<Nghaduu ni adze na wa nye mata,

<< <ono ka yifu,

ofyia dika tso osa mban wuba;

²⁵ mce ka yangwuta mi esho,

Imgbasho ka kyo mfye,

alungwɔ mi esho duu ka suusu.>

²⁶ <<Mi ono na inggise ka di Ongwe Inggise kye akpa mi esho yi mfye okwulewo beyi okwɔkwo.

²⁷ Ta o ka do engyeso mban eso mi ayese ene wa gbe ama ngwu o sadu mi odonu mgbi ese nghataa lu mi odonu mgbi esho ma duu kwake mbonyi.

²⁸ <<Ikyenghane kpayi ozoyeye ne mbi ekwo andundu na: Ni abɔn kyinda di baafe mata, ema li ye dafi li akyonova mani.

²⁹ Nghaduukpaa, ni ema di ungwɔ ntone le kyo yo, ye na gbɛɛ dze kwɛkwe, jo okaka onufozu.

³⁰ N le nya ema otsitsi, ungwɔ ntone duu ka kyo se ese ne ka ngye.

³¹ Esho yi ese ka nye, kpaa elodze mgbi ani ka yagba nye ba.

Inggise ye egbe hona ono ma ba

³² <<Inggise onyi ye egbe hona onɔ ma ba, engyesɔ emi esho kpaa ye ba, naadi Ongwe, kpaa li Otse Imgbasho yuon ye.

³³ Kwasisa di ngyo na! Bana ema ye egbe ngwi onɔ na ka ba ba.

³⁴ Dze dafi inggise le lu agaba: O dzata ude di gbe engbido mgban toke mi ungwɔ mgban duu, ali inggise mgbi ama yɔ o nun ido mgban, di nya ongwu ndze onufozo ma gbɛɛ non ngyo.

³⁵ <<Nghane le ngyo na bana ema ye onɔ ngwi otsungwude na ka ye ba, kyayina ka li mi onɔde, naadi ka li mi idzidze otu, hona mi onɔ ngwi ogbigbi ka teela, naadi ka li mi ikyegbe ho.

³⁶ Ki non ye bwabwa kpaa, no ka tu ema le nuna ba.

³⁷ Ungwɔ ngwi ani le nya ema ne, n le nya ali inggise duu gbɛɛ: <Ngyo na!> >>

14

A kye engyie kyi iYesu ikye mi iBetani

¹ I sisi me egbe efa ngwi oga owe owato-wato mgbi emi Israi beyi ibredi ngwi a kye okwuna wo efu ba ka wa gyo neta, engyukwo ama ofife beyi etsetse mgbi ola mgbi iMose tole pita ofe mi oshu ngwi ama ka bwa iYesu di ngwɔn mani.

² A gbɔgbɛɛ, <<Kpaa no ka li mi egbe oga ba, bana inggise ka ndeye.>>

³ Mi onɔ ngwi iYesu dze iBetani mani, o sise ogye ungwogye mi ude inggise ongwu a li kwun di iSaimon inggise otsoma, ongyaa ba yi engyie ofyunfummya mi ikpokpo alabasta*, engyie mgbi ekwo iNadi† yuon. O kye ikpokpo alabasta na ondun kye kwulu, kye engyie ma yawo iYesu ikye.

⁴ Ama nto mi onɔ na ma, tole gbo mi itingga-itingga yi ewoma gbɛɛ, <<Nene li engyie ombeembe den lo?

⁵ A ki kye gya me udza nngaha udza ido onova onyi di kye udza ma gha emi adze.>> A si kyokyo yi ongyaa na mi itingga-itingga.

⁶ Nghaduu iYesu gbɛɛ, <<Ema dzanta na. Kyone ngwi ema le kakan ewo ngaha? O kyungwo nli osuse yi ani.

⁷ Bana emi adze to yi ema alono duu, ema ka ya ma abɔ alono ngwi ema mina duu. Kpaa ani yɔ, ema ka tu ani alono ba.

⁸ O kyungwo ngwi o yagba okyo. O kyi ani engyie mi ewo duuse ni onɔ ondzi ani wa gyo.

⁹ N nya ema otsitsi, mi ali imbe ngwi a le gbo Eso Osuse kpatse ese duu, ungwɔ ngwi o kyo ne a ka gbɔn, ikye ole wan.>>

¹⁰ Ta iJuda iSkaroti, ongwu nli onyi mbi emi iwyodefa ntona, ke mbi engyukwo ama ofife oka kye iYesu gya yi ama.

¹¹ I kpa ma ofwo odze neni a di zonu onun awuya. Nghane o pita ofe okyon wo ma abɔ.

Ungwogye mgbi Otse iYesu ongwɔ olele.

¹² Mi egbe ongwɔ ababɔ mgbi oga ibredi ngwi a kye okwuna wo efu ba, ngwi li ungwɔ eto mgbi ama ofife yi mmala oga owe owato-wato mgbi emi Israi ne, engwafɔ mgbi iYesu byun gbɛɛ, <<Li mi ole ngwi abu mina ni eyi ke ka melu abu imbe ogye oga owe owato-wato mgbi emi Israi ne?>>

¹³ Neta o do engwafɔn efa eso, nya ma gbɛɛ, <<Kaka ifu igeli na, ongyulo kye ishe eni dikye ka wa kpatse ema. Kyedon na.

¹⁴ Imbe ngwi o kaka ma, nya otsungwude ma gbɛɛ, <Otsetse byita gbɛɛ: Ozu ingyoga mgbi ani, ngwi ani ka gye oga owe owato-wato mgbi emi Israi yi emi ongwafɔ mgbi ani ma ko?>

¹⁵ Ta o ka tso ema ozu okwukwo mi ozeesho, ngwi a gbe okye to ele le fɛfɛ. Kye melu mi ikye eweyi na.>>

¹⁶ Emi ongwafɔ ntona si lu ifu igeli ka di ungwɔ ntona yeye dafi iYesu nya ma mani. Ne a kye kyolu ungwogye oga owe owato-wato mgbi emi Israi.

¹⁷ Ono wa gbese neta, iYesu wa kaka beyi emi iwyodefa ntonani.

¹⁸ Ngwi a sise kwongongo le gye ungwogye mi adinyatse neta, o gbɔgbɛɛ, <<Ani le nya ema otsitsi, onyi mbi ema ka kye ani gya, o so le gye ungwogye yi ani mmene kpaa.>>

¹⁹ A si yee elela dile byun onyonyi gbɛɛ, <<Li ani ba lo?>>

²⁰ Nghaduu iYesu nya ma gbɛɛ, <<Li onyi mbi emi iwyodefa, ama nkye abɔ wo uga yi ani neni.

²¹ Ongwe Inggise ka lu yeye dafi Afe lo mi ikyen mani. Kpaa ahoo mi ikye inggise ongwu nkye Ongwe Inggise gya mani! Ka tatase gbɛɛ a ki mban ba.>>

²² Ngwi a le gye ungwogye ne, iYesu kyelu ibredi, ta Imgbasho angba man kye mwalu, kye nu emi ongwafɔn gbɛɛ, <<Gbɛ na; nene li ikpewo mgbi ani.>>

²³ O di kyi kyelu ibwe, ta Imgbasho angba di kye nu ma, ama duu wa mi efu.

²⁴ O nya ma gbɛɛ, <<Nene li eyi mgbi ondu odzedze mgbi ani, ongwɔ a kye yawo mi ikye ibyi inggise.

²⁵ Ani le nya ema otsitsi, n ka weni awawa ekwo ne wuba nghataa mi egbe

* 14:3 14:3 Alabasta na li ongwɛ ishe ngwi a li man tishi ine saan mi ikwutse ngwi a li kwu di alabasta mi ondu dze mgbi ama † 14:3 14:3 Ekwo iNadi li ekwo ndze ese iDia ngwi a li kye kyo engyie ogbungbe yan.

ngwi n ka wan ofufe mi esuto mgbi Img-basho mani.>>

²⁶ Ngwi a shashi neta, a tase lu Unggwō Olivī.

IYesu teyi gbo dafi iPyita ka wa tangwe ongwu

²⁷ Ta iYesu si nya ma gbēē, <<Ema duu ka tangwe ani, bana Afe lo gbēē:

<< <N ka gbo inggise ongyo ifyungwō ta, mmala ka ganya.>

²⁸ Nghaduu ni ani wa kyato mi ikwu yō, n ka teyi ema kaka iGalalia.>>

²⁹ Kpaa iPyita gbo mi ododa gbēē, <<Kini inggise duu tangwe kpaa, ani ka tangwe ba.>>

³⁰ Man iYesu nyan gbēē, <<N nya abu otsitsi, mi otu ine nēni, duuse ni ogbigbi teela akpe efa yō, abu ka tangwe ani akpe eta.>>

³¹ Nghaduu iPyita biibē mi ela mfyē gbēē, <<Kini li ikwu kpaa ani ka kwulu yi abu, n ka tangwe abu ba.>> Angbeka ntona duu kpaa gbo ngha.

IYesu mi iGesemani

³² A ke imbe ngwi ali kwun di iGesemani, ta iYesu gbo yi emi ongwafōn gbēē, <<Sise mmene na nin ka bibō.>>

³³ O kyi kyelu iPyita yi ijensi beyi ijōn lu yan, man o wita ogyadze mi itukwu kpakpa i di kakan ewo.

³⁴ Ne o nya ma gbēē, <<Elela okyōōkyō gbelu oshishe mgbi ani duu sō nghataa kaka mi odzeedze mgbi ikwongye kpaa, ne dze mmene le ngyo na.>>

³⁵ O si kiyayi gwee ta, kwoke ese bibō gbēē no li kyeme-kyeme yō, ni obyi ne nye ongwu.

³⁶ O si gbōgbēē, <<Baba, Otsani, alungwō dze kyeme-kyeme mbi abu. Kyi kyelu ibwē adze ne mbi ani. Kpaa no ka li mi owitukwu mgbi ani ba, no li mi owitukwu mgbi abu.>>

³⁷ Ta o yido wa tu engwafōn tole nuna. O si nya iPyita gbēē, <<iSaimōn, abu le nunaa? Obyi onyi kpaa abu ka yagba ngyo lo?

³⁸ Ngyo di bibō ikyegbēē ni ema ka gbese mi imbadi ba. Onodzi yō le dze yi oweka, kpaa ewo dzatsi.>>

³⁹ O diye lu ka bō itō ibō ngwi o teyi bō mani.

⁴⁰ Mi onō ngwi o yē mani, o diye tu ma tole nuna, ikyekyē akwukwine lo loma. A ye odze ngwi a ka gbo nyan ba.

⁴¹ Ngwi o yē akpe ongwu ta ne, o gbo yi ama gbēē, <<Ema kale nuna dile tonya maa? I gyo ngha! Onō ma gyo wa! Dika, a kye Ongwe Inggise wo emi ibwubwe abo wa.

⁴² Kyato i ke na! Inggise nkye ani gya ma ba wa!>>

A bwa iYesu

⁴³ Ngwi o kale gbōdze neta, iJuda, onyi mbi iwyoodefa ntona, ba wa to. Ibyi inggise to yan, a sha okwusunkli yi itsitsi okwuta, ngwi li engyukwo ama ofife beyi etsetse mgbi ola mgbi iMose yi emyine dō ma eso.

⁴⁴ Mi itōnō ne ongye okyon gya na wewo tso ma ambē duu gbēē: <<Ongwu ani kye ondu kwon ataka ma li ongwu aali; bwan ngyon kyon lu na.>>

⁴⁵ Vla neta iJuda ke mbi iYesu, o gbōgbēē, <<Otsetse!>> Man kye ondu kwon ataka.

⁴⁶ Engyulo ntona si kpakli iYesu di bwan.

⁴⁷ Ta onyi mi idzidze mgbi ama nkhwulese to kwēkwē na kye ngwalu okwusunkli mgban kye kwodze adō onyi mgbi ongbido mgbi okwukwo inggise ofife.

⁴⁸ Ne iYesu gbēē, <<Ani li inggise ogbe ama oblofe teyi se ngwi ema ba mbi ani yi okwusunkli yi itsitsi okwuta owa bwa anii?

⁴⁹ Alegbe ani li dze yi ema, le tso mi ozu okwukwo osunu Imgbasho mi iJerosalin, kpaa ema bwa ani ba. Nghaduu li kyeme ngwi Afe ka mbwumbwo.>>

⁵⁰ Ta ali inggise duu tangwan tsinya dzanta.

⁵¹ Ongwē mmafa oka, kye angwuto ondlendle nghaama, le kyēdō iYesu. Mi onō ngwi a bwan mani,

⁵² o tsinya dzata angwuto mgban mi iyikpa, lu ibiba.

A kye iYesu ba mbi ama odi mi ola

⁵³ Ne a kye iYesu ke mbi okwukwo inggise ofife, beyi engyukwo ama ofife duu, yi engyukwo emi iJuda yi etsetse mgbi ola kwakye mbonyi.

⁵⁴ iPyita si kyan iyikpa mbombo, nghataa ka kaka imbe ogbiikwō mgbi okwukwo inggise ofife. Mmana o sise yi ama ongyoongyo dile wola.

⁵⁵ Engyukwo ama ofife beyi okwakye mgbi ama odi mi ola duu tole pita obwende mi ikpewo iYesu ikyegbēē nu ma ngwōn, kpaa a tu onyi ba.

⁵⁶ Bana inggise kwuba gbo obwende at-sika mi ikpewon, kpaa elodze mgbi ama kwokyi yi eka ba.

⁵⁷ Ne inggise angbeka di kyato nu obwende at-sika mi ikpewon gbēē:

⁵⁸ <<Eyi fwon le gbōgbēē, <N ka kye ozu okwukwo osunu Imgbasho mi iJerosalin ngwi inggise mbe mi abo ne kye gbobu diye mbe oka mi egbe eta, ongwī li abo mgbi inggise mbe ba mani.>>

⁵⁹ Nghaduukpaa obwende mgbi ama na kwokyi ba.

⁶⁰ Ta okwukwo inggise ofife kyato mi ine mgbi ama si byi iYesu gbēē, <<Abu ka nu uka lo? Li ali obwende ngwi inggise ntona le kye ba ikpewo abu ngha?>>

⁶¹ Kpaa iYesu kwulu ondu nu ma uka ba. Okwukwo inggise ofife na di byun gbēē,

<<Abu li iKrestu, Ongwe Imgbasho Ongha yi mse naa?>>

⁶² IYesu si gbɛɛ, <<Li ani ma aani. Ema dika wa di Ongwe Inggise ka so abugye mgbi Ongwu Nghaangha dika kye akpa mi esho.>>

⁶³ Okwukwo inggise ofife na si kye nghalu angwuto mgban. O byita gbɛɛ, <<Kyonɛ ngwi eyi di mina obwende angbeka?>>

⁶⁴ <<Ema fwo ito ntone ma, ema tsewe sine?>>

Ama duu nu iYesu obube gbɛɛ o gyo ondu ikwongye.

⁶⁵ Ta angbeka wita okyanggwɔ kyin ewo; a kye ungwɔ bwan ine, kwon asa, di nyan gbɛɛ, <<Di yegbo ka!>> Ta inggise ama ongyoongyo na byin di gbon ibe.

IPyita tangwe iYesu

⁶⁶ Mi onɔ ngwi iPyita ka dze ese mi ifyude neta, ongwongyaa onyi mi idzidze enghido mgbi okwukwo inggise ofife nani, ba wa kaka.

⁶⁷ Ngwi o di iPyita le wola neta, o din ine si gbleke kwekwe yan.

O nyan gbɛɛ, <<Abu kpaa li kye yi iYesu ongwɔ iNadzareti.>>

⁶⁸ Nghaduu iPyita tangwe gbɛɛ, <<Ani yon hona difwi odze ngwi abu le gbo ne kpaa ba,>> man o tase mi onufe okakaakaka.

⁶⁹ Ngwi ongwongyiido na din mmana ne, o di nya ama nkwdze to ma gbɛɛ, <<Inggise ne kpaa li onyi mboma.>>

⁷⁰ IPyita di tangwe.

I wa dze gwee neta, ama nkwdze to kwekwe na nya iPyita gbɛɛ, <<Li otsitsi abu li onyi mi idzidze ma, bana abu li emi iGalalia.>>

⁷¹ Ta iPyita wita owo ewon ikamba di fa yi ama gbɛɛ, <<Ani ye inggise ngwu ema le gbodze kwu iyin ne ba.>>

⁷² Mina neta ogbigbi teela akpe efa. Ta iPyita we elodze ongwɔ iYesu gbo yan gbɛɛ: <<Ogbigbi ka teela akpe efa waba ta, abu ka tangwe ani akpe eta mani.>> Man o si nye yi ikwu otsetse.

15

A kye iYesu ba inai iPlatu

¹ Mi egbegbe ototu neta, engyukwo ama ofife yi engyukwo mgbi emi iJuda beyi etsetse mgbi ola yi okwakye mgbi ama ogbiikwo gbela yi ewoma. A si bwalu iYesu kyon wa nu iPlatu (ongwu nli iGona mgbi emi iRoma nani).

² IPlatu si byi iYesu gbɛɛ, <<Abu li uto mgbi emi iJuda?>>

Ne iYesu nun uka gbɛɛ, <<Een, dafi abu gbo mani.>>

³ Engyukwo ama ofife du ongwufabo mbon mi itodze kwuba.

⁴ Ne iPlatu diye byun gbɛɛ, <<Abu ka nu ani uka lo? Di umbwo ungwɔ ngwi a le du ongwufabo mbi abu ikye ma neni.>>

⁵ Nghaduu iYesu di nun uka ba kpoo, ta i si kwulu iPlatu ewo.

⁶ Alonɔ oga owe owato-wato mgbi emi Israi yo, iPlatu li dulu inggise onyi mi obawi, ongwu emi iJuda mina mani.

⁷ Ongyulo oka ngwu a li kwun di iBaraba wodze obawi. A bwalun yi inggise angbeka ka woke obawi ikyegbɛɛ a ngwɔ inggise onɔ ngwi a le kyo ablodze.

⁸ Ibyi inggise wulu ba mbi iPlatu wa nyan gbɛɛ no kyo yi ama ungwɔ ngwi o li tsekise kyo mani.

⁹ Man iPlatu byita gbɛɛ, <<Ema mina gbɛɛ ni ani dzata uto mgbi emi iJuda nu emaa?>>

¹⁰ Ikyesine o ye dafi li uwaba ngwi engyukwo ama ofife kye iYesu wa nun mani.

¹¹ Kpaa engyukwo ama ofife si fyi ibyi inggise ntona mfyɛ itukwu gbɛɛ nu ma nu iPlatu dzita iBaraba no ka li iYesu ba.

¹² IPlatu byi ma gbɛɛ, <<Li ekye nin kyo yi ongwu ema kwun di uto mgbi emi iJuda ne?>>

¹³ A wulu gbɛɛ, <<Ngwɔn mi ekwatsi!>>

¹⁴ IPlatu byita gbɛɛ, <<Li alungwɔ obube ngwi o kyo?>>

Kpaa a nghao gbo mi ela okwukwo gbɛɛ, <<Ngwɔn mi ekwatsi!>>

¹⁵ Ngwi o mina okyo itukwu mgbi ibyi ne, iPlatu si dzata iBaraba nu ma. O nu ma gbo iYesu onitse ibyibyi si kyon nu ma oka ngwɔ mi ekwatsi.

Ama oblakwutse nya iYesu agya.

¹⁶ Ama oblakwutse si kye iYesu lu ude iGona, mi imbe o li so gbiikwo si kwu ewoma ela tsatsa kwakye.

¹⁷ A kye angwuto omuma shinishini won, di kyi shili akata ato kye tukwun ikye.

¹⁸ Ta a wita onyan agya gbɛɛ, <<Eyi ta abu angba uto mgbi emi iJuda!>>

¹⁹ A diye kye okwuta le gbon mi ikye di kyanggwɔ kyin. Man a gbe akwafɔ kwese diye sunun.

²⁰ Ngwi a nyan agya ne, a dulun angwuto omuma shinishini na kye mgban won. Ta a kyon tase oka ngwɔ mi ekwatsi.

A gbokwo iYesu mi ekwatsi

²¹ Ongyulo oka mi igeli iSirini, ngwu a li kwun di iSaimon, otso Alekidzanda beyi iRufu, ye kye ese mgban nye le lu. A siin gbɛɛ non kye ekwatsi nani.

²² Ne a kye iYesu ba imbe ngwi a li kwun di iGogota nani (ngwi itan di Imbe Ikpalikye).

²³ Ta a kye eneeekwo takye yi otse oyulu ungwɔ owulewo nun gbɛɛ no wa, kpaa o fwa owaawa.

²⁴ Man a kyon gbokwo mi ekwatsi. A gbelun angwuto kye ghalu, a gbeefa ikye odi ungwo ngwi ali inggise ka tu mani.

²⁵ Li obyi ongwu gyane mi egbegbe ngwi a kyon gbokwo ekwatsi.

²⁶ A lo ungwo ama ngwi a du ongwufabo mbon mi ele ma gbɛɛ: UTO MGBI EMI IJUDA.

²⁷ A gbokwo ama ofoofɛ nghi efa biyan, onyi mi abugye mgbani yi oka mi abube.

²⁸ (Nɛ Afɛ mbwumbwo odze ngbɛɛ, <<A gbon wo umbwo yi ama ofoola.>>)*

²⁹ Ama nle nye ofɛ gbe ito tukwun kpakpa, le ngwi ikye dile gbɛɛ, <<Oho! Abu ngbɛɛ o ka gbohu ozu okwukwo osunu Imgbasho mi iJerosalin diye kyi mbelu mi egbe eta nɛ,

³⁰ tashulu mi ekwatsi ba esɛ di dulu ewabu to ka!>>

³¹ Li ngha ngwi engyukwo ama ofife beyi etsetse mgbi ola kpaa le nyan agya yi ewoma gbɛɛ, <<O li dulu angbeka to, kpaa o yagba dulu ewon to wuba!

³² Ni iKrestu, uto mgbi emi Israi nɛ, tashulu onenɛ mi ekwatsi ba esɛ, ni eyi di diye noyeye.>> Ama ngwu a kye ma gbokwo ekwatsi biyan kpaa fan esɛ.

³³ Mi onɔ idzidze ude yeye neta esɛ duu yifu nghataa ba obyi eta mi onɔde.

³⁴ Mi obyi ongwu ta mi onɔde na, iYesu si makwo mi ela okwukwo gbɛɛ, <<Eli, Eli, lama sabatani?>> Ngwi itan gbɛɛ, <<Imgbasho mgbi ani, Imgbasho mgbi ani, li ekye ngwi abu le dzaniti?>>

³⁵ Ngwi ama nkwulɛɛ to kwekwe fwo ungwɔnɛ nɛ, a gbogbɛɛ, <<Gado na, o le kwu Elaija ela.>>

³⁶ Ongyulo onyi mboma tsinya kɛ, kye isoso wɔkɛ enekwo onunɔ, kye fake ekwo si kyilen kye nu iYesu gbɛɛ no wa. Man o gbogbɛɛ, <<Dzanta na. Ni eyi di kyayina Elaija ka wa tashulun ba esɛ.>>

³⁷ iYesu gbobakwo mi ela okwukwo man o si yulu.

³⁸ Ta angwuto ngwi a kye tɛɛ mi idzidze ozu okwukwo osunu Imgbasho mi iJerosalin na gbua efa mi esho nghataa luba esɛ.

³⁹ Ngwi agyegika mgbi ama oblakwutɛ, ongwu nkwulɛɛ mmama mi inai iYesu, fwo akwo mgbani ye di dafi o kwulu nɛ, o gbogbɛɛ, <<Otsitsi inggise nɛ li Ongwe Imgbasho!>>

⁴⁰ Engyaa angbeka kwulɛɛ mbombo le di ungwo nle kiyayi mani. Mi idzidze ma li iMeri iMagidalin beyi iMeri onɔ ijensi ongbungbe beyi iJosisi yi iSalomi.

⁴¹ Mi iGalalia engyaa ntonɛ nose li kye yi iYesu dile yan abɔ kpaa. Engyaa angbeka kwuba nba biyan mi iJerosalin kpaa to imbe nani.

Ondziindzi mgbi iYesu

⁴² Li egbe owewo (obwi egbe otonyewo). Ngwi onɔ le gbɛɛ nɛ,

⁴³ iJose ongwu Arimatia, inggise okpongɔ mi idzidze okwakye mgbi ama ogbiikwo, ongwu abuan le fɛ obaaba mgbi esuto mgbi Imgbasho. O kɛ yi imio ba mbi iPlatu ka bon ikwo mgbi iYesu.

⁴⁴ Nɛ i kwulu iPlatu ewo ofwo gbɛɛ iYesu kwulu wa. O kwu ongyukwo mgbi ama oblakwutɛ na ela, o byun ita ni iYesu kwulu wa yɔ.

⁴⁵ Ngwi o wa fwo mi ondu ongyukwo mgbi ama oblakwutɛ gbɛɛ dze ngha nɛ, o kye ikwo na nu iJose.

⁴⁶ Ta iJose gya angwuto ondlendle, o kye sulu ikwo mgbi iYesu kye ndiwoke angwuto na man kyon ndzi mi endzi ngwi a cɛfo ikwutɛ. Ta o tsamu ofishi tukwu ondendzi.

⁴⁷ Nɛ iMeri iMagidalin beyi iMeri onɔ iJosisi di imbe ngwi a kyon ndzi mani.

16

Okɔyɛ-kyɛ mi ikwu

¹ Ngwi egbe otonyido wa nye nɛ, iMeri iMagidalin beyi iMeri onɔ ijensi yi iSalomi gya engyie ongbungbe ikyegbɛɛ ni ama ka kye gyuwɔ ikwo mgbi iYesu.

² Mi egbegbe byibiylbiyi mi egbe ongwu ababo mi ikyidu (egbe iladi) ngwi onɔ le to neni. A si to ofɛ le lu endzi,

³ a byi eka ita mi ofɛ gbɛɛ, <<Li emɛ ka mulu eyi ofishi mi ondendzi nɛ?>>

⁴ Kpaa ngwi a kyile ikye esho nɛ, a di gbɛɛ ofishi ngwi a kye tukwu ondendzi ma mulu.

⁵ Ngwi a kaka endzi nɛ, a di ongwongyulo mmafa wo angwuto onzundze sɔdze agya abugye mi endzi, ta i kwulu ma ewo.

⁶ Ongyulo na nya ma gbɛɛ, <<Ka tsimio ba na. Ema le pita iYesu ongwu iNadaretɛ, ongwu a ngwɔn mi ekwatsi nani. O kyato mi ikwu! O dze mmɛnɛ wuba. Di imbe ngwi a kyon la ma na.

⁷ Nghane ema ye lu na ka nya engwafɔ mgbani yi iPyita gbɛɛ, <O teyi ema le lu iGalalia ma. Ema ka din mi imbe na, dafi o tsekise nya ema mani.>>

⁸ Engyaa ntona si tase mi endzi tsinya. Ewo shi igakwu loma i di wo ma ende. A gbɔdze yi inggise onyi kpaa wuba, ikyena imio wo ma.

⁹ [Ngwi iYesu kyato mi egbe iladi mi egbegbe nɛ, o kye ewon tso mbi iMeri iMagidalin ababo, ongwu o lo onodzi ibwubwe to mbon nghi egyafa nani.

¹⁰ O si lu ka nya ama nkyɛ yan tole tsukwu dile makwo mani.

¹¹ Ngwi a fwo gbɛɛ iYesu dze oshishe, ongyaa na din nɛ kpaa, a noyeye mi ele ba.

* 15:28 15:28 Ambulu nɛ dze mi olɔɔɔ angbeka ba.

¹² Ono wa nye nē, iYesu di kye ewon tso emi ongwafoɔn angbeka nghi efa mi ofe oka idzidza ono ngwi a le kyikyē mi eɛ na mani.

¹³ A si yē wa nya angbeka ntona; kpaa a nu ma oyeyē ba.

¹⁴ Ono gwee nē, iYesu di mblegba to iwyodonyi ntona ngwi a le gye ungwogyē; o shodze yi ama mi oyeyē onuunu ba beyi ikyegbē a fwa kye itukwu tiishu onoyeyē mbi ama ndin ono ngwi o kyato mi ikwongye mani.

¹⁵ Man o nya ma gbē, <<Lu eɛ ka gbo Eɛ Osuse nē nya ali inggise duu.

¹⁶ Ali inggise nnoyeyē ngwi a di kyon iBatisima yɔ, o ka wato, nghaduu inggise nnoyeyē bayɔ, o ka dzili.

¹⁷ Ambē ntone dika kyedɔ ama nnoyeyē: Mi iyi mgbi ani a ka lo onodzi ibwubwe tase; a dika gbo ondudze ofufe;

¹⁸ a ka kye abo byi ifa; ni a wa otse ikwongye kpaa unkonyi ka kyɔ ma ba du; a dika kye abo gbo ama ndotse ta ootse ka ngye loma.>>

¹⁹ Ngwi Otse iYesu gbodze nē yi ama ngye neta, Imgbasho kyon lu esho, o sika sɔke abugye mgbi Imgbasho. ²⁰ Nē emi ongwafoɔn si tase ka gbeesɔ mi ali imbe duu, ta Otse Imgbasho kyidɔ yi ama dile mbwumbwo mi elodze mghan yi ambē nkyedɔ mani.]*

* **16:20 16:20** Ambulu ngwi wita mi egyane lu osu dze mi olɔɔɔ tugbe mgbi ondu iGrikii ngwi a di nghao kye ma wuuta ma ba.

Eso Osuse mi abo mgbi iLuku

¹ Dafi inggise kwuba fya olo ungwō nkiyayi mi idzidze mgbi eyi ne,

² ungwō oloolo ne ba mbi eyi mi abo mgbi ama ndi ine-ine di li engbido, ama nkye ewoma fife mi elodze na mani.

³ Nghane, iTiofilyo otsungwude, dafi ani abuani kya mi odze ne saan mi owita-wita ne, n di gbæ i tishi nin lɔn imbisɔn-mbisɔn mi ikye abu, ⁴ zukwu ni abu difwi otsitsi mgbi ungwō ngwi a tso abu nani.

A teyi gbo ombaamba mgbi ifɔn okyɔ iBatisma.

⁵ Mi onɔ ngwi iHerude li uto mgbi iJudia mani, inggise ofife mgbi Imgbasho oka iyin gbæ iDzakaria, mi aye inggise ofife mgbi Imgbasho mgbi Abyija nani; owan Elidzabeti kpaa li mi eto mgbi Eron (ongwu kpaa li eto mgbi inggise ofife mgbi Imgbasho).

⁶ Ama efa duu le nyaan mi ine Imgbasho, a ngyo ola di gbela yi odze owe-we mgbi Otse Imgbasho, a sulu idza ewo ba du.

⁷ Nghaduu a dze yi ongwæ ba, ikyesine Elidzabeti li ogyoma; ama duu egbe mgbi ama ke.

⁸ Egbe oka ne, iDzakaria dze ondido mgban mgbi inggise ofife mgbi Imgbasho mi ozu okwukwo osunu Imgbasho mi iJerosalin mi onɔ ngwi ido dikyon.

⁹ A sadun mi efa ogboogbo, dafi nli ola mgbi ama ofife mgbi Imgbasho mani, gbæ no kaka **ozu idzidze** mgbi Imgbasho mi imbe iwashi okye ungwō ogbungbe toola.

¹⁰ Onɔ ngwi iDzakaria kye ungwō ogbungbe na le toola ne, ibyi inggise ama osunu Imgbasho kwutoke ese le bibo.

¹¹ Man ongyeso mgbi Otse Imgbasho mblegba tun, o kwudzeke abugye mgbi iwashi okye ungwō ogbungbe toola.

¹² Ngwi iDzakaria di ongyeso ne, i kakan ewo, imio di won.

¹³ Ongyeso nyan gbæ, <<Ka mio ba, iDzakaria; Imgbasho fwo ibo mgbi abu. Owaabu Elidzabeti ka mba abu ongwongyulo, o ka kwun iyi di ifɔn.

¹⁴ Abu ka dze yi atsa diye shisha. Ibyi inggise angbeka ka tsatsa mi ombaamba mgbi ongwæ nani.

¹⁵ Ongwæ na ka li angbodzi inggise mi ine mgbi Otse Imgbasho, o ka wa ebye hona ungwō ofyumfye ba, o ka mbwo yi Onodzi Osaan wita mi onɔ ngwi onɔn byifun mani.

¹⁶ O ka kyata emi Israi kwuba, yile ma luba mbi Otse Imgbasho mgbi ama.

¹⁷ Ongwæ na ka dze Otse Imgbasho iyayi, o ka dze dafi Elaija mi Onodzi beyi mfye, okyatitukwu mgbi etsengwe ye luba mbi

engwæ, ama onghaadɔ ye luba ozoyeye mgbi ama osaan, adzi ni ongwu kye melu inggise mgbi Otse toke le fan fæfæ.>>

¹⁸ iDzakaria byi ongyeso na gbæ, <<Li mi ali ofe ngwi ani ka ye gbæ ungwone ka wa dze ngha? Bana ani kye, owaani kpaa kye.>>

¹⁹ Ongyeso nun uka gbæ, <<Li ani iGebre, ani kwudze mi ine Imgbasho, ongwu ndo ani eso gbæ ni ani gbo nya abu di kye elodze osuse ne ba mbi abu mani.

²⁰ Dafi abu noyeye mi ungwō nka wa kyo mi onɔ mgban ba ne, o ka yæ ikplima di yagba ogbodze wuba, nghataa egbe ngwi owa abu ka wa fwise mani.>>

²¹ Nghane, ama ntole fɛ iDzakaria mi ese ma i kwulu ma ewo dafi o mbe onɔ kwuba mi ifoozu okwukwo osunu Imgbasho mi iJerosalin ngha mani.

²² Ngwi o wa tɔ luba ese ma, o yagba gbodze yi ama wuba, man a difwi gbæ o di ungwō mi ozu okwukwo osunu Imgbasho mi iJerosalin, o ye le gbodze yi ama mi abo ta o si yæ ikplima.

²³ Ngwi onɔ ido mgban mi ozu Imgbasho wa ngye neman, o ye lu udan.

²⁴ Onɔ wa nye gwee neta, owan Elidzabeti si tilude, o kye ewon da ofyia eda.

²⁵ O gbæ, <<Li Otse Imgbasho kyungwone yi ani, mi olele ne o nu ikyese dɔ ani di kyelu ayiwi mgbi ani mi ine inggise.>>

A teyi gbo ombaamba mgbi iYesu

²⁶ Ngwi ifu mgbi Elidzabeti wa li ofyia egyin mata, Imgbasho dɔ ongyeso iGebre ke ogalu iNadzareti, mi ayese mgbi iGalalia,

²⁷ mbi ibidrua ongyaa ngwu a li kwun gbæ iMeri, ngwu inggise oka mi eto mgbi iDevedi. Ongwu a li kwun di ifɔse, tsikwɔn dze ese nani.

²⁸ Ongyeso na ba mbon, o tan angba di nyan gbæ, <<Abu ngwu ikyese dɔ abu kpakpa ne! Otse Imgbasho dze yi abu.>>

²⁹ Itukwu gbo-gbo lo iMeri kwuba mi elodze mgbi ongyeso neni, i di kwulun ewo mi ito angba na dafi ka dze mani.

³⁰ Ongyeso iGebre nyan gbæ, <<Ka mio ba, iMeri, bana ikyese dɔ abu mbi Otse Imgbasho.

³¹ Abu ka wa byifu di mba ongwongyulo, o ka kwun iyi gbæ iYesu.

³² O ka li angbodzi inggise a dika kwun gbæ Ongwæ mgbi Ongwu Nghaangha mi esho. Otse Imgbasho dika kye itsuuto mgbi otson iDevedi kye nun.

³³ O ka li Uto mi eto mgbi iJeko gyegwu, esuto mgban ka dondu ba.>>

³⁴ iMeri byi ongyeso na gbæ, <<Ungwone ka dze ngha sine? Ngwi ani ye ongyulo waba.>>

³⁵ Ongyeso nu uka gbæ, <<Onodzi Osaan ka kyi gbelu abu sɔ, mfye mgbi Ongwu

Nnhaangha mi esho dika gbiiwulu tukwu abu. Ne Ongwe Osaan ngwu abu ka wa mba na, a ka kwun gbɛ Ongwe Imgbasho.

³⁶ Elidzabeti, odo abu ngwu a tsɛwɛ gbɛ o li ogyoma nani, o dze yi ewefa ofyia egyin waani.

³⁷ Lubana ungwo ngwi Imgbasho ka kyo gbɛ ba dzɛma ba.>>

³⁸ IMeri gbɛɛ, <<Ani li ongwongyiido mghi Otse Imgbasho, no kyo yi ani dafi abu gbo nɛni.>> Man ongyeso na lu dzatan.

IMeri ka kpadi Elidzabeti

³⁹ Mi onɔ na iMeri wewo di yewo lu ogalu mi ewunggwɔ mi ɛɛ iJudia.

⁴⁰ O ka kaka ude iDzakaria, man o ta Elidzabeti angba.

⁴¹ Ngwi Elidzabeti fwo angba mghi iMeri nɛ, ongwɛ gbokyɛ lon mi ifu. Ta Elidzabeti si mbwo yi Onodzi Osaan.

⁴² O gbo mi ɛla okwukwo gbɛɛ, <<Mse dze yi abu mi idzidze engyaa duu yi ongwɛ ngwu abu ka mba nani.

⁴³ Kysine ngwi ikyese dɛn nɛn, ngwi onɔ Otse mghi ani ba mbi ani?

⁴⁴ Bana ngwi ani fwo angba mghi abu mata, ongwɛ gbokyɛ len mi ifu yi atsa.

⁴⁵ Mse no dze yi abu ngwu noyɛyɛ gbɛɛ, odzɛ ngwi Otse Imgbasho gbo yi abu ka wa dondu yɛyɛ mani.>>

IMeri tɛ Imgbasho yi ashi

⁴⁶ IMeri gbɛɛ, <<Itukwu mghi ani tɛ Otse Imgbasho

⁴⁷ oshishe mghɛn dze yi atsa

mi ikye Imgbasho Onagbɛ ani,

⁴⁸ lubana o wɛ
ani nli unka ba, ongwongyiido mghan.

Wita mi onɛnɛ lu iyayi
ɛtɔ duu kale kwu ani gbɛɛ ogbumse,

⁴⁹ bana Imgbasho odatu
kyungwɔ okwukwo mi ikye ani,

Osaan li iyi mghan.

⁵⁰ Elela odiidi mghan li na kɛ,
mbi ama nli sunun,

mi ɛtɔ nghataa kɛ ɛtɔ.

⁵¹ O kyungwɔ ama odatu mi abɔ mghan;
o kye ganya ama okyile ewo esho,
mi ɛwɛ otɛɛtɛ mghi ama.

⁵² O tashulu ama nɔɔ uto mi itɛ mghi ama
kpaa o kyile ama oyile ewo ɛɛ esho.

⁵³ Ama ngwu ɛnbwa dɔ ma ma,
o mbwo ma yi ungwo osuse,
kpaa emi awuya yɔ,
o wo ma ofɛ abubu.

⁵⁴ O tobyi ongwongbɛ,
mghan Israi,

mi ondu odzɛdzɛ mghan yi emi otɛyɛ

⁵⁵ mbi Abraham beyi engwiba mghan
gyegwu.>>

⁵⁶ IMeri la mbi Elidzabeti mɛ dafi ofyia
ɛta man yɛ lu ude.

Ombaamba mghi

ijɔn okyɔ iBatisima

⁵⁷ Ngwi onɔ imba mghi Elidzabeti wa gyo nɛta, o mba ongwongyulu.

⁵⁸ Emi ongwunɔn beyi ama owatɛ dɔn fwo gbɛ Otse Imgbasho tɛo ɛlela odiidi kpakpa mbon nɛ, a tsatsa yan.

⁵⁹ Ongwɛ wa mbwo egbɛ egyata nɛ, a ba owa kyan ikyɛ, ma dze mbiso ngwi a ka yile iyi otson kyɔn gbɛɛ, iDzakaria.

⁶⁰ Nghaduu onɔn nya ma gbɛɛ, <<Ei! Dze mbiso ngwi a ka kwun di ijɔn.>>

⁶¹ A nyan gbɛɛ, <<Inggise onyi mi ɛtɔ mghi abu dze yi iyi na ba.>>

⁶² A gbodze yi iDzakaria mi abɔ gbɛɛ nu ma yɛ iyi ngwi o mina okyɔ ongwɛ na mani.

⁶³ O kyo ambɛ gbɛɛ nu ma nun ongwɛ akwukwɔ olɔ ungwɔ, o si lɔ iyin gbɛɛ, <<IJɔn.>> Ta i kwulu ali inggise duu ewo.

⁶⁴ Labɔlabɔ neman ondu mghi iDzakaria kwulu ta itiiɛ she lon o di wita gbɔdzɛ, lɛ tɛ Imgbasho.

⁶⁵ Ama nwatɛ dɔn duu i kwulu ma ewo, inggise ama ntɔ ɛɛ undɔ mghi iJudia duu lɛ gbɔdzɛ ungwɔ okwulewo ntonɛni.

⁶⁶ Ali inggise nfwɔ odzɛ nɛ lɛ tsɛwɛ mi ɛlɛ, lɛ byita gbɛɛ, <<Li ali itɔ inggise ngwi ongwɛ nɛ ka wa dze?>> Bana mfyɛ mghi Imgbasho dzɛyan.

Ashi mghi iDzakaria

⁶⁷ Ta otson iDzakaria mbwo yi Onodzi Osaan man o wita ogbodze mi ɛla oyegbɔ gbɛɛ:

⁶⁸ <<Nu ma tɛ Otse,

Imgbasho mghi emi Israi,

lubana o ba wa tobyi emidan di nagbɛ ma.

⁶⁹ O kye otɛɛ mghi owato-wato tuo ikyɛ eyi,

mi ɛtɔ mghi ongwongbɛ mghan
iDɛvedi.

⁷⁰ Dafi o gbo nyɛ mbi
oyegbɔ osaan emi tugbɛ

⁷¹ gbɛɛ ongwu ka dulu eyi tɔ

mi abɔ engyikyili mghi eyi,

beyi mi abɔ mghi ama ngwu di eyi lanyɛ

⁷² ikyɛ otso ɛlela odiidi mbi emi otɛyɛ

diyɛ wɛ ondu odzɛdzɛ mghan osaan,

⁷³ ofaafa ngwi o fa

yi otɛyɛ Abraham:

⁷⁴ odulu eyi tɔ mi abɔ engyikyili mghi eyi,

ikyɛ onu eyi sunun yi imio ba

⁷⁵ mi osaan beyi osaan mi iyayi mghan,

mi egbɛ oshishe mghi eyi duu.

⁷⁶ Abu ongwani, a ka kwu abu gbɛɛ,

oyegbɔ mghi Ongwu Nnhaangha mi

esho;

lubana abu ka tɛyɛ Otse ikyɛ omɛlun ofɛ.

⁷⁷ Onu emidan difwi odzɛ mghi owato-wato
mi odzita ma yi ali ibwubwɛ.

⁷⁸ Mi ikyɛ ɛlela odiidi oleewo
mghi Imgbasho mghi eyi,

ikyegbɛɛ ni osa dafi onɔ mi esho,
gbosa ba esɛ mbi eyi

⁷⁹ azukwu no wa nu osa mbi ama nwoto
iyifu

beyi iwulu ikwongye duu,
ongyo eyi afo byi ofe iyu.>>

⁸⁰ Ne ongwɛ na she di yɛɛ kpɔkɔɔ mi
onodzi, o la okwɛsɛ nghataa se o wa kye
ewon tso emi Israi mi ododa.

2

Ombaamba mgbi iYesu

¹ Mi onɔ na iSidza (uto) Ogɔstu, uto mgbi
emi iRoma noola gbɛɛ nu ma lo mmbwo
inggise mi esɛ iRoma tsatsadu.

² Nɛnɛ li mmbwo olɔɔlo ongwɛ ababo mi
onɔ ngwi iKwirinu li iGona odi mi esɛ iSiria
mani.

³ Ali inggise lu oka lo mmbwo mi esɛ
udan.

⁴ IJose kyato mi igeli iNadzareti mi ayɛsɛ
iGalalia, lu iBetlehen ogalu mgbi iDevedi
mi ayɛsɛ iJudia, ikyekye o to mi eto mgbi
iDevedi.

⁵ O kɛ oka lo mmbwo na yi iMeri, ongwu
o tsikwɔn dɛɛ esɛ dɛɛ yi ifewo nani.

⁶ Ngwi a ka to iBetlehen neta imba kwun,

⁷ o si mbongwɛ mgban ovle, ong-
wongyulo. O kye oshata ndiwon kyon lake
ikpɔkɔ, lubana a tu imbe mi ozu ingyoga
ba.

Ama ongyo ifyungwo yi engyɛsɔ

⁸ Ama ongyo ifyungwo angbeka to agya
esɛ nani, a lato oshe tole ngyo ifyungwo
mgbi ama mi otu.

⁹ Ongyɛsɔ mgbi Otse Imgbasho wa
mblegba tu ma, ta okwɔkwɔ mgbi Otse
gbosa kpakɛke wo ma, nɛ imio wo ma
kpakpa.

¹⁰ Kpaa ongyɛsɔ nya ma gbɛɛ, <<Ka mio
ba na, ikyena ani ba yi ema Esɔ Osuse mgbi
atsa ngwi shewo nka dɛɛ ikye ali inggise
duu.

¹¹ Inɛ nɛ mi ogalu mgbi iDevedi a mba
ema ongye Onagbɛ, o li iKrestu Otse.*

¹² Ungwo nka li ambe mbi ema yo, ema
ka di ongwɛ eyeyi a kyon ndi wodze oshata
ladzɛ ikpɔkɔ.>>

¹³ Plɛ neta ibyi engyɛsɔ emi esho ba wa tu
ongyɛsɔ nani, le tɛ Imgbasho dile gbɛɛ,

¹⁴ <<Okwɔkwɔ no dɛɛ yi Imgbasho ngwu
Ngha mi esho,

mi esɛ nɛ iyu no dɛɛ yi ama ngwu
ikyese mgban do ma mani.>>

¹⁵ Onɔ ngwi engyɛsɔ dɛɛmata yɛ lu esho
mata, ama ongyo ifyungwo gbo yi ewoma
gbɛɛ, <<Ba i kɛ iBetlehen ni i ka di ungwo
nkyɔ se ngwi Otse Imgbasho nya eyi odzɛ
ele neni.>>

¹⁶ A byakpa lu maama si ka dili iJose yi
iMeri beyi ongwɛ eyeyi na ladzɛ ikpɔkɔ.

¹⁷ Mi onɔ ngwi ama ongyo ifyungwo
ntona di ongwɛ mata, a le gbɔdzɛ ngwi
ongyɛsɔ nya ma mi ikpewo ongwɛ neni.

¹⁸ Ama nfwɔ odzɛ nɛ duu i kwulu ma ewo
mi odzɛ ngwi ama ongyo ifyungwo gbo mi
ikpewo ongwɛ neni.

¹⁹ Nghaduu iMeri kwulu ungwo ntonɛ
duu wɔkɛ itukwu diyɛ le tɛwɛ mi ele.

²⁰ Ama ongyo ifyungwo ntona yido lu,
le kyile iyi Imgbasho deesho dile tsan mi
alungwo ngwi ama fwo diyɛ di, ngwi kyo
yeyɛ dafi a plɛ nya ama mani.

A kye iYesu dubo Imgbasho

²¹ A mban nye egbe egyata, ngwi li egbe
a ka kyan ikye nɛman, a si kwun iyi gbɛɛ,
iYesu, iyi ngwi ongyɛsɔ teyi nu duuse a wa
byifun mani.

²² Ngwi egbe ogbiiyɛ mgbi ama wa gyo
dafi ola mgbi iMose gbo ma nɛ, iJose yi
iMeri kye iYesu kɛ iJerosalin oka kyon dubo
Otse Imgbasho.

²³ (Dafi a lo mi ola mgbi Otse gbɛɛ, <<Ali
ongwongyulo ovle ngwu a mba duu nu ma
kye dubo Otse Imgbasho>>),

²⁴ odi fife dafi ola mgbi Imgbasho gbo
mani: <<Anyama nghi efa, hona ibidrua
ingyakpa efa.>>

²⁵ Mi onɔ na inggise oka dɛɛ iJerosalin a
kwun di iSimion, o le saan di gbekabyi ido
mgbi Imgbasho. Ongwu nose le fɛ owato-
wato mgbi emi Israi, Onodzi Osaan nose
dzeyan.

²⁶ Onodzi Osaan teyi kye tson gbɛɛ o ka
di ikwongye inɛ waba, imbisɔ ngwi o ka di
iKrestu Otse.

²⁷ Onodzi kye iSimion teyi ka kaka ozu
okwukwo osunu Imgbasho mi iJerosalin.
Mi onɔ na iJose yi iMeri kye ongwɛ iYesu ba
owa kyo yan dafi aletɔ mgbi ola mgbi ama
mina mani.

²⁸ iSimion si kye gbɛlu ongwɛ na byike
abo mgban le tɛ Imgbasho gbɛɛ:

²⁹ <<Otse onghaangha, dafi abu mbwo
ondu

odzɛdzɛ mgbi abu nɛ,
dzata ongbido mgbi abu

onɛnɛ no lu mi iyu.

³⁰ Lubana inɛ mgbɛn di
owato-wato mgbi abu,

³¹ ngwi abu kye melu dzeke
mi inɛ inggise duu.

³² Li osa nka dɛɛ mbi emi agwɛsɛ

odi kye okwɔkwɔ ba mbi emidabu Is-
rai.>>

³³ I kwulu iJose yi iMeri ewo mi elodzɛ
ngwi iSimion gbo mi ikpewo ongwɛ ma
neni.

* **2:11 2:11** Ongwu Otse Imgbasho zonu gbɛɛ o ka wa dula esɛ to mani.

³⁴ ISimion kye mse be ma ewo diye nya iMeri gbɛɛ, <<Ongwɛ nɛ, Imgbasho kyon dze ikye odzili-dzili beyi owato-wato mgbi ibyi inggise mi Israi. O dika li ambe ngwi inggise kwuba ka fwan.

³⁵ Ikye ni ewodze mgbi inggise ibyibyi wa do ododa. Ta okwusunkli ka suwo abu itukwu kpaa.>>

³⁶ Oyegbo oka kpaa nose dze, ongyaa ngwu a li kwun di Anna, ongwɛ iFanue, mi agwo mgbi Ashe. O kye kpakpa; o dze yi oban me onova egyafa ta oban si kwulu dzanta.

³⁷ O yɛɛ owakwade me onova ngwusene don ene. O dzata ozu okwukwo osunu Imgbasho mi iJerosalin ba, kpaa o li sunu Imgbasho onu yi otu mi ondu otukwu-tukwu yi ibo.

³⁸ Mi obyi na yeye o kaka si ta Imgbasho angba dile gbodze mgbi ongwɛ na nya ama ntole fe owato-wato mgbi iJerosalin duu.

³⁹ Ono ngwi iJose yi iMeri ngyelu alungwo ngwi ola mgbi Otse mina ma, a ye luba ogalu mgbi ama iNadzareti mi ayese iGalalia.

⁴⁰ Ongwɛ na she diye fyumfye; o mbwo yi ozoyeye, ikyese mgbi Imgbasho dzeyan.

⁴¹ Ali onova ama omba iYesu li ke iJerosalin ikye oka kyo oga owe owato-wato mgbi emi Israi.

⁴² Mi ono ngwi iYesu li onova iwyodefa ma, o si ke oga nɛ yi ama omban, dafi li aletɔ mgbi ama mani.

⁴³ Egbe ngwi oga wa ngyɛ nɛ a ye le lu ude, ta ongwɛ iYesu tila mi iyikpa mi iJerosalin, kpaa ama omban ye ba.

⁴⁴ IJose yi iMeri tsewe gbɛɛ di iYesu kye yi ama mi idzidze ibyi inggise, nghane a kyikye mi egbe ololo. Man a wita opitan mbi odo ma beyi oka ma.

⁴⁵ Dafi a din ba nɛ, a yido lu iJerosalin le ka pitan.

⁴⁶ Mi egbe ongwu ta ma, a wa tun mi ozu okwukwo osunu Imgbasho mi iJerosalin sodze mi idzidze etsetse, le fwo ma dile byi ma ita. ⁴⁷ Ama nfwon duu, i kwulu ma ewo mi ozoyeye beyi uka mgban onuunu.

⁴⁸ Ono ngwi ama omban wa din nɛ, i kwulu ma ewo. Onon si byun gbɛɛ, <<Ongwani, kyosine ngwi abu kyungwɛnɛ yi eyi ngha? Otsabu yi ani gbili abu ndengye.>>

⁴⁹ IYesu byi ma gbɛɛ, <<Kyosine ngwi ema le pita ani? Ema ye dafi i wo gbɛɛ ani ka dze mi ozu mgbi Otsani baa?>>

⁵⁰ Nghaduu elodze ngwi o nya ma na gbosa loma ba.

⁵¹ Ta iYesu wafɔ yi ama lu iNadzareti dile siikye nu ma. Onon kwulu elodze ntone duu woke itukwu mbon.

⁵² IYesu she mi ikpewo beyi ozoyeye, ikyese mgbi Imgbasho dzeyan, inggise duu gbela yan.

3

IJon okyo iBatisima me ofe

¹ Mi onova ongwɛ iwyodeda ngwi iSidza (uto) iTiberu li uto mi iRoma mani, iPontu iPlatu li iGona mi ayese iJudia, iHerude li atotse mi ayese iGalalia, ongwunon iFyilipi li atotse mi Ituria beyi iTirakoni, iLisania di li atotse mi Abilen.

² Mi ono ngwi Anna beyi iKayafa li okwukwo inggise ofife mgbi Imgbasho ma, elodze mgbi Imgbasho ba mbi iJon ongwɛ iDzakaria mi okwese.

³ O kaka ali imbe mi ewekyoo mgbi iJodan, le gbeseo gbɛɛ, <<Kyata mi ali ibwubwe mgbi ema nu ma kyo ema iBatisima ikye nu ma dzita ema yi ali ibwubwe.>>

⁴ Dafi oyegbo Adzaya tsekise lo gbɛɛ:

<<Ela mgbi inggise le kwu mi okwese gbɛɛ:

<Melu ofe ikye mgbi

Otse no byi yeye na,

⁵ Ali ufe duu nu ma yilen tukwu, ali unggwo beyi undo duu nu ma kye gbobu.

Ofe ama nkweggengga

ma nu ma kye nalu byi yeye,

ofe ama nli ishishɛ duu ni a kye tukwulu.

⁶ Ta inggise owamye duu ka di owato-wato mgbi Imgbasho.> >>

⁷ IJon nya ibyi inggise ama nba gbɛɛ no wa kyo ma iBatisima ma gbɛɛ, <<Ema engwe ogidzi ntone! Li emɛ we ema odze gbɛɛ ni ema tsinya itingga mgbi Imgbasho, nkyɛ iyayi na?

⁸ Nghane ema kyo ali otso itukwu okyata-kyata mgbi ema, Ka nya ewema gbɛɛ, <Eyi li engwe mgbi Abrahan ta si ngyɛ ba.> Lubana n nya ema Imgbasho ka yagba kyata akwutse ntone yɛɛ engwe Abrahan gbɛɛ.

⁹ Ika ladze iteekwo le fɛɛfɛ, ali ekwo n wa owawa osuse ba duu, a ka kye dzɛlu ngwuta woke ola.>>

¹⁰ Inggise ntona byun gbɛɛ, <<Ni eyi kyosine?>>

¹¹ IJon nya ma gbɛɛ, <<Inggise ndze yi abu nghi efa yo, no kye onyi nu odon, abu ndze yi ungwogye yo gha yi inggise oka.>>

¹² Ama ogbe udza ifyɛɛ kpaa ba owa kyo iBatisima, a byun gbɛɛ, <<Otssetse, eyi ma ni eyi kyosine?>>

¹³ O nya ma gbɛɛ, <<Ka yama gbɛ awuya nye obyi ba.>>

¹⁴ Oblakwutse angbeka kpaa byun gbɛɛ, <<Eyi ma ni eyi kyosine?>>

O nya ma gbɛɛ, <<Ka yama gbɛ inggise awuya mi abumfye ba dika gbɛ odze tukwu inggise ewo mi atsika ba, udza ofya mgbi ema no gyolo ema.>>

¹⁵ Inggise ntona le fe yi ewe ogbebyi dile tsewe mi itukwu gbɛɛ naadi iJɔn li iKrestu,* ngwu ama le fe ma hoo!

¹⁶ iJɔn nu ma uka gbɛɛ, <<Ani le kyo ema iBatisima yi eni. Nghaduu Ongwu nshewo ngha ani kyema, ngwu odi okpafɔ mgban kpaa ani mɛ oshɛ ba. O ka kyo ema iBatisima mi Onodzi Osaan mgbi Imgbasho beyi ola.

¹⁷ Okwuga byidzɛ abo mgban, o ka folu ungwogyowe kye gbɛlu inɛnɛ osuse woke oba, ashuwe yɔ o ka kye toola mi ola ngwi li gyegwu.>>

¹⁸ iJɔn kwu inggise ntona ewe wo mi elodzɛ angbeka kwuba di gbɔ Esɔ Osuse nya ma.

¹⁹ Dafi iJɔn fwa mi otsitsi tɛɛ iHerude atɔtɛ inɛ ikyegbɛɛ o kyelu iHerodia owa ongwunɔn iFyilipi beyi alungwɔ obube angbeka ngwi o tsekise kyo nɛ,

²⁰ iHerude diyɛ kyo alobube ndatu ngha duu: O bwalu iJɔn woke obawi.

iBatisima beyi odzɛ eto mgbi iYesu

²¹ Ngwi iJɔn kyo ali inggise duu iBatisima nɛ, o kyo iYesu kpaa iBatisima. Mi onɔ ngwi iYesu le bibɔ neta, esho kwulu,

²² man Onodzi Osaan tashulu ba mbon dafi anyama mani, ela di tɔ mi esho gbɛɛ, <<Abu li Ongwani nkpaani itukwu; i kpiani yi abu saan.>>

²³ Onɔ ngwi iYesu li onova osudiwyo ma, o wita ido mgban. Ali inggise tsewe gbɛɛ o li ongwɛ iJɔɛ,

nli ongwɛ iHeli,

²⁴ ongwɛ iMatati,

ongwɛ iLevi, ongwɛ iMelki,

ongwɛ iJenai, ongwɛ iJɔɛ,

²⁵ ongwɛ iMatatia, ongwɛ Emosu,

ongwɛ iNahun, ongwɛ Esili,

ongwɛ iNaga,

²⁶ ongwɛ iMaati,

ongwɛ iMatatia, ongwɛ iSeme,

ongwɛ iJɔɛki, ongwɛ iJoda,

²⁷ ongwɛ iJonan, ongwɛ iResa,

ongwɛ iDzerubabe, ongwɛ iShetie,

ongwɛ iNeri,

²⁸ ongwɛ iMelki,

ongwɛ Addi, ongwɛ iKosan,

ongwɛ Elimanda, ongwɛ Eri,

²⁹ ongwɛ iJoshua, ongwɛ Eliadza,

ongwɛ iJorin, ongwɛ iMatati,

ongwɛ iLevi,

³⁰ ongwɛ iSimion,

ongwɛ iJuda, ongwɛ iJɔɛ,

ongwɛ iJonan, ongwɛ Eliakin,

³¹ ongwɛ iMelia, ongwɛ iMena,

ongwɛ iMatata, ongwɛ iNatan,

ongwɛ iDevedi,

³² ongwɛ iJese,

ongwɛ Obɛdi, ongwɛ iBoadzi,
ongwɛ iSalmɔn, ongwɛ iNashɔn,

³³ ongwɛ Aminada, ongwɛ iRan,

ongwɛ iHerizɔn, ongwɛ iPeredzi,

ongwɛ iJuda,

³⁴ ongwɛ iJeko,

ongwɛ Adziki, ongwɛ Abraham,

ongwɛ iTera, ongwɛ iNaho,

³⁵ ongwɛ iSerɔgu, ongwɛ iReu,

ongwɛ iPelegi, ongwɛ Ebel,

ongwɛ iSala,

³⁶ ongwɛ iKaina,

ongwɛ Afadza, ongwɛ iShɛn,

ongwɛ iNua, ongwɛ iLameki,

³⁷ ongwɛ iMetusela, ongwɛ Enoku,

ongwɛ iJaredi, ongwɛ iMahalale,

ongwɛ iKaina,

³⁸ ongwɛ Enosh,

ongwɛ iSeti, ongwɛ Adan,

Ongwɛ Imgbasho.

4

Imbadi mgbi iYesu

¹ iYesu mbwo yi Onodzi Osaan, o yɛ mi ekyoo mgbi iJodan, ta Onodzi kyon teyi lu okwɛɛ,

² mi imbe na iSatan gyilan mi egbe ngwɛɛfa. Mi egbe ntona duu o gye unkonyi ba, <<Abu li ongwɛ ntona wa nye nɛ, enbwa si dɔn.

³ Ta iSatan nyan gbɛɛ, <<Kini abu li Ongwɛ Imgbasho yɔ, nya ikwutse nɛ no kyata yɛɛ ibredi.>>

⁴ iYesu nun uka gbɛɛ, <<Afɛ lo gbɛɛ: <Li mi ibredi ta ngwi inggise ka dze oshishe ba.>>

⁵ iSatan di kyon lu ka dɔkɛ imbe oshigbo, o tson esuto mgbi ɛɛ duu.

⁶ Ta iSatan nyan gbɛɛ, <<N ka kye ali mfye duu nu abu beyi okwɔkwɔ mgbi ɛɛ nɛni, lubana a kye mfye beyi okwɔkwɔ kye nu ani, ani ka yagba okye nu ali inggise ngwu ani mina duu.

⁷ Nghane, kini abu sunu ani yɔ, ungwɔ ntonɛ duu ka yɛɛ mgbi abu.>>

⁸ Kpaa iYesu nun uka gbɛɛ, <<Afɛ lo gbɛɛ: <Sunu Otɛ Imgbasho mgbi abu di li ongwu ta kyon ido.>>

⁹ iSatan di kye iYesu lu iJerosalin ka kyon dɔkɛ ikyikyɛ ozu okwukwo osunu Imgbasho mi iJerosalin. O nyan gbɛɛ, <<Kini abu li Ongwɛ Imgbasho yɔ, bulu lu ɛɛ.

¹⁰ Lubana Afɛ lo gbɛɛ:

<< <O ka wo engyɛso mgban ola ikye abu gbɛɛ nu ma

ngyo abu saan;

¹¹ ni abu bulu le lu ɛɛ a ka kye gbɛlu abu mi abɔ mgbi ama ikyegbɛɛ

ni abu ka kye afɔ tɛ akwutse ba.>>

* 3:15 3:15 Ongwu Otɛ Imgbasho zɔndu gbɛɛ o ka wa dɛlu ɛɛ tɔ mani.

¹² Nghaduu iYesu nu uka gbɛɛ, <<Afe lo gbɛɛ <Ka mbadi Otse Imgbasho mgbi abu ba.>>

¹³ Mi onɔ ngwi iSatan ngyelu ogyila iYesu ne, o lu dzanta, o nyan gbɛɛ, se egbe oka.

IYesu wita ido mgban

¹⁴ IYesu ye luba iGalalia mi mfye mgbi Onodzi, ta odze mgban si gbɔfwɛ kpatse ese na duu.

¹⁵ O tso mi ozu okwakye mgbi emi ijuda, ali inggise duu tsan.

A fwa iYesu mi iNadzareti

¹⁶ Ta iYesu ke iNadzareti imbe ngwi o she mani, o ka kaka ozu okwakye mgbi emi ijuda mi egbe otonyido dafi o li tsekise kyo mani. O kyato dzekunto ogbo afe,

¹⁷ a kye afe ofulu-fulu mgbi oyegbo Adzaya kye nun. O kye nalu afe na, o tu imbe ngwi Afe lo gbɛɛ;

¹⁸ <<Onodzi mgbi Otse dze mbi ani, lubana o kye engyie Kyi ani, onu ani gbo Eso Osuse nya emi adze.

O do ani eso ogbo oto-to
mi iso nya ama nwoto obawi,
beyi onu ama nbine dine,
onu ama ngwu a si ma,
to myɛ-myɛɛ.

¹⁹ Odi gbɔgbɛɛ onɔ gyo ngwi Otse Imgbasho
ka dulu emidan wato.>>

²⁰ O si kye fulu afe na, yilen nu inggise oyabo nkye nun mani, man soke ese. Ta ali inggise ama nwoto ozu okwakye mgbi emi ijuda na duu gbe ine fyakwun.

²¹ Ta iYesu wita ogbɔdze yi ama gbɛɛ, <<Ine ne, odze ngwi Afe lo ne mbwumbwo mi ado mgbi ema.>>

²² Ali inggise duu gbɔdze osuse ikpewon; i di kwulu ma ewo mi ito elodze osuse nle to mi ondu mbon nani. A si byi ewoma gbɛɛ <<Nene li ongwe iJose ne baa?>>

²³ IYesu nya ma gbɛɛ, <<Li otsitsi ema ka nya ani utsa nga gbe, gbɛɛ: <Inggise obwe ootse, bwe ewabu: di kyungwo ngwi abu le kyo mi iKapenahun ma mi ese ude abu.>

²⁴ <<Otsitsi ani le nya ema, oyegbo onyonyi kpaa a li gbela yan mi ese udan ba.

²⁵ I mina ani ni ema ye gbɛɛ engyaa owakwade to ese Israi kwuba mi onɔ mgbi Elaija, mi onɔ ngwi mmbwo kya ba me onova eta yi ofyia egyin ngwi enbwa gbo kpatse ese duu mani.

²⁶ Nghaduukpaa Imgbasho do Elaija eso ke mbi owakwade onyi kpaa mi Israi ba, se li owakwade mi iDzarefati mi ogalu iShidon ta.

²⁷ Emi Israi kwuba to yi otsoma mi onɔ mgbi Elaiasha oyegbo nghaduu Imgbasho ngyelu inggise onyi kpaa otsoma ba, se li iNama inggise iSiria ta.>>

²⁸ Ngwi o gbɔdze ne yi ama nga ne, ali inggise mi ozu okwakye mgbi emi ijuda na duu nye yi itingga.

²⁹ Ta a kyato, a lon onya tase mi ese ude ama, a kyon tase lu ikpozu ude le ka kyon dɔke undɔ ongi a mbe igeli mgbi ama mi ele mani, ikye oka tsamun ngwuta lu agblo.

³⁰ Nghaduu, o se wo ma ewo lu ofe mgban.

IYesu lo onodzi obube onya

³¹ Ne iYesu si lu iKapenahun, igeli mi iGalalia, mi egbe otonyido, ka wita otso ma.

³² I kwulu ma ewo mi otsootso mgban, ikyesine eso mgban kye yi mfye.

³³ Mi ozu okwakye mgbi emi ijuda na, inggise oka dze ele ngwu dze yi ese ikye, onodzi obube. O teela mi ela okwukwo gbɛɛ,

³⁴ <<Kpei! iYesu ongi iNadzareti, li alungwo mina abu okyo yi eyi? Abu ba owa dzili eyii? Ani ye abu, abu li Ongwe Osaan mgbi Imgbasho.>>

³⁵ Nghaduu, iYesu kyokyo yan gbɛɛ, <<Dede, tase mbon.>> Ta onodzi obube na kyon gyese mi idzidze ma, man tase mbon, kpaa o yama kyon unkonyi ba.

³⁶ I kwulu ma ewo, ta a sile gbo yi ewoma gbɛɛ, <<Nene li ali odze lo! Lubana o gbɔdze mi ela mfye yi onodzi ibwubwe ta a fwon diye tase.>>

³⁷ Man odze mgban si gbɔfwɛ kpatse ese na beyi ese ama nto yi ama kwekwe duu.

IYesu ngyelu ibyi inggise ootse

³⁸ O si kyato mi ozu okwakye mgbi emi ijuda, lu ude iSaimon, onɔ na awo bwa onowa iSaimon ladze ese le tsaatsa, ne a nya iYesu gbɛɛ no yan abo.

³⁹ Ta iYesu si ke ka klese mbon, o kyokyo yi awo na, man i to dzanta. Onowa iSaimon si kyato wita gbe ungowogye le nu ma.

⁴⁰ Mi ononɔde, a gbe emi ootse idzidza-dzidza ba mbi iYesu, ta o kye abo gbo ali inggise ewo, man ootse ngye loma.

⁴¹ Enedzi ibwubwe kpaa to mbi inggise kwuba le kwu ela gbɛɛ, <<Abu li Ongwe Imgbasho.>> Nghaduu o kwo ma ado di nu ma ofe ogbɔdze ba ikyesine, a ye dafi o li iKrestu mani.

⁴² Ngwi egbe fa ne, iYesu tase lu imbe ngwi inggise dze ele ba; ibyi inggise to tole pitan, ngwi a wa to mbon ne, i mina ma omben onɔ, ikyegbɛɛ no ka lu dzata ma ba.

⁴³ Nghaduu iYesu nya ma gbɛɛ, <<Li kyeme ngwi ani ka gbo Eso Osuse mgbi esuto mgbi Imgbasho ne mi igeli angbeka kpaa, lubana li itodze ne ngwi Imgbasho do ani eso ba mmene aani.>>

⁴⁴ O sile gbo Eso mi emi ozu okwakye mgbi emi ijuda kpatse ijudia.

5

Engwafɔ mgbi iYesu emi ababo

¹ Egbe oka ne, iYesu kwulese dze ewuuto mgbi iGenesareti, ibyi inggise kpakeke won tote fwo odze Imgbasho.

² Ne o ndine ka gbo yi uwaa nghi efa beto onduuto kpaa ama otuntse woto ele ba, a tase le sa uke mgbi ama.

³ O kaka uwaa oka ongwi li mgbi iSaimon, man nyan gbɛɛ no tsamu uwaa kaka eni gwɛɛ, ta o sɔke ese mi uwaa si tso ma ungwɔ.

⁴ Ono ngwi o ngyelu ogbɔdze yi ama ne, o nya iSaimon gbɛɛ, <<Gbɛke ole, ka wo uke ni ema kwu mmbwɛ.>>

⁵ iSaimon nun uka gbɛɛ, <<Ongyukwo, eyi kwo uke mi otu nghataa ni egbe fa mi adze kpakpa, kpaa eyi kwu oshagye ba; kpaa li abu gbo mayɔ n ka kye wo.>>

⁶ Ngwi a kyɔ dafi iYesu nya ma ne, a kwu mmbwɛ kpakpa, man uke mgbi ama wita ofawa.

⁷ Ne a flɛ ama otuntse angbeka ama nwoto uwaa oka ntona abɔ gbɛɛ nu ma wa ya ma abɔ, ne a si kwu mmbwɛ mbwo uwaa efa ntona kyɛɛ dile fya osulu-sulu.

⁸ Ngwi iSaimon iPyita di ungwɔne ng-hane, o ka kye akwafɔ kwoke ese mi iyayi mgbi iYesu, o nyan gbɛɛ, <<Lu dze ani ta, Otse, lubana ani li inggise alobube.>>

⁹ Ikyekye ongwu beyi ama nto yan duu i kwulu ma ewo mi ito mmbwɛ ngwi ama kwu kwuba nani.

¹⁰ Li nha ngwi iJensi beyi iJon emi ongwɛ iDzebedi ama nle tuntse yi iSaimon na kpaa i kwulu ma ewo aali. Nghaduu, iYesu nya iSaimon gbɛɛ, <<Ka mio ba, wita mi onene lu iyayi ka li inggise ngwi ema kale kwu.>>

¹¹ Ta a kye kwolu uwaa mgbi ama dɔke ese, a dzata alungwɔ duu kyɛdon.

Inggise ongwu iYesu ngyelun otsoma

¹² Dafi iYesu dze mi igeli oka ne, inggise oka ba mbon ongwu otsoma ghan ewo so. Ngwi o di iYesu ne, o lake ese kye ine tukwu ese, tekye nun gbɛɛ, <<Otse, ni abu ki gbela, o ka yagba nu ani yɛɛ saan.>>

¹³ iYesu na abɔ gbon ewo nyan gbɛɛ, <<Ani gbela, yɛɛ saan!>> Mi ono na ta otsoma ngye lon.

¹⁴ Ne iYesu kwon adɔ gbɛɛ, <<Ka ka gbo nya inggise ba, kpaa kye ewabu lu ka tso inggise ofife mgbi Imgbasho di nu umba dafi iMose woola mani, mi oyɛɛ saan mgbi abu, zukwu no yɛɛ obwendɛ mbo ma.>>

¹⁵ Nghaduu odze mgban nghao le ba ikye ofwon di non ngyelu ma ootse.

¹⁶ Kpaa iYesu li lu ka dzeke imbe ndede le bibo.

iYesu ngyelu inggise ongwu alewo mgban kwulu ootse

¹⁷ Egbe oka ne, iYesu le tsungwɔ neta, emi iFarasi beyi etsetse mgbi ola mgbi iMose, ama nkyɛ mi ali ude mi iGalalia, mi iJudia beyi iJerosalin duu soto ele, mfye mgbi Otse Imgbasho kpaa dzeyan ikye onon ongyelu ma ootse.

¹⁸ Inggise angbeka si kye inggise ngwu alewo mgban kwulu mi amuku, a fya okyon kaka ozu okyon lakiyayi iYesu.

¹⁹ Kpaa dafi a tu ofɛ okyɔ nha ba ikye ibyi inggise ne, a lu ka tɔke ikpendu, kyon nye ikpendu mi amuku nye idzidze ibyi inggise nghataa lu iyayi iYesu.

²⁰ Dafi iYesu di oyɛɛ onuunu mgbi ama nghanɛ, o gbɛɛ, <<Uka, a kye ali ibwubwe mgbi abu ta abu mkpa.>>

²¹ Ta emi iFarasi beyi etsetse mgbi ola, wita otsewɔdze gbɛɛ, <<O tsewɛ gbɛɛ ongwu li ali inggise? Odze na li ito! Li Imgbasho yuon ka dzata inggise yi obube!>>

²² Nghaduu ngwi iYesu ye ewɔdze mgbi ama ne, o byi ma gbɛɛ, <<Li ali ewɔdze ngwi ema le tse mi itukwu mgbi ema da?>>

²³ Li ekyɛ nghao li adze ba: Li ogbɛɛ, a dzita abu yi ali ibwubwe mgbi abu naadi li ogbɛɛ: <Kyato kyikyɛ?>

²⁴ Kpaa li ikye onu ema ye gbɛɛ Ongwɛ Inggise dze yi mfye mi ese ne odze inggise ta yi ali ibwubwe...>> O gbo yi inggise ngwu alewo mgban kwulu na gbɛɛ, <<Ani le nya abu kyato, kyelu amuku mgbi abu lu ude.>>

²⁵ Labɔlabɔ mata, inggise ngwu alewo mgban kwulu na kyato dzɛkunto mi ine mgbi ama, o kyi kyelu amuku mgban ongwi a kyon wele ba ma lu ude le tse Imgbasho.

²⁶ Ali inggise duu ewo waa loma, a si tse Imgbasho. Imio wo ma neta a gbɛɛ <<Eyi di ungwɔ ama okwulewo ine.>>

iYesu kwu iLevi ela

²⁷ Ngwi iYesu ngye ne, o tase ta o di inggise ogbɛ udza ifyɛ ngwu a li kwun di iLevi sɔdze mi ozu ogbɛ udza ifyɛ. O si nyan gbɛɛ, <<Kyɛdo ani.>>

²⁸ Man iLevi kyato dzata alungwɔ duu kyɛdon.

²⁹ Ne iLevi kyon oga okwukwo mi ude mgban, ama ogbɛ udza ifyɛ kwuba beyi angbeka kpaa le gye ungwogye yi ama.

³⁰ Kpaa emi iFarasi beyi emidi ama, ama otso ola mgbi iMose le ndaandu, le byi engwafɔ mgbi iYesu gbɛɛ, <<Kyonɛ ngwi

* **5:30 5:30** Ali ibwubwe Ama ogbɛ udza ifyɛ mi ono na nose a li kye ma wuuta wuba ikyena li emi iRoma ma kye ma ido mi idzidze emidi ama. A di li sii emidi ama okpaa udza ifyɛ di mwa do efu. Nghanɛ emi iJudia li kwu ma gbɛɛ emi ali ibwubwe.

ema le gye ungowgye dile wa yi ama ogbe udza ifyee beyi emi ali ibwubwe*?>>

³¹ IYesu nu ma uka gbee, <<Li inggise ama ndze saan li le pita inggise obwotse ba, kpaa li inggise ama ndotse.

³² Ani ba ikye owa kwu ama osaan ela ba, kpaa li ama nle saan ba mani, ikye nu ma kyatitukwu.>>

Ita mi odze ondu otukwu-tukwu

³³ A gbo yi iYesu gbee, <<Engwafɔ mgbi iɔn li tukwondɔ dile bibɔ alonɔ duu, engwafɔ mgbi emi iFarasi kpaa, nghaduu emidabu le gye di wa alonɔ duu.>>

³⁴ IYesu nya ma gbee, <<Ema ka yagba osi ama nbato oga ongyaa ofufe gbee nu ma tukwondɔ mi onɔ ngwi ongyaa ofufe ka dze yi ama na gbee?

³⁵ Nghaduu egbe kyema ngwi a ka kyi kyelu obongyaa ofufe, ta mi egbe ntona, ama kpaa ka tukwondɔ.>>

³⁶ O diye nya ma utsa gbee, <<Inggise onyi kpaa ka mwadze angwuto ofufe kye tukwuke angwuto ogbugbe ba. Ki non kyo ngha, o ka fawa angwuto ofufe na ta ba, aye angwuto ofufe na dika kwokyi yi ogbugbe na ba.

³⁷ Inggise onyi kpaa ka kye eneekwɔ ofufe yaokɛ ikpɔkpɔ ogbugbe ba. Ki non kyo ngha yɔ, eneekwɔ ofufe na ka kye gbobu ikpɔkpɔ nani, eneekwɔ na kpaa ka yangwuta nyanya beyi ikpɔkpɔ na duu.

³⁸ Kpaa a li kye eneekwɔ ofufe yaokɛ ikpɔkpɔ ofufe.

³⁹ Inggise onyi nle wa eneekwɔ ogbugbe se ngwi ofufe ka minan dzema ba, o ka gbee: <Ogbugbe nghao tishi.>>

6

Ekwu oshe-she mi egbe otonyido

¹ Mi egbe otonyido oka nɛ, emi iYesu le kyikye nye ifu okwɔ ekwu, ta engwafɔn le she ekwu, ngwunu mi atabo le bukwu.

² Kpaa emi iFarasi angbeka byi ma gbee, <<Kysinsɛ ngwi ema le kyungwɔ nli ola ba mi egbe otonyido ngha?>>

³ IYesu nu ma uka gbee, <<Ema gbo ungwɔ ngwi uto iDevedi kyo mi onɔ ngwi ongwu beyi emi ibuge mgban ngwi enbwa dɔ ma na ye wa lo?

⁴ O ka kaka ozu Imgbasho, kyi kyelu ibredi ongwi a kye dɔ Imgbasho ubɔ, kye gye di kye nu ama nkye yan ma duu. Ongwi ola gbee se li inggise ama ofife mgbi Imgbasho ta ka gye mani.>>

⁵ Nɛ iYesu nya ma gbee, <<Ongwe Inggise li Otse mgbi egbe otonyido.>>

Inggise owaa abo

⁶ Mi egbe otonyido oka nɛ, iYesu kaka ozu okwakye mgbi emi iJuda le tso, nɛ inggise oka wodze ele ongwu abɔ abugye mgban waawaa.

⁷ Emi iFarasi beyi etsetse mgbi ola gbe ine fyakwun ikye nu ma di ni o ka bwe inggise na mi egbe otonyido yɔ, ni ama tu itɔdze okye abɔ byi ele kwun elikwɔ.

⁸ Nghaduu iYesu ye ewodze mgbi ama otsetse man o si nya inggise owaa abɔ na gbee, <<Kyato wa dzeke mi iyayi mgbi ali inggise duu.>> Ta o kyato wa kwulese dzeke.

⁹ Nghane iYesu nya ma gbee, <<Ani le byi ema ita, li ole li ola mgbi eyi ngwi li ayin okyɔokyɔ mi egbe otonyido: li okyɔ osuse naadi li okyɔ obube, li odulu oshishe naadi li odzili oshishe?>>

¹⁰ IYesu ndine di ma kpatse si nya inggise owaa abɔ na gbee, <<Na abɔ mgbi abu.>> O si kyo ngha, ta abɔ mgban yɛ saan.

¹¹ Nghaduu itukwu fu loma a si wita ogbo yi ewoma ungwɔ ngwi ama ka kyo yi iYesu mani.

IYesu sadu ama ogbikyon iwyodefa

¹² Egbe oka nose nɛ iYesu tase lu unggwɔ le ka bibɔ, o kye otu na duu bibɔ mbi Imgbasho.

¹³ Ngwi egbe wa fa nɛ, o kwu ama nkyedɔn duu ela takye man, o sadu engyulo iwyodefa, o kwu ma gbee, <<Ama ogbikye ani.>>

¹⁴ ISaimon ongwu o kyɔn iyi oka gbee iPyita, beyi ongwunon Andru, yi iJensi, yi iɔn, yi iFyilipi, yi iBatlomi,

¹⁵ yi iMatiu, yi iTɔmɔsu, yi iJensi ongwɛ Alfe, yi iSaimon ongwu a kwun gbee Ogbodami*,

¹⁶ yi iJuda ongwɛ iJensi beyi iJuda Iskarɔti ongwu n wa yɛ inggise okyon gya nani.

Mse yi ikamba

¹⁷ Neta emi iYesu tashulu mi unggwɔ wa kwulese mi imbe ogblagadaa. Ama okyedɔn kwuto ele beyi ibyi inggise mi ali aye iJudia, iJerosalin yi ewekyoo mgbi iTiru beyi iSidon duu.

¹⁸ A ba ikye owa fwon, no di ngyelu ma ootse. Ama ngwu onodzi ibwubwe kaka ma ewo duu o ngyelu ma ele.

¹⁹ Ta inggise ibyi byi le nana okye abɔ gbon, lubana ama nkye abɔ gbon duu mfyɛ tɔ mbon ngyelu ma ootse.

²⁰ IYesu kye ine byi ama okyedɔn, o nya ma gbee:

<<No kpa ema ewo ema emi adze, lubana esuto mgbi Imgbasho dze ikye ema.

²¹ No kpa ema ewo ema ngwu

* **6:15 6:15 Ogbodami** Li inggise ngwu li mina kpakpa onagbe emidan. Mi Israi mi onɔ mgbi iYesu ma itishe oka dze ngwi mina kpakpa onagbe emi Israi mi abumfyɛ mbi emi iRomanu, iSaimon onyi mbi ama ngwu iYesu sadu ma ogbikyon kye mi itishe nani.

enbwa le do ema oneneni,
lubana ema ka wa tolo.

No kpa ema ewo ema
ama nle tsukwu oneneni,
lubana ema ka wa shisha.

²² No kpa ema ewo mi ono ngwi

inggise di ema kyili,
nu ma di kye ema wuuta
ba di fya ema ito,

di fwa ema gbɛɛ ema li emi
ibwubwe mi ikye mgbi Ongwɛ Inggise.

²³ <<Dze yi atsa mi egbe nani di shufwe
yi atsa, ikyesine umba mgbi ema shewo mi
esho. Lubana li nga ngwi emi otsikyo ma
kyo yi ama ogbɛɛɛ aali.

²⁴ <<Kpaa ahoo mbi ema ama nli aludu,
Lubana ema tu omyɛɛ-myɛɛ mgbi ema
wa.

²⁵ Odze ka tu ema, ema ama ntolo oneneni,
Lubana enbwa ka wa do ema.

Ahoo mi ikye ema ama nle shisha oneneni,
ema ka wa buntse diye tsukwu.

²⁶ Odze ka tu ema, ema ngwu ali inggise
li le gbodze osuse ikpewo ema,
lubana li nga ngwi emi otsikyo
ma kyo yi oyegbo emi atsika aali.

Okpitukwu mbi emi ikyili

²⁷ <<Nghaduu ani le nya ema ama ntolɛ
fwo ani nɛ gbɛɛ: Engyikyili mgbi ema nu
ma kpa ema itukwu, kyo osuse yi ama ndi
ema taanyi,

²⁸ kyumse yi ama nfyɛɛ ema ito di bibo
ikye ama nkya yi ema timbi-timbi.

²⁹ Kini inggise ta abu afe mi atado agya
oka yo, kyata agya oka na kpaa nun. Kini
inggise kye gbelu abu angwuto owoowo
ongwi ifun yo, ka kwo otsungwon okye
gbelu abu angwuto ongwi ese ba.

³⁰ Ali inggise nbo abu ungwo duu, ka kwo
otsungwon ba, ni inggise di gbe ungwo mbi
abu ka kwun mkpa gbɛɛ no yilen wa nu abu
ba.

³¹ Kyo yi angbeka dafi i mina ema gbɛɛ ni
a kyo yi ema mani.

³² <<Kini abu kyo okpitukwu yi ama nkpa
abu itukwu ta ma, li ali oyabo ngwi abu ka
tu? Lubana li nga ngwi emi ali ibwubwe
kpaa li di ama ngwu ama kpa ma itukwu
ma, kpa ma itukwu aali.

³³ Ni abu di kyo osuse yi ama nli kyo osuse
yi abu ta ma, li ali oyabo ngwi abu ka tu?
Lubana li nga ngwi emi ali ibwubwe kpaa
li kyo aali.

³⁴ Kini ema gha ama ngwu ema ye gbɛɛ a
ka yilen kpa ema ta umba ma, li ali oyabo
ngwi ema ka tu? Lubana li nga ngwi emi
ali ibwubwe kpaa li kye nu ama ngwu a ye
gbɛɛ a ka yilen kpa ma kyɛɛ ma aali.

³⁵ Nghaduu, engyikyili mgbi ema nu ma
kpa ema itukwu, kyo osuse yi ama, di kye
nu ma gbɛɛ nu ma ka yilen kpa ema ba.

Ta umba mgbi ema kale gbagbadzidzi, ema
dika li engwe mgbi Ongwu Nghaangha mi
Esho, lubana o li kyo osuse yi ama ungwo li
mɛ ma ine ba yi emi imbali.

³⁶ Dze yi elela odiidi dafi Otsema kpaa li
di elela neni.

Ogbo angbeka ikwo

³⁷ <<Ka gbiikwo ba, ta ema kpaa a ka gbo
ema ikwo ba. Ka ngwo inggise ikwo ba ta
ema kpaa a ka ngwo ema ikwo ba. Dzita
inggise yi obube, ta ema kpaa a ka dzita
ema yi obube mgbi ema.

³⁸ Nu, ta ema kpaa Imgbasho ka yilen nu
ema. Ombaamba osuse, ongwi a siin, ngwi
a kwonwo saan, ngwi di mbwo le yang-
wuta, Imgbasho ka kye nu ema; ikyesine
li ombaamba ngwi ema mba ma, ngwi
Imgbasho ka yilen mba nu ema aali.>>

³⁹ IYesu diye nya ma utsa gbɛɛ, <<Inggise
obine ka kye obine oka teyi gbɛɛ? Ama efa
duu a ka gbɛɛ wokɛ ishe baa?

⁴⁰ Inggise okpayi-kpayi ka ye nga otsetse
mgban ba, kpaa ali inggise ngwu a tson
saan ka dze dafi otsetse mgban mani.

⁴¹ <<Kysine ngwi abu li di efɛ nwodze ine
mbi ongunabu kpaa li difwi otsokplekwo
nwodze ine mgbi abu na ba?

⁴² Ka kysine abu ka nya ongunabu
gbɛɛ: <Ongwunani detse nin dulu abu efɛ
mi ine, ngwi otsokplekwo wodze ine mbi
abu?> Abu inggise ikpala nɛ, tsekise dulu
otsokplekwo nwodze ine mbi abu na duuse
o ka dine saan odulu efɛ nwodze ine mbi
ongwunabu nani.

Ekwo beyi owawa mgban

⁴³ <<Ekwo osuse li wa owawa obube ba,
hona ekwo obube li wa owawa osuse ba.

⁴⁴ Ali ekwo duu a li difwin mi owawa
mgban, inggise li she andundu mi ato ba,
naadi a li she owawa ekwo mi afwe ba.

⁴⁵ Inggise osuse li dulu ungwo osuse ama
ngwi o kye da mi itukwu mgban, inggise ib-
wubwe li dulu ungwo ibwubwe ama ngwi
o kye da mi itukwu mgban, lubana dafi i
mbwon itukwu ma ngwi ondu li gbo to aali.

Ama okyɛdo iYesu mi otsitsi

⁴⁶ <<Kysine ngwi ema li kwi ani gbɛɛ,
<Otse, Otse> kpaa li kyungwo ngwi ani gbo
ba?

⁴⁷ Ani ka tso ema dafi inggise nba mbi ani
wa fwo elodze mgbi ani diye kyo mi ele dze
mani.

⁴⁸ O dze dafi inggise nle mbɛ ozu, o ple
tishe kɛ di wo itozu mi akwutse. Mi onɔ
ngwi ekoo taayo, akpeni wa tseke ele kpaa
i kyon unkaba, ikyesine a mban saan.

⁴⁹ Nghaduu inggise nfwo elodze mgbi ani
diye kyo mi ele ba, o dze dafi inggise nmbe
ozu mgban mi ikye mfyɛn wo itozu ba

mani. Ono ngwi akpeni okwukwo wa tseke ele ne, ozu na gbobu tukwu ese gbluu!>>

7

Oyeye onuunu mgbi ongyukwo oblakwutse mgbi emi iRoma

¹ Dafi iYesu ngyelu odze ogbɔɔgbɔ yi ibyi inggise tsatsadu ne, o si kaka iKapenahun.

² Mi igeli na, ongbido mgbi ongyukwo oblakwutse oka ngwu kpan itukwu saan dotse dze kwekwe okwulu-kwulu.

³ Ongyukwo oblakwutse mgbi emi iRoma ne si fwo odze mgbi iYesu, o do ongyukwo emi iJuda angbeka eso gbɛe nu ma ka nyan no ba wa ngyelu ongbido mgbi ongwu ootse.

⁴ Ne a ka tɛkye nu iYesu gbɛe, <<Inggise ne mina abo oyaaya mbi abu kyeme-kyeme.

⁵ Ikyekye ese mgbi eyi kpan itukwu, o di mbe eyi ozu okwakye.>>

⁶ Ne iYesu si wafɔ yi ama.

Dafi iYesu dze kwekwe okaka ude ne, ongyukwo oblakwutse mgbi emi iRoma na do emi okan angbeka eso nu ma ka nyan gbɛe, <<Otse, ka nu ewabu okakewo wuba, ikyena ani me ongwu abu ka ba onufozo mgbi ani ba.

⁷ Ani me oke mbi abu ba. Nghane gbo elodze ta ootse mgbi ongbido mgbi ani ka ngye.

⁸ Ikyena ani abuen kpaa n li inggise nbyidze abo mfyɛ, yi emi oblakwutse mi abo ani, ni ani nya ongwune gbɛe, <Lu,> o li lu. N di li gbo yi oka gbɛe, <Kwa> o di li ba. N di li nya ongbɛe mgben gbɛe, <Kyungwɔneni,> o di li kyo ngha.>>

⁹ Ngwi iYesu fwo odze ne nghane, i kwu-lun ewo yan, o kyata ine mbi ibyi ama nkyan iyikpa ma si gbɛe, <<N nya ema, n tu ito oyeye onuunu nshewo ito ne ye ba, kwo mbi emi Israi kpaa.>>

¹⁰ Engyeso ntona ye lu ude ka tu ongbido na ye saan.

IYesu kyile ongwɛ owakwade mi ikwu

¹¹ Ngwi i wa nye neta iYesu wafɔ yi engwafɔɔn beyi ibyi inggise le lu mi igeli ngwi a li kwun di iNai.

¹² Dafi a dze kwekwe okaka onufe ogalu ne, a kye ikwo to le ke ongwu nli ongwɛ onyi kpokpo mgbi owakwade. Nghane ibyi inggise mi ogalu na wafɔ yan.

¹³ Ngwi Otse iYesu din ne, elela kyɔn won, o si gbɛe, <<Ka tsukwu ba.>>

¹⁴ Ne iYesu ke kwekwe kye abo gbo ogba, ama nsisi ntona kwulese. O gbɛe, <<Ongwongyulo, kyato.>>

¹⁵ Neta inggise ikwukwo ma si kyato so nto wita ogbɔdze, iYesu yilen nu onɔn.

¹⁶ Ama duu imio wo ma man a le tse Imgbasho. A gbɛe, <<Oyegbo okwukwo to

mi idzidze mgbi eyi: Imgbasho ba owa ya emidan abo.>>

¹⁷ Odze mgbi iYesu si gbɔfwe kpatse iJudia beyi ese angbeka ama nwo otsee do ma duu.

IYesu yi iJɔn okyo iBatisima

¹⁸ Engwafɔ mgbi iJɔn nyan ungwɔ ama ngwi iYesu kyo duu, o kwu efa ela,

¹⁹ o do ma eso gbɛe nu ma ke ka byi Otse iYesu gbɛe, <<Li abu li ongwu iJɔn gboɔgbɛe o kyema le ba ma, naadi ni eyi gbe ine byi inggise oka idzidza?>>

²⁰ Mi ongwɛ emi eso ntona ba mbi iYesu ne, a gbɛe, <<IJɔn okyo iBatisima do eyi eso mbi abu gbɛe ni eyi wa byita gbɛe: <Abu li ongwu nkye ka ba ma naadi ni eyi gbe ine byi inggise oka?>> >>

²¹ Mi onɔ na iYesu ngyelu ibyi inggise ootse idzidza-dzidza, beyi onodzi ibwubwe, di nu ama nbine dine.

²² O si nu emi eso ntona uka gbɛe, <<Yido lu ka nya iJɔn ungwɔ ngwi ema di diye fwo: Ama nbine ye le di, ama ngwu afɔ waawaa le kyikyɛ, ama ndo otsoma, otsoma mgbi ama ngye, ama nkyado le fwo, ama nkwlulu le kyato mi ikwu, a le gbo Eso Osuse nya emi adze.

²³ Imgbasho ka kye mse dze yi ali inggise nƿwa ani ba mi ungwɔ ama ani kyo mani.>>

²⁴ Ono ngwi emi eso mgbi iJɔn lu ne, iYesu wita ogbɔdze yi ibyi inggise mi odze mgbi iJɔn gbɛe: <<Li alungwɔ ngwi ema ke okwese le ka di? Li atakwu ngwi awo le fan ntonaa?

²⁵ Ki no li ngha ba ma, li alungwɔ ngwi ema ke le ka di? Li ongyulo nwo angwuto osuse? Ama nwo angwuto ofyunfym-mya beyi ama ogye ese a li to ude uto.

²⁶ Wane li alungwɔ ngwi ema tase le ka di? Li oyegbɔɔ? Eɛn, ani le nya ema, o ngha oyegbo.

²⁷ Nene li ongwu a lo ungwɔ ikyen gbɛe:

<< <Dii, ani ka do ongyeso

mgbi ani no teyi abu,

ongwu nka teyi ka me abu ofe mani.>

²⁸ Ani le nya ema, inggise ngwu ongyaa mba ma duu, onyi kpaa dzema nshewo ngha iJɔn ba; Nghaduu inggise nli olele mi esuto mgbi Imgbasho shewo nghan.>>

²⁹ (Ali inggise beyi ama ogbe udza ifyee ngwu fwon duu, gbela Imgbasho, lubana iJɔn tsekise kyo ma iBatisima.

³⁰ Kpaa emi iFarasi beyi ama oye ola fwa oweka mgbi Imgbasho mi ikye mgbi ama, ikyesine a fwa onu iJɔn kyo ma iBatisima.)

³¹ <<Ma li alungwɔ ngwi ani ka kye inggise emi eto ne mba yan? A to sine?

³² A to dafi engbe ama nto ifyidu le kwu ewoma ela gbɛe:

<<Eyi gbla ema ozuna,

kpaa ema shufwe ba,

Eyi shashi ibo,

kpaɔ ɛma tsukwu ba!

³³ Lubana iɔn okyɔ iBatisima ba, o li gye ungowgye ba, di li wa eneeƙwɔ ba; ɛma gbɛɛ: <Ese don ikye.>

³⁴ Ongwɛ Inggise ba le gye diye wa, kpaɔ ɛma li gbɛɛ: <Dii, o li inggise okyɔ nggwɔ yi inggise ofya ɛbye di li oka ama ogbɛ udza ifyɛɛ beyi emi ali ibwubwe.>

³⁵ Nghaduu ozoyeye li tso otsitsi to mbi ama nkyedon mani.>>

Owagbai ongyaa kye engyie kyi iYesu afo

³⁶ Inggise iFarasi oka bo iYesu ungowgye ongwɛ onodɛ mi uɛ mgban, o ka soke imbe ogye ungowgye.

³⁷ Ono ngwi ongyaa owagbai ngwu dze igeli na, ka fwo dafi iYesu le gye ungowgye mi ozu mgbi inggise iFarasi nɛ, o kye ikpokpo alabasta mgbi engyie ogbungbɛ,

³⁸ wa kwulɛɛ mi iyikpa iYesu le tsukwu kye etse kyin afo. Di kyi fwoɔɔ yi otu mgban, o kye ondu le kwon afo diye kye engyie ogbungbɛ yawon afo.

³⁹ Ngwi inggise iFarasi ngwu boon ungowgye na di nghanɛ, o gbo yi ewon gbɛɛ: <<Inggise nɛ ki li oyegbo yo, o ki ye ito ongyaa nkye abo le gbon ewo nɛ beyi iyi obube ngwi o dzeyan neni.>>

⁴⁰ Ta iYesu nyan gbɛɛ, <<iSaimon, ani dze yi odzɛ ngwi n ka gbo yi abu.>> O gbɛɛ, <<Gboka otsetse!>>

⁴¹ <<Inggise onu mkpa oka dze yi ama ngban mkpa ngbi efa: Oka dzeyan isule ideli eda, oka ma li isule ngwusefa don iwyo.

⁴² Ama efa duu yagba okpaakpa ba, ta o dze ma ta. Li ɛmɛ ngwu inggise onu mkpa na ka nghao kpan itukwu?>>

⁴³ iSaimon nun uka gbɛɛ, <<N tsewe gbɛɛ, li ongwɔ o dzanta yi mkpa kwuba nani.>> iYesu gbɛɛ, <<O gbo ayin.>>

⁴⁴ O si kyata inɛ kɛ mbi ongyaa na nya iSaimon gbɛɛ, <<Abu di ongyaa nɛ wɛ? Ani ba uɛɛ abu kpaɔ abu nu ani eni osaafɔ ba, kpaɔ ongyaa nɛ nu ani afo yɛɛ eneni yi etse, di kye fwoɔɔ yi otu mgban.

⁴⁵ Abu ta ani angba yi ondu okwo ani ataka ba, kpaɔ ongyaa nɛ kye ono ngwi ani ba mɛnɛ ma jo, o tonya okye ondu kwo ani afo waba.

⁴⁶ Abu kye engyie kyi ani ikye ba, ng-haduu ongwɔ yo kye engyie ogbungbɛ kyi ani afo.

⁴⁷ Hinine ani le nya abu gbɛɛ a dzanta yi ali ibwubwe kwuba, ikyesine o tso okpitukwu kwuba. Kpaɔ inggise ongwɔ a dzanta gweɛ, li tso okpitukwu gweɛ ta.>>

⁴⁸ Ta iYesu nya ongyaa na gbɛɛ, <<A dzita abu yi ali ibwubwe mgbi abu.>>

⁴⁹ Ingyoga angbeka ama nle gye ungowgye yi ama wita ogbo yi ewoma gbɛɛ,

<<Nene li ɛmɛ ngwu ali ibwubwe kpaɔ o li dze inggise ta yan?>>

⁵⁰ iYesu nya ongyaa na gbɛɛ, <<Oyeye onuunu mgbi abu dulu abu wato, lu mi iyu.>>

8

Engyaa ama nwafo yi iYesu

¹ Dafi egbe wa nye gwee nɛ, iYesu le kyikye nye ifu igeli yi agwɔ idzidza-dzidza le gbo Eso Osuse mgbi esuto mgbi Imgbasho. Ama ogbikyon kye yan,

² beyi engyaa angbeka ngwu a ngyelu ma ootse onodzi ibwubwe beyi ootse ita idzidza-dzidza: li iMeri ngwu a li kwun di iMagidalin, ongwɔ a lo onodzi emese to mbon egyafa nani;

³ beyi iJoana, owa iKudza, nli ikye mgbi emi ido mi opiikwɔ mgbi iHerude; beyi iSudzana, beyi engyaa angbeka kwuba ama nli kye ungwɔ mgbi ama abuoma kye ya emi iYesu abo mani.

Utsa mgbi inggise ofwe eto

⁴ Ngwi ibyi inggise tole kwakye, angbeka dile ba mbi iYesu mi igeli idzidza-dzidza nɛ, iYesu nya ma odze mi utsa gbɛɛ:

⁵ <<Inggise ofwe eto tase o ka fwe eto. Dafi o fwe nɛta, angbeka yangwuta mi ofɛ a kye afo dzin, ingwuno emi esho ba wa kyi salu gye.

⁶ Angbeka yangwuta mi akwutse; dafi i lumbye nɛ, a ngwɔ dunto ikyekye a tu eni ba.

⁷ Eto angbeka yangwuta mi ifaato, ato she beyi ama nu ma gbufyo.

⁸ Angbeka yangwuta mi ekye osuse, a lumbye yɛ wa owawa akpe ngwuseda nga ongwɔ a kye kya mani.>>

iYesu si kwu ela gbɛɛ: <<Inggise ndzɛ yi adɔ ofwoofwo yo, no fwo!>>

Itɔdze mgbi utsa

⁹ Engwafɔ iYesu byun ita mi ungwɔ ngwi utsa nɛ tso mani.

¹⁰ Nɛ o gbɛɛ, <<Ema yo, a nu ema yɛ ungwɔ ama odaada ongwɛ esuto mgbi Imgbasho, kpaɔ angbeka yo, li mi utsa ta ngwi ani li gbɔdze yi ama, ikyegbɛɛ:

<<Mi odiidi kpaɔ, a ka di ba,

beyi ofwoofwo,

ni a fwo kpaɔ ka gbosa loma ba.>

¹¹ <<Li ngha ngwi utsa nɛ dze aani: Eto, li elodze Imgbasho.

¹² Eto ama n yangwuta mi ofɛ na, i tso gbɛɛ dze mi ikye ama nfwo kpaɔ iSatan ba wa kye gbelu elodze na mi itukwu mgbi ama, ikyegbɛɛ nu ma dze yi oyeye onuunu ni a dulu ma wato ba.

¹³ Eto ama n yangwuta mi akwutse ma, a dze mi ikye inggise ama nfwo eso diye kyi

gbelu yi atsa, kpaa a yagba dze yi akpa ba, a noyeye mi onɔ gwee ta, ngwi imbadi wa ba ne, a gbese.

¹⁴ Eto ama n yangwuta mi ifaato ma, a dze mi ikye inggise ama nfwo, kpaa okakewo beyi aludu yi oshishe ofyunfya ongwɛ ese ne loka wo ma neta, a ye wa owawa wuba.

¹⁵ Eto ama n yangwuta mi ekye osuse ma, a dze mi ikye inggise ama nfwo elodze mgbi Imgbasho, yilen sise mi itukwu mgbi ama osuse yi osunu mani, a shitukwu nghataa ye wa owawa.

Utsa mgbi ipitila

¹⁶ <<Inggise onyi dzema nka kye ipitila do duuse yile mgboko tukwu ele ba, naadi yilen dzeke ifagwudo ba, kpaa o ka kye dɔke mi ododa, ikyegbɛ inggise ama nle kaka nu ma di osa!

¹⁷ Lubana alungwo ndze mi odaada duu, a ka kye to mi ododa, beyi ungwɔ ama ngwi a kye tukwu duu, a dika kye kwulu to mi ododa.

¹⁸ Nghane gbewɛbyi, mi ofwoofwo ngwi ema fwo neni, ikyekye inggise ndze yi ungwɔ ma, a ka mbwon mbwoombwo, kpaa inggise ndze yi ungwɔ ba, ogyengye ngwi o tsewe gbɛ ongwu dzeyan ma kpaa, a ka kye gbelu mbon.>>

Ono iYesu beyi emi ongwunɔn

¹⁹ Ono iYesu beyi emi ongwunɔn ba mbon, kpaa a yagba to mbon gbɛ ba ikye ibyi inggise.

²⁰ Inggise oka nyan gbɛ, <<Onabu beyi emi ongwunabu kwulese to ese, a mina odi abu.>>

²¹ iYesu nya ma duu gbɛ, <<Ama nle fwo elodze Imgbasho diye kyo mi ele ma, li ama nli emi onani beyi emi ongwunani aali.>>

Yesu nu onikyo awo kwulu

²² Egbe oka neta, iYesu si kaka uwaa yi engwafɔn, o nya ma gbɛ, <<Eyi ka foyombo uto.>> A si kyato olu.

²³ Ngwi a le lu ne, iYesu nauna. Ne onikyo awo ba wa fa mi uto, nghane uwaa le mweeni, ta a dze mi okakewo kpakpa.

²⁴ Man a ba mbon wa kyilen, a nyan gbɛ, <<Ongyukwo, Ongyukwo! Eyi le dzili!>>

iYesu kyato fa awo yi akpeni ela: onikyo awo kwulu, man imbe ye tsiin. ²⁵ O nya engwafɔn gbɛ, <<Oyeye onuunu mgbi ema ko?>>

Kpaa dafi i kwulu ma ewo imio diye wo ma ne, a gbo yi ewoma gbɛ, <<Nene li ali inggise den? O fa awo yi akpeni ela ta a fwon!>>

Inggise iGeraseni ngwu ese don ikye

²⁶ Emi iYesu si fooye ka kaka ogalu iGeraseni, ni oyombo uto iGalalia nani.

²⁷ Ngwi iYesu fa dɔke ese neta, o tsa yi inggise oka mi igeli nani, ngwu ese don ikye. O nya yi angwuto owoowo onɔ ke, o di li la ude ba, li imbe endzi ta ngwi o li la.

²⁸ Ngwi o di iYesu ne, o makwo mi ela okwukwo, o lanke iyayi, ye kwu ela mfyumfye gbɛ, <<Li ekye wo abu yi ani, iYesu, Ongwe Imgbasho nngba mi esho? N le tekye nu abu, ka nu ani adze ba!>>

²⁹ iYesu ple woola gbɛ, ni onodzi ibwubwe na tase mbon. Lubana a li bwan mi onɔ ibyibi, kye ashi won tan itse, ikye ole ngyon, kpaa o li gbɔdze adi nani, onodzi ibwubwe li lon lu okwese.

³⁰ iYesu byun gbɛ, <<Iyi abu di eme?>> O nyan gbɛ: <<Ibyibi>> bana onodzi ibwubwe kaka mbon kwuba.

³¹ Onodzi ibwubwe ntona tekye nu iYesu gbɛ no ka lo ama onya ka yaoke ikplishe na ba.

³² Obyia ibyibi kwuto le gye ungwɔ mi ewunggwɔ. Onodzi ibwubwe ntona si le tekye yi iYesu gbɛ no nu ama ofɛ ni ama lu ka kaka obya, man o si nu ma ofɛ.

³³ Ta onodzi ibwubwe ntona tase mbi inggise na lu ka kaka mbi obya ntonani. Obyi obya ntona nye yi onya kye ikye byi ufe lu ka yaoke uto si dzili mi eni.

³⁴ Ama ntolɛ ngyo obya ntona di ungwɔ nkɔ mani ta a si tsinya lu ka kye odze ne gbɔfwe nya ma mi igeli beyi ama nto okwo mi agya na duu.

³⁵ Ne inggise tase le ka di ungwɔ nkɔ mani. A si ba mbi iYesu, wa tu inggise ongwu onodzi ibwubwe to mbon ma, sɔdze iyayi mgbi iYesu, o wo angwuto ewo di dze yi ozoyeye saan; ta i kwulu ma ewo.

³⁶ Ama nteyi di ma nya angbeka dafi i kyo se inggise ngwu onodzi ibwubwe kaka mbon na ye saan mani.

³⁷ Ta inggise ama nto ese iGeraseni duu nya iYesu gbɛ no lu, ikyekye imio wo ma. Man o si kaka uwaa lu.

³⁸ Inggise ongwu onodzi ibwubwe to mbon na tekye yi iYesu gbɛ ni ongwu lu yan. Kpaa iYesu nyan gbɛ,

³⁹ <<Ye lu ude abu, ka gbo ungwɔ ngwi Imgbasho kyo yi abu neni.>> Inggise na ye lu le kyikyɛ ke igeli-igeli, le gbo ungwɔ ngwi iYesu kyo yan mani.

Ongwe ifaru beyi ongyaa ndotse

⁴⁰ Ngwi iYesu ye luba ne, ibyi inggise gban yi atsa, ikyekye a tole fan.

⁴¹ Ne inggise oka ba, a li kwun di ifaru, o li ongyukwo mi ozu okwakye mgbi emi ijuda, o kwese mi iyayi iYesu, si tekye yan gbɛ no ke ude ongwu.

⁴² Ikyekye ongwɔn ongwu ongyaa onyi kpokpo, ngwu me onova iwyodefa, le fyikwu.

Dafi iYesu le ke ne, ibyi inggise tukwun kpakpa.

⁴³ Mi idzidze inggise ntona, ongyaa oka dze le yeeyi me onova iwyodefa. O kye mbelu aludu mgban duu mbi ama obwotse, kpaa ononyi yan abo ba.

⁴⁴ O kaka ifu ibyi inggise ntona wa kye abo gbo iYesu ondu angwuto mi iyikpa, labolabo mata eyi dze lon.

⁴⁵ IYesu gbɛɛ, <<Li eme kye abo gbo ani? >>

Ama duu le tangwe, iPyita gbɛɛ, <<Ongyukwo, ibyi inggise ama nkpaakeke wo abu ye mba yi abu ne abu le byita gbɛɛ: <Li eme kye abo gbo ani ewoo?> >>

⁴⁶ Nghaduu iYesu gbɛɛ, <<Inggise kye ewo gbo ani, bana n kwu ambe dafi mfyɛ to mbi ani mani.>>

⁴⁷ Ongyaa na di dafi ongwu dze mi odaada wuba ne, o ba yi ewo otsaatsa wa kwesɛ mi iyayi mbi iYesu. O gbo mi ine mghi inggise tsatsa dafi i kyo se ongwu kye abo gbon ondu angwuto, ngwi ewo mghi ongwu kpa di gbosa mina mani.

⁴⁸ Ne iYesu nyan gbɛɛ, <<Ongwongyaa, oyeyɛ mghi abu onuunu dula abu to. Lu mi iyu.>>

⁴⁹ Ono ngwi iYesu le gbɔdze ne mata, inggise oka mi ude iJaru, ongyukwo mi ozu okwakye mghi emi iJuda na ba, o gbɛɛ, <<Ongwabu ongwu ongyaa na kwulu wa: Ka kaka Otsetse ewo wuba.>>

⁵⁰ Ngwi iYesu fwo nghane, o nya iJaru gbɛɛ, <<Ka teeyi ba, dze yi oyeyɛ onuunu, ta ootse mgban ka ngyɛ.>>

⁵¹ Dafi iYesu ka kaka ude iJaru ne, o gbela onu inggise onyi kpaa kaka ozu yan ba, se li iPyita yi iJɔn beyi iJensi yi otso ongwongyaa na beyi onɔn ta.

⁵² Ali inggise duu le tsukwu dile kyelela mi ikye ongwɛ nani. Nghaduu iYesu gbɛɛ, <<Ka tsukwu ba na, lubana ongwɛ ne kwulu ba, o nanuna ta.>>

⁵³ Ama duu shan isha ikwangha, ikyekye a ye gbɛɛ di o kwulu.

⁵⁴ Kpaa ngwi iYesu byin abo ne, o gbɛɛ, <<Ongwani, kyato!>>

⁵⁵ Ta oshishe mgban ye, man o kyato ple. IYesu si nya ma gbɛɛ, nu ma kye ungwogye non gye.

⁵⁶ Ikwulu ama o mban ma ewo, nghaduu iYesu wo ma ola gbɛɛ nu ma ka nya inggise onyi ungwɔ nkyo ne ba.

9

IYesu do ama ogbikyon iwyodefa esɔ

¹ Ono ngwi iYesu kwu iwyodefa ntona kwakye ne, o kye mfyɛ nu ma ikye nu ma lo ali ito onodzi ibwubwe onya di ngyelu ootse,

² o di do ma esɔ gbɛɛ nu ma gbɛɛso mghi esuto mghi Imgbasho di ngyelu ama ndotse ootse.

³ O nya ma gbɛɛ: <<Ka kye unka byi mi okyɛɛ ne ba na, okwuta ba, igbe ba, ungwogye ba, awuya ba, angwuto kpaa ba.

⁴ Ali ude ngwi ema kaka efu duu, dze ele nghataa imbisɔ ngwi ema ka dzata igeli nani.

⁵ Ni inggise gbɛɛ ema bayo, dzata igeli na di kye gbolu ombulu mi afɔ mghi ema otso ambe adɔ okwookwo mboma.>>

⁶ Ama okyɛ yi iYesu si lu kaka mi agwo ude yi agwo ude le gbo Esɔ Osuse neni dile ngyelu ibyi inggise ootse mi ali imbe duu.

Odze kaka iHerude ewo

⁷ Ngwi iHerude atɔtse fwo odze nle kiyayi ne, i si kakan ewo. Inggise angbeka tole gbɛɛ iJɔn okyo iBatisima ye kyɛɛ mi ikwu.

⁸ Angbeka tole gbɛɛ oyegbo Elaija yido wa, hona onyi mi oyegbo emi tugbe ntona diye kyɛɛ mi ikwu.

⁹ Nghaduu iHerude gbɛɛ, <<Ani nu ma dze iJɔn ikye! Ma li eme ngwu ani le fwo odzan kpakpa ngha?>> I mina iHerude kpakpa otsa ine yi iYesu.

IYesu byi inggise idubu eda enbwa

¹⁰ Ama ogbikye iYesu si yido wa nyan ungwɔ ngwi ama kyo duu. Man o kye ma daada lu yan mi igeli mghi iBetsaida,

¹¹ nghaduu ibyi inggise ka difwi imbe ngwi a lu neman a si lukwun. O gbɛɛ ma di nya ma odze mghi esuto mghi Imgbasho, di ngyelu ama i wo ma gbɛɛ ni a ngyelu ma ootse duu.

¹² Ngwi ono le ka gbɛɛ ne, emi iwyodefa ntona ba mbi iYesu wa gbɛɛ, <<Nu ijiji inggise ntone ofe, nu ma lu igeli yi ayese mi agya neni. A mina imbe ngwi a ka la di tu ungwogye, ikyekye imbe ngwi eyi dze ne li imbe okplagada!>>

¹³ IYesu nu ma uka gbɛɛ, <<Nu ma ungwɔ nu ma gye na.>> Kpaa a gbɛɛ, <<Eyi dze yi ibredi nghi eda beyi mmbweni efa ta. Ni eyi ka byi inggise ntone duu enbwa yo, sede eyi ka lu ka gyaagya ungwogye.>>

¹⁴ (A me engyulo idubu eda sini.)

Nghaduu iYesu nya engwafɔɔn gbɛɛ, <<Nu ma sise ibwi-ibwi me mmbwo ngwusefa dɔn iwyo, ngwusefa dɔn iwyo hini.>>

¹⁵ Engwafɔɔn kyo ngha yeɛɛ, ali inggise duu sise.

¹⁶ IYesu kyi kyelu ibredi beke yi mmbweni ntona man kyile ine ke esho, o bibo di kye mwalu. Ta o kye nu ama okyɛ yan nu ma kye gha ma.

¹⁷ Ama duu gye di tolo, ambulu nsisi ma a kye gbelu mbwo uya nghi iwyodefa.

Eme li iYesu

¹⁸ Egbe oka ngwi iYesu dze yuon le bibo ne, ama okye yan to biyan man o byi ma gbæ, <<Inggise li gbæ ani li eme?>>

¹⁹ A nu uka gbæ, <<Angbeka gbæ abu li iJon okyo iBatisima; angbeka gbæ oyegbo Elaija; angbeka li gbæ oyegbo oka tugbe yido ba.>>

²⁰ Nghanæ iYesu byi ma gbæ, <<Ema ma ema gbæ ani li eme?>>

iPyita nun uka gbæ, <<Abu li iKrestu* mgbi Imgbasho.>>

²¹ IYesu kwo ma ado kpakpa gbæ nu ma ka nya inggise onyi odze ne ba.

IYesu gbodze mi adze yi odze ikwongye mgban

²² IYesu si nya ama okye yan gbæ, <<Ongwæ Inggise ka gbiiso mi ungwo kwuba engyukwo yi ama ofife mgbi Imgbasho beyi ama otso ola mgbi iMose, ka ngwon kyeme-kyeme. Nghadiu mi egbe ongwu ta ma Imgbasho ka kyilen luba oshishe.>>

²³ Ne o nya ma duu gbæ: <<Ali inggise nmina okyedo ani yo, li kyeme ngwi o ka tangwe ewon ye kyelu ekwatsi mgban kyedo ani alegbe-alegbe.

²⁴ Ikyena ali inggise nmina odulu oshishe mgban to yo ka byulu lon, kpaa inggise ngwu oshishe mgban byulu mi ikye mgbi ani yo, ka dulun to.

²⁵ Li ali oyabo ngwi inggise ka tu, ni otsungwon tu ese duu kpaa oshishe mgban dzili?

²⁶ Ni inggise kwayiwi ani yi eso mgbi ani, Ongwæ Inggise ka kwayiwi inggise nani mi ono ngwi o ye mi okwokwo mgban beyi okwokwo mgbi Otson Imgbasho beyi engyeso mgban ama osaan mani.

²⁷ N nya ema otsitsi, angbeka to mmene nka di ikwongye ine ba nghataa ngwi a ka di esuto mgbi Imgbasho.>>

Okwokwo mgbi iYesu

²⁸ Ngwi iYesu gbodze ntonye nye egbe egyata neta, o kyi kyelu iPyita beyi iJon yi ifensi lu yan mi ungwo oka bibo.

²⁹ Ngwi o kale bibo ne, ine mgban si kyata, angwuto mgban tundze ye kwo dafi mmbwo onaabo mani.

³⁰ Ple neta, engyulo efa: iMose yi Elaija, to wita ogbodze yi iYesu.

³¹ A to mi okwokwo ongwi esho sile gbodze mgbi ikwu mgbi iYesu ndze kwekwe ombwumbwo mi iJerosalin mani.

³² iPyita yi angbeka si nuna lu byulu, ono ngwi a kyato ne, a di iYesu yi okwokwo mgban yi inggise nghi efa toyan.

³³ Dafi iMose yi Elaija wita olu ne, iPyita nya iYesu gbæ, <<Ongyukwo, i tishi ni eyi ki to mmeneni! Ni eyi kle afu eta, onyi ikye

abu, onyi ikye iMose, onyi ikye Elaija.>> (Nghadiu o ye odze ngwi o le gbo ma ba.)

³⁴ Ngwi o kale gbodze ne, akpa to gbiiwulu tukwu ma; man ama okye yi iYesu wimio dafi akpa wa tukwu ma mani.

³⁵ Ta ela to mi akpa na gbæ, <<Nene li Ongwani, ongwu ani dulu-dulu; gado mbon na.>>

³⁶ Ngwi ela na dede mata, iYesu si dze mmana yuon. A kye ungwone da, di nya inggise onyi kpaa ungwo ngwi ama di mi ono na ba.

IYesu lo onodzi ibwubwe to mbi ongwongyulo

³⁷ Tegblifan, ngwi a tashulu mi ungwo ne ibyi inggise wa tu iYesu.

³⁸ Inggise mi ifu ibyi kwu ela gbæ, <<Otsetse, ani gbabo nu abu kye ine byi ongwan, o li onyi kpokpo.

³⁹ Onodzi obube li dzessin non le teela; o li dze kwulu li tsuuvu ondu. Ni kyon li fyumfyue odzanta dile dzilin kpaa.

⁴⁰ Ani gbabo nu engwafu mgbi abu gbæ nu ma dulu onodzi na to, kpaa a yagba ba.>>

⁴¹ IYesu si gbæ, <<Ema eto ndze yi oyeye onuunu ba dile kpekpe ne! Ka kye ono sine ngwi ani ka dze yi ema yi itukwu oshiishi?>> Man o nya inggise na gbæ, <<Kye ongwabu ma ba mmeneni.>>

⁴² Ngwi a kyon ba ne, onodzi obube na di kyon zudowese o di dze kwulu fyumfyue. IYesu fwa yi onodzi obube na, man o ngwelu ongwe na ootse di yilen nu otson.

⁴³ I kwulu ali inggise ewo mi ogbadzidzi mfyue ngwi Imgbasho kyo nani.

Ngwi i kale kwulu ali inggise ewo mi ungwo ngwi iYesu kyo duu ne, o nya ama okye yan gbæ,

⁴⁴ <<Gado mi odze ngwi ani le gbo nya ema neni: A kye Ongwæ Inggise wo engyikyili mgban abo.>>

⁴⁵ Kpaa ama okye yan kwu ambe odze na ba. Itan da ma daada, ne a yagba difwi ba, imio kpaa di wo ma obyin ita.

Li eme shewo nga?

⁴⁶ Angwodze to mi idzidze mgbi ama okye yi iYesu gbæ li eme mboma shewo nga.

⁴⁷ IYesu ye ungwo ngwi a le tsæwe neta, o si kye ongbæ kwulese dzeke agya mgban.

⁴⁸ O nya ma gbæ, <<Inggise ngbe ito ongwe ne mi iyi mgbi ani gbæ ani; o di gbæ inggise ngwu ndo ani eso mani. Ikyena ongwu ngbau yeyikpa mi idzidze ema duu ma ngbau shewo.>>

Inggise nfwæ ema ba li mgbi ema

⁴⁹ IJon gbo nya iYesu gbæ, <<Ongyukwo, eyi di inggise oka le dulu onodzi emese mi

* 9:20 9:20 Ongwu Imgbasho zonu gbæ o ka wa dulu ese wato mani.

iyi mgbi abu eyi fwa yan gbɛɛ non nya, ikyekye o li onyi mbi eyi ba.>>

⁵⁰ IYesu nyan gbɛɛ, <<Ka yama non nya ba, lubana inggise nfa ema bayo li mgbi ema.>>

Emi iBatlomi fwa iYesu

⁵¹ Dafi onɔ wa dɛ kwɛkwɛ ngwi a ka kye iYesu lu esho nɛ, o ngyɛlu odzɛ mi itukwu mgban si byi ofɛ abo le lu iJerosalin.

⁵² O dɔ emi esɔ angbeka teyin, lu mi agwo oka mi iSamaria oka melu alungwo duu le fan;

⁵³ kpaa inggise emi imbe na gban ba, ikyekye o dɛ yi owɛka olu iJerosalin.

⁵⁴ Onɔ ngwi iJensi yi iJɔn di ungwɔnɛ nɛ, a gbɛɛ, <<Otse, i mina abu gbɛɛ ni eyi kwu ola ela mi esho ba esɛ wa kye ma gyee?>>

⁵⁵ Nghaduu iYesu kyata fwa yi ama,

⁵⁶ ta a si lu agwo oka.

Itodzɛ okyɛdɔ iYesu

⁵⁷ Dafi emi iYesu le lu ofɛ mgbi ama nɛ, ongyulo oka nya iYesu gbɛɛ, <<N ka kyɛdɔ abu ali imbe ngwi abu le kɛ duu.>>

⁵⁸ IYesu nyan gbɛɛ, <<Emi ogbalinya to yi ishe, ingwunɔ emi esho dɛ yi uɛ, kpaa Ongwɛ Inggise dɛ yi imbe okye ikye da ba.>>

⁵⁹ O di nya inggise oka gbɛɛ, <<Kyɛdɔ ani.>>

Kpaa ongyulo ma gbɛɛ, <<Otse, ababo nu ani ofɛ nin ka gbinebyi otsani nghataa kyon ndzi se.>>

⁶⁰ IYesu nyan gbɛɛ, <<Ni emi ikwukwo ndzi ewoma, kpaa abu lu ka gbeesɔ mgbi esuto mgbi Imgbasho.>>

⁶¹ Inggise oka di gbɛɛ, <<N ka kyɛdɔ abu, Otse; kpaa nin ka nya emidani gbɛɛ se egbe oka se.>>

⁶² IYesu si nyan gbɛɛ, <<Inggise nkɛ abo byi ikwukwo oshookwo, wita oshookwo diye le ndine kɛ iyikpa yo, o mɛ unkonyi mi esuto mgbi Imgbasho ba.>>

10

IYesu dɔ inggise ngwuseta dɔn iwyo diwyɛfa esɔ

¹ Ta Otse iYesu dula inggise ngwuseta dɔn iwyo diwyɛfa. Si dɔ ma esɔ efɛfa, nu ma teyi ongwu kɛ ali igeli beyi imbe ngwi ongwu ka wa kɛ duu.

² O nya ma gbɛɛ, <<Etɔ oshe-she le kwuba, kpaa emi idɔ le gwɛɛ ta. Ema bibo mbi Otse Imgbasho mgbi etɔ oshe-she, non dɔ emi idɔ mgban esɔ nu ma wa she etɔ.

³ Lu na! Lubana ani le dɔ ema esɔ dafi engwɛ mmala mi ifu emi idukwɛbe mani.

⁴ Ka kye ashiko naadi igbe oke agaba hona okpafɔ oka ba. Ka kwulesɛ mi ofɛ tangba yi inggise ba na.

⁵ <<Onɔ ngwi ema kaka uɛ inggise yo, tsekise gbɔgbɛɛ, iyu mgbi Imgbasho no dɛ uɛ nɛni.

⁶ Kini inggise iyu dɛ uɛ na yo, iyu mgbi Imgbasho ka kaka mbi otsungwon, kpaa ki no dzɛma ba, iyu mgbi Imgbasho ka yɛ luba mbi ema.

⁷ Ka kyikye mi uɛ-uɛ ba na. La mbonyi, le gye, diye wa alungwo ngwi a kye nu ema duu, lubana inggise idɔ gyo ni a kpan.

⁸ <<Ni ema kaka igeli, nu ma kyo ema onɔ yo, gye alungwo ngwi a kye nu ema duu.

⁹ Bwe ama ndotse to ele ma na, diye nya ma gbɛɛ: <Esuto mgbi Imgbasho dɛ kwɛkwɛ yi ema.>

¹⁰ Nghaduu, igeli nfa ogbɛ ema yo, tase lu ingofɛ ka gbɛɛ,

¹¹ <Ombulu ongwɛ ogalu mgbi ema nto eyi ka afɔ nɛ, eyi ka kye gbolu dafi ambe adɔ okwookwo mbi ema. Di ye na gbɛɛ esuto mgbi Imgbasho dɛ kwɛkwɛ.>

¹² N nya ema gbɛɛ, mi egbe na ka tatase lo ogalu mgbi iSodon nga ogalu nani.

Ogalu ama nnoyɛɛ ba

¹³ <<Ahoo! Abu ogalu mgbi iKoradzin yi abu iBetsaida; ema ka gyadzɛ. Ikyekye ungwɔ okwulewo ongwɛ a kyo mbi ema nɛ, ki li mi ogalu mgbi iTiru yi iSidon yo, a ki kyatitukwu mi ali ibwubwe mgbi ama gbege, a ki kye ishangli wo ewo yɛ myini mi uto.

¹⁴ Nghaduu ka tatase mbi iTiru yi iSidon mi egbe ikwo nga ema.

¹⁵ Abu ogalu mgbi iKapenahun, a ka kyile abu esho wɛ? Ei, abu ka lu esɛ mi imbe mgbi emi ikwukwo.>>

¹⁶ IYesu si nya ama okye yan gbɛɛ, <<Inggise nfwɔ ema fwo ani. Ongwu nfa ema fwa ani. Ongwu nfa ani fwa Imgbasho ndɔ ani esɔ nani.>>

Oyɛɛɛ mgbi emi ngwuseta dɔn iwyo diwyɛfa

¹⁷ Emi ngwuseta dɔn iwyo-diwyɛfa ntona yidɔ yi atsa wa gbɛɛ, <<Otse iYesu, mi iyi mgbi abu emi onodzi emɛɛ kpaa le sunu eyi.>>

¹⁸ IYesu nu ma uka gbɛɛ, <<N di iSatan gbɛɛ kye esho dafi mmbwo le naabo mani.

¹⁹ Ani tsekise kye mfye nu ema okye afɔ dzi ifa beyi mnaa odi nga mfye mgbi ongyikyili mgbi ema, unkonyi kpaa ka kyo ema ba.

²⁰ Nghaduu ka tsatsa na gbɛɛ di emi onodzi ibwubwe sunu ema ba. Kpaa, tsatsa ikyegbɛɛ a lo ema iyi mi esho.>>

IYesu tsatsa

²¹ Mi onɔ na kpɔo iYesu mbwo yi atsa mi Onodzi Osaan, o gbɛɛ, <<Ani ta abu angba Otsani, Otse mgbi esho yi esɛ, ikyekye abu kye ungwɔ ntonɛ da ama ntsewe gbɛɛ di

ama kwiine diye yodze mani, kpaa abu kwulu iba nya engbe. Een, Otsani, li nga ngwi i kpaa abu gbæe no dze aali.

²² <<Otsani kye alungwɔ duu wo ani abɔ. Inggise onyi ye ongwu nli Ongwe ba li Otsɔn ta, inggise onyi kpaa di ye Otsɔn ba li Ongwe ta beyi ama ngwu Ongwe sadu okye Otsɔn tso ma mani.>>

²³ Man iYesu kyata mbi engwafɔɔn ntona gbo yi ama daada gbæe, <<Mse no be ama ndi ungwɔ ema di ne ewo!

²⁴ N nya ema gbæe i mina ibyi oyegbo yi ibyi uto gbæe ama ki di ungwɔ ngwi ema di ne, kpaa a di ba, odi fwo ungwɔ ngwi ema fwo ne, kpaa a yagba fwo ba.>>

Utsa mgbi inggise iSamaria osuse ngwu ya inggise oka abɔ

²⁵ Onɔɔlɔ ma inggise oye ola mgbi iMose saan kyatunto ombadi iYesu, o gbæe, <<Otsetse, li alungwɔ ngwi ani ka kyo se ngwi ani ka tu oshishe igyegwu?>>

²⁶ IYesu nyan gbæe <<Ola mgbi iMose gbosine? Abu li gbon sine?>>

²⁷ O si nu uka gbæe, <<Afe lo gbæe: <Otse Imgbasho no kpa abu itukwu yi itukwu mgbi abu duu yi oshishe mgbi abu duu yi mfyegbi abu duu yi oyeeye mgbi abu duu>; di, <Inggise nwatse do abu kpa abu itukwu dafi ewabu mani.>>

²⁸ IYesu nyan gbæe, <<O gbo ayin; lu ka kyo nga ta o ka dze oshishe.>>

²⁹ Kpaa dafi o mina otso oye-ye mgban ne, o byi iYesu gbæe <<Li eme li inggise owatse do ani?>>

³⁰ IYesu si nyan gbæe: <<Inggise iJuda oka kye mi iJerusalem li ke iJeriko, o ka kaka abɔ emumyi ama ofofe. A gbon ibe di kyon angwuto mi ewo kye dulu dzanta lake ofe le fiyikwu.

³¹ I wa yæe gbæe inggise ofife mgbi Imgbasho oka wa le nye ofe na kpɔɔ, o di inggise na ta, o nye enggengga lu.

³² Inggise iLevi nli kyido mi ozu okwakye mgbi emi iJuda kpaa kyo nga, ngwi o di inggise na ne, ongwu kpaa nye enggengga lu.

³³ Nghaduu inggise iSamaria oka nli ingyoga le ke agaba, o wa to imbe inggise na ladze, ngwi o din ne, elela kyon won kpakpa.

³⁴ O ke kwekwe yan, o san ifwa mi ewo kye otse yawon ele. O kyon dake itaklimyi mgban kyon lu ozu ingyoga ka gbeka byun saan.

³⁵ Tegblifan ne, o dulu udza nme okpa ido egbe efa sini kye nu inggise odi mi imbe ingyoga nani, o nyan gbæe: <Bwen saan, ni ani ye, ungwɔ ngwi abu mbe mi ikyon duu ni nga nga kpaa, n ka yilen kpaa abu.>>

³⁶ IYesu byita gbæe, <<Mi idzidze inggise eta ntona li eme li inggise owatse do inggise ongwu nkaka abɔ emumyi na?>>

³⁷ Inggise oye ola na nun uka gbæe, <<Li inggise ongwu ndin elela nani.>>

IYesu nyan gbæe, <<Lu ka kyo nga.>>

IYesu kaka ude iMata yi iMeri

³⁸ Dafi iYesu yi engwafɔɔn kye ikye do le lu iJerusalem ne, o wa kaka agwɔ oka, ongyaa oka ngwu a li kwun di iMata gban kaka ude mgban.

³⁹ O dze yi ongwunon ongwu ongyaa, iyin di iMeri, ngwu ka sɔke iyayi Otse iYesu le fwo elodze mgban.

⁴⁰ Kpaa i kaka iMata ewo kpakpa yi ungwɔ okyɔkyɔ nshewo ngwi ongwu ka kyo mani. O ba wa byi iYesu gbæe, <<Otse, i kpa abu dafi ongwunani dzata ido duu tsaani abɔ nee? Ngyese nyan no wa tobyi ani.>>

⁴¹ Otse nun uka gbæe, <<IMata, iMata, i kaka abu ewo, eka di kplokɔ lo abu mi ungwɔ kwuba;

⁴² ungwɔ li onyi ta ndze kyeme-kyeme. iMeri kye aye ngwi nghao tishi, ngwi a ka kye gbɛlu mbon ba mani.>>

11

IYesu tso ibɔ obɔɔɔ

¹ Egbe oka ne, iYesu le bibɔ mi imbe oka. Mi onɔ ngwi o ngyelu ibɔ obɔɔɔ ne, ongwafɔ mgban onyi ba mbon wa nyan gbæe, <<Otse, tso eyi obibɔ dafi iJɔn tso engwafɔ mgban nani.>>

² O nya ma gbæe, <<Onɔ ngwi ema ka bibɔ yo, gbæe:

<< <<Otseyi,

nu ma nu mmwe mi iyi mgbi abu.

Ni esuto mgbi abu ba.

³ Nu eyi ungwogye mgbi eyi

ongwi alegbe-alegbe.

⁴ Dze eyi ta yi ali ibwubwe mgbi eyi,

dafi eyi kpaa li dzata

ama nkɔ eyi obube mani.

Dika kye eyi kaka igyla ba;

kpaa dulu eyi to mi obube.>>

⁵ IYesu di nya ma gbæe, <<Li eme mbi ema ndze yi uka, ka ke mbon mi idzidze otu ka nyan gbæe, <Okani, tobyi ani yi ibredi nghi eta;

⁶ ikyesine okani oka dzagaba wa kaka mbi ani, ma n dze yi unkonyi ngwi n ka kye non gye ba.>

⁷ <<Ma o nu uka mi ozu dzidze gbæe, <Ka kaka ani ewo ba; onufozo tukwu, engbe mgbi ani di lato yi ani mi akwulo. Nghane n ka yagba kyato ba wa nu abu unkonyi ba.>

⁸ N nya ema, o ka kyato ba wa nun mi ikyegbæe o li okan ba, kpaa mi ikyegbæe o bɔ kyo ewewa ba, li ikyengha o ka kyato wa nun dafi o mina duu aali.

⁹ <<N di nya ema: Bɔ na ta a ka nu ema, di pita na, ta ema ka tu; tsaabo na, ta a ka kwulu ema onufozu.

¹⁰ Lubana otsungwɔn nɔɔ ka gbɛ. Ongwu npita ka tu. Ongwu ntsaabo, a ka kwulun ofɛ.

¹¹ <<Li emɛ mbi ema etsengwe ngwu ongwɔn ka bɔn mmbweni, se o ka nun ifa gbikye mmbweni?

¹² Naadi o bɔn akyogbi, ngwi o ka kye mnaa nun?

¹³ Ni ema emi ali ibwubwe ye onu engbɛ mgbi ema umba osuse ma, ka kyonese Otsema ongwɔn esho ka nghao nu ama nɔɔn Onodzi Osaan ba.>>

IYesu yi uto mgbi emese

¹⁴ Egbe oka nɛ, iYesu lɔ ikplima emese onya. Onɔ ngwi emese na tɔ nɛ, inggise ngwu onodzi emese na non yɛɛ ikplima ma gbɔdze, ta i kwulu ibyi inggise ntona ewo.

¹⁵ Angbeka gbɛɛ, <<iYesu lɔ emese onya yi mfye mgbi iBedzebu ongwu nli ikye mgbi emese nani.>>

¹⁶ Angbeka le mbadin, a mina ambe ongwɔn esho mɔn.

¹⁷ IYesu ye ewodze mgbi ama nɛ, o nya ma gbɛɛ: <<Ali esuto ngwi gbua mi ikyili yɔ, a ka bulu, ude ngwi di gha yi ewon ka bulu.

¹⁸ Ni iSatan kpaa gha yi ewon ma, ka kyonese esuto mgban ka kwudze? Lubana ema gbɛɛ ani lɔ emese onya yi mfye mgbi iBedzebu.

¹⁹ Kini ani lɔ emese onya yi mfye mgbi iBedzebu ma, li mfye mgbi emɛ ngwi engbɛ mgbi ema li lɔ emese onya? Ngyese engbɛ mgbi ema ka gbɔ ema ikwɔ.

²⁰ Kpaa ni li mi mfye mgbi Imgbasho ngwi ani lɔ emese onya yɔ, esuto mgbi Imgbasho ba mbi ema sewaani.

²¹ <<Ni inggise ndze yi mfye di dze yi okyiika, ngyo ude mgban yɔ, alungwɔ ngwi o dzezan duu ka dze kyon.

²² Nghaduu ni inggise ndze yi mfye nghan ba wa gblika yan yɔ, o ka nghan diye gbelun okyiika ngwi o le tsaabo igege yan mani, o dika kyi ghalu okwude mgban yi inggise angbeka.

²³ <<Inggise ndze yi ani bayɔ, kye afo twɛɛ yi ani. Ongwu ngbe ngwikwo yi ani bayɔ, le bulu-bulu.

²⁴ <<Onɔ ngwi onodzi emese tɔ mbi inggise, o li lu ivu le ka pita imbe otonya. Ki non tu imbe bayɔ, o li gbɛɛ; <N ka yido lu ude ani ogbugbe.>

²⁵ Non ye ba udan ogbugbe wa di a kyi melu imbe ma dzeke saan yɔ.

²⁶ O li ye lu ka kwu emese angbeka egyafa ama ntimbali nghan mani, a ka ba wa kaka sise mi ele. Taman odzeedze mgbi inggise na ka timbi nghaabo ogbugbe.>>

²⁷ Dafi iYesu le gbɔdze le ke nɛ, ongyaa oka mi idzidze ibyi inggise ntona si kyile ela esho gbɛɛ, <<Mse no dze yi ifu ngwi mba abu, beyi abɛ ngwi abu ngha nani.>>

²⁸ IYesu nu uka gbɛɛ, <<Nghaduukpaa li inggise nfwɔ elodze mgbi Imgbasho di kyo mi ele yeye mani ka gbumse.>>

Ambe mgbi iJona

²⁹ Dafi ibyi inggise shili kye iYesu wo idzidze nɛ, o gbɛɛ, <<Nene li eto obube! O le mina ambe, kpaa o ka tu onyi ba sede ambe mgbi **iJona** ta.

³⁰ Dafi iJona li ambe mbi emi iNinive na, li ngha ngwi Ongwe Inggise ka li ambe mbi eto nɛ aani.

³¹ Apodza ongwɔn **aca** ka kye afo twɛɛ yi inggise emi eto neni mi egbe ikwɔ dika nu ma obube, lubana o kye mbi esɛ dondu owa fwo ozoyeye mgbi uto iSolomu, dinnaa, ongwu nshewo ngha iSolomu dze mmeneni.

³² Inggise emi iNinive kpaa ka kye afo twɛɛ yi emi eto neni mi egbe ikwɔ diye nu ma obube; ikyena a kyatitukwu mi onɔ ngwi a fwo elodze ogbɔgbɔ mgbi iJona nani, ma onene ongwu nshewo ngha iJona dze aani.

Osa mgbi ewo.

³³ <<Inggise onyi nka kye ola dɔ se ka kye da di kye mgboko tukwu ele dzema ba. O ka kye fake imbe ododa ngwi ali inggise nkaka duu ka di osa mani.

³⁴ Inɛ mgbi abu li ipitila mgbi ewo mgbi abu. Kini inɛ mgbi abu tishi yɔ, ewo mgbi abu duu ka mbwo yi osa. Kpaa kini inɛ mgbi abu tishi bayɔ, ewo mgbi abu kpaa dika mbwo yi iifu.

³⁵ Ikyenghane, di gbɛɛ, osa ndze mbi abu no ka li iifu ba.

³⁶ Nghane, kini ewo mgbi abu duu mbwo yi osa yi alewo onyi kpaa yifu bayɔ, ka mbwo yi osa dafi osa mgbi ipitila li nu abu osa neni.>>

IYesu tsaafɔ mi ungwɔ mgbi emi iFarasi yi ama otso ola mgbi iMose

³⁷ Ngwi iYesu ngyelu odze ogbɔgbɔ nɛ, inggise iFarasi wa bɔɔn gbɛɛ no ba wa gye ungwogye mi ude mgban; ta o ka sɔke ogye ungwogye.

³⁸ Nghaduu inggise iFarasi na, difwi gbɛɛ iYesu sabɔ mi odzeedze aletɔ mgbi ama ba ta, wita ogye ungwogye, nɛ i kwulun ewo.

³⁹ Otse iYesu si nyan gbɛɛ, <<Onene, ema emi iFarasi li sa ewo alubata yi inunggaa, kpaa mi idzidze mgbi ema yɔ li mbwo yi nggwɔ yi imbali.

⁴⁰ Ema ikwangha inggise ntonɛ! Li ongwu nme idzidze ma, mɛ esɛ kpaa baa?

⁴¹ Ne nu emi adze umba yi itukwu osaan na, ta alungwo duu ka dze ema saan.

⁴² <<Ahoo! Mi ikye ema emi iFarasi, ema li kye onyi mi ikye iwyo ongwí okwo mgbi ema duu mbwo yi ungwó dafi indzafé, atsubo, beyi ungwó angbeka kye nu Imgbasho. Kpaa ema li kyo inggise ogye, Imgbasho di kpaa ema itukwu ba. Li ungwó ndze imbisó ngwi ema ki tsekise kyo duuse angbeka ntona aali.

⁴³ <<Ahoo! Mi ikye ema emi iFarasi, li kpa ema oso imbe mmwe mi ozu okwakye mgbi emi ifuda di nu ma le ta ema angba yi mmwe mi ifyidu.

⁴⁴ <<Ahoo! Mi ikye ema ama olóóóóóó yi emi iFarasi, emi ikpala, ema dze dafi endzi ngwi ambe mgbán byulu, ngwi inggise li kyikye nye ele kpaa a li difwi ba maní.>>

⁴⁵ Inggise otso ola mgbi iMose oka nun uka gbée, <<Otsetse, dafi ngwi abu gbo ungwó ntoné nē, eyi kpaa abu fya eyi ito.>>

⁴⁶ IYesu gbée, <<Ahoo! Mi ikye ema ama otso ola mgbi iMose, ikyekye ema li gbe iso gwuba dō inggise ikye kpaa ema li kye ongwufabó onyi gbo ele ikye oya ma abó ba.

⁴⁷ <<Ahoo! Mi ikye ema, ema mbé endzi mgbi ama ogbée ngwu li emi otsikyema ngwó tugbe maní.

⁴⁸ Ne ema tso gbée ungwó ngwi a kyo na li ayin; a ngwó ama ogbée, ema di mbé ma endzi.

⁴⁹ Mi ikyenghane, Imgbasho mi ozoyeye mgbán gbée, <Ani ka dō ama ogbée yi ama ogbikyé ani esó mboma, angbeka a ka ngwó ma diyé nu angbeka adze.>

⁵⁰ Nghane, etó neni a ka kwo ma adó mi ikwu mgbi ama ogbée ngwu a ngwó mi owita-wita mgbi ese nani.

⁵¹ Wita mi ikwu mgbi Ebél lu ka kaka ikwu iDzakaria, ongwu ma ngwón mi idzidze ozu mgbi Imgbasho yi iwashi ofife nani. N nya ema mi otsitsi, a ka kwo etó nē adó mi ungwó ntoné duu.

⁵² <<Ahoo! Mi ikye ema ama otso ola, lubana ema kyi kyelu ungwó okwulu ofé mgbi ozoyeye mgbi Imgbasho. Ema abuema kpaa kaka ba, diyé noofé gbée ama nle kaka nu ma kaka ba.>>

⁵³ Ngwi iYesu ngyelu odze ntoné ogbógbo nē, o dzata imbe nani, nē emi iFarasi yi ama otso ola mgbi emi ifuda wita ole ban ibe di kyitingga gbée nō gbódze mi ungwó gwuba,

⁵⁴ zukwu ni ama tu ofé di nun obube mi odze ama ntó mi ondu mbon nli ayin ba maní.

12

Adó okwookwo beyi okwu inggise ewe wo

¹ Ngwi inggise idubu ibyibyi wa kwutoke mbonyi nē, a sile dzi ewoma afó, man iYesu

wita ogbódze ababó nya engwafóon gbée: <<Kyo dumóóóóóó yi otsootso mgbi emi iFarasi, ngwi li ewé nli gbófwe dafi okwuna mi ibredi nani.

² Onó kyema ngwi alungwó ndze mi odaada duu ka dō ododa, ungwó ngwi a di kye da duu a ka kye dēese.

³ Ungwó ngwi abu gbo mi iyifu a ka fwo mi osa, ungwó ngwi abu di gbón mi adó mi ifoozu idzidze dika gbela tó mi ikyendu.

⁴ <<N nya ema, emi okani, ka mio ama nka ngwó ikpewo ta ka kyo unka gbe wuba na ba.

⁵ Kpaa n ka tso ema ongwu ema ka mion mani: Mio ongwu, ki non kye ngwólu ikpewo, o di dze yi mfye okye abu wóké imbe adze nani. Eén, ani nya ema, mion na.

⁶ A li kye ifyilo ngbi eda gya mi anini efa baa? Nghaduu ifyilo onyi kpaa Imgbasho gblimón ba.

⁷ Nghane, otu mi ikye mgbi ema duu Imgbasho ye mmbwon. Ka mio ba na; ema ngba ifyilo ibyibyi.

⁸ <<Ani nya ema, inggise ta nkyó obwende mgbi ani mi iné inggise yó, **Ongwé Inggise** kpaa ka kyo obwende mgbán mi iné engyesó mgbi Imgbasho.

⁹ Nghaduu inggise ntangwe ani mi iné inggise yó, ongwu kpaa Ongwé Inggise ka tangwan mi iné engyesó mgbi Imgbasho.

¹⁰ Ali inggise ngbódze obube mi ikye Ongwé Inggise, a ka dzanta yi obube, kpaa ongwu nfyá Onodzi Osaan ito yó, a ka dzanta ba.

¹¹ <<Onó ngwi a kye ema ba iné ikwó mi ozu okwakye mgbi emi ifuda beyi iné emi atótse beyi iné mgbi emi ola ma, no ka kaka ema ewo dafi ema ka na ewema naadi odze ngwi ema ka gbo ba.

¹² Ikyena Onodzi Osaan ka nya ema odze ngwi ema ka gbo mi onó na maní.>>

Utsa mgbi ikwangha inggise aludu

¹³ Inggise oka mi ifu ibyi nya iYesu gbée, <<Otsetse, nya ongwunani no kye ghalu okwude ngwi otseyi dzanta nu eyi nē yi ani.>>

¹⁴ IYesu si nun uka gbée, <<Okani, li eme nu ani mfye ogbiikwó naadi ogha ema okwude?>>

¹⁵ Ta o nya ma gbée, <<Gbewebyi! Ngyo ewema mi ali ofé mgbi nggwó duu; oshishe mgbi inggise dze mi aludu mgbán ba.>>

¹⁶ Man o nya ma utsa nē gbée: <<Ikpesé mgbi inggise udza oka tishi ungwogyé.

¹⁷ O tsewe mi itukwu mgbán gbée, <Li ekyé ngwi ani ka kyo? Ani dze yi imbe ngwi ani ka gbe ungwogyé mgbi ani to ba.>

¹⁸ <<Nē o gbógbée, <Li ungwó ani ka kyo aani. N ka kye bulu emi oba mgbi ani yidó mbé ama okwukwo, man ani ka gbe

ungwogyowe yi okye mgbi ani duu da mi efu.

¹⁹ Ta n ka nya ewen gbɛɛ, <<Abu dze yi ungwɔ osuse kwuba to nka kye onova ibyibi. Yile itukwu bese; gye, wa diye dze yi atsa.>> >

²⁰ <<Kpaa Imgbasho nyan gbɛɛ, <Abu ikwangha nɛ! Mi otu inɛ neni n ka mina oshishe mgbi abu mbi abu. Nɛ li emɛ ka kye gbelu ungwɔ ngwi abu gbe to ikye ewabu nɛ?>

²¹ <<Li ngha nka dze yi ali inggise ngbe ungwɔ to ikye ewon kpaa li aludu mbi Imgbasho ba aali.>>

No ka kaka ema ewo ba

²² Ta iYesu nya engwafɔɔn gbɛɛ: <<Nghanɛ ani nya ema, no ka kaka ema ewo mi oshishe mgbi ema ba, ungwɔ ngwi ema ka gye, naadi mi ikye ewo mgbi ema, ungwɔ ngwi ema ka wo.

²³ Oshishe ngha ungwogyɛ, ewo di ngha angwuto.

²⁴ Di emi ajaglama: A li kya naadi shɛ ba, a dze yi ozu hona oba okye ungwɔ da ba, nghaduu Imgbasho li byi ma enbwa. Ema dze yi oyabo ngha ingwuno duu!

²⁵ Li emɛ mbi ema mi itukwu oshanyɛ mgban ka yagba ombwo obyɛ onyi mi oshishe mgban?

²⁶ Ma ni itukwu oshanyɛ ka yagba ngyelu ungwɔ ogyengyɛ ngha ba wali, oyabo li ekye onu ewema itukwu shanyɛ mi ungwɔ angbeka?

²⁷ <<Di dafi onggangga oshe li she mani. A li kyido naadi gbo ewoma angwuto ba. Nghaduu **iSolomu** mi okwɔkwɔ mgban nose wewo tishi dafi onyi mbi onggangga ntone ba.

²⁸ Ni li ngha ngwi Imgbasho li nu oshe mi okwɔ ngwi dze inɛ, ekeka a ka kye toola sunse ma, ka kyosinɛse ngwi o ka nghao kye inɛ byi ema ba? Ema ngwu oyeyɛ onuunu mgbi ema shanyɛ ntoneni!

²⁹ Nghanɛ, no ka kaka ema ewo mi ungwɔ ngwi ema ka gye naadi wa ba; dika dze yi angwodze mi itukwu kpaa ba.

³⁰ Bana li ama n ye Imgbasho ba li kyɛdo ungwɔ ntoneni, ma Otsema ye dafi ema mina ungwɔ ntone mani.

³¹ Nghaduu pita esuto mgbi Imgbasho ababo, ta a ka gbe ungwɔ ntone duu mbwo ema kɛ ele.

³² <<Ka mio ba na, engwafɔ ama okpa ani itukwu, ikyena i mina Otsema okye esuto nu ema.

³³ Gbelu ungwɔ ngwi ema dzeyan duu gya kye udza gha emi adze. Ema ka tu ungwɔ ama osuse nka li gyegwu, aludu mi esho nka ngyɛ ba, imbe ngwi emumyi ka ba kwɛkwɛ naadi ikwukwu ka kye gye ba mani.

³⁴ Lubana imbe ngwi aludu mgbi ema dzɛma, li mmana ngwi itukwu mgbi ema kpaa li dze aali.

Ongyo le fɛ

³⁵ <<Wewo okyido di nu ipitila mgbi ema le gbɛ,

³⁶ dafi engbido tole fɛ oyɛɛyɛ mgbi ongyukwo mgbi ama mi eba okwokyiikwokyi, ikyegbɛɛ non yɛ wa tsaabo ta a ka kwulun ofɛ vla mani.

³⁷ Ka sunse mbi engbido onɔ ngwi ongyukwo yɛ tu ma le ngyo mani. N nya ema otsitsi, ongwu abuon ka wewo gbe ma sise kye oga nu ma gye.

³⁸ Ka sunse mbi engbido ama ngwu ongyukwo mgbi ama wa tu ma wewo mani, yɛba non ba mi idzidze otu naadi mi ikyegbe kpaa.

³⁹ Kpaa difwi odze neni: Ni otsungwɔ ozu ki yɛ onɔ ngwi emumyi ka ba yɔ, o kika non gbobun ozu kaka ba.

⁴⁰ Ema kpaa li kymɛ ngwi ema ka wewo, ikyekyɛ Ongwɛ Inggise ka ba mi obyɛ ngwi ema gbɛnɛbyi ma ba.>>

⁴¹ IPyita byita gbɛɛ, <<Otse, abu le gbo utsa nɛ nya eyi yueyi naadi li ali inggise duu?>>

⁴² Otse iYesu si gbɛɛ, <<Li emɛ li ongbido oyeyɛ di kwiinɛ? Li ongwu ngbeka byi ungwɔ, ngwi ongyukwo kyon dzeke ikye ogbɛnɛbyi engbido mgban onu ma ungwogyɛ mi onɔ nwoɔyɔ mani.

⁴³ Ka tishi mbi ongbido ngwu ongyukwo mgban wa tun le kyɔ ngha mi onɔ ngwi o yɛ mani.

⁴⁴ N nya ema otsitsi, o ka kyon dzeke ogbɛnɛbyi ungwɔ mgban duu.

⁴⁵ Nghaduu ni ongbido na nya ewon gbɛɛ, <<Ongyukwo mgbi ani le kye onɔ tunto oyɛɛyɛ,> man wita ogbo engyulo yi engyiido ibe dile gye yɛ wa fya yɔ.

⁴⁶ Ongyukwo mgbi ongbido na ka yido mi egbe ngwi o kye inɛ byi ma ba beyi obyɛ ngwi o yɛ ba. O ka non gyiso kpakpa di kyon dzeke imbe mgbi ama onghaado.

⁴⁷ <<Ongbido ongwu n ye ungwɔ ngwi ongyukwo mgban mina, kpaa wewo ba di kyungwɔ ma bayɔ, a ka gbon onitse kwuba.

⁴⁸ Nghaduu ongwu n ye ba di kyungwɔ ngwi li oyeyɛ ba, a ka gbon onitse gwee. Mbi ali inggise ngwu a nun kwuba a dika mina kwuba mbon; ongwu a di nun dzii a dika pita mbon dzii.

IYesu ba yi ogbua-gbua

⁴⁹ <<Ani ba esɛ nɛ yi ola, ma dafi i dze ani ma kile gbɛ kpaa wa!

⁵⁰ Kpaa ani dze yi iBatisima mgbi iso ngwi ani ka wa kaka ele, ma n ka gyiso ongwɔ itukwu nghataa se ka wa ngyɛ.

⁵¹ Ema tsewe gbee ani ba owa kye iyu ba esee? Ei, n nya ema, li ogha inggise yi ewoma.

⁵² I wita onene nghataa lu iyayi inggise ka li eda mi eto onyi a ka gbua yi ewema, eta ka kye afo twese yi efa, efa dika kye afo twese yi eta.

⁵³ A ka wa gha yi ewoma, otsongwe yi ongwani ongyulo, ongwongyulo yi otson, onongwe yi ongwani ongyaa, ongwongyaa yi onon, onobongyaa yi owongwaan, owongwe yi onoban.>>

Odifwi ono

⁵⁴ Ne iYesu nya ibyi inggise gbee, <<Ono ngwi ema di akpa tseto mi onosa, mi ono nata ema li gbee, <Mmbwo ka wa kya,> man di li kya.

⁵⁵ Ma ono ngwi awo ongwani agwudu wa fa, ema li gbee, <Imbe ka wa dziwu,> man di li dze nga.

⁵⁶ Ema emi ikpala ntoni! Ema ye onu osa mi odzeedze mgbi ese beyi akpa mi esho. Kyosine ngwi ema ye onu osa mi odzeedze ongwani onene wuba?

⁵⁷ <<Kyone ngwi ema fwikwo abuema mi ungwani ayin wuba?

⁵⁸ Ni abu le ke opiikwo yi ongyikyili mgbi abu yo, fya kpakpa ni abu yile ide gye yan mi ofe, ni abu kyo nga ba, a ka kwo abu ba ine inggise ogbiikwo, ongwu nka kye abu wo obaka abo, ta a sika kye abu woke obawi.

⁵⁹ N nya abu, o ka tase ba nghataa imbiso ngwi abu ka kpa anini mgbi abu ongwani olele ngwi a wo abu mani.>>

13

Kyatitukwu hona dzili

¹ Mi ono nani, inggise angbeka to imbe na nnya iYesu gbee di iPlatu ngwo emi iGalalia angbeka ni eyi mgbi ama takye yi ife ngwi a le fe mani.

² IYesu si nu uka gbee, <<Ema tsewe gbee emi iGalalia ngwu a ngwo ma nga na nghao li emi ali ibwubwe nga emi iGalalia angbeka ntonaa?

³ Ei, li nga ba! Kpaa n nya ema, ni ema kyata mi ali ibwubwe mgbi ema bayo, ema ka kwulu dafi ama kpaa kwulu nani.

⁴ Inggise iwodegyata ama nkwalu ono ngwi ozu oshigbo mi iSilon gbohu si ma na ma, ema tsewe gbee a kyo obube nga angbeka ama nto iJerosalin naa?

⁵ Ei, li nga ba! Nghaduu n nya ema, ni ema kyata mi ali ibwubwe mgbi ema bayo, ema kpaa ka wa dzili duu.>>

Utsa mgbi andundu ogyoma

⁶ Ta iYesu nya ma utsa ne gbee: <<Inggise oka nose kye ekwo ngwi a li kwun di andundu kye ye mi okwo mgban. O li ka

kpadi gbee, ni i wa owawa yo, kpaa o li tu ba.

⁷ Ne o nya inggise nle ngyo okwo na gbee, <I me onova eta ngwi ani le ba wa kpadi ekwo ne gbee ni ani tu awawa mi ele, kpaa n tu ba. Kye dze ngwuta! Kyosine ngwi o le tukwu imbe?>

⁸ <<Nghaduu inggise ongyo okwo nu uka gbee, <Ongyukwo, di dzanta onova onyi; n ka tise nye ewon gbe ibwa yawon.

⁹ Ki non wa owawa onova nkye ne, tishi! Ni li nga bayo, kye dze ngwuta.> >>

IYesu kyile ongyaa ngbikye mi egbe otonyido

¹⁰ IYesu le tsungwo mi egbe otonyido mi ozu okwanye mgbi emi iJuda oka,

¹¹ man ongyaa oka dze imbe na ngwu onodzi obube non dotse fulu me onova iwodegyata, o kile li yagba zunto kpaakpa gbe ba.

¹² Ngwi iYesu din ne, o kwun ela ba iyayi si nyan gbee, <<Ongyaa, a she abu adita mi oote mgbi abu!>>

¹³ O kye abo gbon, labolabo neta, o si kyato dzekuntu kpaakpa man le tse Imgbasho.

¹⁴ Itingga kyo inggise okye okwanye teyi gbee di iYesu ngyelu oote mi egbe otonyido, o si nya inggise ntona gbee, <<Ali ikyidu dze yi egbe egyin ngwi eyi ka kyido, nghane ba mi egbe ntoneni, ni a ngyelu ema ootse, kpa no ka li egbe otonyido ba.>>

¹⁵ Otse iYesu nun uka gbee, <<Ema emi ikpala ntoni! Ali inggise mgbi ema li kyi shelu mnda naadi itaklimyi mgban mi ifatoba kye ka weni mi egbe otonyido baa?

¹⁶ Nghane ongyaa ne kye mi eto mgbi Abraham, kpaa iSatan bwan adi me onova iwodegyata. Wane i tishi gbee nu ma shan adi mi egbe otonyido ba naadi?>>

¹⁷ Ngwi iYesu gbodze ne ne, ayiwi kwu ongyikyili mgban. Kpaa inggise ntona duu i kpa ma mi ungwani okwulewo ngwi o le kyo nani.

Utsa mgbi inene nkwozidi beyi okwuna

¹⁸ Neta iYesu byita gbee, <<Esuto mgbi Imgbasho ne dze sine? Li ekye ngwi ani ka kye mba yan?

¹⁹ Dze dafi inene nkwozidi, ngwi inggise kye ka fwe mi okwo mgban. I she yee ekwo, ingwuno li lude mi abon.>>

²⁰ IYesu di byita gbee, <<Li alungwo ngwi ani ka kye esuto mgbi Imgbasho mba yan?

²¹ Dze dafi ongyaa kye okwuna tablikiyi yi ofumbu nshe mi ikpokpo di bwuo ewon kpatse mani.>>

Onufe okpenge

²² Ta iYesu nye igeli-igeli beyi agwo emi osho le tsungwo ngwi o le lu iJerosalin mani.

²³ Inggise oka byun gbɛɛ, <<Otse, li inggise gwee ta ka watɔɔ?>>

O nya ma gbɛɛ,

²⁴ <<Fya mi ofyaafya mgbi ema ni ema kaka mi onufe okpenge nani, ikyena inggise kwuba ka fya gbɛɛ nu ma kaka esuto mgbi Imgbasho nghaduu a ka yagba ba.

²⁵ Otsungwo ozu ka kyato yile onufe tukwu, ema ka tila to ese le tsaabo ye gbaabo gbɛɛ, <Kwulu eyi onufe, ongyukwo!>

<<Nghaduu o ka nu uka gbɛɛ, <Ani ye ema hona ye imbe ngwi ema tɔkye ba.>

²⁶ <<Ta ema ka gbɛɛ, <Eyi gye diyɛ wa yi abu, abu di tso mi igeli mgbi eyi kpaa!>

²⁷ <<Nghaduu o dika gbɛɛ, <Ani ye ema naadi imbe ngwi ema tɔkye ba. Lu enggenga mbi ani na, ema emi ali ibwube ntoneni!>

²⁸ <<Akwo omaama beyi aba ogyeegye ka dze imbe nani, onɔ ngwi ema di Abrahan yi Adziki yi ijeko beyi ama ogbɛɛse duu mi esuto mgbi Imgbasho kpaa ema abuema a ka kye ema ngwuta lu ese mani!

²⁹ Ibyi inggise ka kye mi onosa yi onɔde, beyi aca yi agwudu, dika wa so oga mi esuto mgbi Imgbasho.

³⁰ Nghane emi olɛle ka yɛɛ emi ababo, emi ababo dika yɛɛ emi olɛle.>>

IYesu tsukwu ikye iJerosalin

³¹ Mi onɔ na emi iFarasi angbeka ba mbi iYesu wa nyan gbɛɛ, <<Dzata imbe nɛ lu imbe oka. IHerude mina ongwɔ abu.>>

³² IYesu si nu ma uka gbɛɛ, <<Ke ka nya ogbalinya na gbɛɛ, <N ka dulu emese di ngyelu ibyi inggise ootse ine yi ekeka mi egbe ongwu ta ma, n ka ngyelu ido mgbi ani.>

³³ Nghaduu n ka byi ofɛ mgbi ani abo ine yi ekeka yi egbetane, lubana i tishi gbɛɛ nu ma ngwɔ oyegbo mi imbe oka ba li mi iJerosalin ta.

³⁴ <<Ekyi, iJerosalin, iJerosalin, abu nngwɔ ama ogbɛɛse di tse ama ngwu a do ma eso mbi abu akwutse, dafi ani gbili okye emi ongwabu kwakye yi eka, dafi onogbi li kwulu engwaan woke asha, kpaa ema nu ani ofɛ ba!

³⁵ Dika, a dzita ude mgbi ema yɛɛ okwude waana. N le nya ema, ema ka di ani wuba nghataa sede ni ema wa gbɛɛ, <Ogbumse li ongwu nba mi iyi mgbi Otse Imgbasho se.>>

14

IYesu kɛ ude inggise iFarasi

¹ Egbe otonyido oka nɛ, iYesu kɛ le ka gye oga mi ude mgbi inggise iFarasi imo oka, a si kye ine fyakwun.

² Neta inggise oka ngwu afo yi abo weeni ba mbi iYesu.

³ Nɛ iYesu byi ama otso ola mgbi iMose beyi emi iFarasi ita gbɛɛ, <<Ola mgbi eyi noofɛ ongyelu ootse mi egbe otonyido naadi i nu ba?>>

⁴ Kpaa a dede shilididi. Ta iYesu byi inggise na abo, man o ngyelun ootse di dzanta non lu.

⁵ IYesu si byi emi iFarasi ntona gbɛɛ, <<Ni onyi mbi ema dze yi ongwɛ naadi mnda ngbese woke ibuga mi egbe otonyido ma, o ka dulun to ple lo?>>

⁶ Nghaduu a yagba nu uka ba.

IYesu gbɔdze mgbi ewo oyile ese

⁷ Ngwi iYesu difwi dafi ama nba oga ntonɛ le sadu imbe mmwe abuoma nɛ, o nya ma utsa nɛ gbɛɛ:

⁸ <<Ni inggise bo abu oga mgbi eba okwokyiikwokyi yo, ka sise mi imbe mmwe ba. Ikyayina inggise oka nshewo ngha abu kpaa a boon.

⁹ Ni li ngha, inggise nbo ema ma, ka ba wa nya abu gbɛɛ, <Ni abu kye itse mgbi abu nu inggise neni.> Ta abu ka tu ayiwi ye ka soke imbe okwushanye.

¹⁰ Nghaduu, nu ma bo abu oga yo, lu ka soke imbe ngwi ye ese tsatsadu mani, ni inggise nbo abu wa nya abu gbɛɛ, <Kyato, okani, lu itse ntatase nani.> Ta abu ka dze yi mmwe mi ine mbi ama ngwu a bo ma ntonani.

¹¹ Lubana ali inggise nkyile ewon esho duu a ka yilen ese. Kpaa ongwu n yile ewon ese, a ka kyilen esho.>>

¹² Ta iYesu si nya inggise nboon oga na gbɛɛ, <<Ni abu kyo oga mi onɔ naadi onɔnɔde, ka bo emi okaabu ba naadi emi ongwunabu naadi odo abu hona emi aludu ama nwatse do abu ba; ikyena a ka yido bo abu ikye oyilen kpaa abu mkpaa.

¹³ Ni abu kyo oga yo, bo emi adze, yi ama ngbikye tukwu ese, yi ama ntummya, yi ama nbine,

¹⁴ ta Imgbasho ka kye mse be abu ewo. Ikyekye a ka yagba kpa abu mkpa gbe ba, Imgbasho ka yilen kpa abu mi egbe ngwi emi osaan ka kyato mi ikwu mani.>>

Utsa mgbi andefɛ oga

¹⁵ Onɔ ngwi inggise onyi mbi ama nsoto oga biyan fwo odze nɛ nɛ, o nya iYesu gbɛɛ, <<Inggise nka so oga mi esuto mgbi Imgbasho ka gbumse.>>

¹⁶ IYesu nyan gbɛɛ: <<Inggise oka nose le kyo andefɛ oga si bo inggise kwuba.

¹⁷ Ngwi onɔ oga ma wa gyo nɛ, o do ongye ogbeso mgban gbɛɛ no ke ka nya ama ngwu ongwu bo ma gbɛɛ, <Ba na, lubana alungwɔ duu ngye le fe-fe wa.>

¹⁸ <<Kpaa ama duu wita o nu itɔdze idzidza-dzidza. Ongwu ababo nya ongye ogbeso gbɛɛ, <Ani gya ikpese, ma li kyeme

ngwi ani ka ka kpadi. N tekye nu abu, nu ani ofe.>

¹⁹ <<Oka gbɛɛ, <Ani gya mnda efefa imbe eda, n kwa le ka mbadi ma aani. Tsuutsu nu ani ofe.>

²⁰ <<Oka di gbɛɛ, <Ani kwa kye ongyaa ofufe, nghane n ka yagba ke ba.>

²¹ <<Ongye ogbeso ne yido ka nya ongyukwo mgban odze ntonɛ duu. Ta otsungwude nye yi itingga kpakpa man wo ongye ogbeso mgban ola gbɛɛ, <Lu emi ingɛɛ ple beyi emi abofɛ mgbi igeli ka gbe emi adze yi ama ntummya yi ama nbine yi ama ngbikyɛ tukwu ese duu ba.>

²² <<Ongye ogbeso na gbɛɛ, <Ongyukwo, ola ngwi abu wo na ani kyo mi ele wa, kpaa imbe ka dze mi ikye inggise angbeka.>

²³ <<Nghane ongyukwo nya ongye ogbeso gbɛɛ, <Fase lu emi onɔɔfɛ beyi aye ofɛ ka bo ali inggise ngwu abu di duu nu ma ba, zukwu ni ude mgbi ani mbwo.

²⁴ N nya ema, inggise ama ngwu ani ple bo ma ntona onyi kpaa ka ta oga mgbi ani kpane ba!> >>

Itodze onu abu li ongwafɔ mgbi iYesu

²⁵ Ibyi inggise wafɔ yi iYesu le ke, man o kyata nya ma gbɛɛ:

²⁶ <<Inggise ntangwe otson yi onɔn, owan yi engbe mgban, emi ongwunon engyulo yi engyaa naadi oshishe mgban bayo, o ka li ongwafɔ mgbi ani ba.

²⁷ Inggise ndi kye ekwatsi mgban kyedo ani bayo, o ka li ongwafɔ mgbi ani ba.

²⁸ <<Ni i dze gbɛɛ onyi mbi ema mina o mbe ozu oshigbo yo, o ka ple sise kyo mmbwo mi ungwɔ ngwi i ka kyen ombɛ ozu ma ngye baa?

²⁹ Bana ki non wo itozu kpaa di yagba ngyelu bayo, ali inggise ndi duu ka shan isha

³⁰ gbɛɛ, <Amu ne kwaabo ombɛɛmbɛ kpaa yagba ngyelu ba.>

³¹ <<Naadi li ali uto nle ka gblika yi uto oka. Ka tsekise sise tsɛwe ki non ka yagba yi engyilika ngbi idubu iwyo oka gblika yi uto ndze yi engyilika ngbi idubu osu ba?

³² Non ka yagba ba, o ka do ama ogbeso mgban nu ma ka yile ide gye ngwu ma ka dze mbombo yi ama mani.

³³ Nghane, inggise mgbi ema ta nkye alungwo mgban duu nu ba, o ka li ongwafɔ mgbi ani ba.

³⁴ <<Mmwaa tishi, kpaa ni mmwaa fyum-fya wuba ma, a ka kyosinese non di fyum-fya dafi mmwaa?

³⁵ Dika tishi mi ikpese naadi ogbagye ibwa wuba; a ka kye yangwuta.

<<Inggise ndze yi ado yo, otsungwon no fwo.>>

15

Utsa mgbi mmala nbyulu

¹ Egbe oka ne, ama ogbɛ udza ifyɛɛ beyi emi ali ibwubwe wa kwakye ikye ofwo iYesu.

² Nghaduu emi iFarasi beyi ama otso ola mgbi iMose wita okwondukwo gbɛɛ, <<Inggise ne gbela yi emi ali ibwubwe diyɛ le gye ungwogye yi ama kpaa!>>

³ Ne iYesu nya ma utsa sini:

⁴ <<Ni inggise oka mbi ema dze yi mmala ngbi ideli onyi ma onyi byulu mi efu, li ekye ngwi o ka kyo? O ka dzata ngwusene don iwyo diwyegyane ntona mi imbe ododa lu ka pita onyi nbyulu na nghataa se non tuun baa?

⁵ Ono ngwi o ka tuun ma, o ka tsatsa kye dɔke olubo

⁶ le lu ude. Non wa to ude, o ka kwu emi okan beyi ama nwotsuude don ela gbɛɛ, <Tsatsa yi ani na; ikyekye ani ka tu mmala nbyulu ma wa.>

⁷ N nya ema gbɛɛ mi ito ofɛ ne kpɔɔ atsa ka dze esho kwuba mi ikye inggise alobube onyi nkyata luba mbi Imgbasho nga inggise ama osaan ngwusene don iwyo diwyegyane ngwu mina okyata ba ntonani.

Utsa mgbi anini nbyulu

⁸ <<Naadi ni ongyaa dze yi anini ngbi iwyo onyi byulu mi ele ma o ka kyosine? O ka kye ipitila do kyi waalu ozu di pita yi ewe ogbebyi nghataa se non di baa?

⁹ Ono ngwi o ka tu ma, o ka kwu emi okan beyi ama nwotsuude don ela gbɛɛ, <Tsatsa yi ani na ikyekye ani ka tu anini nbyulu ma wa.>

¹⁰ Mi ito ofɛ ne kpɔɔ, n nya ema, atsa ka dze mi ine engyeso mgbi Imgbasho mi ikye inggise alobube onyi nkyatitukwu mani.>>

Utsa mgbi ongwɛ nbyulu

¹¹ IYesu di kiyayi gbɛɛ: <<Inggise oka nose dze yi engwengyulo ngbi efa.

¹² Ongwu ongbungbe nya otson gbɛɛ, <Ot-sani, kye okwude ndze mi ikye mgbi ani ma nu ani.> Ne otson si kye ghalu okwude nu engwaan efa ntonani.

¹³ <<Egbe nye gwee ta, ongwɛ ongwu ongbungbe si kye gbelu alungwo mgban. O kyato lu ese mbombo mi imbe na ma, o kye mbelu awuya mgban duu mi oshishe ayayi.

¹⁴ Ono ngwi o kye mbelu alungwo duu ne, okotondzi enbwa kaka ese na duu, man o ye abubu yi unkonyi ogyeegye ba.

¹⁵ Ne o ke oka kyo inggise oka ido mi ese nani, inggise na kyon deso lu okwo mgban oka kye ine byun obya.

¹⁶ O mina gbɛɛ ongwu ki gye ungwogye ngwi obya ntona le gye mani, kpaa inggise nun unkonyi non gye ba.

¹⁷ <<Mi onō ngwi o wa yile itukwu bese ne, o gbo yi ewon gbēē, <Mi ude, ama okyō otsani idō kpaa a dze yi ungowgye ogyeegye gycloma, ma mmene ani le kwulu enbwa!

¹⁸ N ka ye lu ude mbi otsani ka nyan gbēē: Otsen, ani kyo Imgbasho obube yi abu.

¹⁹ Nghane ani me gyo ngwi a ka kwu ani gbēē ongwabu wuba; nu ani yee dafi emi idō mgbi abu mani.>

²⁰ Man o kyato ye lu mbi otson.

<<Nghaduu ngwi o ka kye mbombo mani, otson din ta elela kyon won; o tsinya ka tsekwulu ongan, si kwokyi ondu yan.

²¹ <<Ongwan si nyan gbēē, <Otsen, ani kyo Imgbasho obube yi abu, nghane ani me ngwi a ka kwu ani di ongwabu wuba.>

²² <<Kpaa otson kwu ongbido mgban ela gbēē, <Vla! Ka kye angwuto ntishi nga mi ozu kye wa won. Kye ongwashi won ongwufabo yi okpafō won afō.

²³ Lu ka kye andefe mnda ongyulo wa ngwolu ni eyi gye di tsatsa.

²⁴ Ikyena ongwani ne kwulu kpaa onene o dze oshishe; o byulu kpaa onene a din.> Ta a wita oga.

²⁵ <<Mi onō na, ongan ongwu ongyukwo nose dze okwo. Ngwi o ye wa to ondu ude ne, o fwo ungow ogboogbo yi ifwe.

²⁶ Nghane o si kwu ongbido oka ela byun gbēē, <Li alungwō le kiyayi?>

²⁷ O nun uka gbēē, <Ongwanabu yido luba ude, otsabu kye ngwolu andefe mnda ikyekye o ye ise.>

²⁸ <<Ongwanon ongwu ongyukwo si kyingga kpakpa gbēē ongwu ka kaka ude wuba. Otson tase wa tekye nun gbēē non kaka.

²⁹ Kpaa o nu otson uka gbēē, <Di! Onova ntonē duu ani kyo abu idō dafi ofyee mani, ma akponyi kpaa ani nga abu adō ye ba. Nghaduu abu nu ani ongwē mnda kpaa gbēē nin kyo oga yi emi okēen ba!

³⁰ Kpaa onō ngwi ongwabu ne kye mbelu ungow mgbi abu duu yi owagbai engyaa ye luba ude ne, abu ngwōn andefe mnda!>

³¹ <<Otson si nun uka gbēē, <Ongwani, abu dze yi ani alonō duu, ma alungwō ngwi ani dzeyan duu li mgbi abu.

³² Nghaduu dze mbiso ngwi eyi ka gye oga di tsatsa, ikyekye ongwunabu kwulu, kpaa onene o dze oshishe; o byulu kpaa onene a din.> >>

16

Ongyukwo idō okwiine

¹ IYesu nya engwafōn gbēē: <<Inggise udza oka nose dze o dze yi ongyukwiido ngwu kye ine le byun udza. Ta a kwu ongyukwiido ne elikwō mbi otsungwude mgban gbēē o le gyon awuya.

² Nghane, o kwun ela, nyan gbēē, <Li ali odze ngwi ani le fwo mi ikpewo abu nga? Lolu ungow mgbi ani ama nbyito abō abu tsatsadu wa nin, ikyekye abu me okye ine byi ani ungow wuba.>

³ <<Ongyukwo idō na ye gbo yi ewon mi itukwu gbēē, <Ani ka kyosine onene, ngwi otsungwude mgbi ani le nya yi ani idō ne? Ani dze yi mfyē me oshookwō ba, ayiwi li kwu ani obibo.

⁴ Ani ye ungow ngwi ani ka kyo wa, ikyegbēē nu ma wa nya yi ani idō mmene kpaa, inggise ka gbēē ani mi ude mgbi ama mani.>

⁵ <<Ta o kwu ama ngye mkpa mbi otsungwude mgban ela onyonyi, o byi ongwu ababō gbēē, <Abu gye mkpa mbi otsungwude mgbi ani me sine?>

⁶ <<O nyan gbēē, <Li ikpokpō **engyie olivi** ideli egyata.>

<<Ongyukwo idō na nyan gbēē, <Kye afe mkpa mgbi abu na sise vla, lo ideli ene.>

⁷ <<O diye byi ongwu fan gbēē, <Abu ma, o gye mkpa sine?>

<<O gbēē, <Li oba alakama (ndze dafi itsikapa nani) idubu onyi.>

<<Ongyukwo idō na nyan gbēē, <Kye afe mkpa mgbi abu, lo ideli egyata.>

⁸ <<Otsungwude na tse ongyukwiido ndze yi otsisi ewo ba na ikyekye o kyungwō mi ine okwuukwu. Bana inggise emi ese ongwī onene nghao ye ogbewebyi ungow mgbi ama nga inggise emi osa.>>

⁹ IYesu kiyayi gbēē, <<N le nya ema, kye aludu ngwi abu dzeyan kwu uka yi inggise mi ese neni, ikyegbēē ni i wa dzema wuba kpaa, a ka gbēē ema mi ude ogyegwu.

¹⁰ <<Inggise ongwu ndze yi oyeye mi ungow ogyengye ma, o ka dze yi oyeye mi ungow okwukwō kpaa, inggise n yagba kye ine byi ungow ogyengye saan ba, ungow okwukwō kpaa o ka yagba kye ine byin saan ba.

¹¹ Ne kini ema di dze yi oyeye mi aludu ongwī ese ne ba, li emē ka kye awuya otsisi ongwī nkye mbi Imgbasho wo ema abo?

¹² Ma ni ema di dze yi oyeye mi ungow mgbi inggise oka ba ma, li emē ka kye ungow mgban kye nu ema gbēē no yee mgbi ema?

¹³ <<Ongbido onyi ka yagba kyo ongyukwō efa idō ba. Lubana o ka di onyi tanyi diye di oka kpan itukwu, hona o ka gha yi onyi ye lu ka beke yi oka. Ema ka yagba kyo Imgbasho idō beyi udza ononyi gbēē ba.>>

¹⁴ Mi onō ngwi emi iFarasi, ama ngwu udza kpa ma kpakpa fwo odze ne duu mata, a wita onyan odze agya.

¹⁵ IYesu nya ma gbēē, <<Ema li ama nfwo ewema ikwō gbēē di ema le saan mi ine inggise, nghaduu Imgbasho ye itukwu

mgbi ema. Bana ungwɔ ndze yi mmwe mbi inggise ma li ungwɔ idza mi ine Imgbasho.

Otsotoo mgbi iYesu angbeka

¹⁶ <<Ola mgbi iMose beyi ungwɔ ama ngwi ama ogbɛɛse lo ma a gbɔn nghataa ba onɔ mgbi iJon okyɔ iBatisima. Wita mi onɔ na, a le gbɔ Eso Osuse mgbi esuto mgbi Imgbasho, ali inggise duu le kaka ele mi mfyumfyɛ.

¹⁷ Sunɔ ba onu esho yi ese byulu ngha onu ambe onyi byulu mi ola.

¹⁸ <<Ali inggise ngwu gha yi owan yɛ lu ka kye ongyaa oka yɔ, li amah ngwi o le kyo, inggise nkye ongyaa ngwu gheeba yi oban le kyo amah.

Utsa mgbi inggise udza beyi iLadzarɔ

¹⁹ <<Inggise udza oka nose dze nli wo angwuto omuma shinishini di tishi ndlɛndɛ, o di dze mi oshishe omyɛɛ-myɛɛ alegbe-alegbe.

²⁰ Mi onufoka mgban a li kye inggise obibo ba wa lake, o saasu ewo a li kwun di iLadzarɔ,

²¹ o li mina ogye ambulu ungowgye ama nli ngwuta mi adinyatse ogye ungowgye mgbi inggise udza nani. Obwe li ba wa kpanan ifwa.

²² <<Ta inggise obibo na wa kwulu, engyɛso emi esho kyon lu mi iyayi Abraham. Inggise udza na kpaa wa kwulu, a kyon ndzi.

²³ O lu udola (ihade) ka dze mi iso kpakpa, o kyile ine esho si di Abraham mbombo, iLadzarɔ sɔdze yan.

²⁴ O kwun ela ke gbɛɛ, <Abraham Otsen, di ani elela do iLadzarɔ eso no kye ongwufabo bake eni wa yulu ani ide, bana n dze mi iso okwulewo mi ola neni!>

²⁵ <<Nghaduu Abraham nyan gbɛɛ, <Ongwani, wɛ mi onɔ ngwi abu dze oshishe, abu tu ungwɔ ama osuse-osuse, nghaduu iLadzarɔ tu ungwɔ ama obube, nghaduu onɛnɛ o sɔ kpan, kpaa abu yɔ dze mi iso kpaakpaa.

²⁶ Ongyɛngyɛ mgbi ungwɔnɛ duu, ikplishe ladze mi idzidze mgbi eyi, ongwɔ inggise oka ka fa ke mbi oka gbe ba.>

²⁷ <<Ta inggise udza na nu uka gbɛɛ, <N tɛkye nu abu, Abraham otsen, do iLadzarɔ eso ke ude otsani,

²⁸ bana ani dze yi engwunani mgbi ifu engyulo nghi eda toma. No ke ka kwo ma ado ikye onu ma ka ba imbe iso owulewo ne ba.>

²⁹ <<Abraham nu uka gbɛɛ, <Emi engwunabu dze yi ola mgbi iMose beyi afe mgbi ama ogbɛɛse okwo ma ado, nu ma fwo ma.>

³⁰ <<Inggise udza na gbɛɛ, <Ei, otsani Abraham, nana ta ka mɛ ba. Kpaa ni inggise oka kyato mbi emi ikwukwo yɛ ke mboma

ta a ka kyatitukwu mi ali ibwubwe mgbi ama.>

³¹ <<Abraham gbo yan gbɛɛ, <Kini a fwo ola mgbi iMose beyi afe mgbi ama ogbɛɛse bayo, ni inggise oka kyɛɛ mbi emi ikwukwo kpaa a ka nu itukwu mi ele ba.> >>

17

Obube, oyeyɛ, ido

¹ iYesu nya engwafɔn gbɛɛ: <<Ungwɔ ama nli nu inggise kyo obube ma li kyɛmɛ a ka ba, nghaduu ahoo mi ikye inggise ngwu ungwɔ obube ntone nye mbon ba mani.

² I tatase nu ma kye ikwɔɔ shaan onbukwɔ kyon ngwuta mi ekyoo okwukwo ngha non nu onyi mi idzidze engbe ntone kyungwɔ obube.

³ Nghane, gbewɛbyi ewema na.

<<Ni ongwunabu kyungwɔ obube, fwa yan, ki non kyatitukwu yɔ, dzanta yi obube mgban.

⁴ Ki non kyo abu ungwɔ obube akpe egyafa mi egbe onyi, diye ba mbi abu akpe egyafa gbɛɛ, <Ani kyatitukwu yɔ,> dzanta yi obube mgban.>>

⁵ Ama ogbikye iYesu nyan gbɛɛ, <<Mbwo eyi oyeyɛ onuunu!>>

⁶ Otse iYesu si gbɛɛ, <<Ni oyeyɛ mgbi ema le gyengyɛ dafi inene nkwodzi yɔ, ema ka nya ita ulɔ ne gbɛɛ, <Kwɔlu ewabu yi akpa, kye ewabu ka kwɔke mi ekyoo okwukwo,> ta o ka fwo ema.

⁷ <<Kyi kye gbɛɛ onyi mbi ema dze yi ongbido nle shin okwɔ naadi le kye ine byin ifyungwɔ. O ka nya ongbido na mi onɔ ngwi o kyɛɛ okwɔ ma gbɛɛ, <Ba i ke ka sise gye ungowgye onɛnɛ?>

⁸ Ungwɔ ka dze ngha ba, o ka gbɛɛ, <Kyo ungowgye ngwi ani ka gye mi otu neni, kye angwuto wo ewo, fe ni ani gye di wa ta, abu ka wa gye mgbi abu olele baa?>

⁹ Ongyukwo na ka ta ongbido na angha mi ikyegbɛɛ di o kyungwɔ ngwi o nyan gbɛɛ non kyo maa?

¹⁰ Mbi ema kpaa, li ngha ndze aali, mi onɔ ngwi ema kyungwɔ ngwi a wo ema duu ma, gbo na gbɛɛ, <Eyi li engbe ama okyido, eyi mɛ ogbe umba ba, eyi kyido ongwɔ i wo imbiso ngwi eyi ka kyo mata.> >>

iYesu ngyɛlu inggise iwyo otsoma

¹¹ Ngwi iYesu to ofe le ke iJerusalem ne, o nye otsee mgbi iSamaria beyi iGalalia.

¹² Dafi o le ke oka kaka agwɔ oka ne, emi otsoma nghi iwyo si tun. A kwulese mbombo

¹³ si kwun ela mi ela okwukwo gbɛɛ, <<iYesu, Ongyukwo, di eyi elela!>>

¹⁴ Dafi iYesu di ma neta, o nya ma gbɛɛ, <<Lu na, ka kye ewema tso ama ofife mgbi Imgbasho.>> Ngwi a to ofe le ke neta, ot-soma gbosa loma.

¹⁵ Onyi mi idzidze mgbi ama di dafi otsoma gbosa lon neta, o yido ba le tse Imgbasho mi ela okwukwo.

¹⁶ O ba wa lake ese mi iyayi iYesu ye tan angba. O li inggise iSamaria.

¹⁷ IYesu byita gbɛɛ, <<Li inggise iwyo ngwu otsoma gbosa loma baa? Inggise egyane ntona ko?

¹⁸ Inggise onyi kpaa yido o wa tse Imgbasho ba se li ingyoga ne taa?>>

¹⁹ Man o nyan gbɛɛ, <<Kyato lu, oyeye onuunu mgbi abu nu abu wato.>>

Obaaba mgbi esuto mgbi Imgbasho

²⁰ Emi iFarasi angbeka byi iYesu ita onɔ ngwi esuto mgbi Imgbasho ka ba mani, o nu ma uka gbɛɛ, <<Esuto mgbi Imgbasho ka ba dafi ema gbe ine byi na ba,

²¹ naadi inggise ka gbɛɛ, <O dze na, hona o dze aali ba,> bana esuto mgbi Imgbasho dze mi idzidze ema.>>*

²² Nghane o nya engwafɔɔn gbɛɛ, <<Onɔ kyema ngwi ema ka mina odi egbe onyi mi egbe mgbi **Ongwe Inggise**, kpaa ema ka di ba.

²³ Inggise angbeka ka nya ema gbɛɛ, <O dze aali!> Naadi <O dze na!> Nghaduu ka yama kyedo ma ba.

²⁴ Dafi mmbwo li naabo ni esho agya onyi gbosa nghataa ka to agya oka ne, li ngha ngwi egbe mgbi Ongwe Inggise kpaa ka dze aali.

²⁵ Kpaa ababo adze ka kyɔn mi ungwɔ kwuba kyeme, eto emi onene dika fwan.

²⁶ <<Dafi i dze mi egbe mgbi iNua nani, li ngha nka wa dze mi egbe ngwi Ongwe Inggise ka ye ma aali.

²⁷ Ali inggise duu le gye ye wa, engyulo le kye engyaa, a kye engyaa le nu eba nghataa ba mi egbe ngwi iNua kaka uwaa okwukwo nani. Ta eni ayo ba wa dzili ma duu.

²⁸ <<Di li ungwonyi dafi mi onɔ mgbi iLoti mani. Ali inggise tole gye ye wa, a tole kyyumma, le kya eto dile mbe ozu.

²⁹ Kpaa mi egbe ngwi iLoti tase mi ogalu iSodon ma, ola beyi enotse nli nu ola gbe mfyumfyɛ kya mi esho ba ese wa dzili ma duu.

³⁰ <<Li ngha nka dze mi egbe ngwi a ka kye Ongwe Inggise tso ma aali.

³¹ Mi egbe na, inggise ndɔdɔze ikyendu mgban no ka tashulu ba ikye owa gbelu okye mgban mi ozu ba. Ka li ungwonyi yi inggise ndze okwɔ, no ka ye ba ude owa kye unkonyi ba.

³² We ungwɔ nkɔ owa iLoti nani.

³³ Ali inggise nmina odze oshishe yo, oshishe mgban ka byulu, ongwu ndzata oshishe mgban gbɛɛ no byulu yo, ka ye tun.

³⁴ N nya ema mi otu nani, inggise efa ka lato akwulo onyi; a ka kyi kyelu onyi dzata oka.

³⁵ Engyaa efa ka tole kpinangwo yi ewoma mi ikwɔ; a ka kyelu onyi dzata oka.>>

³⁶ (Inggise efa ka to okwɔ; a ka kyi kyelu onyi dzata oka.)†

³⁷ Engwafɔ mgbi iYesu si byun gbɛɛ, <<Li mi ole, Otse?>>

O nu ma uka gbɛɛ, <<Li imbe ngwi ungwɔ ikwukwo la ma ngwi mpo li kwakye aali.>>

18

Utsa mgbi owakwade o biibe odze

¹ Ne iYesu nya engwafɔɔn utsa otso ma gbɛɛ nu ma le bibo alono, nu ma ka nde ba.

² O gbɛɛ: <<Mi ogalu oka ma inggise ogbiikwo oka dze nli mio Imgbasho hona kye inggise wuuta ba.

³ Ne owakwade oka dze mi ogalu na nli ba mbon le tekye mi ikye emyemye mgban gbɛɛ, <Ya ani abo mi ikye inggise ngwu kwokyi odze yi ani neni.>

⁴ <<Onɔ she ngwi ongye ogbiikwo na fwa okyungwo mi ele. Nghaduu mi ongyeengye ne, o gbo yi ewon gbɛɛ, <Dafi ngwi ani li mio Imgbasho hona kye inggise wuuta ba ne kpaa,

⁵ mi ikye okakewo ngwi owakwade ne kale nu ani ne, n ka di mi ele azukwu no tu emyemye mgban. Ni ani kyo ba, o ka nin ndengye yi okakewo mgban oba alono neni!>>

⁶ Man Otse iYesu gbɛɛ, <<Gado mi odze ngwi ongye ogbiikwo ebebe na gbo mani.

⁷ Nghane Imgbasho ka yagba gbiikwo emyemye wo emidan, ama nle makwo yan otu yi onɔ le mina abo oyaaya ne baa? O ka kiyayi ofwo ma ngwutaa?

⁸ N nya ema, o ka di gbɛɛ a tu emyemye ple jo. Nghaduu, onɔ ngwi Ongwe Inggise ka ye ma, o ka tu oyeye onuunu mi ese ne joo?>>

Utsa mgbi inggise iFarasi yi inggise ogbe udza ifyɛɛ

⁹ IYesu diye gbo utsa ne nya ama ndze yi abo otsigege gbɛɛ ama le saan yuoma, di kye angbeka wuuta ba ma gbɛɛ

¹⁰ <<Inggise efa ke ozu okwukwo osunu Imgbasho mi iJerosalin oka bibo. Onyi li inggise iFarasi, oka li inggise ogbe udza ifyɛɛ.

¹¹ Inggise iFarasi na kwuzunto le bibo mi ikye ewon gbɛɛ: <Imgbasho, ani ta abu angba ikyegbɛɛ ani dze dafi inggise angbeka ba; dafi ama ofofe yi emi ali ibwubwe yi emi amah hona dafi inggise ogbe udza ifyɛɛ ne ba.

* 17:21 17:21 Naadi dze mi itukwu mgbi ema. † 17:36 17:36 Olɔɔlo kwuba dze yi ambulu ne ba.

¹² Ani li tukwondu akpe efa mi ikyidu onyi, ani di li nu Imgbasho onyi mi ikye iwyo mi alungwo ngwi ani tu duu.>

¹³ <<Kpaa inggise ogbe udza ifyee na dzeke fyata, o yagba kyile ine esho kpaa ba, o kye abo mgban beke igee si gbee, <Imgbasho, di ani elela, ani li inggise alobube.>

¹⁴ <<N nya ema gbee inggise ne lu ude mgban yi emyemye mi ine Imgbasho nga inggise oka nani. Bana ali inggise ta nkyile ewon esho a ka yilen ese, ongwu ndi yile ewon ese a ka kyilen esho.>>

IYesu yi engbe ama oshilele

¹⁵ Inggise gbe engbe ama oshilele ba mbi iYesu ikye no wa kye abo gbo ma. Ngwi engwafon di nga neta, a kwo ma oba mbon.

¹⁶ Kpaa iYesu kwu engbe ntona ela ba mbon si gbee, <<Dzata engbe ntona nu ma ba mbi ani, ka kwo ma ba, lubana esuto mgbi Imgbasho dze ikye ito ntoneni.

¹⁷ N le nya ema otsitsi, ali inggise ngbe esuto mgbi Imgbasho dafi ongwongbe ba ka kaka ele ba.>>

Inggise aludu ogbe inggise teyi

¹⁸ Ongyukwo oka ogbe inggise teyi byi iYesu ita gbee, <<Otsetse osuse, li alungwo ngwi ani ka kyo kyeme se n ka tu oshishe igyegwu?>>

¹⁹ IYesu byun gbee, <<I kypsinese ngwi abu le kwu ani di osuse? Inggise onyi kpaa le saan ba se li Imgbasho yuon.

²⁰ Abu ye ola ntoneni: <<Ka ndaamah ba, ka ngwo inggise ba, ka yimi ba, ka kyo obwende atsika ba, sunu otsabu yi onabu.>>

²¹ O gbee, <<Ani ngyo ola ntona duu kye ono ngwi ani li ongbé ma jo.>>

²² Ngwi iYesu fwo ungwone ne, o nyan gbee, <<Ungwo onyi kwoba mbi abu kpoo. Gbelu alungwo ngwi abu dzevan duu gbe gya kye udza nu emi adze, taman abu ka dze yi aludu mi esho. Ta ye wa kyedo ani.>>

²³ Mi ono ngwi inggise na fwo ungwone ne, o buntse. Lubana o li inggise ndze yi aludu kpakpa.

²⁴ IYesu di dafi o she ewo ta ba ne, o gbee, <<Ka fyumfyé kpakpa ni inggise udza kaka esuto mgbi Imgbasho!

²⁵ Mi otsitsi yo, ka suno ba ni ilakwumyi nye ifo edi nga onu inggise udza kaka esuto mgbi Imgbasho.>>

²⁶ Ama nfwo odze ne byita gbee, <<Li eme tsatso ka wato?>>

²⁷ IYesu gbee, <<Ungwo nli kyeme-kyeme mbi inggise ba li kyeme-kyeme mbi Imgbasho.>>

²⁸ IPyita nyan gbee, <<Dii! Eyi dzata alungwo ngwi eyi dzevan duu kyedo abu.>>

²⁹ IYesu nya ma gbee, <<N nya ema otsitsi, ali inggise ngwu dzata ude naadi owan

hona emi ongwunon naadi ama omban hona emi ongwunon mi ikye esuto mgbi Imgbasho yo,

³⁰ a ka yilen nu ma kwuba mi ono ngwi eyi wele neni. A dika tu oshishe igyegwu mi ono ngwi iyayi kpaa.>>

IYesu diye gbodze ikwu ewon akpe ongwu ta

³¹ IYesu gbe ama ogbikyon iwiyodefa ntona lu enggengga ka nya ma gbee, <<Eyi le lu iJerosalin, ta alungwo ngwi oyegbo lo mi ikye Ongwe Inggise ma duu ka mbwumbwo.

³² A ka kyon wo Udzengye abo. A ka nyan odze agya, fyan ito, kyangwo kyin, gbon onitse diye ngwon.

³³ Mi egbe ongwu ta ma o ka kyato mi ikwu.>>

³⁴ Nghaduu engwafu mgban yagba difwi ungwu ntona onyi ba. Itan daada loma, a di yagba ye ungwu ngwi iYesu le gbodzan ma ba.

IYesu kwulu obine obibo ine

³⁵ Dafi iYesu le to kwekwe mi iJeriko ne, inggise obine oka sodze mi ondoofe, le bibo.

³⁶ Mi ono ngwi o fwo ibyi inggise le nye ne, o byita ungwu nle kiyayi mani.

³⁷ A nyan gbee, <<Li iYesu ongwu iN-adzaret le nye.>>

³⁸ O kwu ela mi ela okwukwo gbee, <<IYesu, Ongwe iDevedi, di ani elela!>>

³⁹ Ama nto iyayi mbon fan ela nyan gbee no tukwondu, kpaa o di kwu ela okwukwo ngaangha, <<Ongwe iDevedi, di ani elela!>>

⁴⁰ Ne iYesu kwulese woola gbee nu ma kye inggise obine na ba mbon. Ngwi o ba kwekwe neta, iYesu byun gbee,

⁴¹ <<Li alungwo ngwi abu mina gbee ni ani kyo abu ele?>>

O gbee, <<Otse, ani mina odine.>>

⁴² IYesu si gbo yan gbee, <<Ine no kwulu lo abu; oyeye mgbi abu nu abu yee saan.>>

⁴³ Labolabo mata, o si dine, kyedo iYesu, dile tse Imgbasho. Ngwi inggise duu di ungwone ne, ama kpaa tse Imgbasho.

19

IYesu beyi iDzakuyu

¹ IYesu kaka iJeriko nye-nye le lu.

² Ongyulo dze imbe na ngwu a li kwun di iDzakuyu; o li ongyukwo mgbi ama ogbe udza ifyee di dze yi aludu.

³ O mina odi ito inggise ngwu iYesu dze mani, nghaduu ngwi o shigbo ba ne, o yagba odin ba ikye ibyi inggise.

⁴ Ne o tsinya lu iyayi ka tse ekwo andundu ni ongwu din, ikyesine iYesu kye le nye ofe nani.

⁵ Ngwi iYesu to imbe na yeye neta, o ndine ke esho si nyan gbæ, <<IDzakyu, tashulu vla-vla. Li kyeme-kyeme n ka kaka ude abu ine.>>

⁶ Ne o tashulu vla si gban yi atsa.

⁷ Inggise tsatsa di ungwoneni man, a wita ondandu gbæ, <<O le ke ingyoga mi ude inggise ali ibwubwe.>>*

⁸ Nghaduu iDzakyu dzekunto gbo yi Otse iYesu gbæ, <<Dii, Otse! Mmene jo n ka kye aye ungwo mgbi ani ngwi ani tulun kyi nu ema adze, ki ani kyo inggise ogye, ni li ekyekye kpaa, n ka kpa otsungwon mkpa akpe ene.>>

⁹ IYesu gbo yan gbæ, <<Ine ne abu yi emidabu duu tu owato-wato, ikyesine inggise ne kpaa, li ongwe Abrahan.

¹⁰ Bana Ongwe Inggise ba ikye owa pita ye dulu ungwo nbyulu ma wat.>>

Utsa mgbi engbido iwyo

¹¹ Dafi a le gado mi ungwone ne, iYesu kiyayi onya ma utsa, ikyesine o dze kwekwe yi iJerosalin, man inggise tsewe gbæ esuto mgbi Imgbasho ka byakpa ba akponyi.

¹² IYesu gbogbæ: <<Ongwe uto oka wewo oke anengye adzi nu ma ka kye abo uto don ikye di yido.

¹³ Ne o kwu engbido mgban nghi iwyo ela si nu ali inggise mgbi ama awuya ngwi me dafi awuya okpa ido ofyia eta sini. O gbæ, <Kyelu awuya ne fashi abo di tu ungwo ele na, duuse nin wa yido.>

¹⁴ <<Nghaduu emi ese udan dun tanyi man a do inggise angbeka eso mbon oka gbogbæ, <Eyi mina gbæ inggise ne no ka li uto mgbi eyi ba.>

¹⁵ <<A gyon uto man o ye luba ude. Ta o deso mbi engbido ngwu ongwu nu ma awuya ma, ikye oye eni owaawa ngwi a tu mi ele mani.

¹⁶ <<Inggise ongwu ababo ba wa gbogbæ, <Ongywko, awuya ngwi abu kye nu ani ma ye mbwumbwo nghi iwyo.>

¹⁷ <<Ongywko nu uka gbæ, <N nu abu abo ongbido mgbi ani osuse. Ikyegbæ abu dze yi oyeye mi ungwo ogwee ne, kye ine byi igeli okwukwo nghi iwyo.>

¹⁸ <<Ongwu fan ba wa gbogbæ, <Ongywko, awuya mgbi abu ye mbwumbwo nghi eda.>

¹⁹ <<Ongywko mgban si nu uka gbæ, <Kye ine byi igeli okwukwo nghi eda.>

²⁰ <<Ne ongbido oka di ba wa gbogbæ, <Ongywko, awuya mgbi abu dze na; ani kye da mi ayangwuto.

²¹ Ani tsimio abu, ikyesine abu li inggise ngwu fyumfye ali kpakpa. Abu li dulu mi imbe ngwi abu kya ba.>

²² <<Ongywko mgban nun uka gbæ, <N ka gbo abu ikwo mi elodze mgbi abu, abu ongbido imbali neni, abu ye gbæ ani li inggise ofyumfye ali, n li dulu mi imbe ngwi ani kye da ba, di li she mi imbe ngwi ani kya ba.

²³ Kyosine ngwi abu kye awuya mgbi ani ka woke mi ozu awuya ba? Mi oyeye mgbi ani, n kika tu eni owaawa mi efu.>

²⁴ <<Ta o nya ama nkwudze to yan ma gbæ, <Gbelu awuya na mi abo mgban kye nu inggise ndzeyan nghi iwyo nani.>

²⁵ <<A gbogbæ, ongyukwo, <Ongwu na tsekise dze yi iwyo wa.>

²⁶ <<O nu uka gbæ, <N nya ema gbæ mbi ali inggise ntulun ma a dika mbwon ele kpoo, kpaa ama ndze yi unkonyi ba ma, ongwu o dzeyan ma kpaa a ka kyi gbelu.

²⁷ Kpaa emi ikyili mgbi ani ngwu mina gbæ nin ka dze uto mi ikye ma ba ne, gbe ma ba wa ngwo ma mi iyayi ani mmeneni.>>

Okakaakaka onghaangha mgbi iYesu

²⁸ Ngwi iYesu gbodze ne ngye ne, o kye ofe dikye olu iJerosalin.

²⁹ Dafi o wa to kwekwe mi ongwe igeli ngwi a li kwun di iBetifege yi iBetani mi undo ngwi a li kwun di ungwo mgbi Olivi ne, o do engwafoon efa eso nya ma gbæ,

³⁰ <<Lu mi ogalu ndze ema iyayi nani, ni ema kaka ele yo, ema ka di ongwe itaklimyi shadi mmanani, ngwi inggise onyi kpaa toon ye waba. Kyi shelu ba mmeneni.

³¹ Kini inggise byi ema gbæ, <Kyosine ngwi ema le shan yo?> Nyan gbæ, <Odze wo Otse yan.>>

³² Ama ngwu iYesu do ma eso ma si ke ka di itaklimyi dafi o tsekise nya ma mani.

³³ Ngwi a le shan neta, emi otsungwon byi ma gbæ, <<Kyosine ngwi ema le she itaklimyi ne?>>

³⁴ A nu uka gbæ, <<Odze wo Otse yan.>>

³⁵ A kyen ba wa nu iYesu, man kye angwuto mgbi ama kye tukwu ongwe itaklimyi na ekpo di ya iYesu abo dake ele.

³⁶ Dafi o toon le ke ne, ibyi inggise gbe angwuto le tase mi ofe.

³⁷ Ngwi o ba kwekwe mi imbe ngwi ofe nye lu unggwo Olivi ne, engwafu duu wita le tsatsa dile tse Imgbasho mi ela okwukwo mi alungwo okwulewo ngwi ama di nani.

³⁸ Le gbæ,

<<Mse no dze yi uto ongwu nba mi iyi mgbi Otse Imgbasho neni!

Iyu mi esho beyi okwoko

mi imbe Onghaangha duu!>>

³⁹ Emi iFarasi angbeka mi idzidze ibyi inggise ntona gbo yi iYesu gbæ, <<Otsetse, fwa yi engwafu ntoneni.>>

* 19:7 19:7 A kye ama ogbe udza ifye gbæ a li inggise imo ba.

⁴⁰ IYesu nu ma uka gbɛɛ, <<N nya ema, kini a dede kpaa, akwutɛ ka gbaakwo.>>

⁴¹ Ngwi iYesu ba kwɛkwɛ wa di iJerosalin ne, o tsukwu mi ikye inggise emi igeli nani.

⁴² O gbɔgbɛɛ, <<Ni abu, ki ye ungwo ama nka ba yi abu iyu inɛ kpaa ta. Nghaduu onene i daada mi inɛ mgbi ema.

⁴³ Egbe ka wa kwulu abu abo ngwi emi ikyili mgbi abu ka loka kye abu wo idzidze di fyi abu mi ali agya duu.

⁴⁴ A ka fyi abu beke ese, abu yi inggise ama nto yi abu duu. A ka dzata ikwutɛ onyi kpaa do ikye oka ba, ikyesine abu fwa o difwi onɔ ngwi Imgbasho ba owa dulu abu wato.>>

*IYesu mi ozu okwukwo osunu
Imgbasho mi iJerosalin*

⁴⁵ Ta iYesu kaka ozu okwukwo osunu Imgbasho mi iJerosalin man wita olɔlu ama nle kyummya† tase.

⁴⁶ O nya ma gbɛɛ, <<Afe lo gbɛɛ, <Ozu mgbi ani ka li ozu obibo; kpaa ema kye yɛɛ imbe odaada mgbi emumyi.> >>

⁴⁷ Alegbe o le tso mi ozu okwukwo osunu Imgbasho mi iJerosalin nani. Kpaa engyukwo ama ofife mgbi Imgbasho, etsetse mgbi ola mgbi iMose beyi emi anghodzi inggise le fya gbɛɛ ama ki ngwɔn.

⁴⁸ Nghaduu a tu ofe onyi ongwɔn ba, ikyesine ali inggise kye itukwu shake mi elodze mgban.

20

A byi iYesu ita mi odze mfye mgban

¹ Egbe oka mi idzidze egbe ntonɛ ne, iYesu le tso ibyi inggise mi ifoozu okwukwo osunu Imgbasho mi iJerosalin dile gbo Eso Osuse, ta engyukwo ama ofife mgbi Imgbasho beyi ama otso ola mgbi iMose beke yi ama okye ese teyi, ba mbon.

² A gbo yan gbɛɛ, <<Nya eyi, li mi ali mfye ngwi abu le kyungwo ntonɛ, li emɛ nu abu mfye ne?>>

³ IYesu nu ma uka gbɛɛ, <<Ani kpaa ka byi ema ita. Nya ani na,

⁴ iBatisima mgbi iJɔn ne, kye mbi Imgbasho mi esho naadi kye mbi inggise?>>

⁵ A si tsewe yi ewoma gbɛɛ, <<Kini eyi gbɛɛ, <Kye mbi Imgbasho mi esho yo,> o ka byita gbɛɛ, <Kyosine ngwi ema nun oyeye ba?>

⁶ Kpaa ni eyi gbɔgbɛɛ, <Kye mbi inggise yo,> ali inggise duu ka tse eyi akwutɛ, ikyesine a kye gbɛɛ iJɔn li oyegbo.>>

⁷ Ne, a nu uka gbɛɛ, <<Eyi ye imbe ngwi i tokye ba.>>

⁸ IYesu nu ma uka gbɛɛ, <<Ngyɛɛ ani kpaa ka nya ema ito mfye ngwi ani kye le kyungwo ntonɛ ba.>>

*Utsa mgbi ama ngwu a kye okwo
do ma ubo*

⁹ IYesu si kiyayi o nya inggise utsa neni gbɛɛ: <<Inggise oka nose ye ekwo ama onaana mi okwo mgban man kye nu emi okwo angbeka mi ondu odzeedze, si lu agaba ono ke.

¹⁰ Ngwi onɔ oshe eto wa gyo ne, o si do onghido mgban eso mbi ama ngwu o kye okwo do ma ubo ntonani, ikyegbɛɛ nu ma nun awawekwo nli mgbi ongwu mi okwo nani. Nghaduu ama ngwu o kye okwo do ma ubo ntona gbon ibe lon onya lu abubu.

¹¹ O di do onghido oka eso, ongwu na kpaa a di gbon nun ayiwi saan, lon onya lu abubu.

¹² O di do inggise ongwu ta eso kpoo, a gbon ibe tan mmya di lon onya tase lu.

¹³ <<Ta otsungwo okwo na gbɔgbɛɛ, <N ka kyosine den? Ani ka do ongwani eso, ongwu nkpen itukwu neni; i kyayina a ka nun mmwe.>

¹⁴ <<Nghaduu ngwi ama o kye okwo do ma ubo ntona dun ne, a kye ondu weɛɛ yi ewoma gbɛɛ, <Nene li ongwɛ ogye okwudan aani. Detsɛ ni i gbongwɔn, ni okwude ne yɛɛ mgbi eyi.>

¹⁵ A si kwon tase mi okwo man gbongwɔn.

<<Nghama li alungwo ngwi otsungwo okwo na ka kyo yi ama?

¹⁶ O ka ba wa kye ama ngwu o kye okwo do ma ubo ntona tsatsaduu kye ngwɔlu di yile okwo na nu inggise angbeka.>> Mi onɔ ngwi inggise ntona fwo ungwɔne ne, a gbɔgbɛɛ, <<Ungwɔne no ka dze ngha ba!>>

¹⁷ IYesu kye inɛ byi ma yeye si byita gbɛɛ, <<Nghane li alungwo ngwi olɔlɔ ne tso den: <<Ikwutɛ ngwi ama

ombɛ ozu fwan mani

li **ongwu** ye kwulu ikye ozu.>

¹⁸ Ali inggise ngbese gyeke ikwutɛ na ka gbobu ambulu-ambulu, kpaa inggise ngwu i ka gyan ma o ka jiye.>>

¹⁹ Etsetse mgbi ola beyi engyukwo ama ofife mgbi Imgbasho le pita ofe ngwi ama ka bwan tsoi, ikyesine a ye ta gbɛɛ o gbo utsa ne li mi ikye mgbi ama. Nghaduu a le tsimio ibyi inggise.

Okpaa udza ifyɛ mbi iSidza

²⁰ Ne a gbinebyin saan. A do ama owodi eso, ama nkɔ ewɛ gbɛɛ ama li emi otsitsi mani. A weka obwa iYesu mi ungwo ngwi o gbo adzi nu ma kyon nu mi abo mfye mgbi iGona.

²¹ Ama owodi ntona si byi iYesu gbɛɛ: <<Otsetse, eyi ye abu li gbodze di tsungwo nle yeye, abu di li kye idzidza dze ba, kpaa li tso ofe mgbi Imgbasho yeye yi otsitsi.

† 19:45 19:45 A tole kye ungwo ama ofife gya mmala, ingyakpa, mndo yi engyie, eneeekwo yi mmwaa.

²² Li ayin ni eyi kpa udza ifyee nu iSida* naadi li ayin ba?>>

²³ O difwi ewe mgbi ama neta o gbo yi ama gbee,

²⁴ <<Kye udza ma tsen n di, li onodzi beyi olcolo mgbi eme do efu den?>>

A gbee, <<Li mgbi iSida.>>

²⁵ O nya ma gbee, <<Kye ungwɔ mgbi iSida nu iSida, mgbi Imgbasho nu Imgbasho.>>

²⁶ A yagba bwan yi elodze ondu mi elodze ngwi o gbo mmana mi ododa na ba. Man i kwulu ma ewo mi uka nani, a si yee shilididi.

Okyee-kyee mi ikwu

beyi ongyaa okyeekye

²⁷ Emi iSadusi angbeka, ama ngbee okyee-kyee mi ikwu dzema ba ma, ba mbi iYesu yi ita.

²⁸ A gbee, <<Otsetse, iMose lo afe nu eyi gbee kini ngwuno inggise kwulu dzata ongyaa, kpaa o dze yi engbe bayo, ongyulo na ka yile owakwade na kyeme-kyeme, ikye otu engbe mi ikye ongwunon nani.

²⁹ Nose emi ngwuno ifu nghi egyafa to. Ongwu ababo kye ongyaa ta kwulu tu ongwɛ ba.

³⁰ Ongwu fan

³¹ beyi ongwu ta yilen owakwade, li ungwonyi nghataa ongwu gyafa, kpaa a tu ongwɛ ba man a kwulu duu.

³² Ongyeengye duu ongyaa na kpaa wa kwulu.

³³ Nghanema, mi egbe olele ngwi emi ikwukwo ka kyato ma, o ka li owa eme, ngwi engyulo egyafa ntona duu kyon?>>

³⁴ IYesu nu uka gbee, <<Inggise emi egbe ne li le kye engyaa, a dile kye engyaa nu engyulo.

³⁵ Kpaa ama ngwu a kye ma wuuta gbee di a me owo ate mi ono na beyi mi okyee-kyee mi ikwu a ka yama kye ongyaa hona bongyulo ba,

³⁶ bana a ka kwulu wuba, a to dafi engyɛso. A li emi ongwɛ Imgbasho, ikyekye a li ama ngwu a kyile ma mi ikwongye.

³⁷ Nghaduu mi utsa mgbi oshe okwoola, iMose kpaa tso gbee emi ikwukwo kyato mi ikwu, bana o kwu Otse Imgbasho gbee, Imgbasho mgbi Abraham, yi Adziki beyi ijeko.

³⁸ Ongwu li Imgbasho mgbi emi ikwukwo ba, kpaa mgbi emi oshishe, bana mbon alungwo duu dze oshishe.>>

³⁹ Etsetse mgbi ola angbeka si gbogbee, <<O nu uka saan, Otsetse!>>

⁴⁰ Man a byun ita onyi wuba.

IKrestu ma li Ongwe eme?

⁴¹ Ta iYesu nya ma gbee, <<Kyonese ngwi a gbee iKrestu† li ongwɛ iDevedi?

⁴² IDevedi abon gbo mi afe mgbi iPaslami gbee:

<< <Otse Imgbasho gbo

yi Otse mgbi ani gbee:

<<Sake abugye mgbi ani

⁴³ nghataa nin nu engyikyili mgbi abu

yee itse mgbi abu ogbe afo do efu.>> >

⁴⁴ IDevedi kwun gbee Otse. Nghane o dika li ongwɛ sine?>>

⁴⁵ Ngwi inggise duu le fwon ne, iYesu nya engwafoon gbee,

⁴⁶ <<Gbewɛbyi etsetse mgbi ola, ama nli kpa ma okyikye kpatse yi angwuto owuluwulu di li kpa ma onu ma le ta ma angba mi ifyidu kye, a di li kye itse imo mi ozu okwakye mgbi emi ijuda beyi imbe ama oshewo mi oga.

⁴⁷ A di li kyo emi owakwade ogye mi ungwɔ ngwi a ki kye kyo oyabo mi ude mgbi ama di li kyile ewoma esho mi ibo obo tunto. Itɔ inggise ntona a ka nghao nu ma adze timbi.>>

21

Umba onuunu mgbi owakwade

¹ Dafi iYesu kyile ine esho ne, o di emi awuya kye umba mgbi ama le woke mi okye ogbe umba mi ozu okwukwo osunu Imgbasho mi iJerosalin.

² O diye di owakwade ngwu dze adze kye anini nghi efa wa woke okye ogbe umba.

³ IYesu gbee, <<N nya ema otsitsi, owakwade ndze adze ne nu ngha angbeka ntona duu.

⁴ Lubana emi awuya ntona duu fwe-fwe mi aludu mgbi ama kye nu; kpaa ongwu mi abubo mgban kye ungwɔ ngwi o ka dze oshishe mi ele duu kye nu.>>

IYesu gbodze ambe ongyeengye mgbi ese

⁵ Engwafoon angbeka le gbodze mi mse beyi idabo ngwi a kyo mi akwutse ongwu ozu okwukwo osunu Imgbasho mi iJerosalin beyi umba ngwi a kye nu Imgbasho. Nghaduu iYesu gbee,

⁶ <<Ungwɔ ngwi ema di mmene ne, ono kyema ngwi a ka dzata ikwutse onyi do ikye oka ba; ama duu a ka kye bulu tukwu ese.>>

⁷ Ne a byun gbee, <<Otsetse, li engga ngwi ungwɔ ntona ka kyo? Naadi li ali ambe ka tso gbee ungwɔ ntona dze kwekwe okyɔkyɔ?>>

⁸ IYesu nu ma uka gbee: <<Gbewɛbyi adzi nu ma ka kpagyama wo ba. Ikyesine inggise kwuba ka ba mi iyi mgbi ani, le kye ewoma gbee, <Li ani ongwu ma aani,> dika

* 20:22 20:22 iSidaLi iyii utɔ mgbi emi iRoma. † 20:41 20:41 iKrestuNgwu a li kwu di iMedzaya Ongwu Otse Imgbasho zonu gbee o ka wa dulu ese wato.

gbɛɛ, <Ono ma gyo wa.> Nghaduu ka kyɛdo ma ba.

⁹ Ono ngwi ema fwo odze ika beyi ablodze, ka mio ba. Ungwo ntonɛ ka kyo kyemɛ duuse, kpaa ongyɛngye mgbi esɛ ka ba labolabo ma ba.>>

¹⁰ Ta iYesu nya ma gbɛɛ: <<Esɛ oka ka kyɛɛ ika yi esɛ oka, esuto oka dika kyɛɛ ika yi esuto oka.

¹¹ Ikpeɛɛ osuusu ka dze kpakpa, onikyo enbwa omba enbwa beyi ootse ibwubwe ka gbɔfwɛ mi imbe idzidza-dzidza, yi ungwo ama okwulewo beyi ambe ama okwukwo mi esho.

¹² <<Kpaa duuse ni ungwo ntonɛ kyo, a ka gbe abo do ema ewo dika nu ema okotondzi adze. A ka kye ema nu mi ozu okwakye mgbi emi iJuda beyi obawi, dika kye ema ba mi inɛ mgbi emi uto beyi emi iGona, tsatsadu mi ikye iyi mgbi ani.

¹³ Ungwɔnɛ ka nu ema ofɛ okyo obwendɛ mgbi ani.

¹⁴ Nghaduu bwa itukwu mgbi ema, no ka kaka ema ewo dafi ema ka na ewema duuse ni egbe wa gyo ba.

¹⁵ Lubana ani ka nu ema elodze beyi ozoyeye ngwi engyikyili mgbi ema ka yagba onatsondu yi ema ba.

¹⁶ Ama omba ema, engwunema, emi odo ema beyi emi oka ema, ka wa kye ema gya, a dika ngwo ema angbeka.

¹⁷ Inggise duu ka di ema tanyi mi ikye iyi mgbi ani.

¹⁸ Nghaduu alotu mgbi ema onyi ka kwo ba.

¹⁹ Mi okwuleɛ mgbi ema kpɔkɔɔ ema ka tu oshishe.

IYesu gbo odzili-dzili mgbi iJerosalin

²⁰ <<Ono ngwi ema wa di emi oblakwutse kpakeɛ wo iJerosalin ma, ye na gbɛɛ odzili-dzili mghan dze kwɛkwɛ.

²¹ Nghane ama nto iJudia nu ma tsinya lu unggwo, ama nto ogalu nu ma tase, ama ndi nto esise nu ma ka ye kaka ogalu ba.

²² Lubana nene li ono ngwi Imgbasho ka nu emi ogalu nɛ adze kpakpa ikye ombwumbwo ungwo ngwi a tsekise lo mani.

²³ Ka kwulewo kpakpa mbi engyaa ama nto yi ifewo mi egbe ntona beyi enengwe ama nto yi engwe abo! Okakewo ka dze kpakpa mi esɛ na beyi itingga mgbi Imgbasho mi ikye inggise ntoneni.

²⁴ A ka ngwo angbeka yi okwusunkli dika kwu angbeka ofyɛɛ gbe ma lu kpatɛɛ esɛ duu. Udzengye ka kye afo tɔdo iJerosalin nghataa ono mgbi Udzengye ka wa ngye.

Obaaba mgbi Ongwe Inggise

²⁵ <<Ambe ka wa to mi ono yi ofyia beyi mɛɛ. Mi ikpeɛɛ, esɛ duu ka dze mi iso

beyi okakewo mi owulu-wulu yi okadu-kadu mgbi ekyoo okwukwo.

²⁶ Ibyi inggise ka dzɛkwulu yi imio, mi odifwi-difwi mgbi ungwo ngwi kye le ba esɛ nɛ mani, lubana ali mfye ongwi esho duu ka suusu.

²⁷ Mi ono na a ka di Ongwe Inggise kye le ba mi akpa mi esho yi mfye beyi okwɔkwɔ oshewo.

²⁸ Ono ngwi ungwo ntonɛ wita okyɔɔkyɔ ma, kyato dzɛkunto kyile ikye mgbi ema esho, lubana owato-wato mgbi ema dze kwɛkwɛ.>>

Ungwo okpayi-kpayi mi ekwo andundu

²⁹ Ta iYesu nya ma utsa nɛ gbɛɛ: <<Kyidi andundu beyi ekwo angbeka duu na.

³⁰ Ono ngwi a wita okyinda ma, ema li di abuema di ye gbɛɛ akyonova dze kwɛkwɛ wa.

³¹ Ngwi i dze nghane, ni ema di ungwo ntonɛ le kyo yo, ye na ta gbɛɛ esuto mgbi Imgbasho dze kwɛkwɛ.

³² <<N nya ema otsitsi, eto nɛ ka nye ba nghataa se ungwo ntonɛ ka kyo.

³³ Esho yi esɛ ka wa nye, kpaa elodze mgbi ani ka yama nye ba.

Ado okwookwo

³⁴ <<Gbɛwebyi na, ka kye itukwu mgbi ema dze mi ungwo ogyeegye yi ungwo owa fya beyi itukwu oshanye mi oshishe ongwi esɛ nɛ ba, ikye ni egbe na ka fa tu ema bwabwa

³⁵ dafi ukya ba mani. Lubana egbe na ka ba mbi ali inggise ndze esɛ duu.

³⁶ Lasisa le ngwo alono na, di bibo gbɛɛ ni ema yagba wato mi ungwo ama nka wa kyo duu, adzi ni ema wa yagba kwudze mi inɛ Ongwe Inggise mani.>>

³⁷ Alegbe mi ono, iYesu li le tsungwo mi ozu okwukwo osunu Imgbasho mi iJerosalin, kpaa mi otu yo o li lu ka la undo ngwi a li kwun di unggwo olivi nani.

³⁸ Ali ebgegbe inggise kwaba li to owa fwon mi ozu okwukwo osunu Imgbasho mi iJerosalin.

22

IJuda gbela okye iYesu gya

¹ Oga owe owato-wato mgbi emi Israi mgbi ibredi ngwi a li kye okwuna wele ba ma le gyo,

² neta engyukwo ama ofife mgbi Imgbasho beyi etsetse mgbi ola le pita ofɛ ngwi ama ka ngwo iYesu daada, bana a le mio ibyi inggise.

³ Nghane iSatan kaka mbi iJuda ongwo a li kwun di Iskaroti, nli onyi mbi emi iwyodefa ntonani.

⁴ O ke mbi engyukwo ama ofife mgbi Imgbasho beyi ama nle ngwo mi ozu okwukwo osunu Imgbasho mi Ijerosalin nani, ka kye ondu weese yi ama dafi ongwu ka kye iYesu gya mani.

⁵ I kpaa ma neta a gbela onun awuya.

⁶ O gbela, dile pita ofe ngwi ongwu ka kye iYesu gya yi ama ono ngwi ibyi inggise ka dzeayan ba mani.

Ungwogye mgbi iYesu ongwu olele

⁷ Egbe ibredi ngwi a kye okwuna wele ba ma gyo, ngwi a ka ngwo ongwummla mgbi oga owe owato-wato mgbi emi Israi.

⁸ IYesu do iPyita beyi ifon eso, gbæ, <<Lu na ka wewo oga ongwu eyi ka gye yi eweyi mani.>>

⁹ A byita gbæ, <<Li mi ole ngwi mina abu gbæ ni eyi ka wewo oga?>>

¹⁰ IYesu nya ma gbæ, <<Dafi ema kaka ogalu mata, inggise nkye ishe eni ka kpatse ema. Kyedon ka kaka ude ngwi o ka kaka mani.

¹¹ di nya otsungwude na gbæ, <Otsetse byita gbæ: Ozu ingyoga ko, ngwi ani ka wa gye oga owe owato-wato mgbi emi Israi beyi engwafæn?>

¹² Ta o ka tso ema ifoozu ogbada-gbada ongwu esho, beyi okye duu mi ele. Kye melu imbe mani.>>

¹³ A si lu ka di alungwo duu yeye dafi iYesu teyi nya ma mani. Ta a wewo oga owe owato-wato mgbi emi Israi mi ele.

¹⁴ Ngwi obyi ma wa gyo ne, iYesu beyi ama ogbikyon sise ogye oga.

¹⁵ Man o nya ma gbæ, <<N mina kpakpa ogye oga owe owato-wato mgbi emi Israi ne yi ema duuse nin wa gyadze.

¹⁶ N le nya ema, ani ka gye oga ne wuba, nghataa sede ongwu a ka wa gye mi esuto mgbi Imgbasho mani.>>

¹⁷ Ono ngwi o kyi kyelu ibwe mgbi eneekwo ne, o ta Imgbasho angba si gbæ, <<Gbæ wa yi ewema na.

¹⁸ Bana n nya ema, n ka yama wa eneekwo mgbi ekwo onaana ne wuba nghataa esuto mgbi Imgbasho ka wa ba.>>

¹⁹ Ta o kyi kyelu ibredi di ta Imgbasho angba kye mwalu, yilen kye nu ma, gbæ, <<Nene li ikpewo mgbi ani ngwi a kye nu ikye ema; kyungwone ikye ole we ani na.>>

²⁰ Mi ito ofe na kpoo, ngwi a gye ungwogye ngye ne, o kyi kyelu ibwe, gbæ, <<Nene li ibwe mgbi ondu odzedze ofufe yi eyi mgbi ani ngwi a kye kyi ikye ema.

²¹ Nghaduu abo mgbi inggise nle pita ani ikye ma, wo le gye ungwogye mmene yi ani.

²² Bana Ongwe Inggise ka kwulu kyeme-kyeme dafi a lo ikyon mani, kpaa ahoo mi ikye inggise nkye Ongwe Inggise gya mani.>>

²³ A wita obyi ewoma ita ongwu nka kyo ito ungwone mi idzidze mgbi ama mani.

²⁴ Angwodze di to mi idzidze mgbi ama gbæ li eme mbi ama shewo nga.

²⁵ IYesu si nya ma gbæ, <<Uto mgbi Udzengye mi ese ne li si emidama; man ama ogbe inggise teyi ntona di li ye gbæ ama li abuge mgbi ali inggise duu.

²⁶ Kpaa mbi ema no ka dze nga ba. Nghaduu ongwu nshewo nga mi idzidze ema ma non yile ewon ese yee dafi ongbæ ogyengye mani, ongwu ngbe inggise teyi ma no yee dafi ongbido.

²⁷ Bana li eme le kpongo nga? Inggise ngwu soso na naadi, ongwu nle kyido ma? Ongwu soso na nga! Ani dze mi idzidze ema dafi ongbido mani.

²⁸ Ema li ama nfyi ani anya mi ono imbadi mgbi ani.

²⁹ N di kye esuto nu ema, dafi Otsani kye nu ani mani,

³⁰ ikyegbæ ni ema gye di wa mi imbe ungwogye mgbi ani mi esuto mgbi ani di soke itsuuto, le gbo agwo mgbi Israi iwyo-defa ikwo.

³¹ <<ISaimon, iSaimon, iSatan pita ofe owa kye kwoolu ema dafi a li kwoo ekwu mi okwuga neni.

³² Kpaa ani bibo mi ikye abu, iSaimon, gbæ ni oyeye onuunu mgbi abu ka yeyikpa ba. Ma on ngwi abu kyata ye luba yo, fyi emi engwunabu mfyie itukwu.>>

³³ Nghaduu iPyita nun uka gbæ, <<Otse, ani wewo okaka obawi diye kwulu yi abu.>>

³⁴ IYesu nyan gbæ, <<N nya abu, iPyita, ine neni ogbigbi ka teela waba ta abu ka tangwe ani akpe eta.>>

³⁵ IYesu di byi ma gbæ, <<Ono ngwi ani do ema eso yi ashiko ba, igbe hona okpaf ba ma, ungwu kwo ema obaa?>>

A gbæ, <<Nkonyi kwo eyi oba ba.>>

³⁶ O nya ma gbæ, <<Nghaduu onene ni ema dze yi ashiko yo, kye, beyi igbe kpaa; ma kini ema dze yi okwusunkli bayo, kye angwuto mgbi ema gya ye gya onyi na.

³⁷ Afe lo gbæ: <A gbôn mumbwo woke yi ama ofoola>; n di nya ema gbæ ungwone ka mbwumbwo mbi ani kyeme. Een, ungwu ngwi a lo mi ikpewo ani na le ke ombwumbwo wa.>>

³⁸ Engwafon si gbæ, <<Di, Otse, okwusunkli efa to mmene na.>>

IYesu gbæ, <<I gyo nga.>>

IYesu bibo mi Unggwu Olivi

³⁹ IYesu tase dafi o li teyi kyo mani lu mi Unggwu Olivi, ne engwafon kyedon.

⁴⁰ Ngwi o ka kaka imbe na ne, o nya ma gbæ, <<Bibo na adzi ni ema ka gbæse mi igyila ba.>>

⁴¹ O gbleke gwee dzata ma, o gbe akwafɔ kweɛ si bibo gbɛɛ,

⁴² <<Otsen, ni li oweka mgbi abu yɔ, kyi kyelu ibwɛ adzɛ nɛ mbi ani; nghaduu ka kyo mi oweka mgbi ani ba, kpaa kyo mi oweka mgbi abu.>>

⁴³ Man ongyeso mi esho mblegba tun di fyɔnfye itukwu.

⁴⁴ Ngwi o kaka iso kpakpa nɛ, o bibo mi itukwu onyi, man andzɛ mgban kyata yɛɛ dafi eyi mani le wulo kyikɛ esɛ.

⁴⁵ Ono ngwi o kyato mi ibo nɛ, o wa tu engwafɔɔn tole nuna ikyekye a kyelela ndengye.

⁴⁶ O byi ma gbɛɛ, <<Kysine ngwi ema le nuna? Kyato bibo na ikyegbɛɛ ni ema ka gbɛɛ mi igyila ba mani.>>

A bwa iYesu

⁴⁷ Ngwi iYesu kale gbɔdzɛ nɛ, ibyi inggise wa kaka, ta inggise ngwu a li kwun di iJuda, nli onyi mbi emi iwyodefa, teyi ma. O ba kwekwe wa kye ondu kwo iYesu ataka,

⁴⁸ nghaduu iYesu byun gbɛɛ, <<IJuda, li mi ondu okwo ataka ngwi abu ka kye Ongwe Inggise gyaa?>>

⁴⁹ Ngwi ama nkyɛdo iYesu di dafi ungwɔ ka wa kyo nɛ, a gbɛɛ, <<Otse, ni eyi gblibe yi okwusunkli mgbi eyii?>>

⁵⁰ Onyi mi idzidzɛ mgbi ama kyɛ kwɔdzɛ adɔ abugye mgbi ongbidɔ mgbi okwukwo inggise ofife.

⁵¹ Kpaa iYesu gbɛɛ, <<I gyo ngha!>> Man o si yile inggise na adɔ beke.

⁵² Neta iYesu nya engyukwo ama ofife mgbi Imgbasho beyi ama nle ngyo mi ozu okwukwo osunu Imgbasho mi iJerosalin beyi engyukwo emi iJuda, ama nba mbon na gbɛɛ, <<Kysine, ngwi ema ba mbi ani yi okwusunkli beyi okwuta dafi ani li inggise ofife nghaa?>>

⁵³ Alegbe ani li dze yi ema mi ozu okwukwo osunu Imgbasho mi iJerosalin, kpaa ema bwa ani ba. Nghaduu nene li ono mgbi ema ngwi iyifu sɔ uto aani.>>

iPyita tangwɛ iYesu

⁵⁴ Nghane a bwa iYesu, a kyon lu ude mgbi okwukwo inggise ofife mgbi Imgbasho. iPyita kye ma iyikpa mbombo.

⁵⁵ A kye ola wo ifyɛ le wɛ, iPyita kpaa sɔ le wɛ yi ama.

⁵⁶ Ongwongyiido din dafi o sɔdzɛ le wola nɛ, o din ine si gbɛɛ, <<Inggise nɛ kpaa dze yi iYesu.>>

⁵⁷ Nghaduu o tangwɛ gbɛɛ, <<Ongyaa, ani yama yen ba.>>

⁵⁸ Ngwi ono kɛ gwee nɛ, inggise oka di gbɛɛ, <<Abu kpaa li onyi mboma.>>

iPyita gbɛɛ, <<Ongyulo, li ani ba.>>

⁵⁹ I mɛ dafi obyi onyi sini ta inggise oka biibɛ gbɛɛ, <<Otsitsi inggise nɛ li kye yan, bana o li inggise iGalaila.>>

⁶⁰ Nɛ iPyita gbɛɛ, <<Inggise nɛ, ani yama ye ungwɔ ngwi abu le gbo na ba!>> Labolabɔ ngwi o kale gbɔdze neta, ogbigbi teela.

⁶¹ Otse iYesu si kyata ine byi iPyita yeyɛ. Man iPyita wɛ odzɛ ngwi iYesu gbo yan mani gbɛɛ: <<Duuse ni ogbigbi wa teela mi otu ine nɛni, abu ka tangwɛ ani akpe eta.>>

⁶² Man iPyita tase lu esɛ ka tsukwu kpakpa.

⁶³ Ama nle ngyo iYesu ma wita onyan agya dile gbon ibɛ.

⁶⁴ A kye ungwɔ bwan ine di byita gbɛɛ, <<Yegbo ka! Li emɛ kye ungwɔ gbo abu?>>

⁶⁵ A di gbo agya angbeka kwuba nyan.

A kye iYesu ba inai iPlatu beyi iHerude

⁶⁶ Ngwi egbe wa fa nɛ, okwakye mgbi engyukwo emi iJuda, ngwi engyukwo ama ofife mgbi Imgbasho yi etsetse mgbi ola ba wa kwakye nɛ, a kye iYesu kɛ mboma.

⁶⁷ A gbɛɛ, <<Ni abu li iKrestu* mayɔ, nya eyi.>>

iYesu nu ma uka gbɛɛ, <<Ni ani nya ema kpaa ema ka nu ani oyeyɛ ba,

⁶⁸ ma ni ani byi ema ita kpaa ema ka yagba onu ani uka ba.

⁶⁹ Nghaduu i wita mi onɛnɛ lu iyayi, Ongwe Inggise ka sɔ mi abugye mgbi Imgbasho Ngha yi mfyɛ.>>

⁷⁰ Ama duu byun gbɛɛ, <<Li abu nɛ li Ongwe Imgbashoo?>>

O nya ma gbɛɛ, <<Ema gbɛɛ ani li ongwu.>>

⁷¹ Ta a di gbɛɛ, <<Kyonɛ ngwi eyi di mina obwende angbeka? Bana eyi abueyi fwo mi ondun.>>

23

A kye iYesu ba iyayi iPlatu

¹ Ta ibyi inggise ama nkwakye duu kyato kye iYesu kɛ mbi iPlatu iGona mgbi emi iRoma.

² A le mwonya odzɛ ban gbɛɛ, <<Eyi tu inggise nɛ le nu emideyi boofɛ. O di fwa gbɛɛ nu ma ka kpa udza ifyɛɛ nu iSida ba. O di gbɛɛ ongwu li iKrestu, Uto.>>

³ Nɛ iPlatu byi iYesu gbɛɛ, <<Abu li uto mgbi emi iJudaa?>>

iYesu nu uka gbɛɛ, <<Eɛn, li ngha dafi abu gbo mani.>>

⁴ iPlatu si diyɛ nya engyukwo ama ofife mgbi Imgbasho beyi ibyi inggise gbɛɛ, <<N di inggise nɛ yi obube ba.>>

⁵ Kpaa a nghao biibɛ gbɛɛ, <<O le tsungwɔ di ba yi okakewo mi ali imbe duu mi

* 22:67 22:67 Ongwu Imgbasho zɔndu gbɛɛ o ka wa dulu esɛ watɔ ma mani.

iJudia. O wita mi iGalalia ba wa kaka iJudia mmeneni.>>

⁶ Dafi iPlatu fwo odze ne ne, o byita kini iYesu li inggise iGalalia yo.

⁷ Ngwi o ye gbæe iYesu kye mi iGalalia imbe ngwi iHerude li uto ne, o kyon deso lu mbi iHerude, ongwu nose kpaa baaba dze iJerosalin mi ono nani.

⁸ Ngwi iHerude di iYesu ne, i kpan kpakpa, bana ono ke ngwi o le mina odin. Mi odze mgban ngwi o fwo ma, i minan odin no kyungwo okwulewo ngwi o le kyo mani.

⁹ Ne iHerude byi iYesu ita kwuba, ng-hadu o nun uka ba.

¹⁰ Neta engyukwo ama ofife mgbi Img-basho beyi ama otso ola mgbi iMose ky-atunto si mwonya odze ban mi ali ito ali ibwubwe duu.

¹¹ Ta iHerude beyi eblakwutse mgban nya iYesu odze agya diye shan isha ik-wangha. A kye angwuto uto okwokwo won ewo, yilen lu ka nu iPlatu.

¹² Egbe na iHerude yi iPlatu yee uka, bana a tsekise dze mi ikyili yi ewoma.

¹³ IPlatu si kwu engyukwo ama ofife mgbi Imgbasho yi ama ogbe inggise teyi beyi ibyi inggise kwakye,

¹⁴ si nya ma gbæe, <<Ema kye inggise ne ba mbi ani gbæe li ongwu le we ibyi inggise odze gbæe nu ma kyo odze oshiishi. Ani kya mi ine mgbi ema ng-hadu, n din yi ungwo ngwi ema le dulu ongwufabo mbon na ba.

¹⁵ iHerude kpa tun yi obube ba, bana o yilen deso ba wa nu eyi; dafi ema di ne, inggise ne kyo unkonyi me ngwi o ka kwulu ba.

¹⁶ Nghane, n ka nu ma gbon ibe ta dzanta.>>

¹⁷ (IPlatu gbo ngha ikyesine mi ono oga owe owato-wato mgbi emi Israi ma, li wogyo gbæe o ka dulu onyi mbi ama nwoto obawo ikye emi iJuda.)

¹⁸ A si feela ondonyi gbæe, <<Ngwolu inggise neni! Dzata iBaraba nu eyi!>>

¹⁹ (iBaraba wodze obawi ikyegbæe o kyo ablodze mi igeli di ngwo inggise.)

²⁰ Dafi iPlatu mina odzata iYesu ne, o di gbo-dze yi ama.

²¹ Nghadu a kiyayi yi ela ofaafa gbæe, <<Gbokwon! Ngwulun!>>

²² IPlatu gbo yi ama akpe ongwu ta ma gbæe: <<Mi ekye? Li ali alobube ngwi o kyo? Ani tun yi obube me onon kwulu ba. Nghane n ka nu ma gbon ibe ta dzanta.>>

²³ Kpaa a kiyayi ofeela gbæe nu ma ngwon, man ela mgbi ama nghan.

²⁴ Ne iPlatu ye gbela yi owitukwu mgbi ama.

²⁵ O dulu inggise nwodze obawi ikyegbæe o kyo ablodze di ngwo inggise, ongwu ibyi

inggise ntona mina mani, di dzata iYesu nu ma dafi a mina mani.

A gbokwo iYesu

²⁶ Dafi ama oblakwutse kye iYesu le lu ne, a bwa iSaimon inggise mi iSirini, ongwu tokye mi okwo le kaka igeli nani, man a bwan kye ekwatsi mgbi iYesu nun gbæe no kye kyedon.

²⁷ Ibyi inggise kye ma iyikpa, beyi engyaa ama nle kyelela dile tsukwu won.

²⁸ Kpaa iYesu kyata ine di ma si gbæe, <<Engwengyaa emi iJerosalin, ka tsukwu ikye ani ba; tsukwu ikye ewema beyi engbe mgbi ema na.

²⁹ Bana ono kyema ngwi ema ka gbæe, <Mse dze yi engyaa ama nli ogyoma, ifu nmbongwe ba yi abe ngwi a nghaan ye waba mani!>

³⁰ Ta

<<A ka gbo yi unggwo ntone gbæe,

<<Yulu tukwu eyi!>>

Beyi undo ntone gbæe,

<<Gbobu tukwu eyi!>> >

³¹ Bana ni inggise kyungwo ntone mi ono ngwi ekwo li eyuyu waali, ni ekwo wa ngwo ma ka dze sine?>>

³² Ama ofofe ngbi efa angbeka kpaa a kye ma to owa ngwo.

³³ Ngwi a ba imbe ngwi a li kwun di dingbo ne, a kyon gbokwo ekwatsi, ama ofofe ntona kpaa a kye ma gbokwo ekwatsi, onyi mi abugye yi oka mi abube mgban.

³⁴ Ne iYesu gbæe, <<Otsani, dzamata, bana a ye ungwo ngwi a le kyo ba.>> Man a kyen angwuto kye ghalu mi efa ogboogbo.

³⁵ Inggise ibyi byi kwuto le di; ng-hadu ama ogbe inggise teyi tole nyan agya gbæe, <<O li dulu angbeka wato; non dulu ewon to ki non li iKrestu mgbi Imgbasho, ongwu Imgbasho dulu gbæe o ka wa dulu ese wato ma yo!>>

³⁶ Ama oblakwutse kpaa ba wa fan ese. A kye enekwo omama kye nun

³⁷ di gbæe, <<Kini abu li uto mgbi emi iJuda yo, dulu ewabu to.>>

³⁸ A lo ambe beke ekwatsi mi ikye mgban gbæe: <<Nene li Uto mgbi emi iJuda.>>

³⁹ Onyi mbi ama ofofe ngwu a gbokwo ma yan nyan agya gbæe: <<Abu li iKrestu ma baa? Dulu ewabu to beyi eyi lo!>>

⁴⁰ Nghadu oka na kyokyo yan gbæe, <<Abu li mio Imgbasho lo, bana abu kpaa dze mi odzili-dzili neni?

⁴¹ Eyi yo, eyi le gbiiso ayin, bana eyi tu ungwo nme mi ali ibwubwe ngwi eyi kyo. Kpaa inggise ne yama kyo unkonyi obube ba.>>

⁴² Ta o gbæe, <<iYesu, we ani mi ono ngwi abu kaka esuto mgbi abu.>>

⁴³ IYesu si nyan gbɛɛ, <<Otsitsi n nya abu, inɛ nɛ abu ka dze yi ani mi esuto mgbi Imgbasho.>>

Ikwu iYesu

⁴⁴ Ta ngwi onɔ do idzidze ude nɛ, ɛsɛ duu yifu nghataa obyi eta ongwɔ onode,

⁴⁵ bana onɔ tse wuba. Man angwuto ngwi a kye tse onufe idzidze ozu osaan mi ozu okwukwo osunu Imgbasho mi iJerusalem na si gbua efa.

⁴⁶ Ta iYesu makwɔ mi ela okwukwo gbɛɛ, <<Otsani, n kye onodzi mgbi ani woke abo mgbi abu.>> Ngwi o gbɔdze nɛ mata, o si yulu.

⁴⁷ Dafi ongyukwo mgbi ama oblakwutse mgbi iRoma di ungwɔ nkɔ nɛ, o tse Imgbasho di gbɛɛ, <<Otsitsi inggise nɛ le saan.>>

⁴⁸ Ngwi ibyi inggise ama nkwakye odi ungwɔ nle kiyayi di ungwɔ nkɔ nɛ, eka kwowina loma ta a lu.

⁴⁹ Nghaduu emi odon duu, beyi engyaa ama nkyedɔn mi iGalalia kwulese fyata le di ungwɔ ntoneni.

Ondziindzi mgbi iYesu

⁵⁰ Mi onɔ na inggise oka dze ngwu a li kwun di iJose, ongwɔ li onyi mbi ama odi mi ola mgbi emi iJuda, o li inggise osuse dile saan kpaa,

⁵¹ ongwɔ gbela yi owitukwu beyi okyɔɔkyɔ mgbi emidan ama odi mi ola mi ikye iYesu na ba. O li inggise mi ogalu Arimatia ayese mgbi iJuda o dile fɛ obaaba mgbi esuto mgbi Imgbasho.

⁵² Inggise nɛ ke mbi iPlatu ka bɔn ikwɔ mgbi iYesu.

⁵³ Ta o kye sulu ikwɔ mgbi iYesu ba ese, o si kye angwuto onzundze ndiwon kyon ka ndzi mi endzi ngwi a cɛfo mi ikwutse, ongwɔ a teyi kye ikwɔ ndzi mi ele ye waba mani.

⁵⁴ Ungwɔnɛ kyo egbe idɔ eda mi onode, ngwi a le wewo ikye egbe otonyewo.

⁵⁵ Engyaa ama nwafo yi iYesu mi iGalalia ntona kyedɔ iJose wa di endzi di di dafi a kyon ka ndzi mi ele mani.

⁵⁶ Nɛ a ye lu ka mɛ ungwɔ ogbungbe yi engyie ngwi a ka kye gyuon ewo. Nghaduu a tonya mi egbe otonyewo dafi ola mgbi ama gbɔ mani.

24

Okɔɛ-kyɛ mi ikwongye

¹ Mi egbe ongwɔ ababo mi ikyidu*, mi egbege byibiyi, engyaa ntona kye ungwɔ ogbungbe yi engyie ngwi a mɛ ma, ke endzi.

² A ke ka di a kyi mulu ikwutse ma mi ondendzi,

³ Ngwi a kaka ele nɛ, a tu ikwɔ mgbi Otse iYesu ba.

⁴ Dafi a le tsewe mi ele nɛ, vla neta engyulo nghi efa kwulese kwɛkwɛ yi ama, wo angwuto onzundze dafi mmbwo onaabo mani.

⁵ Imio wo engyaa ntona ta a si kye ine kwese, engyulo ntona nya ma gbɛɛ, <<Kyonɛ ngwi ema le pita inggise oshishe mi imbe emi ikwukwo?

⁶ O dze mmɛnɛ ba; o kyɛ mi ikwu! We dafi o tsekise nya ema, ngwi o ka dze yi ema mi iGalalia mani gbɛɛ:

⁷ <A ka kye Ongwe Inggise wo emi ali ibwubwe abo kyɛmɛ, a ka gbokwon mi ekwatsi nghataa o ka kwulu, kpaa mi egbe ongwɔ ta ma o ka kyɛ mi ikwu.> >>

⁸ Ta engyaa ntona we elodze mgban.

⁹ Ngwi a ye mi endzi luba nɛ, a kye ungwɔ ntonɛ duu kye nya ama ogbikye iYesu iwyo-donyi ntonani beyi angbeka duu.

¹⁰ Li iMeri iMagidalin yi iJoana beyi iMeri onɔ iJensi, beyi angbeka nto yi ama, nya ama ogbikye iYesu odze neni.

¹¹ Nghaduu ama ogbikye iYesu nu engyaa ntona oyeyɛ ba, ikyekye elodze mgbi ama dze dafi li odze ikwangha mani.

¹² Nɛ iPyita kyato tsinya lu mi endzi. O ka klesɛ di mi idzidze endzi man di angwuto ngwi a kye ikwɔ mgbi iYesu ndiwo ma lato yuoma, ta o si ye lu, le tsewe yuon ungwɔ nkɔ nani.

Mi ofɛ oke Emau

¹³ Nɛ mi egbe nata ama okyedɔ iYesu efa le ke agwɔ oka ngwi a li kwun di Emau, ngwi mɛ dafi imai egyafa sini okyɛ ke iJerusalem.

¹⁴ A le kpɔnya yi ewoma mi ungwɔ ama nkɔ duu.

¹⁵ Dafi a le gbɔdze dile kpɔnya mi ungwɔ ntonɛ yi ewoma nɛ, iYesu abuan ba wa wafɔ yi ama;

¹⁶ kpaa a tukwu ma ine odifwin.

¹⁷ Nɛ iYesu byi ma gbɛɛ, <<Li ekye ngwi ema le gbɔ le ke?>>

A kwulese, a she ine ta ba.

¹⁸ Onyi mbi ama efa na, ongwɔ a li kwun di iKlopa, byun gbɛɛ, <<Li abu ta li ingyoga mi iJerusalem ngwu ye ungwɔ ama nkɔ mi egbe ntonɛ ba dɛɛn?>>

¹⁹ Nghaduu iYesu byita gbɛɛ, <<Li alungwɔ?>>

A gbɛɛ, <<Li odze mgbi iYesu inggise ongwɔ iNadzareti. O li oyegbɔ, elodze mgban dze yi mfye beyi okyɔɔkyɔ mi inai Imgbasho yi inggise duu.

²⁰ Engyukwo ama ofife mgbi Imgbasho beyi ama ogbe eyi teyi kyon nu ama ndze yi

* **24:1 24:1** Egbe ongwɔ ababo mi ikyidu Mbi emi iJuda yo, li egbe iLadi.

mfye nu ma ngwɔn ikwɔ ikwongye, di kyon gbokwo mi ekwatsi;

²¹ Ma eyi gbekabyi gbɛɛ o li ongwu nkye owa dulu emi Israi wato mani. Ma li ekye oka, nghaduu li egbe ongwu ta ine ngwi ungwɔ ntonɛ kyo waani.

²² Nghane, engyaa angbeka mi idzidze mgbi eyi kyungwɔ okwulu eyi ewo. A ke endzi mi egbegbe ototu neni,

²³ kpaa yama tu ikwɔ mgban ba. A ye ba wa nya eyi gbɛɛ di ama di ine odiidi mgbi engyɛsɔ, ngwu nya ma gbɛɛ o dze oshishe.

²⁴ Ne emideyi angbeka ke endzi ka di dafi engyaa ntona tsekise gbo mani, nghaduu ongwu yo a din ba.>>

²⁵ Ta iYesu nya ma gbɛɛ, <<Kyɔnɛ ema li ikwangha ngha, di kyɔnɛ ngwi ema kyo itukwu lo onoyeye mi alungwɔ ngwi ama ogbɛɛsɛ gbo dze ese ngha?

²⁶ Dze mbiso ngwi iKrestu ma ka gbiiso mi ungwɔ ntonɛ diye kaka ude mgban okwɔkwɔ mi esho baa?>>

²⁷ O si nu ma osa mi ungwɔ ngwi Afe gbo mi ikye ongwu, wita mbi iMose beyi oyegbo angbeka duu.

²⁸ Dafi a dze kwɛkwɛ okaka agwɔ ngwi a le ke ma ne, iYesu kyo dafi o ka nye lu iyayi mani.

²⁹ Nghaduu a tɛkye yan kpakpa gbɛɛ, <<dze yi eyi, bana onɔ dze kwɛkwɛ ogbɛsɛ egbe ine ne kpaa le ngye wa.>> Man iYesu kaka ikye oka dze yi ama.

³⁰ Ngwi o sɔke ogye ungwogye yi ama ne, o kyi kyelu ibredi, kye mse be ele, kye mwalu si kye nu ma.

³¹ Ta ine mgbi ama kwulu a si difwin, man o byulu wo ma ine.

³² Engwafɔ ntona byi ewoma gbɛɛ, <<Ngwi o le gbodze yi eyi mi ofe le ke dile nu eyi osa mi ungwɔ ngwi Afe gbo ma, itukwu gbeegbe lo eyi baa?>>

³³ A si kyato akponyi ye luba iJerosalin. A wa tu iwyodonyi ntona beyi angbeka kwakye to imbe nani

³⁴ di gbɛɛ, <<Li otsitsi! Otse iYesu kyɛɛ mi ikwu, o di mblegba tu iSaimɔn.>>

³⁵ Ta ama okyedɔ iYesu efa ntona nya ma ungwɔ ngwi kyo mi ofe, dafi ama di difwi iYesu mi onɔ ngwi o kye mwalu ibredi mani.

IYesu mblegba tu engwafɔ mgban

³⁶ Mi onɔ ngwi a kale gbodze mi ikye ungwɔnɛ ne, iYesu abuon kwudze mi idzidze mgbi ama di gbo yi ama gbɛɛ, <<Iyu no dze yi ema.>>

³⁷ Ne i kwulu ma ewo imio di wo ma kpakpa, a le tsɛwe gbɛɛ ama di onodzi inggise ikwukwɔ.

³⁸ Ta iYesu nya ma gbɛɛ, <<Kyɔsine ngwi i le kaka ema ewo, ngwi itukwu di dze ema efefa ngha?

³⁹ Di abo yi afo mgbi ani na. Li ani abuen! Ema kye abo gbo ani di; bana onodzi inggise ikwukwɔ dze yi ikpewo yi akpukpu dafi ema di ani dzezan ne ba.>>

⁴⁰ Ngwi o gbodze ne mata, o kye abo yi afo mgban tso ma.

⁴¹ Dafi a kale noyeye mi ele ba ikye gbɛɛ i kwulu ma ewo a di dze yi atsa ne, o byi ma gbɛɛ, <<Ema dze yi ungwɔ ogyeegye mmene we?>>

⁴² A si kye ambulu mmbweni oshaasha yi ikpɔkpewo nun,

⁴³ man o kye gye mi inai ma.

⁴⁴ O nya ma gbɛɛ, <<Nene li ungwɔ ngwi ani nya ema onɔ ngwi ani ka dze yi ema mani: Alungwɔ ngwi a lo mi ola mgbi iMose beyi olɔɔlo mgbi ama ogbɛsɛ yi iPaslami duu mbwumbwo kyeme mi ikpewo ani.>>

⁴⁵ Ne o kwulu ma itukwu onu ma difwi Afe mgbi Imgbasho,

⁴⁶ o nya ma gbɛɛ, <<Nene li ungwɔ ngwi a lo ma aani: iKrestu ma ka gyadze di kwulu di kyɛɛ mi ikwu mi egbe ongwu ta,

⁴⁷ ne a kale gbeesɔ mgbi itukwu okyatakya beyi odzata inggise yi ali ibwubwe mi iyi mgban mi ese duu, wita mi iJerosalin.

⁴⁸ Ema li obwende mi ungwɔ ntoneni.

⁴⁹ Ani ka kye ungwɔ ngwi Otsani Imgbasho zonu ma kye desɔ nu ema; kpaa tila to ogalu iJerosalin na nghataa ni Imgbasho wa kye mfye mi esho nu ema se.>>

IYesu ye lu esho

⁵⁰ Onɔ ngwi iYesu gbe engwafɔn tase lu iBetani ne, o kyile abo esho di kye mse be ma ewo.

⁵¹ Ngwi o kye mse le be ma ewo ne, o dzata ma ta a si kyon lu esho. ⁵² Ta a sunun diye luba iJerosalin yi atsa kpakpa.

⁵³ Ne a kiyayi otse Imgbasho mi ozu okwukwo osunu Imgbasho mi iJerosalin, alegbe-alegbe.

Eso Osuse mi abo mgbi iJon

Elodze yee inggise

¹ Mi owita-wita mgbi ese ma Elodze dze, Elodze na dze yi Imgbasho, Elodze na di li Imgbasho.

² O dze yi Imgbasho mi owita-wita mani.

³ Alungwo ngwi Imgbasho ta duu nye mbon, ni li Ongwu bayo unguo ngwi Imgbasho ta duu o ki ta ba.

⁴ Li mbon ngwi oshishe dze, ma oshishe na li osa mgbi inggise.

⁵ Osa na di gbosa mi iifu kpaa iifu difwin gbe ba.

⁶ Imgbasho kye inggise oka deso ba, iyin di iJon.

⁷ O ba ikye owa nu obwende mgbi osa na, adzi ni inggise duu noyeye mi osa nani.

⁸ Li ongwu abuan li iya ma ba, o ba ikye owa kyo osa na obwende ta.

⁹ Osa otsitsi nka nu ali inggise odifwi-difwi ma ka kyema le ba ese neni.*

¹⁰ O teyi dze ese neni, dafi Imgbasho ta ese ne mbon ne kpaa, emi ese difwin ba.

¹¹ O ba mbi ama nli mgban kpaa a gbela gban ba.

¹² Nghaduukpaa ama ngban mani, mbi ama nnoyeye mi iyi mgban ma, o nu ma ofe oyee emi ongwé Imgbasho,

¹³ engwe ngwu a mba ma mi mmbwe yi eyi ba, hona mi ewe otseetse mgbi inggise owamyé naadi mi owitukwu mgbi obongyaa ba, kpaa nli ombaamba mgbi Imgbasho mi onodzi mani.

¹⁴ Ta Elodze na yee inggise wa dze yi eyi. Eyi di okwoko mgban, okwoko mgbi Ongwe Imgbasho Onyi kpokpo, ntokyé mbi Otse Imgbasho, ngwu elela mgban mbwo le fe-fe beyi otsitsi nani.

¹⁵ IJon kyo obwende ikyon. O di gbo mi ela okwukwo gbee, <<Nene li ongwu ani gbee, <Ongwu nkye ani iyikpa ma o ngha ani, ikyekye o teyi ani dze.>>

¹⁶ Elela mgban nle dzii ikye eyi ne, nu eyi duu gbumse idzida-dzida.

¹⁷ Bana a kye ola nu mi abo mgbi iMose; elela beyi otsitsi ba mi abo mgbi iYesu iKrestu.†

¹⁸ Inggise onyi di Imgbasho ye ba, sede li Ongwe onyi kpokpo ndi li Imgbasho mi otsitsi di wodze ifafo yi Otson nani, li ongwu tso eyi dafi Imgbasho dze aali.

*IJon okyo iBatisima tangwe gbee
ongwu li iKrestu ba*

¹⁹ Ono oka ne, engyukwo emi iJuda ama nto ijerosalin do ama ofife mgbi Imgbasho beyi emi iLevi eso nu ma ka byi iJon ita gbee, o li eme.

²⁰ O kye da ma ba, o gbee, <<Ani li iKrestu ma ba.>>

²¹ A byun gbee, <<Nghama abu li eme? Abu li Elaijaa?>> O gbee, <<Ei li ani ba.>>

<<Abu li oyegbo maa?>>

O gbee, <<Ei.>>

²² Mi ongyeengye ne a si byun gbee, <<Abu li eme? Nu eyi elodze ngwi eyi ka yilen ka nya ama ndo eyi eso ntonani. Abu gbosine mi ikye ewabu?>>

²³ IJon nu ma uka mi elodze mgbi oyegbo Adzaya gbee, <<Ani li ela mgbi ongwu nle kwu mi okwese gbee, <Melu ofe mgbi Otse no byi yeye.>>

²⁴ Ama ngwu a do ma eso ma li emi iFarasi.

²⁵ A byun gbee, <<Ni abu li iKrestu, naadi Elaija, hona oyegbo kpaa ba ma, i kyosine ngwi abu le kyo inggise iBatisima?>>

²⁶ IJon nu uka gbee, <<Ani le kyo inggise iBatisima yi eni, kpaa inggise oka kwudze idzidze mgbi ema, ongwu ema yon ba.

²⁷ O kye ani iyikpa, odi okpafu mgban kpaa ani me oshe ba.>>

²⁸ Ungwu ntone duu kiyayi mi iBetani, mi oyombo ekyoo ijodan, imbe ngwi iJon le kyo inggise iBatisima mani.

Dii ongwummala mgbi Imgbasho

²⁹ Tegblifan iJon di iYesu kye le ba mbon neta o gbee, <<Dii ongwummala mgbi Imgbasho, ongwu nkyi kyelu alobube mgbi ese mani!

³⁰ Li ongwu ani nya ema odze mgban gbee, <Inggise oka kyema ngwu ngha ani, ikyekye o teyi ani dze.>

³¹ Ani abuan kpaa nose yon ba, kpaa itodze ngwi ani ba le kyo inggise iBatisima yi eni ma, li ikye okyon tso mbi emi Israi.>>

³² Ta iJon si nu ma obwende neni: <<Ani di Onodzi Osaan tashulu mi esho dafi anyama mani wa tila donke ewo.

³³ Ani kika yon ba, nghaduu Imgbasho ndo ani eso owa kyo inggise iBatisima yi eni ma nya ani gbee, <Ongyulo ngwu abu di Onodzi mgbi ani tila donke ewo ma, li ongwu ka kyo inggise iBatisima yi Onodzi Osaan aali.>

³⁴ Ani di kyo obwende gbee nene li Ongwe Imgbasho.>>

Engwafu mgbi iYesu emi ababo

³⁵ Tegblifan ne iJon diye kwudze yi engwafuon ngbi efa.

* 1:9 1:9 Naadi nene li osa otsitsi nka nu odifwi-difwi mbi ali inggise ngwu ba ese neni. † 1:17 1:17 Ongwu Imgbasho zondo gbee o ka ba wa dulu ese wato ma.

³⁶ Ngwi o dili iYesu nye le lu neta o gbée, <<Dii, li Ongwé Mmala mgbi Imgbasho ma aani!>>

³⁷ Ngwi engwafɔ mgban ntone fwo odze ngwi o gbo neta, a kyedɔ iYesu.

³⁸ Ngwi iYesu kyata di ma kyan iyikpa ne, o byita gbée, <<Li ekye ngwi ema mina?>>

A gbée, <<Otsetse, li mi ole ngwi abu dze?>>

³⁹ O gbée, <<Ba ta ema ka di.>>

Man a ke ka di imbe ngwi o dze mani, diye dzeyan mi egbe na olɔlɔ duu. Ono li obyi ene ngwi onode sini.

⁴⁰ Andru, ongwunɔ iSaimon iPyita, li onyi mi idzidze inggise efa ama nfwo odze ngwi iJón gbo di kyedɔ iYesu mani.

⁴¹ Ungwɔ ababɔ ngwi Andru kyo yɔ, o pita iSaimon ongwunon nyan gbée, <<Eyi tu Onagbe ngwu Imgbasho zonu ma wa>> (ongwu nli iKrestu nani).

⁴² Ne o si kyon luba mbi iYesu.

iYesu din ine si gbée, <<Abu li iSaimon ongwé iJón. A ka kwu abu di iKefa>> (ngwi a li kwun di iPyita, ngwi itan li ikwutse nani).

iYesu kwu iFyilipi beyi iNatanie ela

⁴³ Tegblifan iYesu wewo le lu iGalalia. O wa tu iFyilipi si nyan gbée, <<Kyedɔ ani.>>

⁴⁴ iFyilipi li inggise mi iBetsaida imbe onyi yi Andru beyi iPyita.

⁴⁵ iFyilipi tu iNatanie si nyan gbée, <<Eyi tu ongwu iMose lo odze mgban mi afe mgbi ola, ongwu ama ogbée kpaa lo odze mgban nani, iYesu ongwu iNadzareti, ongwé iJose.>>

⁴⁶ Ta iNatanie byita gbée, <<Ungwɔ osuse ka yagba to mi iNadzaretii?>>

iFyilipi gbée, <<Ba wa di.>>

⁴⁷ Ngwi iYesu di iNatanie kye le to kwekwé ne, o gboɔɔɔ mi ikpewon gbée, <<Nene li inggise Israi otsitsi, ongwu atsika onyi dze mbon ba.>>

⁴⁸ iNatanie byita gbée, <<Abu kyosinese ye ani?>>

iYesu nu uka gbée, <<Ani di abu ngwi abu ka dze ita andundu duuse ni iFyilipi wa kwu abu ela.>>

⁴⁹ Man iNatanie byakpa ghatɔ gbée, <<Otsetse, abu li Ongwé Imgbasho; abu li Uto mgbi Israi.>>

⁵⁰ iYesu gbée, <<Abu noyeye ikyekye ani nya abu gbée ani di abu mi ita andundu. O ka wa di ungwɔ ama nshewo nga ntona kpaa.>>

⁵¹ O diye kiyayi gbée, <<N nya ema otsitsi, ema ka di esho ka kwulu lake asisa, engyeso mgbi Imgbasho kale ke esho ye ba ese mbi Ongwé Inggise.>>

2

iYesu kyata eni yee eneekwo

¹ Mi egbe ongwu ta ma eba okwokyiikwokyi dze ogalu iKana mi ese iGalalia. Ono iYesu dze ele,

² ne iYesu yi engwafɔ mgban kpaa a bo ma eba okwokyiikwokyi nani.

³ Ngwi eneekwo wa ngye ne, ono iYesu nyan gbée, <<A sulu eneekwo wuba.>>

⁴ iYesu nyan gbée, <<Onen, li ekye ngwi abu kye ani le woke ele? Ono mgbi ani gyo waba.>>

⁵ Onon si nya engbido ntona gbée, <<Kyo alungwo ngwi o nya ema duu.>>

⁶ Atankpe akwutse mgbi eni nghi egyn to kwekwé mi imbe nani, ito ngwi emi iJuda li sa ewoma mi odzedze aletɔ mgbi ama mani, ali atankpe li kye ikpokpo eni me osu lu osudiwoyɔ.

⁷ iYesu nya engbido ntona gbée, <<Kweni mbwo atankpe ntone na.>> A si kweni mbwo ma kyee kyee.

⁸ Ta o nya ma gbée, <<Onene yɔ, mwa ka nu ongyukwo mgbi oga ne tsatso na.>>

A si kyo dafi o gbo mani,

⁹ man ongyukwo mgbi oga ne mbadi eni ngwi o kyatan yee eneekwo nani. O ye imbe ngwi eneekwo ne tokye ba, kpaa engbido ama nkweni ma ye. O kwu obongyaa ofufe ela lu enggengga,

¹⁰ ka gbée, <<Ali inggise li teyi kye eneekwo osuse tase se wa kye obube ba olele ono ngwi ingyoga wa ungwɔ kpakpa mani, nghaduu abu kye osuse da nghataa ba oneneni.>>

¹¹ Nene li ambe okwulewo ongwu ababɔ ngwi iYesu kyo mi iKana mi iGalalia. O kye okwɔkwɔ mgban tso, neta engwafɔ mgban si kye oyeye onuunu mgbi ama byike mbon.

iYesu ghosa ozu okwukwo osunu Imgbasho mi iJerosalin

¹² Ungwone wa ngye man o lu iKape-nahun yi onon yi emi ongwunon beyi engwafɔ mgban. A la imbe na egbe efa.

¹³ Ngwi oga owe owato-wato mgbi emi iJuda na wa dze kwekwé ne, iYesu lu iJeros-alin.

¹⁴ O ka to ifoozu okwukwo osunu Imgbasho mi iJerosalin nani, o di inggise tole kye mnda, mmala yi anyama le gya, angbeka soto ewo adinyatse tole nyine awuya.

¹⁵ Ta o shi onitse mi osha, si lo ma onya duu tase mi ifoozu okwukwo osunu Imgbasho, beyi emi mmala yi mnda tsatsa; o kye ganya awuya mi adinyatse mgbi ama onyine awuya di kyi kyata adinyatse ma tukwu ese.

¹⁶ Ama nkye anyama le gya ma o nya ma gbée, <<Gbelu ungwɔ ntone tase mmene na! Kyone ngwi ema kyata ozu mgbi Otsani yee idu!>>

¹⁷ Engwafɔ wɛ dafi a lɔ gbɛɛ, <<Okpitukwu mgbi ani mi ikye ozu mgbi abu le gbɛ mi itukwu mgbi ani dafi ola mani.>>

¹⁸ Emi iJuda byita gbɛɛ, <<Li ali ambɛ okwulewo ngwi abu ka yagba tso eyi zukwu ni eyi difwi mfye ngwi abu sulun se kyo ito ungwo ntonene?>>

¹⁹ IYesu nu ma uka gbɛɛ, <<Gbobu ozu okwukwu osunu Imgbasho neni, ta ani ka yilen mbe mi egbe eta.>>

²⁰ Emi iJuda byun gbɛɛ, <<I kye onova ngwusefa dɔn egyn ombɛ ozu neni, nghane abu ka yilen mbe mi egbe eta taa?>>

²¹ Nghaduu ozu okwukwu osunu Imgbasho ngwi o le gbodzan na li ewo mgban.

²² Mi onɔ ngwi a wa kyilon mi ikwongye ma se engwafɔɔn wa ka wɛ odzɛ ngwi o teyi gbo nani. Man a si noyeyɛ mi afɛ beyi elodzɛ ngwi iYesu teyi gbo.

²³ Dafi o ka dzɛ iJerosalin mi oga owe owatɔ-watɔ mgbi emi Israi nɛ, inggise kwuba di ambɛ okwulewo ama ngwi o le kyo neta, a noyeyɛ mi iyi mgban.

²⁴ Nghaduu iYesu gbela kye ewon nu ma ba, bana o ye ngyɛ ali inggise duu.

²⁵ O mina obwendɛ mgbi inggise ikye inggise ba, ikyekye o teyi ye ungwo nwodzɛ mbi inggise mani.

3

INikodemu kɛ mbi iYesu

¹ Inggise iFarasi oka nose dzɛ iyin di iNikodemu, o li onyi mi idzidzɛ mgbi ama o gbɛ emi iJuda teyi.

² O ba mbi iYesu mi otu wa nyan gbɛɛ, <<Otsetse, eyi ye abu li otsetse nkyɛ mbi Imgbasho. Bana inggise onyi ka yagba kyo ambɛ okwulewo ama ngwi abu le kyo nɛ ba ni Imgbasho dzɛyan bayɔ.>>

³ IYesu nu uka gbɛɛ, <<N le nya abu otsitsi, inggise onyi ka yagba di esutɔ mgbi Imgbasho gbɛ ba se ni a yilen mba akpe efa.>>

⁴ INikodemu byita gbɛɛ, <<A ka kyosinɛse yile inggise mba ngwi o yɛɛ omyine nɛ? O ka yagba ye kaka ifu mbi onɔn akpe ongwu fan ni a yilon mba gbɛɛ?>>

⁵ IYesu gbɛɛ, <<N le nya abu otsitsi, inggise onyi ka kaka esutɔ mgbi Imgbasho ba se a ka mban mi eni beyi Onodzi.

⁶ Mmbwɛ yi eyi li mba mmbwɛ yi eyi, Onodzi li mba onodzi.

⁷ No ka kwulu abu ewo mi odzɛ ngwi ani gbo gbɛɛ, <Se a ka yile abu mba na ba.>

⁸ Awo li fa lu imbe ngwi i mina. Abu ka fwo owulu-wulu mgban kpaa abu ka ye imbe ngwi i tokyɛ hona imbe ngwi i le kɛ ba. Li ngha ndzɛ yi ali inggise ngwu a mban mi Onodzi aali.>>

⁹ Nɛ iNikodemu byita gbɛɛ, <<Ka kyosinɛse ungwɔnɛ ka dzɛ ngha gbɛ?>>

¹⁰ IYesu gbɛɛ, <<Ngwi abu li otsetse mgbi emi Israi nɛ kpaa, abu yagba difwi ungwo ntonɛ lo?>>

¹¹ N le nya abu otsitsi, eyi ye ungwo ngwi eyi le gbo, eyi dile nu obwendɛ mi ungwo ngwi eyi di, nghaduu ema gbela yi obwendɛ mgbi eyi ba.

¹² Ani gbɔdzɛ yi abu mi ungwo ongwɛ esɛ nɛ kpaa abu noyeyɛ ba; ma ka kyosinɛse ngwi abu ka noyeyɛ kini Ani gbɔdzɛ yi abu mi ungwo ongwɛ esho?

¹³ Inggise onyi kpaa kɛ esho ye ba se li Ongwɛ Inggise nkyɛ esho neni.

¹⁴ Dafi iMose nose byi ifa kyilen esho mi okwɛsɛ na li ngha a ka wa kyile Ongwɛ Inggise esho kyemɛ aali,

¹⁵ adzi inggise ngwu noyeyɛ mbon yɔ no ka dzili ba, kpaa no tu oshishe gyegwu.

¹⁶ <<Lubana Imgbasho di esɛ nɛ kpan itukwu jo o kye Ongwan onyi kpokpo nu, gbɛɛ ali inggise nnun oyeyɛ ta no ka dzili ba, kpaa no tu oshishe igyegwu.

¹⁷ Bana Imgbasho dɔ Ongwan esɔ ba esɛ ikye owa fwo esɛ ikwɔ nun obube ba, kpaa li ikye ni esɛ watɔ ikpewon.

¹⁸ Ali inggise nnun oyeyɛ yɔ o ka dzili ba, kpaa ali inggise nnun oyeyɛ bayɔ teyi dzili wa ikyekye o noyeyɛ mi iyi mgbi Ongwɛ Imgbasho onyi kpokpo na ba.

¹⁹ Nɛnɛ li ikwɔ ma aani: Osa ba esɛ neni, kpaa inggise nghaɔ mina iifu ngha osa ikyekye okyɔɔkyɔ mgbi ama li ibwubwe.

²⁰ Ali inggise nkyungwo ibwubwe yɔ, o di osa lanyɛ nghane o ka gbela ba imbe ngwi osa dzɛ ba di ali ibwubwe mgban wa dɔ ododa.

²¹ Nghaduu inggise nkyɛ otsitsi teyi yɔ, o ka ba imbe ngwi osa dzɛ zukwu nu ma difwi saan gbɛɛ ungwo ngwi ongwu kyo nɛ kye mbi Imgbasho.>>

Obwendɛ mgbi iJon ikye iYesu

²² Ngwi ungwɔnɛ wa nɛ neta iYesu yi engwafɔɔn tase lu ikpɛsɛ iJudia, ka kye egbɛ gwɛɛ yi ama le kyo ma iBatisima.

²³ Ono na iJon kpaa le kyo iBatisima mi Ayɛnɔ kwɛkwɛ yi iSalin, ikyekyɛ eni kwoba ba, inggise dile ba tonya ba gbɛɛ ni iJon kyo ma iBatisima.

²⁴ (Ungwɔnɛ li onɔ ngwi a kye iJon wo obawi waba mani.)

²⁵ Angwodzɛ tɔ mi idzidzɛ mgbi engwafɔ iJon angbeka beyi inggise iJuda oka mi odzɛ ewo ofwɔɔfwo.

²⁶ A ba mbi iJon wa gbo yan gbɛɛ, <<Otsetse, inggise ndzɛ yi abu nose mi oyombo ijodan ongwu abu kyo obwendɛ saan mi ikyon na, o le kyo iBatisima, ma ali inggise duu le lu mbon.>>

²⁷ IJon nu uka mi odze ne gbɛɛ, <<Inggise ka yagba kyungwo ba sede ni Imgbasho onghi esho kye nun yɔ.

²⁸ Ema abuemaa ka kyo obwendɛ gbɛɛ ani teyi nya ema gbɛɛ, <Ani li iKrestu ma ba a dɔdɔ ani esɔ teyun a.>

²⁹ Ongyaa ofufe li mgbi obongyaa ofufe. Uka mgbi obongyaa li fwoofwo yi obongyaa, o di li mbwo yi atsa onɔ ngwi o fwo ela mgbi obongyaa mani. Atsa na li mgbi ani, di li nga ngwi atsa mgbi ani li mbwumbwo aali.

³⁰ IYesu ka sheeshe lu iyayi, ani ka yɛɛɛɛ ese.

³¹ <<Ongwu nkye esho ba ma nga duu, ongwu ntɔkye ese ma li mgbi ese, o li gbɔdɛ dafi inggise nkye ese. Ongwu nkye esho ma nga duu.

³² O kyo obwendɛ mi ungwo ama ngwi o fwo diye di, kpaa inggise onyi gbela yi obwendɛ mgban ba.

³³ Inggise ngbela yan gbela gbɛɛ Imgbasho li otsitsi.

³⁴ Lubana ongwu Imgbasho dɔn esɔ ma gbo elodze mgbi Imgbasho, Imgbasho nun mfye mgbi Onodzi odondu ba.

³⁵ O kpa Otson itukwu o di kye alungwo duu dɔn ubo.

³⁶ Ali inggise ngwu nu Ongwe oyeye yɔ dze yi oshishe ogyegwu, ali inggise nfwa Ongwe yɔ ka di oshishe ba, lubana itingga mgbi Imgbasho ka dzezan gyegwu.>>

4

IYesu gbɔdɛ yi ongyaa iSamaria

¹ Emi iFarasi fwo gbɛɛ iYesu nghao le tu ama okyedɔn dile kyo ma iBatisima nga iJon,

² yama li iYesu abɔn le kyo iBatisima ba, kpaa li engwafɔn le kyo.

³ IYesu wa ye nghanɛ man, o dzata ayese mgbi iJudia yido lu iGalalia.

⁴ I wogyɔ ngwi o ka nye onghi iSamaria.

⁵ Ne o wa to igeli mgbi iSamaria oka ngwi a li kwun di iSika, kwekwe yi onwe imbe ngwi ijeko kye nu ijose onghan nani.

⁶ Ibuga mgbi ijeko dze imbe nani, dafi indɛ mgbi agaba kwu iYesu ne, o sise mi ewo ibuga ngwi onɔ do idzidze ude sini.

⁷ Onɔ ngwi byyaa iSamaria ba owa kweni ne, iYesu byan gbɛɛ, <<O ka nu ani eni owawa wɛ?>>

⁸ (Engwafɔ mgban lu ifu igeli oka gya ungwoye.)

⁹ Ongyaa iSamaria na nyan gbɛɛ, <<Abu li inggise iJuda, ani li ongyaa iBatlomi. Kyosinɛ ngwi abu le bɔ ani eni owawa?>> (Bana emi iJuda li kwokyi yi emi iBatlomi ba.)

¹⁰ IYesu gbɛɛ, <<Ni abu ki ye umba mgbi Imgbasho ndze mi ikye mgbi abu beyi inggise nle bɔ abu eni owawa ne yɔ, abu kika bɔ ta, o kika nu abu eni mgbi oshishe.>>

¹¹ Ongyaa na gbɛɛ, <<Ongyukwo, abu dze yi odi okweni ba, ibu ne ke ma abu ka tu eni mgbi oshishe ne mi ole?

¹² Abu shewo nga otseyi ijeko nkye ibuga ne nu eyi di weni mi ele abuan, ngwi engbe mgban kpaa wa beyi ifyungwo mgban naa?>>

¹³ IYesu nyan gbɛɛ, <<Ali inggise nweni ne yɔ ekweni ka ye kwun,

¹⁴ kpaa ali inggise nweni ngwi Ani kye nun yɔ ekweni ka kwun wuba. Mi otsitsi, eni ngwi Ani kye nun na ka yaan uteeni di kale fe nghataa kaka oshishe gyegwu.>>

¹⁵ Ongyaa na nyan gbɛɛ, <<Ongyukwo, nu ani eni nani adzi ni ekweni ka kwin wuba, nin di nya yi eni owa kwɔkwɔ.>>

¹⁶ IYesu nyan gbɛɛ, <<Ka kwu obabu ela no ba.>>

¹⁷ O gbɛɛ, <<Ani dze yi ongyulo ba.>>

IYesu gbɛɛ, <<O gbo ayin dafi abu gbɛɛ abu dze yi ongyulo ba nani.

¹⁸ Otsitsi, abu teyi sulu engyulo nghi eda, ongwu abu dzezan onene ne kpaa li obabu ba. Odze ngwi abu kwa gbo ne li otsitsi.>>

¹⁹ Ongyaa na gbɛɛ, <<Ongyukwo, dze ani dafi abu li oyegbo mani.

²⁰ Emi otseyi teyi li sunu Imgbasho mi unggwo neni, nghaduu ema emi iJuda yɔ li gbɛɛ li mi iJerosalin kyemɛ ngwi eyi ka sunu Imgbasho.>>

²¹ IYesu ghatɔ gbɛɛ, <<Ongyaa, nu ani oyeye, onɔ kyema ngwi ema ka wa sunu Otse Imgbasho mi unggwo ne hona mi iJerosalin kpaa wuba.

²² Ema emi iBatlomi le sunu ungwo ngwi ema yon ba; eyi emi iJuda yɔ, eyi le sunu ungwo ngwi eyi yon, bana owato-wato kye mbi emi iJuda.

²³ Lubana onɔ kyema di li onɔ ma aani, ngwi ali inggise osunu mi otsitsi ka sunu Otson Imgbasho mi onodzi beyi otsitsi kyemɛ, lubana li ito ama osunu ngwu Otso Imgbasho le pita ma aali.

²⁴ Imgbasho li Onodzi, ama osunun nu ma sunun mi onodzi beyi otsitsi kyemɛ.>>

²⁵ Ongyaa na gbɛɛ, <<Ani ye Onagbe (ongwu a kwun di iKrestu ma) kyema. Onɔ ngwi o wa ba yɔ, o ka nu eyi osa mi alungwo duu.>>

²⁶ Man iYesu ghatɔ gbɛɛ, <<Li ani ma jo le gbɔdɛ yi abu aani.>>

Engwafɔ iYesu ye wa tun

²⁷ Mi onɔ na mata engwafɔ mgban ye man i kwulu ma ewo dafi iYesu le gbɔdɛ yi ongyaa mani. Nghaduu inggise onyi byita gbɛɛ, <<Li ekye ngwi abu mina naadi kyɔne ngwi abu le kpɔnya yi ongyaa baa?>>

²⁸ Ta ongyaa na dzata ishe eni mgban, ye lu igeli ka nya ali inggise duu gbɛɛ,

²⁹ <<Ba na, wa di inggise ngwu nya ani alungwo ngwi ani ple kyo tsatsa neni. Li iKrestu ma den hoo?>>

³⁰ A tase mi ogalu kpatse ofe le lu mbon.

³¹ Duuse nu ma ba yo, engwafoon tekye yan gbɛɛ, <<Otsetse, gye ungwogye.>>

³² Nghaduu iYesu nya ma gbɛɛ, <<Ani sulu ungwogye ongwɛi ema ye ba mani.>>

³³ Neman engwafoon tole gbo yi ewoma gbɛɛ, <<Naadi inggise oka kye ungwogye wa nun?>>

³⁴ iYesu gbɛɛ, <<Ungwogye mgbi ani, li okyo itukwu mgbi Ongwu ndo ani eso di ngyelu ido mgban ngwi o wo ani mani.

³⁵ Ema li gbɛɛ, <<I sisi ofyia ene duuse ono oshe eto ka gyo baa?> Nin nya ema, kwulu ine di okwo na! A nye gyo oshe-she.

³⁶ Onene kpaa a le kpa inggise oshe eto mi ido mgban, o dile she eto mgbi oshishe ogyegwu na oneneni, ikye ni inggise ofwe eto beyi inggise oshe eto wa dze yi atsa yi ewoma.

³⁷ Nghane elodze ngbɛɛ, <Inggise oka fwe-fwe eto oka di she-she na li otsitsi.>

³⁸ N do ema eso le ka she eto ngwi li ema kya ba. Angbeka teyi kyolu ido nsuno mani ta ema tu mgbede mi ido mgbi ama.>>

Emi iBatlomi kwuba noyeye

³⁹ Emi iSamaria kwuba mi igeli na nu iYesu oyeye mi ikye obwende mgbi ongyaa nani, ngwi o gbɛɛ, <<O nya ani alungwo ngwi ani teyi kyo tsatsadu.>>

⁴⁰ Nghane ngwi emi iSamaria ba mbon ne, a tekye nun gbɛɛ no dze yi ama, man o si lela yi ama egbe efa.

⁴¹ Elodze mgban ogboogbo nu inggise kwuba yee ama onoyeye.

⁴² A nya ongyaa na gbɛɛ, <<Eyi noyeye mi elodze ngwi abu nya eyi na ta ba, onene eyi fwo mi ado ibeyi, eyi di ye gbɛɛ ongyulo ne otsitsi-otsitsi o li Onagbe mgbi ese neni.>>

iYesu ngyelu ongwɛ ongyukwiido oka ootse

⁴³ Ngwi egbe efa na nye neta iYesu lu iGalalia.

⁴⁴ (Bana ongwu abuan teyi gbɛɛ oyegbo sulu mmwe mi ese udan ba.)

⁴⁵ Ngwi o kaka iGalalia neman emi iGalalia kyon ono. A di ungwɔ ama ngwi o kyo mi iJerusalem tsatsa mi oga owe owatowato mgbi emi Israi nani, ikyekye ama kpaa ke ele.

⁴⁶ O diye ke igeli iKana mi ayese mgbi iGalalia imbe ngwi o kyata eni yee enekwo nani. Ongbodzi inggise ido mgbi uto oka ongwɔn la ootse mi ese iKapenahun.

⁴⁷ Ngwi inggise ne fwo gbɛɛ iYesu dzata iJudia luba iGalalia ne, o si ke mbon ka

tekye nun gbɛɛ no ba wa bwe ongwɔn ongwu ndotse kaka ikwongye nani.

⁴⁸ Ne iYesu nyan gbɛɛ, <<Se ni ema di ambe yi ungwɔ okwulewo bayo ema ka noyeye ba.>>

⁴⁹ Ongbodzi inggise ido mgbi uto na gbɛɛ, <<Ongyukwo, ba vla duuse ni ongwani wa kwulu.>>

⁵⁰ iYesu gbɛɛ, <<O ka yagba lu, unka ka kyo ongwabu ba.>> Inggise na gbela yi odze ngwi iYesu gbo ne taman o si lu.

⁵¹ Ngwi o kale ke ofe mani enghido mgban wa nyan gbɛɛ ewo gbosa lo ongwɔn.

⁵² O byi ma ono ngwi ewo gbosa lon mani, a gbɛɛ, <<Li obyɛ onyi mi ono ngwi awo dzanta.>>

⁵³ Man otson difwi dafi li ono na yeye ngwi iYesu gbɛɛ, <<Ongwabu ka dze oshishe.>> Neta ongwu yi eto mgban duu noyeye.

⁵⁴ Li ambe okwulewo ongwu fan ngwi iYesu kyo mi ono ngwi o dzata iJudia luba iGalalia aani.

5

iYesu ngyelu inggise ootse mi ondu ibu

¹ Ono oka ne, iYesu di yido ke iJerusalem mi oga mgbi emi iJuda.

² Ibu mmala dze ogalu iJerusalem ngwi a li kwun di Onufe Ogalu Mmala ngwi dze yi iwulu opo ngbi eda, iyin mi ondu iHibru li iBetseda.

³ Ibyi inggise ama ndotse lato opo nto-nani, ama obine, ama ogbikyɛ tukwu ese, beyi ama ngwu alewo kwulu. [

⁴ Ongyeso li kye esho wa kaka eni nani, di kyo akpeni: inggise ongwu ababo nkaka mi ono ngwi akpeni le gbo na yo, ali ootse mgban duu li ngye.]

⁵ Inggise oka nose ladze mmanani ngwu dotse onova osudiwo diwɛgyata.

⁶ Ono ngwi iYesu din ladze mmana di difwi gbɛɛ o dze mi ootse na ono ke ne, o byun gbɛɛ, <<I mina abu gbɛɛ ni ootse mgbi abu ngye?>>

⁷ Inggise ootse na si nu uka gbɛɛ, <<Ongyukwo, ani dze yi inggise onyi nka ya ani abo kye ani kaka ibu ono ngwi a kyo akpeni ba. Ni ani le fya gbɛɛ nin kaka ta inggise oka li teyi ani.>>

⁸ Ne iYesu nyan gbɛɛ, <<Kyato! Kyi kyelu obutu mgbi abu, kyikyɛ.>>

⁹ Labolabo mata ootse mgban ngye; o kyi kyelu obutu mgban si kyikyɛ.

Mi egbe ngwi ungwone kyo ma li egbe otonyewo,

¹⁰ neta emi iJuda ntona nya inggise ngwu a ngyelun ootse na gbɛɛ, <<Li egbe otonyewo; ola fwa gbɛɛ ni abu ka kye obutu mgbi abu ba.>>

¹¹ Nghaduu o nu uka gbɛɛ, <<Inggise ongwu ngyelu ani ootse na nya ani gbɛɛ, <Kyi kyelu obutu mgbi abu kyikyɛ.>>>

¹² Nɛ a byun gbɛɛ, <<Li ali inggise nya abu gbɛɛ ni abu kyelu obutu mgbi abu kyikyɛ?>>

¹³ Inggise ngwu a ngyelun ootse na ye inggise ma ba, ikyekyɛ iYesu lu dzanta kaka ifu ibyi inggise.

¹⁴ Ono gwee nɛ iYesu wa din mi ozu okwukwo osunu Imgbasho mi iJerosalin si nyan gbɛɛ, <<Dika, abu yɛɛ saan oneneni. Ka kyo alobube wuba di ungwɔ ntimbi nghaabo nɛ wa kyo abu.>>

¹⁵ Inggise na yɛ lu ka nya emi iJuda ntona gbɛɛ li iYesu dzikan ngyelu ongwu ootse.

Oshishe ikpewo Ongwe

¹⁶ Nghane emi iJuda ntona wita opita iYesu mgbekyɛ ngwi o ngyelu inggise ootse mi egbe otonyewo.

¹⁷ IYesu si nya ma gbɛɛ, <<Otsani le kyido mgban alono duu, li nga ngwi ani kpaa le kyo aani.>>

¹⁸ Mi ikyɛ odzɛ nɛ emi iJuda ntone fya mi oglijo mgbi ama duu ongwon; ikyegbɛɛ o le mbe ala mgbi egbe otonyewo ta ba, kpaa o dile kwu Imgbasho gbɛɛ Otsongwu, okyɛ ewon yɛɛ ungwonyi yi Imgbasho.

Mfye mgbi Ongwe

¹⁹ IYesu nu ma uka sini: <<N nya ema otsitsi, Ongwɛ ka yagba kyo unkonyi abuon ba; o ka kyungwɔ ngwi o di Otsɔn le kyo ma kyoon ta, bana alungwɔ ngwi Otsɔn kyo ma Ongwɛ kpaa li kyo nga yeyɛ.

²⁰ Ikyesine Otsongwɛ di Ongwɛ kpan itukwu di tson alungwɔ ngwi Ongwu li kyo duu. Ɛɛn, ikyegbɛɛ no kwulu ema ewo yɔ, ungwɔ ama nnga ongyelu inggise nɛ ootse kpaa, Otsɔn ka kye tson.

²¹ Dafi Otsɔn li kyile inggise ikwukwɔ di li kye oshishe nu ma nɛ, li nga ngwi Ongwɛ kpaa li kye nu ama ngwu ongwu mina okyɛ nu aali.

²² Nghaduukpaa Otsani li gbo inggise onyi ikwɔ ba, o yile ikwɔ ogbɔɔgbɔ duu wo Ongwɛ abɔ,

²³ ikyegbɛɛ nu ma kye mmwɛ nu Ongwɛ dafi a li kye nu Otsɔn kpaa yeyɛ mani. Inggise nkyɛ mmwɛ nu Ongwɛ ba Otsɔn ndɔn ɛsɔ ma kpaa o nun mmwɛ ba.

²⁴ <<N nya ema otsitsi, inggise nfwo elodzɛ mgbi ani di nu ongwu ndɔ ani ɛsɔ ma oyeyɛ yɔ, o dzɛ yi oshishe ogyegwu. O dika dzili ba; o fa mi ikwongye luba oshishe.

²⁵ N nya ema otsitsi, ono kyema, i di ba kpaa wa ngwi emi ikwukwɔ ka fwo ela mgbi Ongwɛ Imgbasho, ama nfwo ma ka dzɛ oshishe.

²⁶ Dafi Otsongwɛ dzɛ yi oshishe abuon nɛ, li nga ngwi o nu Ongwɛ kpaa dzɛ yi oshishe abuon aali.

²⁷ Nghane o di nun mfye ogbiikwɔ ikyekyɛ o li Ongwɛ Inggise.

²⁸ <<No ka kwulu ema ewo mi ungwɔnɛ ba, ikyena ono kyema ngwi ama nlato endzi duu ka fwo ela mgban

²⁹ di tase mi endzi. Ama nkɔ osuse ka kyato dzɛ oshishe, ama nkɔ obube ka kyato kaka odzili-dzili.

³⁰ Ani abuon ka yagba kyo unkonyi ba; ani li gbiikwɔ dafi ani fwo ma kyoon, ma ikwɔ mgbi ani li otsitsi, ikyesine ani mina okyungwɔ ongwɛ itukwu ani ba, kpaa itukwu mgbi ongwu ndɔ ani ɛsɔ mani.

Obwendɛ mi odzɛ mgbi iYesu

³¹ <<Ni ani kyo obwendɛ mi odzɛ mgbi ani abuani yɔ, obwendɛ na wuuta ba.

³² Inggise oka dzɛma nli kyo obwendɛ mi odzɛ mgbi ani, ma ani yɛ obwendɛ mgban li otsitsi.

³³ <<Abu dɛsɔ kɛ mbi iJon, o di kyo obwendɛ mi ikyɛ otsitsi.

³⁴ Li ogbɛɛ Ani mina obwendɛ mgbi inggise owamye ba; kpaa Ani gbo ntone ikyegbɛɛ ni ema wato.

³⁵ IJon nose dzɛ dafi ipitila nle gbɛ dile gbosa mani, ema dzɛ yi atsa mi ongwono gwee ikyɛ ogbɛɛ osa mgban.

³⁶ <<Ani dzɛ yi obwendɛ nsundo nga mgbi iJon nani. Mi ikyɛ idɔ ngwi Otsani kye nu ani gbɛɛ ni ani ngyelu nɛni, ngwi ani le kyo nɛ, i tso obwendɛ gbɛɛ Otsani dɔ ani ɛsɔ.

³⁷ Otsani ndɔ ani ɛsɔ abuon teyi kyo obwendɛ mi odzɛ mgbi ani. Ema fwo ela mgban hona di odzɛdzɛ mgban yɛ ba,

³⁸ elodzɛ mgban kpaa wodzɛ mbi ema ba, ikyena ema nu ongwu o don ɛsɔ nɛ oyeyɛ ba.

³⁹ Ema kpai elodzɛ Imgbasho nɛ saan ikyekyɛ ema tsɛwɛ gbɛɛ li mi ele ngwi ema tu oshishe gyegwu. Ma li elodzɛ Imgbasho ntone kyo obwendɛ mi ikyɛ odzɛ mgbi ani,

⁴⁰ nghaduu ema fwa oba mbi ani wa tu oshishe.

⁴¹ <<Ani mina mmwɛ mgbi inggise owamye ba,

⁴² kpaa ani yɛ ema. Ani yɛ dafi ema dzɛ yi okpitukwu mgbi Imgbasho mi itukwu mgbi ema ba mani.

⁴³ Ani ba mi iyi mgbi Otsani, nghaduu ema gbɛ ani ba; kpaa ni inggise oka ba mi iyi mgbi ewon yɔ, ema ka gban.

⁴⁴ Ema ka noyeyɛ sine, ngwi ema le mina mmwɛ mbi ewema, kpaa le pita mmwɛ nkyɛ mbi Imgbasho yuon ta ba?

⁴⁵ <<Nghaduu ka tsɛwɛ gbɛɛ li Ani ka gbɛ odzɛ wo ema ewo mbi Otsani ba. Li iMose ngwu ema kye itukwu mgbi ema byi mbon na ka gbɛ odzɛ wo ema ewo aali.

⁴⁶ Ni ema ki nu iMose oyeyē yō, ema kika nu ani kpaa oyeyē, ikyesinē o lō ungwō mi odze mgbi ani.

⁴⁷ Kpaa ngwi ema noyeyē mi ungwō ngwi o lō ba nē, ema ka noyeyē mi odze ngwi ani gbo sine?>>

6

IFesu byi inggise idubu eda enbwa

¹ Ngwi ungwōnē wa nyē nē, iYēsu fooye lu byulu mi agya Ekyoo Okwukwo mgbi iGalalia (ngwi a di li kwun di ekyoo iTiberia kpaa nani),

² nē ibyi inggise kpakpa kyedon ikyekye a di ambē okwulewo ngwi o kyō mbi emi ootse mani.

³ Man iYēsu tō lu ungwō ka sise yi emi ongwafōn.

⁴ Oga owē owatō-watō mgbi emi iJuda dze kwekwē mi onō mani.

⁵ Ngwi iYēsu kyile inē esho di ibyi inggise kpakpa kye le ba mbi ongwu nē, o si byi iFyilipi gbē, <<Li mi ole ngwi eyi ka gya ibredi nu inggise ntonē gye?>>

⁶ IYēsu byita nē ikye ombadun ta, ikyesinē o teyi ye mi itukwu mgban ungwō ngwi ongwu ka kyō.

⁷ IFyilipi nun oka gbē, <<Udza okpa idō mgbi ofyia egyata kpaa ka mē ogya ibredi nu ma tsan aba kpatse ba!>>

⁸ Ongwafō mgbi iYēsu oka, Andru, ong-wuno iSaimon iPyita si gbē,

⁹ <<Ongwongyulo dze mmenēni ngwu dze yi ibredi ngwi a kyō mi ibale ngbi eda beyi ongwē abatsa efa, ntonē ka to ole mbi ibyi inggise ntonē?>>

¹⁰ IYēsu si gbē, <<Ni inggise ntonē sise.>> Oshē kyinda mi imbe na kpakpa man inggise ntona sise mi ele, engyulo mē dafi idubu eda sini.

¹¹ IYēsu si kyelu ibredi kye angba nu Imgbasho man kye nu engwafō mgban nu ma kye gha inggise ntonani, o di kyō ngba yi mmbweni yeyē, ama duu gye dafi a mina mani.

¹² Ngwi inggise duu tu gye gyōlo ma nē, o si nya engwafōn gbē, <<Kyi salu ambulu nsisi ma kwakye mbonyi ni unkonyi ka nyanya ba na.>>

¹³ A si kye salu ambulu ibredi ibale ngbi eda ngwi a gye sisi ma mbwo uya ngbi iwyodefa.

¹⁴ Dafi inggise ntona di ambē okwulewo ngwi iYēsu kyō nē, a gbē, <<Mi otsitsi yō, nēnē li oyegbō nwogyo gbē o ka ba ēse mani.>>

¹⁵ Ngwi iYēsu di gbē, a wewo ogye ongwu uto mi abumfye nē, o wule lu ungwō ka dze yuon.

IFesu kyikye mi ikye eni

¹⁶ Mi onōde nani, engwafōn kē uto,

¹⁷ a kaka uwaa le fooye lu iKapenahun dafi imbe yifu wa, kpaa iYēsu ba wa tu ma waba.

¹⁸ Awo wa le fa fyumfye, dile gbe akpeni.

¹⁹ Dafi a fa uwaa kē mē imai eta naadi eta dō itsitsi nē, a di iYēsu kyikye mi ikye eni le ba kwekwē yi ama, ta imio wo ma.

²⁰ Nghaduu o nya ma gbē, <<Li Ani, ka mio ba na.>>

²¹ Nē a mina okyon kaka uwaa, ntunto neta uwaa to ondu ēse mi imbe ngwi a le kē mani.

²² Tegblifan ibyi inggise ama nto oye uto agya oka nē difwi gbē li uwaa onyi ta bedze mmāna edede ma iYēsu edede kaka yi engwafōn ba, a lu yuoma.

²³ Nē uwaa angbeka kye iTiberia wa bese kwekwē yi imbe ngwi inggise ntona gye ibredi mi onō ngwi Otse iYēsu nose kye angba nu Imgbasho nani.

²⁴ Ngwi ibyi inggise ntona di gbē, iYēsu naadi engwafō mgban to mmāna wuba nē, a kaka uwaa ntona lu oyombo iKapenahun oka pitan.

IFesu ungwogye mgbi oshishe

²⁵ Ngwi a tun mi oyombo uto nē, a byun gbē, <<Otsetse, li alonō ngwi abu to mmēnē?>>

²⁶ IYēsu nu ma uka gbē, <<N nya ema otsitsi, ema le pita ani ikyegbē di ema di ambē okwulewo ba, kpaa li ikyegbē ema gye ungwogye kpakpa tolo.

²⁷ Ka kyidō mi ikye ungwogye nli mbe ba, kpaa mi ikye ungwogye nka dze ba oshishe igyegwu ngwi Ongwē Inggise ka kye nu ema mani, ikyesinē Imgbasho Otson teyi kye ambē mgbi ogbela ungwō nun.>>

²⁸ Nē a byi iYēsu gbē, <<Li alungwō ngwi eyi ka kyō kyemē ikye okyidō ama ngwi Imgbasho mina?>>

²⁹ IYēsu si nu uka gbē, <<Idō mgbi Imgbasho ma li ongwu aani: li onoyeyē mbi ongwu Imgbasho dōn esō nēni.>>

³⁰ Nghanē a byun gbē, <<Li ali ambē okwulewo ngwi abu ka kyō ikye ni eyi diye nu abu oyeyē? Li alungwō ngwi abu ka kyō?

³¹ Emi otsikyeyi nose gye imana nkyē esho kye, mi okwesē dafi ngwi a tsekise lō gbē: <O kye ungwogye kye esho nu ma gye mani.>>

³² IYēsu nya ma gbē, <<N nya ema otsitsi, li iMose kye ungwogye nkyē esho na nu ema ba, kpaa li Otsani kye ungwogye otsitsi nkyē esho na nu ema.

³³ Ikyekye ungwogye mgbi Imgbasho li ongwu nkyē esho ba esē wa kye oshishe nu esē nēni.>>

³⁴ A gbē, <<Ongyukwo, le nu eyi ungwogye na alegbe-alegbe.>>

³⁵ Nē iYēsu nya ma gbē, <<Li ani li ungwogye mgbi oshishe, inggise nba mbi

ani yo enbwa ka don wuba, inggise ndi nu ani oye ye yo ekweni ka kwun wuba.

³⁶ Kpaa dafi Ani nya ema ma, ema di ani wa, nghaduu ema noye ye ba.

³⁷ Ama ngwu Otsani kye ma nu ani duu a ka ba mbi ani, ali inggise ndi ba mbi Ani duu n ka lon onya ba.

³⁸ Ikyena Ani kye esho ba ese owa kyo owitukwu mgbi ani ba, kpaa okyo owitukwu mgbi ongwu ndo ani eso mani.

³⁹ Ma nene li owitukwu mgbi ongwu ndo ani eso ma aani: gbæ ama ngwu ongwu gbe nu ani duu onyi kpaa no ka byulu mi ele ba, kpaa ni Ani kyile ma esho mi egbe ongwu olele.

⁴⁰ Lubana owitukwu mgbi Otsani li ogbæ, ali inggise ndi Ongwæ di nun oye ye ka tu oshishe gyegwu, Ani dika kyilen mi ikwu mi egbe ongwu olele mani.>>

⁴¹ Mi ungwone emi iJuda wita ondandu mi ikye odze mgbi iYesu ikyekye o gbæ, <<Ani li ungwogye nkye esho ba ese.>>

⁴² A gbæ, <<Nene li iYesu lo, ongwæ iJose, ongwu eyi ye otson yi onon ne baa? Kyosine ngwi o ka gbo onene gbæ, Ani kye esho ba ese?>>

⁴³ IYesu nya ma gbæ, <<Nya ondandu yi ewema na.>>

⁴⁴ <<Inggise onyi kpaa ka ba mbi ani ba se Otsani ndo ani eso ma kwon ba mbi ani, ani dika kyilen mi ikwu mi egbe ongwu olele mani.

⁴⁵ A teyi lo mi afe mgbi ama ogbæse gbæ: <Imgbasho ka tso ma tsatsa.> Ali inggise ngaado mbi Otsani di kpayi mbon yo ka ba mbi ani.

⁴⁶ Inggise onyi kpaa di Otsani ye ba, li ongwu nkye mbi Imgbasho ne ta, li ongwu yuon di Otson aali.

⁴⁷ N nya ema otsitsi, inggise nnoye ye dze yi oshishe gyegwu.

⁴⁸ Ani li ungwogye mgbi oshishe.

⁴⁹ Emi otsikyema gye imana mi imbe okplagada ungwogye nkye esho ba ese nani, nghaduu kpaa a kwulu.

⁵⁰ Kpaa ungwogye nkye esho ba ese dze mmeneni, ngwi inggise ka gye di kwulu wuba.

⁵¹ Ani li ungwogye mgbi oshishe nkye esho ba ese. Inggise ta ngye ungwogye ne o ka dze oshishe gyegwu, ungwogye ne li ikpewo mgbi ani ongwu ani ka kye nu mi ikye oshishe mgbi ese.>>

⁵² Ne emi iJuda ntona wita otangwe yi ewoma mi itodze ngwi iYesu gbo nani, gbæ, <<Kyosine ngwi inggise ne ka kye ikpewo mgban nu eyi gye?>>

⁵³ IYesu nya ma gbæ, <<N nya ema otsitsi se ni ema gye ikpewo mgbi Ongwæ Inggise di wa eyi mgban bayo, ema dze yi oshishe mbi ema ba.

⁵⁴ Ali inggise ngye ikpewo mgbi ani diye wa eyi mgbi ani dze yi oshishe igyegwu, ani dika kyilen mi ikwu mi egbe ongwu olele.

⁵⁵ Ikyesine, ikpewo mgbi ani li ungwogye otsitsi, eyi mgbi ani di li ungwæ owawa otsitsi.

⁵⁶ Inggise ta ngye ikpewo mgbi ani di wa eyi mgbi ani wodze mbi ani, ani kpaa wodze mbon.

⁵⁷ Yeye dafi Otsani ndze oshishe do ani eso mani, ani di dze oshishe li ikye Otsani nani, nghane inggise ngye di wa mbi ani yo, ka dze oshishe ikye ani.

⁵⁸ Nene li ungwogye nkye esho ba ese mani, emi otsikyema gye imana nghaduu a kwulu, kpaa inggise nbyi ewon enbwa yi ungwogye ngwi ani kye nu ne, ka dze oshishe gyegwu.>>

⁵⁹ IYesu gbodze ne mi ono ngwi o le tsungwo mi ozu okwakye mgbi emi iJuda mi iKapenahun mani.

Engwafɔ mgbi iYesu kwuba dzatan

⁶⁰ Ngwi a fwo odze ne nghanæ, engwafɔ mgbi iYesu kwuba gbæ, <<Otsootso ne fyumfyæ, li emæ ka gbelan?>>

⁶¹ IYesu ye dafi engwafɔon tole ndandu mi odze neni, o si byi ma gbæ, <<Odze ne nu ema ka dzani taa?

⁶² Kini ema di Ongwæ Inggise ye lu esho mi imbe ngwi o teyi dze ma ema ka gbosine?

⁶³ Onodzi mgbi Imgbasho li nu oshishe; mfyæ mgbi inggise owamyæ dze yi oyabo ba duudu. Elodze ngwi ani gbo nya ema ntonæ li onodzi, a di li oshishe kpaa.

⁶⁴ Nghaduu ema angbeka to ma ngwu noye ye ba.>> Ikyesine iYesu teyi ye mi owita-wita ama ngwu noye ye ba mi idzidze ema, yi ongwu nka wa kyen gya mani.

⁶⁵ O kiyayi gbæ, <<Li ungwæ ngwi ani nya ema gbæ inggise onyi kpaa ka ba mbi ani ba se Otsani nun ofe ma aani.>>

⁶⁶ Wita mi ono na emi ongwafɔon kwuba kyata iyikpa di kyedon wuba.

⁶⁷ Nghane iYesu byi engwafɔ mgban iwyodefa ntona gbæ, <<Ema kpaa i mina ema odzata anii?>>

⁶⁸ ISaimon iPyita nu uka gbæ, <<Otse li mbi emæ eyi ka ke? Abu dze yi elodze mgbi oshishe ogyegwu.

⁶⁹ Eyi noye ye di ye gbæ abu li iKrestu, ongwæ Imgbasho oshishe.>>

⁷⁰ Ne iYesu gbæ, <<Ani sadu ema ngwi iwyodefa baa? Nghaduu onyi mbi ema li olodu!>>

⁷¹ (O gbodze mgbi iJuda ongwæ Iskaroti, ikyesine ngwi o li onyi mbi ongwafɔon ne kpaa, o ka wa kye ongwu gya.)

7

Emi ongwunɔ iYesu nun oye ye ba

¹ Ngwi ungwone wa nye ne, iYesu kaka iJudia ba kpaa lu le kyikyē mi iGalalia, ikyekyē ama ogbe emi iJuda teyi le pita ofe okyelun oshishe.

² Nghaduu ngwi oga iTabenako mgbi emi iJuda wa dze kwekwē ne,

³ emi ongwuno iYesu nyan gbēe, <<I wogyo ngwi abu ka dzata imbe ne lu iJudia adzi ni emi ongwafō abu nu ma di ungwō ama okwulewo ngwi abu li kyo ntoneni.

⁴ Inggise nmina gbēe ni inggise yon, li kyungwō mi odaada ba. Ngwi abu le kyungwō ntonē wa ne, kye ewabu tso ni ese di.>>

⁵ Lubana emi ongwunon kpaa nun oyeye ba.

⁶ Ikyenghanē iYesu nya ma gbēe, <<Ono mgbi ani yeye ma gyo waba; mbi ema yo alono duu le yeye.

⁷ Eše ka di ema tanyi ba, kpaa ani yo i din tanyi, ikyekyē ani kyo obwendē gbēe ungwō ngwi o le kyo li ibwubwe.

⁸ Ema kē oga na. Ani le kē oga ne waba ikyekyē ono mgbi ani yeye ma gyo waba.>>

⁹ Ngwi iYesu gbodze ne ne, o tila dze iGalalia.

¹⁰ Nghaduukpaa, ngwi emi ongwunon lu oga neman, ongwu kpaa wa kē. O kē mi ododa ba, kpaa mi odaada.

¹¹ Mi oga na ma, emi iJuda tole ndinan dile byita gbēe, <<O kō?>>

¹² Ibyi inggise ntona tole ndandu kpatse mi ikye mgbi iYesu, angbeka gbēe, <<O li inggise osuse.>> Angbeka nu uka gbēe, <<Ei o le kpagya inggise wo.>>

¹³ Nghaduu inggise gbodze mgban mi ododa ba ikyekyē a le mio emi iJuda.

IYesu tsungwō mi oga

¹⁴ Ono ngwi oga to idzidze ma se, iYesu wa kē ozu okwukwo osunu Imgbasho mi iJerosalin ka wita ungwō otsootso.

¹⁵ I kwulu emi iJuda ntona ewo man a byita gbēe, <<Kysine ngwi inggise ne ye ungwō kpakpa, ma ngwi inggise onyi kpaa tson ba?>>

¹⁶ IYesu nu uka gbēe, <<Otsootso ne li mgbi ani ba. Kye mbi Ongwu ndo ani eso mani.

¹⁷ Ali inggise ngwu i minan okyo itukwu mgbi Imgbasho ka fya oye kana otsootso ne kye mbi Imgbasho naadi li mgbi ikyibani.

¹⁸ Inggise nli gbodze mgbi ibon li kyo ngya ikye otu mmwe mgbi ewon, kpaa inggise nkyido mi ikye mmwe mgbi ongwu ndon eso ma yo li inggise oyeye; atsika onyi dze mi odze mgban ba.

¹⁹ IMose nose kye ola nu ema baa? Nghaduu inggise mgbi ema onyonyi kpaa kyo mi ele ba. Kylene ngwi ema le fya ongwō ani?>>

²⁰ Inggise ntona gbēe, <<Eše dō abu ikye. Li eme le fya ongwō abu?>>

²¹ IYesu nya ma gbēe, <<Ani kyungwō okwulewo onyi kpata, man i kwulu ema duu ewo.

²² Nghaduu, iMose nu ema ola okyiikyē (kpaa li mbi iMose ngwi ola na tō ba, li mbi emi otsikyema), ema li kye ongwē ikye mi egbe otonyewo.

²³ Kini a ka kye ongwē ikye mi egbe otonyewo ikye ofoola mgbi iMose ba waali, kysine ngwi ema le kyitingga yi ani gbēe di ani ngyelu inggise ololo ootse mi egbe otonyewo?

²⁴ Ka gbiikwō mi ungwō ngwi ema di ma kyoon ba, gbiikwō mi ungwō nli emyemye mani.>>

Li iKrestu ma dēen?

²⁵ Mi ono na ma inggise angbeka mi iJerosalin wita obyī ewoma gbēe, <<Nene li ongyulu ngwu a le fya ongwōn ma lo?

²⁶ O dze mmene, le gbodze mi ododa ma a le kwondo won ba, ama ogbe eyi teyi difwi gbēe o li iKrestu ma waa?

²⁷ Kpaa eyi ye imbe ngwi inggise ne tōkye; ono ngwi iKrestu ma wa ba yo, inggise onyi ka ye imbe ngwi o tōkye ba.>>

²⁸ Ta ngwi iYesu kale tso mi ozu okwukwo osunu Imgbasho ne, o gbo mi ela okwukwo gbēe, <<Een, ema ye ani, ema di ye imbe ngwi ani kye mani. Ani dze mmene ikyibani ba, ongwu ndo ani eso ma li otsitsi. Ema yon ba,

²⁹ nghaduu ani yon ikyekyē ani kye mbon o di dō ani eso.>>

³⁰ Ne a fya obwan, kpaa inggise onyi yagba okye abo gbon ba ikyekyē ono mgban gyo waba.

³¹ Inggise kwuba mi ifu ibyi kye oyeye onuunu mgbi ama byi mbon kpō. A gbēe, <<Ni iKrestu ma wa ba yo, o ka kyo ambe ama nghao kwulewo ngya inggise nee?>>

³² Dafi emi iFarasi fwo ibyi inggise tole ndandu mi ungwō ntonē mi ikpewo iYesu ne, engyukwo ama ofife beyi emi iFarasi dō ama ongyo ozu okwukwo osunu Imgbasho mi iJerosalin gbēe nu ma ka bwa iYesu.

³³ IYesu gbēe, <<Ani ka dze yi ema ongwōn gwee ta, man N ka ye lu mbi Ongwu ndo ani eso mani.

³⁴ Ema ka pita ani, kpaa ema ka tu ani ba; imbe ngwi ani dze kpaa ema ka kē gbe ba.>>

³⁵ Emi iJuda ntona gbo yi ewoma gbēe, <<Li mi ole ngwi inggise ne weka olu ngwi eyi ka din ba? O ka lu imbe ngwi emideyi ganya to mi idzidze emi iGriki ma, dika tso emi iGriki?>>

³⁶ Oweka mgban sine ngwi o gbēe, <Ema ka pita ani, kpaa ema ka tu ani ba, ma imbe ngwi ani dze ema dika ba?>>

³⁷ Mi egbe ongwí olẹlẹ beyi egbe ingblimo mi oga na ma iYesu dzekunto, di gbo mi ela okwukwo gbẹẹ, <<Ni ekweni kwu inggise yọ, non ba wa wa mbi ani.

³⁸ Ali inggise nnu ani oyeye dafi Afe gbo ma, ifogbe mgbi eni oshishe ka fe to mbon.>>

³⁹ Mi odze ne iYesu kye ine byi Onodzi Osaan ngwi ama nnu ongwu oyeye ka wa gbẹ mani. Nghataa ba onọ na a kye Onodzi ma nu waba, ikyekye iYesu kaka okwokwo oshewo mgban ma waba.

⁴⁰ Ono ngwi ibyi inggise ntona fwo odze ngwi o gbo ne angbeka gbẹẹ, <<Otsitsi-otsitsi, inggise ne li Oyegbo mani.>>

⁴¹ Angbeka gbẹẹ, <<O li iKrestu mani.>>

Angbeka di byita gbẹẹ, <<IKrestu ka to mi iGalalia sinẹ?

⁴² Afe gbẹẹ iKrestu ka to mi eto mgbi iDewedi mi iBetlehen, ogalu ngwi iDewedi dze bawẹ?>>

⁴³ Itodze neta inggise ntona si gha ikye iYesu.

⁴⁴ Angbeka mina obwan, nghaduu inggise onyi kye abo gbon ewo ba.

Oyeye onuunu ba mgbi engyukwo emi ifuda

⁴⁵ Onyeeengye yọ ama ongyo ozu okwukwo osunu Imgbasho mi iJerosalin yido ke mbi engyukwo ama ofife yi emi iFarasi, a byi ama ongyoongyo ntona gbẹẹ, <<Kyone ngwi ema kye iYesu ba mmene ba?>>

⁴⁶ Ama ongyoongyo ntona nu uka gbẹẹ, <<Inggise onyonyi yama gbodze dafi ngwi inggise ne gbo ye ba.>>

⁴⁷ Emi iFarasi byi ma gbẹẹ, <<Ema tso gbẹẹ, ema kpaa o kpagya ema woo?>>

⁴⁸ <<Ama ogbe inggise teyi hona emi iFarasi onyi nun oyeye yee?

⁴⁹ Ei! Kpaa ibyi inggise ama n ye unkonyi mi ola mgbi iMose ba ntona, ikamba dze ikye ma.>>

⁵⁰ INikodemu, nteyi ke mbi iYesu, di li onyi mboma ma byita gbẹẹ,

⁵¹ <<Ola mgbi eyi noofe gbẹẹ ni eyi fwo mbi inggise ba ta ngwon ikwo?>>

⁵² A si nun uka gbẹẹ, <<Abu kpaa kye iGalalia? Tsewe mi ele, ta abu ka difwi gbẹẹ oyegbo li to mi iGalalia ba.>>

[

⁵³ Ta ali inggise duu lu ude mgban.]

8

Ongyaa ngwu a bwan mi amah

[¹ Ta iYesu lu Unggwọ Olivi.

² Tegblifan mi egbegbe ototu ne, o diye lu ozu okwukwo osunu Imgbasho mi iJerosalin nani, inggise duu kwakye kpakili won, man o si sise otso ma.

³ Etsetse mgbi ola mgbi iMose beyi emi iFarasi kye ongyaa ngwu a bwan mi amah ba. A non dzekunto mi ine ibyi ntona

⁴ si nya iYesu gbẹẹ, <<Otsetse, a bwa ongyaa ne le kyo amah.

⁵ Mi ola ma iMose nu eyi ofe otsengwo ito ongyaa ne mi akwutse, ma abu gbo dikye?>>

⁶ A tole byun ita ne ikye okyan ukya di tu itodze okye abo byi ele.

Kpaa iYesu klẹse wita olo ungwọ mi ese mi ongwufabo mgban.

⁷ Dafi a kiyayi obyun ita ne, o kyile ikye esho si nya ma gbẹẹ, <<Ni inggise onyi mi idzidze ema kyungwo obube ye bayo, otsungwo no li ababo otsan ikwutse.>>

⁸ O diye klẹse wita olo ungwọ mi ese.

⁹ Mi odze ne, ama nfwo ma wita olu onyonyi, ama nli engyukwo ma teyi, nghataa wa sisi iYesu yi ongyaa na ka kwuzunto mi imbe nani.

¹⁰ IYesu kyile ikye esho byi ongyaa na gbẹẹ, <<Ongyaa, a ko? Inggise onyi kpaa sisi onu abu obube wulo?>>

¹¹ O gbẹẹ, <<Onyi kpaa ba, ongyukwo.>>

IYesu si gbẹẹ, <<Ngyese, ani kpaa nu abu obube ba. Lu kpaa ka kyo alobube wuba.>>*]

IYesu li osa mgbi ese

¹² IYesu di gbodze yi inggise ntoneni, o gbẹẹ, <<Ani li osa mgbi ese. Ali inggise nkyedo ani yọ o ka yama kyikye mi iifu ba, kpaa o ka dze yi osa mgbi oshishe.>>

¹³ Emi iFarasi si kwun shanye gbẹẹ, <<Abu kwudze mmene le kyo ewabu obwende; obwende mgbi abu wuuta ba.>>

¹⁴ IYesu si nya ma gbẹẹ, <<Ni Ani kyo ewani obwende kpaa, obwende mgbi Ani wuuta, ikyekye Ani ye imbe ngwi Ani tokye beyi imbe ngwi Ani le ke mani. Nghaduu ema dze yi ozoyeye mi imbe ngwi Ani tokye hona le ke ba.

¹⁵ Ema li fwiokwo mi odzeedze mgbi inggise owamye; kpaa Ani li fwo inggise onyi ikwo ba.

¹⁶ Ma ni ani gbiikwo yọ, ikwo ogboogbo mgbi ani ka li ayin, ikyesine ani dze yuen ba. Ani dze yi Otsani, ongwu ndo ani eso mani.

¹⁷ Mi ola mgbi ema ma a lo gbẹẹ obwende mgbi inggise efa li wuuta.

¹⁸ Ani li ongwu nkyo ewani obwende; obwende mgbi ani oka li Otsani, ongwu ndo ani eso mani.>>

¹⁹ A si byi iYesu gbẹẹ, <<Otsabu ko?>>

IYesu nu ma uka gbẹẹ, <<Ema ye ani hona Otsani ba. Ema ki ye ani yọ, i kika ye Otsani kpaa.>>

* 8:11 8:11 Ololọ emi tugbe angbeka sulu ambulu ne ba: 7:53–8:11.

²⁰ IYesu gɔdɔɔ ntonɛ mi onɔ ngwi o le tsungwɔ mi akangga ozu okwukwo osunu Imgbasho mi iJerosalin kwɛkwɛ yi imbe ngwi a li kye umba wokɛ nani. Nghaduu inggise onyi bwan ba, ikyekye onɔ mgban gyɔ waba.

²¹ Akpe oka nɛ, iYesu di nya ma gbɛɛ, <<Ani le lu, ma ema ka pita ani, i dika kwulu mi alobube mgbi ema. Imbe ngwi ani le lu ma, ema ka yagba kɛ ba.>>

²² Odɛ nɛ nu emi iJuda ntona byita gbɛɛ, <<O ka ngwɔ ewoon? Li ungwɔ ma ngwi o gbɛɛ, <Imbe ngwi ani le lu ma ema ka ba gbɛ ba daa?>>

²³ Nghaduu iYesu kiyayi gbɛɛ, <<Ema kye mi esɛ; ani kye mi esho. Ema li emi esɛ nɛni; ani li emi esɛ nɛ ba.

²⁴ Ani teyi nya ema gbɛɛ ema ka kwulu mi ali ibwubwe mgbi ema; kini ema noyɛɛ gbɛɛ ani li ongwu ani gbɛɛ ani dɛ ma bayɔ, ema ka kwulu otsitsi mi ali ibwubwe mgbi ema.>>

²⁵ A byun gbɛɛ, <<Abu li emɛ?>>

IYesu nu uka gbɛɛ, <<Ani li ito inggise ngwu ani teyi nya ema gbɛɛ ani dɛɛ mani.

²⁶ Ani dɛɛ yi odɛ kpakpa ofwo ema ikwɔ mi ele. Kpaa ongwu ndo ani esɔ ma li otsitsi, odɛ ngwi ani fwo mbon ma n li kye nya esɛ.>>

²⁷ A yagba difwi gbɛɛ o le nya ma odɛ mgbi Otson ba.

²⁸ Nghane iYesu nya ma gbɛɛ, <<Onɔ ngwi ema kyile Ongwɛ Inggise desho mata, ema ka ye gbɛɛ Ani li inggise ngwu ani tso gbɛɛ di Ani dɛɛ mani. Ani dika kyɔ unkonyi mgbi ikyibani ba kpaa Ani li gbo ungwɔ ngwi Otsani tso Ani ma yɛɛ.

²⁹ Ongwu ndo ani esɔ ma dɛɛ yi ani; o dzata ani yuen ba, ikyɛsine Ani li kyungwɔ nli kpan alono duu.>>

³⁰ Ngwi o gbo elodɛ ntonɛnɛ, inggise kwuba nun oyɛɛ.

Otsitsi ka she abu adi ta

³¹ Mbi emi iJuda ama nnun oyɛɛ ma, iYesu gbɛɛ, <<Ni ema kwudɛ mi otsootso mgbi ani yɔ, ema li ama okyɛdɔ ani yɛɛ.

³² Ema ka ye otsitsi, ta otsitsi ka she ema adi ta.>>

³³ A nun uka gbɛɛ, <<Eyi li eto mgbi Abraham, eyi li ofyɛɛ mgbi inggise onyi ye ba. Kyɔsine ngwi abu dika gbɛɛ a ka she eyi adi ta?>>

³⁴ IYesu gbɛɛ, <<N nya ema otsitsi, inggise nle kyɔ alobube tayo li ofyɛɛ mgbi alobube.

³⁵ Ofyɛɛ dɛɛ yi imbe igyegwu mi eto ba, kpaa ongwɛ li mgbi eto gyegwu.

³⁶ Nghane ni ongwɛ she ema adi ta yɔ, ema ka sheta otsitsi.

³⁷ Ani ye ema li eto mgbi Abraham. Nghaduu ema wewo ongwɔ ani, ikyekye elodɛ mgbi ani wodɛ itukwu mbi ema ba.

³⁸ Ani le nya ema ungwɔ ngwi ani di mi inai Otsani, ema di li kyungwɔ ngwi ema fwo mbi otsema mani.>>

³⁹ A nyan gbɛɛ, <<Abraham li otseyi.>>

IYesu gbɛɛ, <<Ni ema ki li emi ongwɛ Abraham yɔ, ema kile kyungwɔ ngwi Abraham kyɔ mani.

⁴⁰ Ngwi i dɛɛ nɛ, ema weka ongwɔ ani, ikyegbɛɛ ani nya ema otsitsi ngwi ani fwo mbi Imgbasho mani. Abraham kyɔ ito ungwɔ ntonɛ ba.

⁴¹ Ema le kyungwɔ ama ngwi otsema teyi kyɔn mani.>>

A gbɛɛ, <<Eyi li ofyɛɛ ba. Otsɔ ngwi eyi dzɛyan li Imgbasho abuon.>>

Emi ongwɛ Owape olodu

⁴² IYesu nya ma gbɛɛ, <<Ni Imgbasho ki li Otsema yɔ, ani kika kpema itukwu, ikyɛsine ani kye mbi Imgbasho badɛ mmɛnɛ onɛnɛ aani. Ani ba mgbi ikyibani ba; kpaa li ongwu do ani esɔ.

⁴³ Kyɔsine ngwi ema le difwi odɛ ngwi ani le gbo ba? Li ikyegbɛɛ ema le gbela odɛ ngwi ani le gbo ba mani.

⁴⁴ Ema li mgbi otsema, Olodu, di mina ema okyɔ oweka mgbi otsema. O li inggise ogbongwɔ inggise mi owita-wita ma jo, o kwudɛ mi otsitsi ba, bana otsitsi dɛɛ mbon ma ba. Mi onɔ ngwi o mwonya ma, o li gbodɛ mi odɛɛdɛ mgban, bana o li inggise omwonya di li otɛ mgbi onya omwaamwa.

⁴⁵ Nghaduu ikyegbɛɛ ani nya ema otsitsi nɛ, ema nu ani oyɛɛ ba!

⁴⁶ Inggise mgbi ema onyi ka yagba tso abɔ mi obube mgbi ani wɛ? Ni ani le nya ema otsitsi ma, i kyɔsine ngwi ema nu ani oyɛɛ ba?

⁴⁷ Ongwu nli mgbi Imgbasho li fwon. Itodɛ ngwi ema li fwo ba ma li ikyegbɛɛ ema li mgbi Imgbasho ba.>>

IYesu yi Abraham

⁴⁸ A byi iYesu gbɛɛ, <<Eyi gbo ayin mi ogbɛɛ abu li inggise iSamaria esɛ di do abu ikye ba naadi?>>

⁴⁹ IYesu gbɛɛ, <<Esɛ do ani ikye ba, kpaa Ani nu Otsani mmwe nghaduu ema nu ani mmwe ba.

⁵⁰ Ani le pita okwɔkwɔ mi ikye ewen ba; kpaa inggise dzɛma ngwu pita, di li ongwu li ongye ogbiikwɔ aali.

⁵¹ N nya ema otsitsi, kini inggise ngwo elodɛ mgbi ani yɔ, o ka di ikwongye ine ba.>>

⁵² Mi ikye odɛ nɛ emi iJuda ntonɛ kwulu ela gbɛɛ, <<Onɛnɛ eyi ye gbɛɛ esɛ do abu ikye otsitsi! Abraham kwulu, li nga ngwi ama ogbɛɛ kpaa kwulu aali, nghaduu abu gbɛɛ ni inggise ngwo elodɛ mgbi abu yɔ, o ka di ikwongye ine ba.

⁵³ Abu shewo nga otseyi Abraham? O kwulu, li nga ngwi ama ogbese kpaa kwulu aali. Abu tsewe di abu li eme?>>

⁵⁴ IYesu nu uka gbee, <<Ni Ani nu ewani okwokwo yo, okwokwo mgbi ani na wuuta ba. Otsani, ongwu ema li gbee o li Imgbasho mgbi ema na, li ongwu nu ani okwokwo aali.

⁵⁵ Ema yen ba, kpaa Ani yen. Kini Ani gbee di Ani yen bayo, n ka li inggise omwonya dafi ema mani, nghaduu Ani yen di ngyo elodze mgban.

⁵⁶ Otsema Abraham dze yi atsa mi ewe otsetse odi egbe obaaba mgbi ani; o di egbe na diye dze yi atsa.>>

⁵⁷ Emi iJuda ntona nyan gbee, <<Abu me onova ngwusefa don iwyo kpaa waba, ta abu di Abraham ye!>>

⁵⁸ IYesu si gbee, <<Duuse nu ma mba Abraham yo, ani ple dze!>>

⁵⁹ Mi itodze ne, a sa akwutse gbee a ka tsan, kpaa iYesu kye ewon da, wule tase dzata ikpese mgbi ozu okwukwo osunu Imgbasho mi iJerosalin nani.

9

IYesu kwulu inggise nbine kye ifu ine

¹ Dafi iYesu kyikye le ke neta, o di ongyulo ongwu nbine kye ifu.

² Engwafon byun gbee, <<Otsetse, li eme kyo obube, inggise ne naadi ama omban, ngwi a mban bine kye ifu?>>

³ Ne iYesu gbee, <<Li inggise ne naadi ama omban kyo obube ba, kpaa ungwone kyo ikyegbe ido mgbi Imgbasho no tso ambe mi oshishe mgban.

⁴ Dafi ono ka desho ne, li kyeme ngwi eyi ka kyido mgbi Ongwu ndo ani eso nani. Otu kyema, ngwi inggise onyi ka kyido wuba.

⁵ Ngwi Ani ka dze ese ne ne, Ani li osa mgbi ese.>>

⁶ Ngwi o gbodze ne nga ne, o kyanggwɔ tokese, o bwili ekye mi anggwɔ si kye gyuwu ongyulo na ine. ⁷ O nyan gbee, <<Lu, ka ngwune mi uta mgbi iSilon>> (ita iyi ne gbee deeso). Neta ongyulo na lu ka ngwune, si ye luba ude le dine.

⁸ Ama nwatse ude don beyi ama nteyi li din le bibo ma byita gbee, <<Nene li ongyulo nli teyi so le bibo ne lo?>>

⁹ Angbeka gbogbee, li ongwu.

Angbeka gbee, <<Ei, o lun luulu ta.>>

Nghaduu ongwu abuon le kali-kali gbee, <<Li ani ma aani.>>

¹⁰ Ne a byita gbee, <<Kycsinese ine mgbi abu kwulu?>>

¹¹ O nya ma gbee, <<Ongyulo ngwu a kwun di iYesu na bwili ekye kye gyuwu ani ine. O nya ani gbee ni ani lu iSilon ka ngwune. Dafi ani lu ka ngwune netaman, ani si dine.>>

¹² A byun gbee, <<Inggise ma ko?>>

O gbee, <<Ani ye ba.>>

Emi iFarasi kya mi odze ine okwulu-kwulu nani

¹³ A kye ongyulo nbine na ba mbi emi iFarasi.

¹⁴ Egbe ngwi iYesu bwili ekye kwulu ongyulo na ine ma, li egbe otonyewo.

¹⁵ Nghane emi iFarasi kpaa di byun ita dafi i kyo se ngwi ine mgban kwulu mani. Inggise na nu uka gbee, <<O bwili ekye kye gyuwu ani ine, ani ka ngwune taman n sile di aani.>>

¹⁶ Emi iFarasi angbeka gbee, <<Inggise ne kye mbi Imgbasho ba, bana o we egbe otonyewo ba.>>

Nghaduu angbeka byita gbee, <<Kycnese inggise alobube ka kyo ambe okwulewo nga?>> Ikyenghane a si gheefa.

¹⁷ Mi ongyeengye ma a diye kyata byi inggise obine na gbee, <<Abu ma, o gbosine ikpewon? Li ine mgbi abu ngwi o kwulu.>>

Inggise na nu uka gbee, <<O li oyegbo.>>

¹⁸ Emi iJuda noyeye gbee di inggise na teyi bine se ine wa kwulu lon ba, mbise ngwi a deso mbi ama omban.

¹⁹ A byita gbee, <<Nene li ongwɛ emaa? Li ongwu ema gbee di a mban bine kye ifu ma deen? Kycnese ngwi o le di onene?>>

²⁰ Ama omban nu uka gbee, <<Eyi ye o li ongwɛ eyi, eyi di ye o bine kye ifu.

²¹ Nghaduu eyi ye dafi i kyo se o le dine onene ba, naadi eyi ye inggise nkwalun ine ba. Byun na. O li ongbɛ wuba; o ka gbodze ikye ewon.>>

²² Ama omban gbodze ne ikyekye a le mio emi iJuda, bana emi iJuda teyi bwalu ondu gbee inggise ta nnoyeye gbee iYesu li iKrestu yo, a ka dulun to mi ozu okwakye mgbi emi iJuda.

²³ Li ikyengha ngwi ama omban gbogbee, <<O li ongbɛ wuba; byun na aali.>>

²⁴ Akpe ongwu fan, a kwu inggise nteyi bine kye ifu na ela. A gbee, <<Kye oshewo nu Imgbasho, eyi ye inggise ne li inggise alobube.>>

²⁵ O si nu uka gbee, <<Kini o li inggise alobube hona o li inggise alobube ba kpaa, ani ye ba. Ungwɔ onyi ngwi ani ye yo. Ani teyi bine, kpaa onene ani le di!>>

²⁶ Nghane a byun gbee, <<O kycsine yi abu? O kwulu abu ine sine?>>

²⁷ O gbee, <<Ani teyi nya ema kpaa ema gado ba. Li alungwɔ mina ema odi fwo? Ema mina oyɛ engwafon naadi?>>

²⁸ Ta a wulun ito di gbee, <<Abu li ongwafɔ mgbi inggise nani! Eyi yo, eyi li engwafɔ mgbi iMose!

²⁹ Eyi ye gbee Imgbasho gbodze yi iMose, kpaa inggise ne yo, eyi yama ye imbe ngwi o tokye kpaa ba.>>

³⁰ Ongyulo na nu uka gbɛɛ, <<Ungwone li ungwo okwulewo! Dafi ema ye imbe ngwi o tɔkye ba, kpaa o kwulu ani ine neni.

³¹ Eyi ye dafi Imgbasho li fwo odze mgbi emi ali ibwubwe ba mani. O li fwo odze mgbi inggise oyeye ongwu nle kyo oweka mgban.

³² Kye ono ngwi a ta ese nghataa ba oneneni, inggise onyi kpaa fwo gbɛɛ a kwulu inggise ongwu nbine kye ifu ine ye ba.

³³ Ongyulo ne ki kye mbi Imgbasho bayo, o ki kyo unkonyi gbɛ ba.>>

³⁴ Mi elodze ne a nu uka gbɛɛ, <<A mba abu yi alobube kye ifu; kyone ngwi abu le tso eyi!>> Man a tsamun tase.

Ine obu mi onodzi

³⁵ IYesu si fwo dafi a tsamun tase mani, ngwi o wa tun ne, o gbɛɛ, <<Abu noyeye mbi Ongwe Inggise joo?>>

³⁶ Ongyulo na byita gbɛɛ, <<O li eme, ongyukwo? Nya ani zukwu ni ani wa nun oyeye.>>

³⁷ IYesu si gbɛɛ, <<Onene abu din; mi otsitsi, li ongwu nle gbodze yi abu neni.>>

³⁸ Ongyulo na gbogbɛɛ, <<Otse, ani noyeye,>> man o sunun.

³⁹ IYesu gbɛɛ, <<Ani ba ese ne ikye ikwo ogbɔgbɔ, ikyegbɛɛ obine non di, ama ntolle di ma nu ma ye obine.>>

⁴⁰ Emi iFarasi angbeka nto yan ma fwon le gbo nga neta, a byun gbɛɛ, <<Ekyegbɔ? Eyi kpaa bine?>>

⁴¹ Ne iYesu gbɛɛ, <<Kini ema li obine yo, ema ki gye obube mi alobube ba; kpaa onene ngwi ema le tso gbɛɛ ema le dine ne, alobube mgbi ema ka dze yi ema.

10

Inggise ongyo mmala osuse

¹ <<Mi otsitsi-otsitsi yo, n le nya ema, inggise ongwu nkaka mi onufoka mgbi ifatoba mmala ba, kpaa ka tɔ kaka mi ofe angbeka yo, o li emumyi beyi inggise ofofe.

² Nghaduu inggise nkaka mi onufe li inggise ongyo mmala.

³ Inggise ongyoongyo li kwulu onufoka, mmala li fwo ela mgban. O li kwu mmala mgban ela mi iyi, di li gbe ma tase.

⁴ Mi ono ngwi o gbe ama nli mgban tsatsa tase ma, o li teyi ofe, man mmala mgban di li kyedon, ikyekye a ye ela mgban.

⁵ Kpaa a ka yama kyedon ingyoga ba; otsitsi, a ka tsinyan ikyesine a yagba difwi ela mgbi ingyoga ba.>>

⁶ IYesu gbo itaodze neni, kpaa ungwo ngwi o le nya ma gbosa lo ma ba.

⁷ Nghane iYesu diye gbogbɛɛ, <<N le nya ema otsitsi, ani li onufoka mgbi mmala.

⁸ Ama nteyi ani ba duu li emumyi beyi ama ofofe, nghaduu mmala fwo ma ba.

⁹ Ani li onufe; ali inggise nkaka nye mbi ani yo, o ka watɔ. O ka kaka tase, di tu ungwogyɛ.

¹⁰ Emumyi li ba ikye owa yi di ngwo diye dzili; ani ba gbɛɛ nu ma tu oshishe, di tuun dzii.

¹¹ <<Ani li inggise ongyo mmala osuse mani. Inggise ongyo mmala osuse li kye oshishe mgban lasɛ ikye mmala mgban.

¹² Inggise ngwu a kyon ido ongyo mmala yo, mmala li mgban ba. Nghane ono ngwi o di idukwlebe kye le ba ma, o li dzata mmala ntona tsinya lu. Ta idukwlebe li ba wa kwu mmala di ganya ma.

¹³ Inggise na tsinya ikyekye o li inggise ngwu a kyon kyeekye ido ta unkonyi won yi mmala ntona ba.

¹⁴ <<Ani li inggise ongyo ifyungwo osuse; ani ye mmala mgbi ani, mmala mgbi ani kpaa ye ani.

¹⁵ Dafi Otsani ye Ani, Ani kpaa di ye Otsani mani, Ani di kye oshishe mgbi Ani nu mi ikye mmala.

¹⁶ Ani dze yi mmala angbeka ama nwoto ifatoba yi ama ntonɛ ba. Ama kpaa li kyeme ngwi ani ka gbe ma ba. Ama kpaa ka fwo ela mgbi ani dika ye obyi ifyungwo onyi yi inggise ongyo ifyungwo onyi.

¹⁷ Itodze ngwi Ani kpa Otsani itukwu yo, li ikyegbɛɛ Ani kye oshishe mgbi Ani nu, ikye odi yido kyi kyelu.

¹⁸ Inggise onyi kpaa ka yagba gbɛ Ani oshishe ba, Ani ka kye nu abuani. Ani dze yi mfyɛ okye nu di dze yi mfyɛ okyi kyelu. Ola ne Ani gbɛ mbi Otsani.>>

¹⁹ Mi ikye elodze ntonɛ, emi iJuda di dze yi ogbua-gbua yi ewoma.

²⁰ Ama kwuba gbɛɛ, <<Ese don ikye o dile wede. Kyone ngwi eyi le gado mbon?>>

²¹ Nghaduu angbeka gbɛɛ, <<Elodze ntonɛ li mgbi inggise ngwu ese don ikye ba. Emese ka yagba kwulu obine ine gbɛɛ?>>

Emi iJuda fwa iYesu

²² Li ono oga owe-we mgbi okye ozu okwukwo osunu Imgbasho mi iJerosalin dubo Imgbasho. Li mi ono ofu,

²³ ne iYesu le kyikye mi akangga ozu okwukwo osunu Imgbasho mi iJerosalin, mi iwulu onufozo mgbi iSolomu nani.

²⁴ Emi iJuda kwakye kpakeke won, le gbɛɛ, <<Ka kye ono sine ngwi abu kale tsili eyi nga? Kini abu li iKrestu ma yo, nya eyi mi ododa.>>

²⁵ IYesu gbɛɛ, <<Ani nya ema, kpaa ema noyeye ba. Ungwo ama okwulewo ngwi Ani kyo mi iyi mgbi Otsani ne, gbo odzeedze mgbi ani,

²⁶ nghaduu ema noyeye ba ikyekye ema li mmala mgbi ani ba.

²⁷ Mmala mgbi ani li fwo ela mgbi ani; ani ye ma, a di li kyedo ani.

²⁸ Ani nu ma oshishe gyegwu, a dika dzili wuba; inggise onyi kpaa dika lafwa ma mi abo mgbi ani ba.

²⁹ Otsani, nkye ma do ani ubo ma, shewo ngha ali inggise duu; inggise onyi kpaa ka lafwa ma mi abo mgbi Otsani ba.

³⁰ Ani yi Otsani eyi li onyi.>>

³¹ Emi iJuda di kye akwutse gbɛɛ a ka tsan,

³² nghaduu iYesu gbɛɛ, <<Ani tso ema ungwo okwulewo ama nshewo kwuba mbi Otsani. Li ikye ole mi efu ngwi ema ka tse ani akwutse?>>

³³ Emi iJuda gbɛɛ, <<Eyi le tse abu akwutse mi ikye ungwo ntone onyi kpaa ba, li mi ikye ito ofya Imgbasho, ikyesine abu nli inggise owamyɛ nɛ, le tso gbɛɛ abu li Imgbasho.>>

³⁴ IYesu si nya ma gbɛɛ, <<A lo mi ola mgbi ema gbɛɛ, <Ani gbɛɛ ema li emi imgbasho baa?>

³⁵ Ki non kwu ma di emi imgbasho ma, li mbi ele ngwi elodze Imgbasho ba, ngwi Afe ka yagba nyine ba.

³⁶ Ongwu Otson dudu-dudu dafi li mgban abuan di kye deso ba ese nɛ maye? Kyosine ngwi ema dudu ongwfabo mbi Ani gbɛɛ Ani le fyito ikyekye ani gbɛɛ, <Ani li Ongwe Imgbasho?>

³⁷ Ni Ani le kyido mgbi Otsani bayo, ka nu ani oyeye ba na.

³⁸ Kpaa ni ani le kyo yo, ni ema nu ani oyeye ba kpaa, nu ido okwulewo ntona oyeye na, ikye ni ema ye diye difwi dafi Otsani dize mbi ani, ani kpaa di dze mbi Otsani mani.>>

³⁹ A di fya obwan, nghaduu o dzidze to mi abo ma lu.

⁴⁰ Ta iYesu yido foyombo iJodan lu imbe ngwi iJon teyi le kyo iBatisima ababo mani. O ka dzeke ele.

⁴¹ Inggise di ba mbon kpakpa. A gbɛɛ, <<iJon kyo ambe okwulewo onyi ba, kpaa alungwo ngwi iJon gbo mi ikye ongyulo nɛ duu li otsitsi.>>

⁴² Inggise kwuba si nu iYesu oyeye mi imbe nani.

11

Ikwu iLadzar

¹ Onene inggise ngwu a li kwun di iLadzar dotse. O kye mi iBetani, mi agwo mgbi iMeri beyi ongwunon iMata.

² iMeri nɛ, li ongwu ongwunon iLadzar onene ladze ese mi ootse aani, di li ongwu kpoo ka wa kye engyie ogbungbe kyi iYesu afo di kye folu mi otu mgban.

³ Nghane emi ongwunon engyaa deeso mbi iYesu gbɛɛ, <<Otse, ongwu nkpaabu itukwu na dotse.>>

⁴ Mi onɔ ngwi iYesu fwo ungwone mata, o gbogbɛɛ, <<Ootse nɛ ka ngye mi ikwongye ba. Ei, li mi ikye okwoko mgbi Imgbasho adzi ni Ongwe Imgbasho tu okwoko mi ele.>>

⁵ IYesu di iMata yi ongwunon ongwu ongyaa beyi iLadzar kpan itukwu.

⁶ Nghaduu, ngwi o fwo gbɛɛ iLadzar dotse nɛ, o diye dze imbe ngwi o dze na egbe efa kpoo.

⁷ Ta o nya engwafoon gbɛɛ, <<Yido ke iJudia na.>>

⁸ A gbɛɛ, <<Otsetse, li enggeengga ngwi emi iJuda fya otse abu akwutse, nghane abu diye le ke imbe naa?>>

⁹ IYesu gbɛɛ, <<Obyi li iwyodefa mi egbe baa? Inggise nkyikye mi onɔ ka tsiishi ba, ikyekye o li di osa ongwɛ ese neni.

¹⁰ Li mi onɔ ngwi o kyikye mi otu mata ngwi o li tsiishi, ikyekye osa dze ba.>>

¹¹ Ngwi o gbodze nɛ nye nɛ, o kiyayi onya ma gbɛɛ, <<Okeyi iLadzar nuna, kpaa n le ke ele oka kyilen una.>>

¹² Engwafoon nu uka gbɛɛ, <<Otse, ki non nuna yo, o ka tu iyu.>>

¹³ IYesu le gbodze ikwu mgbi iLadzar, kpaa engwafoon tsewe gbɛɛ o le gbodze una onana mgbi atta neni.

¹⁴ Neta o si nya ma mi ododa gbɛɛ, <<iLadzar kwulu,

¹⁵ ma mi ikye mgbi ema yo, ani dze yi atsa dafi ngwi ani dze ele ba mani, ikyegbe ni ema noyeye. Nghaduu i ke ka din na.>>

¹⁶ Nɛ iTomosu (ngwu a li kwun gbɛɛ ongwe efa na), nya engwafu mgbi iYesu angbeka ntona gbɛɛ, <<Ba ni eyi kpaa ke na, adzi ni eyi ka kwulu biyan.>>

IYesu gyila emi ongwunon engyaa

¹⁷ IYesu ka kaka, dafi a kye iLadzar ndzi me egbe ene wa.

¹⁸ Okyee mi iJerusalem ba iBetani sisi gwee ome imai efa,

¹⁹ emi iJuda kwuba di ba mbi iMata yi iMeri owa gyila ma mi ikwu ongwunon ma.

²⁰ Ngwi iMata fwo dafi iYesu kye neta, o tase oka kpatsan, nghaduu iMeri tila dze ude.

²¹ iMata nya iYesu gbɛɛ, <<Otse, ni abu ki dze mmene yo, ongwunani ki kwulu ba.

²² Nghaduu ani ye gbɛɛ mi onene kpaa Imgbasho ka kyo abu alungwo ngwi abu bo duu.>>

²³ IYesu si nyan gbɛɛ, <<Ongwunabu ka ye kyee.>>

²⁴ iMata gbɛɛ, <<Ani ye o ka ye kyee mi okyee-kyee mi ikwu mi egbe ongwɛ olele mani.>>

²⁵ IYesu gbɛɛ, <<Ani li okyɛɛ-kyɛɛ mi ikwu bɛyi oshishe. Inggise nnu ani oyeye yɔ, o ka dɛɛ oshishe, yeba non kwulu kpaa;

²⁶ ma inggise ta ndɛɛ oshishe di nu ani oyeye ka kwulu ba. Abu noyeye mi odɛɛ nɛ wɛ?>>

²⁷ IMata nyan gbɛɛ, <<Eɛn, Otse, ani noyeye gbɛɛ abu li iMedzaya, Ongwɛ Imgbasho, ongwu nka ba ɛɛ nɛ mani.>>

²⁸ Ngwi o gbɔdɛɛ nɛ nye mata, o yidɔ kwu ongwunon iMeri ela kɛ enggenga gbɛɛ, <<Otsetse dɛɛ mmɛnɛni, o le pita abu.>>

²⁹ Ngwi iMeri fwo ungwɔnɛ nɛ, o kyato vla kɛ mbi iYesu.

³⁰ Mi onɔ na iYesu kaka ogalu na waba, kpaa o ka dɛɛ imbe ngwi iMata ka tun nani.

³¹ Ngwi emi iJuda ama nbato yi iMeri mi ude, le gyilan na, di dafi o kyato vla tase neta, a si kyɛdɔn, tsewe gbɛɛ o le lu endzi ka tsukwu mi ele.

³² Ngwi iMeri ka to imbe ngwi iYesu dɛɛ di din mata, o gbɛɛ lanke iyayi di gbɛɛ, <<Otse, ni abu ki dɛɛ mmɛnɛni yɔ, ongwunani ki kwulu ba.>>

³³ Ngwi iYesu din le tsukwu, yi emi iJuda ama nbato yan ntona kpaa tole tsukwu nɛ, itukwu mu lon mi onodzi i di kakan ewo.

³⁴ O byita gbɛɛ, <<Ema kyon da mi ole?>>

A gbɛɛ, <<Ba wa di, Otse.>>

³⁵ IYesu tsukwu.

³⁶ Ta emi iJuda gbɔgbɛɛ, <<Di dafi o kpan itukwu maa!>>

³⁷ Nghaduu angbeka mi efu gbɛɛ, <<Ongwu nkwulu obine inɛ nɛ kyɔnɛ ngwi o kyi ndɛlu ikwu inggise nɛ wuba?>>

IYesu kyile iLadzaru mi ikwu

³⁸ Dafi itukwu nghao fu-fu lo iYesu nɛ, o kɛ endzi. Li endzi olo ngwi a di kye ikwutse tsukwu ondufan.

³⁹ O gbɛɛ, <<Mulu ikwutse nɛni.>>

IMata, ongwu ongwunon kwulu na gbɛɛ, <<Kpaa, Otse, mi onɛnɛ o ka li odikyi, lubana o la endzi egbe ɛnɛ waani.>>

⁴⁰ Neta iYesu gbɛɛ, <<Ani teyi nya abu gbɛɛ kini abu noyeye yɔ, abu ka di okwɔkwɔ mgbi Imgbasho baa?>>

⁴¹ Ta a kyi mulu ikwutse nani. Nɛ iYesu kyile inɛ esho, si gbɛɛ, <<Otsani, Ani ta abu angba dafi abu fwo (ibo mgbi) ani wa mani.

⁴² Ani ye dafi abu li fwo (ibo mgbi) Ani alonɔ mani, kpaa n le gbɔdɛɛ nɛ mi ikye abo oyaaya mgbi inggise ama nkwudɛɛ to mmɛnɛ nɛni, ikye nu ma noyeye gbɛɛ di abu dɔ ani ɛɛ.>>

⁴³ Ngwi o gbɔdɛɛ nɛ mata, iYesu kwu ela okwukwo gbɛɛ, <<ILadzaru, tase!>>

⁴⁴ Inggise ikwukwo na si tase, yi ayangwuto ngwi a kye ndiwon afɔ yi abo, yi ongwɔ a kye bwan inɛ mani.

Man iYesu nya ma gbɛɛ, <<Shelun angwuto ikwɔ na non lu.>>

A wibu ongwɔ iYesu

⁴⁵ Nɛ emi iJuda ibyibyi ama nba angba ikwu mbi iMeri, di ungwɔ ngwi iYesu kyo netaman, a nun oyeye.

⁴⁶ Nghaduu angbeka mi efu lu mbi emi iFarasi ka dakwɔ ungwɔ ngwi iYesu kyo mani.

⁴⁷ Nɛ okwukwo inggise ama ofife bɛyi emi iFarasi kwu ela okwakye mgbi ɔɔɔɔɔ mgbi ama ogbiikwɔ.

A byita gbɛɛ, <<Li alungwɔ ngwi eyi ka kyo? Inggise nɛ le kyo ambɛ ama okwulewo kwuba.

⁴⁸ Kini eyi dzatan le kiyayi ngha yɔ, ali inggise duu ka wa nun oyeye, nghane emi iRoma ka ba wa kyi gbɛlu imbe mgbi eyi bɛyi ɛɛ mgbi eyi kpaa.>>

⁴⁹ Ta onyi mi ifu ma, iyin di iKayafa, ongwu li okwukwo inggise ofife mi onova nani, nya ma gbɛɛ, <<Ema ye unkonyi ba duu!

⁵⁰ Ema yama difwi gbɛɛ i tatase ni inggise onyi kwulu mi ikye ibyi inggise ngha ogbɛɛ ni ɛɛ mgbi eyi duu dzili ba.>>

⁵¹ Li mi owitukwu mgban ngwi o gbɔdɛɛ nɛ ba, kpaa li dafi o li okwukwo inggise ofife mi onova na mani, o gbɔɔɔɔɔ gbɛɛ iYesu ka kwulu mi ikye ɛɛ mgbi iJuda duu,

⁵² dika li ikye mgbi ɛɛ na ta ba kpaa ka li mi ikye engwɛ mgbi Imgbasho ama nganya ntona mi oyile ma luba mbonyi di nu ma yeɛ onyi.

⁵³ Nɛ i wita mi egbe na lu iyayi, a wibu ongwɔ iYesu.

⁵⁴ Nghane iYesu di kyikye mi ododa mi idzidɛɛ emi iJuda wuba. Kpaa o lu ayɛɛ ndɛɛ kwekwɛ yi okwɛɛ, mi agwɔ ngwi a li kwun di iFren nani, ka dɛɛ efu yi engwafɔɔn.

⁵⁵ Ngwi onɔ oga owɛ owato-wato mgbi emi iJuda dɛɛ kwekwɛ nɛ, inggise kwuba le lu iJerosalin ikye oka fwo ewo duuse ni oga owɛ owato-wato wa gyo.

⁵⁶ A kale pita iYesu, dafi a kwudɛɛ to mi akangga ozu okwukwo osunu Imgbasho mi iJerosalin nɛ, a le byi ewoma gbɛɛ, <<Ema le tsewe sine? O ka ba Oga nɛ ba naadi?>>

⁵⁷ Nghaduu engyukwo ama ofife bɛyi emi iFarasi teyi noola gbɛɛ kini inggise ye imbe ngwi iYesu dɛɛ yɔ, non gbɔ adzi nu ma ka bwan.

12

A kye engyie kyi iYesu mi iBetani

¹ Ngwi oga owɛ owato-wato mgbi emi iJuda sisi egbe egyin nɛ, iYesu si kaka iBetani, imbe ngwi iLadzaru ongwu iYesu kyilon mi ikwu dɛɛ nani.

² A kyo oga ongwɔ onɔdɛɛ ikye mmwe mgbi iYesu mi imbe nani. IMata gbe oga

nu, iLadzaru kpaa sɔdze adinyatse ogye ungwogye yi iYesu.

³ Nɛ iMɛri kyɛ kyelu ikpen engyie ɔlɔlɔ ongwɛ fyunfyumnya saan kye tulu kyɛ iYesu afo. Di kyɛ ɔlu yi otu mgban, man mngbe mgbɛ engyie na kyɛ gbelu ozu sɔ.

⁴ Kpaa engwafɔ mgbɛ iYesu onyi, iJuda Iskaroti ongwɛ nka wa kyon gya ma byita gbɛɛ,

⁵ <<Kyɔsine ngwi a kye engyie nɛ gya kye awuya na gha emi adzɛ ba? I mɛ udza okpa idɔ onova ɔlɔlɔ.>>

⁶ O gbɔdze nɛ ikyegbɛɛ di o kye emi adzɛ wuuta ba, kpaa li ikyegbɛɛ o li emumyi; ngwi o li inggise okye ashiko da nɛ, o li ya ewon abɔ mi ungwɔ ngwi a kye wokɛ ele mani.

⁷ iYesu gbɛɛ, <<Dzanta kɛ. O kye engyie nɛ dzɛkɛ mi ikye egbe owa ndzi ani.

⁸ Ema ka dze yi emi adzɛ mi idzidzɛ ema alɔnɔ duu, kpaa ema ka dze yi ani alɔnɔ ba.>>

⁹ Ibyi inggise emi iJuda difwi gbɛɛ iYesu dze imbe nani man a ba, mi ikyon ta ba kpaa owa di iLadzaru, ongwɛ iYesu kyilon mi ikwongye nani.

¹⁰ Nɛ engyukwo ama ofifɛ mgbɛ Imgbasho dze yi oweka okyi ngwɔlu iLadzaru kpaa,

¹¹ lubana mi ikye mgbɛ iLadzaru emi iJuda kwuba le dzata engyukwo mgbɛ ama ye nu iYesu oyeɛ.

iYesu kaka mi ogliɔ

¹² Tegblifan ibyi inggise kpakpa ama nba oga owe owato-wato mgbɛ emi iJuda fwo gbɛɛ iYesu kye ofɛ dikye le ba iJerosalin nɛ,

¹³ a gbe abaade tase oka tun, le gbaakwo gbɛɛ, <<Osana!

Mse no bɛ inggise ngwu ba

mi iyi mgbɛ Otse ewo!

Mse no bɛ Uto mgbɛ emi Israi ewo!>>

¹⁴ iYesu tu ongwɛ itaklimyi dɔkɛ ele, dafi a teyi lɔ mi afe gbɛɛ,

¹⁵ <<Ka mio ba na, engwengwengyaa mgbɛ iDzayɔn;

dii, uto mgbɛ abu kye aali,

o dɔdze ongwɛ itaklimyi.>>

¹⁶ Mi ababɔ ma engwafɔ mgban difwi ungwɔ ntɔnɛ ba. Li onɔ ngwi a nu iYesu okwɔkwɔ nyɛ ma se, a kuma difwi gbɛɛ ungwɔ ngwi a kyon ntɔnɛ, Afe ple lɔ dze ese ikyon.

¹⁷ Ikyenghanɛ ibyi inggise ama nto yan mi onɔ ngwi o kwu iLadzaru ela tase mi endzi di kyilon mi ikwu ma, kiyayi okye elodze na gbɔfwe.

¹⁸ Ikyegbɛɛ inggise kwuba fwo ambɛ okwulewo ngwi o kyo nɛ, a tase oka tun.

¹⁹ Nɛ emi iFarasi gbɔ yi ewoma gbɛɛ, <<Dii, ungwɔnɛ le kye eyi kɛ mbeka ba. Di dafi ese duu kyedon mani!>>

iYesu gbɔdze ikwu ewon

²⁰ Emi iGriki angbeka kɛ oka sunu mi oga owe owato-wato mgbɛ emi iJuda nani.

²¹ A ba mbi iFyilipi, ongwɛ kye mi iBetsaida mi iGalalia na, yi imina. A gbɛɛ, <<Ongyukwo, i mina eyi odi iYesu.>>

²² iFyilipi si kɛ ka nya Andru; Andru yi iFyilipi diɛ lu ka nya iYesu.

²³ iYesu nu uka gbɛɛ, <<Obyi ngwi Ongwɛ Inggise ka gbɛ okwɔkwɔ ma gyo wa.

²⁴ N nya ema otsitsi, ni inenekwu ngwuta lake ese ma ni i bwa bayɔ, ka li inɛnɛ onyi kpɔɔ; kpaa non bwa yo, ka mba kwuba.

²⁵ Inggise ndi oshishe mgban kpan itukwu yo, oshishe na ka nyanya lon, kpaa ongwɛ ndi oshishe mgban tan anyi mi ese nɛ yo, ka kyon kaka oshishe ogyegwu.

²⁶ Ali inggise nkɔɔ ani idɔ ka kyɛdɔ ani kyɛmɛ; imbe ngwi ani dze ma, ongbidɔ mgbɛ ani kpaa ka dze ele. Otsani ka nu ongwɛ nli kyo ani idɔ ma mmwe.

²⁷ <<Onɛnɛ itukwu mgbɛ Ani dze mi okakewo, ma li alungwɔ ngwi ani ka gbɔ? Nin gbɛɛ, <Otsani, dula Ani tɔ mi obyi nɛ>? Ei, li mi itɔdze nɛ yɛyɛ ngwi Ani kaka obyi nɛ aani.

²⁸ Otsani, kye okwɔkwɔ nu iyi mgbɛ abu! >>

Ta ela tɔ mi esho gbɛɛ, <<N kye okwɔkwɔ nu mi ele wa, ma n dika nun okwɔkwɔ kpɔɔ.>>

²⁹ Ibyi inggise ama nto mmana ma fwo ungwɔ na di gbɛɛ akpala gbo; angbeka gbɛɛ ongyeso gbɔdze yan.

³⁰ iYesu gbɛɛ, <<Ela nɛ ba mi ikye mgbɛ ani ba, kpaa li mi ikye oyabɔ mgbɛ ema.

³¹ Onɛnɛ li onɔ ngwi a ka gbɔ ese nɛ ikwɔ, li onɛnɛ ngwi a ka lɔ ongwuuto ongwɛ ese nɛ onya tɔ.

³² Nghaduu Ani, onɔ ngwi a wa kyile Ani esho mi ese nɛ yo, N ka kwo inggise duu ba mbi ani.>>

³³ O gbɔ ongwɔnɛ ikye otso itɔ ikwu ngwi ongwɛ ka wa kwu mani.

³⁴ Ibyi inggise gbɛɛ, <<Eyi fwo mi Afe gbɛɛ iMedzaya ma ka dze gyeɛgwu, ma kyɛnɛ ngwi abu ka gbɛɛ, <A ka kye Ongwɛ Inggise lu esho kyɛmɛ>? Li emɛ li Ongwɛ Inggise nɛ>>

³⁵ iYesu si nya ma gbɛɛ, <<Ema ka wa tu osa mi ongwɔnɛ mi iyayi. Kyikye mi onɔ ngwi ema ka dze yi osa nɛni, duuse ni otu wa to tu ema. Inggise nli kyikye mi iyifu li ye imbe ngwi o le kɛ ba.

³⁶ Ema noyɛyɛ mi osa ngwi ema ka dzɛyan nɛni, ikye ni ema wa yɛɛ emi ongwɛ osa.>> Ngwi o ngyelu odzɛ ogbɔɔgbɔ mata, o si lu ka da.

Emi iJuda fwa onu iYesu oyeɛ

³⁷ Ambɛ ama okwulewo ngwi iYesu kyo mi inai ma nɛ kpaa, a nun oyeɛyɛ ba.

³⁸ Ungwōne kyo ikye ombwumbwo elodze mgbi oyegbo Adzaya ngbē:

<<Otse, li eme noyeye mi eso mgbi eyi, di li eme ngwu mfye mgbi Otse tso to ododa mbon?>>

³⁹ Li mi itodze ne ngwi a yagba noyeye ba aali, igyena, dafi Adzaya kpaa gbo mbeka ma gbē:

⁴⁰ <<O tukwu ma ine di nu itukwu mgbi ama tiishu, nghane a ka di mi ine mgbi ama wuba, naadi difwi mi itukwu mgbi ama ba, hona kyatitukwu ni ani bwe ma ba.>>

⁴¹ Adzaya gbodze ne ikyekye o di okwōkwō mgbi iYesu di gbodze mi efu.

⁴² Nghaduu mi ono na kpoo angbeka kwuba mi idzidze ama ogbe inggise teyi nun oyeye. Kpaa mi ikye mgbi emi iFarasi a yama gbo oyeye onuunu mgbi ama tase ese ba, ikyesine a le mio gbē a wa dulu ma to mi ozu okwākye mgbi emi iJuda.

⁴³ Lubana a mina otsetse mgbi inggise nga otsetse mgbi Imgbasho.

⁴⁴ IYesu gbo mi ela okwukwo gbē, <<Ni inggise nu ani oyeye yo, li ani ta ngwi o noyeye ba, kpaa o nu ongwu ndo ani eso ma oyeye.

⁴⁵ Inggise ndi ani yo, o di ongwu ndo ani eso mani.

⁴⁶ Ani ba ese ne dafi osa, ikyegbē ali inggise ongwu nu ani oyeye yo non ka dze mi iifu ba.

⁴⁷ <<Mbi inggise ongwu nfwo elodze mgbi ani kpaa ngyo ma bayo, ani gbōn ikwō ba. Bana ani ba owa gbo ese ikwō ba, kpaa owa dulun to.

⁴⁸ Ikwō dze mi ikye mgbi ongwu nfwa ani diye gbē elodze mgbi ani ba mani; elodze ngwi ani gbō na kpoo ka ngwōn ikwō mi egbe ongwī olele.

⁴⁹ Bana ani le gbodze mgbi ikyibani ba, kpaa li Otsani ndo ani eso ma wo ani ola mi ungwō ngwi ani ka gbō yi ito ofe ngwi ani dika gbōn mani.

⁵⁰ Ani ye gbē ola mgban li nu oshishe gyegwu. Nghane alungwō ngwi ani gbō yo le ye ye yi ungwō ngwi Otsani nya ani gbē ni ani gbō mani.>>

13

IYesu sa engwafōon afo

¹ Duuse nu ma wa gye oga owe owatowato mgbi emi iJuda. IYesu ye dafi ono mgban ngye owa dzata ese ne ye lu mbi Otson. Ngwi ama nli mgban kpan itukwu ka to ese ne ne, o si tso ma okpitukwu mgban ngye klekle.

² Dafi a so ungwogye ongwī onode neman, Olodu tu iJuda Iskaroti ongwē iSaimon wo, owa kye iYesu gya.

³ IYesu ye dafi Otson nun mfye mi alungwō duu mani, di ye dafi ongwō kye mbi Imgbasho dile ye lu mbi Imgbasho mani.

⁴ Ne o kyato mi ita ungwogye fwadulu angwuto ongwī ese kye oshata to oshi.

⁵ O kyi mwalu eni woke okye wita le sa emi ongwafōon afo, yile oshata na fwo ma afo.

⁶ O wa to mbi iSaimon iPyita, ongwu nbyun gbē, <<Otse, abu ka sa ani afo?>>

⁷ IYesu nu uka gbē, <<Onene ema yama ye ungwō ngwi ani le kyo ne waba, kpaa ema ka wa ye mi iyayi.>>

⁸ IPyita gbē, <<Ei, o ka yama sa ani afo ba.>>

IYesu gbē, <<Kini ani sa abu afo bayo, abu wo ate yi ani ba.>>

⁹ iSaimon iPyita si gbē, <<Ngyese, Otse, no ka li afo ta ba, sa ani abo yi ikye kpaa!>>

¹⁰ IYesu nu uka gbē, <<Inggise nteyi shuwo yo i wogyo ngwi o ka saafō ta; ikyekye ewo mgban duu teyi le saan wa. Ema le saan, kpaa li ema duu ba.>>

¹¹ Bana iYesu ye otsungwōn nka wa kye ongwu gya mani, li nga ngwi o gbē li ema duu le saan ba aali.

¹² Dafi o sa ma afo ngye ne, o yile angwuto wo ye luba imbe mgban. O si byi ma gbē, <<Ema difwi ungwō ngwi ani kyo yi ema ne we?>>

¹³ <<Ema li kwu ani gbē, <Otsetse> yi <Otse> li ayin ye ye, li ungwō ngwi ani dze aali.

¹⁴ Onene ngwi ani, Otse yi Otsetse mgbi ema, sa ema afo ne, ema kpaa ka ye sa ewema afo nga.

¹⁵ N tso ema ambe nga ikye ni ema kyo dafi ani kyo yi ema neni.

¹⁶ N nya otsitsi ongbido yama dze yi oshewo nga ongyukwo mgban ba, naadi ongyeso nga ongwu ndon eso ma ba.

¹⁷ Ngwi ema ye ungwō ntonene ne, ema ka tu mse kini ema kyo ma yo.

IYesu ple gbo dafi a ka wa kye ongwu gya mani

¹⁸ <<N yama le gbo yi ema duu ba; n ye ama ani sadu mani. Nghaduu nene li ikye ni ungwō ngwi a lo dze Afe gbē: Ongwu nkye abo wo uga yi ani ne ka yile iga fyi yen na no mbwumbwo.

¹⁹ <<N le nya ema onene duuse no wa kyo, ikyegbē no wa kyo yo ema ka noyeye mi ito inggise ngwu Ani dze mani.

²⁰ N nya ema otsitsi, ali inggise ngbe inggise ngwu ani don eso tayo gbē ani; ma inggise ta ongwu gbē Ani yo gbē ongwu ndo ani eso mani.>>

²¹ IYesu gbodze ne ngye man i kakan ewo mi onodzi ta o kyo obwendē gbē, <<N nya

ema otsitsi, onyi mbi ema ka wa kye ani gya.>>

²² Engwafɔɔn ndine di ewoma, ikye ni ama difwi inggise ngwu o le gbodze na ikyen mani.

²³ Oka mi idzidze ma, ongwafo nkpa iYesu itukwu, so don.

²⁴ ISaimon iPyita kyo ongwu nkpa iYesu itukwu na abo gbɛɛ, <<Byun li emɛ ngwi o le gbodze na yan.>>

²⁵ O kye ewo ge iYesu kɛ, si byun gbɛɛ, <<Otse li emeni lo?>>

²⁶ IYesu nu uka gbɛɛ, <<Li ongwu ani ka kye anggayɛ ibredi nɛ ba kye nun mani.>> Nɛ, o kye anggayɛ ibredi na ba, kye nu iJuda Iskaroti, ongwɛ iSaimon nani.

²⁷ Ntunto ngwi iJuda kye gbɛlu ibredi neman, iSatan si kaka mbon.

IYesu nyan gbɛɛ, <<Ungwɔ nwo abu owa kyo ma, kyon ple-ple tsatso!>>

²⁸ Nghaduu inggise onyi mi ita ungwogye difwi ungwɔ nkɔ se ngwi iYesu gbodze nɛ yan ma ba.

²⁹ Dafi iJuda li uto igbe nɛ, angbeka tsɛwɛ gbɛɛ iYesu le nyan gbɛɛ no ka gya ungwɔ ngwi ama ka wa kyo aboyaaya ele mi oga owe owato-wato mgbi emi iJuda, hona kye ungwɔ nu emi adze.

³⁰ Labolabo ngwi iJuda kyi gbɛlu ibredi neta, o to lu ese. Ma li mi otu.

IYesu gbo dafi iPyita ka wa tangwe ongwu mani

³¹ Ngwi iJuda to lu nɛ, iYesu gbɔgbɛɛ, <<Onɛngwe Ongwɛ Inggise tu okwɔkwɔ wa, Imgbasho kpaa tu okwɔkwɔ mbon.

³² Kini Imgbasho tu okwɔkwɔ mbon yo, Imgbasho ka nu Ongwɛ okwɔkwɔ mbi ewon, dika nu okwɔkwɔ ma akponyi.

³³ <<Engbɛ mgbi ani, ani ka dze yi ema onɔ gblɔgɔɔ wuba. Ema ka pita ani, dafi n nya emi iJuda ma n dile nya ema onɛnɛ ngha yɛyɛ: Imbe ngwi ani le kɛ ma, ema ka ba gbɛ ba.

³⁴ <<Ani le wo ema ola ofufe: Kpa ewema itukwu na. Dafi ema kpa ani itukwu nɛ, li ngha ema kpaa ka kpa ewema itukwu aali.

³⁵ Ni ema le kyo ngha yo inggise duu ka ye gbɛɛ ema li engwafɔ mgbi ani.>>

³⁶ ISaimon iPyita byun gbɛɛ, <<Otse, li mi ole ngwi abu le kɛ?>>

IYesu gbɛɛ, <<Imbe ngwi ani le kɛ ma, ema ka kyɛɔ onɛnɛ gbe ba, nghaduu ema ka wa kyɛɔ mi onɔ ongwɛ iyayi.>>

³⁷ IPyita byita gbɛɛ, <<Otse, kyɔsine ngwi ani ka yagba kyɛɔ abu onɛnɛ gbe ba? Ani ka kye oshishe mgbi ani nu mi ikye abu.>>

³⁸ IYesu si gbɛɛ, <<Mi odzimo abu ka kye oshishe mgbi abu nu mi ikye anii? N nya abu otsitsi, ogbigbi ka teela waba ta, abu ka tangwe ani akpe eta!

14

IYesu kwu engwafɔɔn ewe wo

¹ <<Ka nu itukwu kaka ema ewo ba. Nu Imgbasho oyeye; di nu ani kpaa oyeye na;

² Mi uɔɔ Otsen ozu kwuto; ki li ngha bayo, n ki nya ema. Ani le lu ele oka yile imbe mɛ ikye ema.

³ Ni Ani ka yile imbe mɛ ikye ema yo, n ka ye wa gbe ema ka dze yi Ani adzi imbe ngwi Ani dze ma ema kpaa ka dze.

⁴ Ema ye ofɛ oke imbe ngwi ani le lu mani.>>

IYesu li ofɛ oke mbi Otsɔn

⁵ ITɔmɔsu nyan gbɛɛ, <<Otse, eyi ye imbe ngwi abu le kɛ ba, ma ka kyɔsine eyi ka ye ofɛ?>>

⁶ IYesu nu uka gbɛɛ, <<Ani li ofɛ yi otsitsi beyi oshishe. Inggise onyi ka yagba kɛ mbi Otsani ba se o ka nyɛ mbi ani.

⁷ Ema ki ye ani saan yo, ema kika ye Otsani kpaa. Wita onɛnɛ lu iyayi, ema yon di din waani.>>

⁸ IFyilipi gbɛɛ, <<Otse, tso eyi Otsabu mani ta sika gyɔlo eyi.>>

⁹ IYesu nyan gbɛɛ, <<IFyilipi, ngwi Ani dze yi ema onɔ gblɔgɔɔ nɛ kpaa abu ye ani lo? Ali inggise ndi ani yo li Otsani ma ngwi o di. Kyɔsine ngwi abu gbɛɛ, <Tso eyi Otsani ma>

¹⁰ Abu noyeye dafi Ani dze mbi Otsani, Otsani kpaa di dze mbi ani baa? Elodze ngwi Ani le nya ema nɛ li mgbi ani abuen ta ba. Kpaa li Otsani ndze mbi ani ma, le kyidɔ mgban aani.

¹¹ Nu Ani oyeye dafi Ani gbɛɛ Ani dze mbi Otsani, Otsani kpaa di dze mbi ani nɛni; hona ni i ndɛ sine-sine kpaa ema noyeye mi ambe mgbi ungwɔ okwulewo ntoneni.

¹² N nya ema otsitsi, ali inggise ndze yi oyeye onuuu mbi ani ka kyungwɔ ama ngwi Ani teyi le kyo ntoneni. O ka kyungwɔ ama nngba ntɔnɛ kpaa, ikyekye n le lu mbi Otsani.

¹³ N ka kyo alungwɔ ngwi ema bo mi iyi mgbi ani duu, adzi ni Ongwɛ kye okwɔkwɔ nu Otsɔn.

¹⁴ Ema ka yagba bo alungwɔ duu mi iyi mgbi ani, n dika kyo ema ele.

IYesu zonu Onodzi Osaɔn

¹⁵ <<Kini ani kpa ema itukwu yo, ema ka ngyo ola ngwi Ani wo ema mani.

¹⁶ N dika bo Otsani, ta o ka nu ema Ongye okwu ema ewe wo oka, ongwu nka dze yi ema gyegwu mani,

¹⁷ Onodzi mgbi otsitsi nani. Eɛ ka gban ba, ikyekye o yon hona din kpaa ba. Nghaduu ema yon, lubana o dze yi ema dika wo mbi ema kpaa.

¹⁸ N ka dzata ema dafi ongwokwu ba; n ka ye ba mbi ema.

¹⁹ Mi ongwono gwee ese ka di ani wuba, kpaa ema yo ka di ani. Ikyesine Ani dze oshishe, ema kpaa ka dze oshishe.

²⁰ Mi egbe na ema ka wa difwi dafi ani dze mbi Otsani, ema wo mbi ani, ani di wo mbi ema mani.

²¹ Ali inggise ndze yi ola mgbi ani di li ngwo ma yo, li ongwu ani kpan itukwu. Inggise ani kpan itukwu yo o ka kpa Otsani itukwu, ani kpaa o dika kpa ani itukwu, n dika kye ewani tson.>>

²² Ta iJuda (li mgbi Iskaroti na ba) gbɛɛ, <<Otse, kysinese ngwi abu witukwu okye ewabu tso ese ba ngwi li eyi ta?>>

²³ IYesu nu uka gbɛɛ, <<Kini ani kpa inggise itukwu yo, o ka kyɛdo otsootso mgbi ani. O dika kpa Otsani itukwu, eyi dika ba mbon wa dzezan.

²⁴ Inggise ngwu ani kpan itukwu bayo, o ka kyɛdo otsootso mgbi ani ba. Elodze ngwi ema li fwo ntone li mgbi ani ba; a li mgbi Otsani ndo ani eso mani.

²⁵ <<Ani le nya ema ungwɔ ntone duu ngwi ani ka dze yi ema neni.

²⁶ Kpaa Ongye okwɛwɛwo, Onodzi Osaan, ngwu Otsani ka kye deso mi iyi mgbi ani na, ka tso ema ungwɔ duu diye we ema alungwɔ ama ngwi ani teyi gbo nya ema duu.

²⁷ N dzata iyu yi ema; n kye iyu mgbi ani nu ema. N kye nu ema dafi ese li nu ma ba. Ka nu itukwu sha ema anye ba dika tsimio ba na.

²⁸ <<Ema fwo dafi ani gbɛɛ, <N le lu mbeka n dika ye ba mbi ema mani.> Ni ani kpa ema itukwu yo, ema ka tsatsa gbɛɛ Ani le lu mbi Otsani, lubana Otsani shewo nga Ani.

²⁹ N nya ema onene duuse no wa kyo, ikyegbɛɛ no wa kyo yo, ni ema noyeye mani.

³⁰ N ka gbɔdze yi ema gblɔgɔdo wuba, lubana ongwuuto ongwɔ ese ne kyema. O dze yi mfye mbi ani ba,

³¹ kpaa ese no ye kyeme gbɛɛ Otsani kpa ani itukwu, ani di li kyungwɔ ngwi Otsani wo ani ola ma yeye.

<<Kyato; ni eyi lu dzata imbe ne na.

15

Ekwo eneekwo yi abɔn

¹ <<IYesu nya engwafɔn gbɛɛ: Ani li ekwo eneekwo otsitsi, Otsen li inggise ogbinehyi ekwo.

² O li kyi dzelu ali abo ndze mbi ani wa owawa ba ma ngwuta, kpaa o li kye gbombo akyikyen mi abo ngwi wa owawa mani, ikye no kiyayi owa awawa kwuba.

³ Ema teyi le saan mi ikye elodze ngwi Ani ple gbo nya ema nani.

⁴ Kwudze mbi ani na, ta Ani kpaa ka kwudze mbi ema. Abo ka yagba wa owawa

ikyibon ba, sede o ka kwokyi mi iteekwo kyeme. Ema kpaa ka yagba wa owawa ba sede ni ema kwudze mbi ani.

⁵ Ani li ekwo eneekwo ema li abo. Kini inggise kwudze mbi ani yo, ani kpaa ka kwudze mbon, o ka wa awawa ngbaabo ogbugbe; ni li Ani bayo ema ka kyo unkonyi gbɛɛ ba.

⁶ Ali inggise nkwudze mbi ani bayo, o dze dafi abekwo ngwi a kyi fwelu ngwuta non ngwo mani; ito abekwo ntona a li sa ma woke ola nu ma gyola.

⁷ Kini ema kwudze mbi ani elodze mgbi ani kpaa di dze mbi ema yo, ema ka bo alungwɔ ngwi ema mina duu a ka kye nu ema.

⁸ Ungwone li ikye onu Otsani okwɔkwo, ogbɛɛ ni ema wa awawa ngbaabo ogbugbe, nu ma di difwi gbɛɛ ema li engwafɔ ani.

⁹ Dafi Ani kpa Otsani itukwu ne, li nga ngwi ema kpa ani itukwu aali, onene kwudze mi okpitukwu mgbi ani na.

¹⁰ Kini ema ngwo ola mgben yo, ema ka kwudze mi okpitukwu mgben, dafi ani kpaa ngwo ola mgbi Otsen di kwudze mi okpitukwu mgban neni.

¹¹ Ani nya ema ungwone ikye ni atsa mgbi ani dze mbi ema, adzi ni atsa mgbi ema mbwumbwo.

¹² Ala mgbi Ani ma li ongwu aani: Di ewema kpa eka itukwu dafi ema kpa Ani itukwu neni.

¹³ Inggise onyi dze yi okpitukwu ngwi she nga ongwone ba, ogbɛɛ inggise kye oshishe mgban lase mi ikye mgbi emi okaan.

¹⁴ Ema li emi okani kini ema ngwo ola ngwi ani wo ema yo.

¹⁵ Ani kwu ema gbɛɛ engbido wuba, ikyesine engbido ye ungwɔ ngwi ongyukwo mgban li kyo ba. Nghane, n kwu ema gbɛɛ emi okani, bana alungwɔ ngwi ani kpai mbi Otsani duu ani nu ema ye.

¹⁶ Li ema dula Ani ba, kpaa Ani dula ema di wo ema ido gbɛɛ ni ema lu ka wa owawa nka li gyegwu. Ta Otsani ka nu ema alungwɔ ngwi ema pita mi iyi mgbi ani duu.

¹⁷ Nene li ola ngwi ani wo ema: Di eka kpa eka itukwu na.

Ese di engwafɔ tanyi

¹⁸ <<Kini ese di ema tanyi yo, we gbɛɛ i tsekise di ani tanyi.

¹⁹ Kini ema li mgbi ese yo, ema kika kpan dafi ema li mgban mani. Dafi i dze nghane, ema li mgbi ese ne ba, kpaa ani dula ema to mi ese. Li ikyengha ngwi ese di ema tanyi aali.

²⁰ We odze ngwi ani tsekise gbo yi ema gbɛɛ: <Ongbido onyi shewo nga ongyukwo mgban ba nani.> Kini a gbo ani odze ewo yo, a dika gbo ema kpaa nga.

Kini a sunu otsootso mgbi ani, a ka sunu otsootso mgbi ema kpaa.

²¹ A ka kyo yi ema mi ito ofe ne mi ikye iyi mgbi ani, ikyesine a ye Ongwu ndo ani eso ma ba.

²² Ni ani ki teyi ba wa gbodze yi ama bayo, a kika dze yi obube mi alobube mgbi ama ba. Nghaduu onene ne ema ka yagba natsundu mi obube mgbi ema wuba.

²³ Inggise ongwu ndi ani kyili di Otsani kpaa kyili.

²⁴ Ni ani ki kyo mi idzidze mgbi ama ungwō ngwi inggise oka teyi kyo mi idzidze mgbi ama ye bayo, a kika dze yi obube mi alobube mgbi ama ba. Kpaa onene a di ungwō ama okwulewo ntone duu, nghaduu kpaa a di ani kyili yi Otsani duu.

²⁵ Nghaduu nene li ombwumbwo ungwō ngwi a lo mi Ola mgbi ama gbē: <A di ani kyili mi itodze ba nani.>

²⁶ <<Ni ongye Okwawewo, Onodzi mgbi otsitsi ntōkye mbi Otsani ongwu ani ka wa don eso mbi ema ma, wa ba yo, o ka kyo obwende mi ikye ani.

²⁷ Li kyeme ema kpaa ka kyo obwende, ikyesine ema dze yi ani kye mi owita-wita.

16

¹ <<Ungwō ntone duu Ani tsekise nya ema ikyegbē ni ema ka boofe ba.

² A ka wa dula ema to mi ozu okwakye mgbi emi ifuda; mi otsitsi, onō kyema ngwi ali inggise ngwu ngwa ema duu ka tsewe gbē ongwu le kyo Imgbasho ido.

³ A ka kyo ito ungwō ntoneni ikyesine, a ye Otsani hona ani ba.

⁴ Ani tsekise nya ema ungwō ntoneni, ikyegbē ni onō ma wa gyo ema ka we gbē ani tsekise kwo ema ado. Ani nya ema ungwōne mi ababo ma ba, ikyekye ani ka dze yi ema.

Ido mgbi Onodzi Osaan

⁵ <<Onene Ani le lu mbi ongwu ndo ani eso mani, nghaduu onyi mbi ema kpaa byi ani ita gbē, <Li mi ole ngwi abu le lu baa?>

⁶ Ikyegbē Ani nya ema ungwō ntone ne, ema yē elela.

⁷ Nghaduu Ani le nya ema otsitsi: Li mi abo oyaaya mgbi ema ngwi Ani le lu dze ema ta aani. Sede Ani ka lu dze ema ta bayo, Ongye okwewewo na ka ba mbi ema ba; Kpaa kini Ani lu, Ani ka donso mbi ema.

⁸ Non wa ba yo, o ka fwo ese ikwō mi ikye alobube yi osaan:

⁹ mi aye mgbi obube yo, li ikyegbē a nu ani oyeye ba;

¹⁰ mi aye mgbi osaan yo, li mi ikyegbē Ani le lu mbi Otsani, mi imbe ngwi ema ka di ani alono-alono wuba;

¹¹ mi aye mgbi ikwō ogboogbo yo, li ikyegbē ongwuuto mgbi ese ne, a tsekise gbōn ikwō.

¹² <<Ani ka dze yi odze kpakpa ogbo yi ema, nghaduu i mbwo nyese ngwi ema ka difwi ngye oneneni.

¹³ Kpaa onō ngwi ongwu, Onodzi mgbi otsitsi, wa ba yo, o ka ngwo ema kaka ali otsitsi duu. O ka gbodze mgbi ikyibon ba; o ka gbodze ngwi o fwo ma kyoon ta, o dika nya ema ungwō nka kye iyayi mani.

¹⁴ O ka kye okwōkwō ba mbi ani ikyekye o ka kye odze ngwi Ani gbō yilen nya ema.

¹⁵ Alungwō nli mgbi Otsani li mgbi ani. Li ikyengha ngwi ani gbē Onodzi ka todulu mi ungwō nli ngwi ani kye nu di nu ema yon aali.

¹⁶ <<Mi ongwono gwee ema ka wa di ani wuba, dika tunto bata ema dika wa di ani.>>

Okakewo mgbi engwafō iYesu ka yē atsa

¹⁷ Engwafō mgbi iYesu angbeka gbō yi ewoma gbē, <<O kye ine byi sine ngwi o gbē, <Mi ongwono gwee ema ka di ani wuba, dika tunto bata ema dika wa di ani,> <Ikyekye ani le lu mbi Otsani?> >>

¹⁸ A kiyayi obyita gbē, <<Ongwono gwee ne ma, <tso sine?> Eyi difwi odze ngwi o le gbō ne ba.>>

¹⁹ Ngwi iYesu di gbē i mina ma obyiti ongwu ita mi odze ne ne, o nya ma gbē, <<Ema le byi ewema ita mi odze ngwi Ani gbē, <Mi ongwono gwee ema ka wa di ani wuba, dika tunto bata ema dika wa di ani nē?>

²⁰ Ani nya ema otsitsi, ema ka wa tsukwu di kyelela nghaduu ese ka dze yi atsa kwuba. Ema ka wa dze mi okakewo, kpaa okakewo mgbi ema ka wa yē atsa.

²¹ Ongyaa nle gblimba li dze yi owuluwulu kpakpa ikyekye onō imba mgbān gyo; kpaa mi onō ngwi o mbongwe yo, o li gblimo yi owuluwulu nani ikyesine atsa mgbān li ogbē ongwu mbimba mi ese nani.

²² Li ngwa ndze yi ema aani: Onene li onō okakewo mgbi ema, kpaa Ani dika yē di ema ta ema ka dze yi atsa, ma inggise onyi kpaa ka gbelu ema atsa na ba.

²³ Mi egbe na ema ka byi ani ita ungwō onyi kpaa wuba. N nya ema otsitsi, Otsani ka kye alungwō ngwi ema bo mi iyi mgbi ani duu nu ema.

²⁴ Nghataa ba onene kpaa ema bo unkoniyi mi iyi mgbi ani waba. Bo na ta ema ka gbē, man ema ka dze yi atsa kpakpa.

²⁵ <<Nghaduu ani teyi le gbodze yi ema mi itaodze, onō kyema ngwi ani ka wa gbō ito ondudze ne yi ema wuba, kpaa n ka wa nya ema odze mgbi Otsani mi ododa.

²⁶ Mi egbe na ema ka bɔ mi iyi mgbi ani. Ani le gbɛɛ n ka bɔ Otsani mi ikye ema ba.

²⁷ Ei, Otsani abuon di ema kpan itukwu ikyesine Ani kpa ema itukwu ema di noyeye gbɛɛ Ani kye mbi Imgbasho.

²⁸ Ani kye mbi Otsani di wa kaka ese neni; onene ani le dzata ese ne diye lu mbi Otsani.>>

²⁹ Ta engwafɔ iYesu gbɛɛ, <<Onene abu le gbɔdze yi eyi gbosa di li mi itaodze wuba.

³⁰ Onene eyi di gbɛɛ abu yengye alungwɔ duu di mina gbɛɛ ni inggise onyi kpaa no ka byi abu ita angbeka wuba. Ungwone nu eyi noyeye gbɛɛ abu kye mbi Imgbasho.>>

³¹ IYesu nu ma uka gbɛɛ, <<Ema noyeye onene?

³² Nghaduu onɔ kyema, di li onɔ ma joani, onɔ ngwi a ka ganya ema, ali inggise ka lu ude mgban. Ema ka dzata ani yuen. Kpaa Ani dze yuen ba, lubana Otsani dze yi ani.

³³ <<Ani teyi nya ema ungwɔ ntone, ikyegbɛɛ ni ema tu iyu ikpewo ani. Mi ese ne ema ka dze yi okakewo. Nghaduu bwalu itukwu na! Ani ngha ese wa.>>

17

IYesu bibo mi ikye ewon

¹ Dafi iYesu gbɔdze ne ngye ne, o kyile ine esho si bibo gbɛɛ:

<<Otsani, onɔ ma gyo wa. Kye Okwɔkwɔ nu ongwabu, adzi ni Ongwabu kpaa kye okwɔkwɔ nu abu.

² Bana abu teyi kye mfyɛ nun mi ikye mgbi ali inggise duu gbɛɛ no kye oshishe gyegwu nu ama abu kye nun duu.

³ Ma li oshishe gyegwu aani: li onu ma ye abu, Imgbasho otsitsi yuon, beyi iYesu iKrestu, ongwu abu dɔn eso neni.

⁴ Ani kye okwɔkwɔ nu abu mi ese mi ongyelu idɔ ngwi abu kye nu ani gbɛɛ ni ani kyo mani.

⁵ Ikyenghane, Otsani, nu ani okwɔkwɔ mi inai abu okwɔkwɔ ngwi ani teyi dzezan yi abu duuse ese wa wita nani.>>

IYesu bibo mi ikye engwafɔɔn

⁶ <<Ani kye abu tso mbi ama abu kye nu ani mi ese neni. A teyi li mgbi abu; abu kye ma nu ani a di ngyo elodze mgbi abu.

⁷ Onene a ye gbɛɛ ungwɔ ngwi Ani dzezan duu kye mbi abu.

⁸ Lubana ani kye elodze ngwi abu kye nu ani ma nu ma a di kyi gbelu. A ye saan gbɛɛ ani kye mbi abu, a di noyeye gbɛɛ abu dɔ ani eso.

⁹ Ani bibo mi ikye ma. Ani le bibo mi ikye mgbi ese ba, kpaa li mi ikye mgbi ama ngwu abu teyi gbe ma nu ani, ikyesine a li mgbi abu.

¹⁰ Alungwɔ ani dzezan duu li mgbi abu, alungwɔ abu di dzezan duu li mgbi ani. Ani di tu okwɔkwɔ ikpewo ma.

¹¹ Ani ka dze ese ne wuba, kpaa ama ka to ese neni, ani kyema le lu mbi abu. Otsani Osaan, ngyo ma mi mfyɛ mgbi iyi mgbi abu, iyi ngwi abu kye nu ani ikye nu ma ye onyi dafi eyi kpaa li onyi neni.

¹² Mi onɔ ngwi ani ka dze yi ama ma, ani ngyo ma di kye ma dze saan mi iyi ngwi abu kye nu ani. Onyi kpaa byulu ba sede li onyi ongwu dze mi ikye odzili-dzili, ikyegbɛɛ ni elodze mgbi Afe mbwumbwo nani.>>

¹³ <<Ani kyema le ba mbi abu oneneni, nghaduu ani gbɔ ungwɔ ntone ngwi ani ka dze ese neni, ikyegbɛɛ nu ma tu atsa kpakpa dafi ani kpaa tu neni.

¹⁴ Ani teyi kye elodze mgbi abu nu ma wa, kpaa ese di ma kyili, ikyekye a li mgbi ese ne wuba dafi ani kpaa li mgbi ese ne ba neni.

¹⁵ Ibo mgbi ani li ikyegbɛɛ ni abu kye gbelu ma mi ese ne ba, kpaa li ikyegbɛɛ ni abu ngyo ma mi abɔ emi obube.

¹⁶ A li mgbi ese ne ba, dafi ani kpaa li mgbi ese ne ba neni.

¹⁷ Kye ma kyi salu mi otsitsi mgbi abu; elodze mgbi abu li otsitsi.

¹⁸ Dafi abu dɔ ani eso ba ese ne ne, ani kpaa dɔ ma eso mi ese.

¹⁹ Mi ikye mgbi ama ani kye ewani kyi salu, adzi ni a kyi salu ma saan.>>

IYesu bibo ikye ama onoyeye duu

²⁰ <<Ibo mgbi ani li ikye ma yuoma ba. Ani bibo ikye ama nka wa noyeye mbi ani mi eso mgbi ama ogbɔɔgbɔ kpaa,

²¹ gbɛɛ ama duu nu ma wa ye onyi, Otsani, dafi abu dze mbi ani ngwi ani kpaa dze mbi abu neni. Ni ama kpaa dze mbi eyi ikye ni ese noyeye gbɛɛ abu dɔ ani eso.

²² Ani kye okwɔkwɔ ngwi abu kye nu ani ma nu ma wa, ikyegbɛɛ nu ma li onyi, dafi eyi kpaa li onyi neni:

²³ Ani wo mboma abu di wo mbi ani. Ni a gbe ma duu kwakye ye ondonyi onu ese ye gbɛɛ abu dɔ ani eso, a di kpa abu itukwu yeye dafi ani kpa abu itukwu neni.>>

²⁴ <<Otsani, ani mina gbɛɛ ama ngwu abu kye nu ani ma nu ma dze yi ani mi imbe ngwi ani dze mani, odi di okwɔkwɔ mgbi ani, okwɔkwɔ ngwi abu kye nu ani ikyesine ani kpa abu itukwu duuse ni abu ta ese nani.>>

²⁵ <<Otsani Osaan, dafi ese ye abu ba ne kpaa, ani ye abu, ma engwafɔ ntone ye dafi abu dɔ ani eso.

²⁶ Ani teyi kye abu tso ma, dika kiyayi ole kye abu tso ikyegbɛɛ okpitukwu mgbi abu mbi ani no dze mboma ani abuen kpaa dika dze mboma.>>

18

A bwa iYesu

¹ Ono ngwi iYesu bibo ngye ne, ongwu yi engwafoon fa ufe mgbi iKidon. Mi oyombo na okwo ekwo dze, a si kaka efu.

² IJuda, nkyon gya na, ye imbe nani, ikyesine iYesu li teyi kwakye mi imbe na alono yi engwafoon.

³ IJuda si ba okwo ekwo nani, o gbe obyi oblakwutse mgbi emi iRoma beyi ama ongyo ozu okwukwo osunu Imgbasho angbeka nkye mbi engyukwo ama ofife beyi emi iFarasi teyi. A gbe ola byi yi okyiika.

⁴ Ngwi iYesu teyi ye alungwo nka wa kyon ne, o tase ka byi ma gbæ, <<Li eme ngwi ema le pitan?>>

⁵ A nu uka gbæ, <<iYesu ongwu iNadzareti.>>

iYesu gbæ, <<Li ani ma aani.>> (iJuda ongwu nkyon gya na, kwudze mmama yi ama.)

⁶ Ono ngwi iYesu gbæ, <<Li ani ma aani,>> neta a yeyikpa zudwoke ese.

⁷ O diye byi ma gbæ, <<Li eme ngwi ema le pitan?>>

A di gbæ, <<iYesu ongwu iNadzareti.>>

⁸ iYesu gbæ, <<N teyi nya ema gbæ li ani ma aani. Kini ema le pita ani yo, ni inggise nton lu na.>>

⁹ Ungwone kyo ikyegbæ elodze ngwi o teyi gbo ma no mbwumbwo: <<Ani nu onyi kpaa byulu mi ama ngwu abu gbe nu ani nton ba.>>

¹⁰ Ne iSaimon iPyita, ongwu ndze yi okwusunkli na, kye ngwalu kye kwodze ado abugye mgbi ongbido mgbi okwukwo inggise ofife. (Ongbido na iyin di iMalku.)

¹¹ Nghaduu iYesu wo iPyita ola gbæ, <<Yile okwusunkli mgbi abu woke ifwe. Nin ka wa ibwe ngwi Otsani kye nu ani ne baa?>>

A kye iYesu ke mbi Anna

¹² Obyi oblakwutse yi ongyukwo mgbi ama beyi ama ongyo ozu okwukwo osunu Imgbasho bwalu iYesu. A bwan adi,

¹³ si kyon ke mbi Anna ababo, ongwu li otsowa iKayafa, nli okwukwo inggise ofife mi onova na mani.

¹⁴ iKayafa li ongwu teyi we emi iJuda ewe gbæ i tatase gbæ ni inggise onyi kwulu mi ikye ibyi inggise mani.

iPyita tangwe iYesu akpe ongwu ababo

¹⁵ iSaimon iPyita yi ongwafu oka kyedo iYesu. Ikyekye ongwafu ne okwukwo inggise ofife na yon, nghanne o kaka yi iYesu mi idzidze ude mgbi okwukwo inggise ofife nani,

¹⁶ kpaa iPyita yo kwudze onufoka mi ese. Ta ongwafu oka, ngwu okwukwo inggise

ofife yon na, ye wa gbodze yi ongwongyaa ndze ondu ido mi onufoka, man o kye iPyita kaka idzidze.

¹⁷ Ongwongyaa mi onufe na byi iPyita gbæ, <<Abu kpaa li onyi mi engwafu mgban lo?>>

O gbæ, <<Li Ani ba.>>

¹⁸ Ono ma ofu le yi, ne engbido beyi ama ongyoongyo kwudze kpakeke wo ola ngwi a kye wo le we mani. iPyita kpaa kwudze le wola yi ama.

Okwukwo inggise ofife byi iYesu ita

¹⁹ Nghanne, okwukwo inggise ofife na byi iYesu ita mi odze mgbi engwafoon beyi otsootso mgban.

²⁰ iYesu nu uka gbæ, <<Ani gbodze nya ese mi ododa, n li tso alono mi ozu kwakye mgbi emi iJuda hona mi ozu okwukwo osunu Imgbasho mi iJerusalem, imbe ngwi emi iJuda duu li kwakye nani. N gbodze onyi mi odaada ba.

²¹ Kysinese ngwi abu le byi ani ita? Byi ama nfwo ani mani. Otsitsi a ye ungwu ngwi ani gbo.>>

²² Mi ono ngwi iYesu gbodze ne ma, onyi mbi ama ongyoongyo ndze kwekwe yan ma tan afe mi ine. O byita gbæ, <<Li ngha ngwi a li nu okwukwo inggise ofife uka daa?>>

²³ iYesu gbæ, <<Kini ani gbo ungwu nli ayin bayo, tso ani obwende mi ungwu nli obube mani. Kpaa kini ani gbo otsitsi ma, kyonne ngwi abu ta ani afe?>>

²⁴ Neta Anna si kyon deso, yi adi mi abo, lu mbi iKayafa, okwukwo inggise ofife nani.

iPyita tangwe iYesu akpe ongwu fan yi ongwu ta

²⁵ Dafi iSaimon iPyita ka kwudze le wola ne, a di byun gbæ, <<Abu li onyi mi engwafoon we?>>

O tangwe gbæ, <<Li ani ba.>>

²⁶ Nghaduu onyi mbi ama ongyoongyo mgbi okwukwo inggise ofife na, ongwu nli odo yi ongyulo ngwu iPyita teyi dzan ado na, fwa ikwangha yi iPyita gbæ, <<Ani di abu yi iYesu mi okwo baa?>>

²⁷ iPyita di tangwe, labolabo neta ogbigbi wita otelea.

iPlatu fwo iYesu ikwo

²⁸ Ta emi iJuda kyelu iYesu mbi iKayafa lu opiikwo mgbi iGona inggise iRoma. Ono na li egbegbe ototu, mi ikye ofwa idza owa ndelu ma oga owe owato-wato mgbi emi iJuda ne, emi iJuda fwa okaka ude iGona.

²⁹ iPlatu tase ke mboma ka byita gbæ, <<Li ali itodze ngwi ema kye le ba mi ikpewo ongyulo ne?>>

³⁰ A nu uka gbæ, <<Inggise ne ki kyungwo obube bayo, eyi ki kyon ba mbi abu ba.>>

³¹ IPlatu gbogbɛɛ, <<Nghane kyon abuema ka gbon ikwɔ mi ola mgbi ema na.>>

Emi iJuda fwa gbɛɛ, <<Ola nu eyi ofe ongwɔ inggise ba.>>

³² Ungwɔnɛ kyɔ ikyegbɛɛ odzɛ ngwi iYesu teyi gbo mi ito ikwu ngwi ongwu ka wa kwu ma no mbwumbwo.

³³ IPlatu si yɛ kaka ifoozu, kwu iYesu ela ba di byun gbɛɛ, <<Abu li uto mgbi emi iJudaa?>>

³⁴ IYesu byun gbɛɛ, <<Li ewe otseetse mgbi abu naadi inggise angbeka nya abu odzɛ mi ikye ani?>>

³⁵ IPlatu gbɛɛ, <<Ani li emi iJudaa? Li emidabu yi engyukwo ama ofife mgbi abu kye abu ba mbi ani aani. Li alungwɔ abu kyɔ?>>

³⁶ IYesu gbɛɛ, <<Esuto mgbi ani li ongwɔ ese ne ba. Ki li ongwɔ ese ne yɔ, engbido mgben kika gblika ikye otukwu ofe onu emi iJuda bwa ani. Nghaduu esuto mgbi ani dze mbeka.>>

³⁷ IPlatu gbɛɛ, <<Ngyese, abu li uto!>>

IYesu nu uka gbɛɛ, <<O gbo ayin ogbɛɛ di ani li uto. Mi otsitsi yɔ, li itodzɛ ne ngwi a mba ani, di li itodzɛ ne ngwi ani ba ese neni, ikye okyɔ obwende mi otsitsi nani. Ali inggise ndzɛ mi agya mgbi otsitsi yɔ li fwo ani.>>

³⁸ IPlatu byita gbɛɛ, <<Li alungwɔ li otsitsi?>> Mi odzɛ ne o di tase ke mbi emi iJuda ka gbogbɛɛ, <<N tun yi obube ba.

³⁹ Ema dze yi aletɔ mgbi ema onu ani dlu inggise onyi mi obawi mi onɔ oga owe owato-wato mgbi emi iJuda nu ema. Ema mina gbɛɛ ni ani dlu uto mgbi emi iJudaa?>>

⁴⁰ Nghaduu a wulu ela gbɛɛ, <<Ei, no ka li ongwu ba! Kye iBaraba nu eyi!>> Onɔ na iBaraba wo abɔ mi ablodze.

19

A ngwɔ iYesu ikwɔ owa gbokwon

¹ Ta iPlatu woola nu ma gbo iYesu onitse.

² Ama oblakwutse ndi akata ato kye tukwun ikye. A kye awulu omuma shinishini kye won

³ diyɛ ke mbon dudo-dudo, gbɛɛ, <<Eyi ta abu angba, uto mgbi emi iJuda!>> A dile tukwun afe mi ine.

⁴ IPlatu di tase ba ese wa gbo yi emi iJuda gbɛɛ, <<Dii, ani kyon le ba ese mbi ema ni ema ye gbɛɛ ani tun yi obube mi elikwɔ ngwi ema kwun ne ba.>>

⁵ Ngwi iYesu tase ba ese yi akata ato mi ikye beyi awulu omuma shinishini mi ewo ne, iPlatu nya ma gbɛɛ, <<Ongyulo ma dze na!>>

⁶ Plɛ ngwi engyukwo ama ofife beyi ama ongyoongyo mgbi ama din ne, a wulu gbɛɛ,

<<Gbokwon mi ekwatsi! Gbokwon mi ekwatsi!>>

Nghaduu iPlatu gbɛɛ, <<Ema kyon ka gbokwo mi ekwatsi abuema na. Mbi ani yɔ, ani tu itodzɛ mi elikwɔ mgban ba.>>

⁷ Emi iJuda biibe gbɛɛ, <<Eyi dze yi ola, ma mi ola mgbi eyi mayo, o ka kwulu kyeme, ikyena o kye ewon gbɛɛ ongwu li Ongwe Imgbasho.>>

⁸ Ngwi iPlatu fwo ungwɔnɛ ne, i nghao kwulun ewo,

⁹ ta o diyɛ kaka ifyudɛ. O byi iYesu gbɛɛ, <<Abu kye mi ole?>> Nghaduu iYesu kwondo won ba.

¹⁰ IPlatu gbɛɛ, <<Abu fwa ogbɔdzɛ yi anii? Abu difwi gbɛɛ ani dze yi mfye odzata abu hona gbokwo abu mi ekwatsi baa?>>

¹¹ IYesu gbɛɛ, <<Abu kika dze yi mfye mi ikye ani ba, ni a ki kye nu abu kye esho bayɔ. Nghaduukpaa ongwu nkye ani nu mi abɔ mgbi ema na, nghao kyɔ obube duu.>>

¹² Wita mi onɔ na lu iyayi, iPlatu fya odzata iYesu, kpaa emi iJuda kiyayi owulu gbɛɛ, <<Kini abu dzata ongyulo ne lu yɔ, abu li oka iSidza wuba. Ali inggise nkye ewon gbɛɛ ongwu li uto duu kye iga le fyɛsɛ yi iSidza.>>

¹³ Ngwi iPlatu fwo odzɛ ne ne, o ka kye iYesu luba ese man sɔke itse ogbiikwɔ mi imbe ngwi a li kwun di Ikwutse (ngwi a li kwun mi ondudze Aramai gbɛɛ iGabata nani).

¹⁴ Li mi egbe owewo mgbi oga owe owato-wato mgbi emi iJuda, di li mi onɔ idzizude.

Ne iPlatu nya emi iJuda gbɛɛ, <<Uto mgbi ema dzana.>>

¹⁵ Nghaduu a wulu gbɛɛ, <<Kyon lu mmeneni! Kyon lu mmeneni! Gbokwon ngwon!>>

Ta iPlatu byita gbɛɛ, <<Nin gbokwo uto mgbi ema mi ekwatsi?>>

Engyukwo ama ofife gbɛɛ, <<Eyi dze yi uto oka ba li iSidza yuon.>>

¹⁶ Mi ongyeengye duu iPlatu kyon nu ma gbɛɛ nu ma ka gbokwon mi ekwatsi.

A gbokwo iYesu

Man ama oblakwutse kye iYesu lu.

¹⁷ Ngwi o kye ekwatsi mgban ne, o lu imbe idingbo (ngwi a li kwun mi ondudze Aramai di iGogota nani).

¹⁸ Mi imbe ne a gbokwon yi inggise efa, oka mi abugye yi oka mi abube, iYesu wo idzidze.

¹⁹ IPlatu nu ma lo ungwɔ kye beke mi ekwatsi. I gbogbɛɛ: IYESU ONGWI IN-ADZARETI, UTO MGBI EMI IJUDA.

²⁰ Emi iJuda kwuba gbo ambe neni, bana imbe ngwi a gbokwo iYesu ma dze kwekwe yi igeli okwukwo, ambe na a lon mi ondu Aramai, iLatin yi iGriki.

²¹ Engyukwo ama ofife mgbi emi iJuda fwa yi iPlatu gbɛɛ, <<Ka lo gbɛɛ, <Uto mgbi emi iJuda ba,> kpaa gbɛɛ ongyulo nɛ li kye ewon gbɛɛ ongwu lu uto mgbi emi iJuda.>>

²² iPlatu gbɛɛ, <<Ungwo ngwi ani lo yo, ani lo setawaali.>>

²³ Ono ngwi ama oblakwutse gbokwo iYesu mi ekwatsi ngye nɛ, a kyi gbelu angwuto mgban, kyi ghalu imbe ene, onyi mi ikye mgbi ali inggise mgbi ama, i sisi awulu mgban. Angwuto nɛ dze yi okwokyi-ikwokyi ba, li ungwonyi kye esho lu ese.

²⁴ Ama oblakwutse ntona gbo yi ewoma gbɛɛ, <<Eyi ka fawa angwuto nɛ ba, eyi ka gbo efa mi ele ni eyi ye inggise nka li mgban.>>

Ungwone kyo ikye ombwumbwo ungwu ntsekise dze mi Afe gbɛɛ,

<<A kye ghalu angwuto
mgbi ani nu ewoma
di gbo efa mi abu mgbi ani.>>

Li ungwu ngwi ama oblakwutse kyo aani.

²⁵ Ono iYesu kwudze kwekwe yi ekwatsi mgbi iYesu yi oshanon, yi iMeri owa iKlopa, beyi iMeri iMagidalin.

²⁶ Dafi iYesu di onon mi imbe na, yi ongwafoon ngwu kpan itukwu kwudze yan nɛ, iYesu nya onon gbɛɛ, <<Ongyaa ongwabu dzana,>>

²⁷ o diye gbo yi ongwafoon na gbɛɛ, <<Onabu dzana.>> Wita mi ono na nghataa lu iyayi, ongwafoon na kye iMeri lu ude mgban.

Ikwo iYesu

²⁸ Ono gwee nɛ, iYesu ye dafi alungwo duu ngye, ma ikyegbɛɛ ni ungwu ndze mi Afe mbwumbwo yo, O gbɛɛ, <<ekweni kwin.>>

²⁹ Mi imbe na atankpe enee kwu ofyun-fyummya ba dze ele, nghane a kye isoso tswoke ele, kye fake anggekwo ihiso, kyilen be iYesu ke ikpondu.

³⁰ Ngwi iYesu wa duu nɛ, o gbɛɛ, <<I ngye wa.>> Ta, o kye onbukwo ngwuta si yulu.

³¹ Ungwone kyo mi obwi, tegblifan li egbe otonyewo mgbi emi iJuda. Ikyegbɛɛ emi iJuda mina gbɛɛ ni ikwo ntona lato ekwatsi mi egbe otonyewo ba nɛ, a ka bo iPlatu ofe gbɛɛ nu ma gbikye ma afo di tashulu ikwo ntonani.

³² Ama oblakwutse ba wa gbikye afo efa mgbi inggise ongwu ababo ngwu a kyon gbokwo mi ekwatsi yi iYesu dika gbikye mgbi oka nani.

³³ Nghadu ngwi a ba mbi iYesu ma, a difwi dafi o teyi kwulu wa nɛ, a gbikyen afo wuba.

³⁴ Neta, inggise oblakwutse oka kye okpa kwo iYesu mi esa, ta eyi yi eni fe lon mi esa.

³⁵ Inggise ndi ma kyo obwende, obwende mgban li otsitsi. O ye gbɛɛ ongwu gbo otsitsi, di kyo obwende ikyegbɛɛ ni ema kpaa ki noyeye.

³⁶ Ungwo ntona kyo adzi ni ondu odzɛɛdze ngwi Afe dze gbɛɛ <<Akpukpu mgban onyi kpaa a ka gbikyen ba,>> na no mbwumbwo.

³⁷ Dafi Afe oka di gbɛɛ, <<A ka di ongwu a kyon okpa nani.>>

A ndzi iYesu

³⁸ Ono gwee nɛ, iJose ongwu Arimatia wa bo iPlatu ikwo mgbi iYesu. IJose kpaa li ongwafu mgbi iYesu, o wa bo mi odaada ikyekye o le mio emi iJuda. Dafi iPlatu nun ofe nɛ, o wa kyi kyelu ikwo mgbi iYesu lu.

³⁹ O kye beyi iNikodemu, ongyulo nteyi ke mbi iYesu mi otu nani. iNikodemu ba yi ungwu ama ogbungbe kwuba ngwi a kye bwuo yi ewoma nɛ mlo dafi ngwuseta don iwyo diwyeda sini.

⁴⁰ Ngwi a kyi kyelu ikwo mgbi iYesu nɛ, ama efa kye ikwo na ndi woke angwuto yi ungwu ama ogbungbe ntonani. A kyungwone dafi emi iJuda li ndzi inggise mi aleto mgbi ama mani.

⁴¹ Imbe ngwi a gbokwo iYesu mi ekwatsi na, li mi okwo, di li mi okwo na ngwi endzi ofufe dze ele, ongwu a ndzi inggise mi ele ye waba.

⁴² Ikyegbɛɛ li egbe owewo mgbi emi iJuda mi ikye egbe otonyewo, endzi di dze kwekwe nɛ, a kye iYesu ndzi mi ele.

20

Endzi nla ayayi

¹ Egbe iladi mi egbegbe otutu nɛ, iMeri iMagidalin ke endzi ka di dafi ikwutse ngwi a kye tukwu ondendzi na a kye mulu. ² Nɛ o nye yi onya ke mbi iSaimon iPyita beyi ongwafu oka, ongwu nkpa iYesu itukwu nani, ka gbɛɛ, <<A kyi dula Otse iYesu mi endzi, ma eyi ye imbe ngwi a kyon ka lake ba.>>

³ Ta iPyita yi ongwafu na kyato olu imbe ngwi endzi dze mani.

⁴ Ama efa le lu onyonya, kpaa ongwafu oka na tsinya nga iPyita teyi ka to itendzi ababo.

⁵ O klese wine mi ifun kpaa li angwuto ngwi a kye ndi wo iYesu mata ladze ele, nghaduu o kaka ifun ba.

⁶ Nɛ iSaimon iPyita, ngwu kyan iyikpa ma, wa to si kaka lu ifendzi. O di angwuto ikwo ntona lato ifun,

⁷ beyi ayangwuto ngwi a kye bwa iYesu ikye nani. Angwuto na fulu ewon, i lake idzidza yi ongwu a ndzin mi ele mani.

⁸ Ongyɛngye yo, ongwafu oka ongwu nteyi kaka itendzi ababo na kpaa, kaka ifun ka di si noyeye.

⁹ (Nghaduukpaa i gbosa lo ma mi odze ngwi Afe gbæe iYesu ka kyæe mi ikwu na ba.)

IYesu mblegba tu iMeri iMagidalin

¹⁰ Ta engwafɔ ntona yido lu ude mgbi ama,

¹¹ kpaai iMeri yɔ tila dze itendzi le tsukwu. Dafi o le tsukwu ne, o klese le wine mi ifendzi

¹² man di engyeso nghi efa wo angwuto onzundze, a soto imbe ngwi a teyi kye ikwo mgbi iYesu la mani, onyi mi ikye oka mi atafa.

¹³ A byun gbæe, <<Ongyaa, li ekye ngwi abu le tsukwu?>>

O gbæe, <<A kyi kyelu ikwo mgbi Otse iYesu mgbi ani lu, ma ani ye imbe ngwi a kyon ka lake ba.>>

¹⁴ Ngwi o gbɔdze ne mata, o ndine kpatse man o di iYesu kwudze imbe nani, nghaduu o difwi gbæe li iYesu ba.

¹⁵ IYesu gbæe, <<Ongyaa, li ekye ngwi abu le tsukwu? Li eme ngwu abu le ndinan?>> Ongyaa na tsewe gbæe o li otsungwo okwo, o gbæe, <<Ongyukwo, kini abu kyon lu yɔ, nya ani imbe ngwi abu kyon lake mani nin nka kyi kye.>>

¹⁶ IYesu gbæe, <<IMeri!>>

O kyata ine byun man kwu ela okwukwo mi ondu Aramai gbæe, <<IRaboni!>> (Ngwi itan gbæe otsetse).

¹⁷ IYesu gbæe, <<Ka tsekwlun ba, ikyesine N yido lu mbi Otse waba. Nghaduukpaa lu ka nya emi ongwunani gbæe, <Ani le yido lu mbi Otsani beyi Otsema, mbi Imgbasho mgbi Ani yi Imgbasho mgbi ema.>>

¹⁸ IMeri iMagidalin kye esɔ ne lu mbi engwafɔn gbæe, <<Ani di Otse iYesu!>> O di nya ma gbæe o nya ongwu ungwɔ ntoneni.

IYesu mblegba tu engwafɔn

¹⁹ Mi onɔde mi egbe iLadi na, ngwi engwafɔn kwakye yi eka ne, a kye ofe tukwu bana a le mio emi ijuda, iYesu ba wa kwudzeke idzidze mgbi ama si gbæe, <<Iyu no dze yi ema!>>

²⁰ Ngwi o gbo ungwone nye ne, o gbe abo tso ma beyi esa. Engwafɔn tsatsa kwuba mi onɔ ngwi a di Otse iYesu mani.

²¹ IYesu di gbæe, <<Iyu non dze yi ema! Dafi Otsani do ani esɔ ne, ani kpaai le do ema ngha.>>

²² Yi odze na ta, o tufu ma wo si gbæe, <<Gbæ Onodzi Osaana na.

²³ Kini ema dzata inggise yi ali ibwubwe mgban yɔ, a dzanta yan, kini ema dzatan bayɔ, a dzanta ba sewaali.>>

IYesu mblegba tu iTɔmɔsu

²⁴ Nghaduu iTɔmɔsu (ongwu a li kwun di ongwefa nani), onyi mbi emi iwyodefa ntona dze yi ama mi onɔ ngwi iYesu ba ma ba.

²⁵ Nghane engwafɔ angbeka ntona nyan gbæe, <<Eyi di Otse iYesu!>>

Kpaai o nya ma gbæe, <<Li kyeme ngwi ani ka di emi ambe mgbi ikusa mi abo mgban di kye ongwufabo ke imbe a gbokwon ikusa ntona, di kye abo mgbi ani kaan esa bayɔ, n ka noyeye ba.>>

²⁶ Ngwi i wa nye egbe egyata ne, engwafɔ mgban di woto yi eka, iTɔmɔsu kpaai wodze yi ama. Dafi onufozu tukwu ne kpaai, iYesu wa kwudzeke idzidze ma di gbæe, <<Iyu no dze yi ema!>>

²⁷ Ta o nya iTɔmɔsu gbæe, <<Kye ongwufabo mgbi abu beke mmeneni, di atabo mgbi ani. Na abo mgbi abu ba esa mgbi ani, ka tangwe wuba kpaai noyeye.>>

²⁸ iTɔmɔsu si kwun gbæe, <<Otse mgbi ani yi Imgbasho mgbi ani!>>

²⁹ IYesu nyan gbæe, <<Ikyegbæe abu di ani ne, abu nu ani oyeye, mse no dze yi inggise ama ndi ani ba kpaai noyeye mani.>>

³⁰ IYesu kyo ambe ungwɔ angbeka okwulewo gwuba mi inai engwafɔn, ngwi a lo ma wo afe ne ba.

³¹ Kpaai ntona a lo ma ikyegbæe ni ema noyeye gbæe iYesu li iMedzaya, Ongwe Imgbasho, di li ikyegbæe ni ema noyeye mi iyi mgban ta ema ka tu oshishe.

21

IYesu tsetu engwafɔ egyafa.

¹ Ngwi ungwone wa nye ne, iYesu di tsetu emi ongwafɔn, mi ekyoo okwukwo mgbi iTiberia. Li ito ofe ngwi i kyo joani:

² ISaimon iPyita, iTɔmɔsu (ngwi a li kwun di ongwefa nani) iNatanie ongwɔ iKana mi ese iGalalia, emi ongwɔ iDzebedi, beyi engwafɔ mgbi iYesu angbeka efa kpaai to mbonyi.

³ ISaimon iPyita nya ma gbæe, <<Ani le lu mtse ota-ta,>> a gbæe, <<Eyi kpaai ka ke yi abu.>> Ta a si tase ka kaka uwaa, kpaai mi otu na duu a kwu unkonyi ba.

⁴ Mi egbegbe otutu ne iYesu wa kwudzeke mi agobo, kpaai emi engwafɔn yagba difwi gbæe li iYesu ba.

⁵ O kwu ma ela ke gbæe, <<Emi okani, ema kwu nka wa lo?>>

A nun uka gbæe, <<Ei.>>

⁶ O nya ma gbæe, <<Ngwi Ibriji mgbi ema mi abugye mgbi uwaa ta ema ka kwu ungwɔ.>> Ngwi a kyo nga neta, a yagba okwo uke kaka uwaa ba, ikye mmbweni kwuba ngwi a kwu mani.

⁷ Ta ongwafɔ nkpa iYesu itukwu na nya iPyita gbæe, <<Li Otse iYesu!>> Ngwi iSaimon iPyita fwo gbæe, <<Li Otse ne,>> o kye angwuto mgban ongwɔ ese tukwu (lubana o teyi kye kwulu mi ewo) man ngwa gyeke eni.

⁸ Engwafɔ angbeka ntona kyedɔ mi uwaa, a kwo uke yi mmbwe ngwi mweele ma luba agobo, ikyesine i tunto yi agobo ba, i me dafi akwubɔ ideli onyi hini.

⁹ Ngwi a tɔ lu agobo ne, a di ibredi ladze, angola le gbe mmbweni di dodze ele.

¹⁰ IYesu nya ma gbɛɛ, <<Dulu mmbwe ngwi ema kwa kwu ne ba na.>>

¹¹ ISaimon iPyita tɔdɔke uwaa di kye kwolu uke dɔke esɛ. Mmbweni okwukwo mweele, duu li ideli onyi yi ngwusefa dɔn iwyo diwyeta, ma dafi mmbwe ntona le kwuba ne kpaa uke fawa ba.

¹² IYesu nya ma gbɛɛ, <<Ba wa tiikye na.>> Onyi mi ifu ma kpaa shitukwu byun ita gbɛɛ, <<Abu li eme ba>> A ye dafi li Otse iYesu mani.

¹³ IYesu wa kyelu ibredi ma kye nu ma, di kyo ngha ye ye yi mmbweni ma kpaa

¹⁴ Nene li akpe ongwu ta ngwi iYesu mblegba tu emi ongwafɔn mi onɔ ngwi o kye mi ikwu aani.

IYesu yile iPyita dze ofe

¹⁵ Onɔ ngwi a gye ungowogye ngye ne, iYesu byi iSaimon iPyita ita gbɛɛ, <<iSaimon ongwɛ ijɔn, otsitsi-otsitsi ani kpa abu itukwu ngha ungwɔ ntonɛ?>>

O gbɛɛ, <<Eɛn, Otse, abu ye dafi abu kpa ani itukwu mani.>>

IYesu nyan gbɛɛ, <<Byi mmala mgbi ani enbwa.>>

¹⁶ IYesu di byun gbɛɛ, <<ISaimon ongwɛ ijɔn, ani kpa abu itukwu otsitsii?>>

O nu uka gbɛɛ, <<Eɛn, Otse iYesu, abu ye dafi abu kpa ani itukwu mani.>>

IYesu nyan gbɛɛ, <<Gbewebyi mmala mgbi ani.>>

¹⁷ Akpe ongwu ta o byin gbɛɛ, <<iSaimon ongwɛ ijɔn, ani kpa abu itukwu?>>

IPyita wulu itukwu ikyesine iYesu byun akpe ongwu ta gbɛɛ, <<Ani kpa abu itukwu?>> O gbɛɛ, <<Otse, abu ye alungwɔ duu; abu ye gbɛɛ abu kpa ani itukwu.>>

IYesu nyan gbɛɛ, <<Byi mmala mgbi ani enbwa.

¹⁸ N nya abu otsitsi, onɔ ngwi abu li mmafa ma, o li gbe angwuto wo ewo di ke imbe ngwi abu mina duu, kpaa onɔ ngwi abu ye ishongye abu ka na abɔ mgbi abu efa, inggise oka ka gbe angwuto wo abu di kye abu ke imbe nmina abu okɛɛke ba mani.>>

¹⁹ IYesu gbɔ ungwone ikye otso ito ikwu mgbi iPyita ngwi o ka wa kwu kye okwɔkwɔ nu Imgbasho mani. Ta o nyan gbɛɛ, <<Kyedɔ ani!>>

²⁰ IPyita kyata ine man di ongwafɔ nkpa iYesu itukwu na kye ma iyikpa. (Li ongwu nso kye ewo ge iYesu mi onɔ ngwi a le gye ungowogye ongwɛ olɛɛ di li ongwu teyi byi

iYesu gbɛɛ, <<Otse, li eme ka kye abu gya?>>)

²¹ Onɔ ngwi iPyita din ne, o byi iYesu gbɛɛ, <<Otse, li ekye ngwi inggise ne ka kyo?>>

²² IYesu nu uka gbɛɛ, <<kini ani mina gbɛɛ no dze oshishe nghataa ni ani wa ye ba ma, li ekye mgbi ema mi ele? Abu yo kyedɔ ani.>>

²³ Mi ikye odze ne, ayayi odze gbɔfwe mbi emi ongwunon gbɛɛ ongwafɔ ne ka kwulu ba. Nghaduu iYesu gbɛɛ o ka kwulu ba ba, o gbɔɔgbɔ ta gbɛɛ, <<Kini ani mina gbɛɛ non dze oshishe nghataa ni ani wa ye ma, li ekye mgbi ema mi ele?>>

²⁴ Nene li ongwafɔ nkɔ obwendɛ mi ungwɔ ntonɛ duu di lɔ ma toke esɛ. Eyi ye dafi obwendɛ mgban li otsitsi mani.

²⁵ IYesu kyungwɔ angbeka kpaa kwuba. Ni a ki lɔ alungwɔ duu toke esɛ yo, n tsewe gbɛɛ esɛ duu kpaa imbe kika dze ogbe afɛ ntona toke ba.

Okyaokyo mghi ama ogbikye iYesu

A kye iYesu lu esho

¹ Otsungwude iTiofyo, mi olololo mghi ani ongwu ababo ma, n lo alungwo ngwi iYesu wita okyaokyo diye tso

² nghataa ba egbe ngwi a kyon lu esho, ngwi o wo ama ngwu o sadu ma li ama Ogbikyon ola mi mfye mghi Onodzi Osaan ngye mani.

³ Ngwi o gbiiso nye ne, o kye ewon tso mbi inggise ntone di nu ma obwende kwuba saan gbæ ongwu dze oshishe. O kye ewon tso ma me egbe ngwusefa di gbodze esuto mghi Imgbasho nya ma.

⁴ Onoka ngwi o kwakye yi ama, le gye ungowgye yi ama ne, o nya ma gbæ: <<Ka tase dzata iJerosalin ba na, kpaa fe umba ngwi Otsani zonu, ngwi ema tsekise fwo ani gbodze efu nani.

⁵ Bana iJon okyo iBatisima kyo iBatisima yi eni ta, nghaduu egbe sisi gwee ta a ka kyo ema iBatisima yi Onodzi Osaan.>>

⁶ Ngwi a ka to yi ewoma ne, a byun gbæ, <<Otse, li mi onone ngwi abu ka yile esuto mghi emi Israi nu maa?>>

⁷ Ne iYesu nya ma gbæ: <<I wogyo ngwi ema ka ye egbe yi ono ngwi Otsani kye dze mi mfye mgban ba.

⁸ Kpaa ema ka gbæ mfye mi ono ngwi Onodzi Osaan ba mbi ema mani, ta ema ka ye emi obwende mghi ani mi iJerosalin yi iJudia yi iSamaria nghataa kpatse ese duu.>>

⁹ Ngwi iYesu gbo ungwone ngye neta, a kyon mi inai ma lu esho, man akpa tukwu ma ine odin.

¹⁰ A si kye ine fyakwu esho dafi o le lu mani, vla neta engyulo ngwi efa wo angwuto onzundze kwudzeke kwekwe yi ama.

¹¹ Engyulo ntona gbæ, <<Emi iGalalia, li ekye ngwi ema to mmene kye ine byi esho nghaa? iYesu ngwu a kyon inai ema lu esho ne, di li ito ofe ne kpoo ngwi o dika ye ba ese neni.>>

A dulu iMataya gbikye iJuda

¹² Ta ama ogbikye iYesu si yido mi iJerosalin mi Unggwu Olivi nani, ngwi me dafi itsitsi imai okye me ele ba ogalu iJerosalin.

¹³ Ngwi a wa kaka iJerosalin ne, a lu ozeesho mi imbe ngwi a lato mani. Ama nto ma li iPyita, iJon, iJensi, Andru, iFyilipi, iTomosu, iBatlomi, iMatu, iJensi ongwæ

Alfeo yi iSaimon ogbodami na beyi iJuda ongwæ iJensi.

¹⁴ Ama duu kwakye mbonyi le bibo alono duu, angbeka nto beyi ama li engyaa yi iMeri ono iYesu beyi emi ongwunon.

¹⁵ Mi egbe ntona iPyita kyato nto mi idzidze mghi ama onoyeye ntona (okwakye nme mmbwo dafi ideli onyi don osu sini)

¹⁶ si gbæ, <<Emi ongwunani, i wogyo ngwi Afe ka mbwumbwo mi ungwu ngwi Onodzi Osaan tsekise gbo to mi ondu iDevedi mi ikpewo iJuda, ongwu nme ofe nu ma bwa iYesu nani.

¹⁷ Ongwu nose li onyi mi ate mghi eyi di kyido ne yi eyi kpaa.>>

¹⁸ (Udza ngwi iJuda tu mi alobube mgban ma, o kye gya ikpese, ngwi non kye ewon widokwo. Ikwo mgban mwe gbobu efwee yangwuta.

¹⁹ Ali inggise mi iJerosalin fwo ungwoneni, ne a kwu imbe na mi ondudze mghi ama di Akedama, ngwi itan gbæ, ikpese eyi.)

²⁰ iPyita kiyayi gbæ, <<Bana, a lo mi Afe mghi iPaslami gbæ,

<< <Ni imbe mgban na la ayayi;

ni inggise onyi kpaa ka dze ele ba,>

<< <Ni inggise oka di kyi kyelu imbe ido mgban nani.>

²¹ Nghane li kyeme-kyeme ngwi eyi ka dulu inggise onyi mbi engyulo ama ntona, ongwu nteyi le kye yi eyi alono duu ngwi Otse iYesu ka dze yi eyi mani,

²² eyi mina inggise onyi nka kyo obwende mghi iYesu ne yi eyi. Ma dika li inggise ndze yi eyi wita mi ono ngwi iJon kyo iYesu iBatisima nghataa ba ono ngwi a kyi kyelu iYesu mbi eyi lu esho nani.>>

²³ Ne a si dulu engyulo efa ba iyayi: Onyi ma a li kwun di iJostusu ngwu iyin oka li iBasaba (iyin oka di li iTomosu) iyi oka ma li iMataya.

²⁴ A si bibo gbæ, <<Otse Imgbasho, abu ye itukwu ali inggise duu. Tso eyi inggise ongwu abu sadu mi idzidze inggise efa ntona

²⁵ ongwu nka kyelu imbe ido mghi ama ogbikye iYesu ne, ngwi iJuda dzanta lu imbe ndze mi ikyon mani.>>

²⁶ Ta a gbæfa, efa si kwu iMataya; man a kyon mbwoke yi iwiyodonyi ntonani.

2

Obaaba mghi Onodzi Osaan

¹ Ngwi egbe iPentikosu* wa gyo ne, ama duu kwakye mbonyi.

² Vla neta adu kye esho dafi onikyawo wa yaoke ozu ngwi a soto mani.

* **2:1 2:1 iPentikosu** Li oga ngwi emi Israi li kyon mi ono ngwi oga owe owato-wato mghi emi Israi nye egbe ngwusefa don iwyo mani.

³ A di ungwō ndze dafi amoola ganya wa dake ikye mgbi ama duu.

⁴ Ama duu si mbwo yi Onodzi Osaan man wita le gbo ondudze angbeka dafi Onodzi kye ma teyi mani.

⁵ Mi onō na, emi ijuda ama ndze yi imio mgbi Imgbasho kye mi ayese duu wa kwakye mi iJerusalem.

⁶ Onō ngwi a fwo adu ne ne, ibyi inggise kwakye. Nghaduu i kwulu ma ewo, ikyekye ali inggise fwo ma le gbo ondudze mgbi ongwu.

⁷ I kwulu ma ewo kpakpa, a si byita gbēe, <<Inggise ama nle gbodze ntone duu li emi iGalalia baa?

⁸ Ma i kyosinese ngwi eyi fwo ama duu le gbo ondudze mgbi eyi?

⁹ Emi iPatia, iMede yi Elami; iMesopotamia, iJudia beyi iKadosia, iPontu yi Asia,

¹⁰ iFrijia yi iPamfylia, Igyibiti beyi aye mgbi iLibya kwekwe yi iSereni, ingyoga mgbi iRoma

¹¹ (yi emi ijuda beyi ama ngwu kyat-itukwu ye le sunu Imgbasho mgbi emi iJuda duu), emi iKrete beyi emi Arabia, eyi fwo ma le gbo ungwō okwulewo mgbi Imgbasho mi ondudze mgbi eyi!>>

¹² I kwulu ma ewo a di wende, a si byi ewoma gbēe, <<Ungwōne tso sine?>>

¹³ Angbeka gbo ibwa nya ama onoyeye ntona gbēe, <<A wa ebye le fya.>>

IPyita gbodze yi ibyi inggise

¹⁴ Ne iPyita kyato dzekuntu yi iwyodonyi ntonani, kyile ela mgbān gbodze yi ibyi inggise ntona gbēe: <<Emidani emi iJuda beyi ema ama nto iJerusalem duu, detse nin gbōfwe odze ne nya ema; gado saan mi odze ngwi ani le nya ema neni.

¹⁵ Inggise ntone le fya ebye, dafi ema tsewe na ba. Kwa li obyī egypte mi egbegbe ta aani!

¹⁶ Ei, ungwōne li ungwō ngwi oyegbo iJowe tsekise gbōn dze ese gbēe:

¹⁷ <<Imgbasho gbēe, mi egbe ongwī olele, ani ka kye Onodzi mgbi ani yaoke mbi ali inggise duu.

Engwē ema engyulo yi engyaa kale yegbo, engbe mmafa mgbi ema kale di ine odiidi,

engyukwo mgbi ema kale woowo elela.

¹⁸ Mbi engbido mgbi ani kpaa, engyulo yi engyaa duu,

n ka kye Onodzi mgbi ani yaoke mboma mi egbe ntonani, man a ka yegbo.

¹⁹ N ka kyo ambe okwulewo mi esho mbyoo beyi ungwō ama okwulewo mi iteese, otso gbēe di ani dze yi mfyē.

N ka tiika mi ese adzi ni inggise ngwō ewoma,

ola dika gbimbe so yi iwu.

²⁰ A ka kyata onō yeē iyifu, di kyata ofyia yeē eyi duuse ni egbe oshewo

beyi okwōkwō mgbi Otse no ba.

²¹ Nghane ali inggise nkwi mi iyi mgbi Otse duu ka tu owato.>

²² <<Emi Israi, gado mi odze ne na; iYesu ongwī iNadzareti nose li inggise ngwu Imgbasho gbela yan di kyo ambe okwulewo mbi ema nye mbon, dafi ema abuema ye mani.

²³ Inggise ne a kyon wo ema abo mi ow-itukwu mgbi Imgbasho beyi oye-ye mgbān; ma ema noofe ni emi imbali, gbokwon ngwōn mi ekwatsi.

²⁴ Nghaduu Imgbasho kyilon mi ikwu, dulun to mi owulewo mgbi ikwongye, lubana li kyeme-kyeme ni ikwongye bwan adi ba.

²⁵ iDevedi gbodze mgbān gbēe:

<<Ani di Otse dze yi ani alono duu.

Ikyegbēe o dze abugye mgbi ani ne, ani ka teeyi ba.

²⁶ Nghane itukwu mgbi ani sheta

ide mgbi ani di dze yi atsa; ikpewo mgbi ani kpaa ka dze mi ewe ogbebyi,

²⁷ lubana abu ka dzita ani mi endzi ba, hona abu ka dzita

Ongwabu Osaan no bwa ba.

²⁸ Abu nu ani ye ofe oshishe; abu ka mbwo ani yi atsa mi ifafō mgbi abu.>

²⁹ <<Emi ongwunani, ani ka nya ema yi abo otsigēge gbēe iDevedi nli ikye mgbi ema na kwulu a kyon ndzi, ma endzi mgbān dze mmene nghataa ba ine.

³⁰ Kpaa ongwu nose li oyegbo di ye dafi Imgbasho zonu yan kpoklō gbēe ongwu ka wa kye ongwiba mgbān oka sōke itsuuto mgbān mani.

³¹ Ngwi iDevedi di ungwō ndze iyayi ne, o gbodze okye-kye mi ikwu mgbi iMedzaya nani, gbēe a dzanta mi endzi ba, naadi ikwō mgbān bwa ba.

³² Imgbasho teyi kyile iYesu ne luba oshishe, ma eyi duu li obwende mgbi otsitsi neni.

³³ A kyilon esho sōke abugye mgbi Imgbasho, o gbe Onodzi Osaan ngwi Otsōn zonu mani di kye ungwō ngwi ema le di diye fwo onene ne yaoke.

³⁴ Lubana li iDevedi nose lu esho ba, nghaduu o gbēe,

<<Otse Imgbasho gbo yi Otse mgbi ani gbēe:

<<Sōke abugye mgbi ani

³⁵ nghatakata ni Ani nu engyikyili mgbi abu yeē

itse mgbi abu ogbe afo do ele.>> >

³⁶ <<Ikyenghane emi Israi duu nu ma ye ungwɔnɛni: Imgbasho nu iYesu, ngwu ema gbokwon mi ekwatsi ne, yee Otse beyi iKrestu.>>

³⁷ Ngwi inggise ntone fwo odze ne ne, eka dze loma ta a byi iPyita beyi ama ogbikye iYesu angbeka ntona gbɛɛ, <<Emi ongwuneyi, eyi ka kyosine?>>

³⁸ IPyita nu uka gbɛɛ, <<Kyatitukwu nu ma kyo ema iBatisima, mi iyi mgbi iYesu iKrestu mi ikye odzita ema yi ali ibwubwe. Ta ema ka gbɛ umba mgbi Onodzi Osaan.

³⁹ Ondu odzɛɛdɛ ne dze ikye ema yi emi ongwɛ ema beyi ama nto mbombo ikye ama ngwu Otse Imgbasho mgbi eyi ka kwu ma ela duu mani.>>

⁴⁰ O di kwo ma ado yi elodze angbeka kwuba; di tekye nu ma gbɛɛ, <<Dulu ewema tase mi ungwɔ nka wa kyo eto obube neni.>>

⁴¹ Ama ngbɛ eso mgban ma a kyo ma iBatisima, i mɛ inggise idubu eta mbwoke mbwo mgbi ama mi egbe nani.

Okwakye mgbi ama onoyeye

⁴² A kye ewoma tswoke mi otsootso mgbi ama ogbikye iYesu beyi okwakye, ungwɔgye ogyeegye yi ewoma, ibredi oghaagha beyi ibo obɔɔɔɔ.

⁴³ I kwulu ali inggise duu ewo, ama ogbikye iYesu ntona di kyo ambe ama okwulewo gwuba.

⁴⁴ Ama onoyeye duu to yi eka di li kyo alungwɔ duu ungwɔnyi.

⁴⁵ A kye ungwɔ ngwi ama dzeɣan beyi okye duu gya, di gha nu ali inggise duu dafi okakewo mgbi otsungwɔn dze mani.

⁴⁶ Alegbe a li kiyayi okwakye yi ewoma mi ifyude ozu okwukwo osunu Imgbasho mi iJerosalin. A li gha ibredi mi ude mgbi ama di li gye yi ewoma mi atsa yi itukwu onyi,

⁴⁷ le tse Imgbasho dile tu mgbede mbi inggise duu. Ne Otse Imgbasho sile mbwo ama ngwu o dula ma wato ma mmbwo alegbe-alegbe.

3

IPyita kyile inggise ngbikye tukwu ese le bibo

¹ Egbe oka ne iPyita beyi iJon le ke ozu okwukwo osunu Imgbasho mi iJerosalin mi onɔ ibo mi obyɛ eta ngwi onɔ tashulu akpa.

² Onɔ na inggise oka ngwu gbikye tukwu ese kye ifu, a li kyon ka sɔke onufozu ozu okwukwo osunu Imgbasho mi iJerosalin ngwi a li kwun di osunse nani, le bo inggise ama nle kaka ozu ungwɔ alegbe-alegbe.

³ Onɔ ngwi o di iPyita yi iJon le kaka ne, o bo ma awuya.

⁴ IPyita yi iJon kye ine byun yeye. IPyita si gbɛɛ <<Kye ine byi eyi!>>

⁵ Inggise na si kye itukwu byike mboma, le tsewe gbɛɛ ongwu ka tu ungwɔ mboma.

⁶ Man iPyita gbɛɛ, <<N dze yi iyudza onzundze yi Abashi ba, kpaa ungwɔ ngwi ani dzeɣan ma, n ka kye nu abu. Mi iyi mgbi iYesu iKrestu ongwɛ iNadzareti kyato kyikye.>>

⁷ Ngwi o byin mi abugye ne, o yan abo non kyato, labolabo neta afo mgbi inggise na si fyumfyɛ.

⁸ O ta yile afo dzeke ese man wita okyikye. Ne o si lu yi ama mi ifyude ozu okwukwo osunu Imgbasho mi iJerosalin, le kyikye tablika dile tse Imgbasho.

⁹ Ngwi inggise duu din le kyikye dile tse Imgbasho ne,

¹⁰ a difwin dafi ka li inggise nli so le bibo mi onufozu ozu okwukwo osunu Imgbasho mi iJerosalin ngwi a li kwun di osunse nani, ta i kwulu ma ewo kpakpa mi ungwɔ nkyo yan mani.

IPyita gbɔdɛɛ yi ama ntongwine tole di mani

¹¹ Ngwi inggise obo ungwɔ ye wa beke yi iPyita yi iJon ne i kwulu inggise ntona duu ewo ta a ba onyonya wa tu ma mi imbe ngwi a li kwun di iwulu onufe mgbi iSolomu nani.

¹² Ngwi iPyita di nghane, o nya ma gbɛɛ: <<Emi Israi, kyosine ngwi ungwɔne le kwulu ema ewo? Kyosine ngwi ema le di eyi ine dafi li mfyɛ naadi osaan mgbi eyi ngwi eyi nu inggise ne kyikye?>>

¹³ Imgbasho mgbi Abraham, Adziki beyi ijeko; Imgbasho mgbi emi otseyi, kye okwɔkwɔ nu ongbido mgban iYesu. Ema kyon nu gbɛɛ nu ma ngwɔn, di tangwan mi inai iPlatu, bana o mina odzanta non lu.

¹⁴ Ema tangwe Ongwu nle Saan dile Nyaan nani, di mina gbɛɛ a ki dula inggise ongwɔ inggise nu ema.

¹⁵ Ema ngwɔ otsungwɔ oshishe, nghaduu Imgbasho kyilon mi ikwu. Eyi li obwende mi ungwɔnɛni.

¹⁶ Li oyeye onuunu mi iyi mgbi iYesu ngwi inggise ema di, di yon ne yee saan aani. Li iyi mgbi iYesu beyi oyeye onuunu nkye mbon ma nu ootse ngye lo inggise ne saan, ngwi ema di neni.

¹⁷ <<Onene, emi ongwunani, ani ye ta gbɛɛ ema kyungwɔne mi ine obuubu, dafi ama okye ema teyi kpaa tsekise kyo mani.

¹⁸ Nghaduu li ito ofe ngwi Imgbasho mbwumbwo ungwɔ ngwi ongwu tsekise gbɔn nye mbi ama ogbɛɛɛ aali, gbɛɛ iMedzaya mgbi ongwu ka wa gyadze.

¹⁹ Kyatitukwu yido luba mbi Imgbasho na, adzi ni Otse dze ema ta yi ali ibwubwe mgbi ema, onɔ onya otooto ka kye mbi Otse,

²⁰ Ono di kyema ngwi Otse ka nu ema mfyef ofufe. O ka kye iYesu deso nu ema, iMedzaya mgban ngwu o dudu-dudu nani.

²¹ Li kyeme ngwi o ka tila dze esho ng-hataa ngwi ono ka gyo ngwi Imgbasho ka yile alungwo duu sise, dafi o zondzu gbege nye mbi oyegbo mgban ama osaan mani.

²² Ikyesine iMose gbee, <Otse Imgbasho mgbi ema ka dudu oyegbo dafi ani mi idzidze ema nu ema; li kyeme ema ka gado mi alungwo ngwi o nya ema duu.

²³ Ali inggise ngwu gado fwon ba duu a ka dulun mbi engwe Imgbasho dzeke enggenga.>

²⁴ <<Mi otsitsi ama ogbeese wita mbi iSamue lu mbi angbeka duu, teyi gbodze ungow ama ntole kyo mi ese ongw onene neni.

²⁵ Nghane ema li ama gyokwude mgbi ama ogbeese beyi ondu odzeedze ngwi Imgbasho dze yi otsema mani. O nya Abraham gbee, <Ikpewo eto mgbi abu inggise mi ese duu ka tu mse.>

²⁶ Ono ngwi Imgbasho dudu ongbido mgban ma, o kyon deso mbi ema ababo ikye okye mse be ema ewo mi okyata ema mi imbali mgbi ema.>>

4

A kye iPyita yi ifon ba ine okwakye mgbi eme ifuda

¹ Ama ofife mgbi Imgbasho yi inggise ogbe obaka ama ongyo ozu okwukwo osunu Imgbasho mi iJerusalem teyi beyi emi iSadusi ba mbi iPyita yi ifon mi ono ngwi a kale gbodze yi inggise ntona mani.

² I kaka ma ewo kpakpa ikyekye ama ogbikye iYesu le tso inggise ntona dile gbo okye-kyee mi ikwu mgbi iYesu kpaa.

³ A bwa iPyita yi ifon, ma ikyegbee ono gbeese ne, a kye ma woke obawi nghataa egbe fa.

⁴ Nghaduu ibyi inggise ama nfwo eso na duu noyeye, ne mmbwo mgbi ama okyedso iYesu si she me dafi idubu eda sini.

⁵ Tegblifan ne, ama ogbe inggise teyi, engyukwo beyi etsetse mgbi ola mgbi iMose kwakye mi iJerusalem.

⁶ Anna okwukwo inggise ofife na dze mmanani, yi iKayafa, ifon, Alekidzanda beyi inggise angbeka mi eto mgbi okwukwo inggise ofife nani.

⁷ A nu ma kye iPyita beyi ifon ba inai ma, si wita obyi ma gbee: <<Li mi ali mfyef naadi ali iyi ngwi ema le kyungwone?>>

⁸ Ne iPyita, ngwu Onodzi Osaan shewo mbon na, nya ma gbee: <<Ema ama oteyi beyi engyukwo mgbi inggise ntonene!

⁹ Yeba ni a kwu eyi ela gbee ni eyi nu uka mi ikye ali osuse ngwi eyi kyo yi inggise

ngwu gbikye tukwu ese ne, di byita dafi a kyilon yo,

¹⁰ ngyese ye odze ne na, ema yi emi Israi duu: Li mi iyi mgbi iYesu iKrestu ongw iNadzareti, ongwu ema kyon gbokwo ekwatsi kpaa ngwu Imgbasho kyilon mi ikwu na, ngwi ootse mgbi inggise ne ngye ngwi o kwuzunto mi inai ema aani.

¹¹ O li

<<Ikwtuse ngwi ema ama ombe ozu fwan, ngwi i wa yee ikwtuse okwulu ikye ozu mani.>

¹² Owato dze mbi inggise oka ba, ikyesine iyi oka dzema mi ese ne ngwi a kye nu gbee inggise ka wato kyeme ba.>>

¹³ Ngwi okwakye di abo otsigage mgbi iPyita beyi ifon di difwi gbee a kpayi afe ba, a li inggise ama n ye unka ba ne, i kwulu ma ewo man a kwambe gbee inggise ntone nose dze yi iYesu.

¹⁴ Nghaduu ngwi a di inggise ongwu a ngyelun ootse na kwudze yi ama ne, odze onyi kpaa dzema ngwi a ka gbo ba.

¹⁵ Nghane a nya ma gbee nu ma dzata okwakye, ta a si wita okponya yi ewoma.

¹⁶ A byita gbee, <<Li alungwo ngwi eyi ka kyo yi engyulo ntone?>> <<Bana ali inggise ndze iJerusalem duu ye gbee a kyungwo okwulewo okwukwo, ma eyi ka tangwan gbe ba.

¹⁷ Kpaa onu ungowone kwulese mi ogbofwe kiyayi mi idzidze inggise yo, eyi ka wo inggise ntone ola kyeme gbee, nu ma ka gbodze yi inggise onyi kpaa mi iyi ne wuba.>>

¹⁸ Ne a di kwu ma ela ba ifun si wo ma ola gbee, nu ma ka gbodze hona tsungwo mi iyi mgbi iYesu wuba du.

¹⁹ Nghaduu iPyita yi ifon nu uka gbee, <<Tsewe abuema na ni i tishi mi ine Imgbasho gbee ni eyi fwo ema dzata Imgbasho yo.

²⁰ Lubana eyi ka yagba so shili mi ungow ngwi eyi di diyef fwo gbe ba.>>

²¹ Ngwi a di wo ma ola yee ne, a nu ma lu. A yagba ye dafi ama ka kwo ma ado ba, ikyekye ali inggise duu le tse Imgbasho mi ungow nkyo nye nani.

²² Ikyesine inggise ngwu a ngyelun ootse kwulewo na, nga onova ngwusefa wa.

Ibo mgbi ama onoyeye

²³ Ngwi a dze ma ta ma; iPyita yi ifon yido lu mbi emidama ka nya ma alungwo ngwi engyukwo ama ofife yi emi obotse gbo yi ama mani.

²⁴ Ono ngwi a fwo odze ne ne, a kyile ela mgbi ama esho yi eka mi ibo mbi Imgbasho. A gbee <<Otse Imgbasho onghaanga, abu ta esho yi ese yi ekyoo okwukwo, yi alungwo nto efu duu.

²⁵ Abu gbɔdzɛ mi Onodzi Osaan nye ondu mgbi ongbido mgbi abu, otseyi iDedevi gbɛɛ:

<< <Kyonɛ ngwi Udzengye le kyitingga ngwi inggise dile tsewodze ikwangha?

²⁶ Uto ongwɛ esɛ nɛ li tsewe ika man ama ogbe inggise teyi li kwakye yi eka

kye afo twesɛ yi Otse Imgbasho beyi iMedzaya mgban kpaa.>

²⁷ Mi otsitsi yɔ, iHerude yi iPontu iPlatu kye ewoma kwakye yi Udzengye beyi emi Israi mi ogalu nɛni ikye okye afo twesɛ yi ongbido mgbi abu osaan iYesu, ongwɛ abu kye engyie kyun ikye nani.

²⁸ A kyungwɔ ngwi mfye yi oweka mgbi abu teyi kye bwalu dze esɛ gbɛɛ ka kyo mani.

²⁹ Ngwi i dze nghanɛ Otse Imgbasho, di mi ega odzɛdzɛ mgbi ama di tobyi engbido mgbi abu nu ma gbeesɔ mgbi abu yi abo otsigege.

³⁰ Na abo mgbi abu ikye ongyelu ootse di kyo ambe ama okwulewo yi ungwɔ okwulewo mi iyi mgbi ongbido mgbi abu osaan iYesu.>>

³¹ Ngwi a bibo ngye nɛ, imbe ngwi a kwakye ma suusu. Ta ama duu a mbwo ma yi Onodzi Osaan man a si gbeesɔ Imgbasho yi abo otsigege.

Ama onoyeye gha ungwɔ ngwi ama dzeyan

³² Ama onoyeye ntona duu dze yi itukwu onyi. Onyi mboma kpaa li tso gbɛɛ ungwɔ ngwi ongwɛ dzeyan li mgbi ongwɛ ba, kpaa a li kye ghalu alungwɔ ngwi a dzeyan duu.

³³ Yi mfye okwulewo ama ogbikye iYesu ntona kiyayi okyo obwendɛ mi okyɛɛ-kyɛɛ mgbi Otse iYesu mi ikwu, elela mgbi Imgbasho di dze yi ama kpakpa.

³⁴ Ungwɔ kwo inggise onyi kpaa oba mi idzidze ma ba. Ikyesine alono duu ama ndze yi ikpese naadi ozu li kye gya, kye awuya ngwi a kye gya ma ba

³⁵ wa nu ama ogbikye iYesu, ta a li gha nu ali inggise dafi imina mgbi otsungwon dze mani.

³⁶ IJose, inggise iLevi kye mi iSapru, ongwɛ ama ogbikye iYesu kwun di iBanabasi (ngwi itan gbɛɛ ongwɛ onu itukwu ofyumfye-fyumfye),

³⁷ kye ikpese mgban gya kyelu awuya ma ba wa lakiyayi ama ogbikye iYesu.

5

Anania yi iSafira

¹ Nɛ inggise ngwu iyin di Anania, beyi owan iSafira, kpaa kye ikpese gya.

² Yi oye-ye mgbi owan saan o kye mwalu awuya na da ikye ewon, man kye ongwɛ

nsisi ma ba wa lakiyayi mgbi ama ogbikye iYesu.

³ IPyita si gbɛɛ, <<Anania, kyɔsine ngwi iSatan gbɛ abu itukwu sɔ nghaa, ngwi abu mwonya nya Onodzi Osaan di kye mwalu awuya ngwi abu kye ikpese gya kye dze ewabu kɛ?

⁴ I ple li mgbi abu duuse abu kye gya lo? Ma ngwi abu kye gya ma, awuya ma li mgbi abu baa? Li alungwɔ nu abu tsewe okyo ito ungwɔnɛ? Li inggise ngwu abu mwonya nya ba, kpaa li Imgbasho.>>

⁵ Ngwi Anania fmo odze nɛ mata, o si gbese kwulu. Nɛ imio wo ali inggise nfwo ungwɔ nkɔ na duu.

⁶ Neta engbe mmafa to ba wa kye ikwɔ mgban ndi woke angwuto, kyon lu ka ndzi.

⁷ I nye obyi eta man owan wa kaka, o ye ungwɔ nkɔ waba.

⁸ IPyita byun gbɛɛ, <<Nya ani, li mmya ngwi abu yi Anania tu mi ikpese na dɛɛn? >> O gbɛɛ, <<Eɛn, li mmya ma aani.>>

⁹ IPyita nyan gbɛɛ, <<Kyɔsine ngwi ema bwondu ombadi Onodzi mgbi Otse Imgbasho? Di! Atafa mgbi inggise ama nkye obabu ndzi to onufe aali, ma a dika kye abu kpaa tase.>>

¹⁰ Mi onɔ na mata o gbese lakiyayi mgbi iPyita si kwulu. Nɛ engbe mmafa ntona kaka ifun, ngwi a di gbɛɛ o kwulu nɛ, a kyon tase lu ka ndzi mi ewo endzi mgbi oban.

¹¹ Imio wo emi iKrestu kpakpa beyi ama nfwo ungwɔ nkɔ na duu.

Ama ogbikye iYesu ngyelu ibyi inggise ootse

¹² Ama ogbikye iYesu kyo ambe ama okwulewo ibyibyi yi ungwɔ ama okwulewo mi idzidze inggise ntonani. Ma ama onoyeye ntona duu li kwakye yi ewoma mi iwulu onufe mgbi iSolomu.

¹³ Dafi inggise kye ma wuuta kpakpa nɛ kpaa, inggise onyi li boofɛ ka kwakye yi ama ba.

¹⁴ Nghaduu, engyulo yi engyaa kwuba noyeye mbi Otse di mbwo ma mmbwo.

¹⁵ Ikyenghane, inggise kye ama ndotse ba ondoofɛ wa lake akwulo yi obutu gbɛɛ ni i ndende kpaa onodzi mgbi iPyita no gbo tukwu angbeka mi ele mi onɔ ngwi o le nye mani.

¹⁶ A gbe ibyi inggise kye igeli ama nto kwekwe wa kwakye mi iJerosalin, ama ndotse yi ama ngwu onodzi ibwubwe ngwunu ma, a si ngyelu ama duu ootse.

A nu ama ogbikye iYesu iso

¹⁷ Nɛ okwukwo inggise ofɛɛ beyi ama okyedɔn duu, ama nto mi aye mgbi iSadusi ma, yɛɛ okyo ama ogbikye iYesu uwaba.

¹⁸ A bwa ama ogbikye iYesu ntona gbɛ ma woke obawi ndze ikye ali inggise duu mani.

¹⁹ Nghaduu, mi otu ma ongyeso mgbi Otse kyi kwulu onufe obawi gbe ma tase.

²⁰ O gbæ, <<Lu na, ka kwudzeke mi ifyude ozu okwukwo osunu Imgbasho mi iJerosalin, di nya inggise ntona eso mgbi oshishe ofufe ne yæye.>>

²¹ Ngwi egbe fa ne, a kaka imbe okwakyè mi ozu okwukwo osunu Imgbasho mi iJerosalin, dafi a ple nya ma mani, si wita otso inggise ntonani.

Ono ngwi okwukwo inggise ofife yi ama okyedon wa to ne, a kwu ewoma ela okwakyè beyi engyukwo emi Israi duu. Ta a deso ke obawi gbæ nu ma kye ama ogbikyè iYesu ntona wa nu ma.

²² Nghaduu ngwi a ka to obawi ne, emi ido ntona di ma mmana ba. Ne a yido ka nya ma gbæ,

²³ <<Eyi ke ka di obawi tukwu saan, yi ama ongyoongyo kwudze to onufe; kpaa ngwi eyi kwulu onufe ne, eyi di inggise onyi mi ifun ba.>>

²⁴ Ngwi ongyukwo obaka mi ozu okwukwo osunu Imgbasho mi iJerosalin beyi engyukwo ama ofife fwo eso ne ma i wo ma ende, a le tsewe ungwō nkiyayi mani.

²⁵ Ne inggise oka si ba wa gbæ, <<Dika! Engyulo ngwu ema gbe ma wo obawi ntona, to ifyude ozu okwukwo osunu Imgbasho mi iJerosalin le tsungwo ma.>>

²⁶ Mi odze na na, inggise ogbe ama ongyo obawi teyi ke yi emi ido mgban ka kye ama ogbikyè iYesu ntona luba. A kyo mi mfyè ba, ikyekye a mio gbæ inggise ntona wa tse ama akwutse.

²⁷ Ngwi a kye ama ogbikyè iYesu ba ne, a nu ma ba inai okwakyè adzi nii okwukwo inggise ofife byi ma ita.

²⁸ O gbæ, <<Eyi wo ema ola kpoklō gbæ ni ema ka tsungwo mi iyi ne ba. Nghaduu ema gbafwe otsootso mgbi ema mi iJerosalin wa, di mina onu eyi gye obube mi eyi mgbi inggise neni.>>

²⁹ IPyita yi ama ogbikyè iYesu angbeka ntona nu uka gbæ: <<Li Imgbasho ngwu eyi ka kyo ola mgban kyeme aali li inggise ba!

³⁰ Imgbasho mgbi emi otseyi kyile iYesu mi ikwu, ongwu ema ngwōn mi okyon gbokwo ekwatsi nani.

³¹ Imgbasho kyilon esho kyon dzeke abugye mgbi ongwu dafi Ongwuuto yi Onagbe mani, adzi non nu okyatitukwu beyi odzita inggise yi ali ibwubwe mbi emi Israi.

³² Eyi li obwende mgbi ungwō ntonani, beyi Onodzi Osaan ongwu Imgbasho kye nu ma asunun na kpaa.>>

³³ Ono ngwi emi okwakyè ntone fwo odze ne ma, itukwu fu loma kpakpa a di mina okye ngwōlu ma.

³⁴ Nghaduu inggise iFarasi ngwu a li kwun gbæ iGamalie, otsetse mgbi ola mgbi

iMose, ongwu inggise ntona tsatsadu nun mmwæ, kyato mi okwakyè noola gbæ ni a kye ama ogbikyè iYesu ntona toke ese mi ono gwee se.

³⁵ Ne o si gbōdze yi ama gbæ: <<Ema emi Israi, kyo dumō mi ungwō ngwi ema tsewe okyo yi engyulo ntone neni.

³⁶ Ongwæ ono ngwi nye ma iTeuda to, le tso gbæ ongwu li ungwō, ne inggise mæ ideli ene kyedon. A ngwōn, ama okyedon duu ganya, ta alungwō duu yæ mnana.

³⁷ Ongwu nye, iJuda ongwu iGalalia to mi egbe olo umbwo man inggise ibyibyi di kyedon. Ongwu kpaa a ngwōn, ta ama okyedon duu ganya.

³⁸ Inghawane, mi odze ne, ani le wæ ema odze gbæ: dzata engyulo ntone nu ma lu! Ikyesine ni itodze hona okyaokya mgbi ama tiita mbi inggise owamyè yo, ka dondu.

³⁹ Kpaa ni i kye mbi Imgbasho yo, ema ka yagba ngha ma ba; ema ka di ewema kye afo twese yi Imgbasho ta.>>

⁴⁰ A si gbæ elodze mgban, ta a kwu ama ogbikyè iYesu ela si gbo ma ibe. Man wo ma ola gbæ, nu ma ka gbōdze mi iyi mgbi iYesu wuba, si nu ma lu.

⁴¹ Ama ogbikyè iYesu ntona dzita okwakyè, le tsatsa ikyekye Imgbasho kye ama wuuta dafi ama gyadze tu ayiwi mi ikye iyi mgbi iYesu mani.

⁴² Alegbe-alegbe, mi okwakyè mi ozu okwukwo osunu Imgbasho mi iJerosalin beyi ude ude, a yama nya ole tso dile gbo Eso Osuse gbæ iYesu li iMedzaya ba.

6

A sadu inggise egyafa

¹ Mi ono ngwi engwafō mgbi iYesu wale mbwo kpakpa ne, emi iJuda ama ogbo ondu iGriki le kwondukwō ikye ama ogbo ondu iHibru ikyekye a kye owakwade mgbi ama wuuta mi ungwogye ngwi a li gha alegbe-alegbe na ba.

² Nghane ama ogbikyè iYesu iwiyodefa ntona kwu ama onoyeye ntona duu kwakyè si gbæ, <<Ka li ayin ba kini eyi dzita ido mgbi elodze Imgbasho yæ le gha ungwogye yo.

³ Emi ongwunani, sadu engyulo egyafa mi idzidze ema, ama ngwu ema ye gbæ a dze yi Onodzi saan yi ozoyeye mani. Eyi ka yile ido ne wo ma abo

⁴ ta eyi ka yile itukwu mgbi eyi nu mi ibo yi ido mgbi elodze Imgbasho.>>

⁵ Ewodze ne kpa inggise ntona duu. A sadu iStivin, inggise ngwu mbwo yi oyeye onuunu beyi Onodzi Osaan; iFyilipi kpaa, iProkoru, iNikano, iTimon, iPamena, beyi iNikola ongwu nkye mi Antioku, nkyata luba odze Imgbasho mgbi emi iJuda nani.

⁶ A gbe inggise ntona tso ama ogbikye iYesu, man a bibò woma di kye abò dò ma ikye.

⁷ Nghane elodze Imgbasho gbofwe. Mmbwo mgbi engwafò iYesu mi iJerusalem she kpakpa, ne ama ofife kwuba yee ama onoyeye.

A bwa iStivin

⁸ Ne iStivin, inggise ngwu elela mgbi Imgbasho dze mbon yi mfyee kpakpa, kyungwo ama okwulewo yi ambe okwulewo mi idzidze inggise ntonani.

⁹ Ne, inggise angbeka mi ozu okwakye mgbi ofyee ama a she ma adi ta wita otangwodze yi iStivin. A li emi iJuda ama nkye iSirini yi Alekdzandra beyi ayese mgbi iSilisia yi Asia.

¹⁰ Nghaduu a yagba kye afò twese yi ozoyeye mgban hona Onodzi ndze mbon ma ba.

¹¹ Ne a we inggise angbeka ewe daada ikye nu ma gbée, <<Eyi fwo iStivin gbo elodze ofya iMose yi Imgbasho ito.>>

¹² Mi odze ne, a kyile inggise ntona angbi yi engyukwo beyi etsetse mgbi ola mgbi iMose. A bwa iStivin kyon ba okwakye.

¹³ A gbe ama omwonya angbeka ba, wa mwonya gbée, <<Inggise ne nya ogbodze obube ikpewo imbe osaan ne beyi ola waba.

¹⁴ Ikyesine eyi fwon le gbogbée iYesu ongwí iNadzaréti ne ka bulu imbe ne di nyine aletò ngwí iMose kye wo eyi abò neni.>>

¹⁵ Ama nsoto okwakye duu kye ine fyakwu iStivin, man a di ine mgban dze dafi ine mgbi ongyeso mani.

3

Elodze mgbi iStivin mbi okwakye

¹ Ne okwukwo inggise ofife byun gbée, <<Odze ntone li otsitsii?>>

² IStivin nu uka gbée: <<Emi ongwunani yi emi otsani, gado mbi ani na! Imgbasho mgbi okwòkwò tò tò otseyi Abraham ngwí o ka dze iMesopotamia mani, duuse o wa dze iHaran.

³ Imgbasho gbée, <Dzita ese mgbi abu yi emidabu, lu ikpese ngwí ani ka tso abu mani.>

⁴ <<Nghane o dzita ikpese mgbi emi iCadía lu ka so iHaran. Ngwí otson wa kwulu nye ne, Imgbasho don eso ba ikpese ngwí ema todze ele onene neni.

⁵ Imgbasho nun okwude onyi mmene ba, atafò ikpese onyi kpaa ba. Nghaduu Imgbasho zonu yan gbée ongwí yi eto mgban ka yee otsungwo ikpese neni, nghataa gyegwu. Mi onò na Abraham dze yi ongwé waba.

⁶ Li odze ngwí Imgbasho gbo yan aani: <Eto mgbi ema ka li ingyoga mi ese ngwí li mgbi ama ba, a ka kwu ma ofyee di nu ma adze mi onova ideli ene.

⁷ Imgbasho gbée, nghaduu ani ka kwo ese ngwí a to ele dafi ofyee ma ado, ngyeduu a ka tase mi ese na wa sunu ani mi imbe neni.>

⁸ Ne o nu Abraham ondu odzèedze mgbi ikye okye-kye. Man Abraham yee otso Adziki di kyan ikye ngwí a mban nye egbe egyata mani. Adziki wa yee otso ijeko, ijeko di wa yee otso iwyodefa emi otsikyeyi ntonani.

⁹ <<Ikgyegbée emi otsikyeyi ntona di iJose tanyi ne, a kyon gya dafi ofyee lu Igyibiti. Nghaduu Imgbasho dzeayan

¹⁰ di dulun tò mi okakewo mgban duu. Imgbasho nu iJose ozoyeye di yan abò nu untse osuse don mbi iFaro uto mgbi emi Igyibiti; nghane o non yee inggise ogbe emi Igyibiti teyi yi ude mgbi ongwí duu.

¹¹ <<Ne omani wa dò mi Igyibiti yi iKana duu, kye adze kpakpa ba, emi otseyi si tu ungwogyee wuba.

¹² Onò ngwí ijeko fwo gbée ungwogyowe dze Igyibiti ne, o dò emi otseyi eso ke ele ababo.

¹³ Mi okèèke mgbi ama ongwí fan ma, iJose nya emi ongwunon inggise ngwí ongwó dze mani, man iFaro si ye odze eto mgbi iJose.

¹⁴ Ngwí ungwóne nye ne, iJose dèso mbi otson ijeko yi eto mgban duu, a li ngwuseta don iwyo diwyeda duudu.

¹⁵ Ne ijeko si lu Igyibiti, li mi imbe na ngwí ama duu ka kwulu aali.

¹⁶ A yile ikwò mgbi ama luba iSheken wa ndzi mi endzi ngwí Abraham gya nose mi abò mgbi emi ongwé iHamo mi awuya mani.

¹⁷ <<Ngwí onò wa mba ngwí Imgbasho ka mbwo ondu odzèedze yi Abraham ne, mmbwo mgbi emideyi mi Igyibiti she kpakpa.

¹⁸ Ne uto ofufe, ngwí ye unkonyi mi odze mgbi iJose ba, yee uto mgbi Igyibiti.

¹⁹ O ngwunu emideyi di si emi otsikyeyi, gbée nu ma gbe engwengyulo eyeyi ngwuta adzi nu ma kwulu.

²⁰ <<Mi onò na a mba iMose, ma o li nngwadza mi ine mgbi Imgbasho. A gbewe byun mi ude otson ofya eta.

²¹ Ngwí a kyon tò dzata ude ne, ongwé iFaro ongwó ongyaa kyon si byun dafi ongwán mani.

²² A tso iMose ozoyeye mgbi emi Igyibiti tsatsa, o diye datu mi elodze yi okýòòkúyò.

²³ <<Onò ngwí iMose li onova ngwusefa ma, itukwu kyee lon oka kpadi emi Israi emidan.

²⁴ O di onyi mi ele ngwí inggise Igyibiti le nun adze, nghane o ke oka tobyun di

kpumkpa ikyon mi okyi ngwolu inggise Igyibiti nani.

²⁵ IMose tsewe gbæ, emidongwu ka difwi gbæ Imgbasho kye ongwu le kyidɔ ikye odulu ma tɔ, nghaduu kpaa a difwi ba.

²⁶ Tegblifan iMose wa kpatse yi emi Israi nghi efa tole gblibe. O fya oyile ma gyiide mi ogbæ, <Engyulo, ema li engwuno ewe kysine ngwi ema mina ota ewema mmya?>

²⁷ <<Nghaduu ongwu nle kyo yi oka timbi ma tsamu iMose lu enggenga si gbæ, <Li eme nu abu mfye okye eyi teyi di gbo eyi ikwo?>

²⁸ I mina abu ongwu ani dafi abu ngwu inggise Igyibiti edede naa?>

²⁹ Ngwi iMose fwo odze ne ne, o tsinya lu iMidian, imbe ngwi o ka dze ingyoga di kye ongyaa mba engbe efa.

³⁰ <<Ngwi i wa nye onova ngwusefa ne, ongyeso mblegba tu iMose mi ambe mgbi oshæ ogyola mi imbe okplagada kwæwe yi Unggwu iSinai.

³¹ Ngwi iMose di ungwone ne, i kwulun ewo. Ngwi o gbo ke kwæwe oka di saan ne, o fwo ela mgbi Otse Imgbasho gbæ:

³² <Ani li Imgbasho mgbi emi otsabu, Imgbasho mgbi Abraham, Adziki yi ijeko.> IMose tsatsa yi imio di yagba kye ine byi ola na wuba.

³³ <<Ne Otse Imgbasho si nyan gbæ, <Kyi dula okpafɔ mgbi abu; ikyekye imbe ngwi abu kwudze ne li imbe osaan.

³⁴ Ani di adze mgbi emidani mi Igyibiti wa. Ani fwo andu omama mgbi ama di ba ese owa she ma adi ta. Ba onenen, n ka dɔ abu eso ye ke Igyibiti.>

³⁵ <<Nene li iMose ngwu a teyi fwan yi elodze gbæ, <Li eme nu abu li inggise ogbe eyi teyi di gbo eyi ikwo?> Li iMose ne kpɔ ngwu Imgbasho nye mbi ongyeso mblegba tun ngwi oshæ le gyola mani. Dɔn eso no ka li inggise ogbe ma teyi di dula ma tɔ.

³⁶ O gbe ma tase mi Igyibiti di kyungwu ama okwulewo yi emi ambe okwulewo mi Igyibiti, mi ekwoo omuma okwukwo yi imbe okplagada mi onova ngwusefa.

³⁷ <<Nene li iMose ngwu nya emi Israi gbæ, <Imgbasho ka kye oyegbo ndæ dafi ani mi ididze ema dæɔ nu ema mani.>

³⁸ O wodze okwakye mi imbe okplagada, yi ongyeso ngbodze yan mi Unggwu ongwu iSinai, beyi emi otseyi; o di gbæ elodze oshishe okye wa gbo nya eyi.

³⁹ <<Nghaduu emi otsikyeyi gbela yan ba. A fwan, di mina gbæ ama ki ye lu Igyibiti.

⁴⁰ A nya Eron gbæ, <Me eyi Imgbasho ama nka kye eyi teyi mani. Lubana iMose ngbe eyi tɔ mi Igyibiti ne, eyi ye ungwu nkyon ba!>

⁴¹ Nana li onɔ nose ngwi a mæ adagyæ mi odzædæ mgbi ongwumnda mani. A gbæ ifæ

ofe-fæ ba ele di kyo oga osunu ungwɔ ngwi ama mæ mi abɔ mgbi ama.

⁴² Nghane Imgbasho fashi iyikpa tse ma yile osusunu mgbi ama nu mæ mi esho. Ungwone kwokyi yi ungwɔ ngwi a lo mi Afe mgbi ama ogbæse gbæ:

<< <Emi Israi! Li ani ngwu ema ngwu ifyungwu

di fifæ nu mi onova ngwusefa mi imbe okplagadaa?

⁴³ Emi adagyæ ngwi ema mæ osunu nani, ema kyile ude angwula ongwu iMoleki esho yi mæ

mgbi Imgbasho mgbi ema iRefanu.

Nghane n ka lo ema onya lu anɔ oka>

nye-nye iBabylon kpaa.

⁴⁴ <<Emi otsikyeyi dze yi iTabenako obwende yi ama mi oshæ. A man dafi Imgbasho tso iMose mi odzædæ ngwi o di mani.

⁴⁵ Dafi a kyi gbelu iTabenako ne, emi otseyi kyi kyelu byi yi ama, mi onɔ ngwi iJoshua kye ma teyi kaka ese ngwi Imgbasho kyi gbelu nu ma nani. Itila dze ikpese na nghataa ba onɔ mgbi iDavedi,

⁴⁶ ngwu ikyese mgbi Imgbasho dɔn, o di bɔn ibɔ gbæ ni ongwu mbe imbe ngwi Imgbasho mgbi ijeko ka dze nani.

⁴⁷ Kpaa li iSolomu mbaan ozu nani.

⁴⁸ <<Nghaduu, onghaangha na, li la ozu ngwi inggise mbe ba. Dafi oyegbo gbogbæ:

⁴⁹ << <Esho li esuto mgbi ani,

ese li imbe mgbi ani ogbe afɔ dɔ.

Li ali ito ozu ngwi abu ka mbe ani ele?

Li nga Imgbasho gbo aali.

Naadi li mi ole ngwi imbe mgbi ani otonya ka dze?

⁵⁰ Li abɔ mgbi ani mæ ungwɔ ntonɛ duu baa?>

⁵¹ <<Ema ama ndɔto ibiba dzogbo di kyi-ikye mi itukwu yi adɔ ba neni! Ema to yeye dafi emi otsema mani: Ema li kye afɔ twesæ yi Onodzi Osaan alonɔ duu!

⁵² Oyegbo teyi dzema ngwu emi ot-sikyema nose nun iso baa? A kye ngwolu ama ngbo obaaba mgbi ongwu nle saan na kpaa. Ma onene ema kyon gya di ngwon wa.

⁵³ Ema ama ngbe ola ngwi nye abɔ ongyeso mgbi Imgbasho kpaa kyo mi ele ba neni.>>

A tse iStivin akwutse

⁵⁴ Ngwi emi okwakye fwo odze ne mi ondu mghan ne, a nye yi itingga di kwolu ine ikye yan.

⁵⁵ Kpaa iStivin, mbwo yi Onodzi Osaan, o ndine ke esho si di okwɔkwo mgbi Imgbasho yi iYesu kwudze abugye mgbi Imgbasho.

⁵⁶ O gbæ, <<Dika, ani di esho kwulu Ongwe Inggise di kwudze abugye mgbi Imgbasho.>>

⁵⁷ Mi odze ne a kye abo tukwu ado mgbi ama, le kwu ela mi ela okwukwo, ama duu kye tukwun,

⁵⁸ kwon tase mi ogalu si wita otsan akwutse. Nghanæ, emi obwende gbe angwuto mgbi ama wa toke iyayi mgbi ongwe mmafa ngwu a li kwun di iSol nani.

⁵⁹ Ngwi a le tsan akwutse ne, iStivin bibo gbæ, <<Otse iYesu, kyi gbelu onodzi mgbi ani.>>

⁶⁰ Ne o gbe akwafu kwoke ese makwo to ese gbæ, <<Otse, ka we alobube ne ikye ma ba.>> Ngwi o gbodze ne mata, o si yulu.

8

¹ ISol dze imbe nani di gbela ikwu iStivin.

ISol nu emi iKrestu iso

Mi egbe na iso gbobu to ikye emi iKrestu mi iJerosalin, ne ama duu ganya kpatse iJudia yi iSamaria, i sisi ama ogbikye iYesu yuoma.

² Emidi Imgbasho kye iStivin ndzi di tsukwu kpakpa ikyon.

³ Nghaduu iSol wita odzili emi iKrestu. O le kaka ude ude, le kwo ama onoyeye engyulo yi engyaa gbe ma woke obawi.

IFyilipi gbeeso mi iBatlomi

⁴ Ama ngwu a ganya ma na, gbeeso ne mi ali imbe ngwi a ke duu.

⁵ IFyilipi ke ogalu oka mi iSamaria ka gbeeso mgbi iKrestu mi ele.

⁶ Ngwi ibyi ntona fwo iFyilipi di di ambe okwulewo ngwi o kyo ne, a nghao gbekabyi mi odze ngwi o gbo mani.

⁷ Onodzi ama okpekpe tase mbi inggise ibyibyi yi ela ota-ta, ama ngwu alewo kwulu yi ama ngbikye tukwu ese kwuba a ngyelu ma ootse.

⁸ Man atsa si dze ogalu na kpakpa.

ISaimon inggise obudei

⁹ Inggise oka dze ogalu na li kyo obudei ono ke, li kwulu emi iSamaria duu ewo kpakpa, a li kwun di iSaimon. O tsaabo igge gbæ ongwu li ongbodzi inggise.

¹⁰ Ta ali inggise, ama nshewo yi ama n ye ese duu, kye eka mgbi ama nu mbon si li wulu gbæ, <<Inggise ne li mfyee mgbi Imgbasho ngwi a ye gbæ li mfyee ogbagbadzidzi mani.>>

¹¹ A kyedon ikyekye ono ke ngwi o le kyungwo okwulu ma ewo yi obudei mghan.

¹² Kpaa ngwi a nu iFyilipi oyeye dafi o gbo Eso Osuse mgbi esuto mgbi Imgbasho beyi iyi mgbi iYesu iKrestu ne, a kyo ma iBatisima, engyulo yi engyaa duu.

¹³ ISaimon abuton noyeye ta a kyon iBatisima. O di kyedo iFyilipi mi ali imbe

duu, i kwulun ewo mi ambe okwulewo kpakpa yi ungwo ama okwulewo ngwi o di ntonani.

¹⁴ Ono ngwi ama ogbikye iYesu mi iJerosalin fwo gbæ, emi iSamaria gbe Imgbasho ne, a do iPyita yi iJon eso ke mboma.

¹⁵ Ngwi a ka to ne, a bibo wo ma ikyegbæ nu ma gbe Onodzi Osaan,

¹⁶ ikyena Onodzi Osaan ba mbi inggise mgbi ama onyi waba; a kyo ma iBatisima mi iyi mgbi Otse iYesu kyoona.

¹⁷ Ne iPyita yi iJon kye abo do ma ikye ta a si gbe Onodzi Osaan.

¹⁸ Ngwi iSaimon di gbæ li mi abo mgbi ama ogbikye iYesu okye do ma ikye ta ngwi a kye Onodzi nu ne, o kye awuya ba mboma

¹⁹ si gbæ, <<Nu ani kpaa mfyee neni, adzi ni ali inggise ngwu ani kye abo gbon duu no gbe Onodzi Osaan.>>

²⁰ IPyita nu uka gbæ: <<Ni awuya mgbi abu dzili beyi abu duu, ikyesine abu tsewe gbæ abu ka gya umba mgbi Imgbasho yi awuya!

²¹ Abu dze yi aye hona umba mi ido ne ba, ikyekye itukwu mgbi abu le saan mbi Imgbasho ba.

²² Kyatitukwu mi imbali neni di bibo mbi Otse. Kpakpana o ka dzita abu mi odze yi ito ewodze ngwi abu dzeyan mi itukwu mbi abu neni.

²³ Ikyekye ani di gbæ abu mbwo yi uno beyi adi obwa-bwa mi alobube.>>

²⁴ Ne iSaimon nu uka gbæ, <<Bo Otse Imgbasho ibo ikye ani adzi ni ungwo ngwi abu gbo ntona onyi kpaa no ka kyo ani ba mani.>>

²⁵ Ono ngwi a kyo obwende di gbeeso mgbi Otse ngye ne, iPyita yi iJon yido le lu iJerosalin, le gbo Eso Osuse mi agwo ibyibyi mi iSamaria.

IFyilipi yi inggise iTiopia

²⁶ Ne ongyeso mgbi Otse nya iFyilipi gbæ, <<Lu ofe atese, ofe okplagada nkye mi iJerosalin lu iGadza nani.>>

²⁷ Neta o si to ofe le lu, ngwi o le ke ofe ne, o kpatse adumongyaa inggise iTiopia, inggise imo nle di mi awuya mgbi iKandase duu, Apodza mgbi emi iTiopia mani. Inggise ne ke iJerosalin oka sunu Imgbasho,

²⁸ ngwi o sodze mmya ye le lu ude mghan ne, o le gbo afe mgbi oyegbo Adzaya.

²⁹ Onodzi nya iFyilipi gbæ, <<Ke ka kwudzeke kwekwe yi mmya nani.>>

³⁰ IFyilipi si tsinya ke kwekwe yi mmya na si fwo inggise na le gbo afe mgbi oyegbo Adzaya. IFyilipi byita gbæ, <<Ungwo ngwi abu gbo na gbosa lo abuu?>>

³¹ O gbæ, <<Ka gbosa lo ani sine, sede inggise oka ka kye gbafwe nya ani se lo?>> Nghanæ o bo iFyilipi gbæ no wa so yan.

³² Inggise na le gbo imbe ngbæ,

<<A kyon teyi dafi ongwummala
ngwi a kye le ka ngwo mani.
O di dze shili dafi ongwummala
ngwi a dzan andu,
kpaa o kwondu ba mani.

³³ Mi ayiwi mgban yo,
a non gye emeyenye ba.
Li eme ka gbodze eto mgban?
Lubana a kyi kyelun
oshishe mi ese neni.>>

³⁴ Adumongyaa na byi iFyilipi gbɛɛ,
<<Tsuutsu nya ani, li eme ngwu oyegbo le
gbodzan, li mi ikye ongwu abuan naadi
inggise oka idzidza?>>

³⁵ Ta iFyilipi si wita yi imbe mgbi Afe na
yeye nyan Eso Osuse mgbi iYesu.

³⁶ Ngwi a le ke ofe ne, a wa to imbe ngwi
eni dze, ta adumongyaa na gbɛɛ, <<Dii, eni
dze aani. Kyone ngwi a ka kyo ani iBatisima
ba?>> [

³⁷ IFyilipi gbɛɛ, <<Kini abu noyeye yi
itukwu mgbi abu duu yo, a ka yagba kyo
abu.>> Adumongyaa na si gbɛɛ, <<N noyeye
gbɛɛ iYesu iKrestu li Ongwe Imgbasho.>>]*

³⁸ O byakpaa gbɛɛ nu ma kwulese yi
mmya. IFyilipi yi inggise na tashulu kaka
eni man iFyilipi kyon iBatisima.

³⁹ Mi onɔ ngwi a tase mi eni ma, Onodzi
mgbi Otse wa kyi kyelu iFyilipi lu akponyi,
man adumongyaa na din wuba, kpaa lu
ungwon le tsatsa.

⁴⁰ IFyilipi ka to mi Azotu le kyikyɛ kye, le
gbo Eso Osuse mi ali igeli duu nghataa ka
kaka iSisiria.

9

iSol k yatitukwu

¹ Mi ongwono na, iSol kale pita ofe obube
ongwo engwafɔ mgbi Otse. O ke mbi ok-
wukwo inggise ofife

² ka bon gbɛɛ non lo afe kwuba ke mi ozu
okwakyɛ mgbi emi ijuda nto iDamasiko,
ikyegbɛɛ kini ongwu tu inggise nka dze ito
Ofe na yo, ni li ongyulo naadi ongyaa kpaa
ni ongwu kwun ofeye luba iJerosalin.

³ Ngwi o dze kwekwe okaka iDamasiko
neta, osa tokye esho wa dzanwo akponyi.

⁴ O gbɛɛ lake ese si fwo ela le nyan gbɛɛ,
<<iSol, iSol, li ekye ngwi abu le nu ani iso?
>>

⁵ iSol byita gbɛɛ, <<Li abu emeni Otse?>>

Ela na nu uka gbɛɛ, <<Li ani iYesu ngwu
abu le nu ani iso mani.

⁶ Kyato onene kaka ifu ogalu, ta a ka nya
abu ongwɔ ngwi abu ka kyo kyeme-kyeme
mani.>>

⁷ Inggise ama nkyɛ yi iSol na mmyɛ
dzema; ikyesine a fwo ela na kpaa a di
inggise ba.

⁸ iSol kyato mi ese, ngwi o kwulu ine ne,
o yagba odine wuba. Ne a byin abo kaka
iDamasiko.

⁹ O bine dze imbe na egbe eta, o gye
ungwo hona wa ungwo kpaa ba.

¹⁰ Mi iDamasiko ma ongwafɔ oka dze ele
iyin di Anania. Otse kwun ela mi ine odiidi
gbɛɛ, <<Anania!>>

O gbela gbɛɛ, <<Uwoo, Otse.>>

¹¹ Otse nyan gbɛɛ, <<Lu ofe ngwi iyin gbɛɛ
Byi yeye nani ke ude iJuda ka byita inggise
ongwi iTasu ngwu iyin di iSol, o le bibo mi
abo ma.

¹² O di inggise ngwu a li kwun di Anania
ba mi ine odiidi wa kye abo le don ikye, ikye
okwulun ine.>>

¹³ Kpaa Anania gbɛɛ, <<Otse, ani fwo
inggise ibyibi le gbodze ungwo obube ama
inggise ne kyo yi emi osaan mi iJerosalin.

¹⁴ Ma o di gbe mfyɛ mbi engyukwo ama
ofife badze owa bwa ali inggise nle kwu mi
iyi mgbi abu duu.>>

¹⁵ Nghaduu Otse nya Anania gbɛɛ, <<Ke!
Inggise ne li okyiido ngwi ani dulun okye iyi
ani ke mbi Udzengye yi uto mgbi ama beyi
emi Israi duu.

¹⁶ Ma n ka tson dafi o ka gbiiso mi ikye iyi
mgbi ani kyeme-kyeme mani.>>

¹⁷ Ta Anania si lu ka kaka ozu mani,
ngwi o kye abo do iSol ikye ne, o gbɛɛ,
<<Ongwunen iSol, Otse iYesu ngwu tsetu
abu mi ofe mi onɔ ngwi abu le ba mmene
nani, do ani eso ikyegbɛɛ ni abu ye dine diye
mbwo yi Onodzi Osaan.>>

¹⁸ Labolabo mata, ungwo dafi akwukwu
mmbweni to ngwuta mi ine mgbi iSol, ta o
diye le di. O kyato taman a kyon iBatisima,
¹⁹ ngwi o wa gye ungwogyɛ neta o si yile
ewo bɛɛ.

iSol gbeɛɔ mi iDamasiko

beyi iJerosalin

iSol kye egbe gwee yi engwafɔ mgbi iYesu
mi iDamasiko.

²⁰ O byakpa wita ogbeɛɔ mi ozu ok-
wakyɛ mgbi emi ijuda gbɛɛ iYesu li Ongwe
Imgbasho.

²¹ Ama nfon duu i kwulu ma ewo ta a
byita gbɛɛ, <<Nene li ongyulo nle nu ama
nle kwu mi iyi ne iso mi iJerosalin ma baa?
Ma o di ba mmene owa bwa ma gbe ma lu
ka nu engyukwo ama ofife naadi?>>

²² Nghaduu eso ogboɔgbo mgbi iSol ng-
hao fyumfyɛ di non kwulu emi ijuda ama
nto iDamasiko ewo mi otso gbɛɛ iYesu li
iMedzaya.

²³ Ngwi i wa ke goɔ ne, emi ijuda wibu
ongwon,

²⁴ kpaa iSol difwi oweka mgbi ama. Otu
yi onɔ a gbinebyi onufe ogalu le ngyo ikye
ongwon.

* 8:37 8:37 Ambulu ne dze mi olɔɔlo angbeka ba.

²⁵ Nghaduu ama okyedon kyen woke uya mi otu kyon nye ifo mi ewishi luba ese.

²⁶ Ngwi o wa kaka iJerusalem ne, o fya gbee ni ongwu kwakye yi engwafu mghi iYesu, kpaa ama duu tsimion, a noyeye gbee o li ongwafu otsitsi ba.

²⁷ Kpaa iBanabasi kyon ba mbi ama ogbikye iYesu. O nya ma dafi mi onw ngwi iSol le ke okyee ma o di Otse iYesu, Otse di gbodze yan, dafi o di gbeeso mi iyi mghi iYesu mi iDamasiko yi imio ba mani.

²⁸ Nghane iSol dze yi ama mi iJerusalem shewota, le gbodze yi abo otsigge mi iyi mghi Otse.

²⁹ O li gbodze di tangwodze yi emi iJuda ama ogbo ondu iGriki, kpaa a fya ongwon.

³⁰ Ngwi ama onoyeye wa difwi nghanee, a kyon lu iSisiria, di kyon deso lu iTasu.

³¹ Ta ali okwakye mghi emi iKrestu mi iJudia, iGalalia beyi iSamarita duu dze mi iyu onw nani. Onodzi Osaan si ya ma abo nu ma fyumfyee di she mi mmbwo, di dze yi imio mghi Otse.

Odze mghi Aeni yi iDokasi

³² Dafi iPyita le dzagaba kpatsee ese na duu ne, o ke oka kpadi emi osaan mi iLida.

³³ Mi imbe na o tu inggise ngwu a li kwun di Aeni, kwulu afu yi abo ladze akwulo onova egyata.

³⁴ iPyita nyan gbee, <<Aeni iYesu iKrestu ngyelu abu ootse. Kyato kyi kyelu akwulo mghi abu.>> Aeni byakpa kyato akponyi.

³⁵ Ama nto iLida beyi iSharon duu di Aeni man kyata yee ama okyedw Otse.

³⁶ Ongwafu ongyaa oka dze iJopa iyin di iTabyita (ngwi itan di iDokasi mi ondu iGriki), o li le kyungwo ama osuse di ya emi abubo abo alono duu.

³⁷ Mi itono na o dotse si kwulu, a sho ikwo mghan ewo kye ka do mi ozeesho.

³⁸ iLida tunto yi iJopa ba; ngwi engwafu wa fwo gbee iPyita dze iLida ne, a do inggise efa eso ke mbon gbee, <<Wafu yi eyi ple-ple!>>

³⁹ iPyita wafu yi ama, ngwi o ka to ne a kyon lu ozeesho. Engyaa owakwade duu kyato toke unto yan, le makwo di gbe abu yi angwuto angbeka ngwi iDokasi kwo nu ma mi onw ngwi o ka dze oshishe ma tson.

⁴⁰ iPyita lo ma onya duu to mi ifoozu; si kwese bibo. Ngwi o kyata ine ke mbi ongyaa ikwukwo ne, o gbee, <<iTabyita, kyato.>> O kwulu ine, ngwi o di iPyita neta, o soko unto.

⁴¹ O kye abo byun yan abo non kye afu dzeke ese. Ne o si kwu ama onoyeye ela beyi ewakwade kyon nu ma oshishe.

⁴² Odze ne gbofwe kpatse iJopa duu, inggise kwuba di noyeye mbi Otse.

⁴³ iPyita tila dze iJopa kye onw kpakpa yi inggise okyido okpa okwookwo ngwu a li kwun di iSaimon.

10

iPyita yi iKanelu

¹ Ongyulo oka dze iSisiria a li kwun di iKanelu, o li okwukwo ogbakwu nle di mi obyi oblakwutse mi Italia.

² Ongwu yi eto mghan duu kye itukwu nu di li mio Imgbasho; o li gha emi abubo umba dzii di li bo Imgbasho ibo alono duu.

³ Egbe oka dafi obyi eta ngwi onw tashulu akpa ne, o di ine odiidi. O di ongyeso mghi Imgbasho saan, ba mbon wa gbee, <<iKanelu!>>

⁴ iKanelu kye ine fyakwun yi imio. O byita gbee, <<Li ekye, Otse?>>

⁵ Ongyeso na nu uka gbee, <<Ibo yi umba mghi abu ogha emi abubo duu lu esho i yee ungwwo Imgbasho kale we abu.

⁶ Do inggise eso nu ma ke iJopa ka yile inggise ngwu iyin di iSaimon ngwu a li kwun di iPyita na oneneni.

⁷ O dze yi iSaimon inggise okyido okpa, ngwu ude mghan dze ondekyoo okwukwo nani.>>

⁸ Onw ngwi ongyeso ngwu gbodze yan na lu ne, iKanelu kwu engbido mghan efa ela beyi inggise oblakwutse nli mio Imgbasho, di li onyi mbi ama ogban eso.

⁹ O nya ma alungwo nkya duu man do ma eso lu iJopa.

Ine odiidi mghi iPyita

¹⁰ Tegblifan ngwi onw do idizidze ude ngwi a le lu agaba ungwwo ma di dze kwekwe yi iJopa ne, iPyita doko ikpendu* oka bibo.

¹¹ Onyagleu don o di mina ogye ungwogye. Ngwi a kale kyo ungwogye ne, o di ine odiidi.

¹² O di esho kwulu a kye ungwwo dafi akwukwo ogbada kye odi tsan mi okoko ene naan luba ese.

¹³ Mi ifun ali ito mmbwaba afu ene, yi ungwwo ama okwo ifu ese beyi ali ito ingwunw emi esho duu woto ele.

¹⁴ Ne ela si nyan gbee, <<Kyato, iPyita. Ngwolu ma gye.>>

¹⁵ iPyita nu uka gbee, <<Otse mi otsitsi yo ungwwo ka dze ngha gbe ba. Lubana ani gye ungwwo onyi ntsiidza naadi le kpekpe ye ba.>>

¹⁶ Ela na diye nyan gbee, <<Ka kwu ungwwo onyonyi ngwi Imgbasho kye melu saan gbee ungwwo idza ba.>>

¹⁷ Ungwone kyo ngha akpe eta, man a byakpa kyi kyelu akwukwo na lu esho.

¹⁸ Ngwi iPyita kale tsewe ungwwo ngwi ine odiidi ne tso ne, inggise ama ngwu iKanelu

* 10:9 10:9 Mi ese mghi iPalisiti ikpendu mghi ama li le pete.

dɔ ma esɔ ntona ka ye imbe ngwi ude iSaimon dze man kwulesɛ tokɛ onufoka.

¹⁸ A kwu ela, byita gbɛɛ ni ama ye ni iSaimon ngwu a li kwun di iPyita na ka dze mmama mayo.

¹⁹ Dafi iPyita kale tsewe mi ine odiidi ne, Onodzi nyan gbɛɛ, <<i>Saimon, inggise eta to ese le pita abu ma.

²⁰ Nghane tashulu lu ozu ese. Ka fwa owafɔ yi ama lu ba, ikyesine li ani dɔ ma esɔ.>>

²¹ iPyita tashulu ka nya ma gbɛɛ, <<Li ani li inggise ngwu ema le pitan mani. Ema ba li ekye?>>

²² A gbɛɛ, <<i>Kɔnelu okwukwo ogbakwu dɔ eyi esɔ. O li inggise osaan di li mio Imgbasho, ngwu emi iJuda duu li fwon. Ongyesɔ osaan nyan gbɛɛ no nu abu ba ude mgban adzi non fwo odze ngwi abu ka gbɔ nyan mani.>>

²³ Ne iPyita gbɛ ma kaka ude dafi ingyoga mgban mani.

IPyita ke ude iKɔnelu

Tegblifan ne iPyita kyato okyee yi ama, ama onoyeye angbeka mi iJopa kpaa di wafɔ yi ama.

²⁴ Ngwi egbe di fa ne, o kaka iSisiria. iKɔnelu kye ine kwo ofe le fe ma di kwu etɔ beyi abuge mgban duu kwakye.

²⁵ Dafi iPyita wa to ude ma ne, iKɔnelu wa kwese mi iyayi mbon di sunun.

²⁶ Kpaa iPyita kye abɔ byun nyan gbɛɛ, <<kyato, ani kpaa li inggise owamye dafi abu.>>

²⁷ Ngwi iPyita kale gbɔdze yan ne, iPyita lu idzidze ozu ka di ibyi inggise kwakye to.

²⁸ O nya ma gbɛɛ: <<Ema ye saan ta gbɛɛ ola mgbi eyi fwa gbɛɛ inggise emi iJuda no ka kwakye yi Udzengye hona ke ingyoga mi udan ba. Nghaduu Imgbasho tso ani gbɛɛ ni ani ka kwu inggise owamye gbɛɛ o le kpekpe hona tsiidza ba.

²⁹ Nghane ngwi ema desɔ mbi ani ma, ani tsondu ba ani ba. Ema desɔ mbi ani li ali itɔdze?>>

³⁰ iKɔnelu nu uka gbɛɛ, <<Egbe ene ine waani ani wodze ozu mbi ani le bibɔ mi obyi eta itɔ onɔ neni. Neta inggise wo angwuto onzundze kwɔkwɔ wa mblegba tu ani

³¹ <<Si gbɛɛ, <i>Kɔnelu Imgbasho fwo ibɔ mgbi abu di we umba ngwi abu le gha emi adze mani.

³² Nghane desɔ ke iJopa mbi iSaimon ngwu a li kwun di iPyita nani. O kedze ingyoga mi ude iSaimon inggise nli kyidɔ okpa, ndze ondekyoo okwukwo nani.>

³³ Man ani byakpa desɔ mbi abu, i tishi dafi abu di ba mani. Onene eyi duu kwakye mmeneni mi inai Imgbasho ikye

ofwo alungwɔ ngwi Imgbasho wo abu ola gbɛɛ ni abu nya eyi mani.>>

³⁴ iPyita si wita ogbɔdze gbɛɛ: <<Onene ani difwi otsitsi gbɛɛ Imgbasho li tso osadu-sadu ba

³⁵ kpaa li gbela yi inggise mi ali agwɔ nli mion di kyungwɔ nli ayin mani.

³⁶ Ema ye esɔ ngwi Imgbasho dɔ mbi emi Israi, onya ma Esɔ Osuse mgbi iyu ngwi nye mbi iYesu iKrestu, ongwu nli Otse mgbi alungwɔ duu nani.

³⁷ Ema ye ungwɔ nkyɔ mi ikpese iJudia duu, wita mi iGalalia mi onɔ ngwi iJɔn gbeesɔ mgbi iBatisima nye

³⁸ dafi Imgbasho kye engyie kyi iYesu ongwɔ iNadzareti ikye yi Onodzi Osaan beyi mfye, dafi o dile kyikye kpatse le kyungwɔ osuse dile onyelu ama ngbeka woto abumfye mgbi onodzi ibwubwe duu ootse, ikyesine Imgbasho dze biyan.

³⁹ <<Eyi li obwende mi alungwɔ ngwi o kyo mi ese iJuda beyi iJerosalin duu. A ngwɔn mi okyon gbokwo ekwatsi,

⁴⁰ nghaduu Imgbasho kyilon mi ikwu mi egbe ongwu ta mani di nu ma dun.

⁴¹ Li ali inggise duu din ba, kpaa li ama Imgbasho sadulu ma mbi eyi ama ngye di wa yan mi onɔ ngwi o kyato mi ikwu ma li obwende aali.

⁴² O wo eyi ola gbɛɛ ni eyi gbeesɔ nya inggise di kyo obwende gbɛɛ li ongwu ngwu Imgbasho dula gbɛɛ ni ongwu li inggise ogbɔ emi oshishe beyi emi ikwukwo ikwɔ.

⁴³ Oyegbɔ duu kyo obwende mi ikyon gbɛɛ ali inggise nnun oyeye duu a zanta yi alobube mi iyi mgban.>>

⁴⁴ Ngwi iPyita kale gbɔ elodze ntonɛ ne, Onodzi Osaan kaka mbi ali inggise ama nfwo esɔ na duu.

⁴⁵ I kwulu emi iJuda ama nkyiikye di noyeye wafɔ yi iPyita ma ewo dafi umba mgbi Onodzi Osaan kpaa a kye nu Udzengye mani.

⁴⁶ Lubana a fwo ma le gbɔ ondudze angbeka dile tse Imgbasho.

Neta iPyita gbɛɛ,

⁴⁷ <<Inggise oka dzema nka fwa gbɛɛ nu ma ka kyo inggise ntonɛ iBatisima mi eni ba gbɛɛ? Lubana a gbɛ Onodzi Osaan dafi eyi kpaa gbe neni.>>

⁴⁸ iPyita nu ondu gbɛɛ nu ma kyo ma iBatisima mi iyi mgbi iYesu iKrestu. Ne a si nya iPyita gbɛɛ no dze yi ama mi egbe gwee.

11

IPyita nu okwakye mgbi emi iKrestu mi iJerosalin osa

¹ Ama ogbikye iYesu beyi ama onoyeye angbeka mi iJudia duu fwo dafi Udzengye kpaa gbe elodze Imgbasho mani.

² Dafi iPyita wa kaka iJerosalin neta, ama nnoyeye kyiikye kwun shanye

³ gbee, <<Abu ka kaka ude ama okyiikye ba gye ungwogye yi ama.>>

⁴ IPyita wita di gbo alungwo duu nya ma klekle dafi i kyo mani:

⁵ <<Ani dze igeli iJopa le bibo, ani nuna lu kpini si di ine odiidi. Ani di ungwō dafi akwukwō ogbada a kye odi tsan mi okoko ene kye esho luba ese, di li imbe ani dze ma yeye ngwi i ba.

⁶ Ani wine ke ifun man di mmbwaba ama owo afo ene, mmbwaba ama okwukwo, mmbwaba ama okwo ifu ese, beyi ingwuno emi esho.

⁷ Ta ani fwo ela le nya ani gbee, <Kyato iPyita, ngwolu ma gye.>

⁸ <<Ani nu uka gbee, <Otse mi otsitsi yo ungwō ka dze nga gbe ba. Lubana ani gye ungwō onyi ntsiidza naadi le kpekpe ye ba.>

⁹ <<Ela na diye nya ani gbee, <Ka kwu ungwō onyonyi ngwi Imgbasho kye melu saan gbee ungwō idza ba.>

¹⁰ Ungwone kyo nga akpe eta, man a di kyi kwolu ye lu esho.

¹¹ <<Mi ono nata engyulo nghi eta ngwu a do ma eso kye iSisiria ba mbi ani wa kwulese to ude ngwi ani ladze mani.

¹² Onodzi nya ani gbee ni ani ka kwagbini owafu lu yi ama ba. Ama onoyeye nghi egyin ntone kpaa tawo ani, ka kaka ude inggise nani.

¹³ O nya eyi dafi ongyeso mblegba tu ongwu mi ozu mgbani di gbee, <Deso ke mbi iSaimon mi iJopa ngwu a li kwun di iPyita nani.

¹⁴ O ka nya abu eso ngwi abu yi eto mgbi abu duu ka wato mi ele mani.>

¹⁵ <<Dafi ani wita ogbodge ne, Onodzi Osaan ba mboma dafi i teyi ba mbi eyi mi owita-wita nani.

¹⁶ Ta ani we odze ngwi Otse nose gbo mani, gbee: <Ijon kyo iBatisima mi eni, kpaa a ka kyo ema iBatisima mi Onodzi Osaan.>

¹⁷ Nghane kini Imgbasho nu ma umba ungwonyi dafi o nu eyi ama nnoyeye mbi Otse iYesu iKrestu ne ma, ani li eme mi ono na okye afo twese fwa yi Imgbasho?>>

¹⁸ Ngwi a fwo ungwone ne, a kiyayi otangwodze wuba man tse Imgbasho, le gbee, <<Alima, Imgbasho gbela yi Udzengeye kpaa odzita ma yi obube nu ma tu oshishe.>>

Adua mi Antioku

¹⁹ Ikyenghane, ama onoyeye nganya ikye ikwu iStivin ne, tse lu iFonishia, iSapru, beyi Antioku, le gbeeso nya emi iJuda yuoma kyoona.

²⁰ Angbeka mboma, dafi i dze duu kpaa, a li emi iSapru beyi iSirini, lu Antioku ka

wita ogbodge yi emi iGriki kpaa, le nya ma Eso Osuse mgbi Otse iYesu.

²¹ Abumfye mgbi Otse dze yi ama, ne inggise kwuba noyeye di kyata luba mbi Otse.

²² Odze ne kaka ado mgbi emi okwakye mgbi emi iKrestu mi iJerosalin, man a do iBanabasi eso ke Antioku.

²³ Ngwi o ka kaka di di dafi Imgbasho kye mse be inggise ntona ewo ne, atsa tsan o di fyuma mfyie itukwu duu gbee nu ma kwulese mi otsitsi mbi Otse yi itukwu mgbi ama duu.

²⁴ Lubana iBanabasi li inggise osuse, di mbwo yi Onodzi Osaan beyi oyeye onuunu. Ikyenghane inggise kwuba luba mbi Otse.

²⁵ Ne iBanabasi ke iTasu oka pita iSol,

²⁶ ngwi o ka tun ne, o kyon luba Antioku. Mi onova na duu iBanabasi yi iSol li kwakye yi okwakye mgbi emi iKrestu di tso ibyi inggise kpakpa ungwō. Li mi Antioku ababo ngwi a wita okwu ama okyedo iYesu di emi iKrestu.

²⁷ Mi ono ne oyegbo angbeka kye iJerosalin bato Antioku.

²⁸ Onyi mboma, ngwu iyin di Agabu, kyato gbeese nye mi Onodzi gbee onikyenbwa ka gbo kpatse ese iRoma. (Ungwone kyo mi ono ngwi iKladios lu uto.)

²⁹ Ama okyedo iYesu mi Antioku kye ali ito oyabo ngwi ama dzezan duu deso nu emi ongwuno ma mi iJudia.

³⁰ Ungwō ngwi a li kyo yo, a li kye umba mgbi ama deso nye mbi iBanabasi yi iSol ke mbi engyukwo mgbi ama mi iJerosalin.

12

IPyita to mi obawi mi ofe okwulewo

¹ Li mi itono ne ngwi uto iHerude* wita obwa emi iKrestu angbeka, yi oweka onu ma iso.

² O teyi ngwō iJensi ongwuno iJon mi okwusunkli.

³ Ngwi o di gbee i kpa emi iJuda ne, o kiyayi di bwa iPyita kpaa. Ungwone kyo mi ono mgbi ibredi ngwi a li kye okwuna wele ba nani.

⁴ Dafi o bwan ne, o kyon woke obawi di kyon do ama ongyoongyo ubo, oblakwutse eneene mi otsa ene duu. iHerude dze yi oweka owa dulun to ba wa gbōn ikwō mi ododa mi ono ngwi oga owe owato-wato mgbi emi Israi ngye mani.

⁵ IPyita tila wodze obawi, kpaa okwakye mgbi emi iKrestu yo le bibo mi itukwu onyi mbi Imgbasho ikyon.

⁶ Mi obwi egbe ngwi iHerude ka kyon to wa gbōn ikwō ma, iPyita la le nuna mi idizdze oblakwutse nghi efa, a bwan

* 12:1 12:1 iHerude ne li ongwiba mgbi iHerude ongwī ababo.

adi agya efa, ama ongyoongyo di to onufe okakaakaka.

⁷ Ple neta ongyeso mgbi Otse wa mblegba tu ma ta obawi si gbosa. O kye abo mu iPyita mi agya kyilen una, o nyan gbæ, <<Kyato Ple!>> Man ashi ntona she lon mi owashi abo yangwuta.

⁸ Ongyeso na si nyan gbæ, <<Gbe angwuto mgbi abu wo beyi okpafo.>> iPyita si kyo nghan. Ongyeso na di nyan gbæ, kye angwuto ofu mgbi abu tukwu kyedo ani.

⁹ iPyita kyedon tase mi obawi, kpaa i gbosa lon gbæ ungwo ngwi ongyeso le kyo na li otsitsi ba, o tsæwe gbæ ongwu le woowo elela.

¹⁰ A nye imbe ongyoongyo ongwu ababo beyi ongwu fan, di wa to onufe ashashi nto lu ogalu nani. I kwulu ewon, man a nye ele tase. Ngwi a kyikye lu byulu ne, ongyeso na byulu dzanta.

¹¹ Neta iPyita difwi di gbæ, <<Onene ani ye yeye gbæ Otse do ongyeso mgban gbæ no wa dula ani to mi abumfye mgbi iHerude beyi alungwo ngwi emi iJuda le tsæwe ikye ani duu.>>

¹² Ngwi o wa difwi ungwone ne, o lu ude iMeri onso iJon, ngwi a di li kwun gbæ iMaki, imbe ngwi ibyi inggise kwakye to dile bibo.

¹³ iPyita tsaabo mi onufe ongwu ese, man ongwongyiido ngwu iyin di iRoda ba owa ye inggise ndze onufe mani.

¹⁴ Ngwi o difwi ela mgbi iPyita ne, atsa atsan nyese o kwulu ofe wuba kpaa ye tsinya lu dile kwu-ela gbæ, <<iPyita dze onufe ma!>>

¹⁵ Kpaa a nyan gbæ, <<O dze yi ikye yeye ba.>> Dafi o kale kiyayi gbæ di li otsitsi ne, a nyan gbæ, <<Ka li ongyeso mgban kyæme.>>

¹⁶ Nghaduu iPyita yo kale tsaabo kpoo ma, ngwi a wa kye kwulu ofe ne, a din man i kwulu ma ewo.

¹⁷ iPyita kyo ma abo gbæ nu ma dede si tsuutsa dafi Otse dula ongwu to mi obawi mani. O di gbæ, <<Nya ijensi beyi ama onoyeye odze mi ungwoneni.>> Neman o si lu imbe oka.

¹⁸ Ngwi egbe fa ne, ende olele efu ba dze mi idzidze ama oblakwutse mi ungwo nkya yi iPyita nani.

¹⁹ Ngwi iHerude gbilin kpatse din ba ne, o diye kya mbi ama ongyoongyo ntonani si nu ondu gbæ nu ma ngwo ma.

Ikwu iHerude

Ne iHerude kyæ mi iJudia lu iSisiria ka kye egbe gwee mi ele.

²⁰ iHerude teyi dze yi odze oshiishi yi emi iTiru beyi iSidon; a ye kwakye yi ewoma di pita ofe ogbodge yan. Ngwi a tu oyabo mgbi

iBlastu, ongbido mgbi uto yuon ngwu a nun oyeye ne, a ke mbi uto ka pita iyu, ikyekye li ese mgbi uto na li nu ma ungwogye.

²¹ Mi egbe ngwi a kye dze ma, iHerude gbe angwuto mgban mgbi uto wo ewo, soke itsuuto mgban man gbodge yi ama mi ododa.

²² A wulu gbæ, <<Nene li ela mgbi Imgbasho li mgbi inggise ba.>>

²³ Ikyegbæ iHerude tse Imgbasho ba ne, Ongyeso mgbi Otse tan afe, ta o gbaangbi byakpa kwulu.

²⁴ Nghaduukpaa elodze mgbi Imgbasho kiyayi osheeshe di gbafwe.

²⁵ Ngwi iBanabasi beyi iSol ngyelu ungwo ngwi a ke ma ne, a ye mi iJerusalem, a kye iJon ngwu a li kwun di iMaki na wafu yi ama.

13

A do iBanabasi yi iSol eso

¹ Mi okwakye mgbi emi iKrestu mi Antioku ma, ama ogbæse yi etsetse to ele; li iBanabasi yi iSimion ngwu a li kwun di iNaija beyi iLusho ongwu iSirini yi iMane (ongwu nshe beyi iHerude iGona* nani) yi iSol.

² Ngwi a tole sunu Otse dile tukwondu ne, Onodzi Osaan gbo yi ama gbæ, <<Dula iBanabasi yi iSol dzeke idzidza mi ikye ido ngwi ani kwu ma ela ikyon mani.

³ Ngwi a tukwondu diye bibo neta, a gbe abo do ma ikye di wo ma ofe lu.

Mi iSapru

⁴ Ngwi Onodzi Osaan do ma eso ne, iBanabasi yi iSol byi ofe abo lu ka kaka iSelushia si kaka uwaa dzekyo lu ibu ongwu iSapru.

⁵ Ngwi a wa to iSalami ne, a gbæso mgbi Imgbasho mi ozu okwakye mgbi emi iJuda. IJon iMaki kye yi ama le tobyi ma.

⁶ A kyikye kpatse ibu na nghataa wa kaka iPafosu. Mi imbe ne a kpatse yi inggise iJuda otseefa di li oyegbo atsika ngwu iyin di iBa-iYesu,

⁷ nli kye yi iSejio iPabosu iGona ongwu ibu nani. iGona na, li inggise ndze yi ozoyeye saan, o dæso mbi iBanabasi yi iSol ikyekye o mina ofwo elodze Imgbasho.

⁸ Kpaa Elimasi inggise otseefa na (bana li ita iyi mgban aali) kaka ma idzidze fwa yi iGona na gbæ no ka noyeye mi odze ngwi iBanabasi yi iSol le gbo na ba.

⁹ Ne iSol, ngwu iyin oka di iPol, nmbwo yi Onodzi Osaan na tongwine byi Elimasi nyan gbæ,

¹⁰ <<Abu ongwæ owape olodu nli ongyikyili mgbi alungwo osuse duu ne! Abu mbwo yi ali ewe yi okpagyewo duu. Abu ka nya ombe ofe mgbi Otse nli ayin ne lo?

* 13:1 13:1 iHerude Antipa ne li ongwæ iHerude ongwu ababo

¹¹ Nghane abo mgbi Otse kpakli abu wa. O ka bine, mi ongwono gwee o ka di osa mgbi ono ba.>>

Ntunto neta ine tuubu lon man o yee pwaapwa dile mina inggise nka kwon abo to mani.

¹² Ngwi iGona di ungwo nkya ne, o noyeye, bana i kwulun ewo mi otsootso odze mgbi Otse.

Mi iPidia ongwi Antioku

¹³ IPol yi emi afokyee mgban kaka uwaa mi iPafosu luba iPega, igeli mi iPamfylia, li imbe na ngwi iJon ngwu iyin oka di iMaki na dzita ma ye lu iJerosalin aali.

¹⁴ Mi iPega ma, a kyato lu Antioku ongwi iPidia. Mi egbe otonyewo ne, a kaka ozu okwakye mgbi emi iJuda di sise.

¹⁵ Ono ngwi a gbo mi afe mgbi Ola mgbi iMose beyi afe mgbi emi Oyegbo nye neta, ama odi mi ozu okwakye mgbi emi iJuda na deso mboma gbee, <<Emi ongwunani, ni ema dze yi eso mgbi onu itukwu ofyumfye-fyumfye ikye inggise ntona ye, gbo na.>>

¹⁶ IPol dzekunto kyo ma abo si gbee: <<Emi Israi beyi Udzengye ama osunu Imgbasho, gado mbi ani na!

¹⁷ Imgbasho mgbi emi Israi dulu emi otseyi; o nu ma okiyayi mi ono ngwi a to Igyibiti mani, mi abumfye odatu o dulu ma to mi ese nani,

¹⁸ o shitukwu yi okyokyo mgbi ama mi afutse onova ngwusefa,

¹⁹ di dzili agweese egyafa mi iKana kye ikpese mgbi ama kye nu emidi ongwu no ye okwude mgbi ama.

²⁰ Ungwo ntona duu kye me onova ideli ene ngwusefa don iwyo.

<<Ngwi ungwone kyo nye ne, Imgbasho gbe ama ogbiikwu nu ma nghataa ba ono mgbi oyegbo iSamue.

²¹ Ne inggise ntona si mina uto, man Imgbasho kye iSol ongwe iKish, mi udze mgbi iBenjamin nu ma, o so uto onova ngwusefa.

²² Ngwi o wa dulu iSol uto ne, o nu iDevedi yee uto mgbi ama. O kyo obwende ikyon gbee: <Ani tu iDevedi ongwe ifese inggise ongwu itukwu mgbi ani, o ka kyo alungwo duu ngwi ani mina gbee no kyo mani.>

²³ <<Mi eto mgbi inggise ne, Imgbasho kye ongye Onagbe iYesu nu emi Israi, dafi o zonu mani.

²⁴ Duuse ni iYesu wita ido yo, iJon gbeeso okyatitukwu beyi iBatisima nya ali inggise duu mi Israi.

²⁵ Ngwi iJon le ngyelu ido mgban ne, o yi ma gbee: <Ema tsewe gbee ani li eme? Ani li ongwu ma ba. Ei, o kyema mi iyikpa ani, odi okpaf mgban kpaa ani me oshe ba.>

²⁶ <<Emi ongwunani, engwe Abraham, beyi Udzengye ama omio Imgbasho, li ikye mgbi eyi ngwi a kye eso mgbi owato-wato ne ba aani.

²⁷ Inggise emi iJerosalin beyi ama ogbe ma teyi difwi ito inggise ngwu iYesu dze ma ba, kpaa mi ongwon ikwo yo, a mbwumbwo ungwo ngwi ama ogbeese li tsekise gbo mi alegbe otonyewo mani.

²⁸ Dafi a tu itodze nme ongwon ba ne kpaa, a nya iPlatu gbee no nu ondu nu ma ka ngwon.

²⁹ Ngwi a kyi kyolu alungwo ngwi a lo ikpewon duu ma ngye ne, a tashulun mi ekwatsi di kyon ndzi.

³⁰ Nghaduu Imgbasho kyilon mi ikwongye,

³¹ egbe ibyibyi ama nwafo yan mi iGalalia ke iJerosalin ma din. A li obwende mgban mbi emideyi oneneni.

³² <<Eyi le nya ema Eso Osuse neni: Li ungwo ngwi Imgbasho zonu yi emi otseyi

³³ o mbwumbwo ikye eyi emi ongwama, mi okyile iYesu mi ikwongye. Dafi a tsekise lon mi afe mgbi ashi ongwu fan mani gbee:

<< <Abu li Ongwani;
ine ne ani yee Otsabu.>

³⁴ Ikyegbee Imgbasho kyilen mi ikwu, dika non bwa ba ne kpaa, a lon mi elodze ntoneni gbee: << <N ka kye ondu odzeedze osaan beyi mse ingblimo ngwi ani teyi dze yi iDevedi ma nu abu.>

³⁵ Li nga ngwi a lo imbe oka gbee:

<< <Abu ka nu Ongwabu Osaan
mbee ba aali.>

³⁶ <<Lubana ngwi iDevedi kyo oweka mgbi Imgbasho ngye duu ne, o kwulu; a kyon ndzi yi emi otson ikpewo mgban bwa.

³⁷ Nghaduu ongwu Imgbasho kyilon mi ikwu na bwa ba.

³⁸ <<Ikyenghane, emi ongwunani, i mina ani gbee ni ema ye gbee li ikpewo iYesu ngwi a gbeeso odzita inggise yi ali ibwubwe nya ema aani.

³⁹ Mi ikpewon ali inggise ngwu noyeye duu gye emyemye, ola mgbi iMose yagba kyungwone ba.

⁴⁰ Gbewebyi ni ungwo ngwi ama ogbeese gbo ntona no ka kyo ema ba ungwo ama ngbee:

⁴¹ << <Dii, ema ama ogbo agya,
kwu Imgbasho shanye ntona,
ka kwulu ema ewo,
ema dika dzili.

Ani ka kyungwo mi egbe mgbi ema ngwi ema ka noyeye ba yeba ni inggise nyaanya ema kpaa.> >>

⁴² Dafi iPol yi iBanabasi le dzita ozu okwakye mgbi emi iJuda ne, inggise ntona bo ma gbee nu ma di wa gbodze mi itodze ntona mi egbe otonyido nkye neni.

⁴³ Ono ngwi a ngyelu okwakye ne, emi ijuda ibiyibi beyi ama nkyata le sunu odze Imgbasho mgbi emi ijuda ma, kyedo iPol yi iBanabasi, a gbadze yi ama di nu ma itukwu ofyumfye-fyumfye gbæe nu ma kiyayi odze mi elela mgbi Imgbasho.

⁴⁴ Mi egbe otonyido ngbodo ma, i dze dafi inggise mi ogalu duu kwakye ikye ofwo elodze mgbi Otse mani.

⁴⁵ Ngwi emi ijuda di ibyi inggise ntona ne, a kaka uwaba dile fyito mi odze ngwi iPol le gbo mani.

⁴⁶ Ne iPol yi iBanabasi nu ma uka yi abo otsigege gbæe: <<Dze gyo ngwi eyi kika gbadze Imgbasho nya ema ababo. Kpaa ngwi ema fwan di kye ewema wuuta otu oshishe igyegwu ba ne, eyi yile ine byi Udzengye oneneni.

⁴⁷ Lubana nene li ungwō ngwi Otse wo eyi ola mi ele aani gbæe:

<< <Ani nu abu li osa mbi Udzengye, ikyegbæe ni abu kye eso mgbi owato-wato kpatse ese.> >>

⁴⁸ Ono ngwi Udzengye fwo odze ne ne, ewo sheta lo ma a di kye mmwe nu elodze mgbi Otse; ama ngwu a di sadu ma ikye oshishe igyegwu duu noyeye.

⁴⁹ Elodze mgbi Otse si gbɔfwe kpatse ayese na duu.

⁵⁰ Nghaduu emi ijuda kaka mbi engyaa ama omio Imgbasho ama nle kpongɔ beyi inggise ama ogbe inggise teyi mi ogalu nani. A nu ma wita eye yi iPol beyi iBanabasi, di lo ma onya to mi ayese nani.

⁵¹ Nghane a kyi gbolu ombulu mi afɔ mgbi ama dafi a gbela yi ama ba mani, ta a si lu iKonu.

⁵² Man engwafɔ si mbwo yi atsa beyi Onodzi Osaan.

14

iPol yi iBanabasi mi iKonu

¹ iPol yi iBanabasi ka kaka ozu okwakye mgbi emi ijuda mi iKonu dafi a teyi li kyo mani. Mi ele ma a gbeeso saan ta mmbwo inggise kwuba mi ijuda beyi Udzengye onoyeye.

² Kpaa emi ijuda ama nfwā onoyeye ntona kwo Udzengye ntona wo nu ma kyitingga yi iPol beyi iBanabasi.

³ Nghane iPol yi iBanabasi kye ono kpakpa mi ele, le gbadze mgbi Otse mi ododa. Otse tso gbæe eso mgbi elela mgban na li otsitsi mi onu ma mfye okyungwɔ beyi ambe ama okwulewo.

⁴ Emi ogalu na gheefa, angbeka ye agya mgbi emi ijuda, angbeka ye agya mgbi ama ogbikyē iYesu.

⁵ Ta Udzengye yi emi ijuda beyi engyukwo mgbi ama duu, wibu onu iPol beyi iBanabasi adze di tse ma akwutse.

⁶ Nghaduu ngwi a wa ye odze ele ne a tsinya lu iLikonia igeli mgbi iListra beyi iDebe beyi ese ama nkpaɛke won,

⁷ dika gbeeso osuse mi imbe ntonani.

Mi iListra beyi iDebe

⁸ Inggise oka dze iListra waawaa afɔ, tummya kye ifu di kyikyē ye ba.

⁹ O kye adɔ ge le fwo iPol dafi o le gbadze mani. iPol kye ine byin yeye, difwi gbæe o dze yi oyeye onuunu ongyelun ootse,

¹⁰ si kwu ela to gbæe, <<Kyato dzekunto mi afɔ mgbi abu!>> Mi elodze ne, inggise na ta lu esho si wita okyikyē.

¹¹ Ono ngwi ibyi ntona di ungwō ngwi iPol kyo ne, a wulu mi ondu iLikonia gbæe, <<Imgbasho gbeka ba mbi eyi mi odzædze mgbi inggise owamye wa!>>

¹² iBanabasi a kwun gbæe iDzeu, a di kwu iPol gbæe iHeme* ikyesine o li inggise oteyi odze ogbɔɔgbɔ.

¹³ Ta inggise ofife mgbi imgbasho mgbi iDzeu, ngwu ozu ofife mgban dze kyila yi igeli okwukwo nani, ba yi engyulum-nda beyi ofumbu wa to onufe ogalu igeli ikyesine ongwu beyi ibyi inggise ntona mina ofife nu iPol beyi iBanabasi.

¹⁴ Nghaduu ngwi iPol yi iBanabasi fwo ungwone ne, a fawa angwuto mgbi ama tsinya kaka idzidze ibyi inggise, le weela gbæe:

¹⁵ <<Engyulo, kyosine ngwi ema le kyungwone nghaa? Eyi kpaa li inggise owamye ta dafi ema mani. Eyi kye eso osuse ne le wa nu ema, le nya ema gbæe ni ema kyata mi ayayi ungwō ntoneneni luba mbi Imgbasho oshishe, ongwu nta esho yi ese beyi ekyoo okwukwo beyi alungwɔ ama nto efu duu nani.

¹⁶ Tugbe ma, Imgbasho li nu ali ese duu kyo owitukwu mgbi ama.

¹⁷ Nghaduu o li nya okye ewon tso ma ba. O tso ema mse mgban mi onu ema mmbwo di nu eto ungowogye she mi ono mgban; o nu ema ungowogye kpakpa di mbwo ema yi atsa mi itukwu.>>

¹⁸ Yi elodze ntone duu kpaa, i fyi ma mfye okwɔ ibyi inggise ntona ofife nu ma.

¹⁹ Ta emi ijuda angbeka kye mi Antioku beyi iKonu wa kwolu ibyi inggise luba agya mgbi ama. Ne a tse iPol akwutse di kwon tase mi ogalu nani, le tsewe gbæe o kwulu.

²⁰ Kpaa ngwi engwafɔ wa kpakeke won ne, o kyato diye lu ogalu nani. Tegblifan ma ongwu beyi iBanabasi dzata imbe na lu iDebe.

A yido lu Antioku mi iSiria

* **14:12 14:12** iDzeu li iyi Imgbasho okwukwo mgbi emi iGriki. iHeme li Imgbasho ogbadze mgbi iDzeu

²¹ A gbeeso osuse mi igeli okwukwo nani di tu inggise ama onoyeye kwuba. Man a ye lu iLitra, iKonu beyi Antioku,

²² a yile engwafu dze ofe di kwu ma ewewo gbee nu ma noyeye mi otsitsi. A di nya ma gbee, <<Eyi ka nye mi adze kpakpa ikye okaka esuto mghi Imgbasho.>>

²³ iPol beyi iBanabasi dudu engyukwo nu ma mi ali okwakye mghi emi iKrestu duu, yi ibo obobbo beyi ondu otukwu-tukwu, a kye ma dubo Otse, ongwu a kye oyeye onuunu mghi ama byi mbon nani.

²⁴ A nye ongwu iPisidia, a wa kaka iPamfyllia,

²⁵ ngwi a gbeeso mi iPega ngye ne, a kye ikye do lu Atalia.

²⁶ Mi Atalia ma a dzekyo mi uwaa yido lu Antioku, imbe ngwi a kye ma dubo elela mghi Imgbasho mi ikye ido ngwi a kye ngye nani.

²⁷ Ngwi a kaka imbe na ma, a gbe emi iKrestu kwakye mbonyi di nya ma alungwo ngwi Imgbasho kye nye mbi ama, dafi o di kwulu ofe mghi oyeye onuunu mbi Udzengye kpaa mani.

²⁸ A si dze yi engwafu mi imbe na ono tunto.

15

Okwakye mghi engyukwo mi iJerosalin

¹ Inggise angbeka kye mi iJudia wa kaka Antioku man le tso ama onoyeye ntona gbee: <<Sede a ka kye ema ikye mi otsootso mghi iMose bayo, ema ka yagba otu owatowato ba.>>

² Mi odze ne iPol beyi iBanabasi si kaka angwodze ota-ta yi ama kpakpa. Ta a si dudu iPol yi iBanabasi, beyi ama onoyeye angbeka, gbee nu ma lu iJerosalin ka di ama ogbikye iYesu beyi engyukwo mi odze neni.

³ Opokwakye mghi emi iKrestu do ma eso nu ma byi ofe abo, dafi a kyikye nye iFonishia beyi iSamaria ne, a gbo dafi Udzengye kpaa kyata ye luba mbi Imgbasho mani. Elodze ne nu ama onoyeye duu ewo osheta kpaakpaa.

⁴ Ngwi a wa kaka iJerosalin ne, okwakye mghi emi iKrestu yi ama ogbikye iYesu beyi engyukwo duu gbe ma, neta a nya ma alungwo ngwi Imgbasho kye nye mbi ama duu.

⁵ Ta ama onoyeye angbeka ama ndze agya mghi emi iFarasi ma kye toke unto si gbo gbee, <<Li kyeme-kyeme ngwi a ka nu Udzengye kyikye, di ngwo ola mghi iMose.>>

⁶ Nghane ama ogbikye iYesu beyi engyukwo kyi ikye kwokyi yi ewoma ikye odi mi odze neni.

⁷ Ngwi a gbodze kpakpa ne, iPyita kye unto si gbodze yi ama gbee, <<Emi ongwunani, ema ye dafi mi ono ama nye ma Imgbasho dudu ani mi idzidze ema ogbo Eso Osuse mi ondu mghi ani ni Udzengye fwo di noyeye mani.

⁸ Imgbasho n ye itukwu mghi inggise duu ma, tso gbee di ongwu gbe Udzengye mi okye Onodzi Osaan nu ma, yeye dafi o kye yi eyi neni.

⁹ O tso idzidza mghi eyi yi ama ba, lubana o salu ma itukwu ye saan ikyekye a noyeye.

¹⁰ Nghama, kyosine ngwi ema le fya ombadi Imgbasho mi okye okye egyeegye ngwi eyi naadi emi otseyi yagba okye ye ba kye do engwafu ikye?

¹¹ Ei! Eyi noyeye gbee li mi elela mghi Otse mghi eyi iYesu ngwi a dudu eyi to, dafi ama kpaa a dudu ma to nani.>>

¹² Okwakye na duu zumye le gado mbi iPol beyi iBanabasi dafi a le nya ma odze ungwu ama okwulewo beyi ambe ama ngwi Imgbasho kye yi Udzengye nye mbi ama mani.

¹³ Ono ngwi a ngye ne, iJensi gbodze to gbee: <<Engwunani, gado mbi ani na.

¹⁴ ISaimon tsutsa nya eyi dafi mi ababo ma Imgbasho tso oweka mgbani mi odudu Udzengye angbeka nu ma ye emidan mani.

¹⁵ Elodze mghi ama ogbeese kpaa kwokyi yi ungwone, dafi a lo mi Afe mani gbee:

¹⁶ <<Ni ungwone nye ani ka yido di yile esuto mghi iDevedi sise.

Ikpishi mgbani ka yi yilen mbe, dika non dze mi odzeedze mgbani,

¹⁷ adzi ni inggise owamye ama nsisi duu pita Otse,

beyi Udzengye ama ndze yi iyi mghi ani duu,

li nga ngwi Otse nkyungwo ntonene gbo aali>

¹⁸ ungwona a teyi yen mi owita-wita mghi ese majo.

¹⁹ <<Nghane, ani le ngyelu gbee, ni eyi ka non ye okye mbi Udzengye ama nle kyata luba mbi Imgbasho ba.

²⁰ Tatase ni eyi lo ma afe, nya ma nu ma dudu abo mi ungwogye ngwi a kye fife nu angwula, mi amah idza, mi mmbwe mmbwaba ngwi a tsili-tsili ma onbukwo beyi mi ali eyi duu.

²¹ Lubana a gbo ola mghi iMose mi ali ogalu ono ke di gbon mi imbe okwakye mghi emi iJudia ali egbe otonyewo duu.>>

Okwakye lo afe mbi Udzengye ama onoyeye

²² Ta ama ogbikye iYesu yi engyukwo, beyi okwakye mghi emi iKrestu ololo duu, bwundu dudu emidama angbeka di do ma eso lu Antioku yi iPol beyi iBanabasi. A

dulu iJuda (ngwi a li kwun gbɛɛ iBasaba) beyi iSaila, inggise efa ntone a nu ma mmwe kpaakpaa mi idzidze mgbi ama onoyeye.

²³ A kye afe ntone do ma eso a lo mi ele gbɛɛ:

Ama ogbikye iYesu yi engyukwo, beyi emi engwunema, deso angba mbi ema Udzengye emi engwunee yi mi Antioku, iSiria, beyi iSilisia.

²⁴ Eyi fwo gbɛɛ angbeka mbi eyi to mi oye-ye mgbi eyi ba di nu ema okakewo, nu ema iso mi itukwu mi odze ngwi a gbo mani.

²⁵ Nghane eyi duu gbela odulu inggise angbeka yi emi okeyi ingblimo iBanabasi yi iPol di do ma eso mbi ema.

²⁶ Inggise ntone kye oshishe mgbi ama lase mi ikye iyi mgbi Otse mgbi eyi iYesu iKrestu.

²⁷ Nghawane eyi le do iJuda yi iSaila eso nu ma ka kyo obwende ongwu ondu mi ungwɔ ngwi eyi le lo ntoneni.

²⁸ I kpa Onodzi Osaan beyi eyi ombwo ema okye nga ungwɔ ntone ba, sede li ama ndze kyeme-kyeme nani.

²⁹ Ema ka gye ungwogye ngwi a kye fife nu angwula ba, ungwɔ eyeeyi ba, ema dika gye mmbwe mmbwaba ngwi a tsili-tsili ma onbukwo ba, di dula abo mi amah idza. Kini ema kyungwo ntone bayo, li ayin seali.

Ke saan na.

³⁰ Inggise ntona kyee okyee lu Antioku, ka kwu emi iKrestu kwakye mbonyi kye afe ma nu ma.

³¹ Inggise ntona gbo afe nani ewo di sheta loma ikyesine li eso okwu ma ewewo.

³² iJuda yi iSaila, ama abuoma li oyegbo, a gbodze kpakpa okwu ama onoyeye ntona ewhane di yile ma dze ofe.

³³ Ngwi a kye egbe gwee mi ele ne, ama onoyeye ntona wo ma ofe mi iyu nu ma yido lu ka tu ama ndo ma eso mani.

³⁴ (Nghaduukpaa iSaila yo i kpan odze imbe nani.)*

³⁵ Kpaa iPol beyi iBanabasi tila dze Antioku, ne ama beyi inggise angbeka kwuba tso diye gbeeso mgbi Otse mi ele.

IPol gha yi iBanabasi

³⁶ I wa la gwee ne iPol gbo yi iBanabasi gbɛɛ, <<Ba ni eyi ye ka kpadi emi ongwuneyi mi ali igeli ngwi eyi gbeeso mgbi Otse mi ele duu, di di dafi a le kyo mani.>>

³⁷ I mina iBanabasi okye iJon, ngwu a di li kwun gbɛɛ iMaki na, wafɔ yi ama,

³⁸ kpaa iPol tsewe gbɛɛ li ayin ba okyon wafɔ yi ama, ikyesine o tse dzamata mi iPamfylia di nya okyido yi ama.

³⁹ A dze yi angwodze fyumfye kpakpa yi ewoma neman a gha okyee. iBanabasi kyelu iMaki fooye lu iSapru,

⁴⁰ nghaduu iPol dula iSaila lu yan, ngwi a le lu ne, ama onoyeye kye ma woke iwulu abo mgbi Otse.

⁴¹ O kyikye kpatse iSiria beyi iSilisia, le fyi okwakye mgbi emi iKrestu mfye itukwu.

16

Agaba mgbi iPol ongwu fan

¹ iPol beyi iSaila ke iDebe, a di nye ke iListra, imbe ngwi inggise onoyeye ngwu a li kwun di iTimoti dze, Onon li emi iJuda di noyeye. Nghaduu otson li emi iGriki.

² Ama onoyeye mi iListra beyi iKonu duu gbodze osuse ikpewo iTimoti.

³ Nghane i mina iPol okyon wafɔ ke agaba yan, ikyenghane o kyan ikye ikye mgbi emi iJuda ama nto imbe na mani, ikyena ama duu ye gbɛɛ otson li emi iGriki.

⁴ Ngwi a le dzagaba mi igeli igeli kye ne, a kye ewodze ngwi ama ogbikye iYesu beyi engyukwo emi iJerosalin kye bwalu ma, gbo nya inggise ntona ikyegbɛɛ nu ma sunu mi ele.

⁵ Nghane ozu okwakye mgbi emi iKrestu duu fyumfye kpakpa mi oyeye onuunu dile mbwoombwo mi mmbwo mgbi ama alegbe-alegbe.

Ela okwuukwu mi iMasidonia

⁶ Akpe oka ne iPol beyi emidan dzagaba nye iFrijia beyi iGalatia, ikyena Onodzi Osaan nya ma gbɛɛ nu ma ka yama gbeeso mi ayese mgbi Asia ba.

⁷ Ngwi a wa to otsee iMisia ne, i mina ma okaka iBitinia, nghaduu Onodzi mgbi iYesu nu ma ofe nu ma kaka ba.

⁸ Nghane ta a si wikye nye ongwu iMisia lu iTroa.

⁹ Mi otu na iPol si di ine odiidi. O di ongyulo mi iMasidonia, le tekye yan gbɛɛ, <<Ba iMasidonia wa ya eyi abo.>>

¹⁰ Ngwi iPol di ine odiidi nye ne, eyi si wewo akponyi lu iMasidonia. ikyekye eyi kyi kye gbɛɛ, Imgbasho kwu eyi ela gbɛɛ ni eyi ka gbo Eso Osuse nya ma mi imbe nani.

ILedia mi iFyilipi noyeye mbi iYesu

¹¹ Eyi kaka uwaa mi iTroa dzekyo dake ibu iSamotre, tegblifan ne eyi bese mi iNiapoli.

¹² Mi imbe na eyi lu iFyilipi, ogalu ongwu ababo mi agwo iMasidonia nbyidze abumfye mgbi iRoma nani; eyi la imbe na egbe ibyibi.

¹³ Mi egbe otonyewo ne, eyi tase dzita onufe ogalu lu ondekyoo, imbe ngwi eyi tsewe gbɛɛ emi iJuda ka kwakye le bibo

* 15:34 15:34 Afe angbeka dze yi ambulu ne ba

mani. Eyi sise di wita ogbodge yi engyaa angbeka ama nkwaye mi imbe na mani.

¹⁴ Onyi mi idzidze ma nle fwo eyi ma li iLedia mi iTyatira, o li gbe angwuto ondlendle gya. O li sunu Imgbasho, nē Otse Imgbasho kwulun itukwu non gbela odze ngwi iPol le gbo mani.

¹⁵ Ngwi a kyon iBatisima beyi emidan duu nē, o bō eyi gbēē ni eyi ba udan. O gbēē, <<Ni ema kye ani gbēē ani noyeyē mbi Otse yō, ba wa la ude ani na.>> O biibe yi eyi, ta eyi si kē.

iPol beyi iSaila mi obawi

¹⁶ Egbe oka ngwi eyi le kē imbe obibo nē, eyi kpatse yi ongwongyaa ofyēē ngwu ese don ikye di li ongye ogbēē. O li tseefa kwo awuya kpakpa nu emi otsidōn.

¹⁷ Ongwongyaa nē kyedō iPol yi eyi le kwu-ela gbēē, <<Inggise ntonē li engbido mgbi Imgbasho onghaangha, a le nya ema ofē ngwi ema ka wato mani.>>

¹⁸ O kiyayi ogbodge nē alegbe-alegbe, ng-hataa itukwu wa wulu iPol man o kyata nya onodzi obube nwodze mbon na gbēē, <<N wo abu ola mi iyi mgbi iYesu iKrestu tase mbon!>> Onodzi na si tō dzanta mi onō nani.

¹⁹ Ngwi emi otsidō ofyēē na difwi gbēē ofē otu awuya mgbi ama tukwu nē, a si kpakli iPol yi iSaila kwo ma kpēēkpēē lu ifyidu ka wo emi mfye abo.

²⁰ A gbe ma ba mbi ama ogbiikwō wa gbēē, <<Engyulo ntonē li emi iJuda, a le ba yi okakewo mi igeli mgbi eyi kpakpa.

²¹ A tole tso aletō nli ayin ba mbi eyi emi iRoma.>>

²² Ibyi si yaoke okyō eye yi iPol beyi iSaila, ama ogbiikwō kyī ngħalu ma angwuto di noola gbēē nu ma gbo ma ibe.

²³ Ngwi a gbo ma ibe saan nē, a gbe ma woke obawi. A si wo ongye ongyoongyo na ola gbēē no ngyo ma saan.

²⁴ Ngwi a woola ngħane, inggise ongyo obawi na si gbe ma woke mi idzidze obawi di ta ma itse mi afō.

²⁵ Mi idzidze otu nē, iPol beyi iSaila tole bibō dile shashi mbi Imgbasho. Inggise angbeka mi ifu obawi tole fwo ma dafi a le shashi mani. ²⁶ Ntunto nē, ikpese suusu kpakpa man itozu mgbi obawi suusu. Onufe obawi duu kwulu akponyi, ta itse ngwi a ta ama nwoto obawi duu she.

²⁷ Ngwi inggise ongyo obawi wa gbokyoato neta, o dili onufe obawi tsatsa lato asisa, o si kye ngwalu okwusunkli mgħan ikye ongwō ewon, ikyēkyē o tsewē gbēē emi obawi duu tse lu.

²⁸ Hinine iPol fan ela gbēē, <<Ka yama ngwō ewoo ba! Eyi duu ka todze aana!>>

²⁹ Ongye ongyo obawi kwu ela ola si maama lu ifun ka gbēē lakiyayi iPol beyi iSaila le shi adagba għagħaagħa.

³⁰ O gbe ma tase wa byi ma gbēē, <<Engyukwo, li ekyē n ka kyō kyēmē-kyēmē se n ka wato?>>

³¹ A nyan gbēē, <<Nu oyeyē mbi Otse iYesu ta abu ka tu owato-wato beyi ude mgbi abu duu.>>

³² Neta a si gbo elodze mgbi Otse iYesu nyan beyi ama nto udan duu.

³³ Ngwi ka li otu mani, inggise ongyo obawi na gbe ma ka sa ma ifwa mi ewo tsatsadu; ntunto mata a si kyon iBatisima beyi emidan duu.

³⁴ Inggise ongyo obawi na gbe ma tō luba ude mgħan wa nu ma ungwogye, o mbwo yi atsa, ikyēkyē o yēē owa noyeyē mbi Imgbasho, ongwu yi eto mgħan duu.

³⁵ Ngwi egbe wa fa nē, ama ogbiikwō dō obaka mgbi ama esō mbi inggise ongyo obawi na gbēē: <<Nu inggise ntona ofē nu ma lu.>>

³⁶ Inggise ongyo obawi nē si nya iPol gbēē, <<Ama ogbiikwō ntona desō gbēē ni a dzita abu beyi iSaila. Onene ema ka lu. Lu mi iyu na.>>

³⁷ Nghaduu iPol nya obaka ntona gbēē: <<A gbo eyi ibe mi ododa ikwō kpaa a yama fwo eyi ba, dafi eyi li emi iRoma nē kpaa a di gbe eyi wo obawi. Nghama onene a mina odzita eyi ni eyi lu ngħa mgħanta imimaa? N fwa! Nya nu ma ba abuoma wa dudu eyi tase.>>

³⁸ Obaka ntona si yē lu ka nya ama ogbiikwō ntona ngħa, dafi a ka fwo gbēē iPol yi iSaila li emi iRoma nē, imio wo ma.

³⁹ A lukwu ma kē obawi ka nu ma aba ogyeegye. A gbe ma tase wa tēkyē nu ma gbēē nu ma lu dzita ogalu mgbi ama.

⁴⁰ Nghaduu iPol beyi iSaila yidō luba ude iLedia, mmana a wa tu ama onoyeyē angbeka, a di kwu ma ewe wo duuse a kwa lu dzita igeli nani.

17

iPol għeesō mi iTesalonika

¹ Ngwi iPol beyi emi okan dzagaba ka nye ongyi Amfipoli yi Apolonia nē, a wa to iTesalonika, imbe na ozu okwakyē mgbi emi iJuda dze efu.

² Dafi iPol teyi li kyō mani, o ka kaka ozu okwakyē mgbi emi iJuda, man si kpōnya yi ama mi Afe mi egbe otōnyewo ngħi etā,

³ le nu ma osa diyē le tso ma ambē gbēē iMedzaya ma ka gyadze kyēmē di kyēē mi ikwongye. O gbēē, <<iYesu ngwu ani le gbodzan nya ema nē li iMedzaya mani.>>

⁴ Emi iJuda angbeka noyeye di yee ama okyedo iPol beyi iSaila, dafi emi iGriki iby-ibyi ama omio Imgbasho beyi engyaa imo angbeka kwuba kpaa kyo mani.

⁵ Nghaduu emi iJuda angbeka kyoofu, ng-hane a kwu ama ondeye angbeka kwakye mi ifyidu, a yee ondu onyi man si wita eye mi ogalu nani. A tsinya ka kaka ude iJason le pita iPol beyi iSaila ikye okye ma luba ese wa nu ibyi inggise.

⁶ Dafi a yama tu ma mi imbe na ba ne, a si kwo iJason yi ama onoyeye angbeka gbe ma ke mbi engyukwo emi igeli, le kwu-ela gbæ: <<Inggise ama nle nu okakewo kpatse ese duu ne, bato mmene oneneni,

⁷ ma iJason gbe ma kaka ude mgban. Ama duu tole foola ngwi iSidza wo, a tole gbæ uto oka dze ngwu a li kwun di iYesu.>>

⁸ Ngwi a fwo odze ne nga ne, igeli duu yee yaaya.

⁹ Ta a nu iJason beyi angbeka ntona kpaa udza ogbe-abo se nu ma lu.

iPol beyi iSaila mi iBeria

¹⁰ Mi otu na ama onoyeye kye iPol beyi iSaila deso lu iBeria. Ngwi a ka to imbe na ne, a kaka ozu okwakye mgbi emi iJuda.

¹¹ Emi iBeria dze yi ali osuse nga emi iTesalonika, lubana a gbe eso na yi atsa kpakpa dile kya mi Afe alegbe-alegbe ikye odi ni odze ngwi iPol gbo na li otsitsi yo.

¹² Emi iJuda ibyibyi noyeye, dafi ibyi engyaa imo emi iGriki beyi engyulo kpaa kyo nani.

¹³ Nghaduu ngwi emi iJuda angbeka mi iTesalonika kwambe gbæ iPol le gbo elodze Imgbasho mi iBeria ne, a lo ke imbe na ka teeye.

¹⁴ Ne ama onoyeye byakpa kye iPol deso lu ondiiga, kpaa iSaila beyi iTimoti tila mi iBeria.

¹⁵ Ama nwafo beyi iPol ntona tawon ng-hataa ke Aten, ne a si yido lu iBeria yi eso mbi iSaila beyi iTimoti gbæ nu ma vla-vla ka tun.

iPol gbæso mi Aten

¹⁶ Ngwi iPol kale dzegiya ma mi Aten ne, eka kwowina lon kpakpa mi ikye angwula ama ngbiimbe mi ifu ogalu nani.

¹⁷ Nghane o li kponya yi emi iJuda beyi emi iGriki ama omio Imgbasho mi ozu okwakye mgbi emi iJuda, beyi inggise ama ngwu o tu ma mi ifyidu kpaa alegbe-alegbe.

¹⁸ iPol kaka angwe ota-ta yi obyi etsetse angbeka ngwu a li kwu ma gbæ Epikuria yi iStoki a li inggise ama otsewodze kpakpa. Angbeka mi ele byita gbæ, <<Li ali odze ngwi inggise ntso gbæ ongwu ye nga duu ne le mina ogbo?>> Angbeka gbæ, <<Dze dafi o le gbodze Imgbasho ongwu anengye mani.>> A gbodze ne nga ikyekye iPol le

gbo Eso Osuse mi odze mgbi iYesu beyi okyee-kyee mgban mi ikwu.

¹⁹ Ne a kyon ke okwakye mgbi Ariopagu, mmana ma a byun gbæ, <<Ni eyi ye li ali otsootso ofufe ngwi abu le tso kye den?

²⁰ Abu le kye odze angbeka ama nfyi eyi mfye ofwoofwo kpakpa ba, nghane eyi mina oye itan.>>

²¹ (Emi Aten yi ingyoga mgbi ama ngwu lato yi ama duu, li kye ono okyo nkonyonyi wuba, kpaa a li le gbodze di gado mi odze ama ofufe.)

²² Neta iPol kyato dzekiyayi okwakye mgbi emi Ariopago si gbæ: <<Ema emi Aten! N difwi gbæ ema li sunu Imgbasho angbeka saan mi ali ito ofe duu.

²³ Ikyena n kyikye wodi agwo mgbi ema, n di ungwō ama ngwi ema le sunu ma mani, n di iwashi oka a lo ungwō mi efu gbæ; IKYENGHANE UNGWŌ NGWI EMA TOLE SUNUN DAFI IMGBASHO NGWU A YEN BA NA, n ka gbodzan nya ema.

²⁴ <<Imgbasho ne li ongwu ta ese beyi alungwō ama nto efu duu na, li Otse mgbi esho yi ese, o li yama la ozu ngwi a mbe mi abo ba.

²⁵ O mina unkonyi mi abo mgbi inggise owamye ba, ikyekye i won yi unka ba, lubana li ongwu abuon li nu ali inggise oshishe yi mmye beyi ungwō angbeka duu aali.

²⁶ Ikpewo inggise onyi Imgbasho ta inggise ama nto ese tsatsadu, ikyegbæ ese duu no li mgbi ama; li ongwu di kye ono dze ali inggise duu beyi imbe ngwi a ka dze yeye mani.

²⁷ Imgbasho kyungwōne nga ikye ni inggise ye ongwu, pita ongwu di tu ongwu, nghaduu o dze mbotunto yi eyi ba.

²⁸ <<Lubana li mbon ngwi eyi dze oshishe di li kyikye kye di dze mi odzeedze mgbi eyi.>> Dafi ama olo ungwō mgbi abu angbeka gbo mani gbæ, <<Eyi li eto mgban.>

²⁹ <<Nghane dafi eyi li eto mgbi Imgbasho ne, ni eyi ka tsewe gbæ odzeedze mgban dze dafi abashi naadi iyudza onzundze okwōkwō hona ikwutse naadi ungwō ok-paakpa ngwi inggise kpa mi ozoyeye mgban ba.

³⁰ Tugbe ma Imgbasho kye ado ong-haangha ito ne wuuta ba, kpaa onene yo o woola gbæ ni ali inggise mi ali imbe duu kyatitukwu mi ofe obube mgbi ama.

³¹ Lubana o kye egbe dze ngwi o ka wa fwo ese duu ikwō mi otsitsi mi abo mgbi iYesu ngwu o tsekise dulo nani. Imgbasho tsekise tso obwende ne mbi ali inggise duu mi okyile iYesu mi ikwu.>>

³² Ono ngwi a fwo iPol gbodze mgbi okyee-kyee mi ikwu ne, angbeka shan isha, kpaa angbeka gbæ, <<I mina eyi odi fwo abu mi itodze ne onoka.>>

³³ Ngwi a gbodze ne mata, iPol si lu dzata okwakye.

³⁴ Nghaduu inggise angbeka gbela kyedo iPol di yes ama onoyeye. Onyi mi idzidze mgbi ama li iDionasu, inggise mi okwakye mgbi Ariopago, beyi iwata ngwu iyin di iDamari beyi angbeka kwuba.

18

iPol ke iKorinti

¹ Ngwi ungwone nye ne, iPol dzita Aten lu iKorinti.

² Li mmana ngwi o tu inggise iJuda ngwu a li kwu iyin di Akwila, o li inggise mi iPontu, o kwa kye mi Itali yi owan iPrisila ono ke waba, ikyekye uto iKladiosu wola gbɛɛ emi iJuda duu nu ma dzita iRoma. Ne iPol si ke oka di ma,

³ ma ikyegbɛɛ ongwu kpaa li inggise otuo opo dafi ama kpaa li tuo ne, o tila dze le kyido yi ama.

⁴ Alegbe otonyewo duu o li ka kaka ozu okwakye mgbi emi iJuda, le fya ikye ni ongwu kyata emi iJuda beyi emi iGriki itukwu.

⁵ Ono ngwi iSaila beyi iTimoti yido mi iMasidonia ne, iPol kyelu ono mgban duu nu mi eso ogbɔgbɔ di kyo obwende mbi emi iJuda gbɛɛ, <<IYesu li iMedzaya mani.

⁶ Kpaa ngwi emi iJuda gbela yi iPol wuba yido le fyan ito ne, o gbo angwuto mgban otso ma gbɛɛ di a le tangwe Imgbasho di nya ma gbɛɛ, <<Eyi mgbi ema no dikye ema! Ani yo, ani kyido mgbi ani saan. Wita onene lu iyayi n le lu ka gbeeso nya Udzengye.>>

⁷ Ne iPol si dzita ozu okwakye mgbi emi iJuda lu ude nwatse don mani, ude iTaitusu iJostusu ongwu nli Udzengye li sunu Imgbasho nani.

⁸ IKrispu, ongyukwo mi ozu okwakye mgbi emi iJuda, beyi eto mgban ololo duu noyeye mbi Otse iYesu; beyi emi iKorinti gwuba ama nfwɔ iPol noyeye a di kyo ma iBatisima.

⁹ Otu oka ma, Otse iYesu gbodze yi iPol mi ine odiidi gbɛɛ, <<Ka yama wo imio ba; kiyayi ogbɔgbɔ, dika tukwondo ba.

¹⁰ Ikyesine n dze beyi abu, ma inggise onyonyi ka yama dze abu wo di kyo abu ibli ba, ikyekye ani to yi inggise kwuba mi ogalu neni.>>

¹¹ Nghane iPol la imbe na onova onyi yi ofyia egyin le tso ma elodze Imgbasho.

¹² Nghaduu ono ngwi iGalio gye iGona mgbi Akaya ma, emi iJuda dze iPol wo bwon kyon lu opiikwo.

¹³ A gbɛɛ, <<Ongyulo ne, le fya okyata inggise nu ma sunu Imgbasho mi ofe ngwi ola mgbi eyi gbela ba.>>

¹⁴ Ngwi iPol kwa wewo ogbɔdze ne, iGalio nya emi iJuda gbɛɛ, <<Ni ema emi iJuda kile kwondukwo mi ungwɔ obube hona alobube ntimbi kpakpa yo, n kika yagba kyungwo mi efu.

¹⁵ Kpaa ngwi i yes angwodze mi ikye odze ogbɔgbɔ yi iyi, beyi ola mgbi ema ne, yile odze mgbi ema me abuema na. N ka yama wo abo mi ito ntona ba.>>

¹⁶ Neman o lo ma onya tase mi ozu ikwo.

¹⁷ Ta ama duu kpakli iSostene nkye ozu okwakye mgbi emi iJuda teyi mani di gbon mi iyayi opiikwo. Nghaduu iGalio gbine ngwuta i kakan ewo ba.

iPol yido lu Antioku mi iSiria

¹⁸ iPol la iKorinti egbe ibyibyi. Ta o dzita ama onoyeye, kye ikye do onye ongwɔ eni lu iSiria. O wafɔ yi iPrisila yi oban Akwila. Duuse non lu yo, o nye wulo otu mi iSenkria, ikye ombwo ondu odzɛɛdze ngwi o dze mani.

¹⁹ A ka kaka Efesu, man iPol dzita iPrisila beyi Akwila. Ongwu abon kaka ozu okwakye mgbi emi iJuda ka kponya yi ama.

²⁰ Ngwi a nyan gbɛɛ no la yi ama kpakpa ne, o fwa.

²¹ Ngwi o ka lu ne, o zondɔ gbɛɛ, <<N ka yido ba mbi ema, ni li oweka mgbi Imgbasho yo.>> Neta o si kaka uwaa lu dzata Efesu.

²² Ngwi o kaka iSiria ne, o ka ta emi iKrestu angba di nye lu Antioku.

²³ Dafi o la Antioku kye egbe gwee ne, iPol kyato mi imbe na dzagaba ke imbe idzidza-dzidza kpatse ayese iGalatia beyi iFrijia, le kwu ama onoyeye ewe wo.

Apolo wita ido mgban

²⁴ Nghane inggise iJuda ngwu iyin di Apolo, ngwu a mban mi ogalu Alekdzandra ba Efesu. O li ongyulo ngwu kpai afe, di dze yi ozoyeye mgbi lhyibyilo saan.

²⁵ A tson Ofɛ mgbi Otse, ngwi o le fu mi onodzi ne, o gbodze di tso odze mgbi iYesu mi itukwu onyi, nghaduu o ye odze iBatisima mgbi iJon kyon ta.

²⁶ O si wita odze ogbɔgbɔ yi abo otsigege mi ozu okwakye mgbi emi iJuda. Ngwi iPrisila beyi Akwila fwon ne, a kyon lu ude ama ka nun osa mi Ofɛ mgbi Otse saan.

²⁷ Ono ngwi i wa wo Apolo oke Akaya ne, ama onoyeye fyonmfye itukwu, di lo afe mbi ama okyedo mi imbe na gbɛɛ nu ma gban abo efa. Okakaakaka mgban ma, o dze yi abo oyaaya mbi ama Imgbasho nu ma noyeye mi elela mgban mani.

²⁸ Ikyena o tangwodze yi emi iJuda kpoklɔ di nga ma mi ododa, tso ma ambe mi Afe saan gbɛɛ iYesu li iMedzaya.

19

Agaba mgbi iPol ongwu ta

¹ Ngwi Apolo ka dze iKorinti ne, iPol nye ongwu afeese wa kaka Efesu. Mmanana o tu ama onoyeye angbeka

² di byi ma gbɛɛ, <<Ema gbɛ Onodzi Osaan onɔ ngwi ema noyeye ma we?>>

A gbɛɛ, <<Ei, eyi fwo kpaa gbɛɛ Onodzi Osaan dze ma ba.>>

³ Ne iPol byi ma gbɛɛ, <<Nghama li ali ito iBatisima ngwi a kyo ema?>>

A nu uka gbɛɛ, <<IBatisima mgbi iJɔn.>>

⁴ iPol si gbɔgbɛɛ, <<IBatisima mgbi iJɔn li iBatisima itukwu okyata-kyata. IJɔn nya inggise ntona gbɛɛ nu ma noyeye mbi ongwu nka wa ba mi iyikpa ongwu mani, li iYesu waali.>>

⁵ Ngwi a fwo odze ne ne, a kyo ma iBatisima mi iyi mgbi Otse iYesu.

⁶ Dafi iPol kye abo dɔ ma ikye ne, Onodzi Osaan kaka mboma, a si gbɔ onduzɛ angbeka di yegbɔ.

⁷ Mmbwo mgbi ama duu mɛ iwyodefa.

⁸ iPol kaka ozu okwakye mgbi emi iJuda di gbɔdɛ yi ama mi ododa nghataa ofyia eta, le tangwodze di biibe yi ama mi ikye odze esuto mgbi Imgbasho.

⁹ Nghaduu angbeka mi ifu ma fyumfyɛ ikye di fwa onoyeye, di kwu Ofɛ mgbi Otse fyito mi ododa. Ne iPol dzita ma di kyi gbelu ama onoyeye ntona wafɔ biyan lu kale tso ma alegbe mi ozu otsuungwɔ mgbi iTiranu.

¹⁰ Ungwɔne kiyayi mɛ onova efa, nghataa emi iJuda beyi emi iGriki ama nto ayese mgbi Asia duu fwo elodze mgbi Otse.

¹¹ Imgbasho nye ikpewo iPol kyungwo ama okwulewo,

¹² Nghane gbaka ayangwuto ofwɔ ine beyi ishisha angwuto ngwi a kye gbɔ iPol ewo kpaa, ni a kye kɛ ni emi ootse kye abɔ gbɔ efu ootse mgbi ama li ngye onodzi ibwubwe kpaa li tɔ dzamata.

¹³ Emi iJuda angbeka ama ntole gaaga tsili kye le lɔ onodzi ibwubwe onya, a fya okwu mi iyi mgbi Otse iYesu mi ikye ama ngwu esɛ dɔ ma ikye gbɛɛ ni esɛ tɔ lu. A le gbɔgbɛɛ, <<Mi iyi iYesu, ongwu iPol li le gbɛɛsɔ mgban na, tase lu na.>>

¹⁴ Emi ongwɛ iSkeva, ongyukwo inggise ofɛɛ mgbi emi iJuda, ngɛi egyafa, tole kyungwɔnɛni.

¹⁵ Egbe oka ne onodzi ibwubwe nu ma uka gbɛɛ, <<iYesu ani yen, iPol kpaa ani ye odzan, nghama ema li ele?>>

¹⁶ Nghane inggise ndze yi onodzi obube bulu gye ma di nga ma yi mfye. O sulu ma onikiyibe, a si tsinya dzata ude mgban ibiba yi eyi mi ewo.

¹⁷ Onɔ ngwi emi iJuda beyi emi iGriki nto Efesu wa ye ungwɔne ne, imio wo ma, ta iyi mgbi Otse iYesu si gye mmwe kpakpa.

¹⁸ Ibyi inggise ama nnoyeye tɔ ba mi ododa wa fwi ali ibwubwe ngwi ama kyo mani.

¹⁹ Inggise ibyibyi ama okyɔ obudei, gbe afɛ ofulu-fulu mgbi ama kwakye gbe toola mi ine ibyi inggise. Ngwi a kyi gbɔlu mmya mgbi umbwo afɛ ntona ne, i mɛ iDracama idubu ngwusefa dɔn iwyo.*

²⁰ Mi ito ofɛ ne elodze mgbi Otse gbɔfwe di nghao fyumfyɛ.

²¹ Ngwi ungwɔ ntonɛ duu kyo nye ne, iPol wewo olu iJerosalin, o nye ongwɛ iMasidonia beyi Acaya. O gbɛɛ, <<Ni ani ka kaka iJerosalin yɔ, n ka kɛ iRoma kpaa kyɛmɛ-kyɛmɛ.>>

²² O dɔ ama okyidɔ biyan ngɛi efa, iTimoti beyi Erastu, kɛ iMasidonia, ongwu yɔ tila dze mi ayese mgbi Asia ongwɔnɔ gwee se.

Onɔgbɛ tɔ mi Efesu

²³ Mi itɔnɔ na onikyeye gbokyeɛ mi ikye Ofɛ mgbi Otse iYesu.

²⁴ Inggise onda iyudza onzundzɛ okwɔkwɔ, iyin gbɛɛ iDemetrio, li ongwu mɛ ozoka Atemi, ungwɔne li nu ma awuya ongyɛngye ba, li mmya ongbungbe ba mbi ama onduufa.

²⁵ O kwu ama onduufa kwakye, beyi ama ndze mi ito ofɛ idɔ pita li ungwɔnyi mani, si gbɛɛ: <<Engyulo, ema ye li mi idabo ne ngwi eyi li tu aludu mgbi eyi.

²⁶ Ema di diye fwo, dafi iPol biibe yi ibyi inggise mi Efesu mmeneni wo ma endɛ, sisi gwee ki li ayese mgbi Asia duu. O gbɛɛ Imgbasho ama ngwu inggise mɛ ma mɛmɛ mi abɔ ntonɛ duu, a yama li Imgbasho ba dududu.

²⁷ Odze obube dze ana, yama li idabo mgbi eyi neta ngwi iyi mgban osuse ka byulu ba, kpaa ozoka mgbi imgbasho ongyaa oshewo Atemi kpaa ka yeɛ ungwɔ onyadi, ongwu imgbasho ongyaa abɔn ngwu a li sunun kpatse ayese Asia yi esɛ olɔlɔ duu na, a ka kye bulu ugabaidu mgban oshewo nani.>>

²⁸ Ngwi a fwo ungwɔne ne, itukwu gyaabyi loma man a wita owulu gbɛɛ: <<Oshewo li Atemi mgbi emi Efesu!>>

²⁹ Labolabo neta igeli yeɛ onɔgbɛ-onɔgbɛ. Inggise ntona kye bwalu iGayɔsu beyi Aristako, ongwu li ongwɛ afokyeɛ mgbi iPol kye mi iMasidonia, a si wafɔ ondonyi dafi a li inggise onyi mani kaka imbe okwakye okwukwo.

³⁰ iPol mina okye ewon tɔ iyayi ibyi inggise, kpaa ama okyedɔ gbelon ba.

* 19:19 19:19 iDracama onyi li udza okpa idɔ mi egbe onyi

³¹ Engyukwo emi ido angbeka mi ayese na, ama nli oka iPol deso tekye nun gbex non ka yama lele kye ewon ke imbe okwakyekwukwo na ba.

³² Okwakyekwende. Angbeka tole wulu mi itodze oka angbeka mi itodze idzidza. Angbeka ye itodze nkye ma kedze imbe na ba.

³³ Emi iJuda tsamu Alekidzanda dzekiyayi ibyi inggise man angbeka mi ibyi inggise tole nyan odze ngwi o ka gbo mani. O si kyo ma abo gbex nu ma dze shilididi ikye ni ongwu natsondu onagbe ewon, mi inai ma.

³⁴ Ngwi a wa difwi gbex o li emi iJuda ne, ama duu wulu ondoniyi me dafi obyi efa hini gbex: <<Oshewo li Atemi mgbi emi Efesu!>>

³⁵ Ongye ololo mgbi ogalu okwukwo tukwu ma ondu, o nya ibyi inggise gbex: <<Ema emi Efesu, li eme mi ese ye gbex igeli mgbi Efesu li ogalu osunu anghodzi Imgbasho ongyaa Atemi ba di ye dafi onodzi mgbani, nngwuta kye esho ma dze imbe ne ba?

³⁶ Nghane, dafi a ka tangwe otsitsi ne gbe ba ne, li ayin ni ema yile itukwu bese di kyo unkonyi mi ikwangha ba.

³⁷ Ema gbe engyulo ntona ba mmene, nghaduu a yama yi ozoka unkonyi hona kwu ashu mgbi eyi shanye ba.

³⁸ Nghane, kini iDemetrio beyi ama okyidabo yan dze yi okakewo yi inggise yo, opikwo lasisa, emi ola kpaa to. Nu ma ka kwelikwo mmanani.

³⁹ Nghaduu ni odze ka dzema ngwi ema mina okye ba yo, li kyeme ni a kye melu mi okwakyekwende mi ola mani.

⁴⁰ Dafi i dze nghane, ungwonkyo ine ne a ka yagba maayi be eyi gbex di li eyi teeye. Eyi ka yagba tangwe mi ikye onagbe ne naadi nu itodze nka me ba.>>

⁴¹ Ngwi o gbodze ne ngye mata, o si nu okwakyekwende.

20

IPol nye ongwu iMasidonia yi iGriki

¹ Ono ngwi eye wa ngye ne, iPol deso mbi ama onoyeye, ngwi o fyuma mfye itukwu ne, o nya ma gbex se egbe oka man kye ofe dikye lu iMasidonia.

² O si dzagaba nye imbe nani, o nya ma elodze kpakpa ofyuma mfye itukwu, mi olele ne o ka kaka iGriki,

³ o la imbe na ofyia eta. Ikyekye emi iJuda wibu okyon ungwon obube dafi o wewo okaka uwaa lu iSiria mani, ne o kyatitukwu yido wikye ka nye ongwu iMasidonia.

⁴ Ama ntawon li iSopata ongwu iPerusu ngwu kye mi iBeria, Aristako beyi iSekundu yi iGayosu emi iTesalonika, mi iDebe, iTimoti kpaa, yi iTaciko beyi iTrofimu mi ayese mgbi Asia.

⁵ Inggise ntona wikye lu ka dze giyi eyi mi iTroa.

⁶ Nghaduu ngwi oga ibredi ongwu a kye okwuna wo efu ba wa nye ne, eyi kaka uwaa mi iFyilipi kye egbe eda duuse kwa lu ka tu angbeka ntona mi iTroa, eyi la ele ikyidu ololo.

A kyile iYutuku mi ikwu mi iTroa

⁷ Egbe ongwu ababo mi ikyidu* ma eyi kwakey ikye ogye oga. iPol gbodze yi ama, ma ikyegbex o weka olu tegblifan ne, o kiyayi yi onya okpaaakpaa yi ama nghataa otu gheefa.

⁸ A gbe ola ipitila doto mi ifoozu ongwu esho imbe ngwi eyi kwakey mani.

⁹ Ongwongyulo mmafa ngwu a li kwun di iYutuku sodze ofe awo le mwuna. Dafi iPol kale kiyayi yi odze ogbongbo ne, una wa ngwon lu kpini, o si gbex kye esho wa zudowoke ese man a ka kyon ikwukwo tatso.

¹⁰ Nghaduu iPol tashulu luba ese, o tukwuke ikwo nani tsekwulun. O si nya ma gbex, <<Ka yama teeyi ba na, o dze oshishe!>>

¹¹ Ta o diye toke lu esho kye ghalu ibredi gye yi ama. Ngwi o gbodze yi ama nghataa ni egbe fa neman, o si lu.

¹² Inggise ntona si kyi kyelu ongwongyulo mmafa ne lu ude oshishe itukwu di fyuma mfye kpakpa.

IPol nya engyukwo emi Efesu gbex se egbe oka

¹³ iPol nya eyi gbex ni eyi nye ongwu uwaa teyi ongwu lu Aso, ka kye ongwu mi imbe nani, ikyesine o le lu imbe na mi afese.

¹⁴ Ngwi o tu eyi mi Aso ma, eyi kyon wo uwaa lu iMitilene.

¹⁵ Tegblifan ma, eyi dzata imbe na dzekyo wa to kwekwe yi ibu iKio. Egbe oka ne eyi dzekyo dake ibu iSamosi, di kaka iMiletu tegblifan.

¹⁶ iPol di wewo nu ma fan nye ongwu eni lu dzata Efesu, ikye omba ono mi ayese mgbi Asia wuba, lubana i won okaka iJerosalin ple, duuse ni oga iPentikosu wa gyo.

¹⁷ Mi iMiletu ma, iPol deso ke Efesu ikye engyukwo emi iKrestu gbex nu ma ba wa tu ongwu.

¹⁸ Ngwi a wa kaka ne, o gbo yi ama gbex: <<Ema ye odzeedze ngwi ani dze mi ono

* 20:7 20:7 Egbe ongwu ababo mi ikyidu li egbe iladi mbi emi iJuda. Li egbe ngwi iYesu kye mi ikwu man emi iKrestu kyata yee egbe osunu Imgbasho mani.

ngwi ani dze yi ema ma duu, wita mi egbe ongwani ababo ngwi ani ba ese Asia mani.

¹⁹ N kyo Otse ido mi ewo oyile ese beyi etse ine. N di shitukwu mi ali imbadi yi iso ngwi emi iJuda wibu ani mi ele duu.

²⁰ Ema ye n yama yeyikpa ogbo ungwondze yi oyabo nya ema mi ododa ba, mi ude ema hona mbi ibyi inggise kpaa.

²¹ Ani gbo nya emi iJuda beyi emi iGriki gbee li kyeme nu ma kyatitukwu luba mbi Imgbasho di dze yi oyeye onuunu mbi Otse mgbi eyi iYesu.

²² <<Nghane onene, Onodzi Osaan si ani le lu iJerosalin, nghaduu n yama ye ungwonka kiyayi yen mi imbe na ba.

²³ Kpaa ungwondze ngwi ani ye li onyi ta, ali ogalu ngwi ani kaka efu duu, Onodzi Osaan li le kwen ado gbee obawi beyi adze ogyeegye dze ani ese ma.

²⁴ Nghaduukpaa n kye oshishe mgben gbee li unkonyi ba, ni ani ki yagba ngyelu onya otse-tse beyi ido ngwi Otse iYesu kye wo ani abo ne kpata ido okyo obwende mi Eso Osuse mgbi elela mgbi Imgbasho neni.

²⁵ <<Onene, n ye ta gbee inggise onyonyi mi idzidze ema ngwu ani gbeeso esuto mgbi Imgbasho nyan, ka yama di ani wuba.

²⁶ Nghane, n le nya ema mi ododa onongwune gbee, n yama dze yi obube mi odzili-dzili mgbi inggise onyonyi ba.

²⁷ Lubana ani fwijiwo onya ema oweka mgbi Imgbasho duu ba.

²⁸ Gbewedze ewema beyi ifyungwo ama Onodzi Osaan gbe wo ema abo gbee ni ema le di mboma mani. Li inggise ama ongyo emi iKrestu mgbi Otse†, ngwu ongwu gyaagya yi eyi mgban ntoneni.

²⁹ Ani ye ta gbee ni ani wa dzita imbe ne yo, emi idukwlebe ibwubwe, ka ba idzidze ema a ka yama dzita ifyungwo ba.

³⁰ Mi idzidze ema kpaa, angbeka ka to nka kyata otsitsi, ikye otu ama okyed ma.

³¹ Nghane gbewebyi na! We na gbee mi onova eta n yama kwulase okwo ali inggise mgbi ema ado mi otu yi ono yi etse ine ba.

³² Onene n kye ema do Imgbasho ubo yi eso mgbi elelan, nka nu ema she di nu ema okwude mi idzidze ama ngwu a kye ma kyi salu duu.

³³ N yama mina iyudza onzundze hona abashi naadi angwuto mgbi inggise onyi ba.

³⁴ Ema abuema duu ye gbee abo mgbi ani ntone nu ani ungwondze ngwi ani mina tsatsadu beyi imina mgbi ama okye yi ani kpaa.

³⁵ Alungwo ani kyo duu, ani tso ema dafi mi ito ido okwunewo ne eyi ka ya emi abubu yi emi ootse abo kyeme-kyeme, ole we elodze ama ngwi Otse iYesu abuon gbo

mani gbee: <Mse dze mi onuunu ngha ogbe-gbe.> >>

³⁶ Ngwi iPol gbodze ne ngye ne, o si gbe akwafu kwese yi ama duu bibo.

³⁷ Neta ama duu si nye yi ikwu otseetse, a tsakwulun di nyan gbee se egbe oka yi okpitukwu.

³⁸ Ungwondze nnghao nu eka kploko lo ma yo, li elodze ngwi o gbee a ka yama di ongwu wuba nani. Taman a si tawon ka kaka uwaa.

21

IPol ke iJerosalin

¹ Ngwi o nya ma gbee se egbe oka duu ne, eyi si nye ongwani emi byakpa lu iKosu yeye. Tegblifan ma eyi ke iRode di nye lu iPatara.

² Ngwi eyi tu uwaa ongwani nle lu iFonishia ne, eyi kaka si kye okyee.

³ Dafi eyi di iSapru ke ne, eyi nye ongwani atiise mgban mi uwaa lu iSiria. Eyika bese mi iTai, imbe ngwi iwudza mgbi eyi ka dula okye mani.

⁴ Ka kpatse yi ama onoyeye angbeka emi imbe nani, ne eyi la yi ama ikyidu onyi. Ama okyed ntone, mi ikpewo Onodzi Osaan yegbo gbee iPol no ka ke iJerosalin ba.

⁵ Nghaduu ngwi ono mgbi eyi wa ngye ne, Eyidzita imbe na wikye lu iyayi. Ama okyed yi owama beyi engbe duu tawo eyi tase mi ifyigeli, neman eyi kwese bibo mi ondiiga.

⁶ Ngwi eyi kyo eka se egbe oka ngye ne, eyi kaka iwudza, man ama si yido lu ude.

⁷ Eyikiyayi yi agaba mgbi eyi mi iTai ka bese mi iPitolemai, imbe na eyi tangha yi ama onoyeye di dze yi ama egbe onyi.

⁸ Tegblifan ne, eyi dzita ma wa kaka iSiria di dze ude iFyilipi inggise ogbeeso, o li onyi mbi inggise egyafa ngwu a dula ma gbee nu ma gha ungwogye mi iJerosalin mani.

⁹ O dze yi engwengyaa nghi ene ama nbongyulo waba li yegbo.

¹⁰ Ngwi eyi la imbe na egbe ibyibyi ne, oyegbo oka ngwu a li kwun di Agabu kye iJudia ba.

¹¹ Ngwi o nye ba mbi eyi ne, o kyi kyelu okpa obwa oshi mgbi iPol, kye bwa ewon afu beyi abo duu si gbee, <<Onodzi Osaan gbogbee, <Li ito ofe ne emi iJuda ama nto iJerosalin ka bwa otsungwo okpa ne adi kyon wo Udzengye abo aali.> >>

¹² Ngwi eyi fwo ungwone ne, eyi beyi inggise ama nto mmanana tekye yi iPol gbee no ka ke iJerosalin ba.

¹³ Nghaduu iPol gbee, <<Kyon ngwi ema le tsukwu dile gbua ani eka? Ani wewo ikye adi obwa-bwa ta ba, kpaa odi kwulu mi iJerosalin ikye iyi mgbi Otse iYesu.>>

† 20:28 20:28 Otse mmene ne li Imgbasho mi ololo angbeka

¹⁴ Dafi i yee gbée eyi ka kýòókýò yan gbé ba ne, eyi si dze abo ta nyan gbée, <<Ni oweka mgbi Imgbasho kyo.>>

¹⁵ Ngwi egbe ntone wa nye ne, eyi kyi gbelu okye mgbi eyi si lu iJerusalem.

¹⁶ Ama okyedo angbeka mi iSisiria wafu yi eyi di kye eyi ba ude Mnason, imbe ngwi i wo gbée eyi ka dze mani. Ongwu nose li ongyulo nkye mi iSapru di li onyi mbi ama okyedo emi ababo ntonani.

Okakaakaka mgbi iPol mi iJerusalem

¹⁷ Ngwi eyi kaka iJerusalem ne, ama onoyeye gbé eyi abo efa.

¹⁸ Tegblifan ne iPol beyi eyi angbeka duu ké oka di iJensi, engyukwo emi iKrestu mi iJerusalem duu kpaa todze ele.

¹⁹ iPol kye angba kwulu ma di kiyatse odze nya ma klekle ungwó ngwi Imgbasho kyo yi Udzengye mi ikpewo ido ngwi ongwu kyo mani.

²⁰ Ngwi a fwo ungwóne mata, a si tse Imgbasho. Ta a nya iPol gbée: <<Año, o di dafi umbwo inggise idubu ibyibi mi iJuda kyatitukwu, di dze yi itukwu olola ongyo Ola mgbi iMose mani.

²¹ A nya ma gbée abu le tso emi iJuda ama nto idzidze Udzengye gbée nu ma kyata dzita Ola iMose, le nya ma gbée nu ma ka kye engwe ma ikye ba hona kyo aletó mgbi eyi ba.

²² Li kyeme ngwi a ka fwo gbée abu badze, nghané li ekye i ka kyo?

²³ Ngyese kyungwó ngwi eyi nya abu mani. Engyulo ene to mmene yi eyi ama nzondu yi Imgbasho.

²⁴ Wafu yi ama, ni ema wewo lu mi ewo ofwo-fwo mgbi ama mani di kpa mi ungwó ngwi a kyo duu, adzi ni a kpalu ma otu. Ta ali inggise ka ye gbée otsitsi dze mi odze ngwi a le gbo ikpewo abu ne ba, kpa i tso gbée abu abuabu gbela yi ola mgbi iMose.

²⁵ Nghaduu mbi Udzengye ama onoyeye yo, eyi teyi lo oweka mgbi eyi ké mboma gbée nu ma dze enggenga mi ungowye ngwi a kye fife nu angwula, yi eyi, yi mmbwe ngwi a ngwó mfyumfyé beyi amah idza.>>

²⁶ Tegblifan ne, iPol kye Engyulo ntone ka fwo ewo yi ama. Ne o si ké ozu okwukwo osunu Imgbasho mi iJerusalem oka nu ma ye egbe ngwi ewo ofwo-fwo ne ka dondu ngwi a dika nu umba ikye ali inggise mgbi ama mani.

A bwa iPol

²⁷ Ngwi egbe egyafa ntona wa dze kwekwe ongyeengye ne, emi iJuda angbeka mi ayese mgbi Asia di iPol mi ozu okwukwo osunu Imgbasho mi iJerusalem. A si kyile etase angbi man a bwan,

²⁸ le teela gbée, <<Emi Israi, ya eyi abo na! Nene li ongyulo nle tsungwó nli ayin ba

kpatse mi ikpewo eyi yi ola mgbi eyi beyi imbe ne mani. Ungwó oka nbe efu yo, o gbe emi iGriki kaka ifyude ozu okwukwo osunu Imgbasho mi iJerusalem di kwo idza kaka imbe Osaan neni.>>

²⁹ (Lubana a tsekise di iTrofimu inggise emi Efesu yi iPol mi ogalu, a si kyi kyelu mi itukwu mgbi ama gbée iPol kyon kaka ifyude ozu okwukwo osunu Imgbasho mi iJerusalem.)

³⁰ Ogalu na duu gbokye, inggise kye onyonya mi ali agya duu. Ngwi a kpakli iPol ne, a kwon to mi ozu okwukwo osunu Imgbasho mi iJerusalem, labolabo neta a gbe onufe gyetukwu.

³¹ Ngwi a le fya ongwón ne, akwó mgbi odze ne kaka mbi agyegika mgbi oblakwutse mgbi emi iRoma gbée ogalu iJerusalem duu yee kwutukwutu.

³² Akponyi man agyegika na gbe engyukwo oblakwutse angbeka beyi engbe oblakwutse si tsinya lukwu ibyi inggise. Ono ngwi emi ablodze ntona dili agyegika beyi eblakwutse mgbán ne, a nya ogbo iPol ibe.

³³ Ta agyegika na ba wa bwa iPol di woala gbée nu ma bwan adi yi ashi efa. Ne o si byun ito inggise ngwu o dze beyi ungwó ngwi o kyo mani.

³⁴ Mi idzidze ibyi inggise ntona angbeka tole gbo itodze idzidza mi ela okwukwo, angbeka di li itodze idzidza, ngwi i fyumfyé gbée agyegika na no difwi otsitsi odze mi ikye onogbe ne, o si woala nu ma kye iPol lu ogalu oblakwutse.

³⁵ Dafi iPol wa to afó otóke ozu ne, ablodze mgbi ibyi inggise ntona she nyese i yee gbée oblakwutse ntona ka kyon kye-kye.

³⁶ Ibyi inggise ama nkye ma iyikpa ma tole wulu gbée, <<Ngyelu yan na!>>

iPol gbodze yi ijiji inggise

³⁷ Dafi ama oblakwutse wewo okye iPol lu ogalu mgbi ama ne, o si byi agyegika gbée, <<Nin gbodze yoo lo?>>

Agyegika na byun gbée, <<O li gbo iGriki we?

³⁸ Abu li inggise Igyibiti ngwu wita eye di gbe ama ongwó inggise idubu ene lu imbe okplagada onoka nose ma we?>>

³⁹ iPol si nu uka gbée, <<Ani li emi iJuda, n kye mi iTasu mi ogalu iSilisia, ogalu ingblimo. Tsuutsu nin gbodze yi inggise ntoneni.>>

⁴⁰ Ngwi o gbe ofe mbi agyegika ne, iPol kwudzeke afó otóke ozu di kyo ibyi inggise ntona abo. Ngwi a dede ne, o gbo yi ama mi ondu Aramai gbée:

22

¹ <<Emi ongwunani beyi emi otsani, gado dafi ani ka natsondu ewen onene neni.>>

² Ono ngwi a fwon le gbodze yi ama mi ondu Aramai ne, a si zumye.

Neta iPol gbæ:

³ <<Ani li inggise iJuda, a mba ani mi iTasu mi iSiliisia, kpaa ani she mi igeli neni. Mi abo mgbi iGamalie a nye ani klekle mi ola mgbi emi otseyi, n di fyumfyem itukwu mbi Imgbasho yeye dafi ema kpaa dze ine neni.

⁴ Ani nu ama okyedɔ Ofɛ ne iso nghataa kaka ikwongye mgbi ama, di bwa engyaa yi engyulo gbe ma wo obawi.

⁵ Okwukwo inggise ofife beyi engyukwo okwakye duu kpaa ka kyo obwendɛ. A di nu ani afe ke mbi emi ongwunoma ama nto iDamasiko, ikye oka bwa ma dafi emi obawi mani, gbe ma ba iJerusalem wa kwo ma ado.

⁶ <<Mi ono idzidze ude ngwi ani dze kwekwe okaka iDamasiko neta, osa tokye esho wa dzaniwo akponyi.

⁷ Man ani gyekɛ esɛ si fwo ela le gbo yi ani gbæ, <ISol! iSol! Kyosine ngwi abu le nu ani iso?>

⁸ Ani byun gbæ, <<Li abu eme Otse?

O nya ani gbæ, <<Ani li iYesu ongwɛ iNadzareti, ngwu abu le nun iso mani.

⁹ Ama nkye yi ani di osa nani, kpaa a fwo ela mgbi ongwu nle gbodze yi ani ma ba.

¹⁰ Ani byun gbæ, <<Li alungwo ngwi ani ka kyo?>

Otse nya ani gbæ, <<Kyato; lu iDamasiko. Mi imbe na a ka nya abu alungwo ngwi a kye dze gbæ abu ka kyo duu.>

¹¹ Ama nkye yi ani ma byi ani abo kaka iDamasiko, ikyesine osa na bulu ani ine.

¹² <<Ongyulo iyin gbæ Anania ba owa di ani. O li ngwo ola saan di dze yi mmwe mbi emi iJuda ama nto imbe na duu.

¹³ O kwulese dze ani ke agya si nya ani gbæ, <<Ongwunani iSol, ine mgbi abu no kwulu!>> Mi ono na yeye ta ani yagba dun.

¹⁴ <<O si nya ani gbæ, <Imgbasho mgbi emi otseyi dula abu gbæ ni abu ye oweka mgban di di Ongwu Nle Nyaan na diye fwo odze mi ondu.

¹⁵ Abu ka li obwendɛ mgban mbi inggise duu mi ungwɔ ngwi abu di diye fwo neni.

¹⁶ Ma li ekye ngwi abu le fe onene? Kyato, kwu mi iyi mgban nu ma kyo abu iBatisima di salu ali ibwubwe mgbi abu ngwuta.>

¹⁷ <<Ngwi ani ye luba iJerusalem dile bibo mi ozu okwukwo osunu Imgbasho ne, ani di ine odiidi

¹⁸ di di Otse iYesu le gbodze yi ani gbæ, <Lu dzata iJerusalem Ple, ikyesine a ka gbela obwendɛ mgbi abu onuunu ikye ani ba.>

¹⁹ Nghaduu ani gbæ, <<Otse, inggise ntone ye ani dafi ani kyikye mi ozu okwakye mgbi emi iJuda kpatse, ikye ogbe

ama nnoyeye mi iyi mgbi abu wo obawi di gbo ma ibe mani.

²⁰ Ono ngwi a tsengwo iStivin ikyegbæ o le kyo obwendɛ mi iyi mgbi abu ma, ani kwudze ele di gbela yi ongwɔngwo mgban di ngwo angwuto mgbi ama nle ngwon mani.>

²¹ <<Ta Otse iYesu si nya ani gbæ, <Lu, ani ka do abu eso lu kpini mbi Udzengye.>>

IPol inggise iRoma

²² Ibyi inggise gado mbi iPol nghataa o gbodze ne ngye. Man a kyile ela ondonyi gbæ, <<Ngwon na, o me odze oshishe ba!>>

²³ Dafi a le wulu di fwadulu angwuto mgbi ama ngwuta dile tombulu ke esho ne,

²⁴ agyegika nu ondu nu ma kye iPol kaka ogalu oblakwutse. O nu ondu gbæ nu ma gbon di byun ita, nu ma ye ungwɔ nkyo duuse ibyi inggise tole fan ela ngha mani.

²⁵ Dafi a nan lase ogbon ne, iPol byi ongyukwo oblakwutse nkwardze mmama ma gbæ, <<Li ola ni abu gbo inggise iRoma ngwu a gbon ikwo di tun yi obube ba kpaa ibee?>>

²⁶ Ngwi ongyukwo na fwo ngha ne, o ke mbi okwukwo ogbakwu na ka kye tson gbæ, <<Li ekye abu le kyo? Inggise ne li inggise iRoma.>>

²⁷ Okwukwo ogbakwu na ke mbi iPol ka byun gbæ, <<Nya ani n di abu li inggise iRoma?>>

O gbæ, <<Een, ani li inggise iRoma.

²⁸ Ne okwukwo ogbakwu na gbæ, <<Ani kpa udza she ikye oyee inggise iRoma.>>

IPol nyan gbæ, <<Nghaduu ani yo ani li imba mgbi iRoma.>>

²⁹ Ama nwewo obyin ita ma byakpa yeyikpa. Okwukwo ogbakwu na abuon ewo waa lon ono ngwi o difwi gbæ iPol li inggise iRoma kpaa ongwu tan itse mani.

IPol kedze ine okwakye mgbi

emi iJuda

³⁰ Tegblifan, ngwi i mina agyegika na oye itodze yeye ngwi emi iJuda gbe odze tukwu iPol ewo ne, o shan adi ta di nu ondu ni engyukwo ama ofife beyi okwakye mgbi engyukwo duu kwakye. Ta o si kye iPol ba non dzekunto mi iyayi ma.

23

¹ IPol kye ine byi okwakye mgbi engyukwo emi iJuda yeye si gbæ, <<Emi engwunani, ani kyido mgbi ani mbi Imgbasho mi itukwu asisa nghataa ba ine.>>

² Mi odze ne okwukwo inggise ofife Anania nu ama nkwluse to kwekwe yi iPol ondu gbæ nu ma gbobun ondu.

³ Ne iPol nya Anania gbæ, <<Imgbasho ka ta abu afe, abu inggise ikpala neni! Abu so mmama le gbo ani ikwo mi odzeddze mgbi

Ola, nghaduu abu abubu foola mi onu ondu gbɛɛ nu ma ta ani afe!>>

⁴ Ama nkɔwudɛ yi iPol ntona byun gbɛɛ, <<Abu shitukwu le fya okwukwo inggise ofife mgbi Imgbasho itoo?>>

⁵ iPol gbɛɛ, <<Engwunani, ani yama ye gbɛɛ o li okwukwo inggise ofife ba, lubana a lo gbɛɛ, <Ka gbɔdɛ obube ikpewo inggise ogbe emidabu teyi ba.> >>

⁶ Ngwi iPol ye gbɛɛ angbeka li emi iSadusi angbeka di li emi iFarasi ne, o makwo yi okwakye mgbi engyukwo ntona gbɛɛ, <<Emi ongwunani, ani li inggise iFarasi, di li ongwɛ inggise iFarasi. A le gbo ani ikwo ikyegbɛɛ ani kye eka byi okyɛɛ-kyɛɛ mi ikwongye.>>

⁷ Ono ngwi o gbɔdɛ ne nɔɔ na, odɛ oshiishi to mi idzidɛ mgbi emi iFarasi beyi emi iSadusi, man okwakye na gheefa.

⁸ (Emi iSadusi noyɛɛ gbɛɛ okyɛɛ-kyɛɛ mi ikwu, beyi engyɛso naadi emi onodzi dzema ba, kpaa emi iFarasi noyɛɛ mi ungwɔ ntona duu.)

⁹ Odɛ oshiishi yɛ okwukwo neman etsetse mgbi ola angbeka ama nli emi iFarasi toke unto di tangwe kpɔkɔ gbɛɛ, <<Eyi tu unkonyi obube mbi inggise ne ba,>> A byi ma gbɛɛ, <<Ni li onodzi hona ongyɛso gbɔdɛ yan ma ye?>>

¹⁰ Odɛ oshiishi na yɛ eye man okwukwo ogbakwu na mio gbɛɛ a ka kyi fwalu iPol ambulu-ambulu. O woola gbɛɛ oblakwutɛ nu ma ka kye kyi gbelu mi abo mɔye yilen luba ogalu oblakwutɛ.

¹¹ Mi otu ongwɔ egbe na Otɛ wa dɛɛɛ yi iPol nyan gbɛɛ, <<Fyumɔye itukwu! Dafi abu gbɔdɛ mgbi ani mi iJerusalem na, li nɔɔ ngwi abu dika gbo kyeme mi igeli iRoma aali.>>

A wibu ongwɔ iPol

¹² Mi egbegbe ne emi iJuda kwakye di bwalu ondu mi ofaafa gbɛɛ ama ka gye hona wa ungwɔ ba sede ama ngwɔlu iPol.

¹³ Inggise nɔɔ ngwusefa ama nwɔdɛ mi ondu obwa-bwa neni.

¹⁴ A ke mbi engyukwo ama ofife beyi engyukwo emi iJuda ka nya ma gbɛɛ, <<Eyi bwa mi ofaafa kpɔkɔ gbɛɛ eyi ka gye unkonyi ba sede eyi ngwɔlu iPol.

¹⁵ Nghawane, ema yi okwakye mgbi engyukwo emi iJuda dɛso mbi okwukwo ogbakwu mi ikpala no kye ba mbi ema gbɛɛ, i mina ema ofwo itɔdɛ saan mi odɛ mgban. Eyi wewo ogbongwɔn duuse no wa to mmeneni.>>

¹⁶ Kpaa ngwi ongwɛ ongwunɔ iPol fwo nɔɔ na, o lu ogalu oblakwutɛ ka nya iPol.

¹⁷ Ta iPol kwu ongyukwo oblakwutɛ ntona onyi ela nyan gbɛɛ, <<Kye ongwum-mafa ne ke mbi okwukwo ogbakwu, o dɛ yi odzimo onyan.>>

¹⁸ Nghane o kyon ke mbi okwukwo ogbakwu nani. O nyan gbɛɛ, <<iPol inggise mi obawi na dɛso mbi ani nya ani gbɛɛ ni ani kye mmafa ne ba mbi abu ikyɛɛ o dɛ yi odzimo onya abu.>>

¹⁹ Okwukwo ogbakwu na byi ongwongyulo mmafa na abo, kwon lu enggenga si byun gbɛɛ, <<Li ali odɛ ngwi abu dɛɛɛ onya ani?>>

²⁰ O nyan gbɛɛ, <<Emi iJuda bwondu onya abu ni abu kye iPol ba okwakye mgbi engyukwo emi iJuda ekeka mi ɛwe gbɛɛ ama mina oye itɔdɛ yɛɛ mi odɛ mgban.

²¹ Ka gbela yi ma ba, ikyɛsine inggise nɔɔ ngwusefa da to oshɛ le fan. A fa gbɛɛ ama ka gye hona wa ungwɔ ba sede ama ngwɔ iPol. A wewo ngyɛ onɛɛ le fɛ ogbela-gbela mgbi abu mi oweka mgbi ama.>>

²² Okwukwo ogbakwu na wo ongyulo mmafa na ofɛ di kwon adɔ gbɛɛ, <<Ka nya inggise onyi kpaa gbɛɛ di abu nya ani odɛ ne loo.>>

A nyine iPol lu iSidzaria

²³ Ta o kwu engyukwo mgbi ama oblakwutɛ efa ela si nu ma ondu gbɛɛ, <<Gbe oblakwutɛ ideli efa yi ama otɔ mmya ngwuseta don iwyo beyi emi asho ideli efa nu ma wewo oke iSisiria mi obyɛ egypte mi otu ine.

²⁴ Di wewo yi mmya angbeka nka kye iPol ke mbi iGona iFelisi saan mani.>>

²⁵ O lo afe sini:

²⁶ IKladiosu iLisia, Ugabaidu, iGona iFelisi:

N ta abu angba.

²⁷ Inggise ne emi iJuda bwan di wewo ongwɔn, kpaa ani ba yi ibyi oblakwutɛ wa nagban, ikyɛɛɛ ani fwo gbɛɛ o li imba mgbi iRoma.

²⁸ Ani mina oye ungwɔ ngwi a le gbe odɛ tukwun ewo mani, nghane ani kyon ba mbi okwakye mgbi engyukwo emi iJuda.

²⁹ Man ani wa difwi gbɛɛ a le gbe odɛ tukwun ewo mi ikye ola mgbi ama, nghaduu itɔdɛ onyi ngwi a nu ngwi me ongwɔn hona kye wo obawi dzema ba.

³⁰ Ono ngwi a nya ani ungwɔ ngwi a kye weka okyɔ yi inggise ne mata, ani kyon dɛso lu mbi abu akponyi. Ani di nu ondu gbɛɛ ama ngbe odɛ tukwun ewo ntona nu ma gbo itɔdɛ mgbi ama ma nya abu.

³¹ Nghane oblakwutɛ ntona kyidɔ ngwi a nu ma ondu mani, a kye iPol wafɔ yi ama kyon lu byulu kaka Antipatri mi otu nani.

³² Tegblifan ma emi mmya tawon lu kpaa emi afɛɛɛ yɔ yidɔ luba ogalu mgbi oblakwutɛ.

³³ Ngwi emi mmya ntona ka kaka iSisiria ne, a kye afe ma nu iGona di kye iPol kpaa won abo.

³⁴ iGona gbo afe na si byita ayese ngwi o kye ele mani. Ngwi o difwi gbɛe o kye mi iSilisia ne,

³⁵ o gbɛe, <<Ani ka fwo odze mgbi abu mi onɔ ngwi ama ngbe odze tukwu abu ewo kaka mmene mani.>> Ta o wo ma ola gbɛe nu ma kye iPol lu ude uto iHerude ka ngyon.

24

A fwo iPol ikwo mi inai iFelisi

¹ Ngwi i kye egbe eda ne okwukwo inggise ofife Anania ba wa kaka iSidzaria yi engyukwo angbeka beyi inggise oye ola iyin di iTetulo, a si gbe itodze ngwi a le gbe odze tukwu iPol ewo mi ele ma to iGona ese.

² Ngwi a kwu iPol ela kaka ifun ne, iTetulo kye itodze mgbi elikwo mgban tso iFelisi gbɛe, <<Eyi to mi iyu mi abo abu onɔ she, ine mgbi abu odiidi na di ba yi okiyayi mi ese neni.

³ Ugabaidu iFelisi, mi ali imbe yi ali ofe duu, eyi gbela ungwone di gbede nu abu kwuba.

⁴ Nghaduu ombe abu onɔ bayo, n le bo gbɛe o ki shitukwu diyɛ fwo eyi gwee.

⁵ <<Eyi difwi gbɛe inggise ne li inggise oteeye, o li tu ola eye wo mi idzidze mgbi emi iJuda mi ese duu. O li inggise ogbe emi iNadzareti teyi mi eye

⁶ o di fya okye ayiwi kaka ozu okwukwo osunu Imgbasho mi iJerosalin; nghanɛ eyi kpaklin. [Di mina ogbon ikwo mi ola mgbi eyi.

⁷ Kpaa agyegika iLisia ba mfyumfye wa kyon kyi lafwa mbi eyi,

⁸ kwu ama nkwun elikwo ntone ela nu ma ba]*, ni abu byi ma ita abuabu ta abu ka yagba otu otsitsi mi odze ngwi eyi gbe le tukwun ewo ntoneni.>>

⁹ Emi iJuda ntona gbela wo odze ngwi a gbe tukwun ewo ntonani, dile tso gbɛe odze ntone li otsitsi.

¹⁰ Ngwi iGona kyo iPol abo gbɛe no gɔɔdze ne, o si wita ogɔɔdze gbɛe: <<Ani ye i kye onova ibiyibi ngwi abu li inggise ogbiikwo mi ese neni; nghanɛ n dze yi atsa onatsondu ewen.

¹¹ O ka yagba byi inggise angbeka fwo i nga egbe iwyoɔdefa waba ngwi ani ke iJerosalin oka sunu.

¹² Ama odze odze tukwu ani ewo ntone yama din le tangwodze yi inggise onyi mi ozu okwukwo osunu Imgbasho hona tu inggise wo mi ozu okwakye mgbi emi iJuda naadi mbeka onyonyi mi ogalu ba.

¹³ A dika yagba nu osa mi odze onyi ngwi a gbe le tukwu ani ewo ne ba.

¹⁴ Nghaduu, ani gbela dafi engyukwo mgbi ama tsewe gbɛe ofe mgbi Otse ngwi

ani le kyedɔ na li ayin ba mani. Kpaa ani kale sunu Imgbasho ngwi emi otsikyani sunu mani. Ani di noyeye mi alungwo ngwi a lo mi ola mgbi iMose beyi afe mgbi ama ogbɛese duu

¹⁵ ani di dze yi ewe ogbe byiibyi mbi Imgbasho ungwonyi dafi inggise ntoneni, gbɛe emi osaan beyi emi imbali duu ka kyee mi ikwu.

¹⁶ Nghanɛ ani li fya alono ni itukwu mgbi ani dze saan mi ine Imgbasho beyi inggise.

¹⁷ <<Ngwi ani wa dzɛma ba onova ibiyibi ne, n ba iJerosalin ikye okye umba wa nu emiden emi adze di fife nu Imgbasho.

¹⁸ Ani fwo lu ewani yee saan mi onɔ ngwi a tu ani mi ifyude ozu okwukwo osunu Imgbasho le kyungwone mani. Ibyi inggise to yi ani hona ani ndeye yi inggise oka ba.

¹⁹ Nghaduu emi iJuda angbeka to ayese mgbi Asia, ngwi i gbuo a ki to mmene mi inai abu nu ma sulu obwendɛ obube ikpewo ani yo a ki kyo.

²⁰ Hona ama nto mmenene nu ma gbo ungwɔ obube ngwu ma tu mbi ani mi onɔ ngwi ani kwudze mi inai okwakye mgbi engyukwo emi iJuda mani.

²¹ Li mi ikye ungwɔ onyi ngwi ani kyile ela esho onɔ ngwi ani kwudze inai ma na ta: <Li itodze mgbi okyee mi ikwu ngwi abu le gbo ani ikwo ine aani.> >>

²² Nghanɛ iFelisi n ye odze Ofɛ mgbi Otse saan ne, tsamu egbe ikwo lu iyayi. O gbɛe, <<Ni iLisia okwukwo ogbakwu wa ba ta n ka ngyelu ikwo mgbi abu neni.>>

²³ O wo ongyukwo oblakwutse ola gbɛe no nu ma ngyo iPol kpaa nu ma ka kyon tukwu ba di nu emi okan ofe nu ma tobyun mi imina mgban.

²⁴ Ngwi egbe nye gwee ne, iFelisi yi owan iDrusila, nli ongyaa emi iJuda na waba. O dɛso nu ma kye iPol ba wa fwon dafi o le gbodze oyeye onuunu mbi iYesu iKrestu mani.

²⁵ Dafi iPol le tsuutsa mgbi odze saan, yi obwa ewo fyii beyi ikwo ogbɔɔgbo nkyɛ iyayi ne, imio wo iFelisi man o gbɛe, <<I gyo nga tsatso! O ka yagba lu. Nin wa tu onɔ ta, n ka dɛso mbi abu.>>

²⁶ Mi itono na, iFelisi tsewe gbɛe iPol ka kye akwatsa wo ongwu ondu, nghanɛ o tonya oɔɛso mbon ba.

²⁷ Ngwi i nye onova efa ne, iPoshio iFestusu dɔke uto gbikyɛ iFelisi, kpaa ikyɛgbɛe i mina iFelisi okyumse yi emi iJuda ne, o dzata iPol mi obawi.

25

IFestusu gbo iPol ikwo

¹ Ngwi iFestusu gyuuto kye egbe eta ne, o dzata iSisiria lu iJerosalin,

* 24:8 24:8 Ambulu ne dze mi olɔɔlo angbeka ba.

² Imbe na engyukwo ama ofife beyi engyukwo emi ijuda ba mbon wa gbe itodze obube mgbi iPol tonke ese.

³ A si byakpa mina abo oyaaya mbi iFestusu gbæ, no tobyi ama kye nyine iPol luba iJerusalem maama, ali ma a le wewo owa kwo ofe ngwɔn.

⁴ iFestusu nu uka gbæ, <<A kye iPol dzæke iSisiria, ma ani abuen kpaa n le ke ele dzikan-dzikan.

⁵ Yeba non kyo obube yo, ni ama ogbe ema teyi angbeka wafɔ yi ani ka gbɔ obube ngwi o kyo ma, mi imbe nani.

⁶ Ngwi iFestusu kye egbe egyata naadi iwyo yi ama ne, o si lu iSisiria, tegblifan ne o kwu ela gbæ nu ma kwakye mi opiikwo di noola gbæ nu ma kye iPol ba mbi ongwu.

⁷ Ngwi iPol wa to ne, emi ijuda ama nkye mi iJerusalem ba ma loka won, gbe odze okwulewo ama nli otsitsi ba le tukwun ewo.

⁸ Ta iPol si natsondu gbæ: <<N kyungwo obube onyi mi ikpewo ola mgbi emi ijuda naadi ozu okwukwo osunu Imgbasho mi iJerusalem hona iSidza ba.>>

⁹ Ngwi i mina iFestusu okyungwo gbæ no kpa emi ijuda ne, o nya iPol gbæ, <<O ka gbela oke iJerusalem azukwu ni ani ka fwo abu ikwo mi itodze obube ntone we?>>

¹⁰ iPol gbæ: <<Ani kwudze mi opiikwo mgbi iSidza oneneni, li imbe ngbuo gbæ a ka gbɔ ani ikwo aani. Abu abubu ye saan n kyo emi ijuda obube onyi ba.

¹¹ Kini ani kyo obube yo, n fwa okwulu ba. Kpaa ni odze obube ngwi emi ijuda gbe tukwu ani ewo ne li otsitsi bayo, inggise onyi sulu ofe okye ani wo ma abo ba. N tekye ni iSidza abun fwo ani ikwo!>>

¹² Ngwi iFestusu kye bwalu ondu yi ama oso ikwo yan ne, o nya iPol gbæ: <<O tekye nu iSidza ne li mbi iSidza o ka ke!>>

iFestusu tsewodze yi Uto Agripa

¹³ I kye ongwæ egbe gwee ne Uto Agripa yi iBenisi kaka iSisiria oka kye mmwe nu iFestusu.

¹⁴ Ngwi i yæ gbæ a ka la egbe ibyibi mi imbe na ne, iFestusu kpunya odze mgbi iPol na yi uto. O gbæ: <<Inggise oka dze mmene ma ngwu iFelisi dzanta wo obawi.

¹⁵ Ono ngwi ani ke iJerusalem ma, engyukwo ama ofife yi engyukwo mgbi emi ijuda gbe odze obube tukwun ewo di gbæ nu ma ngwɔn ikwo.

¹⁶ N nya ma gbæ yama li aletɔ mgbi emi iRoma okye inggise nu ama ngbe odze obube le tukwun ewo ba, sede a ka nun ofe no natsondu ewon mi odze obube ngwi a gbe tukwun ewo mani.

¹⁷ Ono ngwi a ba mmene yi ani ma, ani mbe ono yi ikwo na wuba, kpaa n byakpa

kwu ela ni a kwakye mi ozu ikwo tegblifan si nu ma kyon ba.

¹⁸ Ngwi ama ogbe odze tukwun ewo kyato ogbodze ne, a yama kwu iyi ungwɔ obube ama ani tsewe ma ba.

¹⁹ Ungwo ngwi a ye kyo yo, a ye le gbɔ onogbe biyan mi ikye odze Imgbasho mgbi ama beyi odze mgbi inggise ikwukwo ngwu a kwun di iYesu ngwu iPol le tso gbæ o dze oshishe nani.

²⁰ I wo ani ende dafi n ka kya mi ito ikwo ne mani; nghanne n ye byun ita ni o ka gbela ke iJerusalem nu ma ka kya mi itodze ntone yo.

²¹ Ngwi iPol tekye gbæ nu ma kye ongwu nu dafi oweka mgbi ongyufa dze ma ne, n woola gbæ nu ma kwunewo ongyon saan ngkataa ba ono ngwi ani ka kyon ke mbi iSidza mani.>>

²² Ta Agripa nya iFestusu gbæ, <<I mina ani ofwo ongyulo ne abuen.>> O gbæ, <<Ekeka ta o ka fwon.>>

iPol mi inai Agripa

²³ Tegblifan ne, Agripa yi iBenisi wewo datu kaka ozu okwakye yi engyukwo oblakwutse ama olongbo-longbo beyi ama ogbe inggise teyi mi ogalu nani. iFestusu si woola nu ma kye iPol kaka ifun.

²⁴ iFestusu gbæ: <<Uto Agripa yi ema ama nto mmene yi eyi duu, ema di ongyulo ne loo! Emi ijuda duu biibe yi ani mi iJerusalem beyi iSidzaria mmeneni, le feela gbæ o me ngwi o ki dze oshishe wuba.

²⁵ N difwi gbæ o kyungwo me ondu ikwu ba, kpaa ikyegbæ o kye akwo mgban ke mbi ongyufa ne, n kye weka okyon deso lu iRoma.

²⁶ Nghaduu n sulu itodze onyonyi ngwi n ka lo nu Ugabaidu ikye inggise ne ba. Ne n kyon ba inai ema duu, onghaangha duu yo mbi abu uto Agripa, azukwu ni ema kyan di kana n ka tu itodze ngwi n ka lo.

²⁷ Lubana i tso ozoyeye ba, olo itodze obube ikye inggise obawi ba ta kyon deso lu mbi Ugabaidu.>>

26

¹ Ne Agripa nya iPol gbæ, <<N nu abu ofe gbodze mgbi abu mani.>> Neta iPol kyo abo si wita ogbondu ewon gbæ:

² Uto Agripa ikyese den okwudze inai abu ine ogbondu ewani mi ungwɔ obube ngwi emi ijuda gbe tukwu ani ewo duu neni,

³ onghaangha duu ngwi abu ye aletɔ beyi angwodze mgbi emi ijuda saan neni. Nghanne n tekye nu abu shitukwu gen ado saan.

⁴ <<Emi ijuda duu ye odzædzæ mgbi ani kye ongbe, mi okyæ ese mgbi ani mi ese mgbi ani, beyi iJerusalem kpaa.

⁵ A teyi ye ani onɔ ke onɛnɛni dika kyo obwendɛ, ni imina ma yo, ani li emi iFarasi ama ngwu nghao fyumfye mi odze Imgbasho mgbi eyi neni.

⁶ Ikyenghane li mi ikye ewe ogbe byiibyi mi ondu odzɛɛdze ngwi Imgbasho dze yi emi otseyi ma ngwi a le fwo ani ikwo ine aani.

⁷ Li ondu odzɛɛdze ngwi agwo mgbi eyi iwyoɛɛɛ le sunu Imgbasho onɔ yi otu gbɛɛ ni ama wa di dafi i ka ba mani. Uto dee, li ikye ewe ogbe byiibyi ne ngwi emi iJuda le duɔ ongwufabo mbi ani aani.

⁸ Kyɔnɛɛɛ i fyi ema mfyɛ onoyɛyɛ gbɛɛ Imgbasho li kyile inggise mi ikwu?

⁹ <<Ani abuanɛ kpaa teyi gbela gbɛɛ i gbuo nin kyo alungwo ama ndze kyɛmɛ duu ikye okye afo twɛɛɛ yi iyi mgbi iYesu ongwɛ iNadzareti neni.

¹⁰ Di li ungwɔ ngwi ani kyo mi iJerosalin yɛyɛ kpaa aali. Mi ogbela-gbela mgbi engyukwo ama ofɛɛ n gbe emi osaan kwuba woke obawi, ani di li onyi mbi ama nwo abo ogbela gbɛɛ ni a gbɔ ma ikwo ngwo ma.

¹¹ Onɔ ibyiibyi n kyikyɛ mi ozu okwakye mgbi emi iJuda idzidza-dzidza ikye okwo ma ado, di li fya osi ma nu ma fya Imgbasho ito. Dafi itingga kyo ani yi ama ma, n lu anengye kpaa oka nu ma iso.

¹² N kyɛɛ oke ito agaba ne mi iDamasiko mi ondu onuunu yi ogbela-gbela mgbi engyukwo ama ofɛɛ.

¹³ Uto dee, ngwi onɔ do idzidze ude ngwi ani kye ofɛ dikye le ke ne, ani di osa kye esho, gbosa ngha onɔ, naabo yawo ani yi ama nwafo yi ani mani.

¹⁴ Eyi duu zudo woke ese, man ani fwo ela le gbɔ yi ani mi ondu Aramiki* gbɛɛ, <iSol, iSol, kyɔnɛ abɛ le nu ani iso ngha? Mnda ka yagba kye afo twɛɛɛ yi okwuta ogbon ba.>

¹⁵ <<Ta ani byita gbɛɛ, <Li abɛ eme, Otse?> Otse nu uka gbɛɛ, <<Li ani iYesu ngwu abɛ le nu ani iso mani.

¹⁶ Onɛnɛ kyato dzekunto. Ani mblegba tu abɛ ikye okye abɛ yɛɛ ongbido beyi obwendɛ mi ungwɔ ngwi abɛ di mbi ani beyi ungwɔ ani ka tso abɛ mani.

¹⁷ N ka nagbe abɛ mi abɛ emidabu yi abɛ Udzengye. N le do abɛ esɔ mboma

¹⁸ ikye okwulu ma ine di kyata ma mi iyifu luba osa, beyi mfyɛ mgbi iSatan luba abɛ mgbi Imgbasho, azukwu ni a dzita ma yi ali ibwubwe di gbe ma toke mbonyi yi ama ngwu a salu ma yɛɛ saan mi oyɛyɛ onuunu mbi ani mani.>

¹⁹ <<Nghane, uto Agripa, n yama nghaado mi ine odiidi nkyɛ esho na ba.

²⁰ N wita mi iDamasiko, luba iJerosalin yi iJudia duu, beyi Anengye kpaa. N gbɛɛɛ gbɛɛ nu ma kyata luba mbi Imgbasho

nu ma di tso okyata-kyata mgbi ama mi okyɔɔkyo.

²¹ Li itɔdze ngwi emi iJuda kpakli ani mi ifyudɛ ozu okwukwo osunu Imgbasho di fya ongwɔ ani ma aali.

²² Nghaduɔ n tu otobyi-tobyi mgbi Imgbasho nghataa ba ine, n di kwudze mmɛnɛ ikye okyo obwendɛ nya ama nshewo beyi ama n yeyikpa kpaa. Ani le gbɔdze onyonyi ngha ungwɔ ngwi ama ogbɛɛɛ beyi iMose gbɛɛ ka wa kyo ma ba

²³ gbɛɛ iMedzaya ka gyadze, ngwi o di li inggise ongwu ababo owa kyɛɛ mi ikwu ne, o ka gbɔ osa nya emidan beyi Udzengye.>>

²⁴ Duuse ni iPol ngyɛlu ogbondu ewon yo, iFestusu dzan elodze ondu, o gbɔ mi ela esho gbɛɛ, <<Eka kwagbɔdo loo iPol! Afe mgbɔɔ okpayi kwuba ne nu ikye kyata loo.>>

²⁵ iPol gbɛɛ, <<Ikyɛ kyata lo ani ba, ugabaidu iFestusu,>> <<Odze ngwi ani le gbɔ li otsitsi di li ingblimo.

²⁶ Uto bɛ yi ungwɔ ntonɛni, n ka yagba gbɔdze biyan itukwu asisa. N noyɛyɛ gbɛɛ ungwɔ ntɔnɛ onyi kpaa byulu lon mi ikye waba, ikyekye a kyɔn mi odaada ba.

²⁷ Uto Agripa, abɛ nu ama ogbɛɛɛ oyɛyɛ? N ye o nu.>>

²⁸ Ta Agripa nya iPol gbɛɛ, <<Abɛ tsɛwɛ gbɛɛ mi ongwɔnɔ gweɛ nɛta elodze mgbi abɛ ka yagba kyata ani yɛɛ inggise iKrestuu?>>

²⁹ iPol nu uka gbɛɛ, ni li onɔ bweɛ hona onɔ gblɔgɔdo kpaa, N le bo Imgbasho ibɔ gbɛɛ, no wa li abu yuwoo ta ba kpaa ama nle fwo ani ine ne duu ki kyata dze dafi ani sini, kpaa itse yo nu ma ka ta ema ba.>>

³⁰ Uto yi iGɔna yi iBenisi beyi ama nsoto yi ama duu kyato.

³¹ A dzata ifoozu, ngwi a kyɛ ge ewoma ne a gbɛɛ, <<Inggise ne le kyungwo onyonyi ngwi me ondu ikwongye hona kaka obawi ba.>>

³² Agripa nya iFestusu gbɛɛ, <<iPol ki teyi tɛkyɛ gbɛɛ ni iSidza gbɔn ikwo bayo, o me odzanta.

27

IPol nye ongwɛ uwaa ke iRoma

¹ Ngwi ondu wa bwa gbɛɛ uwaa ka gbe eyi lu iTali ne, a kye iPol yi emi obawi angbeka wo ongyukwo oblakwutɛ ongwu nli ikye odi mi obyi oblakwutɛ mgbi ugabaidu ngwu a li kwun di iJuliyoɔsɔ na abɔ.

² Eyi kyɛɛ yi uwaa mi Adramatun eyi wewo obɛɛɛ mi iga ama nto ondekyoo mi ayɛɛ mgbi Asia di nye kaka onekyoo. Aristaku, inggise iMasidonia ngwu nkyɛ mi iTesalonika na, kye yi eyi.

* 26:14 26:14 Hona iHibru

³ Tegblifan ne, eyi bɛsɛ mi iSidan; nɛ iJuliyɔsu di iPol elela, nun ofɛ no kɛmbi emi okan adzi nu ma nun ungwɔ ama nminan.

⁴ Mmana eyi diyɛ lu onekyoo di nye kwekwɛ yi ibi ongwɔ iSapru ikyekyɛ awo gbɛleyi wuba.

⁵ Ngwi eyi fa uwaa dzɛkyo onekyoo mi iga mgbi iSilisia yi iPamfɔyilia nɛ, eyi ka bɛsɛ mi iMira ongwɔ iLisia nani.

⁶ Mi imbe na ongyukwo oblakwutse di iwudza ongwɔ Alekdzandra le lu Itali man gbɛ eyi woke ele.

⁷ Eyi lu dumo-dumo mi egbe ibyibyi yi adzɛ kpakpa ka nye kwekwɛ yi iSinido. Ngwi awo gbɛla ni eyi kye inɛ byi imbe ngwi eyi le kɛ ma ba nɛ, eyi yɛ kye inɛ byi oyombo iSamo ikye ni ibi ongwɔ iKrete na tukwu eyi awo mani.

⁸ Eyi nye ondiiga nɛ mi iso wa to imbe ngwi a kwun di iFɛ Hevun, kwekwɛ yi ogalu iLasia.

⁹ Eyi mbe onɔ kpakpa nye wa, ma okyɛɛ ongwɔ iwudza nɛ yɛɛ okakewo ikyesine onɔ Oga otukwɔndu ngwi a li dzata inggise yi alobube kpaa nye wa. Nghane iPol wɛ ma ewodzɛ gbɛɛ,

¹⁰ <<Engyulo, n le di gbɛɛ agaba nɛ ka ba yi eyi odzili-dzili dika nu iwudza yi okyɛ beyi oshishe mgbi eyi kpaa nyanya.>>

¹¹ Nghaduu ongyukwo oblakwutse na gbɛla odzɛ owɛɛwɛ mgbi iPol ba kpaa kyɛdɔ elodzɛ mgbi inggise ofa iwudza beyi otungwɔ iwudza.

¹² Dafi iga iFɛ Hevun na tishi ola ele nghataa ni ogba ngyɛ ba nɛ, inggise kwuba gbɛla gbɛɛ ni eyi kiyayi yi okyɛɛ, ka la iFɔni nghataa ni ogba ngyɛ. Nɛnɛ li iga mi iKrete nkyɛ inɛ byi okwokyiikwokyi mgbi aca yi onodɛ beyi agwudu yi onodɛ nani.

Onikyawo

¹³ Ngwi awo aca wita ofa fee nɛman, a tsɛwɛ gbɛɛ di ama tu ungwɔ ngwi ama mina ma wa; nɛ a takyɛ ashi obwa iwudza kwulɛsɛ ngwuta woke iwudza, si kye ondu agobo iKrete dikyɛ.

¹⁴ Onɔ gweɛ neta awo okwokyiikwokyi mgbi agwudu yi onosa gbokyɛɛ mfyumfyɛ kye ibi wa fa eyi lu onekyoo.

¹⁵ Awo na wa tsɛkɛ iwudza ta eyi yagba fa iwudza kye inɛ byi awo wuba; neta eyi nya yi iwudza ofaafa nɛ awo kyi gbɛlu iwudza le lu.

¹⁶ Ngwi eyi nye lu ongwɛ ibi ngwi a li kwun di iKauda nɛ, eyi fya kpakpa se wa yagba onu uwaa ongbungbɛ na gbobu ba.

¹⁷ Ngwi a kyi kyɛlu uwaa ongbungbɛ woke ifun nɛ, a kye odi bwalu iwudza beke. Ngwi a mio gbɛɛ di iwudza ka ka kwo esɛ mi mfyɛn mgbi iSati nɛ, a takyɛ ashi obyi iwudza kwulɛsɛ ngwuta woke eni ni iwudza le kwo lu dumo-dumo.

¹⁸ Tegblifan, dafi awo na kale fa ngaabɔ le gbobulu iwudza nɛ a wita omwa okyɛ yangwuta mi eni.

¹⁹ Mi egbe ongwɔ ta nɛ, a kye abɔ mgbi ama abuoma she okyɛ iwudza angbɛka yangwuta.

²⁰ Ngwi onɔ hona ofyia kpaa eyi di ma wuba egbe ibyibyi, onikyawo kpaa kale fa nɛ, eyi gbɛwɛ ngwuta gbɛɛ eyi ka wato wuba.

²¹ Dafi inggise ntonɛ kyikyɛ onɔ tunto tu ungwogye gye ba nɛ, iPol kyato nya ma gbɛɛ: <<Engyulo, ema ki gbɛla odzɛ mgbi ani owɛ-wɛ mi iKrete gbɛɛ ni ema ka fa ba na yɔ; ungwɔ ama nnyanya di byulu lo ema ntonɛ kika kyo ba.

²² Nghaduu onɛnɛ, ani kwu ema ɛwɛ wo gbɛɛ ni ema kiyayi mi itukwu mgbi ema fyumfyɛ-fyumfyɛ, ikyekyɛ inggise mgbi ema onyi kpaa ka byulu ba, sɛdɛ li iwudza ta ka nyanya.

²³ Mi otu ongwɔ dɛdɛ na, ongyɛsɔ mgbi Imgbasho mgbi ani ngwu ani li sunun na wa kwudzɛ kwekwɛ yi ani

²⁴ si nya ani gbɛɛ, <Ka wimio ba iPol, iSidza ka fwo abu ikwo kyɛmɛ; ma di li ikyɛ mgbi abu Imgbasho ka dzata ama nwoto iwudza yi abu ntonɛ duu oshishe.

²⁵ Nghane fyumfyɛ itukwu kpɔɔ na engyulo, lubana ani noyɛyɛ gbɛɛ ungwɔ ngwi Imgbasho gbɔ nɛ ka kyo nga yɛyɛ.

²⁶ Nghaduukpaa, iwudza mgbi eyi ka ka fatila dɔkɛ ibi mbɛka.>>

Iwudza fatila

²⁷ Mi otu ongwɔ iwyodɛnɛ ma kpaa awo na ka kye eyi le ga kye Onekyoo Adratiki, ngwi otu wa gheefa nɛ, ama ofa iwudza difwi gbɛɛ ama le dze kwekwɛ yi ondikyi.

²⁸ A mba okɛɛkɛ mgbi eni si di gbɛɛ li atafɔ ideli onyi dɔn osu. I kye onɔ gweɛ nɛ, a di mba tu atafɔ ngwusɛnɛ dɔn iwyo.

²⁹ Ngwi eyi le mio gbɛɛ eyi ka wa gyeke akwutse nɛ, a kyi takyɛ iyudza obwa iwudza kwulɛsɛ nghi enɛ yaokɛ eni mi iyikpa di bibɔ gbɛɛ ni egbe fa.

³⁰ Ngwi i mina ama ofa iwudza otse dzamata nɛ, a kyi shɛlu uwaa ongbungbɛ na woke eni tole kyo ɛwɛ dafi ama takyɛ iyudza okwu iwudza kwulɛsɛ le ngwuta woke eni mi iyayi mani.

³¹ Ta iPol nya okwukwo ogbakwu beyi oblakwutse ntona gbɛɛ, <<Ni inggise ntonɛ to dzata iwudza yɔ ema ka wato ba.>>

³² Nghane oblakwutse ntona kye dzɛlu odi ngwi a kye ongwuwaa na sha ele ma non fɛ lu.

³³ Duuse ni egbe fa nɛ, iPol tɛkyɛ yi ama duu gbɛɛ ni a gye ungwogye. O gbɛɛ, <<Egbe iwyodɛnɛ inɛ waani, itukwu kaka ema ewo jo ema gye unkonyi ba.

³⁴ Kpaa onene n tekye nu ema gbɛɛ ni ema gye ungowogye adzi ni ema dze oshishe. Lubana alotu onyi kpaa ka kwo mi ikye mgbi inggise onyi ba.

³⁵ Ngwi iPol gbɔdze ne ngye ne, o kyi gbelu ibredi angbeka si ta Imgbasho angba mi inai ma duu. Kyi mwalu wita ogyeegye.

³⁶ Ama duu fyumfye itukwu di gye ungowogye abuoma.

³⁷ Eyi ama nwoto iwudza duu li inggise ideli efa ngwuseta don iwyo diwyeegyini.

³⁸ Ngwi a gye ungowogye dafi a mina ma ne, a kyi gbelu ungowogyowe nsisi duu yangwuta mi onekyoo ikye okyi mwalu mlo mi iwudza.

³⁹ Ngwi egbe wa fa ne, ama ofa iwudza difwi agobo ma wuba, kpaa a di iga mfyani. Nghanɛ a tsewodze gbɛɛ ni ama yagba yo, ama ka fa iwudza na nye mfyani ka beke ese.

⁴⁰ Dafi a kye dzelu iyudza okwu iwudza kwulesɛ ne, a dzitama mi eni di kye shelu odi ama ntse anghi ntona mi onɔ na kpɔɔ. Ta a kyile angwuto ogbaawo iwudza ikyegbɛɛ ni awo fa iwudza beke iga.

⁴¹ Nghaduu iwudza kwo ese kye ikye shawoke mfyani kye inene byi esho fatila yagba okiyayi wuba man akpeni gbobu iwudza mi iyikpa.

⁴² Ama oblakwutse tsewe okyi ngwɔlu emi obawi ntonani di a wa tse eni lu agobo ka tseyulu.

⁴³ Nghaduu i mina okwukwo ogbakwu na odulu oshishe mgbi iPol wato, ne o kwo ma oweka mgbi ama ikyenghanɛ o wo ama n ye eni otseetse ola gbɛɛ nu ma tse eni lu agobo.

⁴⁴ Ama nsisi ka gbe igɛɛ tukwu otsokplekwo beyi ombwumbwu uwaa lu agobo. Li nghan ngwi eyi duu bese saan aali.

28

Ibu ngwi iMɔta

¹ Ngwi eyi wa bese saan ne eyi difwi gbɛɛ li mi ibu ngwi iMɔta.

² Emi ibu ntona tso eyi okpitukwu ngwi eyi din ye ba. A gbɛ eyi di mɛ ola wo eyi ikyekye mmbwo le kya ofu dile yi.

³ IPol waa akyikye ekwo kwutoke, ngwi o le sa woke ola ne, ogidzi ngwi olola non tase ton tandri won abo.

⁴ Ngwi emi ibu di ifa na fatila kwodze abo ne, a gbo yi ewoma gbɛɛ, <<Inggise ne ka li inggise ongwɔ inggise kyeme-kyeme; lubana dafi o wato mi ekwoo okwukwo ne kpaa, obube mgbani ka non dze oshishe ba.>>

⁵ Kpaa iPol ngwi ifa na woke ola unka di kyon ba.

⁶ Inggise ntona kye ewe byi gbɛɛ o ka mwe ewo naadi tseese kwulu ntunto. Nghaduu ngwi a fe onɔ ke di di unkonyi okakewo kyon ba ne, a k yatitukwu mgbi ama di gbɛɛ o li Imgbasho.

⁷ Ogalu dze kwekwe mi imbe na ngwi li mgbi iPobilu, uto mgbi ibu nani. O gbɛ eyi mi udan abo efa di kyo yi eyi saan egbe eta.

⁸ Otson dotse ladze ese, awo bwan o dile nya adama. IPol kaka ka din, ngwi o bibo won ngye ne, o gbe abo don ikye di ngyelun ootse.

⁹ Ngwi ungwɔne kyo nye ne, emi ootse angbeka mi ibu na duu ba, a di ngyelu ma ootse.

¹⁰ A nu eyi mmwe mi ofe idzidza-dzidza, ngwi eyi di wa wewo onye ongwɔ eni lu ne, a nu eyi alungwo ngwi eyi mina mi ikye okye nani.

IPol kaka iRoma

¹¹ Ngwi i wa nye ofyia eta ne, eyi kaka iwudza oka ngwi a dzanta mi ibu na owa ololo olu. Li iwudza ongwɔ Alekdzandra ngwi a kye ambe dze ikyen gbɛɛ Imgbasho ongwefa.*

¹² Eyi wa bese mi iSiraku, di la ele egbe eta.

¹³ Mi imbe na eyi di nye ongwɔ eni ka kaka iRejun. Tegblifan man awo iwu gbokyee, ngwi i di fa egbe oka ne eyi to iPuteli.

¹⁴ Mi imbe na eyi tu ama okyedɔ iYesu angbeka, a bo eyi wa la yi ama ikyidu ololo. Man eyi si kyee wa kaka iRoma.

¹⁵ Ama okyedɔ iYesu emi imbe na teyi fwo gbɛɛ eyi kyema, man a lukwu eyi nghataa luba idu Apio beyi imbe ngwi a kwun gbɛɛ Ozu eta mgbi ingyoga owa kpatse eyi. Ngwi iPol dili ma ne, o ta Imgbasho angba itukwu di fyonmfye.

¹⁶ Ngwi eyi ka kaka iRoma ma, a nu iPol ofe gbɛɛ no la ozu yuon kpaa oblakwutse nu ma ngyon.

IPol gbeeso mi iRoma ngwi a le ngyon

¹⁷ Ngwi i kye egbe eta ne, iPol kwu engyukwo emi iJuda kwakye, dafi a wa kwakye ne, iPol nya ma gbɛɛ: <<Emi ongwunani, ani kyo nkonyonyi ongha emideyi adɔ naadi aletɔ mgbi emi otsikyeyi ba, kpaa a bwa ani mi iJerusalem di kye ani wo emi iRoma abo.

¹⁸ A kya mi odze mgbi ani di mina ma odzita ani ikyesine ani kyungwo obube nme ondu ikwongye ba.

¹⁹ Kpaa emi iJuda fwa, nghanɛ i yee kyeme ngwi ani ka tekye nu ma yile ani luba mbi iSidza. Nghaduu ani dze yi odze onyi ogbe tukwu emidani ewo ba.

* 28:11 28:11 Imgbasho ongwefa ntona, a li kwu ma gbɛɛ iKasto beyi iPolosu. A li emi ongwɛ iDzeu Imgbasho mgbi emi iGriki. A li di mbi ama okyikye mi eni.

²⁰ Li itodze ne ngwi ani gbæ ni ani di ema di gbodze yi ema. Li mi ikye ewe ogbe byiubyi mgbi emi Israi ma ngwi a bwa ani adi mi ashi ne aani.>>

²¹ A nun uka gbæ, <<Eyi tu afe onyi nkye mi ifudia mi ikye odze mgbi abu ba, emi ongwuneyi onyi nkye mi imbe na nya eyi hona gbodze obube onyi mi ikpewo abu ba.

²² Nghaduu i mina eyi ofwo ewe otsetse mgbi abu, lubana eyi ye dafi inggise mi ali imbe duu le gbodze osuse ba ikpewo aye inggise ntona mani.>>

²³ A kye egbe dze owa kwakye yi iPol, di ba mi mmbwo kpakpa nghaabo ogbugbe mi imbe ngwi o dze mani. O li gbodze esuto mgbi Imgbasho nya ma mi egbegbe nghataa onco li gbese dile biibe yi ama mi ola mgbi iMose beyi oyegbo gbæ nu ma noyeye mbi iYesu.

²⁴ Engyukwo angbeka mboma noyeye mi odze ngwi o gbo mani, kpaa angbeka yo gbela ba.

²⁵ Dafi angwodze to mi idzidze mgbi ama ne, a wita oganya mi onco ngwi iPol ngyelu odze ne ogboogbo mani gbæ: <<Onodzi Osaan na gbodze otsitsi mi ikye mgbi emi otsikyema mi onco ngwi o gbodze nye mbi oyegbo Adzaya mani gbæ:

²⁶ << <Ke mbi inggise ntona dika nya ma gbæ,

<<Ema kale fwo alono kpaa ka yama gbosa lo ema ba; ema kale di alono kpaa ema ka yama difwi ba.>>

²⁷ Itukwu mgbi inggise ntona tiishu; a li fwo kpaa gbadikye, a di kye ine mgbi ama tukwu. Lubana a kika di yi ine mgbi ama, fwo mi ado mgbi ama, difwi mi itukwu mgbi ama di kyata ba mbi ani Imgbasho ta ani kika ngyelu ma ootse.>

²⁸ << <Ikyenghane ani mina ni ema ye gbæ owato-wato mgbi Imgbasho ne a kye deso nu Udzengye, ama yo a ka kyi gbelu!>>

²⁹ Ngwi iPol gbo elodze ntona ngye ne, emi ifuda si lu kale tangwodze yi ewoma kpakpa.†

³⁰ IPol kwu ozu onova efa le gbe inggise ama nba owa din duu.

³¹ Ngwi imbe fyin ba ne, o gbeeso mgbi esuto mgbi Imgbasho yi abo otsigegæ di tsungwo mgbi Otse iYesu iKrestu.

† 28:29 28:29 Ambulu ne dze mi ololo angbeka ba

Afe mgbi iPol mbi ama onoyeye Emi iRoma

IPol lo afe ke mbi emi iRoma

¹ Afe ne kye mbi iPol, ongbido mgbi iKrestu iYesu, ongwu a kwun ela non gbikye iYesu, ngwu a di dulun dzeke ikye ogbo Eso Osuse mgbi Imgbasho nani.

² Eso Osuse ne Imgbasho ple zondur nye mbi ama ogbeese mi Afe Osaan.

³ Eso Osuse ne li odze mgbi Ongwan, mi odzeedze mgbi inggise owamye yo, o li ongwiba mgbi iDevedi.

⁴ A kyon tso gbee o li ongwu Imgbasho mi ongwu a kyilon mi ikwu mi mfyemgbi Onodzi Osaan nani: O li iYesu iKrestu Otse mgbi eyi.

⁵ Li mi ikpewon beyi ikye iyi mgban ngwi eyi yee ama ogbikye iYesu ngwi mtse di do eyi otso Udze duu ofe gbee nu ma siikye nu di dze yi oyeye onuunu aani.

⁶ Ema kpaa wodze idzidze ama ngwu a kwu ma ela gbee nu ma yee emidi iYesu iKrestu neni.

⁷ Ani le lo afe ne ke mbi ema emi iRoma, nkpa Imgbasho itukwu ngwu O di kwu ema ela gbee, ni ema li emi osaan nani: Elela yi iyu nkye mbi Imgbasho Otseyi yi Otse iYesu iKrestu na no dze yi ema duu.

I mina iPol oke iRoma

⁸ Ababo yo, angba mgbi ani le ke mbi Imgbasho mgben ikpewo iYesu iKrestu ikye ema duu, ikyena a gbodze oyeye onuunu mgbi ema kpatse ese duu.

⁹ Imgbasho, Ongwu ani li kyon ido itukwu onyi mi ogbeeso osuse mgbi ongan na li obwende mgben dafi n li we ema alono

¹⁰ mi ibo mgben obobobo mani. N di bo gbee kpakpaa Imgbasho ka nu ani ofe nin ba mbi ema.

¹¹ I mina ani odi ema adzi nin kye umba mgbi onodzi nu ema onu ema fyumfyem mi oyeye mgbi ema onuunu,

¹² ikyegbee, ni eyi fyi eka mfyem itukwu mi oyeye onuunu mgbi ewe.

¹³ I mina ani gbee ema ki ye emi ongwunani, dafi onwo ibyibi ani weka oke mbi ema mani, kpaa ofe nin ba nghataa ba oneneni. I mimen gbee nin ka tu ama okyatitukwu mi idzidze ema, yeye dafi ani tu mi idzidze udze angbeka kpaa nani.

¹⁴ N dze yi ido okyo yi emi iGriki beyi emi iGriki ba kpaa, ikye ama okwiine beyi ogbadro duu.

¹⁵ Li ngha ngwi i tse ani olo kpakpa ogbo Eso Osuse nya ema ama nto iRoma aali.

¹⁶ Bana ayiwi kwu ani ogbo Eso Osuse ne ba, ikyeye li mfyem mgbi Imgbasho ikye owato-wato mgbi ali inggise nnoyeye duu: ababo ikye emi iJuda duuse Udzengeye.

¹⁷ Lubana Eso Osuse ne Imgbasho kye tso ofe ngwi inggise ka dze nyaan yi Ongwu mani: ngwi li mi oyeye onuunu mi owita-wita nghataa ka dondu. Yeye dafi Afe lo mani gbee: <<Ama osaan ka dze oshishe mi oyeye onuunu.>>

Itingga mgbi Imgbasho ikye inggise owamye

¹⁸ Itingga mgbi Imgbasho ne tsoto mi esho ikye ama ngbela yan ba duu yi emi imbaali ama nli si otsitsi bese yi imbaali mgbi ama mani.

¹⁹ Lubana ungwu ndze gyo ngwi a ka ye Imgbasho daada ba, ikyeye Imgbasho kye tso ma gedee.

²⁰ Inggise sulu itodze ogbee n ki ye wuba, lubana wita mi onwo ese ota-ta majo, odzeedze mgbi Imgbasho ngwi a li din ba, mfyem mgban ogyegwu, mbiso onghaangha mgban duu, O nu ma di saan adzi ni inggise ka yagba tangwan ba du.

²¹ Lubana ngwi a ye Imgbasho ne kpaa, a li nun mmwe gyo yan hona tan angba ba, kpaa ewe otseetse mgbi ama yee ayayi, ikwangha itukwu mgbi ama yifu.

²² Ama yo tsewe gbee ama kwiine, ng-haduu a yee emi ikwangha

²³ ngwi a kile sunu Imgbasho nli kwulu ba na ma, a ye le sunu adagye ngwi a kpaakpa dze dafi inggise naadi ingwuno naadi mmbwaba hona ungwu ama okwo ifu ese (nli kwulu ntonani).

²⁴ Nghane Imgbasho dzata ma nu ma kyo alungwu ayiwi ngwi itukwu mgbi ama mina mani. Ewodze idza mgbi ama nu ma kyungwu ayiwi ola yi ewoma di nu ikpewo mgbi ama mmwe wuba.

²⁵ A kyi nyine otsitsi mgbi Imgbasho yi atsika, ye le sunu ungwu ama Imgbasho taata ngha Imgbasho ntaata ungwu, nme ngwi a ka tsan gyegwu nani. No dze ngha.

²⁶ Mi itodze ne Imgbasho dzata ma nu ma le mina ungwu ayiwi. Engyaa mgbi ama kpaa le la yi engyulo dafi atta ta ma wuba, ye le la yi ewoma.

²⁷ Mi ito ofe ne kpoo engyulo kpaa dzata abo ola yi engyaa ye le la yi ewoma. Engyulo le kyungwu ayiwi yi ewoma, di tu umba mgbi ado okwookwo ngwi gyo yi ikwangha ali mgbi ama nani.

²⁸ Okiyayi yo, ngwi a fwa ogbela Imgbasho ne, O dzata ma ni ewodze ikwangha mgbi ama kye ma teyi. Li ikyengha ngwi a le kyo idza nwogyo a ki le kyo ba aali.

²⁹ Imbali gbe ma so, ungwu ibwubwe yi nggwu yi mmgbe. Anyi mbwo ma itukwu yi inggise ongwongwu yi ibe ogboogho yi

okpagyewo beyi inggise okye wo itukwu. A li ama odziidze,

³⁰ ama ogbaagya yi ama Imgbasho ta ma anyi, ama ofyito yi emi imoga beyi abo otsigege; a li ba yi ofe ofufe okyungwo obube; di li nga ama omba ma ado;

³¹ a dze yi ozoyeye ba, oyeye onuunu ba, a tishi itukwu ba, a li di elela ba.

³² Ngwi a ye dafi ola mgbi Imgbasho gbæ, inggise nkya ito ali ntonɛ gyo ondu ikwongye ne kpaa, a kɛɛkiyayi okyungwo ntonɛne ta ba kpaa, a li tu ama nle kyo ito ali ne wo nu ma kiyayi.

2

Ikwo mgbi Imgbasho oyeye mani

¹ Nghane, ema ama nli fwo inggise angbeka ikwo ne, dze yi ekye oto-to wuba, lubana mi ali ito ofe ngwi ema le fwo angbeka ikwo duu, ema le ngyelu yi ewema, ikyekye ungwɔ ngwi ema le fwo angbeka ikwo mi ele ne, ema le kyo ma tsatsa.

² Ikyenghane eyi ye ta gbæ ikwo ofwoofwo mgbi Imgbasho mbi ama nle kyo ito ungwɔ ntonɛ li mi otsitsi.

³ Nghawane ni abu inggise ewewɛ le fwo ma ikwo dile kyo ungwonyi yi ama ma, o tsewe gbæ o ka wato mi ikwo ofwoofwo mgbi Imgbashoo?

⁴ Naadi ema kwu itukwu oleewo mgbi Imgbasho okwulewo yi onyotse beyi itukwu mban oshihi ne shanye? Mi otsitsi yo ema ye dafi Imgbasho di eyi elela mani, ikyesine o le tobyi eyi ni eyi kyata mi ali ibwubwe mgbi eyi.

⁵ Kpaa mi ikye ado onghaangha beyi itukwu otiishu mgbi ema yo, ema le gbe ado okwookwo ngwikwo le fɛ egbe itingga mgbi Imgbasho, onɔ ngwi ikwo mban ofwoofwo mgbi otsitsi na kawa tsoto mani.

⁶ Imgbasho <<Ka wa nu ali inggise yeye dafi otsungwon kyo mani.>>

⁷ Ama nkwnewo kyo osuse kyɛdo okwokwo, yi mmwe beyi oshishe nka dondu ba na, o ka nu ma oshishe ogyegwu.

⁸ Nghaduu ama nli tsotsli di fwa otsitsi dile kyɛdo ofe ibwubwe yo, itingga yi itukwu owulu-wulu ka dze ikye ma.

⁹ Okakewo yi iso okwulewo ka dze ikye ali inggise owamye nkyungwo ibwubwe yo: ababo mbi emi iJuda, man mbi ama nli emi iJuda ba;

¹⁰ nghaduu Imgbasho ka kye okwokwo, mmwe yi iyu nu ali inggise nkya osuse duu: ababo mbi emi iJuda, beyi mbi ama nli emi iJuda ba.

¹¹ Lubana Imgbasho li tso osadu-sadu ba.

¹² Ama nkya obube ngwi ola dze waba ma kpaa, a ka ngwo ma ikwo imbiso ngwi a dze

yi ola ba mani, ama nkya obube ngwi ola dze yo, a dika ngwo ma ikwo mi ola mani.

¹³ Lubana li ama nfwoofwo ola mata le saan mi ine Imgbasho ba, kpaa li ama nngyo ola ma ngwi a ka kwu ma di ama osaan aali.

¹⁴ (Udzengye dze yi ola ba, kpaa nu ma le kyo dafi ola mina ma yo, i yɛɛ ola mboma, dafi a dze yi ola ba ne kpaa.

¹⁵ A tso ambɛ gbæ ungwɔ ngwi ola mina ma, a lo ma mi itukwu mgbi ama, dafi ewodze mgbi ama kpaa dile kyo obwendɛ mani. Ewe tseɛtse mgbi ama kpaa le nu ma obube hona nagbe ma.)

¹⁶ Ungwone ka wa kyo mi egbe ngwi Imgbasho ka nu iYesu iKrestu gbo inggise ikwo mi ungwɔ ama a le kyo daada, dafi Eso Osuse mgben gbo mani.

Emi iJuda beyi ola

¹⁷ Ikyenghane, ni abu kwu ewabu di emi iJuda; di kye abo byike ola, di kye odzɛɛdɛ mgbi abu yi Imgbasho le kwaayi;

¹⁸ di ye owitukwu mban ye gbela yi ungwɔ nnghaangha ikyekye ola tso abu;

¹⁹ di gbela otsitsi gbæ abu li inggise otso obine ofe, di li osa mgbi ama nwoto iyifu,

²⁰ abu li inggise owe emi ikwangha odze, abu li otsetse mgbi engbe ama oshilele, ikyekye abu ye odzɛɛdɛ mgbi ola beyi otsitsi mban,

²¹ nghama abu, o li tso angbeka, kyone ngwi o tso ewoo wuba? Abu nle gbɛso gbæ ni inggise ka yimi ba ne, o kale yimii?

²² Abu nli gbæ ni inggise ka kyo amah ba ne, o li kyo amaah? Abu ngwu angwula ta abu anyi ne, o li yimi mi ozu angwulaa?

²³ Abu nli kyile ewo esho yi ola ne, o li kwu Imgbasho shanye mi ola ofaafaa?

²⁴ Dafi a lo mi afe gbæ: <<A fya iyi Imgbasho ito mi Anengye ikye abu.>>

²⁵ Kini abu ngyo ola yo, ikye sulu oyabo, kpaa ni abu foola yo, abu yɛɛ dafi o kyiikeye ye kpaa ba.

²⁶ Ki ama nkyikeye ba le kyungwo ama ola mina ma, Imgbasho ka di ma dafi ama nkyikeye ntona baa?

²⁷ Mi otsitsi yo, Ama nli emi iJuda ba ngwu a kyan ikye ba kpaa ngyo ola yo, ka yagba nu abu ngwu dze yi ola di kyiikeye kpaa foola ma gye obube.

²⁸ Inggise nkyikeye mi mmbwe yi eyi taman ka yɛɛ emi iJuda otsitsi ba.

²⁹ Ei, inggise emi iJuda otsitsi yo, li inggise ngwu itukwu mban le saan yi Imgbasho mani. Ikye okyɛɛkye otsitsi ne, di li osunu ola ngwi a lo mi afe ta ba; kpaa li itukwu okyata-kyata nkye mi Onodzi mgbi Imgbasho nani. Inggise nkyatitukwu na li mina gbæ, ni inggise tse ongwu ba, kpaa ni Imgbasho tse ongwu.

3

Imgbasho li nyine ba

¹ Ni inggise li emi iJuda, o nga angbeka mi ekye? Naadi oyabo mgbi ikye okye-kye li ekye?

² Dze yi oyabo mi ali ito ofe duu! Ababo yo, li ama Imgbasho kye elodze mgban wo ma abo.

³ Ni emi iJuda angbeka dze yi oyeye onuunu ba ma? Oyeye mgbi ama onuunu ba na ka yagba nde Imgbasho ombwo ondu odzeedze mgbaan?

⁴ Onoka ba du! Ki ali inggise duu li gbatsika kpaa, Imgbasho li gbo otsitsi. Dafi Afe lo mani gbæ:

<<Ikye ni Abu gbodze yo,
ni a di gbæ Abu gbo ayin,
ni Abu di gbiikwo yo,
ni Abu di nga.>>

⁵ Nghaduu kini okpekpe mgbi eyi nu osaan mgbi Imgbasho nghao tsoto saan ma, eyi ka gbosine? Eyi ka gbæ Imgbasho kyo ayin ba okyitingga yi eyi? (N byita odze ma dafi ikwangha inggise mani.)

⁶ Li nga ba du! Ki Imgbasho li gbiikwo mi otsitsi ba ma, O gbo ese ikwo sine?

⁷ Inggise oka ka tangwe gbæ, <<Kini atsika ngben ogboogbo nu otsitsi mgbi Imgbasho beyi okwokwo mgban sheeshe waali, kyone ngwi Imgbasho dika kwo ani ado?>>

⁸ Inggise angbeka kye ondu le wo eyi ewo mi atsika di eyi gbæ, <<Tatase okyo obube kpakpa!>> Ama nle gbo ito odze ntonene me ngwi Imgbasho ka ngwo ma ikwo.

Inggise onyi kpa le saan ba

⁹ Nghanema eyi duu ka ngyelu sine? Eyi emi iJuda tatase nga ama nli emi iJuda ba ntonaa? Ba dududu! Eyi teyi kyi gbolu ngye wa, gbæ, emi iJuda yi ama nli emi iJuda ba kpaa li ofyee mgbi alobube ungwonyi.

¹⁰ Dafi a lo mi Afe mani gbæ:
<<Inggise onyi osaan dzema ba,
ei onyi kpaa ba;

¹¹ inggise onyi odze yi ozoyeye kpaa dzema ba,
inggise onyi kpaa pita oye Imgbasho ba.

¹² Ama duu kyata iyikpa,
a yee ayayi duu;
inggise onyi kpaa kyo osuse ba,
onyi kpaa ba.

¹³ Elodze mgbi ama dze dafi endzi
ngbofo le nukwo mani;
ikyide mgbi ama li gbatsika.
Unka mgbi ogidzi dodze
ikpondu mgbi ama.

¹⁴ Ikamba yi elodze ama
onuno mbwo ma ondu.

¹⁵ Afo mgbi ama dze vla-vla
o ka dze eyi kyi ese;

¹⁶ ido mgbi ama li onu inggise

kaka iso ali imbe ngwi a ke duu,

¹⁷ a ye ofe odze mi iyu ba.

¹⁸ A dze yi imio mgbi Imgbasho ba du.>>

¹⁹ Onene eyi ye gbæ alungwo ngwi ola gbo yo, i gbo yi ama nwoto abo ola mani, ikye ni ali inggise ka natsundu yi Imgbasho wuba.

²⁰ Nghane Imgbasho ka yama gbela yi inggise gbæ o le saan mi ikye ola ongyoongyo ba, lubana li ola li nu eyi difwi gbæ eyi kyo obube.

Osaan ikpewo oyeye onuunu

²¹ Nghaduu dula ola dzeke ese onene kpaa, osaan nkye mbi Imgbasho ma a nu eyi yen wa, ngwi ola beyi ama ogbeese mgbi Imgbasho kyo obwende.

²² Osaan nkye mbi Imgbasho ne ba ikpewo oyeye onuunu mbi iYesu iKrestu ikye ama nnoyeye duu. Idzida dzema ba,
²³ lubana inggise duu kyo obube di dzitsi mi okwokwo mgbi Imgbasho,

²⁴ kpaa Imgbasho nu eyi gye emyemye ayayi mi elela mgban mi owato-wato nba ikpewo iKrestu iYesu nani.

²⁵ Imgbasho kyon nu dafi ife ofeefe, mi onoyeye mi eyi mgban. O kyungwone ikye okye emyemye mgban tso, ife ne tso gbæ, Imgbasho kyo osuse dafi o kwo ama nkyo obube mi ono ngwi nye na ado ba mani,

²⁶ o kyungwone ikye otso gbæ ongwu li inggise ogbiikwo osuse mi ono ongwu onene nani, ikye ni ongwu gye emyemye di nu ama nnoyeye mbi iYesu gye emyemye.

²⁷ Nghane abo otsigge ko? A kye dzeke enggenga. Mi ali ito ofe? Li mi ola ongyoongyoo? Ei, kpaa li mi oyeye onuunu ngwi eyi ka gye emyemye.

²⁸ Lubana eyi kye abo hyi gbæ inggise li gye emyemye li mi ola ongyoongyo ba, kpaa li mi oyeye onuunu.

²⁹ Imgbasho ne li Imgbasho mgbi emi iJuda yuomaa? O li Imgbasho mgbi Udzengye kpaa baa? Een, li mgbi Udzengye kpaa,

³⁰ Ngwi Imgbasho li onyi ta ne, li ongwu ka nu ama okyiikye beyi ama okyiikye ba duu emyemye.

³¹ Nghanema, eyi ka kyi ngwolu ola do ikye oyeye onuunu nee? Onoka ba du! I ka kekiyayi onu ola mmwe.

4

Abrahan gye emyemye mi oyeye onuunu

¹ Ikyenghane li ekye ngwi eyi ka gbæ otsikyeyi Abrahan difwi mi itodze ne?

² Ni Abrahan gye emyemye ikye ido yo, o dze yi ungwu otsabo igege ele, kpaa li mbi Imgbasho ba.

³ Afe gbo dikye? <<Abrahan nu Imgbasho oyeye, Imgbasho kyon gbee o li inggise osaan.>>

⁴ Kini inggise kyido yo, awuya ngwi a li kpan na a li di gbee li umba ba, kpaa li ungwo nwogyo a ka kyo.

⁵ Nghaduukpaa, inggise ama nli kyido ba kpaa li nu Imgbasho ongwu nli nu emi imbaali kpaa gye emyemye na oyeye yo, a li kye oyeye onuunu mgbi ama gbee di li osaan.

⁶ IDEvedi kpaa gbo ngha ono ngwi o gbo dze inggise nkyido ba kpaa Imgbasho non gye emyemye ma gbee mse dze yan:

⁷ <<Mse dze yi ama ngwu a dzamata yi obube,

di tukwulu ma alobube mani.

⁸ Mse dze yi inggise ngwu Otse ka kye alobube mgban wuuta ba mani.>>

⁹ Mse ne dze ikye ama okyiikye kyoon ta naa dze ikye ama nkyiikye ba kpaa? Eyi teyi li gbee oyeye onuunu mgbi Abrahan nu ma kwun di inggise osaan.

¹⁰ Otse-tse na ba mi ali ito ofe? A tsan duuse non kyiikye naadi o kyiikye se? A tsan duuse o wa kyiikye!

¹¹ O di gbe ambe ikye, ambe mgbi osaan ngwi o tu mi oyeye onuunu mi ono ngwi o kyiikye waba mani. Ikyenghane, o li otso ama nkyiikye waba kpaa noyeye duu, adzi ni a kwu ma di ama osaan.

¹² O di li otso ama nkyekyiikye ta ba kpaa le kyikye mi oyeye onuunu ngwi Abrahan tun duuse wa kyiikye nani.

¹³ Li mi abo ala ngwi Abrahan yi eto mgban tu ondu odzeddze gbee, o ka gyokwude ese ba, kpaa li mi osaan nkye mi oyeye onuunu nani.

¹⁴ Lubana ni ama nle kyedo ola ntona yee ama gyokwude yo, oyeye onuunu dze yi oyabo wuba ondu odzeddze mgban kpaa yee ayayi.

¹⁵ Ikyekye ola li ba yi itingga. Imbe ngwi ola dze bayo ala ofaafa kpaa dze ba.

¹⁶ Nghane, ondu odzeddze li ba mi oyeye onuunu, adzi ni elela di dze ikye eto mgbi Abrahan duu. Ondu odzeddze otsitsi ne dze ikye ama nli mgbi ola kyoon ba, kpaa li mbi ama nsulu oyeye onuunu mgbi Abrahan nani. O li otseyi duu.

¹⁷ Dafi Afe tsekise lo ma gbee: <<Ani nu abu li otso ese ibyiibi.>> O li otseyi mi ine Imgbasho, ongwu o nun oyeye nani, Imgbasho nli kyile emi ikwukwo, di li kwu ungwo ama ndzema ba dafi a tsekise dze nani.

¹⁸ Ngwi dze dafi ewe ogbe byiibi dzema ba ne kpaa, Abrahan gbewebyi noyeye. Nghane o yee otso ese ibyiibi, yeye dafi Imgbasho teyi nyan mani gbee, <<Li nha ngwi engwiba mgbi abu ka mbwo aali.>>

¹⁹ Ngwi Abrahan me onova ideli onyi ne kpaa, oyeye onuunu mgban shanye ba. O ye dafi ongwu dze kwekwe okwulu, owan iSara kpaa kye ka mbongwe wuba mani.

²⁰ Nghaduu Abrahan tangwe ondu odzeddze mgbi Imgbasho ba, kpaa keekiyayi mi oyeye mgban onuunu di kye okwokwo nu Imgbasho,

²¹ ikyesine o ye saan ta gbee Imgbasho dze yi mfyee okyungwo ngwi o zonu nani.

²² Li ikyengha <<ngwi a gbela yan gbee o le saan aali.>>

²³ Elodze ngwi a lo gbee <<a gbela yan na>> a lon li ikye mgban yuon ba,

²⁴ kpaa li ikye eyi ama Imgbasho ka gbela gbee eyi le saan ikye gbee eyi noyeye mbi ongwu Imgbasho nkyile iYesu Otse mgbi eyi mi ikwongye mani.

²⁵ A kyon nu mi abo ikwongye mi ikye ali ibwubwe mgbi eyi di kyilon mi ikwongye ikye ni eyi gye emyemye mi ine Imgbasho.

5

Iyu yi atsa

¹ Nghawane, dafi eyi gye emyemye mi oyeye onuunu ne, eyi sulu iyu yi Imgbasho mgbi eyi ikpewo Otse mgbi eyi iYesu iKrestu,

² ongwu eyi tu ofe kaka elela ongwu eyi kwudze ele onene ne mi oyeye onuunu neni. Eyi di dze yi atsa yi ewe ogbe byiibi otu okwokwo mgbi Imgbasho nani.

³ Li nha ta ba, kpaa eyi di tsatsa mi iso mgbi eyi, ikyekye eyi ye ta gbee iso li ba yi itukwu oshiishi;

⁴ itukwu oshiishi li ba yi itukwu ofyumfye, itukwu ofyumfye li ba yi ewe ogbebyi.

⁵ Ewe ogbe byiibi di li nu eyi ayiwi ba, ikyekye Imgbasho kye okpitukwu mgban yawo eyi ke itukwu nye mi Onodzi Osaan ngwi O kye nu eyi nani.

⁶ Ngwi onw wa gyo yeye ne, iKrestu kwulu ikye eyi mi ono ngwi eyi dze yi mfyee ba kale nha Imgbasho ado mani.

⁷ I fyumfye ni inggise kwulu ikye inggise osaan, kpaa mi ikye inggise osuse saan yo, kaba inggise ka yagba kwulu.

⁸ Nghaduu Imgbasho kye okpitukwu mgban tso eyi mi ito ofe neni: Ngwi eyi ka li emi ali ibwubwe majo iKrestu kwulu ikye eyi.

⁹ Ngwi eyi gye emyemye mi eyi mgban wa ne, a ka dulu eyi mi itingga mgbi Imgbasho ikpewon sine nha lo?

¹⁰ Lubana onw ngwi eyi ka li engyikyili mgbi Imgbasho ma, a yile eyi gyiide yan mi ikwu ongan, ikyegbee a yile eyi gyiide ne, eyi ka wa wato ikpewo okyee-kyee mgban mi ikwu sine nha lo?

¹¹ Ungwone li nha ta ba, kpaa eyi di tsatsa mbi Imgbasho ikpewo Otse mgbi

eyi iYesu iKrestu, mi oyile eyi gyiide yi Imgbasho.

Ikwongye ba ikpewo Adan, Oshishe kye ikpewo iKrestu

¹² Nghane, dafi alobube kaka ese ikpewo inggise onyi, ikwongye di kaka ese ikpewo alobube ne, inggise duu tu ikwongye, ikyekye ali inggise duu kyo obube.

¹³ Lubana duuse ni a kye ola nu yo, alobube teyi dze ese neni. Kpaa a kye alobube wuuta ba ikyesine ola dzema waba.

¹⁴ Ndze nghanɛ kpaa, ikwongye wita kye onɔ mgbi Adan nghataa ba onɔ mgbi iMose jo kaka mbi ama nfoola dafi Adan ndze dafi iKrestu nka wa ba na ba mani.

¹⁵ Nghaduu umba ungwo ngwi iYesu kyo na dze dafi adɔ onghaangha na ba. Lubana ki ibyi inggise kwulu ikye adɔ onghaangha mgbi inggise onyi yo, mbi inggise onyi iYesu iKrestu na umba itukwu oleewo mgbi Imgbasho nkye mbon ka gbɔfwɛ mbi ibyi inggise!

¹⁶ Odi kiyayi yo, umba mgbi Imgbasho dze dafi alobube ngwi Adan kyo na ba. Ikwo kyɛdɔ alobube onyi na di ba yi odzili-dzili, kpaa umba na yo kyɛdɔ adɔ onghaangha mgbi inggise ibyibyi di nu ma gye emyemye.

¹⁷ Lubana ki adɔ onghaangha mgbi inggise onyi, nu ikwongye gyuto ikpewo inggise onyi na waali, ka dze sine mbi ama ngbɛ elela mgbi Imgbasho dzii beyi umba mgbi osaan ngyuto mboma ikpewo inggise onyi iYesu iKrestu na!

¹⁸ Nghawane, dafi adɔ onghaangha onyi ba yi odzili-dzili mbi inggise duu ne, li nghanɛ ali osaan onyi ba yi emyemye nka nu inggise duu tu oshishe yeye aali.

¹⁹ Lubana dafi adɔ onghaangha mgbi inggise onyi nu inggise duu yee emi alobube ne, li nghanɛ ngwi osiikyenu mgbi inggise onyi ka nu inggise ibyibyi yee saan kpaa aali.

²⁰ A kye ola na ba ikye ni obube tsoto; kpaa ni obube tsoto yo, elela Imgbasho nghao tsoto duu.

²¹ Ikyenghane, dafi alobube gbe inggise duu teyi kaka ikwongye ne, li nghanɛ ngwi elela mgbi Imgbasho nnu eyi osaan na gbe eyi teyi onene, nu eyi tu oshishe gyegwu ikpewo iYesu iKrestu Otse mgbi eyi aali.

6

Eyi kwulu mi alobube, ye dze oshishe mi iKrestu

¹ I ka gbɔn sine waden? Ni eyi keekiyayi okyo alobube zukwu ni elela sheeshee?

² Onoka lo! Ni eyi kwulu mi alobube waali; kyosine se eyi di kale kyon kpoo?

³ Naadi ema ye dafi eyi ama ngwu a kyo eyi iBatisima mbi iYesu iKrestu ne, a kyo eyi iBatisima kaka ikwongye mgban ma we?

⁴ Nghanɛ a gbe eyi ndzi yan nye mi iBatisima kaka ikwongye ikyegbɛɛ, dafi a kyile iKrestu mi ikwongye mi okwɔkwɔ mgbi Otson ne, eyi kpaa kawa dze mi oshishe ofufe.

⁵ Dafi a gbe eyi kwokyi yan mi ikwongye nghanɛ, li kyeme a dika gbe eyi kwokyi yan mi okyee-kyee mi ikwu.

⁶ Lubana eyi ye odzɛɛdɛ mgbi eyi ogbugbe na a kye gbokwo yan ikye ongyelu yi ikpewo mgbi alobube nani, zukwu ni eyi ka li ofyee mgbi alobube wuba.

⁷ Inggise nkwalu yi iKrestu ta wa yo, o wato mi alobube.

⁸ Onene kini eyi kwulu yi iKrestu yo, eyi noyeye ta gbɛɛ i dika wa dze oshishe yan.

⁹ Lubana eyi ye ta gbɛɛ ngwi a kyile iKrestu mi ikwu ne, o ka yama kwulu wuba; ikwongye sulu mfyɛ onghan wuba.

¹⁰ Ikwu ngwi iYesu kwu na, o kwikwu akponyi ikye odzili alobube; kpaa oshishe ngwi o dze na, o dze ikye Imgbasho kyon.

¹¹ Mi ito ofɛ na kpoo, kye ewema gbɛɛ ema kwulu ikye odzɛ mi alobube wuba, kpaa we gbɛɛ iKrestu iYesu nu ema oshishe mbi Imgbasho.

¹² Ikyenghane ka nu alobube gyuto mi ikpewo mgbi abu nli kwulu ne ba, di abu wa sunu imina mgban ibwubwe.

¹³ Ka yama kye alewo mgbi ema nu ali ibwubwe no yee okye mgbi imbaali ba. Kye ewema nu Imgbasho, dafi ama ngwu a dula ma to mi ikwongye luba oshishe mani; di kye alewo mgbi ema nun dafi okyiido mgbi osaan mani.

¹⁴ Nghawane, ka nu alobube kye ema teyi ba, ikyekye ema byidze abo ola ba, kpaa abo elela.

Ofyee mgbi osaan

¹⁵ Ungwo ntone duu ma itan sine? Eyi ka kiyayi okyo obube ikyegbɛɛ eyi woto abo ola ba kpaa woto abo elela nghaoo? Onoka ba du!

¹⁶ Ema ye dafi ema li ofyee mgbi inggise ngwu ema le siikyenun ma we? Ema ka yagba li ofyee mgbi alobube di kwulu, hona ofyee ama osiikyenu Imgbasho, nka nu ema dze mi ofɛ mgbi osaan.

¹⁷ Nghaduu eyi ta Imgbasho angba gbɛɛ, nose ma ema li ofyee mgbi alobube kpaa onene yo, ema ye kyɛdɔ ito otsootso ngwi a tso ema ne itukwu onyi.

¹⁸ A she ema adi mi ifu alobube, ema yee ofyee mgbi osaan.

¹⁹ N le gbɔdɛ ne mi odzɛɛdɛ mgbi inggise owamyɛ ikyekye ema ndɛ mi odzɛɛdɛ mgbi atta mgbi ema. Dafi ema li kye alewo mgbi ema yee ofyee nu idza ni ali ibwubwe

mgbi ema le sheeshe wele ma, onene kye alewo mgbi ema yee ofyee nu osaan nka kye ema kaka osaan kpaa mani.

²⁰ Ono ngwi ema li ofyee mgbi alobube ma, ungwō kwu osaan akye yi ema ba.

²¹ Li ali oyabo ngwi ema tu mi ono na mi ungwō ama n yee ema ungwō ayiwi onene ne? Bana ungwō ntona li ba yi ikwongye mi ongyeengye!

²² Nghaduu onene ngwi a dulu ema to mi abo alobube di yee ofyee mgbi Imgbasho ne, oyabo ngwi ema tu ma kye ema kaka osaan. Ongyeengye mgban di li oshishe ogyegwu.

²³ Lubana mkpa alobube li ikwongye, kpaa umba mgbi Imgbasho li oshishe ogyegwu mbi iKrestu iYesu Otse mgbi eyi.

7

To mi abo ola luba mbi iKrestu

¹ Emi ongwunani, ema ama nbe mi ola ntonene, ema ye dafi ola li kyido mi ikpewo inggise ono ngwi otsungwon dze oshishe ma ta baa?

² Dze sini, ola tso gbæ ongyaa dze ikye oban ono ngwi o ka dze oshishe mani. Nghaduu ni oban kwulu yo, o to mi abo ola nani.

³ Nghawane, ki non kyuka yi ongyulo oka ngwi oban ka dze oshishe yo, o kyo amah. Kpaa ni oban wa kwulu yo, o to mi abo ola nani. Non ye bongyulo oka jokpa, o yama li ongyaa amah wuba.

⁴ Ne, emi ongwunani, ema kpaa ola nwodze mbi ema na kwulu ikpewo ikwu iKrestu, ikye ni ema li mgbi iKrestu ongwu a kylon ni ikwu ikye ni eyi wa owaawa mbi Imgbasho nani.

⁵ Lubana ngwi odzeedze ibwubwe mgbi atta kye eyi teyi ma, imina obube ngwi ola kye ba ma le kyido mbi eyi, man alungwo ngwi eyi kyo duu ngye mi ikwongye.

⁶ Nghaduu onene ngwi eyi kwulu mi ungwō nple kwu eyi ofyee ne, eyi to mi abo ola ikye ni eyi ki kyungwo mi odzeedze ofufe mgbi Onodzi, no ka li imbisō mgbi ola ogbugbe ngwi a loolo na ba.

Ogbili-gbili mgbi alobube yi ola mi itukwu

⁷ I ka gbōn sine wa den? Ola ne li ungwō obubee? Ono oka ba du! Mi otsitsi ki li ola bayo, n kika ye ungwō nli alobube ba du. N kika ye ungwō nli odi mbe angwo ba du, ni ola ki gbæ, <<Ka yama di ungwō mbe angwo bayo.>>

⁸ Li ofe ngwi ola kye ba nani, ngwi alobube tu ofe okwokyle ali imina obube duu mbi ani aani. Kini ola dzema bayo, alobube dze yi mfye wuba.

⁹ Duuse ni ani ye ola yo, ani dze oshishe; kpaa ngwi ola wa ba ne, alobube fwi to dze oshishe man ani kwulu.

¹⁰ N difwi gbæ ola se ndze yi oweka okye oshishe ba ma, ye kye-kye ikwongye ba.

¹¹ Lubana alobube tu ofe ikpewo ola kpaga ani wo, di ngwo ani.

¹² Nghawane, ola le saan, ali ola le ayin di tishi.

¹³ Ungwō ntishi ne di yee ikwongye mbi anii? Onoka ba du! Ikyegbæ nu ma difwi alobube gbæ di li alobube yo, i kye ikwongye ba mbi ani ikpewo ungwō osuse, adzi ni alobube yee alobube yeye ikpewo ola mani.

¹⁴ Eyi ye ta gbæ ola li ungwō ongwī onodzi, nghaduu ani dze mi odzeedze mgbi ali ibwubwe mgbi atta, a kyen gya yi alobube dafi ofyee mani.

¹⁵ Ani yama ye ungwō ani le kyo ba. Lubana ungwō ngwi ani mina okyo ma n li kyon ba, kpaa ungwō nta ani anyi ma n li kyon.

¹⁶ Ni ani di kyungwō ngwi ani mina okyo ba ma kpaa, n di li gbela gbæ ola tishi.

¹⁷ Ngwi i dze nghanē yama li ani yuen le kyo ba kpaa, li alobube nwodze mben mani.

¹⁸ N ye ta gbæ mi atta mgbi ani ibwubwe nani, unkonyi osuse wodze mbi ani ba. Bana n sulu imina okyungwō osuse kpaa, n li yagba kyon ba.

¹⁹ Lubana ungwō osuse ngwi ani mina okyo ma n li kyo ba, li obube ngwi ani mina okyo ba ma, n li kiyayi okyo aali.

²⁰ Kini ani le kyungwō ngwi ani mina okyon bayo, yama li ani yuen le kyo wuba, kpaa li alobube nwodze mbi ani ma le kyo aali.

²¹ Ne n difwi gbæ mfye oka le tsamu ani, ono ngwi i mina ani okyungwō osuse ma, ungwō obube li kye ani teyi.

²² Lubana n gbela yi ola mgbi Imgbasho itukwu ngyi;

²³ nghaduu n difwi mfye oka idzidza nle gblika yi itukwu mgbi ani, i di nu ani yee ofyee alobube nkye ani le teyi mi alungwo ngwi ani le kyo duu.

²⁴ Li ali ito ishisha inggise ngwi ani dze den! Li eme ka nagbe ani mi abo atta mgbi ani nkye ani le lu ikwongye ne?

²⁵ N ta Imgbasho angba ikpewo iYesu iKrestu Otse mgbi eyi!

Nghawane, ani abuen mi itukwu mgben yo, n li ofyee mi ola mgbi Imgbasho, kpaa mi odzeedze mgbi mmbwe yi eyi yo, mfye oka le tsamu ani ni ani kyo alobube.

8

Oshishe ongwī Onodzi

¹ Nghanē, onene odzili-dzili yama dze ikye ama ndze mi ifu iKrestu iYesu ba,

² ikyekye ikpewo iKrestu iYesu mfye mgbi Onodzi nu oshishe shen adi ta mi mfye mgbi alobube yi ikwongye.

³ Lubana ungwo ngwi ola yagba kyo ba, ikyegbee odzeedze mgbi inggise owamye sulu mfye mme ba ma, Imgbasho kyon. O kye onghan deso ba mi odzeedze mgbi inggise owamye, ikye owa kyi kyelu ado okwookwo mgbi alobube mi ikpewo mgban,

⁴ adzi ni a di osaan ngwi a gbæ ni eyi dze mi ola ma mbi eyi ama nle kyedo odzeedze mgbi mmbwe yi eyi ba kpaa le kyedo odzeedze mgbi Onodzi neni.

⁵ Ama ngwu mmbwe yi eyi kye ma le teyi yo, li gbe itukwu mgbi ama byi ungwo ngwi mmbwe yi eyi mina mani; kpaa ama Onodzi kye ma le teyi, li gbe itukwu ma byi ungwo ama Onodzi mina.

⁶ Itukwu mgbi inggise ngwi alobube kye le teyi yo li ikwongye, nghaduu itukwu ngwi Onodzi kye le teyi yo, li oshishe yi iyu.

⁷ Kpaa itukwu alobube, li dze mi ogblagblo yi Imgbasho. Li yama sunu ola mgbi Imgbasho ba, hona dika yagba kpaa ba.

⁸ Ama ngwu mmbwe yi eyi kye ma le teyi yo, ka yagba kyungwo okpa Imgbasho ba.

⁹ Ema ta yo, mmbwe yi eyi kye ema le teyi ba kpaa li Onodzi, kini Onodzi mgbi Imgbasho wodze mbi ema yo. Ma ali inggise ndze yi Onodzi mgbi iKrestu ba wa, o li mgbi iKrestu luba.

¹⁰ Nghaduu ni iKrestu dze mbi abu yo, ewo mgbi abu kwulu ikye alobube, kpaa onodzi mgbi abu dze oshishe ikye osaan.

¹¹ Ma ni Onodzi mgbi Ongwu nkyile iYesu mi ikwu na wodze mbi abu yo, Ongwu nkyile iKrestu mi ikwu na dika nye mi Onodzi mgban nwodze mbi abu ne, dulu abu mi ikwongye luba oshishe.

¹² Nghane, emi ongwunani, eyi li ofyee mgbi imina onghi ese ne ba, ne eyi sulu itodze okyedo imina onghi ese wuba.

¹³ Lubana ni abu dze mgbi mmbwe yi eyi yo, o ka kwulu; kpaa ni abu dze mi Onodzi, kyi kyelu imina obube mgbi ewo ngwuta yo, o ka dze oshishe.

¹⁴ Ama ngwu Onodzi mgbi Imgbasho kye ma le teyi yo, a li emi ongwæ Imgbasho.

¹⁵ Ikyesine ema gbe onodzi nnu ema yee ofyee nka mio wuba, kpaa ema gbe Onodzi nnu ema yee engwæ Imgbasho mani. Ma mi ikpewo Onodzi ne eyi kwun gbæ, <<Baba, Otseyi.>>

¹⁶ Onodzi na abon kyo obwende yi onodzi mgbi eyi gbæ eyi li emi ongwæ Imgbasho.

¹⁷ Ma ngwi eyi li engwæ ne, eyi li ama gyokwude mgban. Eyi li ama gyokwude Imgbasho ungwonyi yi iKrestu. Eyi ka gyadze yi iKrestu, ma ni eyi gyadze yi iKrestu yo, eyi dika kaka okwokwo mgban yan.

Okwokwo onghi iyayi

¹⁸ Ani noyeye gbæ adze ngwi eyi le gye onene ne yama me mi okwokwo ngwi a kawa kye tso eyi ma ba.

¹⁹ Esee duu le tsoolo ni ama wa di dafi Imgbasho ka kye emi onghan tso mani.

²⁰ Lubana a nu ese duu ndengye, yama li itukwu ese ba, kpaa li itukwu Imgbasho non dzeke ngha, yi ewe ogbe byi

²¹ gbæ ese abuan ka wato mi adi mgbi ungwo ombeembe ngwi a bwan na luba ewo osheta okwokwo mgbi emi ongwæ Imgbasho.

²² Lubana eyi ye dafi ese duu le maandu dafi imba ongwæ mani, nghataa ba ono dzikan neni.

²³ Yama li ese yuon ta ba, eyi abueyi ama nka wa tu owawa onghi ababo mgbi Onodzi ma jokpaa, le maandu mi itukwu le fe ono ngwi a ka gbe eyi dafi engwæ, beke yi ikpewo ofufe ngwi a zonu okye nu eyi mani.

²⁴ Ikyesine li mi ewe ogbe byiibyi ne ngwi eyi wato aani. Kpaa ewe ogbe byiibyi onghi a di yo, yama li ewe ogbe byiibyi luba du. Li eme li kye ewe byi ungwo ngwi ongwu teyi dzeayan?

²⁵ Kpaa ni eyi gbewebyi ungwo ngwi eyi ple dzeayan wa bayo, i ka shitukwu fe.

²⁶ Mi ito ofe na kpoo, Onodzi li tobyi eyi ono ngwi eyi dze ewo atsi mani. Eyi ye ungwo ngbuo ngwi eyi ka bibo ikyen ba, kpaa Onodzi li bo ikye eyi yi andu omaama ngwi a ka gbøn gbe ba mani.

²⁷ Imgbasho nli kyidi itukwu mgbi eyi ma ye oweka mgbi Onodzi, ikyekye Onodzi li bo ikye emi osaan dafi owitukwu mgbi Imgbasho dze mani.

Eyi shewo ngha ama onghaangha

²⁸ Eyi di ye gbæ alungwo nba mbi eyi duu li Imgbasho nu ofe gbæ no to lo ama ongwu kpa ma itukwu ma tishi, ama ngwu a kwu ma ela mi itodze mgbi ongwu mani.

²⁹ Lubana ama Imgbasho teyi ye ma ma, o kye ma dzeke dafi emi Onghan, adzi nu ma yee yeye dafi Ongwe nli Ongwole mgbi emi ongwunon duu.

³⁰ Ama ngwu o di ple kye ma dze ma, o kwu ma ela; ama ngwu o kwu ma ela ma, o di nu ma gye emyemye; ama ngwu o di nu ma gye emyemye ma, o di kye okwokwo mgban nu ma.

³¹ Li ali uka tsatso ngwi eyi ka nu ikye ungwo ntone? Ni Imgbasho dze yi eyi ma li emeni ka fyinyene yi eyi?

³² Ongwu nkye abo tukwu onghan ba, kpaa kyon nu mi ikye eyi duu na, ka kysinese o ka di eyi elela kye alungwo duu nu eyi ba.

³³ Li eme ka gbe odze tukwu ama Imgbasho sadu ma ne ewo? Li Imgbasho li nu inggise gye emyemye.

³⁴ Li ongwu eme ka ngwo eyi ikwo do? Inggise dzema ba, lubana iKrestu iYesu kwulu mi ikye eyi a di kyilon luba oshishe ikye eyi, o di sodze imbe mmwe mi abugye mgbi Imgbasho le tekye ikye eyi.

³⁵ Li eme ka gha eyi yi okpitukwu mgbi iKrestu? Li okakewo naadi adze naadi iso hona enbwa hona ibiba naadi inoola naadi okwusunkli?

³⁶ Dafi Afe lo ma gbæe,
<<Mi ikye abu Imgbasho,
eyi li tsigege yi ikwongye alono duu;
A di eyi dafi mmala ngwi a le
ka kye eba gbon onbukwo mani.>>

³⁷ Mi ungwone duu kpaa eyi shewo nga apan onghaangha ikpewo iKrestu ndi eyi kpan itukwu nani.

³⁸ Lubana n ye saan gbæe ikwongye hona oshishe, naadi engyeso hona onodzi ibwubwe, hona ono ongwu onene naadi ono ongwu iyayi, hona ali ito mfyeduu,

³⁹ naadi mfyeduu ongwu esho hona mfyeduu ongwu ikpese, hona ungwu ngwi a ta duu, ka yagba ghalu eyi yi okpitukwu mgbi Imgbasho ndze mi idzidze eyi yi iKrestu iYesu Otse mgbi eyi ne ba.

9

Imgbasho sadu emi Israi

¹ N le gbo otsitsi mbi iKrestu, n le mwonya ba, itukwu mgben kpaa nin obube ba, Onodzi Osaan li obwende mgben,

² Eka kwowina len kpakpa itukwu di wulin jo dondu ba.

³ Bana n mina gbæe ani abuen a ki wo ani ikamba di dzabo yi iKrestu mi ikye emi ongwunani, emi Israi ama nli eto yi ani neni.

⁴ A li emidi Imgbasho ngwu Imgbasho kyelu ma nu ma yee eto mgban. Imgbasho tso ma okwokwo mgban. O bwondu yi ama di kye ola mgban nu ma. Ozu osunu Imgbasho mi iJerusalem na beyi ondu Imgbasho dze duu li mgbi ama.

⁵ Li ama li inyabyi, di li mboma ngwi iKrestu to eto mi ese neni, ongwu nli Imgbasho onghaangha neni. Nu ma tsan gyegwu! No dze nga.

⁶ No ka dze dafi elodzimgbasho wæse ba. Lubana li ama nto eto mi Israi duu li emi Israi yeye ba.

⁷ Dafi eto mgbi Abraham tsatsa li emi ongwiba mgbi Abraham ba neni. Imgbasho nya Abraham gbæe, <<Li ikpewo Adziki ngwi abu ka tu eto ngwi Ani zondzu yi abu nani.>>

⁸ Ungwone tso gbæe, li engwe ama Abraham mba abon li emi ongwæ Imgbasho

kyeme-kyeme ba, kpaa li engwe ama Abraham mba mi ondu odzædæe ma ngwu a kye ma wuuta gbæe engwiba mgbi Abraham aali.

⁹ Lubana li ela mgbi ondu odzædæe ma aani: <<Onova nkye ne mi ito ono ne yeye n ka yido, iSara ka byi ongwæ abo.>>

¹⁰ Li nana ta ba, ongwefa mgbi iRebeka ntona a sulu otsoma onyi, otsikyeyi Adziki.

¹¹ Nghaduu, duuse ni a mba engwefa ntona, naadi nu ma wa kyo obube hona osuse yo, Imgbasho nya iRebeka gbæe ongwon ongwu okwukwo na kale kyo ongwu ongbungbe ido. Imgbasho gbodze ne ikye otso gbæe ongwu dudu ongwu itukwu ongwu wa, ma yama li ikye unkoka ngwi a kyo ba,

¹² li mi ido okyockyo ba, kpaa li mbi Imgbasho ongwu nkwu ela mani, a nyan gbæe, <<Okwukwo na kale kyo ongwu ongbungbe ido.>>

¹³ Yeye dafi Afe lo mani gbæe, <<iJeko kpan itukwu, kpaa Isol ten anyi.>>

¹⁴ Nghane i ka gbon sine tso? Imgbasho kyo ebebe? Nga ba dududu!

¹⁵ Lubana o gbo nya iMose gbæe, <<Inggise ngwu ani mina n ka dun elela, inggise ngwu ani di mina n ka kyo elela won.>>

¹⁶ Nghane, ungwu ndze mbiso gbæe ka dze yo, li imina hona ofyaafya mgbi inggise ba, kpaa li elela odiidi mgbi Imgbasho.

¹⁷ Li nga ma ngwi Imgbasho gbo nya iFaro mi Afe gbæe, <<Li mi itodze ne yeye ngwi ani kyile abu desho, gbæe nin tso mfyeduu mgben mboo, adzi ni a gbodzen kpatse ese duu.>>

¹⁸ Nghane Imgbasho sulu elela odiidi mbi inggise ngwu i kpan odin elela mani, o di li kye ali inggise ngwu i kpan duu itukwu tiishu.

¹⁹ Inggise oka mbi ema ka byi ani gbæe: <<Ne kyone ngwi Imgbasho di li nu eyi obube? Lubana li eme ka kyi ndelu ow-itukwu mgbi Imgbasho?>>

²⁰ Ei, ka gbo nga ba. Abu li eme, inggise owamyeduu hini, ka tangwe yi Imgbasho? Ungwu ngwi a ta-ta ka yagba nya Ongwu ntan ma gbæe, <<Kyone abu ta ani dze nga gbæe?>>

²¹ Ongye ombe ishe sulu ofe okye akwiibe onyi ma mbe ishe ama a ka kyungwo ingblimo di mbe angbeka ngwi a ka kyungwo imo mi ele ba gbe lo?

²² Kabana Imgbasho mina otso itingga yi mfyeduu mgban mbi ali inggise ngwu o mina odzilin duu, nghaduu o shitukwu yi ama.

²³ Kaba o kyungwone ikye otso okwokwo mgbi ongwu mi ono ngwi ongwu dze yi elela odiidi mbi ama ongwu kyi melu ma toke gbæe ni a tu okwokwo mgbi ongwu mani.

²⁴ Eyi kpaa wodze mbi ama ngwu o sadu mani, li emi ijuda ta ba, Udzengye kpaa.

²⁵ Dafi Otse gbo yeye mi afe mgbi iHosia mani gbɛ:

<<A yama li <inggise mgbɛn>

ba kpaa n ka kwu ma gbɛ, <Emiden>; n ka tso okpitukwu mbi inggise

ama ngwu a

tso okpitukwu yi ama ye ba mani.

²⁶ O diye gbɛ,

<<Imbe ngwi a ple nya ma gbɛ,

<Ema li emidani ba na,>

li mi ele yeye ngwi a

dika kwu ma gbɛ,

<Emi ongwɛ Imgbasho oshishe.> >>

²⁷ Ongye ogbɛsɛ Adzaya gbobakwɔ ikye emi Israi gbɛ:

<<Dafi nmbwo mgbi emi Israi dze

dafi mfyani mi onekyoo

nɛ kpaa, li gwee ni ta ka wato.

²⁸ Lubana Otse ka kwo

esɛ adɔ ple,

ma dika li dafi

o gbɔgbɛ ongwu ka kyo ma yeye.>>

²⁹ Dze yeye dafi Adzaya tsekise gbo mani gbɛ:

<<Ni Otse Ongha yi mfyɛ ki dzata eto mgbi eyi

angbeka oshishe bayo,

eyi kika dzili dafi iSodon yi iGomora mani.>>

Emi Israi noyeye ba

³⁰ Ni i gbɔn sɛ tsatso? Udzengye ama ngbli mi odze osaan ba kpaa, tun mi oyeye onuunu.

³¹ Kpaa emi Israi ama ngbli gbɛ ama ki dze osaan yi Imgbasho ma kpaa tun ba.

³² Kyɔnɛ ngwi a tu ba? Ikyekye a pita li mi oyeye onuunu ba, kpaa a pita dafi li mi idɔ mgbi ama okyɔkyɔ mani. Ali nɛ yee iKrestu ngwi inggise le tsiishi mi ele.

³³ Dafi a lɔ mani gbɛ, <<Dika, n kye iKrestu la emi iDzayon nu ma le tsiishi beyi ikwutse nnu ma le gbɛsɛ mani, nghaduu inggise nnun oyeye yɔ, ka gyayiwɛ ba.>>

10

¹ Emi ongwunani, oweka yi ibɔ mgbi ani mbi Imgbasho ikye emi Israi yɔ, li ogbɛ a ki wato.

² Lubana n ka kyo obwɛndɛ ikye ma gbɛ Imgbasho gbɛ ma itukwu sɔ, kpaa a difwi ofɛ ngwi a ka kyɛdɔ Imgbasho ba.

³ Dafi a yama ye osaan nkyɛ mbi Imgbasho na ba le di gbɛ ama ki kyo osaan mgbi ikyibɔ ma nɛ, a gbela nu osaan mgbi Imgbasho kye ma teyi ba.

⁴ Lubana iKrestu ngyɛlu yi ola, ikye ni ama nnun oyeye duu, yee saan yi Imgbasho.

⁵ IMose nu osa mi osaan ngwi a li tu mi ola mani o gbɛ, <<Inggise nkyungwɔ ama ola gbo yɔ, ka dze oshishe.>>

⁶ Nghaduu osaan ndze mi oyeye onuunu ma gbɛ, <<Ka yama gbo mi itukwu mgbi abu gbɛ, <Li emɛ ka kɛ esho?> >> (ka kye iKrestu ba esɛ)

⁷ <<naadi, <Li emɛ ka lu esɛ kpini?> >> (gbɛ no kyile iKrestu mbi emi ikwukwɔ).

⁸ Imbe odze nɛ kyinebyi ma li ongwu aani: <<Esɔ mgbi Imgbasho dze kwɛkwɛ yi abu, dze ikpondu mgbi abu beyi itukwu mgbɔɔ,>> ali ma, li esɔ mgbi oyeye onuunu ngwi eyi le gbo nɛni.

⁹ Kini abu gbo mi ondu mgbi abu gbɛ, <<IYɛsu li Otse,>> di noyeye mi itukwu mgbi abu gbɛ Imgbasho kyilen mbi emi ikwukwɔ yɔ, o ka wato.

¹⁰ Lubana li mi oyeye onuunu mgbi ema mi itukwu ngwi ema gye emyemyɛ, di li obwɛndɛ ngwi ema kyo mi ondu mgbi ema ma, ngwi a dulu ema wato aali.

¹¹ Dafi Afe gbo mani gbɛ, <<Ali inggise nnun oyeye duu, ka gyayiwɛ ba.>>

¹² Lubana idzidza dze mbi emi iJuda yi Udzengye ba, Otse onyi ma li mgbi ama duu di li kye mɛɛ ba ama nkwi mi iyi mgbani duu ewo kpakpa,

¹³ ikyesine, <<Ali inggise nkwi mi iyi mgbi Otse duu ka wato.>>

¹⁴ Nghanɛ, ka kyɔnɛ, ngwi a ka kwu mi iyi mgbi ongwu a nun oyeye ba? Dika kyɔnɛ ngwi a ka noyeye mbi ongwu a fwo odzan ba? A dika kyɔsɛnɛ fwo ni inggise gbo nya ma ba?

¹⁵ Ni a dɔ ma esɔ ba ma a ka kyɔnɛsɛ gbo? Dafi Afe gbo mani gbɛ, <<Ama nle wa gbo Esɔ Osuse ma obaaba mgbi ama sunse saan!>>

¹⁶ Kpaa li emi Israi duu gbela Esɔ Osuse nɛ ba. Lubana Adzaya gbɛ, <<Otse, li emɛ nu esɔ mgbi eyi oyeye?>>

¹⁷ Ongwikpa yɔ, oyeye onuunu kye mi ofwoofwo, ofwo esɔ ogbɔgbɔ mgbi elodze iKrestu.

¹⁸ Nghaduu n le byita gbɛ, a yama fwo ba naadi? Mi otsitsi yɔ a fwo, <<Ela mgbi ama gbɔfwɛ kaka esɛ duu, elodze mgbi ama kpatse imbe esɛ dondu duu.>>

¹⁹ N dile byita gbɛ, Israi yama tu osa ba naadi? Ababɔ yɔ, iMose gbɛ, <<N ka nu ema di esɛ nli unkonyi ba ma kyofu; n ka nu esɛ ndifwi unkonyi ba ma kyo ema itingga.>>

²⁰ Adzaya di gbo yi imio ba gbɛ, <<Inggise ama npita ani ba ma li ama di di ani aali; N kye ewen tso mbi ama nle byita ani kpaa ba mani.>>

²¹ Nghaduu mi odze mgbi Israi yɔ Imgbasho gbɛ, <<I kye egbe olɔlɔ ngwi ani na abɔ kɛ mbi ama onghaadɔ beyi ama nɛwa onoyeye ntonani.>>

11

*Emi Israi ama nkale kyo oyeye
mbi Imgbasho*

¹ Nghanɛ n le byita gbɛɛ, Imgbasho fwa emidan naadi? Onoka ba du! Ani li inggise Israi abuen, ongwiba mgbi Abraham, mi agwo mgbi iBenjamin nani.

² Imgbasho yama fwa emidan ama o teyi ye ma na ba. Ema ye odze ngwi Afe gbo ikye Elaija dafi o fyewo yi Imgbasho ikye emi Israi ma lo:

³ <<Otse, a kyi ngwolu ama ogbɛɛɛ mgbi abu di kyi gbobulu abu iwashi ntonani; li ani onyi ta sisi, a dile fya ongwɔ ani>>?

⁴ Ma Imgbasho nose nun uka sine? <<Ani nu inggise idubu egyafa sisi ama nfwa okwakwafɔ nu iBaa.>>

⁵ Onene kpaa inggise sisi to ma ama Imgbasho sadu ma mi elela.

⁶ Ki li mi elela yo, yama li ido okyɔɔkyɔ wuba. Ni li otsitsi yo, elela ka li elela wuba.

⁷ Ungwɔnɛ tso gbɛɛ osaan ngwi emi Israi le gbili mi itukwu mgbi ama onyi ma kpaa a tu ba, li ama a sadu ma gwee ma ta tu. Kpaa ama nsisi duu gbadikye,

⁸ dafi Afe lo mani gbɛɛ, <<Imgbasho nu ma itukwu yɛ mbumbu, a sulu inɛ kpaa a li di ba, a sulu ado kpaa a li fwo ba, nghataa ba inɛ.>>

⁹ IDevedi di gbɛɛ, <<Ni oga mgbi ama yɛ mmbwalii yi ukya, nka nu ma ɛɛ ogboogbo ngwi li ado okwookwo ngyɔ yi ama mani.

¹⁰ Inɛ no bulu lo ma mi ikye
zukunftu nu ma ka yagba di ba,
ni ekpo fulu loma mi iso gyegwu.>>

Abekwo a kwokyi ma mani

¹¹ N diye byita gbɛɛ, emi Israi tsiishi gbɛɛɛ lamyɛ okyɛɛ-kyɛɛ? Onoka ba dududu! Ola ofaafa mgbi ama nu owato-wato ba mbi Udzengye adzi ni Israi di kyofu.

¹² Kpaa kini ado onghaangha mgbi ama yɛɛ mse mbi ɛɛɛ, ɛɛɛ ogboogbo mgbi ama di yɛɛ mse mbi Udzengye, emi iJuda duu wa gbelan ma, ito aludu ngwi inggise mi ɛɛɛ duu ka tu ma ka shewo sine!

¹³ N le gbɔdɛɛ yi ema Udzengye. Dafi ani li ongye ogbikye iYesu mbi ema Udzengye nɛ, n ka dɛɛ yi abo otsigege mi ido mgben

¹⁴ yi ewɛ ogbebyi gbɛɛ kaba n ka kyile emiden itukwu esho nu ma kyofu, emi iJuda nu ma wato.

¹⁵ Lubana kini ofwaafwa ngwi emi Israi fwa Imgbasho nɛ yile ɛɛɛ duu gyiide yi Imgbasho ma, ogbela-gbela mgbi ama ka li ɛkyɛ tsatso? Ka dɛɛ dafi okyile emi ikwukwo luba oshishe.

¹⁶ Kini a kye anggayi ibredi nu Imgbasho yo, ibredi ololo duu kpaa li mgban, ni a di gbe akpekwo nu Imgbasho yo, abekwo kpaa li mgban.

¹⁷ Ema Udzengye dɛɛ dafi abekwo olivi ntaagbo ngwi a kye kwokyi yi ekwo olivi ongwɔ inggise okwo yeeɛɛ mani. Ema gbikye abo angbeka ngwi a fwelu ma ngwuta nani. Ma mi itɔdɛɛ nɛ, ema kpaa li tu mse ndze mbi ekwo olivi ngwi a kwokyi-kwokyi nani.

¹⁸ Nghaduu ka yama tsɛɛ gbɛɛ abu tatase ngha abo ngwi a fwelu ma yangwuta na ba. Wɛ ta gbɛɛ, li abu le fyi akpekwo anya ba kpaa li akpa le fyi abu anya aali.

¹⁹ Kaba abu ka gbɔgbɛɛ, <<A kyi fwelu abo ntone yangwuta ikye okye ani kwokyi mi ele.>>

²⁰ Li otsitsi waali. A kyi fwelu ma ikyekye a noyɛɛ ba, kpaa abu kwudɛɛ mi oyɛɛɛ onuunu. Ka li inggise ohaha ba, kpaa dɛɛ yi imio ewo.

²¹ Dafi Imgbasho di emi iJuda ama nli abo mgbi atta elela ba nɛ, ema kpaa o ka di ema elela ba ngha aali.

²² Onene ema di dafi Imgbasho nuno di leewo ma lo, o nuno yi ama ngbɛɛɛ mani, kpaa o leewo yi ema, o dika kiyayi oleewo yi ema kini ema kiyayi yi oleewo mgban nɛ yo, ni li ngha bayo, ema kpaa a ka kyi fwelu ema ngwuta.

²³ Ni a fyumfyikye wuba yɛ noyɛɛɛ yo, a ka yile ma kwokyi, ikyesine Imgbasho ka yagba yile ma kwokyi.

²⁴ Ngwi i dɛɛ ngha duu kpaa, yama li ayin ba odulu abo olivi ongwɔ ntaagbo kye wa kwokyi mi ekwo olivi osuse. Nghanɛ yama li adɛɛ ba ni Imgbasho yile abo olivi osuse ongwɔ a kyi fwe ngwuta yilen kwokyi mi ita ma!

Emi Israi duu ka wato

²⁵ Emi ongwunani, i minen gbɛɛ ni ema difwi ungwo odaada nɛni, adzi ni ema ka kyile ewo esho ba: Emi Israi angbeka kye itukwu tiishu, a dika kɛɛkiyayi mbinose ngwi mmbwo mgbi Udzengye ka ba ngye mbi Imgbasho.

²⁶ Taman emi Israi duu ka wato, dafi a lo mi Afe mani gbɛɛ: <<Ongye odulu inggise wato ma ka kye iDzayon; o ka kyata emi Israi nu ma nya okwu Imgbasho shanye.

²⁷ Dika li ondu obwaabwa mgbi ani yi ama onɔ

ngwi n ka kyi kyelu alobube
mgbi ama mani.>>

²⁸ A kye emi Israi gbɛɛ a li engyikyili mgbi Imgbasho, ikye ni Eɔ Osuse kaka mbi ema Udzengye. Nghaduu a ka li ama ngwu a sadu ma, a di kpa Imgbasho itukwu ikye emi otsikyoma.

²⁹ Lubana ni Imgbasho kye umba nu inggise yo, o li yɛ kyi gbelu wuba, ama ngwu o kwu ma ela kpaa, o li yɛ fwa ma wuba.

³⁰ Yeye dafi ema onoka nose nga Imgbasho adɔ kpaa a di ema elela ikye adɔ onghaangha mgbi emi Israi nani,

³¹ nghane ama kpaa ye ngaado ikyegbɛɛ ni Imgbasho di ama elela mi elela odiidi ngwi o di ema nani.

³² Imgbasho gbe ali inggise duu woke obawi mi adɔ onghaangha mgbi ama, adzi ni ongwu wa di ma duu elela.

Tse Imgbasho

³³ Eheen, inggise oyagba kyi mbalu aludu yi ozoyeye mgbi Imgbasho dzema ba! Inggise

ka yagba difwi owitukwu mgban hona nu osa mi ungwɔ ama o li kyo gbe ba!

³⁴ Li emeni ye itukwu Otse?

Hona li emeni wan odze ye?

³⁵ Li eme nu Imgbasho ungwɔ gbɛɛ no wa yilen kpan ye?

³⁶ Lubana alungwɔ duu tɔkye mbon, alungwɔ duu nye mbon dika ye lu mbon duu.

Okwɔkwɔ duu li mgban gyegwu! No dze ngaha.

12

Ifɛ ofɛ-fɛ mgbi oshishe

¹ Ikyenghane, emi ongwunani, n tɛkye nu ema, mi elela odiidi mgbi Imgbasho, gbɛɛ ni ema kye ewo mgbi ema fife mgbi oshishe osaan nu Imgbasho adzi ni Imgbasho dze yi atsa. Ikyesine li ofɛ ntishi ni ema sunu Imgbasho mi onodzi aani.

² Ka kye ali mgbi esɛ ne yi ungwɔ etɔ mgbi ama ba na, kpaa ni Imgbasho kyata ema yɛɛ inggise ofufe mi ewodze mgbi ema otseɛtse. Ta ema ka yagba ye owitukwu mgbi Imgbasho ikye ema, ntishi di kpaan mani.

³ Lubana mi elela ngwi Imgbasho dzeyan ikye ani kye idɔ ne wo ani abɔ ne, n le nya ema duu gbɛɛ, ka di ewema miine nye obyɪ ba, tatase yɔ yile ewema esɛ mi ewe otseɛtse mgbi ema, mi odzɛɛdze mgbi oyeye onuunu ngwi Imgbasho mba kye nu ema mani.

⁴ Yeye dafi ali ogyengye mbi eyi sulu ikpewo onyi yi alewo ibyibyi nani, alewo ntone di sulu idɔ mgbi ama idzidza-dzidza,

⁵ nghane mbi iKrestu yɔ ngwi eyi li ibyibyi ne eyi yɛɛ ikpewo onyi, ma ali alewo duu li mgbi ewoma.

⁶ Eyi to yi umba idzidza-dzidza, mi odzɛɛdze mgbi elela ngwi Imgbasho dzeyan ikye eyi mani. Kini umba mgbi inggise li idɔ oyegbɔ yɔ, no kyo gyɔ-gyɔ dafi oyeye onuunu mgban tso mani.

⁷ Ni li okyo angbeka idɔ yɔ, no kyo ma idɔ, ni li otsootso yɔ, no tso,

⁸ ni li ofyi inggise mfye itukwu yɔ, no fyi ma mfye itukwu, ni li odi mi imina mgbi angbeka yɔ, no nu dzii, ni li ogbe inggise

teyi yɔ, no gbe ma teyi saan, ni li odi elela yɔ, no kyo yi ewo osheta.

Okpitukwu

⁹ Okpitukwu no li mi otsitsi. Ungwɔ obube no ta abu anyi; dzɛɛ beke yi ungwɔ osuse.

¹⁰ Di ewema kpitukwu dafi engwunewe mani. Nu angbeka mmwɛ nga ewabu.

¹¹ Ka yama kyo ewewa mi idɔ mgbi Otse ononyi ba, kpaa zola mi Onodzi di kiyayi okyɔn idɔ.

¹² Dze yi atsa mi ewe ogbe byiibyi na, shitukwu mi adze dika nde yi ibɔ obɔɔɔɔ ba.

¹³ Ghalu ungwɔ ngwi abu sulun yi emidi Imgbasho ama ungwɔ kwoma oba. Kiyayi oshabɔta.

¹⁴ Bɔ Imgbasho ibɔ no kye mse be ama nle nu abu iso ma ewo; no ka li ikamba ba.

¹⁵ Tsatsa yi ama nle tsatsa; kye abɔ tiko yi ama nkye abɔ tiko mani.

¹⁶ Dze ondonyi yi ewema na. Ka yama kyile ewo esho ba, kpaa gye tsa yi inggise ama n yeyikpa kpaa mani. Ka di ewema miine ba.

¹⁷ Ka yama yile mkpa ungwɔ obube kpa inggise mi obube ba. Gbeka dze no kyungwɔ nli ayin mi ine ali inggise duu.

¹⁸ Fya mi ofyaafya mgbi abu no dze mi iyu yi ali inggise duu.

¹⁹ Emi okani ka yama kpa mkpa ba na, dzata abɔ ni Imgbasho kpumkpa na abɔn, lubana a lɔ mi Afe gbɛɛ, <<Mkpa okpaakpa li idɔ mgbi ani; n ka yilen kpa,>> Li nga Otse gbo aali.

²⁰ Tatase yɔ, <<Ka nu enbwa dɔ ongyikyili mgbɔɔ hona nu ekweni kwun ba, kpaa nun ungwogye no gye di nun ungwɔ owawa no wa. Kini abu kyo nga yɔ, o gbe angola oyɔɔ tukwun ikye.>>

²¹ Ka yama nu ungwɔ obube nga abu ba, kpaa nga ungwɔ obube yi osuse okyɔɔkyɔ.

13

Sunu ama ogbe esɛ teyi

¹ Ali inggise duu no sunu ama ogbe esɛ teyi kyeme, lubana mfye oka dzema ba sede li ongwɔ Imgbasho kye dze mani. Mfye ama nto esɛ ne duu li Imgbasho ta ma.

² Ikyenghane ama ntuo afɔ esɛ yi mfye ne duu le tuo afɔ esɛ yi ungwɔ ngwi Imgbasho kye dze, ama ndi kyo nga duu a ka gbo ma ikwo.

³ Lubana ama ogbe esɛ teyi yama li sulu owitukwu obube mbi ama nle kyo ali osuse ba, sede mbi ama okyo ali ibwubwe mata. I mina abu odze yi ewo osheta mbi inggise mfye baa? Ngyese kyungwɔ osuse ta o ka tse abu.

⁴ Bana o li ongbidɔ mgbi Imgbasho ikye okyo yi abu saan. Kpaa kini abu le kyo obube yɔ, mio, lubana okwusunkli ngwi

o kye byabo na li ayayi ba. O li ongbido mgbi Imgbasho, o li inggise nka ba yi ado okwookwo mbi ama okyo obube.

⁵ Ikyenghane, li kyeme-kyeme ni abu sunu mfye, li ikye ado okwookwo kyeme ba kpaa dafi itukwu mgbi abu tso abu mani.

⁶ Di li itodze ngwi ema li kpa udza ifyee kpaa ma aani, bana emi mfye ntona a li engbido mgbi Imgbasho, a kyi kyelu ono mgbi ama duu ogbinebyi ese.

⁷ Alungwo ngwi abu sulu inggise ele duu kye nun: kini abu kpa udza ifyee wa bayo, fya no kpa; ni li udza idu oka-ka yo, nu ma ka; ni li mmwe yo, nu mmwe; ni li oshewo yo, nu oshewo.

Tso okpitukwu, lubana Egbe ma Mba

⁸ Ka nu mkpa do abu ikye ba, sede mkpa onu ema kpa ewe itukwu ta, lubana inggise ndi odon kpan itukwu yo, o nu ola mbwumbwo.

⁹ Ola ma gbæ, <<Ka gbo amah ba,>> <<Ka ngwo inggise ba,>> <<Ka yimi ba,>> <<Ka di ungow engye mbe angwo ba,>> ola angbeka nsisi duu a kwulu woke mbonyi gbæ: <<Di inggise ama nwatse do abu kpa abu itukwu dafi ewabu mani.>>

¹⁰ Okpitukwu dze yi ungow obube ikye odon ba. Nghane ni abu dze yi okpitukwu yo, abu ngvelu ola duu.

¹¹ Le kyungwoneni, difwi ono ongwini oneneni. Ono gyo ngwi ema ka kyato mi una onaana, ikyekye owato-wato mgbi eyi nghao dze kwekwe onene nga ababo nose ngwi eyi noyeye mani.

¹² Otu ne ke kpini wa; egbe dze kwekwe ofaafa. Nghane ni eyi dzata ali ama ngwi eyi li kyo ma mi iyifu ntonani di gbe okyiika mgbi osa wo ewo.

¹³ Ni i le kyungwo mi oloola, dafi ngbuo okyo mi ono mani, no ka li mi oga ibwubwe yi ebye ofyaafya ba, no ka li mi amah ba, kale gbongbe hona kyofu yi ewema ba na.

¹⁴ Nghaduu, gbæ Otse iYesu iKrestu wo ewo, dika tsewe ofe ngwi abu ka kyo imina mgbi ali ibwubwe ba.

14

Ka ngwo ewema ikwo ba

¹ Gbela yi inggise ngwu oyeye onuunu mgban fyumfyee ba kpaa, kale natsondu mi ewodze mgbi ama otsetse ba.

² Oyeye onuunu mgbi inggise oka li non gye alungwo duu, kpaa inggise oka ngwu oyeye mgban fyumfyee bayo, li gye afodoo kyoon.

³ Inggise nli gye alungwo duu na no ka di ongwu nli gye afodoo ta na gbæ di o li unka ba ba. Inggise ndi li sadu-sadu ungowogye na, no ka di ongwu nli gye duu na gbæ o dze mi itodze ba ba, lubana Imgbasho gbela yi ama duu.

⁴ Abu li eme ogbo ongbido mgbi inggise oka ikwo? Non wende hona le kyo ayin kpaa li ongyukwo mgban ka ye. Li Otse ka non kyungwo nli ayin gbæ, di li ongyukwo mgban ka nun emyemye aali.

⁵ Inggise oka li di gbæ egbe oka le saan nga oka; inggise oka li di gbæ egbe duu li ungwonyi. Ali inggise no di dafi itukwu mgban nyan mani.

⁶ Inggise nli di egbe oka gbæ i nghao le saan na, le kyo nga okye mmwe nu Otse. Inggise nli gye mmbwe na, le gye ikye okye mmwe nu Otse, lubana o li ta Imgbasho angba; inggise nfwa mmbwe na kpaa, fwa ikye okye mmwe nu Otse di li ta Imgbasho angba.

⁷ Lubana eyi dze oshishe ikye eweyi hona kwulu ikye eweyi ba.

⁸ Kini eyi dze oshishe yo, i dze ikye Otse; kini eyi di kwulu kpaa, i kwulu ikye Otse. Nghane, ni eyi dze oshishe hona kwulu kpaa, eyi li mgbi Otse.

⁹ Li itodze ne yeye ngwi iKrestu kwulu diye kyee ikyegbæ ni ongwu li Otse mgbi emi ikwukwo yi emi oshishe duu aali.

¹⁰ Ema ma, li ikye ekye ngwi ema le ngwo emi ongunema ikwo? Hona kyone ngwi ema le di ongunema gbæ a li unka ba? Lubana egbe kyema ngwi Imgbasho ka gbo eyi duu ikwo.

¹¹ Ikyesine Otse gbo mi Afe gbæ, <<Ani fa mi oshishe mgbi ani gbæ ali akwafo duu ka kwese nu ani, ali ide dika kyo obwende kye otsetse nu Imgbasho!>>

¹² Inghawane, ali inggise duu ka wa gbo ungow ngwi otungwonon kyo nya Imgbasho.

¹³ Nghane ni eyi nya ogbo eweyi ikwo. Tatase, fya kyo ali nka wo ongunabu ekle ba mani.

¹⁴ Ngwi ani dze mi ifu Otse iYesu ne, n difwi saan gbæ ungowogye onyi ka nu ani tsiidza ba. Nghaduu ni inggise di gbæ ungow tsiidza yo, i tsiidza mbon sewaali.

¹⁵ Kini ongunabu le tu ese ogboogbo mi ungow ngwi abu le gye yo, okyockyo mgbi abu tso okpitukwu wuba. Ka yama nu ongunabu ongwu iKrestu kwulu ikyon dzili ikye ungow ogyeegye mgbi abu ba.

¹⁶ Ka noofe ni inggise gbodze obube kwu iyi ungow ngwi abu di gbæ li osuse na ba.

¹⁷ Bana esuto mgbi Imgbasho li ungow ogyeegye hona ungow owaawa ba, kpaa li osaan, li iyu beyi atsa mi Onodzi Osaan.

¹⁸ Ni inggise kyo iKrestu ido mi ito ofe ne yo li kpa Imgbasho, di li kpa inggise kpaa.

¹⁹ Ni eyi fya mi ofyaafya mgbi eyi duu okyungwo nka ba yi iyu, di tobyi eweyi ikye ni eyi fyumfyee mi oyeye onuunu mgbi eyi mani.

²⁰ Ka yama kyi mbelu ido mgbi Imgbasho ikye ungowogye ba. Ali ungowogye duu li

osuse, kpaa li ayin ba ni abu gye ungwɔ nka nu inggise oka ese ogboogbo yɔ.

²¹ Tatase ogye mmbwɛ, naadi wa eneekwɔ hona kyɔ unkoka nka nu ongwunabu ese ogboogbo ba mani.

²² Oyeye onuunu ngwi abu tulun mi ungwɔ ntonɛ ma no li abu yi Imgbasho efa ta. Mse dze yi inggise ndzɛ yi itukwu efefa ba mi ungwɔ ngwi o gbela okyɔ mani.

²³ Nghaduu inggise ngwu itukwu dzan efefa mi ungwɔ ngwi o le gye yɔ a ngwɔn ikwɔ, ikyekyɛ o gye yi oyeye onuunu ba. Alungwɔ ngwi inggise kyɔ mi oyeye onuunu ba duu li alobube.

15

¹ Eyi ama oyeye onuunu mgbi eyi fyumfye nɛ, ni eyi tobyi ama nfyumfye ba ntonani. Ni eyi kale kyungwɔ okpa eweyi kyoona ba.

² Ni eyi duu kyungwɔ nka kpa ama nwatse do eyi ikye oyabo mgbi ama di fyumfye itukwu mi oyeye onuunu mgbi ama.

³ Lubana iKrestu abuan kpaa kyungwɔ gbɛɛ no kpa ewon ba, dafi Afe gbo mani gbɛɛ, <<Ito ngwi a le fya abu Imgbasho ma li ani ngwu a le fya.>>

⁴ Bana alungwɔ ngwi a lo mi Afe tugbe duu li ikye otso di nu eyi itukwu ofyumfye adzi ni eyi gbekabyi.

⁵ Ni Imgbasho nli nu itukwu oshiishi di kwu inggise ewe wo na nu ema onodzi odzɛ ondonyi ngwi ema le kyɛdo iKrestu iYesu nɛni,

⁶ adzi ni ema tɛ Imgbasho Otso iYesu iKrestu Otse mgbi eyi mi ondonyi yi itukwu onyi mani.

⁷ Gbela yi ewema na, yeye dafi iKrestu gbela yi ema nɛni, ikye ni iyi Imgbasho gye oshewo.

⁸ Bana n nya ema gbɛɛ iKrestu ba dafi ongbido mbi emi iJuda ikye otso gbɛɛ Imgbasho kyɔ ondu ngwi o dze yi emi ot-sikyoma mani

⁹ adzi ni Udzengye kye iyi Imgbasho desho mi elela ngwi o di ma nani, bana Afe lo gbɛɛ,

<<Ikyenghanɛ n ka tse iyi abu mi idzidze Udzengye; N ka shashi mi iyi mgbi abu.>>

¹⁰ Afe di lo gbɛɛ, <<Ema Udzengye tsatsa yi emidi Imgbasho na.>>

¹¹ A di lo gbɛɛ, <<Inggise mi ese duu nu ma kyile iyi Otse desho di shin ashi mmbwɛ.>>

¹² Adzaya di lo gbɛɛ, <<Mi inyabyi mgbi ijese, inggise ka wa to mi ele nka li uto mi ese duu; Udzengye duu ka gbɛwɛbyi mbon.>>

¹³ Ni Imgbasho nli nu ewe ogbe byiibi ni mbwo ema yi atsa beyi iyu dafi ema nun oyeye nɛni, ikye ni ewe ogbe byiibi mgbi ema mbwo mi mfyɛ mgbi Onodzi Osaan.

IPol inggise ogbeeso nya Udzengye

¹⁴ Emi ongwunani, ani abuen kpaa n gbela gbɛɛ ema li kyɔ osuse kpakpa di sulu oyeye di mɛ otso ewema.

¹⁵ Ani lo afe nya ema mi itodzɛ angbeka saan, n diye le wɛ ema, ikye elela ngwi Imgbasho di ani nɛni.

¹⁶ O dulu ani oli inggise ogbeeso mgbi iKrestu iYesu nya Udzengye di kyido mgbi inggise ofife ogbo Eso Osuse mgbi Imgbasho, ikye ni Udzengye yɛɛ umba osuse ngwi Imgbasho gbela yan, ngwi Onodzi Osaan kyi salu ma mani.

¹⁷ Ikyenghanɛ n dze yi abɔ otsigegɛ mbi iKrestu iYesu mi ido ngwi ani le kyɔ Imgbasho ele nɛni.

¹⁸ N ka yama kyɔ odzasha ogbɔdzɛ oka idzidza ba sede ungwɔ ngwi iKrestu kyɔ nyɛ ikpewo ani ogbe Udzengye teyi nu ma sunu Imgbasho mi ungwɔ ngwi ani gbo diye kyɔ mani,

¹⁹ mi mfyɛ mgbi ambe yi ungwɔ ama okwulewo, mi mfyɛ mgbi Onodzi Osaan. Ng-hanɛ wita mi iJerosalin nghataa lu ililikun n gbo Eso Osuse mgbi iKrestu nɛ saan.

²⁰ Teyi li imina mgbi ani ogbo Eso Osuse mi imbe ngwi a ye iKrestu waba, adzi nin wa le mbe dɔke itozu mgbi inggise oka ba mani.

²¹ Nghaduu dafi a lo mi Afe mani gbɛɛ, <<Ama ngwu a teyi nya ma odzɛ mghan waba ka wa din, beyi ama nteyi fwo waba kpaa ka tu osa.>>

²² Li itodzɛ nɛ ngwi ani li tu onɔ oka kpadi ema ba aali.

Oweka mgbi iPol oke iRoma

²³ Nghaduu onenɛ ngwi ani sulu imbe okyido mi ayese ntonɛ wuba, ngwi i di dze ani itukwu onova ibyibi odi ema nɛ,

²⁴ n weka onyɛ kpadi ema onɔ ngwi n kale ke iSpen mani. Tonya di kyɔ atsa yi ema ongwono gwee adzi ni ema yen abɔ mi okyɛɛ mgben.

²⁵ Ngwi i dze nga duu nɛ kpaa, n dze ofe le lu iJerosalin oka tobyi emi osaan.

²⁶ Lubana i kpa emi iMasidonia yi emi Acaya onu umba ikye emi osaan ndzɛ abubu mi iJerosalin.

²⁷ A kyɔ yi atsa, mi otsitsi yɔ i gbuo ngwi a ki kyɔ nga yi ama. Lubana ni Udzengye tu mse ongwɔ onodzi mbi emi iJuda yɔ, ama kpaa i gbuo nu ma kyi ghalu ungwɔ ama ngwi a sulun ma yi emi iJuda.

²⁸ Nin kye awuya nɛ nu ma ngyɛ yɔ, n ka nyɛ kpadi ema se wa lu iSpen.

²⁹ N ye onɔ ngwi ani ka ba mbi ema ma, n ka kye yi mse mgbi iKrestu kyɛɛ.

³⁰ Emi ongwunani, n tɛkyɛ nu ema mbi Otse iYesu iKrestu beyi mi okpitukwu mgbi Onodzi gbɛɛ, bo Imgbasho ibo kpoklɔo mi ikye ogbili-gbili mgben nɛni.

³¹ Bibo ikye nin wato mi abo emi iJudia ama nnoyeye ba, ni emi osaan mi iJerosalin di gbela yi ido ngwi ani le kyo,

³² adzi ni Imgbasho nin ofe nin ba mbi ema yi atsa, adzi ni eyi kwu eweyi ewe wo.

³³ Ni Imgbasho onu iyu na dze yi ema duu. No dze nga.

16

Angba mgbi ikyiben

¹ N tse ongwuneyi ongwu ongyaa iFoebe, nli ongyido mi okwakyie mgbi emi iKrestu mi iSenkria nani.

² N le gbæ ni ema gban dafi i gbuo ogbæ inggise nnoyeye mbi Otse di yan abo mi onɔ ngwi o mina oyabo mbi ema mani, lubana o tobyi inggise kwuba, ani abuen kpaa.

³ Ta iPrisila yi Akwila angba, ama nle kyido iKrestu iYesu yi ani ungwonyi ntanani.

⁴ A kye oshishe mgbi ama lasɛ ikye ani kpaa. Okwakyie mgbi emi iKrestu mi Udzenge duu gbade nu ma li ani yuwen ba.

⁵ Ta emi iKrestu ama nli kwakyie mi ude ma na kpaa angba. Ta Epenetu okani itukwu-tukwu nli inggise ababo okyati-tukwu mi ayese mgbi Asia luba iKrestu na kpaa angba.

⁶ Ta iMeri nli kwunewo ido ikye ema na angba.

⁷ Ta Androniko yi iJunaya emi oden, ama nkaka obawi yen na angba. Ama ogbikyie iYesu li nu ma mmwe nngwashaba, a di teyi ani dze mi ifu iKrestu kpaa.

⁸ Ta Ampliyatu nkpa ani itukwu mbi Otse na angba.

⁹ Ta Ubanu ngwu nkwokeyi abo yi eyi mi ido iKrestu na angba, di ta okani imo iStaci angba.

¹⁰ Ta Apele ongwu a mbadin di gbela yan mi ifu iKrestu na angba. Ta emidi Aristobulu angba.

¹¹ Ta oden iHerodion angba. Ta emidi iNasiso ama nto mi ifu Otse ma angba.

¹² Ta iTrafena yi iTrafosa engyaa ama nkya Otse ido kpoklɔɔ na angba. Ta okani imo iPesi, ongyaa oka ndi kwunewo ido mi ifu Otse na angba.

¹³ Ta iRufu ngwu Otse dulun na, beyi onon n yee dafi onani kpaa na angba.

¹⁴ Ta Asinkrito, iFlegon, iHeme, iPatroba, iHema beyi emi iKrestu ama nto yi ama ma angba.

¹⁵ Ta iFyilologo yi iJulia yi iNelio beyi ongwunon ongwu ongyaa, di ta Olimpa beyi emi osaan ama nto yi ama duu angba.

¹⁶ Ta ewema angba tsekwlulu ewema na. Okwakyie emi iKrestu duu le ta ema angba.

¹⁷ N le tekye nu ema emi ongwunani gbæ, ni ema gbewehyi ama nli ba yi ogbua-gbua di li wo ema ekle yi otsootso nnye idzidza yi otsootso ngwi ema teyi kpayi nani. Fyata yi ama.

¹⁸ Lubana ito inggise ntona yama le sunu Otse iKrestu mgbi eyi ba, kpaa a le kyo ikye ifu mgbi ama. A li kpagya ogbadro wo yi ondu ofyumfya mgbi ama.

¹⁹ Ali inggise duu fwo dafi ema li siikyenu mani, nghanɛ n dze yi atsa kpakpa ikye ema; nghanɛ n dze yi atsa kpakpa ikye ema; nghanɛ n dze yi atsa kpakpa ikye ema; nghanɛ n dze yi atsa kpakpa ikye ema.

²⁰ Imgbasho iyu na ka dziye iSatan dzikan-dzikan ni ema kye afɔ dzin. Ni elela mgbi Otse iYesu mgbi eyi dze yi ema.

²¹ ITimoti ngwu eyi le kyido yi eka, deso angba mbi ema, li nga ngwi iLusio yi iJacon beyi iSospata emi odo ani ntone kpaa deso angba aali.

²² Ani iTedio, nlo afɛ nɛ, le ta ema angba mbi Otse.

²³ IGayosu, inggise oshabota ngwu ani yi emi iKrestu duu tu mgbede mbon na, le ta ema angba. Erasto, nli di mi ali ido mi ogalu na yi ongwuneyi iKwatu tole ta ema angba.

²⁴ Ni elela mgbi Otse iYesu iKrestu mgbi eyi dze yi ema duu. No dze nga.*

²⁵ Ba ni eyi kye oshewo nu Imgbasho Ongwu n yagba nu ema kwudze kpoklɔɔ mi oyeye onuunu mgbi ema, dafi Esɔ Osuse mgbi iYesu iKrestu lo ngwi ani gbo kwulu iba ungwɔ odaada ngwi a kye da onɔ tunto nya ema neni.

²⁶ Nghaduu onenɛ i fwi to a di yen mi ungwɔ olɔɔɔ mgbi ama ogbæse mi ola ngwi Imgbasho ogyegwu na wo mani, adzi ni ese duu noyeye di siikyie nun.

²⁷ Ni okwakwo dze mbi Imgbasho nkwiine yuon na mi ikpewo iYesu iKrestu gyegwu-gyegwu! No dze nga.

* 16:24 16:24 Ambulu nɛ dze mi olɔɔɔ angbeka ba

Afe mgbi iPol ongwɪ ababɔ mbi ama onoyeyɛ Emi iKorinti

¹ Afe nɛ kye mbi ani iPol ngwu Imgbasho kwu ani ela mi oweka mgban gbɛɛ ni ani li inggise ogbikyɛ iKrestu iYɛsu bɛyi iSɔstɛnɛ ongwuneyi nɛni.

² Ani le lɔ kɛ mbi emi odzimgbasho mi iKorinti, mbi ama ngwu a salu ma mbi iKrestu iYɛsu diyɛ kwu ma ela owa yɛɛ saan, bɛyi ama nli kwu mi iyi mgbi iYɛsu iKrestu mgbi eyi mi ali imbe duu gbɛɛ, Otse mgbi ama bɛyi mgbi eyi nani.

³ Elela bɛyi iyu nkyɛ mbi Otseyi Imgbasho bɛyi Otse iYɛsu iKrestu na no dɛɛ yi ema.

Angba otaata

⁴ Ani li ta Imgbasho angba alɔɔ duu ikyɛ ema mi ikyɛ elela ngwi o kye nu ema mi ikpewo iYɛsu iKrestu nani.

⁵ Lubana li mbon ngwi ema yɛɛ aludu mi ali ito ofɛ duu, mi odɛɛ ogbɔɔgbɔ bɛyi ozoyeyɛ mgbi ema aani,

⁶ Ikyɛna obwendɛ mgbi eyi ikyɛ iKrestu to gedɛɛ mbi ema.

⁷ Nghane ema kwoba yi umba mgbi onodzi ba dafi i dɛɛ ema kwɔkwɔ mi oyɛɛyɛ mgbi iYɛsu iKrestu nani.

⁸ O ka nu ema mfye nghataa kɛ ongyɛngyɛ, zukwu ni a wa di ema yi obube mi egbe ngwi Otse mgbi eyi iYɛsu iKrestu ka ye na ba mani.

⁹ Imgbasho nkwi abu ela kaka okwakye-kwakye yi ongan iYɛsu iKrestu Otse mgbi eyi na li otsitsi.

Obgua-gbua mbi emi iKrestu

¹⁰ Emi ongwunani mi ifu iKrestu, n le tɛkyɛ nu ema mi iyi mgbi Otse iYɛsu iKrestu gbɛɛ ni ema gbɛla yi ewema. Ka gha yi ewema ba. Ɖwɛ otɛɛtɛɛ yi ungwɔ okyɔɔkyɔ mgbi ema no tso gbɛɛ ema dɛɛ ondonyi.

¹¹ Emi ongwunani mi ifu iKrestu, n fwo mbi inggise angbeka mi ude iKlio gbɛɛ ema le kyo odɛɛ oshiishi yi ewema.

¹² N fwo di ema angbeka le gbɛɛ, <<Ani le kyɛdɔ iPol>> oka gbɛɛ, <<Ani le kyɛdɔ Apolo>> oka gbɛɛ, <<Ani le kyɛdɔ iKɛfa>> oka di gbɛɛ, <<Ani le kyɛdɔ iKrestu.>>

¹³ iKrestu ghaa? Li iPol ngwu a gbokwo mi ekwatsi gbɛɛ no kwikwu ikyɛ ali ibwubwe mgbi emaa? Naadi li iyi mgbi iPol ngwi a kyo ema iBatisima?

¹⁴ N ta Imgbasho angba ikyɛkyɛ ani kyo inggise onyi kpaa iBatisima ba, li iKrispu bɛyi iGayosu kyoon,

¹⁵ nghane inggise onyi ka yagba gbɛɛ di a kyo ema iBatisima mi iyi mgbi ani ba.

¹⁶ (N wɛ dafi li eto mgbi iStefana kyoon ta ngwi ani kyo ma iBatisima mani, n yagba wɛ ni ani kyo eto oka ba.)

¹⁷ Lubana iKrestu yama dɔ ani ɛsɔ owa kyo iBatisima ba, kpaa li ogbɔ Ɖsɔ Ɖsuse yi ozoyeyɛ mgbi inggise owamye ba. Ikyɛ ni mfye mgbi iKrestu mi ekwatsi na no ka yɛɛ ayayi ba mani.

IKrestu li ozoyeyɛ yi mfye mgbi Imgbasho

¹⁸ Lubana ɛsɔ ogbɔɔgbɔ mgbi ekwatsi li dɛɛ too mi adɔ mgbi ama nle dzili mani, nghaduu mbi eyi ama nwato yo, ɛsɔ na li mfye mgbi Imgbasho.

¹⁹ Afe gbɛɛ, <<N ka kyi mbɛlu ozoyeyɛ mgbi inggise ama okwiine mani. Ama ntɛwɛ gbɛɛ ama ye nyɛɛ na n ka wo ma endɛ.>>

²⁰ Inggise okwiine ma kɔ? Inggise okpayi ungwɔ ma kɔ? Ama okya mi odɛɛ ongwɪ egbe nɛ ma kɔ? Imgbasho tso gbɛɛ ozoyeyɛ mgbi ɛɛ nɛ li ikwangha daabaa?

²¹ Lubana Imgbasho mi ozoyeyɛ mgban nu inggise difwi ongwu mi ozoyeyɛ mgbi inggise owamye ba. Tatase ma yo, li mi ɛsɔ ngwi eyi le gbɔ ngwi a le kwun di ikwangha ungwɔ nɛ ngwi Imgbasho nu ama nnoyeyɛ mi ele wato aani.

²² Emi iJuda mina ambɛ okwulewo, kpaa emi iGriki mina ozoyeyɛ.

²³ Nghaduu eyi le gbɛɛsɔ mgbi iKrestu ngwu a gbokwon nani: O li ikwutɛ otsiishi mgbi emi iJuda di li ikwangha ungwɔ mbi Udzengye,

²⁴ nghaduu mbi ama ngwu Imgbasho kwu ma ela mi idzidɛɛ emi iJuda bɛyi iGriki yi, iKrestu li mfye bɛyi ozoyeyɛ mgbi Imgbasho.

²⁵ Lubana ikwangha mgbi Imgbasho ngha ozoyeyɛ mgbi inggise, ewo odzaatsi mgbi Imgbasho fyumfyɛ ngha ɛnɛpɛ mgbi inggise.

²⁶ Emi ongwunani, tɛwɛ ito inggise ngwu ema dɛɛ duuse ngwi a wa kwu ema ela mani. Li ema tsatsa kwiine mi odɛɛdɛɛ mgbi inggise ba; li duu fwiayi ba; li ema duu a mba ema mi aludu ba.

²⁷ Nghaduu Imgbasho sadu ungwɔ ama ɛɛ li kwu ma di ikwangha ma ikyɛ onu ama oyodɛɛ ayiwi. O di sadu ungwɔ ama ndɛngyɛ emi ɛɛ nɛ ikyɛ onu emi mfye ayiwi.

²⁸ Imgbasho sadu ungwɔ mgbi ɛɛ nɛ ama ngwi a kwushanyɛ bɛyi ungwɔ ngwi a kye wuuta ba, bɛyi ungwɔ ngwi a kye ma gbɛɛ li unka ba ma ngha ungwɔ ama emi ɛɛ nɛ di gbɛɛ li ungwɔ imɔ mani,

²⁹ ikyɛ ni inggise onyi ka tsa abigege yan ba.

³⁰ Li mi ikyɛ Imgbasho ngwi ema dɛɛ mbi iKrestu iYɛsu aani, ongwu n yɛɛ ozoyeyɛ

mgbi eyi nkye mbi Imgbasho nli onyaan yi osaan mgbi eyi di li owato-wato mgbi eyi aani.

³¹ Ikyenghane, Afe lo gbæ, <<Inggise nka tsaabo igegè yò, no tsaabo igegè mbi Otse.>>

2

IPol gbeeso mgbi iKrestu ongwu a gbokwon mi ekwatsi

¹ Emi ongwunani mi ifu iKrestu, onò ngwi ani ba mbi ema ma n yama fwi iba mgbi Imgbasho nya ema yi ondu omyemye hona yi ozoyeye odatu ba.

² Lubana ngwi ani dze yi ema ma, n mina oye unkoka ba, sede li ogbeeso mgbi iKrestu yi ikwu mgban mi ekwatsi kyoon.

³ Nose ngwi ani ba mbi ema ma n dze dafi ndzinubu mani, yi imio ewo kpakpa.

⁴ Elodze ngwi ani gbeeso mi ele li elodze mgbi ine okwuukwu hona elodze ogyila inggise ba, kpaa li mi abumfye mgbi Onodzi,

⁵ adzi ni oyeye onuunu mgbi ema no ka dze mi ozoyeye mgbi inggise owamyè ba, kpaa no li mi mfye mgbi Imgbasho.

Iba nkye mi Onodzi mgbi Imgbasho

⁶ Nghaduu, eyi li gbeeso mgbi ozoyeye yi ama nmyotse mi onodzi mani, kpaa li mi ozoyeye ongwí èsè nè hona mgbi uto ongwí egbe nè ngwu ozoyeye mgbi ama le wa byulu na ba.

⁷ Kpaa, ozoyeye ngwi eyi le gbo nè, li ozoyeye mgbi Imgbasho ndze mi odaada ngwi inggise yon ba, kpaa Imgbasho abunon kye dzeke mi okwòkwò mgbi eyi se a kwuma ta èsè.

⁸ Ama oteyi èsè onyi kpaa difwi ozoyeye nè ba, a ki difwi yò, a ki yama gbokwo Otse mgbi okwòkwò mi ekwatsi ba.

⁹ Nghaduu, Afe lo gbæ: <<Ungwò ngwi ine din ye waba, ngwi ado onyi fwon waba, ngwi itukwu onyi kpaa tsewè gbæ ka kyo ba mani, li ungwò ngwi Imgbasho kyi melu dzeke ikye ama ndin kpa ma itukwu ma aali.>>

¹⁰ Nghaduu Imgbasho kye tso eyi nye mbi Onodzi mgban. Onodzi na li ye alungwò duu kwo yi ungwò ama nlu kpini mbi Imgbasho kpaa.

¹¹ Lubana li eme ka ye ewodze ongwí itukwu mgbi inggise? Sede li onodzi mgbi inggise nani, li itò ofe na yeye ngwi inggise onyi ka ye ewodze mgbi Imgbasho ba aali, sede li Onodzi mgbi Imgbasho ta.

¹² Eyi yama gbe onodzi ongwí èsè nè ba, kpaa li Onodzi nkye mbi Imgbasho adzi ni eyi tu osa mi ungwò ama Imgbasho gbe nu eyi ayayi neni.

¹³ Nghane eyi le gbòdze mi ewè otseetse mgbi inggise owamyè ba, kpaa li mi ewè otseetse mgbi Onodzi mgbi Imgbasho. Di li

Onodzi nè kpòò li nu eyi tse ungwò ongwí Onodzi nya inggise ama nto mi onodzi aani.

¹⁴ Nghaduu inggise ndze yi Onodzi Osaan na bayò, ka gbela ungwò nkye mbi Onodzi mgbi Imgbasho na ba, ikyesine a li ayayi ungwò mbon, dika gbosa lon kpaa ba, ikyekye a li ungwò emi onodzi.

¹⁵ Inggise ndze mi onodzi yò, ka yagba fwo alungwò duu ikwò, kpaa ongwu abunon yò, inggise onyi ka yagba fwon ikwò ba.

¹⁶ Lubana Afe gbæ, <<Li eme ye ow-itukwu mgbi Otse ngwi otsungwòn ka wan odze?>> Nghaduu eyi dze yi itukwu mgbi iKrestu nani.

3

Ogbua-gbua mbi emi iKrestu

¹ Emi ongwunani, n yagba gbòdze yi ema dafi inggise ama nto mi Onodzi ba, kpaa dafi inggise emi èsè nè mani, ikyekye ema to dafi engweyeyi mi ifu iKrestu.

² Ani nu ema enaabe, li ungwogye okpòkò ba, ikyesine ema me mi ele ba. Nghataa ba onene kpaa, ema me waba.

³ Ema ka li emi èsè. Lubana ngwi uwaba yi odze oshiishi ka dze idzidze ema nè, ema li emi èsè daabaa? Ema le kyo dafi emi ewewè bana?

⁴ Bana ni inggise le gbæ, <<N le kyedò iPol,>> oka dile gbæ, <<N le kyedò Apolo ma,>> ema le kyo dafi emi ewewè daabaa?

⁵ Nghama li eme li Apolo? Li eme di li iPol? Eyi li engbido mgbi Imgbasho ta aani. Li ikpewo eyi ngwi ema noyeye, dafi Otse kye wo eyi abò gbæ ni eyi kyo mani.

⁶ Ani kya etò, Apolo yawo eni, kpaa li Imgbasho non she.

⁷ Nghane inggise nkye kya yi ongwu n yawo eni ma li unka ba, kpaa li Imgbasho yuon, nli nu ungwò she nani.

⁸ Inggise nkye ye beyi ongwu yawo eni na duu le kyidò ungwonyi. Ali inggise dika gbe umba mi odzèdze dze mgban.

⁹ Lubana eyi li ama okyido yi Imgbasho; kpaa ema yò li okwò mgbi Imgbasho. Ema di li ozu mgbi Imgbasho kpaa.

¹⁰ Mi elela ngwi Imgbasho di ani ma, ani wo itozu dafi inggise n ye ozu ombèmbè saan mani, ta inggise oka le mbe dake ele. Nghaduu ali inggise nle mbe duu no mbe mi ozoyeye.

¹¹ Lubana inggise onyi ka yagba wo itozu oka idzidza yi ongwí Imgbasho tsekise wo nli iYesu iKrestu nè ba.

¹² Ali inggise nkye abashi, hona iyudza onzundze hona akwutse ofyunfyumya hona ekwò hona enggwò naadi angganggò, le mbe dò itozu nè duu,

¹³ a ka kye idò mgban tso dafi i dze mani, ikyekye Egbe na ka kye dò ododa. A ka kye

mbadi mi ola, man ola ka tso odzēdzē ido mgbi ali inggise duu.

¹⁴ Inggise ngwu ido mgban gyola bayo, o ka gbē umba.

¹⁵ Kpaa ni i gyola yo, o gyadze labo; ongwu abuan a ka dulun to, nghaduu o ka wato dafi inggise nwato mi amoola mani.

¹⁶ Ema ye dafi ema abuema li ozu mgbi Imgbasho, Onodzi mgbi Imgbasho di wodze mbi ema ma we?

¹⁷ Ali inggise nkyi mbelu ozu mgbi Imgbasho yo, Imgbasho ka dzilin. Lubana ozu mgbi Imgbasho le saan, ema abuema li ozu nani.

¹⁸ Ka yama kpaagya ewema wo ba. Ki inggise mi idzidze ema tsēwe gbē ongwu yodze mi odzēdzē mgbi ēse ongwu onene yo, no yē <ikwangha> adzi no wa yē inggise okwiine.

¹⁹ Lubana ozoyeye mgbi ēse nē li ikwangha mbi Imgbasho. Dafi Afe lo mani gbē, <<O li bwa ama okwiine mi angwe mgbi ama.>>

²⁰ Afe di gbē, <<Otse ye dafi ēwe otsetse mgbi ama okwiine li ayayi mani.>>

²¹ Ikyenghane, ka kye odzēdzē mgbi inggise tsaabo igegē ele ba! Alungwo duu li mgbi abu,

²² ni li iPol hona Apolo hona iKefa naadi ēse hona oshishe naadi ikwongye naadi onene hona iyayi duu li mgbi ema,

²³ ema li mgbi iKrestu, iKrestu li mgbi Imgbasho.

4

Ama ogbikye iKrestu

¹ Ikyenghane, ema di eyi dafi engbido mgbi iKrestu yi ama ngwu a kye ido odaada mgbi Imgbasho wo eyi abo gbē ni eyi gbo mani.

² Onene a mina gbē ama ngwu a kyi ido wo ma abo ma, li kyeme nu ma le kyon mi otsitsi.

³ Ni ema hona opiikwo gbo ani ikwo kpaa li itodze ba. Mi otsitsi yo, ani abuen kpaa li gbo ewani ikwo ba.

⁴ Itukwu mgbi ani le saan, kpaa nana tso gbē ani le saan bese ba. Li Otse li ongye ogbo ani ikwo.

⁵ Nghane ka fwo inggise onyi ikwo duuse ni onō ma gyo ba; fē nghataa ni Otse ye se. O ka kye ungwo ndze mi iyifu beyi itukwu inggise do ododa. Li mi onō na Imgbasho ka tse ali inggise ngwo ngwi o ka tsan aali.

⁶ Ikyenghane emi ongunani, n kye ewani yi Apolo tso ambe ikye oyabo mgbi ema, adzi ni ema di ambe mbi eyi mi odze ngwi a gbogbē, <<Ka foola mi ungwo ngwi a lo dze ese nē ba.>> Ta ema ka nya ogbē inggise oka ngha oka.

⁷ Lubana li emē nu ema tatase nga angbeka? Li alungwo ngwi abu dzeyan se ngwi a kye nu abu nuunu ba? Ma ni a kye nu abu nuunu waali, kyosinese abu le tsaabo igegē?

⁸ Ema teyi dze yi alungwo ngwi ema mina wa! Ema teyi li emi awuya wa! Ema yē uto, ngwi eyi li uto ba nē kpaa? I mina ani gbē ema ki yē uto otsitsi, zukwu ni eyi kpaa yē uto yi ema!

⁹ Lubana i dzen gbē Imgbasho kye eyi ama ogbikye iYesu dzeke imbe nnghao yeyikpa duu mani. Eyi to dafi inggise ngwu a ngwo ma ikwo kye ma le ka ngwo mi ododa mani. A nu eyi yē imbe okwakye mi inē engyeso beyi inggise mi ēse duu.

¹⁰ Eē di eyi gbē eyi li ikwangha ikye iKrestu, kpaa ema yo iKrestu nu ema kwiine! A di gbē eyi le sheshe, kpaa ema yo ema fyumfyē! A li kwu eyi shanyē, nghaduu a li nu ema mmwe!

¹¹ Nghataa ba obyī neni eyi dze enbwa yi ekweni ifu, eyi le to ishangli; a kyodulu eyi kpakpa, eyi dze yi ude ba.

¹² Eyi li kyido kpakpa mi abo mgbi eyi. Ono ngwi inggise wo eyi ikamba yo, eyi li kye mse bē ma ewo; ono ngwi a nu eyi iso ma, eyi li shitukwu;

¹³ ono ngwi a fya eyi ito, eyi li nu uka yi elodze oleewo. Nghataa ba oneneni a kye eyi yē ungwo isha, eyi dze dafi ishibe mgbi ēse neni!

¹⁴ N le lo ema afe nē, li ikye onu ema ayiwi ba, kpaa li ikye okwo ema ado, dafi emi ongwani ama osuse mani.

¹⁵ Lubana ni ema sulu ama ogbekabyi ema idubu iwoyo mi ifu iKrestu kpaa, otsema li ibyibi ba. Ikyesine mi ifu iKrestu iYesu yo, ani yē otsema ikpewo Eso osuse neni.

¹⁶ Nghane n le tekye gbē ni ema kye afo ani.

¹⁷ Mi itodze nē n le do ongwani itukwu-tukwu ongwu nnoyēye mi ifu iKrestu, iTi-moti, eso mbi ema. O ka wē ema ofe oshishe ngwi ani dze ele mi ifu iKrestu iYesu kwokyi yi ungwo ani tso mi okwakye mgbi emi iKrestu mi ali imbe duu mani.

¹⁸ Ema angbeka yē ama okyile ewo esho, ikyekye ema tsēwe gbē ani kyema kawa kpadi ema ba.

¹⁹ Nghaduu ni Otse gbela yo, n ka ba mbi ema dzikan-dzikan, ta n ka difwi dafi ama okyile ewo esho le gbodze ma ta ba, kpaa ito mfye ngwi a dzeyan mani.

²⁰ Lubana esuto mgbi Imgbasho li odze ondu ta ba, kpaa li mi abumfyē.

²¹ Li ole ka nghao kpa ema? Nin ba mbi ema yi onitse naadi okpitukwu yi itukwu iyu?

5

Idza mi ifu emi iKrestu

¹ A wa kwelikwō gbē amah idza le kiyayi mi idzidze ema, ito ngwi ama n ye Imgbasho ba jokpaa li kyon ba mani: inggise oka le la yi owa otson.

² Ma ema le tsaasha! Tatase ema kile buntse di dulu ongwunema nkyungwōne ma to mi idzidze ema ba naa?

³ Dafi ani dze yi ema ine-ine ba ne kpaa, n dze yi ema mi onodzi, n di fwo inggise nkyungwōne ma ikwō kpaa wa, yeye dafi n dze yi ema mani.

⁴ Ono ngwi ema kwakye mi iyi mgbi Otse mgbi eyi iYesu ma, ani dze yi ema mi onodzi, mfyē mgbi Otse mgbi eyi iYesu di dze yi ema.

⁵ Kye inggise ne wo iSatan abo na, adzi ni a dzili odzēdze mgban mgbi mmbwe yi eyi, ni onodzi mgban wa wato mi egbe ngwi Otse ka ye mani.

⁶ Ewo okyile esho mgbi ema na tishi ba. Ema ye dafi ongwē okwuna gwee kpaa li gbelu ofumbu so ma wē?

⁷ Kyi dulu okwuna alobube ogbugbe na mbi ema zukwu ni ema dze dafi ofumbu ofufe ngwi a kye okwuna wele ba mani, di li ungwō ema dze kpaa aali. Lubana a kye iKrestu, Ongwumala oga owē owato-wato mgbi eyi fife wa.

⁸ Nghane ni eyi ka kyo Oga ne yi okwuna imbaali yi ali ibwubwe ba, kpaa no li mi ogye okwuna mgbi emyemye beyi otsitsi nani.

⁹ Ani teyi lo ema afe gbē ni ema ka kwakye yi emi amah ba.

¹⁰ Nghaduu n kyinebyi emi esē ne ama nle kyo amah hona le kyo nggwō di yimi naadi sunu angwula ntona ba. Ni li ngha yo ka tso gbē ema ka dzata esē neni.

¹¹ Kpaa ani le lo nya ema gbē ni ema ka yama be ewo yi inggise nkwi ewon gbē ongwu li inggise onoyeye kpaa widza hona li kyo nggwō hona li sunu angwula hona li inggise ombe inggise iyi hona li fyebye naadi yimi na ba. Ka kye abo wo uga yi ito inggise na kpaa ba.

¹² Li ido mgbi ani ofwo emi esise ikwō ba. Kpaa li ido mgbi ema ofwo ama nli emi iKrestu se kale kyo obube mi ito ofe ne ma ikwō.

¹³ Imgbasho ka fwo emi esise ikwō. Kpaa ema yo Afe lo gbē, <<Lo inggise obube na tase mi idzidze ema na.>>

6

Emi iKrestu kwu eka elikwō

¹ Kini inggise mi idzidze ema sulu okakewo yi oka ma, o ka kyon kwelikwō

mbi ama oye Imgbasho ba ntona naa o ka kyon ke mbi emi odzimgbasho?

² Ema ye dafi li emi osaan ka gbō esē ikwō lo? Ma ni li ema ka gbō esē ikwō wali, li ambuluo odze ntonē ngwi ema ka mē gbē ba deen?

³ Ema ye dafi eyi kawa gbō engyeso ikwō wē? Se ka fwikye ungwō ongwī esē ne!

⁴ Nghane, kini ema sulu okakewo ito ntonē yo, yeba ni li inggise nfyumfyē mi iKrestu ba kpaa nu ma dulun no gbiikwō nani!

⁵ N le gbōdze ne ikye onu ema ayiwi. Ema sulu inggise onyi ongwu nkwiine mē ogbō ama onoyeye ikwō mi idzidze ema baa?

⁶ Nghaduu engwuneka mi ifu iKrestu le kye ewoma kwelikwō mbi ama onoyeye ba!

⁷ Ikyegbē ema sulu okakewo mi idzidze ema ne i tso saan gbē odze ngha ema. Tatase ni ongwunema kyo ema obube ngha onu ema kye ewema ke mbi emi esē baa? Tatase ni inggise kyōkōkō ema ogye lo?

⁸ Otimbi ngha yo, ema abuema li kyo ogye di kyo ewema obube kpaa.

⁹ Ema ye dafi ama otimbali ka kaka ude Imgbasho ba ma wē? Ni a ka kpagya ema wo ba ama okyo amah hona emi angwula hona ama ola yi owinggise hona owagbai engyulo hona amah idza, ongyulo ola yi ongyulo,

¹⁰ hona emumyi, hona ama okyo nggwō, hona ama ofyēbye, hona ama ombe inggise iyi, naadi ama ogbe inggise ungwō mi abumfyē duu ka kaka esuto mgbi Imgbasho ba.

¹¹ Li ngha ngwi ema angbeka nose dze aali. Kpaa a kyi sholu ema, a nu ema yē saan di gye emyemye mi iyi mgbi Otse iYesu iKrestu ikpewo Onodzi mgbi Imgbasho mgbi eyi.

Ka gbaamah ba

¹² <<A nu ani ofe okyo alungwō duu>> kpaa li alungwō duu sulu abo oyaaya ba. <<A nu ani ofe okyo alungwō duu,>> kpaa n ka yama nu unkonyi gbē ani so ba.

¹³ <<Ungwōgye dze ikye ifu, ifu di dze ikye ungwōgye>> nghaduu Imgbasho ka dzili ma duu. Ikpewo dze ikye amah ba, kpaa li ikye mgbi Otse nli otsungwō ikpewo nani.

¹⁴ Imgbasho kyile Otse mi ikwu mi abumfyē mgban, o dika kyile eyi kpaa.

¹⁵ Ema yagba ye dafi ewo mgbi ema li alewo mgbi iKrestu ma wē? Nghama li ayin nin kye alewo mgbi iKrestu kwokyi yi mgbi owagbai? Onoka lo!

¹⁶ Ema ye dafi inggise nkye ewon kwokyi yi owagbai yo, o yē ungwonyi yan mi ikpewo ma wē? Bana Afe lo gbē, <<Ama efa ka yē ikpewo onyi.>>

¹⁷ Nghaduu inggise nkye ewon kwokyi yi Otse yɔ, o yɛe ungwonyi yan mi onodzi.

¹⁸ Dulu abo mi amah na. Alobube angbeka duu ni inggise kyo kpaa li kwokyi yi ikpewo mgban ba, kpaa inggise nkyo amah yɔ, o kyo ikpewo mgban obube.

¹⁹ Ema ye dafi ikpewo mgbi ema li ozu mgbi Onodzi Osaan, nwodze mbi ema, ngwi ema gbɛ mbi Imgbasho na baa? Ema li mgbi ewema ba,

²⁰ a gya ema gyaagya mi mmya okwukwo. Nghane kye ikpewo mgbi ema kyido nka nu Imgbasho mmwe mani.

7

Odze ongyaa okyeekye

¹ Li odze ngwi ani sulun mi afe ngwi ema lo ani na aani. Kini inggise kye ongyaa ba kpaa li ungwɔ obube ba.

² Kpaa ngwi amah shaye nɛ, i gbuo ni ali ongyulo sulu ongyaa mgban, ni ali ongyaa kpaa bongyulo.

³ Ongyulo no gbewo yi owan mi onɔ ngwi owan dze yi imina mani, ongyaa kpaa no di gbewo yi oban onɔ ngwi oban dze yi imina mani.

⁴ Ewo mgbi owongyulo li mgban yuon ba li mgbi oban kpaa. Di li ngha, ewo mgbi obongyaa kpaa li mgban yuon ba, li mgbi owan kpaa aali.

⁵ Ka fwa ogbewo yi ewema ba na sede ni ema bwundu yɔ, ikye ni ema tu onɔ bibɔ. Ni i ngye yɔ, diye gbewo yi eka ikye ni iSatan ka gyila ema ni ema gbese mi imbadi ba, ikyeekye ewo ka yagba dze ngha gbɛ ba.

⁶ Ani le siisi ema mi odze nɛ ba, kpaa li odze owe-wɛ ta.

⁷ I mina ani gbɛɛ engyulo duu ki dze dafi ani mani. Nghaduu Imgbasho nu ali inggise umba mgban; o nu oka ongwunɛ, o nu oka ongwunani.

⁸ Mbi ologba yi owakwade yɔ, n le nya ma gbɛɛ tatase nu ma kiyayi odze yuoma dafi ani dze yuwen neni.

⁹ Nghaduu kini ema ka yagba bwa ewema fyii bayo, kye ongyaa na, lubana tatase okye ongyaa ngha ole ndengye kye yi imina.

¹⁰ Ema ama nkye ongyaa hona bongyulo yɔ, ongyaa no ka gha yi oban ba.

¹¹ Nghaduu ni ongyaa gheeba yi oban yɔ, no ka bongyulo oka wuba, ni i yɛɛ kyeme yɔ, no ye ka tu oban ogbugbe. Obongyaa kpaa no ka gheeba yi owan ba.

¹² Mbi angbeka yɔ n gbɛɛ, (nɛnɛ li ewodze mgbi ani, li mgbi Otse ba): Kini inggise iKrestu sulu owan ngwu noyɛɛ ba kpaa gbela odze yan yɔ, no ka yama gheeba yan ba.

¹³ Kini ongyaa iKrestu kpaa bongyulo onoyɛɛ ba kpaa gbela okiyayi dzeyan yɔ, no ka yama gheeba yan ba.

¹⁴ Lubana obongyaa onoyɛɛ ba na, a kyon kyi salu ikpewo owan, ongyaa nnoyɛɛ ba na kpaa, a kyon kyi salu ikpewo oban ngwu noyɛɛ nani. No li ngha bayo emi ongweema kika le kpekpe, mi ongwe emi ali ibwubwe, kpaa ngwi i dze ngha nɛ, a le osaan.

¹⁵ Nghaduu ni ongwu nnoyɛɛ ba na biibe ogheeba yɔ, no gha. Ongyulo hona ongyaa nnoyɛɛ yɔ, dze yi obube mi ito ofɛ na ba; Imgbasho kwu eyi ela gbɛɛ ni eyi to mi iyu.

¹⁶ Ongyaa, kaba li abu ka dulu obɔɔ wato! Abu ongyulo kpaa kaba li abu ka dulu owɔɔ wato?

¹⁷ Nghaduukpaa, ali inggise no kwudze mi ido ngwi Otse kye won abo ngwi Imgbasho kwun ela mi ele mani. Nɛnɛ li ola ngwi ani kye dze mbi emi iKrestu duu aani.

¹⁸ Inggise dze nteyi kyiikeye se nu ma wa kwun elaa? No ka fwoɔ ambe ikye na ba. Inggise dze nkyiikeye bata a kwun elaa? Ye no ka kyiikeye wuba.

¹⁹ Ikye okye-kye hona ikye okye-kye ba duu li itodze ba, ungwɔ okwukwo yɔ li ongyo ola mgbi Imgbasho.

²⁰ Ali inggise no tila dze mi imbisɔ ngwi o dze se Imgbasho kwun ela mani.

²¹ Abu teyi li ofyɛɛ se Imgbasho wa kwu abu elaa? No ka kaka abu ewo ba, kpaa ni abu ye ofɛ owato mi abo ofyɛɛ na yɔ, fya wato.

²² Lubana inggise nli ofyɛɛ mi onɔ ngwi Otse kwun ela ma li inggise odubɔ ewon mbi Otse; O li ungwonyi yi inggise nteyi dubɔ ewon se Otse wa kwun ela mani, o yɛɛ ofyɛɛ mgbi iKrestu.

²³ Imgbasho gya ema gyaagya mi mmya okwukwo; nghane ka yɛɛ ofyɛɛ inggise ba na.

²⁴ Emi ongwunani, ali inggise no kwudze dafi otsungwon dze se Imgbasho kwun ela mani.

²⁵ Nghaduu mbi ama nbeba wa bayo: Otse wen ola ba, kpaa n le gbo owitukwu mgbi ani dafi inggise ngwu menbwa mi elela odiidi mgbi Otse ngwu a ka fwon mani.

²⁶ Mi ikye okakewo ongwɔ onɛnɛ nɛ, n tsewe gbɛɛ tatase ni ema tila dze dafi ema dze nani.

²⁷ Abu kye ongyaa waa? Ka pita ofɛ ogheeba ba. Abu li ologbaa? Ka pita ongyaa okyeekye ba.

²⁸ Ni abu kye ongyaa yɔ, abu kyo obube ba; Kini ologba di kye ongyaa hona bongyulo kpaa, o kyo obube ba. Nghaduu ama nkye ongyaa ka dze yi okakewo ongwɔ ɛɛ nɛ kwuba, nghane i mina ani gbɛɛ ni ema ka kaka iso nɛ ba.

²⁹ Emi ongwunani, odze ani le gbo ma n le gbɛɛ, onɔ ngwi Otse ka ye ma sisi kwe. Wita onene nghataa lu iyayi ama nsulu engyaa nu ma dze dafi a sulun ba mani;

³⁰ Inggise ama nle tsukwu, nu ma kyo dafi a le tsukwu ba mani; ama nle tsatsa, nu ma dze dafi a le tsatsa ba mani; ama ngha ungwo, nu ma kyo dafi li ungwo mgbi ama okye ka da ba mani;

³¹ Ama nle kyo oyabo yi ungwo onghi ese ne, nu ma ka dzile beke ele ba. Lubana ese ne dafi eyi ye ma ka nye kan-kan.

³² I mina ani gbɛɛ ni ema ka dze mi okakewo ba. Ologba li nghao gbekabyi ido mgbi Otse, dafi ongwu ka kyo se ngwi ka kpa Otse mani.

³³ Nghaduu ongyulo nkye ongyaa yo li kye eka byi ungwo emi ese neni, dafi ongwu ka kyo se nka kpa owan mani,

³⁴ Man itukwu li yee efefa lon. Ongyaa nsulu ongyulo ba naadi ibidrua yo, itukwu mgban li fado mi ido mgbi Otse, oweka mgban li okye ewon do Otse ubo mi mmbwe yi eyi beyi onodzi. Nghaduu ongyaa nbongyulo yo, itukwu mgban li nghao byi ungwo onghi ese neni, dafi ongwu ka kyo se ni itukwu sheta lo oban mani.

³⁵ N le gbodze ne ikye mgbede mgbi ema, li ikye otukwu ema ofe ba, kpaa li ikye ni ema dze mi ofe nli ayin, ndze yi itukwu efefa ba di kyo Otse ido itukwu asisa.

³⁶ Inggise ntsewe gbɛɛ ongwu le kyo yi ongwongyaa ngwu o kye ashua won onbukwo gbosa ba,* ma egbe mgbi ongwongyaa dile ke o di di gbɛɛ i gyolo ongwu okye ongyaa yo, no kyo dafi i won itukwu mani. O le kyungwo obube ba. Nu ma kye ewoma.

³⁷ Kpaa ongyulo nkyi bwalu mi itukwu mgban, ngwi a siin siisi ba, nka yagba kyo dafi itukwu mgban nyan, di kyi kye mi itukwu mgban gbɛɛ ongwu ka kye ongwongyaa na wuba kpaa, o kyo ayin.

³⁸ Inghawane, ongwu nkye ongwongyaa na kyo ayin, ongwu ndi fwa okye na kpaa nghao kyo ayin duu.

³⁹ Ongyaa sulu ofe odzata ongyulo onɔ ngwi o ka dze oshishe ba, kpaa onɔ ngwi oban kwulu yo, o ka bongyulo ngwi o di kpan duu, kpaa no li ongyulo iKrestu.

⁴⁰ Mi odiidi mgbi ani yo, non tila dze yuon o ka nghao dze yi atsa, n tsewe gbɛɛ ani kpaa dze yi Onodzi mgbi Imgbasho.

8

Ungwogye ngwi a kye fife nu angwula

¹ Nghane mi odze ungwogye ngwi a kye fife nu angwula yo: eyi duu sulu ozoyeye

mi ele. Ozoyeye li nu inggise tsaasha, kpaa okpitukwu li mbeembe lu iyayi.

² Mi otsitsi yo inggise ama ntsewe gbɛɛ ama ye ngye na, a ye unkonyi ba dududu.

³ Kpaa inggise ngwu Imgbasho kpan itukwu yo Imgbasho yen.

⁴ Ikyenghane, mi itodze ogye ungwo ngwi a kye fife nu angwula yo: eyi duu ye gbɛɛ angwula li unkonyi mi ese ba, eyi ye gbɛɛ Imgbasho li onyi ta.

⁵ Lubana a li kwu ungwo mi esho beyi ese kwuba di imgbasho beyi otse, kpaa onyi mi ele li Imgbasho hona otse ba,

⁶ Nghaduu mgbi eyi yo Imgbasho li onyi ta, o li Otseyi ngwu alungwo tokye mbon, li mbon ngwi eyi dze oshishe; Otse iYesu iKrestu kpaa di li onyi ta, li ikpewon ngwi alungwo duu tokye, di li ikpewon ngwi eyi dze oshishe aani.

⁷ Ngwi i dze ngha duu ne kpaa, li inggise duu ye otsitsi ne ba. Inggise angbeka be yi angwula jo a noyeye gbɛɛ angwula li ungwo oshishe, hinine nu ma gye ungwogye ngwi a kye fife nu angwula yo, li dze ma gbɛɛ di li ungwogye mgbi angwula abuon, ngwi ewe otseetse mgbi ama fyumfyem ba ne, a li tsewe gbɛɛ ama kyo obube.

⁸ Nghaduu ungwogye li kye eyi ba kwekwe yi Imgbasho ba; ni eyi gye ungwogye hona gye ba kpaa eyi nye idzidza mbi Imgbasho ba.

⁹ Gbewebiyi saan, ni ungwogye angwula mgbi abu ogyeegye ka nu inggise ama nfyumfyem itukwu ba ese ogboogbo ba.

¹⁰ Lubana, ni inggise nfyumfyem itukwu ba di abu ngwu sulu ozoyeye ne le gye ungwo mi ozu angwula ma, ka nun itukwu ofyumfyem-fyumfyem ogye ungwogye angwula na ba we?

¹¹ Nghane ongwunabu nfyumfyem itukwu ba ngwu iKrestu kwulu ikyen na ka dzili ikye ozoyeye mgbi abu neni.

¹² Ni abu kyo emi ongwunabu obube mi ito ofe ne, di ta ewe otseetse mgbi ama nfyumfyem ba na mmya yo, abu kyo iKrestu obube.

¹³ Nghane, ni ungwogye mgbi ani ogyeegye ka nu ongwunani ese ogboogbo yo, n ka gye mmbwe wuba, ikye nin ka nun ese ogboogbo ba.

9

Mfye mgbi inggise ogbikyem iYesu

¹ N dze ikyiben baa? Ani li inggise ogbikyem iYesu lo? N di iYesu Otse mgbi eyi ye bana? Ema li idabo mgbi ani mbi Otse baa?

² Kini inggise angbeka di gbɛɛ ani li inggise ogbikyem iYesu ba kpaa, mbi ema yo ani

* 7:36 7:36 Imbe ne li ongyulo mbe ongwongyaa onɔ, onoka li li ama omban.

li inggise ogbikye iYesu! Lubana ema li ambe otso gbɛɛ ani li inggise ogbikye iYesu.

³ Nene li atsondu mgbi ani onaana mbi ama nka kwo ani osha aani.

⁴ Eyi dze yi ofe ogye ungowgye di wa ungow owaawa baa?

⁵ Eyi dze yi ofe okye oweyi ongwu nnoyeye wafɔ yi eyi dafi ama ogbikye iYesu angbeka yi emi ongwuno Otse beyi iKefa li kyo na lo?

⁶ Naadi i yɛɛ kyeme gbɛɛ li Ani yi iBan-abasi ta ka kyido ikye obyi eweyi?

⁷ Li ali oblakwutse ka ye kpa ewon udza ofya? Li eme ka ye ekwo se ka gye owawan ba? Li eme ka ngwo ifyungwo se ka wa enaabe ifyungwo na ba?

⁸ N le gbɔdze ne mi ozoyeye mgbi inggise owamye taa? Ola kpaa gbɔ ngba yeye baa?

⁹ Lubana a lo mi Ola mgbi iMose gbɛɛ: <<Ka yama kye uke wo mnda ondu onɔ ngwi o le kyido ba.>> Li mnda ngwi Imgbasho gbɔdze ne kyinebyiini?

¹⁰ Mi otsitsi yo o gbɔdze ne ikye eyi, naadi ngba ba? Li ngba, a lo ikye eyi, ikyekye inggise oshookwo yi inggise ogbo ungowgyowe duu ewe ogbe byiibyi mgbi ama li ikye otu ungowgye mi okwo nani.

¹¹ Ni eyi kye eto mgbi onodzi kya mbi ema wali, i she lamyɛ ni eyi tu ungow mgbi ese ne mbi emaa?

¹² Ni inggise angbeka kpaa ema le tobyi ma ma, ema ka ngba tobyi eyi baa?

Nghaduu eyi yama gbinebyi ito ofe ne ba. Kpaa ikye owo Eso Osuse mgbi iKrestu ekle bayo, ungow ngwi ema nu eyi duu li gyɔlo eyi.

¹³ Ema ye dafi ama nli kyido mi ozu okwukwo osunu Imgbasho mi iJerusalem li tu ungowgye mgbi ama mi ele, ama nli fife mi iwashi kpaa li gye atafa ife ma we?

¹⁴ Mi ito ofe ne kpoo, Otse noola gbɛɛ nu ma byi ama ogbo Eso Osuse kpaa enbwa.

¹⁵ Kpaa odze wo ani yi ungow ntone onyi ba, n dile lo afe ne ikyegbɛɛ ni ema kyo ani ungow ntone ba. Tatase nin kwulu onu inggise kwo ani abo otsigegɛ neni.

¹⁶ Nghaduu, ni ani le gbɔ Eso Osuse kpaa n li kyile ewo esho ba, ikyekye li Imgbasho kye ido ne wo ani abo. Ahoo mi ikye ani ki nin gbɔ Eso Osuse ne bayo!

¹⁷ Ni ani di itukwu ani le gbeeso ne yo, n sulu umba, kpaa nin le gbɔ itukwu ani bayo, n le kyɔkyido ngwi a kye wo ani abo ma ta.

¹⁸ Nghanema umba mgbi ani li ekye? Li ofe ogbeeso ne ayayi di mina gbɛɛ ungow ndze ikye ani ma nu ma kyo ani ele kyeme-kyeme ba.

¹⁹ Ngwi ani dubo ewen di byabo inggise ba ne kpaa, n kye ewani yɛɛ ofyɛɛ mgbi ali

inggise duu, ikye ni ani tu inggise mbwo kpakpa mani.

²⁰ Ono ngwi ani dze yi emi iJuda yo, ani li yɛɛ dafi inggise iJuda mani, ikye okwo ma ba mbi iKrestu. Mbi ama nbyito abo ola yo, ani li kye ewani yɛɛ dafi inggise nbyidze abo ola mani (ngwi ani byidze abo ola ba ne kpa), ikye okwo ma ba mbi iKrestu.

²¹ Mbi ama nsulu ola ba ma ani li yɛɛ dafi inggise osulu ola ba (nghaduu ani kye ola mgbi Imgbasho ngwuta ba, ani byidze abo ola mgbi iKrestu), ikye ni ani kwo ma ba mbi iKrestu.

²² Ani yɛɛ sheshe mi idzidze ama osheshe, ikye otu inggise ama nle sheshe. Ani yɛɛ alungwo duu mbi ali inggise duu, ikyegbɛɛ mi ali ito ofe duu kpaa nin dula angbeka watɔ.

²³ Ani kyungwo ntone ikye Eso Osuse, adzi nin tu mse mi ele mani.

²⁴ Ema ye dafi ama odayayi onya li mbwo kpaa li onyi ta li kye umba ma we? Tsinya mbiso ni i tu umba na.

²⁵ Inggise ama nli dayayi mi ole duu a li kpayi saan. A li kyo ikye otu umba ongwɛ ka la ba; nghaduu eyi li kyo ikye otu umba nka la gyegwu mani.

²⁶ Nghane ani li tsinya dafi inggise nle tsinya too-too ba, ani li gblibe dafi inggise nle ngwi asa mi awo ma ba.

²⁷ Ei, ani li nye ikpewo mgbi ani di non yɛɛ ofyɛɛ mgbi ani ikye ni ani gbeeso nya angbeka ikye ani abuen kpaa ni umba wa nyen ba mani.

10

Ka sunu adagyɛ ba

¹ Emi ongwunani, ka yama gblimo ungow nkɔ emi otsikyeyi tugbe ngwi Imgbasho kye iwulu akpa tukwu ma nu ma nye ikpɛsɛ ongowngwo fa mi onekyoo omuma na ba.

² Ungwana dze dafi iBatisima ngwi a kyo ma nu ma yɛɛ ama okyedo iMose mani.

³ Ama duu gye ungowgye ongwɛ onodzi ungwonyi

⁴ diye wa ungow owawa ongwɛ onodzi ungwonyi; lubana a weni ikwutse onodzi nkye yi ama mani, ikwutse na di li iKrestu.

⁵ Nghaduukpaa Imgbasho sulu atsa yi angbeka kwuba mi idzidze ma ba; a kwulu jo ikwo mgbi ama gbe okwese dzii.

⁶ Ungwone nose kyo ikye otso ambe ikye ni eyi ka kye itukwu mgbi eyi fake ungow obube dafi ama kyo na wuba.

⁷ Ka li inggise ola angwula dafi angbeka nose kyo na ba; Bana Afe lo gbɛɛ: <<Inggise ntona sise ikye ogye di wa diye kyato shufwe.>>

⁸ Ni eyi ka kyo amah dafi angbeka kyo se inggise idubu osudeta kwulu mi egbe onyi na ba.

⁹ Ni eyi ka mbadi Otse dafi angbeka mbadi se ifa ngwo ma ma ba.

¹⁰ Ka yama ndandu dafi angbeka kyo se ongyeso ikwongye ngwo ma na ba.

¹¹ Ungwo ntonde kyo ma ikye otso ambe, a di kyi lolu ma ikye okwo eyi ama ndze oshishe mi onso ese odondu ne ado.

¹² Nghane, kini abu ye gbee di abu kwudze kpoklozo yo, gbewebyi ni o ka gbese ba!

¹³ Ito igyila nba mbi abu duu li idzidza yi ongyi nba mbi inggise angbeka ma ba, li ba mbi inggise angbeka kpaa ngha. Nghaduu Imgbasho li kwudze mi ola mgban; O ka gbela ni igyila nka ngha abu mmye ba mbi abu ba. Kpaa onso ngwi a gyila abu yo, O ka ba yi abu ofe ongha igyila nani.

Oga angwula beyi oga mgbi Otse

¹⁴ Nghane emi okani osuse, nya osunu angwula na.

¹⁵ N le gbodze yi inggise ama odifwi odze, byi ewema ita mi odze ngwi ani gbo neni.

¹⁶ Ibwe mgbi mse ngwi eyi li kye mse be ele ne, li ondu odzeedze mgbi eyi mgbi iKrestu baa? Naadi ibredi ngwi eyi li gha ne li ondu odzeedze mgbi ikpewo mgbi iKrestu baa?

¹⁷ Lubana ibredi ne li onyi ngwi eyi duu li gha, ne eyi duu yee ikpewo onyi.

¹⁸ Di mi odzeedze mgbi emi iSrai: ama ngye ungwo ife ma sunu Imgbasho mi iwashi baa?

¹⁹ Nghane ani le gbee angwula hona ungwoye ngwi a kye fife nu angwula li ungwo imo kpawee?

²⁰ Ei, ani le gbo ngha ba! Emi angwula li fife nu emese, li mbi Imgbasho ba, ma i mina ani gbee ni ema wa li abuge yi emese ba.

²¹ Abu ka yagba wa ibwe mgbi Otse diye wa mgbi emese ba; o ka yagba be angha mi adinyatse ungwoye mgbi otse yi mgbi emese ba.

²² Eyi le mila oba yi ofu okyeekye mbi Otse? Eyi fyumfye ngha Otse?

Odubo ewoo mgbi inggise onoyeye

²³ <<A nu eyi ofe okyo alungwo duu>> kpaa li alungwo duu tishi ba. <<A nu eyi ofe okyo alungwo duu>> kpaa li alungwo duu ka tobyi eyi ba.

²⁴ Inggise no ka yama pita ungwo osuse ikye ewon ba, kpaa ikye angbeka.

²⁵ Abu ka yagba gye ali mmbwe ngwi abu gya mi idu duu, ka yama byita imbe ngwi i tokye ba di itukwu wa nu abu obube.

²⁶ Lubana, <<Ese beyi ungwo ama nto ele duu li mgbi Otse.>>

²⁷ Kini inggise onoyeye ba bo abu oga ma abu gbela ke yo, gye alungwo ngwi o kye dze abu ese duu, ka byiibyi ita ba di itukwu wa nu abu obube.

²⁸ Kpaa ni inggise teyi nya abu gbee, <<A kye ungwoye ne fife nu angwula yo>> ka gye ba, ikye inggise ngwu nya abu na beyi ikye itukwu onuunu obube

²⁹ ka li ikye gbee itukwu nu abu obube ba, kpaa inggise oka nani. Kyosine ngwi ani ka kyo itukwu ani se itukwu ka nye ka nu inggise oka obube?

³⁰ Kini ani gye ungwoye na yi angha ota Imgbasho wali, kyosine inggise oka ka mbe ani iyi gbee di ani kyo obube?

³¹ Nghane ni abu gye hona wa naadi alungwo ngwi abu le kyo duu, kyon mi ikye okwokwo mgbi Imgbasho.

³² Ka nu inggise onyi ese ogboogbo ba, yeba ni li inggise ijuda, hona iGriki hona okwakye mgbi emi iKrestu kpaa,

³³ dafi ani le fya okyungwo gbee no kpa inggise mi ali ito ofe duu ne kpaa. Lubana n le pita mse mi ikye ewani ba kpaa mi ikye inggise ibyiibyi, ikye gbee kana a wa wato.

11

¹ Kyedo ambe mbi ani na dafi ani kpaa le kyedo ambe mbi iKrestu neni.

Ola mgbi osunu mi ododa

² Ani tse ema dafi ema we yen mi alungwo diye gbewebyi otsootso ama ani gbe nu ema ntonde yeye mani.

³ Onene i mina ani onu ema difwi gbee ikye mgbi ali ongyulo li iKrestu, ikye mgbi ali ongyaa li ongyulo, ikye mgbi iKrestu di li Imgbasho.

⁴ Ongyulo ta ngwu bibo hona gbeeso kye angwikye tukwu yo, o nu ikye mgban (iKrestu) mmwe ba.

⁵ Ali ongyaa ndi bibo hona gbeeso yi ikye asisa yo, o nu ikye mgban (oban) mmwe ba, li ikondu dafi a kpalun otu mani.

⁶ Ni ongyaa ka yama kye ungwo bwa ikye bayo no nu ma wulon otu; ma ni li ungwo ayiwi mbon owulo otu yo, no kye ungwo bwa ikye.

⁷ Ngwi ongyulo dze mi odzeedze beyi okwokwo mgbi Imgbasho ne, dze mbiso ngwi ongyulo ka kye ungwo tukwu ikye ba; nghaduu ongyaa li okwokwo mgbi ongyulo.

⁸ Lubana ongyulo to ikpewo ongyaa ba kpaa li ongyaa to ikpewo ongyulo aali;

⁹ A yama ta ongyulo ikye ongyaa ba kpaa li ongyaa ngwu a ta ikye ongyulo.

¹⁰ Mi itodze ne, beyi ikye engyeso emi esho yo, tishi ni ongyaa sulu ambe mgbi mfye mi ikye mgban.

¹¹ Nghaduukpaa, mbi Otse yo, ongyaa byabo ongyulo, ongyulo kpaa byabo ongyaa.

¹² Lubana dafi ongyaa tɔ ikpewo ongyulo na li ngha ngwi ongyaa kpaa di mba ongyulo yeye aali. Kpaa alungwo duu kye mbi Imgbasho.

¹³ Gbo otsitsi abuabu: li ayin ni ongyaa bibo mbi Imgbasho ikye asisaa?

¹⁴ Kye ateesa ma jo li ungwɔ ayiwi ni otu mgbi ongyulo ngwu gbo onbukwo,

¹⁵ nghaduu kini ongyaa sulu otu tunto mi ikye yɔ, li ingwinda mbon: Lubana a kye otu nun ikye otukwun ikye blibli.

¹⁶ Ni i dze inggise otangwodze ne yɔ, eyi hona emi iKrestu sulu ali oka idzidza osunu ba.

Ungwogye mgbi Otse ongyi onode

¹⁷ Mi otsootso ntonɛ yɔ n yama tse ema ba, lubana okwakye mgbi ema li ba yi ombeembe ngha osuse.

¹⁸ Ungwɔ ongyi ababo, n fwo gbɛɛ ni ema wa tu eka mi okwakye mgbi emi iKrestu yɔ, ogbua-gbua li dze idzidze ema, n pita onoyeye mi ele.

¹⁹ Li ungwɔ otsetsewo ba, idzidza tɔ gedegede mi idzidze ema ikye ni Imgbasho difwi ema ama nle kyo ayin mani.

²⁰ Ni ema wa kwakye yɔ, li oga mgbi Otse ngwi ema li gye ba.

²¹ Lubana ema li kwaafɔ giyi oka mi onɔ ngwi ema le gye ma ba. Inggise oka li lu yi enbwa ifu, oka li gye di wa fya.

²² Ema sulu ude ngwi ema ka gye di wa mi ele lo? Naadi ema kyi kye ozu mgbi Imgbasho yee ayayi diye nya ama nsulu unka ba ntonɛ adi? Ni ani ki gbosine yi ema? Ni ani ki tse ema yi ito ali nɛɛ? N ka tse ba!

²³ Lubana ungwɔ ngwi ani tun mbi Otse ma ngwi ani kye nu ema aali: Otse iYesu kyi kyelu ibredi mi otu ngwi a kyon gya mani,

²⁴ ta ngwi o kye angba nu Imgbasho ne, o kye mwalu si gbɛɛ, <<Nene li ikpewo mgbi ani, ngwi dze ikye ema; kyungwɔne ikye ni ema le we ani na.>>

²⁵ Mi ito ofe na kpɔɔ, o di kyi kyelu ibwe di gbɛɛ, <<Ibwe ne li ondu odzɛɛdze ofufe mi eyi mgbi ani; kyo ngha yeye onɔ ngwi i ka wan mani, ikye ole we ani.>>

²⁶ Lubana alono ngwi ema gye Ibredi di wa ibwe ne yɔ, ema le noola ikwu Otse nghataa mbise o ka ye.

²⁷ Ikyenghane, ali inggise ngye ibredi diye wa ibwe mgbi Otse ne mi ofe nli ayin bayɔ, o kyo obube mi ikpewo beyi eyi mgbi Otse.

²⁸ I tishi ni inggise kyidi odzɛɛdze mgban duuse no wa gye ibredi na diye wa mi ibwe nani.

²⁹ Lubana inggise ta ngwu gye di wa kpaa difwi gbɛɛ li ikpewo mgbi Otse bayɔ, o fwo ewon ikwɔ.

³⁰ Li ungwɔ nkyɔ se ngwi ema kwuba ndengye di dotse, ma ema ibyibi di kwulu kpaa wa.

³¹ Nghaduu ni eyi kyidi odzɛɛdze mgbi ewe saan yɔ, eyi ka ke inai ikwɔ mgbi Imgbasho ba.

³² Ni Otse Imgbasho gbo eyi ikwɔ yɔ, O kwo eyi ado ikyegbɛɛ ni a wa ngwɔ eyi ikwɔ ungwonyi yi ese ba mani.

³³ Nghane, emi ongwunani, ni ema ba owa gye ungwogye mgbi Otse yɔ, fe ewema na.

³⁴ Inggise mgbi ema ngwu enbwa don yɔ, no gye ungwɔ kye ude, ikyegbɛɛ onɔ ngwi ema wa kwakye yi eka ma no ka yee ungwɔ ikwɔ ofwoofwo ba mani. Ni ani di wa ba ta n ka tso ema ofe angbeka mbweele.

12

¹ Emi ongwunani, i mina ani gbɛɛ ni ema ka dze mi ine obuubu mi odze umba mgbi onodzi badu.

² Ono ngwi ema li emi angwula ma, ema ye dafi mi ali ito ofe duu a li nu ema boofe ikye osunu angwula nli yagba gbɔdze kpaa ba na mani.

³ Nghane n le nya ema gbɛɛ, inggise nle gbɔdze mi Onodzi mgbi Imgbasho ka yagba fya iYesu ito ba. Inggise onyi dika yagba gbɛɛ, <<iYesu li Otse ba,>> sede mi mfye mgbi Onodzi Osaan.

⁴ Umba mgbi onodzi to ita idzidza-dzidza, nghaduu ka li Onodzi onyi mani.

⁵ Ofe okyo Otse ido li ita idzidza-dzidza, kpaa ka li Otse onyi mata.

⁶ Ofe okyido mbwo yi ita, nghaduu li Imgbasho onyi ma li kyo ma nye mbi ali inggise duu.

⁷ A kye umba mgbi Onodzi nu ali inggise duu ikye ni eyi ya eweyi abo.

⁸ Inggise oka a nun Onodzi mgbi ozoyeye, oka yɔ a nun Onodzi mgbi okpayi ungwɔ di difwi,

⁹ li Onodzi onyi ma kpɔɔ li nu inggise oyeye onuunu, di li nu umba ongyelu ootse kpaa aali.

¹⁰ Mbi oka yɔ li mfye okyungwɔ okwulewo, mbi oka li ogbo ungwɔ nka kyo mi onɔ ongyi iyayi, mbi oka li odifwi idzidza mgbi emi onodzi, mbi oka yɔ li ogbo ondudze ita idzidza-dzidza, oka jo yɔ li okyata ondudze kpaa.

¹¹ Ntonɛ duu ka li ido mgbi Onodzi onyi nani, o di li kye nu ali inggise dafi o di kpan mani.

Ewo onyi yi alewo kwuba

¹² Dafi ewo li onyi kpaa sulu alewo kwuba ne, li ngha ngwi i dze yi iKrestu kpaa aali.

¹³ Lubana a kyo eyi duu iBatisima mi Onodzi onyi ni eyi yee alewo onyi, ni li emi

ijuda hona emi iGriki, ofyee naadi ongwɛ kpaa a nu eyi duu Onodzi onyi na ni eyi wa.

¹⁴ Ewo sulu alewo onyi ta ba, kpaa li alewo kwuba.

¹⁵ Kini afo yeba gbɛɛ, <<N li abo ba nɛ n yama li aye mgbi ewo nɛ bayo,>> Mi itodze nɛ afo ka yagba dula ewon to mi alewo gbɛ ba.

¹⁶ Kini ado gbɛɛ, <<Ikyegbɛɛ ani li inɛ ba nɛ, n wodze alewo nɛ ba,>> itodze nɛ ka yagba ndan oli ikpewo nɛ gbɛ ba.

¹⁷ Kini ewo tsatsa li inɛ ma, ofwoofwo kika dze ole? Kini ewo tsatsa li ado ma, nkwo ofwoofwo kika dze ole?

¹⁸ Nghaduu Imgbasho ye dafi ongwu gbe alewo toke mi oloola mi ewo mani. Olele duu li dafi ongwu mina gbɛɛ no dze mani.

¹⁹ Ni alewo duu li onyi ma, ewo ololo kika dze ole?

²⁰ Ngwi i dze nghanɛ alewo le kwuba kpaa ewo li onyi ta.

²¹ Inɛ ka yagba nya abo gbɛɛ, <<I kwokyin yoo ba ba!>> Hona ikye ka yagba nya afo gbɛɛ, <<I kwokyin yoo ba ba!>>

²² Mi otsitsi yo, alewo ama nshanye di wuuta ba ma, li ama nli kyeme-kyeme aali,

²³ Alewo ama ngwi eyi li tsewe gbɛɛ di a sulu mmwe ba ma, eyi li nghao wo ma okpa. Alewo ama ngbosa saan ba ma, eyi li kye ma do ododa ba,

²⁴ nghaduu eyi li yagba wewo yi alewo ama nto gede-gede nɛ saan ngha ba. Nghaduu Imgbasho gbe alewo duu kwokyi ikyegbɛɛ ama n yeyikpa kpaa nu ma tu mmwe.

²⁵ Ikye ni oghaagha wa dze mi ewo ba, kpaa nu ma tobyi ewoma.

²⁶ Kini alewo onyi kaka iso yo, ali alewo duu ka kaka iso na yan; kini alewo onyi tu mmwe yo, ali alewo duu ka tsatsa yan ungwonyi.

²⁷ Onenɛ ema li ewo mgbi iKrestu, ali inggise mbi ema duu li alewo mgban.

²⁸ Mi obyi iKrestu yo Imgbasho teyi sa ama ogbikye iYesu, ongwu fan ama ogbɛɛɛ, ongwu ta etsetse, beyi ama okyungwo okwulewo, beyi ama osulu umba ongyelu ootse, ama nli yagba otobyi angbeka, ama nsulu umba ogbe inggise teyi, beyi ama ogbo ondudze idzidza-dzidza.

²⁹ Li ama duu li ama ogbikye iYesuu? Li ama duu li oyegbɔɔ? Li ama duu li otsetsee? Li ama duu li kyungwo okwulewo?

³⁰ Li ama duu sulu umba ongyelu ootsee? Li ama duu li gbo ondudze idzidza-dzidzaa? Li ama duu li kyata ondudzee?

³¹ Imina mgbi ema no dze mi umba ama okwukwo mani.

Nghanɛ n ka tso ema ofe nnghao tishi ma oneneni.

13

Okpitukwu

¹ Kini ani yagba ogbo ondudze mgbi inggise beyi mgbi engyeso, kpaa sulu okpitukwu bayo, ani dze dafi ashi ngwi a kye le gbo yi ewoma hona ongwumfo ngwi a le sun mani.

² Ki ani dze yi umba oyegbo diye dze yi ozoyeye ogbo ungwɔ ama odaada yi ali ozoyeye duu, di dze yi oyeye onuunu nka yagba kyile unggwo gbɛ, kpaa ni ani sulu okpitukwu bayo, ani li unkonyi ba.

³ Kini ani gbe ungwɔ ngwi ani sulun duu nu emi adze diye kye ikpewo mgbi ani nu ma toola, kpaa ni ani sulu okpitukwu bayo, i tobyi ani ba.

⁴ Okpitukwu li itukwu oshiishi, li mse okyɔkyɔ, li kyo uwaba ba, li tsaabo igegɛ ba, li kyile ewo esho ba.

⁵ Li fyumfyɛ ikye ba, li pita ungwɔ ikye ewon ba, li dzedze kyitingga ba, li kye odze obube wo itukwu ba.

⁶ Okpitukwu li kwokyi yi ungwɔ obube ba, kpaa li dze yi atsa yi ungwɔ nli otsitsi mani.

⁷ Okpitukwu li ngyo, li nu inggise oyeye, li sulu ewe ogbe byiiby, li kwu onyotse.

⁸ Okpitukwu li yama wɛɛɛ ba, nghaduu imbe ngwi elodze oyegbo to duu kawa ngye; imbe ngwi ondudze to, ka kwutsee se; imbe ngwi ozoyeye dze li wa nye.

⁹ Lubana eyi li ye sheeshe, di li yegbo sheeshe,

¹⁰ nghaduu ni oyeye osaan wa ba yo, oyeye osheeshe li noofe.

¹¹ Ono ngwi ani li ongbungbe ma, n li gbodze dafi ongbɛ, n li tsewodze dafi ongbɛ, n li sakwulu odze imbisɔ ongbɛ. Ngwi ani wa yɛ ongyukwo nɛ, n dzata ali yi okyɔkyɔ mgbi ongbɛ nani.

¹² Onenɛ eyi le di byini-byini dafi onodzi mi idzinggi mani; kpaa eyi kawa di inɛ. Onenɛ ani ye sheeshe, kpaa n dika wa ye besɛ, dafi Imgbasho ye ani besɛ neni.

¹³ Onenɛ li ungwɔ eta ntonɛ ta dze, oyeye onuunu yi eka ogbe byiiby beyi okpitukwu. Kpaa onghaangha duu li okpitukwu.

14

Umba oyegbo beyi ondudze

¹ Kyedɔ ofe mgbi okpitukwu di dze yi imina kpakpa mi ikye umba onodzi na. Onghaangha duu yo umba oyegbo.

² Lubana inggise nle gbo ondudze yo, o le gbodze yi inggise ba kpaa li Imgbasho. Otsitsi inggise onyi kpaa li tu osa mbon ba; o li le gbo ungwɔ ama odaada mi onodzi mgban.

³ Nghaduu inggise nle gbodze oyegbo yo, le gbodze yi inggise ikye okwu ma ewe wo nu ma fyumfye itukwu di dze myee-myee.

⁴ Inggise nle gbo ondudze ngwi inggise difwi bayo le tobyi ewon ta, kpaa ongwu nle gbo ondu oyegbo yo le tobyi okwakye mgbi emi iKrestu duu.

⁵ I mina ani gbæ, ali inggise duu kile gbo ondudze angbeka, nghaduu ka tatase lo ani ni ema le yegbo yo. Lubana inggise nle yegbo shewo nga ongwu nle gbo ondudze angbeka, sede no nu osa ikye otobyi okwakye mgbi emi iKrestu yo.

⁶ Emi ongwunani, onene ni ani ba mbi ema wa le gbo ondudze angbeka ma, n tobyi ema mi ekye, sede ni ani kwulu iba hona ozoyeye hona yegbo naadi ewodze se ka ya ema abo baa?

⁷ Mi odze ungwø ama ndze oshishe ba li gbela dafi ozuna yi elete ne, ni ela mgbi ama li ungwonyi ma, a kika kyosinese ye idzidza mgbi ama.

⁸ Ni agba di kweela to saan ba ma li eme ka wewo ika?

⁹ Li nga ndze yi abu aali. Ni abu gbodze mi ozoyeye mi ondudze mgbi abu ba ma inggise ka kyosine ye odze ngwi abu le gbo? Ka dze dafi abu le gbodze yaoke awo ta mani.

¹⁰ Ondudze mbwo mi ese li otsitsi, kpaa ama duu a li gbo ma yi itaan.

¹¹ Kini inggise le gbo ondudze ma ni ani le difwi bayo ani yan duu ka yee ingyoga ewe.

¹² Li nga ndze yi abu aali. Dafi i mina abu otu umba mgbi onodzi ne, sadulu umba ama nka dze yi okwakye mgbi emi odzimgbasho abo oyaaya mani.

¹³ Mi itodze ne, ali inggise nle gbo ondudze ngwi a yen bayo, no bibo no tu mfye onu osa mi ungwø ngwi o le gbon mani.

¹⁴ Lubana ni ani bibo mi ondudze ngwi a yen bayo, onodzi mgbi ani bibo sewaali kpaa itukwu ka to yi unkonyi ba.

¹⁵ Nghane n ka kyosine den? N ka bibo yi onodzi mgben dika bibo mi itukwu kpaa. N ka shashi yi onodzi beyi itukwu mgben kpaa.

¹⁶ Kini abu le tse Imgbasho yi onodzi mgbi abu ma, inggise ngwu wo yi abu ngwi i gbosa lon ba na ka kyosinese gbela gbæ <<no dze nga>> mi angba ota-ta mgbi abu na?

¹⁷ Angba mgbi abu na ka menbwa saan, kpaa inggise oka na tu oyabo mi ele ba.

¹⁸ N ta Imgbasho angba dafi ani li gbo ondudze ongwu a fwon ba nga ema duu.

¹⁹ Nghaduu mi okwakye mgbi emi odzimgbasho yo, i tatase nin gbo elodze eda mi ondudze ngwi a yen nga ngwi ani ka gbo elodze idubu iwoyo mi ondudze ngwi inggise yen ba mani.

²⁰ Emi ongwunani, nya otsewodze dafi engbe na, ka ye obube ba dafi engbe, kpaa tsewodze dafi ongyukwo.

²¹ A lo mi afe gbæ, <<N ka nu ingyoga gbodze yi inggise ntone mi ondudze beyi ikyiide ngwi a yen ba, nghaduu kpaa a ka fwo ani ba,>> li Otse gbodze neni.

²² Ikyenghane, ondudze ngwi angbeka yen ba ne li ambe ndze ikye ama onoyeye ba, kpaa dze ikye ama nnoyeye ba mani, nghaduu odze oyegbo dze ikye mgbi ama onoyeye, li ikye ama onoyeye ba na ba.

²³ Nghane, ni okwakye mgbi emi odzimgbasho duu kwakye mbonyi ma ama duu le gbo ondudze ngwi a yen ba, ma ni inggise ama ngwu i gbosa lo ma ba yi ama onoyeye ba wa kaka ma, a ka gbæ ema duu le wede bana?

²⁴ Kpaa ni ali inggise duu le gbo elodze oyegbo ma inggise ngwu noyeye hona ngwi i gbosa lon ba wa kaka yo, ka gbosa lon mbi ali inggise duu gbæ ongwu li inggise obube,

²⁵ man o ka fwi ungwø odaada ama nwoto itukwu mbon di yee okwakwafø sunu Imgbasho diye gbæ, <<Mi otsitsi Imgbasho dze yi ema.>>

Osunu mi oloola

²⁶ Eyi ka gbosine waden, emi ongwunani? Ono ngwi ema kwakye yo, kyungwø nka gbosa lo ali inggise duu, ni inggise oka li inggise oshashi, oka no li inggise otsootso, oka no li inggise ofwi iba mgbi Imgbasho, oka no li inggise ogbeeso mi ondudze ngwi a yen ba, oka kpoo no li inggise onu osa mi ondudze nani. Ungwø ntone duu no li ikye oyabo mgbi okwakye mgbi emi odzimgbasho.

²⁷ Ni inggise ka gbodze mi ondudze ngwi a yen bayo, no ka nga inggise efa naadi eta ba, nu ma gbo onyonyi, ni inggise oka di dze onu osa kyeme-kyeme.

²⁸ Ni inggise dzema onu osa bayo, inggise na no tukwondu mi okwakye, no gbodze mi itukwu mgban yi Imgbasho efa.

²⁹ Ama ogbeese efa hona eta ama ndze yi eso mgbi Imgbasho nu ma gbodze, angbeka duu nu ma gadø saan fwo ungwø ngwi a le gbo mani.

³⁰ Ma ni ine odiidi ba mbi inggise oka ngwu sodze ese yo ongwu nle gbodze na no kwulese.

³¹ Lubana, ema ka yagba gbeeso onyonyi ni ali inggise tu ungwø otsootso na di fyumfye itukwu mani.

³² Oyegbo no fe no dikyon se no gbo.

³³ Lubana Imgbasho li Imgbasho oba yi ende owoowo ba, kpaa O li Imgbasho mgbi iyu.

Mi ali okwakye mgbi emi osaan duu,

³⁴ engyaa nu ma so shili mi okwakye mgbi emi odzimgbasho. A nu ma ofe

ogbodge ba, dafi ola mgbi emi iJuda tso mani, nu ma fwoofwo.

³⁵ Kini ungwo wo engyaa ende yo nu ma byi oba ma mi ude, lubana li ungwo ayiwi kwuba ni engyaa gbodge mi okwakye mgbi emi odzimbasho.

³⁶ Elodzimbasho ne tokye mbi emaa? Naadi li mbi ema ta ngwi elodze ne fatilaa?

³⁷ Kini inggise tsewe gbex ongwu li oyegbo hona dze yi umba mgbi onodzi yo, o ka ye dafi li ola ngwi Otse abuon wo ngwi ani le lo mani.

³⁸ Inggise nbyi elodze ne mi abube yo, a kawa kyon dzeke abube.

³⁹ Nghane emi ongwunani, itukwu no dze ema olola ogbeeso, dika kwu ma ondudze angbeka ogbodge ba.

⁴⁰ Kpaa ni a kyo alungwo duu saan no di dze mi ola kpaa.

15

Okye-kye mgbi iKrestu mi ikwu

¹ Emi ongwunani, i mina ani owe ema eso osuse ngwi n ple gbo nya ema ngwi ema gbe di kwulesse dze efu neni.

² Kini ema byi Eso Osuse ngwi ani gbo nya ema ne saan yo ema wato, kpaa ni li nga bayo oyeye onuunu mgbi ema duu weeni.

³ Lubana ani nya ema eso ingblimo dafi a kye nu ani mani gbex: iKrestu kwulu ikye ali ibwubwe mgbi eyi dafi Afe lo mani,

⁴ a kyon ndzi, mi egbe ongwu ta ma a kyilen mi ikwu,

⁵ O di mblegba tu iPyita, beyi iwyodefa ntonani.

⁶ Ngwi ungwone kyo nye ne, O di mblegba tu emi iKrestu angbeka ngwu mmbwo mgbi ama nga ideli eda ononyi, angbeka mi ele ka to oshishe ma, kpaa angbeka yo kwulu wa.

⁷ Ne O mblegba tu ifensi di wa mblegba tu ama ogbikyon duu,

⁸ ongyeengye duu yo, O mblegba tu ani ngwu a mba ani mi itodze ba neni.

⁹ Lubana ani nghao yeyikpa mbi ama ogbikye iYesu duu, ani gbuo ngwi a ki kwu ani gbex inggise ogbikye iYesu kpaa ba, ikyesine ani nu emi odzimbasho iso.

¹⁰ Nghaduu li mi elela mgbi Imgbasho ngwi ani yee ungwo ani dze ne aani, elela mgban ne kyido mbi ani saan. N kyido nga ma duu, li onghaangha mgbi ani ba kpaa li elela mgbi Imgbasho ndze yi ani mani.

¹¹ Ungwo okwukwo yo, ni li ani hona ama gbeeso kpaa ka li eso ma onyi ta, di li eso ne ngwi ema noyeye mi ele aani.

Okye-kye mgbi emi ikwukwo

¹² Kini eyi gbeeso gbex a kyile iKrestu mi ikwu waali, kysine ngwi ema angbeka li gbex okye-kye mi ikwu dzema ba?

¹³ Kini okye mi ikwu dzema bayo, iYesu kpaa a kyilon ba.

¹⁴ Ma ni a kyile iYesu bayo, eso mgbi eyi ogbodge beyi oyeye mgbi ema onuunu duu weeni.

¹⁵ Li nga ta ba, a di eyi dafi obwende ama ogbatsika mi odzimbasho, lubana eyi gbex Imgbasho kyile iKrestu mi ikwu. Kpaa O kyilon luba, ni li otsitsi gbex a li kyile emi ikwukwo bayo.

¹⁶ Lubana ni a ka kyile emi ikwukwo bayo, iYesu kpaa a kyilon ba sewaalo.

¹⁷ Ma ni a kyile iKrestu bayo, oyeye onuunu mgbi ema weeni, ema ka woto ifu ali ibwubwe mgbi ema.

¹⁸ No li nga yo, ama ngwu nuna mi ifu iKrestu kpaa a tila-tila jo.

¹⁹ No li mi itodze ne ta ngwi eyi kye ewe ogbe byiibi mgbi eyi byi mbi iKrestu yo, eyi yee ungwo elela nga mi ese duu.

²⁰ Nghaduu mi otsitsi yo, a kyile iKrestu mi ikwu, o di li ongwovle mgbi emi ikwukwo duu.

²¹ Lubana dafi ikwongye nye mbi inggise onyi ne, li nga ngwi okye-kye mi ikwu kpaa nye mbi inggise onyi aali.

²² Bana, ngwi inggise duu tu ikwongye ikpewo Adan ne, li nga ngwi eyi duu ka tu oshishe ikpewo iKrestu aali.

²³ Nghaduu ali inggise ono mgban dze, iKrestu li ongwovle, ono ngwi o wa ye ta a ka kyile emidan.

²⁴ Ta ese ka ngye, man o ka dzili alungwo duu beyi mfyeyile esuto wo Imgbasho Otson abo.

²⁵ Lubana iKrestu ka kyuuto nghataa mbise o ka talu engyikyili mgban weese.

²⁶ Ongyikyili ongwile olele o ka dzilin yo li ikwongye.

²⁷ Lubana odze ngwi Afe gbex, <<O ka gbe alungwo duu won abo ne kpaa.>> Imgbasho wodze <<Alungwo duu>> na ba, ikyekye li Imgbasho abon kye alungwo duu wo iKrestu abo aali.

²⁸ Ono ngwi alungwo duu woke abo mgbi ongwex Imgbasho ma o ka yile ewon wo Imgbasho ke abo, ikye ni Imgbasho li Ugabaidu.

²⁹ Kini okye mi ikwu dzema ba ma, ama ngwu a kyo ma iBatisima mi ikye emi ikwukwo ntona ka kysine? Ni inggise li kye mi ikwu ba dududu ma, kysine a le kyo inggise iBatisima gbikye ma?

³⁰ Eyi ma kysine ngwi eyi di kye onbukwo mgbi eyi le nu eba ali obyi duu?

³¹ Ani kye ewen le bo ikwu alegbe, li abo otsigege ngwi ani sulun mbi ema mi ikye iKrestu ma nin le gbodge ne nga aani.

³² Ki ani tsiibe yi mmbwaba emi Efesu mi ewe otsetse mgbi mmbwe yi eyi tama, li ali oyabo ngwi ani tu? Kpaa nu ma li kyile emi

ikwukwɔ bayɔ, <<Ba ni eyi gye di wa na, ikyesine ekeka i ka kwulu.>>

³³ Ka nu ma kyo ema ikwanghewo ba, uka obube li mbe inggise osuse.

³⁴ Yile itukwu bese di nya yi ali ibwubwe na, ikye onu ema ayiwi yo inggise angbeka toma ngwu yama difwi Imgbasho waba.

Ikpewo nkyee mi ikwu

³⁵ Kaba inggise oka ka byita gbɛɛ, <<A ka kyile emi ikwukwɔ sine? A ka kyee yi ali ito ewo?>>

³⁶ Ka li ikwangha ba na, eto ungwɔ li bwa kyeme se wa lumbye to ese.

³⁷ Inene ungwɔ ngwi abu kye kya li idzidza yi mmbye nli wa lu to nani.

³⁸ Ali eto ungwɔ duu Imgbasho li nu ma ewo ngwi O di kpan mani.

³⁹ Ikpewo duu li ungwonyi ba, inggise sulu ikpewo idzidza, mgbi mmbwaba yi ingwuno beyi mmbweni kpaa li idzidza-dzidza.

⁴⁰ Ewo emi esho to ma se ewo emi ese kpaa kwa to; ewo ongwɔ esho dze yi ito okwɔkwɔ mgban, se ewo ongwɔ ese kwa dze yi ito okwɔkwɔ mgban aali.

⁴¹ Ono dze yi ito okwɔkwɔ mgban, ofyia kpaa dze yi mgban, mce kpaa to yi mgbi ama, okwɔkwɔ mgbi mce angbeka kpaa di nye idzidza yi angbeka.

⁴² Li ngha nkawa dze yi okyee-kyee mi ikwu aali. Ikpewo ongwɔ a kye ndzi na ka bwa, kpaa ongwɔ a ka kyilon na ka bwa wuba gyegwu.

⁴³ A li kye ikpewo ndzi mi mmwe ba, kpaa a li kyilen mi okwɔkwɔ; a li kye ndzi mi ewo odzaatsi, nghaduu a li kyile mi mfyee;

⁴⁴ A li ndzi mi ikpewo mgbi mmbwe yi eyi, a li kyilen mi ikpewo ongwɔ onodzi.

Kini ikpewo mgbi mmbwe yi eyi dze yo, ikpewo mgbi onodzi kpaa dze.

⁴⁵ Li ngha ngwi a lo gbɛɛ, <<Adan ongwu ababo na li inggise oshishe>> Ongwu olele li onodzi onu oshishe aali.

⁴⁶ Mgbi atta li ba ababo se mgbi onodzi li wa ba olele.

⁴⁷ Adan ongwu ababo na li mi ombulu ongwɔ ese ngwi a man, kpaa ongwu fan na yo kye mi esho.

⁴⁸ Ali inggise nli mgbi ese yo, ewo mgban li ungwonyi yi ongwu a me mi ombulu ongwɔ ese neni. Ama nli mgbi esho yo, a li ungwonyi yi ongwu nkye esho nani.

⁴⁹ Dafi ngwi eyi kye otsonodzi mgbi inggise ongwɔ ese ne ne, li ngha ngwi eyi dika kye otsonodzi mgbi ongwu nkye esho na aali.

⁵⁰ N le nya ema emi ongwunani saan gbɛɛ, mmbwe yi eyi ka yagba gyokwude esuto mgbi Imgbasho ba, hona ungwɔ odzili-dzili ka yagba gyokwude ungwɔ nka dzili ba na ba.

⁵¹ Gadɔ nin nya ema ungwɔ odaada na, li eyi duu ka kwulu ba, kpaa eyi duu a ka kyata eyi.

⁵² Ka le vla dafi a li blinɛ neni, mi ono ngwi a ka fo agba ongwɔ olele mani. Lubana agba kawa fo man a ka kyile ikpewo ama nka kwulu wuba ntonani. Ta a ka nyine eyi ikye ni eyi ka kwulu wuba.

⁵³ Ikyesine ikpewo nli dzili ne ka kyata yee ikpewo odzili wuba, ikpewo nli kwulu ne ka yee ikpewo okwulu wuba.

⁵⁴ Ono ngwi ikpewo odzili-dzili ne yee ikpewo odzili wuba ikpewo okwulu-kwulu kpaa yee ikpewo nka kwulu wuba ta ungwɔ ngwi a lo gbɛɛ, <<Onghaangha kye ikwongye mbe,>> na ka kaka yeye.

⁵⁵ <<Ikwongye, onghaangha mgbi abu ko? Ikwongye oto-to mgbi abu ma di dze ole?>>

⁵⁶ Oto-to mgbi ikwongye li alobube, mfyee mgbi alobube di li ola.

⁵⁷ Nghaduu eyi ka ta Imgbasho angba dafi o nu eyi onghaangha mbi Otse iYesu iKrestu mani.

⁵⁸ Nghane emi ongwunani ama okpa ani itukwu, kwudze kpoklo di kye ewema duu nu ikye ido mgbi otse na, ikyekye ema ye dafi ido mgbi ema ka weeni ba mani.

16

Umba onuunu ikye ama onoyee

¹ Nghane mi ikye umba mgbi ama osunu Imgbasho mi ayese mgbi iJudia na yo, kyo yeye dafi ani nya emi iKrestu mi iGalatia gbɛɛ nu ma kyo nani.

² Mi egbe ongwɔ ababo mi ali ikyidu, ali inggise no kye ongwɔ udza le da, dafi o li tu mani. Ikye ni ani wa ba yo, a ka kyadze gbe umba wuba mani.

³ Ni ani wa kaka ta, n ka kye afe okye inggise tso nu ama ema sadu di do ma eso yi umba mgbi ema lu iJerosalin ntonani.

⁴ Ni i gbuo gyo ni ani kpaa ke yo, a sika wafɔ yen.

IPol tsewe agaba

⁵ Ni ani ngyelu okyee mi iMasidonia ta n ka ba mbi ema, ikyesine n weka onye ongwɔ iMasidonia.

⁶ Ye kyo ba n ka kye ongwono gwee yi ema, hona n ka kye owa ololo ne duu yi ema, adzi ni ema tobyi ani mi agaba angbeka ngwi n ka ke duu.

⁷ I minen odzedze agaba nye di di ema ta ba, i minen okye egbe efa yi ema, kini Imgbasho noofɔ yo.

⁸ Nghaduu n ka tila dze Efesu nghataa ba ono iPentikosu,

⁹ ikyekye ofɛ la ani asisa gbadaa okyido mmeneni, kpaa inggise kwuba gbela yen ba.

¹⁰ Kini iTimoti wa ba yo, di na gbɛɛ unkonyi nka ba yan imio dzema ba na.

Lubana o kyido mgbi Otse yeye dafi ani le kyo neni.

¹¹ Inggise onyi no wa fwa ogban ba. Won ofe beyi emi ongwuneyi ntona nu ma ye luba mbi ani na, n le giine ma.

¹² Mi odze mgbi ongwuneyi Apolo yo, ani biban gbee no wafɔ yi engwuneyi ntonɛ kpaa ewo kye lon esho ba, o kawa ba onɔ ngwi o tu onɔ mani.

¹³ Gbewebyi na, kwudze kpɔklɔ mi oyeye onuunu, li inggise ama otsabo igɛɛ di fyumfye itukwu na.

¹⁴ Kyo alungwo duu mi okpitukwu.

¹⁵ Ema ye dafi eto mgbi iStefana li ababo mi ayese mgbi Acaya okyatitukwu mani, a di kye ewoma nu mi ido mgbi emi osaan. N le tekye nu ema emi ongwunani gbee,

¹⁶ ni ema sunu ito inggise ntoneni beyi ama nle kyido ito mgbi ama neni.

¹⁷ N tsatsa onɔ ngwi iStefana yi iFotunatu beyi Akayiko ba mben mani, ikyekye a le tobyi ani gbikye ema.

¹⁸ Lubana a nu itukwu be ani yi ema ese. Ito inggise ntona gbua a ki nu ma umba.

Angba olele

¹⁹ Obyi iKrestu emi ayese mgbi Asia nu ema angba kwuba. Akwila yi iPrisila beyi emi iKrestu ama nkwakye mi ude ama kpaa le ta ema angba lele mi iyi mgbi Otse.

²⁰ Ama onoyeye duu le ta ema angba. Ta ewema angba di tsekwalu ewema mi ofe osaan na.

²¹ Li ani iPol lo afe angba ne abuen.

²² Inggise ngwu Otse kpan itukwu bayo ikamba ikyon. Otse ki ye ple!

²³ Ni elela mgbi Otse iYesu dze yi ema.

²⁴ Okpitukwu mgbi ani no ke mbi ali inggise ndze mbi iKrestu iYesu duu. No dze ngha.

Afe mgbi iPol ongwu fan mbi ama onoyeye Emi iKorinti

¹ Afe ne kye mbi ani iPol ngwu Imgbasho kwin ela ogbikye iYesu iKrestu mi oweka mgban, beyi iTimoti ongwuneyi le ke mbi okwakye mgbi emi odzimgbasho mi iKorinti, beyi emi osaan mi ese Acaya duu gbæ:

² Elela beyi iyu nkye mbi Otseyi Imgbasho beyi Otse iYesu iKrestu na, no dze yi ema.

iPol ta Imgbasho angba

³ Ba ni i tse Imgbasho Otso Otse mgbi eyi iYesu iKrestu, Otso odi elela beyi Imgbasho nli nu omyee-mye duu,

⁴ ongwu ndi li nu eyi omyee-mye mi ali okakewo duu, ikyegbæ ni eyi kpaa nu ama ndze yi okakewo omyee-mye ngwi eyi abueyi gbæ mbi Imgbasho mani.

⁵ Lubana dafi adze ogyeegye mgbi iKrestu fe kaka oshishe mgbi eyi ne, li nga ngwi omyee-mye kpaa fe yaoke mbi eyi mi ikpewo iKrestu aali.

⁶ Kini eyi dze mi okakewo yo, li ikye iyu beyi owato-wato mgbi ema. Ni eyi dze myeemye yo, li mi ikye omyee-mye mgbi ema nkye mi onyotse okwuukwu mgbi ema yi itukwu oshiishi mi adze ngwi eyi gye yi eka ungwonyi nani.

⁷ Ma ewe ogbe byiiby mgbi eyi ikye ema le kpoklɔ, ikyesine eyi ye gbæ dafi ema gyadze ungwonyi yi eyi ne, li nga ngwi ema dika dze mi omyee-mye mgbi eyi kpaa aali.

⁸ I mina eyi gbæ ni ema ka dze ikwukwu mi adze ngwi eyi gye mi ayese mgbi Asia na ba emi engwunee yi. Eyi kaka iso ngwi nga eyi mmye, ikyenghane oshishe kpaa to sisi eyi itukwu.

⁹ Mi otsitsi yo, itukwu mgbi eyi ye dafi a gbo eyi ikwo ikwongye mani. Nghaduu ungwone kyo ikyegbæ ni eyi ka kye abo tsigese ikye eweyi ba, kpaa mbi Imgbasho ongwu nli kyile inggise mi ikwongye nani.

¹⁰ Imgbasho dula eyi to mi ito imio ikwongye nani, o dika dula eyi to. Mbon eyi gbæwebyi gbæ o dika kiyayi odulu eyi to kpɔ,

¹¹ dafi ema le tobyi eyi mi ibo neni. Ibyi inggise ka ta Imgbasho angba ikye ema, mi mse ngwi eyi gbæ mi ibo ntone neni.

iPol kyata oweka mgban

¹² Onene li abo otsigegæ mgbi eyi aani: ewe otseetse tso obwendæ gbæ eyi bwa eweyi fyii mi ese, onghaangha duu mi odzeedze mgbi eyi beyi ema, mi osaan beyi odze mi otsitsi nkye mbi Imgbasho nani.

Eyi kyungwo ntone mi ozoyeye mgbi ese ne ba, kpaa li mi elela odiidi mgbi Imgbasho.

¹³ Lubana eyi lo ungwɔ oka ngwi ema ka gbɔn gbæ hona difwin ba luba. Ani gbekabyi gbæ,

¹⁴ dafi ema difwi eyi mi agya oka ne, ema kawa difwi saan gbæ ema ka tsaabo igegæ mbi eyi, dafi eyi kpaa ka tsaabo igegæ mbi ema mi egbe ngwi Otse iYesu ka yido mani.

¹⁵ Ikyegbæ ani dze yi abo otsigegæ mi efu ne, n tsewe oteyi ke mbi ema ikye ni ema tu mgbede akpe efa.

¹⁶ N tsewe onye mbi ema onani ka ke iMasidonia di ye mi iMasidonia nye mbi ema, ni ema di wo ani ofe lu iJudia.

¹⁷ Ono ani tsewe ungwone ma, ani byin loo? Naadi ani dze dafi inggise ama nli gbela odze gbæ, <<een hona ei ikye no kpa inggise angbeka maa>>?

¹⁸ Nghaduu, dafi Imgbasho li nyine ba ne, eso mgbi eyi mbi ema li <<een yi ei ba.>>

¹⁹ Lubana eso mgbi Ongwe Imgbasho, iYesu iKrestu ngwu ani yi iSaila beyi iTimoti gbo mi idzidze ema ne, li odze mgbi <<een yi ei ba>> kpaa mbon li <<een alono duu.>>

²⁰ Lubana mmbwo ondu odzeedze ngwi Imgbasho dze duu, li <<Een>> mbi iKrestu. Nghane eyi li kyo <<no dze nga>> mi ikpewon ikye okye okwokwo nu Imgbasho.

²¹ Ikyenghane li Imgbasho nu eyi yi ema kwudze kpoklɔ mbi iKrestu. Li ongwu sadulu eyi,

²² o kye ambæ otso gbæ eyi li mgban dze eyi diyæ kye onodzi mgban woke itukwu mgbi eyi dafi ambæ mani, otso obwendæ ungwɔ nkye iyayi.

²³ Imgbasho nu ani ofe ni ani ke iKorinti ba, ikye ni ema to myeemye.

²⁴ Eyi yama le si ema siisi mi oyeye onuunu mgbi ema ba, kpaa eyi le kyido yi ema ikye atsa mgbi ema, ikyekye li mi oyeye onuunu ngwi ema kwudze kpoklɔ aani.

2

¹ Nghane n bwalu mi itukwu mgben gbæ n ka dzagaba oka ke mbi ema oka nu ema itukwu owulu-wulu wuba.

² Lubana ni ani nu ema itukwu owulu-wulu ma, li ele sisi toma nka nu ani atsa, li ema ama ani nu ema itukwu owulu-wulu ne banaa?

³ Li ikyengha ani lo ke mbi ema aali, gbæ nin wa ba yo, nin ka sulu itukwu owulu-wulu yi ama nka nu ani ewo sheta ntona ba mani. N dze yi abo otsigegæ ikye ema duu, ikyesine ema duu ka dze mi atsa yi ani.

⁴ Lubana ani lo ema afe ne mi itukwu owulu-wulu yi itingga mi igegæ yi etse ine kpakpa, ikye onu ema itukwu owulu-wulu ba, kpaa ni ema ye dafi okpitukwu mgbi ani ikye ema dze mani.

Okye alobube ta inggise mkpa

⁵ Ni inggise ba yi inggise itukwu owulu-wulu yɔ, otsungwo yama nu ani itukwu owulu-wulu dafi o nu ema ibyibyi na jo ole gbɔn mwonya wele kye ba.

⁶ Adɔ okwookwo ngwi ibyi kwon na gyɔgyɔ yan.

⁷ Nghane i wogyɔ ni a dzanta di gyilan, ikye no ka kyelela lamyɛ ba mani.

⁸ Ikyenghane, ani gbabo nu ema, gbɛɛ ni ema yile okpitukwu mgbi ema mbon tson.

⁹ Itɔdze ngwi ani lo afe ne mbi ema ma, li ikye ombadi di ye kini ema ka yagba siikyenu mi alungwo duu yɔ.

¹⁰ Ali inggise ngwu ema dzanta yi obube yɔ, Ani kpaa dzanta. Ma ungwɔ ngwi Ani dzanta na, ni ungwɔ di dze ngwi a ka dzanta yɔ, Ani dzanta yan, ne yeba ni ungwɔ dze ongwɔ a ka dzanta yɔ n dzitan mi ikye iKrestu ikye ema,

¹¹ ikye ni iSatan ka si eyi ikye weese ba mani. Lubana oweka mgban da eyi daada ba.

Ama ogbo Eso mgbi ondu odzedze ofufe

¹² Ono ngwi ani ke iTroa oka gbeeso mgbi iKrestu ma, ani difwi gbɛɛ Otse ple me ani ofe wa.

¹³ Nghaduu itukwu be ani ese mi ele ba, ikyekye n yama kwokyi ine yi ongwunen iTaitusu mi imbe na ba. Nghane n nya ma gbɛɛ se egbe oka, man si nye lu iMasidonia.

¹⁴ Nghaduu n ta Imgbasho angba, ongwu nli gbe eyi teyi mi onghaangha mgban mbi iKrestu nani, o di nu eyi gbɔfwe ozoyeye mgbi iKrestu mi ali imbe duu dafi mmgbɛ mani.

¹⁵ Lubana mbi Imgbasho eyi li mmgbɛ mgbi iKrestu mi idzidze ama a dula ma wato beyi ama nle dzili mani.

¹⁶ Mbi ama nle dzili yɔ, eyi nukwo ikwukwo; mbi ama a dula ma wato yɔ, eyi gbungbe inggise oshishe. Ma li eme me okyɔ ito ido na?

¹⁷ Eyi dze dafi inggise angbeka nli gbɔdze Imgbasho ikye otu eni owaawa na ba, ng-haduu, mbi iKrestu eyi le gbɔ otsisi, dafi inggise ama a do ma eso kye mbi Imgbasho mani.

3

¹ Eyi dile kyile eweshoo? Naadi eyi mina okye afe ka tso ema hona gbe afe mbi ema dafi angbeka li kyo maa?

² Ema abuema gbikye afe mgbi eyi, ngwi a lo wodze itukwu mbi eyi, ngwi ali inggise duu ye di gbɔn.

³ Ema tso gbɛɛ ema li afe nkyɛ mbi iKrestu, ambe ido mgbi eyi, a lon mi eniibe ba kpaa a lon mi Onodzi mgbi Imgbasho

oshishe, li mi ikwutse opata ba, kpaa li mi itukwu mgbi inggise owamye.

⁴ Ito abɔ otsigege ne li mgbi eyi mi ikpewo iKrestu mi inai Imgbasho.

⁵ Li ikyegbɛɛ eyi me okyungwo ntone abueyi ba, kpaa li Imgbasho nu eyi mfye okyido ntoneni.

⁶ O nu eyi me ogbeeso mgbi ondu odzedze ofufe, yama li mi afe olɔɔlo ba kpaa li mi Onodzi; lubana afe olɔɔlo na li ba yi ikwongye, kpaa Onodzi li nu oshishe.

Okwɔkwɔ mgbi ondu odzedze ofufe

⁷ Ola ogbugbe ngwi a lo mi ikwutse na ba yi ikwongye, nghaduu Imgbasho kye nu yi okwɔkwɔ. Ngwi okwɔkwɔ na le sila ne kpaa, ola na nu ine mgbi iMose kwo ni emi Israi yagba kyinebyin ba.

⁸ Nghane ka kyosinese ngwi ido mgbi Onodzi ka kwo nghaabo na ba?

⁹ Kini ido nba yi inggise odzili-dzili dze yi okwɔkwɔ mgban ma, ido nba yi osaan ka kwo sine na nghalo!

¹⁰ Okwɔkwɔ nba onene shewo ne, nu ungwɔ ogbugbe na dze yi okwɔkwɔ wuba du.

¹¹ Ni ungwɔ nle sila ogbugbe na dze yi okwɔkwɔ ma, okwɔkwɔ mgbi ungwɔ nli gyegwu na ka she sine ngha!

¹² Nghane, ngwi eyi dze yi ito ewe ogbe byiibyi ne ne, eyi dze yi abɔ otsigege.

¹³ Eyi yama dze dafi iMose nkye ayangwuto tukwu ine blii ikye ni emi Israi ka di osila-sila mgbi okwɔkwɔ na ba na ba.

¹⁴ Nghaduu alono ngwi a gbo ola na yɔ, ayangwuto na li tukwu ma itukwu ofwo ola nani nghataa ba ine, lubana li mbi iKrestu ta ngwi a ka yagba kyi kwulu ayangwuto nani.

¹⁵ Nghataa ba ine ni a gbo ola mgbi iMose kpaa, ayangwuto ka tukwu ma itukwu ma.

¹⁶ Nghaduu alono ngwi inggise kyata luba mbi Imgbasho yɔ, a li kyi kwulun ayangwuto nani.

¹⁷ Ikyenghane Otse li Onodzi, ma ali imbe ngwi Onodzi mgbi Otse dze yɔ, ewo osheta-sheta dze efu.

¹⁸ Ma eyi ama ayangwuto tukwu eyi ine ba ntone, eyi ka dze dafi idzinggi nka kye okwɔkwɔ mgbi Otse tso mani. Ma dafi Onodzi mgbi Otse le kyido mbi eyi ne, eyi ka nghao yee dafi ongwu mani dze nghao kye okwɔkwɔ mgban tso.

4

Aludu nwodze ishe ibiibe

¹ Nghane, dafi li ikpewo elela odiidi mgbi Imgbasho ngwi eyi tu ido ne ne, i ka yile itukwu iyikpa mi ele ba.

² Ikyenghane, eyi fwa ofe ungwɔ ama odaada beyi ofe ayiwi, eyi kpagya inggise wo hona mwonya mi elodzimgbasho ba.

Mi ofe oka yo, eyi kye otsitsi tsoto saan, eyi kye eweyi nu ikye okyo oweka mgbi ali inggise duu mi ine Imgbasho.

³ Ma ni Eso Osuse mgbi eyi gbosa bayo, i gbosa ba mbi ama nle dzili mani.

⁴ Imgbasho ongwí ese onene ne blu ama onoyeye ba ine ongwí itukwu, ikye nu ma ka yama di osa mgbi Eso Osuse nli okwókwó mgbi iKrestu nli odzēdzē mgbi Imgbasho ne ba.

⁵ Lubana eyi le gbeeso mgbi eweyi ba, kpaa li eso gbēe iYesu iKrestu li Otse di gbo gbēe eyi li engbido mgbi ema mi ikye iYesu.

⁶ Ikyesine ka li Imgbasho ngbēe, <<Ni osa tsoto mi iifu ma,>> nu osa mgbān tso mi itukwu mgbi eyi ikye onu eyi difwi ozoyeye mgbi okwókwó mgbi Imgbasho mi inai iKrestu aali.

⁷ Kpaa eyi dze yi aludu wodze asuusu, otso gbēe mfyē ama onghaangha duu kye mbi Imgbasho li mbi eyi ba.

⁸ A si eyi kpakpa mi ali agya duu, kpaa a yama dziye eyi ba; i kaka eyi ewo, kpaa eyi yama dze ewo atsi ba!

⁹ A nu eyi iso kpaa a kye eyi ngwuta ba; a gbo eyi tukwu ese kpaa a dzili eyi ba.

¹⁰ Alono duu eyi li kye iso ikwongye mgbi iYesu mi ewo mgbi eyi le ga kye, adzi ni oshishe mgbi iYesu na tsoto mi ewo mgbi eyi.

¹¹ Lubana eyi ama ndze oshishe ntone a li kye eyi le nu ikwongye alono duu ikye iYesu, adzi ni oshishe mgbān no fwi to mi ikpewo mgbi eyi nka bwa neni.

¹² Nghane, ikwongye le kyido mbi eyi ama ogbikyē iYesu, kpaa oshishe le kyido mbi ema.

¹³ Afe lo gbēe, <<Ani gbo ikyekye ani noyeye; mi ito oyeye onuunu na, eyi kpaa gbo ikyesine eyi noyeye,

¹⁴ ikyekye eyi ye gbēe ongwu nkyile Otse iYesu mi ikwu na dika wa kyile eyi kpaa mi ikwu yi iYesu dika kye eyi yi ema tso mi inai Imgbasho.

¹⁵ Ungwó ntone duu li mi ikye abo oyaaya mgbi ema, ikye ni elela nle to mbi inggise kwuba-kwuba na no nu angba ota-ta mbwo fe yangwuta ikye okwókwó mgbi Imgbasho.

¹⁶ Nghane eyi yama gbeka ngwuta ba. Mi ine yo i dze dafi eyi le nyanya mani, nghaduu mi onodzi yo eyi le yee ofufe alegbe-alegbe ta aali.

¹⁷ Lubana okakewo ama oshilele ntone le me eyi ofe okaka okwókwó igyegwu nkawa nu adze mgbi eyi ogyeegye duu yee dafi li unka ba mani.

¹⁸ Ikyenghane eyi kye ine mgbi eyi byi ungwó ama eyi li di ine-ine ba, kpaa li mi ungwó ama eyi li di ma mi ine ba mani. Lubana ungwó ama eyi li di ma ine-ine

ntone kawa nye, nghaduu ungwó ama eyi li di ma ba ntona li gyegwu.

5

Imbe odzēdzē mgbi eyi mi esho

¹ Lubana eyi ye gbēe kini a kye afu ngwi eyi lato ele mi ese ne kye nghalu kpaa, eyi dze yi ude ngwi Imgbasho mbe eyi ele, ude nli gyegwu mi esho, ngwi a mbe mi abo mgbi inggise owamye ba mani.

² Ikyenghane eyi le sandu, le gbekabyi gbēe a kawa to eyi angwuto yi imbe ongwí eyi kawa dze mi esho,

³ ikyesine kini a to eyi angwuto yo, eyi ka dze ibiba wuba.

⁴ Lubana dafi eyi ka lato afu ne ne, okye le lo eyi, eyi dile sandu, ikyena i mina eyi odze ibiba ba kpaa nu ma to eyi angwuto yi odzēdzē ongwí esho, ikye ni oshishe igyegwu kye ungwó ndze mi mmbwe yi eyi ne mbe.

⁵ Nghane li Imgbasho ta eyi mi itodze mgbān di kye Onodzi mgbān nu eyi, otso ambe gbēe li ungwó nkawa dze.

⁶ Ikyenghane eyi dze yi abo otsigege alono duu di ye gbēe ngwi eyi ka dze ude mi ikpewo ne ne, eyi dze enggengga yi Otse.

⁷ Eyi dze oshishe mi oyeye onuunu, yama li mi odiidi ba.

⁸ Ani gbēe, eyi dze yi abo otsigege di mina odzata ikpewo neni di dze ude yi Otse.

⁹ Nghane ni eyi dze mi ikpewo ne hona dzata ikpewo ne kpaa, li imina mgbi eyi okyo owitukwu mgbān.

¹⁰ Lubana ali inggise duu ka ba inai iKrestu, ikye non fwo eyi ikwó. O dika nu ali inggise umba ngwo yi ido ngwi ot-sungwon kyó mi ono ngwi o ka dze oshishe mani, yeba ni li osuse hona obube kpaa.

Ido oyile ide gye

¹¹ Nghane, eyi ye ungwó nli mmwe onu Otse Imgbasho mani, eyi li biibe yi inggise gbēe nu ma difwi. Odzēdzē mgbi eyi le gblegedee mi ine Imgbasho, n di tsewe gbēe le gblegede mi itukwu mgbi ema kpaa.

¹² Eyi dile fya otse eweyi mi ine ema wuba, kpaa le nu ema ofe okye abo tsa igege ikpewo eyi, ikye ni ema nu ama nli tsaabo igege mi ungwó ama a li di mi ine nga ungwó nwoto itukwu ma uka.

¹³ Ni i dze dafi eyi li emi ede yo, li ikye mgbi Imgbasho; kpaa ni eyi dze saan yo, li mi ikye mgbi ema.

¹⁴ Lubana li okpitukwu mgbi iKrestu non dze nga aali, ikyekye eyi difwi dafi inggise onyi kwulu mi ikye ali inggise tsatsadu mani, ikyenghane inggise duu kwulu.

¹⁵ iKrestu kwulu ikye ali inggise duu, ikye ni ama ndze oshishe duu dze oshishe ikye ewoma wuba kpaa no li mi ikye ongwu

nkwlulu ikye ma, ngwu a di kyilon mi ikwu nani.

¹⁶ Ne, wita onene nghataa lu iyayi eyi li nu inggise mmwe mi odzēdzē mgbi mmbwē yi eyi ba. Dafi eyi teyi nu iKrestu mmwe mi ito ofe ne nye ne kpaa, onene eyi le kyo nga wuba.

¹⁷ Nghane, kini inggise dze mi ifu iKrestu yo, otsungwon li atta ofufe; odzēdzē mgbi otsungwo ogbugbe nye, otsungwon yee ingise ofufe!

¹⁸ Ungwontone duu kye mbi Imgbasho, ongwu nyile eyi gyiide yi ewon ikpewo iKrestu di wo eyi ido oyile ide gye nani:

¹⁹ Lubana Imgbasho kye alobube mgbi inggise wuuta ba, o yile inggise gyiide yi ewon ikpewo iKrestu. O di kye ido ogbeeso yile ide gye wo eyi abo.

²⁰ Ikyenghane eyi li ama ogbikye iKrestu, i dze dafi Imgbasho kye ekye otooto mgban le nye ikpewo eyi mani. Eyi le tēkye nu ema gbikye iKrestu gbē: Yile ewema gyiide yi Imgbasho na.

²¹ Imgbasho nu ongwu ndze yi alobube ba na yee ife mgbi alobube ikye eyi, adzi ni eyi yee ama osaan mbon mi inai Ongwu.

6

¹ Dafi eyi li ama okyido yi Imgbasho ne, eyi le tēkye nu ema gbē elela mgbi Imgbasho ngwi ema gbē na no ka nyanya ba.

² Lubana Afe gbē, <<Mi onō oyabo mgbi ani ma, ani fwo akwo mgbi abu, mi egbe owato-wato ma kpaa ani ya abu abo.>> N nya ema, onene li onō oyabo mgbi Imgbasho, onene li egbe owato-wato.

IPol kaka adze

³ Eyi yama kye ofishi tukwu inggise onyonyi ofe ba, ikye nu ma ka di obube mi ido mgbi eyi ba.

⁴ Tatase yo ngwi eyi li enghido mgbi Imgbasho ne, eyi kye eweyi nu mi ali ofe duu: mi itukwu oshiishi kpakpa; mi onō okakewo; mi onō okenye-kenye yi onō iso;

⁵ mi onō ibe ogboogbo, mi onō obawi yi onō ablodze; mi onō okyido kpoklō, onuna mi otu ba beyi onō enbwa;

⁶ mi onō odze saan, onō odifwi-difwi, onō okwu onyotse di kyumse; mi Onodzi Osaan beyi mi okpitukwu otsitsi;

⁷ mi odze ogboogbo otsitsi beyi mi mfyē mgbi Imgbasho; yi okyiika mgbi odze saan mi abugye beyi abube;

⁸ nye mi okwōkwo beyi okwushanye, ogbōdze obube beyi odze osuse; ingblimo, nghaduu inggise li gbē eyi li ama omwonya;

⁹ a ye eyi, nghaduu a kye dafi a ye eyi ba mani; a kye eyi gbē eyi le kwulu, kpaa eyi ka dze oshishe; a sulu eyi ibe, nghaduu a ngwo eyi ba;

¹⁰ a di eyi dafi eyi le kyelela, kpaa eyi dze yi atsa alono duu; a di eyi dafi eyi li emi adze, nghaduu eyi le nu inggise kwuba yee emi aludu; a di eyi dafi eyi dze yi nka ba, kpaa eyi sulu alungwo duu.

¹¹ Eyi gbōdze yi ema emi iKorinti yi itukwu asisa, di kwulu itukwu mgbi eyi nu ema.

¹² Eyi yile okpitukwu mgbi eyi da ema daada ba, kpaa ema le kye mgbi ema da eyi.

¹³ N le gbōdze yi ema dafi n kika gbo yi emi ongwani mani, inghawane ema kpaa kwulu itukwu mgbi ema nu eyi na.

Ka li ungwonyi yi emi ese ba

¹⁴ Ka li ungwonyi yi emi ese ba. Lubana li alungwo kwokyi osaan yi imbaali? Naadi li alungwo kwokyi osa yi iifu?

¹⁵ Li ali ogbela-gbela dze idzidze iKrestu yi ude angwula? Li alungwo kwokyi inggise oye Imgbasho yi inggise oye Imgbasho ba?

¹⁶ Li alungwo kwokyi ozu mgbi Imgbasho yi angwula? Lubana eyi li ozu mgbi Imgbasho oshishe. Dafi Imgbasho gbo mani gbē: <<Ani ka dze yi ama di kyikyē yi ama, ani dika li Imgbasho mgbi ama, a dika li emidani.

¹⁷ Ikyenghane tase mboma di gbua yi ama na, li nga ngwi Otse gbo dali. Ka kye abo gbo ungwō idza ba, ta ani ka gbē ema.

¹⁸ N ka li Otsema, ema dika li emi ongwani engyulo yi engyaa, li nga ngwi Otse onghaangha gbo aali.>>

7

¹ Emi okeyi, ngwi ondu odzēdzē ntone dze mbi eyi ne, ni eyi dze kyila yi ungwō ama nli nu ewo beyi onodzi tsiidza mani, ni eyi kye mmwe nu Imgbasho ni eyi fya di dze yeye dafi ongwu mani.

IPol tsatsa

² Mē ofe ikye eyi mi itukwu mgbi ema, eyi yama kyo inggise onyonyi obube ba, eyi mbe inggise onyonyi ba, eyi yama kyo inggise ogye ba.

³ N le gbōdze ne ikye ofwa ema ba; dafi ani teyi gbo mani gbē, ema ka dze eyi itukwu alono duu, yeba ni eyi dze oshishe hona kwulu kpaa.

⁴ Ani dze yi abo otsigēge mbi ema kpakpa; Ani li dze yi ewo okyile esho mbi ema kwuba. Ema kwu ani ewe wo kpakpa; mi ali okakewo ngwi eyi tulun duu kpaa atsa mgbi ani ka dondu ba.

⁵ Ono ngwi eyi wa kaka iMasidonia ma, eyi yama tu ono otonya ba, okakewo loka wo eyi. Engyikyili nu eyi okakewo mi ese, kpaa mi itukwu yo, imio gbɛ eyi so.

⁶ Nghaduu Imgbasho nli kwu ama ngwu a kye ma wuuta ba ewe wo na, kwu eyi ewe wo mi obaaba mgbi iTaitusu,

⁷ di li mi obaaba mgban ta ba, nghaduu li mi ewe ngwi ema kwun wo nani. O nya eyi dafi ema mina odi ani yi elela ngwi ema le kyo ikye ani dafi ema di kye ani wuuta mani, ikyenghane atsa mgbi ani she nghaabo ogbugbe.

⁸ Yeba ni afe mgbi ani nu ema kye abo tiko kpaa, N makwo gbɛ n ki ye ba. Nghaduu N gbɛ N ki ye mi ele, ikyesine N di gbɛ afe mgbi ani ta ema mnya, kpaa li mi ongwono gwee ta,

⁹ nghaduu onene Ani dze yi atsa, ikyegbɛ di ani nu ema aba ogyeegye ba, kpaa li ikyegbɛ elela okyokyo mgbi ema nu ema itukwu okyata-kyata. Lubana elela okyokyo mgbi ema li oweka mgbi Imgbasho ikyenghane eyi dze ema ifwa mi ofe onyonyi ba.

¹⁰ Elela okyokyo nli mgbi Imgbasho li ba yi itukwu okyata-kyata nli kye inggise kaka owato-wato ngwi n ki ye li dze ele ba mani, kpaa elela okyokyo ongwino ese ne li ba yi ikwongye.

¹¹ Di ungwono ngwi elela okyokyo nli mgbi Imgbasho ne kyo mbi ema neni: ema mina okyi tso mi otsitsi gbɛ di ema li emyemye, Ema kyitingga, I kwulu ema ewo, Le dze ema kwokwo odi gbɛ a ki kyo otsitsi, Ema tso saan gbɛ di ema dze yi emyemye mi ikye odze neni.

¹² Nghane ngwi ani lo ke mbi ema ne kpaa, yama li mi ikye mgbi ongwu nkyo obube na hona ongwu a kyon obube na ba, kpaa li ikyegbɛ ni ema di abuema dafi ema gbela yi eyi mi inai Imgbasho mani.

¹³ Ungwontone duu kwu eyi ewe wo. Ungwo okyi beke yi ewe okwu wo ngwi eyi tu ne yo, i kpa eyi kwuba odi dafi iTaitusu dze yi atsa mani, ikyeye onodzi mgban bese mi okyokyo mgbi ema duu.

¹⁴ Ani kye ema tsaabo igege biyan, ema di nu ani ayiwi ba. Nghaduu dafi odze ngwi eyi nya ema duu li otsitsi ma, li ngha i tso gbɛ eyi ngwi eyi kye ema le kwo yi iTaitusu na kpaa li otsitsi aali.

¹⁵ Ngwi o ka we gbɛ ema duu sunu, gbe ongwu yi imio yi ewo oshiishi ne, okpitukwu mgban mi ikye ema nghao sheeshe.

¹⁶ N dze yi atsa N ka dze yi abo otsigege mbi ema bese.

8

Umba ogha dzii

¹ Emi ongwunani, i mina eyi gbɛ ni ema ye ito mse ngwi Imgbasho kyo yi emi iKrestu mi iMasidonia mani.

² Ngwi a nye mi iso kpakpa di dze abubo saan ne kpaa, a shabota dzii.

³ Lubana ani kyo obwende gbɛ a nu dzii dafi a yagba mani, a di nu jo ngha mfye mgbi ama kpaa. A di kyon mi itukwu asisa,

⁴ a tekye yi eyi gbɛ a ki nu ama ofe ni ama nu emi osaan umba mi ikye ido neni.

⁵ A di kyo dafi eyi mina ma ba, kpaa ababo yo a kye ewoma nu mbi Otse di kye ewoma nu mbi eyi yeye dafi Imgbasho mina gbɛ nu ma kyo mani.

⁶ Nghane eyi tekye nu iTaitusu, ongwu nteyi tso ema ofe mi umba mgbi ema onuunu nani, gbɛ no ye ke mbi ema ka ngyelu ido mgbi umba oghaagha mgbi ema nani.

⁷ Dafi ema kyo alungwo duu saan mi oyeye onuunu yi elodze ogbongbo yi ozoyeye yi okwunewo saan beyi mi okpitukwu ikye eyi ne, fya ni ema nghao kyo mi elela mgbi ido mgbi umba onuunu neni.

⁸ Li ola n le wo ema ba, kpaa i minen ombadi okpitukwu mgbi ema otsitsi nani ikye okye mba yi okwunewo mgbi angbeka.

⁹ Lubana ema ye elela mgbi Otse mgbi eyi iYesu iKrestu, dafi nose o dze aludu mani, nghaduu mi ikye mgbi ema o yee adze, ikye ni ema yee emi aludu mi ikpewo adze mgban nani.

¹⁰ Nene li ewodze nghao tishi mi odze ne ngwi ani kye le nu ema aani: Onova nnye ne ema li emi ababo oghumba ta ba kpaa di dze yi oweka okyo ngha.

¹¹ Ikyenghane ngyelu ido nani, adzi ni oweka ngwi ema dzeyan mi ikye ido ne ma, mbwumbwo, kyon mi odzedze ungwwo ngwi ema dzeyan mani.

¹² Lubana ni inggise dze yi oweka onuunu yo, umba mgban kpaa a li gban mi odzedze ungwwo ngwi o dzeyan mani, li mi odzedze ungwwo ngwi o dzeyan ba ma ba.

¹³ Oweka mgbi eyi li ogbɛ ni a sulu angbeka okye ni okye lo angbeka ba, kpaa li ogbɛ ni eyi li ungwonyi.

¹⁴ Ongwi ema dzeyan kwuba onene ne ka tobyi ma mi imina mgbi ama, ni ama di wa dzeyan kwuba a dika tobyi ema mi imina mgbi ema. Ta ema ka li ungwonyi,

¹⁵ dafi Afe gba mani gbɛ: <<Ongwo ngbe ungwwo ngwikwo kpakpa ma dzeyan nyese ba, ongwu ngbe ngwikwo gwee ma dzeyan gwegweligwe ba.>>

ITaitusu yi emi ibuge mgban

¹⁶ Ani ta Imgbasho, ngwu nu iTaitusu itukwu osuse ikye ema dafi ani kpaa dzeyan ne angba.

¹⁷ Lubana iTaitusu gbela yi ekye mgbi eyi oto-to ta ba, kpaa o le ba mbi ema yi ewe ogbe byiihyi kpakpa yi oweka mgban.

¹⁸ Eyi dile dɔ ongwuneyi mi iKrestu ongwu emi iKrestu duu tsan mi ido mgban mgbi Eso Osuse ogboogbo na wafɔ biyan.

¹⁹ Ombwo efu yɔ, emi iKrestu duu dulun gbɛɛ no tawo eyi dafi eyi kye umba ngwi a nu mi ikye okye mmwɛ nu Otse abuan kye ka nu, odi tso oweka mgbi eyi mi abo oyaaya.

²⁰ Eyi mina gbɛɛ ni inggise onyi ka di endɛ mi onikyo umba ngwi ema nu itukwu onyi nɛ ba.

²¹ Lubana eyi le nyɛ mi iso okyungwɔ nli ayin mani, li mi inɛ mgbi Otse ta ba, mi inɛ inggise kpaa.

²² Odi kiyayi mi odzɛ nɛ yɔ, eyi le dɔ ongwuneyi oka ongwu nli tso eyi alono gbɛɛ ongwu dze yi itukwu ofyumfye-fyumfye na wafɔ yi ama, o di mina otobyi ema onɛnɛ nghaabo ogbugbe ikyekye o nu ema oyeye saan.

²³ ITaitusu yɔ, li ibuge mgbi ani, eyi dile kyido mi idzidzɛ ema ungwonyi; nghaduu emi ongwuneyi angbeka ntone yɔ, a li ama emi iKrestu dɔ ma eso, a di li mmwɛ mbi iKrestu.

²⁴ Ikyenghanɛ tso inggise ntone ambe okpitukwu mgbi ema beyi itodzɛ ngwi eyi dze yi abo otsigege ikye ema neni, adzi ni emi odzingbasho di.

9

¹ Odzɛ dzema ngwi ani ka lo nya ema ikye abo oyaaya ngwi ema ya emi osaan nɛ ba.

² Lubana ani ye ewo le gba ema gbaagba oyabo, ani dile tsaabo igɛɛ yi emi iMasidonia mi ele, le nya ma gbɛɛ kye onova nnye nɛ jo ema emi Acaya wewo onuunu; ma okyɔkyɔ mgbi ema na nu ama kwuba kyeɛ itukwu esho.

³ Nghaduu n le dɔ emi ongwuneyi eta ntone eso ikye ni abo otsigege mgbi eyi ikye ema mi odzɛ nɛ no ka yɛ atsika ba, nghaduu ni ema ki wewo, dafi ani gbɛɛ ni ema wo mani.

⁴ Lubana ni emi iMasidonia wafɔ yi ani wa di gbɛɛ ema wewo bayɔ, odzɛ eyi le gbo ikye ema duu li odzɛ ayayi, eyi ka gyayiwɛ mi abo otsigege mgbi eyi ikye ema, kpaa ema ka nghao gyayiwɛ.

⁵ I yɛɛ nghanɛ ani di gbɛɛ li kyeme-kyeme onu emi ongwuneyi ntone teyi ka kpadi ema di ngyelu ewo owoowo ikye umba ngwi ema zondɔ onu dzii nani. Ta umba mgbi ema ka dze le fɛfɛ dika tso gbɛɛ ema nu ikyekye i wo ema, a si ema siisi ba.

Eto okya dzii

⁶ We na gbɛɛ: Inggise nkya gwee ka she gwee, inggise nkya dzii dika she dzii.

⁷ Ali inggise no nu ungwɔ ngwi o tsewe mi itukwu mgban gbɛɛ ongwu ka nu mani, No ka nu mi ewewa naadi mi osiisi ba, lubana

li kpa Imgbasho yi inggise onu umba yi atsa.

⁸ Ta Imgbasho ka yagba nu mse mgban dze yi ema dzii, ikye ni ema dze yi alungwɔ duu, alono duu di fwe nu inggise angbeka mani.

⁹ Dafi Afe lo mani gbɛɛ: <<O kye umba mgban fwe nu emi adzɛ dzii; osaan mgban li gyegwu-gyegwu.>>

¹⁰ Ikyenghanɛ, Imgbasho nli kye eto nu inggise ofwe eto beyi ungowgye na dika nu oba mgbi eto ungowgye mgbi ema mbwo dika nu umba oshe-she mgbi osaan mgbi ema na yɛ dzii.

¹¹ A ka nu ema yɛɛ aludu mi ali ofɛ duu ikye ni ema ghumba dzii alono duu, man mi ikpewo eyi umba mgbi ema ogha dzii na ka yɛɛ angba ota-ta mbi Imgbasho.

¹² Ido ngwi ema tole kyo nɛ, le nu oyabo mbi emidi Imgbasho yuoma ba, le tso ofɛ ota Imgbasho angba mi ofɛ idzidza-dzidza.

¹³ Ikye ido ngwi ema kyo kye ewema tso nɛ, inggise ka tse Imgbasho ikye obwendɛ mgbi Eso Osuse mgbi iKrestu neni, beyi umba ngwi ema gha ma yi inggise angbeka dzii nani.

¹⁴ Ma mi ibo mgbi ama ikye ema yɔ, itukwu mgbi ama ka byidzɛ mbi ema, ikye elela okwulewo ngwi Imgbasho kye nu ema nani.

¹⁵ Nɛ i ta Imgbasho angba mi umba mgban okwulewo ngwi a ka gbɔn gbɛ ba neni!

10

IPol natsondu ido mgban

¹ Ani iPol abuen le tekye nu ema mi itukwu oleewo beyi ewo oyile ese mgbi iKrestu, ngwi ema li di gbɛɛ ani li <<ing-gise otishaali>> onɔ ngwi ani dze yi ema, <<kpaa li inggise ofyunfyali>> onɔ ngwi ani fyata yi ema nani!

² N tekye gbɛɛ, ka nu ani wa dze nya-nya yi ema onɔ ngwi ani wa yɛ ba ma ba; lubana ani noyeye gbɛɛ n ka koodzɛ yi ama ngbɛɛ eyi li kyungwɔ mi odzɛdzɛ mgbi mmbwɛ yi eyi mani.

³ Lubana eyi to ese neni, kpaa eyi li gblika dafi ese li gbo na ba.

⁴ Okyiika mgbi eyi li mgbi mmbwɛ yi eyi ba, kpaa li okyiika nfyumfye kye mbi Imgbasho okyi gbobu ali ogalu mgbi engyikyili duu.

⁵ Eyi li kyi bulu angwodzɛ yi ali ewɛ okyɔkyɔ ama n yile afɔ twɛɛ yi ozoyeye mgbi Imgbasho duu, eyi di li kyi bwalu ali ewodzɛ duu adi ikye nu ma sunu iKrestu.

⁶ Ni ema di tso ikye osu-su mgbi ema ngye yɔ, eyi ka wewo okwo ali inggise nfwa okyo mi ola duu ado.

⁷ Ema li di kwletse-kwletse ta. Ni inggise dze yi abo otsigege gbɛɛ ongwu li mgbi iKrestu yɔ, no ye ta gbɛɛ eyi kpaa li mgbi iKrestu yɛyɛ dafi ongwu mani.

⁸ Ka dze dafi ani le tsaabo igege nyese mi mfye ngwi Otse kye nu eyi gbɛɛ ni eyi tobyi ema yama li odzili ema ba nɛni, nghaduu ayiwi kwu ani mi ele ba.

⁹ No ka yama dze dafi afe ngwi ani le lo nɛ, li ikye oba yi ema imio ba.

¹⁰ Lubana angbeka li gbɛɛ, <<Afe mgbi iPol li datu di li siisi inggise, kpaa mi ine-ine yɔ o li aple inggise elodze mgban kpaa menbwa ba.>>

¹¹ Ito inggise ntona nu ma ye gbɛɛ ungwɔ ngwi eyi lo ngwi a di mi afe na, li ungwɔ ngwi eyi ka kyo onɔ ngwi eyi dze ine-ine mani.

¹² Ni eyi ka kye eweyi dzeke hona mba yi inggise ama nli tekpo na ba. Dafi a li kye ewoma mba yi eka mani, i tso gbɛɛ a kwiine ba.

¹³ Eyi ka tsaabo igege mi ungwɔ ndze yi itodze mbi eyi ba ba. Eyi ka tsaabo igege mi idɔ ngwi Imgbasho wo yɛyɛ gbɛɛ ni eyi kyo mata, ema kpaa woto idɔ nɛni.

¹⁴ Ngwi i yɛyɛ gbɛɛ ema kpaa woto idɔ nɛ, eyi le kyile ewo esho nyese ba ni eyi ki ba mbi ema bayɔ, lubana eyi gbeeso mgbi iKrestu nɛ lu kpini kaka mbi ema kpaa.

¹⁵ Naadi eyi tsaabo igege mi idɔ ngwi inggise angbeka teyi kyo ba. Ewe mgbi eyi ogbe byiihyi li ogbɛɛ, dafi oyeyɛ onuunu mgbi ema le kɛɛkiyayi nɛ, idɔ mgbi eyi mi idzidze ema ka tsee kpakpa,

¹⁶ ikyegbɛɛ ni eyi gbo Eso Osuse nye-nye ayese ngwi ema to nani. Lubana eyi mina otsabo igege mi idɔ ngwi a teyi kyo mi ayese mgbi inggise oka ba.

¹⁷ Afe gbo saan gbɛɛ, <<Inggise nle tsaabo igege yɔ, no tsaabo igege mbi Otse.>>

¹⁸ Lubana li inggise nle gbo osuse mgbi ewon ma ngwi a gbela yan ba, kpaa li inggise ngwu Otse gbela yan mani.

11

IPol beyi ama ogbikyɛ iYɛsu emi atsika

¹ I minen gbɛɛ ema ki shitukwu yen mi ongwɛ ikwangha mgben nɛni; ma ema le kyo ngha kpaa wa.

² N le kyoofu inggise Imgbasho ikye ema. Ema dze dafi ongwongyaa n ye ongyulo waba, ngwu ani zonu gbɛɛ o ka bongyulo onyi nli iKrestu abuon nani.

³ Nghaduu imio wen gbɛɛ, dafi ifa nose kpagya Ifa wo mi ewɛ nɛ, kaba itukwu mgbi ema kawa lu enggenga mi otsitsi beyi osuusunu ngwi ema le sunu iKrestu nani.

⁴ Lubana ni inggise ba wa gbodze iYɛsu oka idzidza yi iYɛsu ngwu eyi le gbo nɛ,

hona ni ema gbɛɛ onodzi idzidza yi ongwu ema teyi gbɛɛ nɛ naadi gbɛɛ eso oka idzidza yi eso ngwi ema tsekise fwo nɛ yɔ, ema li gbela yan ple.

⁵ Nghaduu n tsewe gbɛɛ <<ama ogbikyɛ iYɛsu ama okpongɔ ntona>> a ngha ani ba.

⁶ Kanaba ani li inggise ngwu a tso ani odze ogboɔgbɔ saan ba, kpaa n dze yi ozoyeye. Eyi nu odze nɛ gbosa lo ema mi ali ofe duu.

⁷ Nghane li ungwɔ obube gbɛɛ di ani yile ewani ese ikye okyile ema esho mi ogbo Eso Osuse mgbi Imgbasho nya ema ayayii?

⁸ Li ungwɔ obube gbɛɛ di ani gbɛɛ awuya mbi emi iKrestu angbeka ikye otobyi ema ba.

⁹ Onɔ ngwi ani dze yi ema di mina ungwɔ ma, n li okye mbi ema ba, lubana ama onoyeyɛ nkyɛ iMasidonia nu ani ungwɔ ngwi ani mina. Ani kye ewani dzeke mi ali ofe duu gbɛɛ nin ka li okye mbi ema ba, n dika kiyayi okyɔ ngha.

¹⁰ Ngwi otsitsi mgbi iKrestu ka dze mbi ani nɛ tayo, inggise onyi mi ayese mgbi Akaya ka kwɔ ani abo otsigege mgbi ani nɛ ba.

¹¹ Ani gbɛɛ awuya mbi ema ba gbɛɛ di ekye kyo? Ikyegbɛɛ ema kpa ani itukwu ba naadi sine? Imgbasho ye, ema kpa ani itukwu.

¹² Ani dika kiyayi okyungwɔ ngwi ani le kyo nɛni ikye otukwu ofe mbi ama nle pita ofe onu ma di gbɛɛ ama le kyidɔ ungwonyi yi eyi ntonani.

¹³ Lubana ito inggise ntona li ama ogbikyɛ iYɛsu emi atsika, emi idɔ ama okpaga inggise wo, le kye ewoma tso dafi ama ogbikyɛ iKrestu.

¹⁴ Li odze okwulewo ba, lubana Owape olodu abuon le kyo ewɛ kye gbɛɛ ongwu li ongyeso mgbi osa.

¹⁵ Li odze okwulewo ba, ni engbido mgban tole kyo ewɛ kye dafi engbido mgbi osaan yɔ, Imgbasho ka kwɔ ma adɔ mi ongyeengye dafi okyɔkyɔ mgbi ama dze mani.

IPol tsaabo igege mi adze mgban ogyeegye

¹⁶ N di yilen gbo: Ni inggise onyi ka kye ani gbɛɛ di ani li ikwangha inggise ba. Kpaa kini ema kye ngha yɔ, gbɛɛ ani dafi ema li gbɛɛ ikwangha inggise, gyo nin tsaabo igege gwee mani.

¹⁷ Abo ngwi ani kye tsigege nɛ ani le gbodze dafi Ongyukwo li gbo ma ba, kpaa dafi ikwangha inggise mani.

¹⁸ Ngwi inggise ibiyi li tsaabo igege dafi ese le kyo nɛ, ani kpaa ka tsaabo igege.

¹⁹ Ngwi ema di gbɛɛ ema kwiine nɛ, li kpa ema okwakye yi emi ikwangha.

²⁰ Mi odzimɔ yɔ, ema li gbela yi ama nkwu ema ofyɛɛ kpaa hona ama okwu ema

ine mbe naadi ama ogye ema mmgbé hona kye ewo ma dze gogó naadi ta ema afe mi ine kpaa mani.

²¹ I kwu ani ayiwi ogbée eyi kwiine ba nyese okyó itó ali nani.

Ni a ka tsaabo igege yó, ani kpaa ka tsaabo igege, nghaduu li idó mgbi ayayi.

²² A li emi iHibruu? A li emi Israii? A li emi ongwé Abrahan? Li ngha ani kpaa dze aali.

²³ A li engbido mgbi iKrestuu? (N le gbódze ne dafi ani dze yeye ba mani.) Nghaduu n kyon idó tishi ngha ma. A li kye ani wo obawi along-along duu, a nghao gbo ani ibe, n di ikwongye ine akpe ibiyi.

²⁴ Emi iJuda gbo ani onitse osudiwyo diwyegyane akpe eda.

²⁵ A gbo ani ibe yi okwuta akpe eta, a tse ani akwutse onóonó, iwudza gbobu yen akpe eta mi eni, n la ifu onekyoo egbe onyi yi otu onyi.

²⁶ N le dzagaba along duu. N kpatse yi ibli mi ekyoo, n kpatse yi ibli mi abó emumyi, n kpatse yi ibli mi abó emi ese mgbi ani, n kpatse yi ibli mi abó Udzenye; n kpatse yi ibli mi ogalu, n kpatse yi ibli mi agwó agwó, n kpatse yi ibli mi onekyoo; n di kpatse yi ibli mbi ama okyó odzingbasho ewé.

²⁷ N kyido di gbili diyé nuna ba; N ye ungwó ngwi a kwun di enbwa yi ekweni di gye ungowye ba onó ibiyi; Ofu yi ani n di dze ibiba kpaa.

²⁸ Mi ungwó ntone duu kpaa, ani kye itukwu mgbi ani fake mbi emi iKrestu duu alegbe-alegbe.

²⁹ Onó ngwi angbeka dzewatsi ma ewo li kwulu len. Onó ngwi a gyla angbeka kaka ungwó obube ma, itingga li kyo ani.

³⁰ Ni ani ka tsaabo igege kyeme yó, n ka tsaabo igege mi ungwó ama nnu ani dzewatsi mani.

³¹ Imgbasho Otsó Otse iYesu, ongwu ndze mbiso a ka tsan igyegwu na, ye dafi n le mwonya ba mani.

³² Mi iDamasiko ma, iGóna nbyidze abó Uto Areta nu ma dze ogalu iDamasene wo ikye obwa ani.

³³ Nghaduu a kye ani woke uya nye ofaawo to mi ikpishi man ani dzidze to mi abon.

12

Ine odiidi yi iba mgbi iPol

¹ N ka kiyayi otsabo igege kyeme. Dafi abó oyaaya dze efu ba ne kpaa, n ka kiyayi yi ine odiidi yi iba ama nkye mbi Otse.

² Ani ye inggise oka mi ifu iKrestu ngwu a kyon lu aye esho ongwu ta, onova iwyodene waani. Li mi ikpewo hona mi onodzi ho n yama ye ba, Imgbasho ta ye.

³ Ani di ye gbée ongyulo ne, yeba ni li mi ikpewo hona mi ikpewo ba kpaa ani ye ba, li Imgbasho yuon ye,

⁴ a kyon lu adopo. O fwo ungwó ama o ka yagba gbón gbe ba, ungwó ama a nu inggise ofe gbée ni a gbón ba.

⁵ N ka tsaabo igege yi itó ongyulo nani, kpaa n ka yama tsaabo igege ikye ewen ba, sede mi ewo odzaatsi mgbi ani ta.

⁶ Ni ani kyi kye gbée n ka tsaabo igege kpaa, n ka yama li ikwangha ba, ikyekye n kale gbo otsitsi. Nghaduu n yeyikpa, ikyenghane inggise onyi ka tsewodze ani ngha ungwó ngwi ani kyo hona gbo ba.

⁷ Onu ani nya yi ewo okyile esho mi iba ama okwulewo ngwi ani di ntona yó, a kye ato kwo ani mi ikpewo, a dó ongyeso mgbi iSatan oka ikye owa nu ani iso.

⁸ N tēkye yi Otse akpe eta gbée no kyi kyelu iso ne mbi ani.

⁹ Kpaa o nyen gbée, <<Elega mgbi ani le dzii ikye abu, lubana mfye mgbi ani li ng-hao tsoto mi ewo odzaatsi.>> Ikyenghane, n ka nghao tsaabo igege yi atsa mi onó ngwi ani dzewatsi mani, adzi ni mfye mgbi iKrestu no kyido mbi ani.

¹⁰ Ne mi ikye iKrestu yó, n dze yi atsa mi ewo odzaatsi yi ito yi onó okenye-kenye yi iso beyi onó ofyumfye. Lubana onó ngwi ani dzewatsi ma, ani li tu mfye.

Okakewo mgbi iPol ikye emi iKorinti

¹¹ N kye ewen yee ikwangha, nghaduu li ema kwen kaka ele. I wogyó ngwi li ema ki kyen tso, lubana ngwi ani li unka ba ne kpaa, n li ungwonyi yi <<ama ogbikyé iYesu ama okpongó>> ntonani.

¹² Ungwó ama nli tso ambe mgbi inggise ogbikyé iYesu yó: Li ambe yi ungwó ama okwulewo ngwi a kyo mi idzidze ema yi onyotse okwuukwu nani.

¹³ Ani kyo yi ema timbi ngha emi iKrestu angbeka sine, li ikyegbée di ani yee okye mbi ema ba maa? Dzenta yi obube ne na!

¹⁴ Onene n wewo odzagaba ke mbi ema akpe ongwu ta, n ka li okye mbi ema wuba, ikyekye ungwó ngwi ani mina yama li ungwó ngwi ema sulun na ba, kpaa li ema abuema. Lubana li engbe li byi ama omba ma enbwaba, kpaa li ama omba engbe li byi engbe enbwa aali.

¹⁵ Nghane n ka dze yi atsa kpakpa ombe alungwó ngwi ani dzeayan beyi odzedze mgbi ani duu. Kini ani tso okpitukwu mbi ema kpakpa ma, ema ka tso mbi ani sheeshée?

¹⁶ No dze dafi i dze mani, ani teyi li okye mbi ema ba. Nghaduu, inggise angbeka kale tsewe gbée, ani le kyókyó ema ewé!

¹⁷ Ani kyo ema ogye ikpewo inggise ama ani dó ma eso mbi ema ntona onyi yee?

¹⁸ Ani dɔ iTaitusu yi ongwuneyi esɔ mbi ema. iTaitusu kyo ema ogye ba, naadi o kyo? Okyɔɔkyɔ mgbi eyi kye otsonodzi onyi di nye ofe onyi daabana?

¹⁹ Kye gbege ma ema li tsewe gbɛɛ eyi le naana atsondu eweyi inai emaa? Eyi li gbɔdze mi ine Imgbasho dafi emi iKrestu mani; emi okeyi osuse, alungwɔ ngwi eyi kyo duu, li ikye oyabɔ mgbi ema.

²⁰ Lubana ani le mio gbɛɛ onɔ ngwi ani wa ba, n ka di ema dafi ani mina ma ba, ema kpaa dika di ani dafi ema mina gbɛɛ ni ani dze ma ba. Imio wen gbɛɛ, kanaba onɔgbe ogbɔgbo yi ofu okyeekye yi itingga okyɔɔkyɔ yi ogbua-gbua yi ombe inggise iyi yi idze odzɛɛdze yi ewo okyile esho beyi oblu-blu ka dze idzidze ema.

²¹ Imio wo ani gbɛɛ nin wa ye ba yɔ, Imgbasho mgbi ani ka nin ayiwi inai ema, itingga dika kyo ani yi inggise kwuba ama nteyi le kyungwɔ obube kpaa kyatitukwu mi okpekpe yi alobube mgbi ama beyi amah idza ngwi a kye ewoma tswoke ele na wa ba mani.

13

Ewe oweewe mgbi iPol ongwi olele

¹ Nɛɛ li akpe ongwu ta ani ka ba ema ese jo waani. Dafi Afe di gbo mani gbɛɛ, <<Ali odze duu ka yeɛ otsitsi mi obwende mgbi inggise efa hona eta sini.>>

² N tsekise kwo ema adɔ mi onɔ ani dze yi ema akpe ongwu fan mani. N dile yilen gbo ngwi ani dzema ba ne gbɛɛ: Owa ye ba mgbi ani ma, n ka kye ta ama nteyi kyo obube naadi angbeka mkpa ba,

³ ngwi i yeɛ gbɛɛ ema le mina ambe oye gbɛɛ iKrestu le gbɔdze nye mbi ani neni. Ewo dzan atsi okyido yi ema ba, o li tso mfye mgban mi idzidze ema.

⁴ Ikye onu ema ye otsitsi yɔ, a gbokwon mi ekwatsi onɔ ngwi ewo dzan atsi mani, nghaduu o dze oshishe mi mfye mgbi Imgbasho. Mi ito ofe na kpɔɔ, eyi kpaa ewo dze eyi atsi mbon, nghaduu mi mfye mgbi Imgbasho yɔ, eyi ka dze biyan ikye okyon idɔ.

⁵ Kyidi di fwo ewema ikwɔ ikye odi ni ema dze mi oyeye onuunu yɔ. Sede ema ka difwi gbɛɛ iYesu iKrestu wodze mbi ema bayo, ema gbo imbadi.

⁶ N di noyeye gbɛɛ ema ka difwi dafi eyi gbo imbadi na ba mani.

⁷ Ikyenghane eyi le bibɔ mbi Imgbasho gbɛɛ ni ema ka kyo nkoka obube wuba. Li ikye onu inggise di gbɛɛ eyi ngha imbadi ba kpaa ni ema kyungwɔ nli ayin yeba ni eyi kyo ayin ba kpaa.

⁸ Lubana eyi ka kye afo twese yi otsitsi ba, kpaa li otsitsi ta ngwi eyi ka kyo.

⁹ Eyi li dze yi atsa onɔ ngwi eyi dzewatsi kpaa ema fyumfye mani; lɔɔ mgbi eyi li ikyegbɛɛ ni ema nghao kyo saan.

¹⁰ Li ikyengha ngwi ani lɔ ungwɔ ntone onɔ ngwi ani dze yi ema ba ma aani, ikyegbɛɛ ni ani wa ba yɔ nin kale kyo yi ema nyanya mi idɔ mgbi ani okyɔɔkyɔ ba mani, mfye ngwi Otse kye nu ani li ikye ofyi ema anya, yama li obulu ema ba.

Olele angba mgbi iPol

¹¹ Ongyɛngye yɔ, emi ongwunani se egbe oka na. Gbekabyi okyɔ saan na, gadɔ fwo ekye otooto mgbi ani, dze mi ondonyi di to mi iyu. Ta Imgbasho mgbi okpitukwu yi iyu na ka dze yi ema.

¹² Ta ewema angba ye tsekwwulu ewema na.

¹³ Emi osaan duu kpaa le ta ema angba.

¹⁴ Ni elela mgbi Otse iYesu iKrestu yi okpitukwu mgbi Imgbasho beyi okwakye mgbi Onodzi Osaan dze yi ema duu. No dze ngha.

Afe mgbi iPol mbi ama onoyeye Emi iGalatia

¹ Afe ne kye mbi ani iPol nli onyi mbi ama ogbikye iYesu; ngwu ela okwu-kwu mgbi ani kye mbi ibyi inggise naadi owitukwu mgbi inggise owamye ba, kpaa li mi owitukwu mgbi iYesu iKrestu beyi Otse Imgbasho, ongwu nkyile iYesu mi ikwongye nani.

² Emi iKrestu ama nto yi ani duu kwakye okye angba dɛso nu okwakye mgbi emi iKrestu ama nto iGalatia gbɛɛ:

³ Elela yi iyu mgbi Otseyi Imgbasho beyi Otse iYesu iKrestu no dze yi ema duu.

⁴ IYesu iKrestu nkye ewon fifi mi ikye odulu eyi wato mi ali ibwubwe mgbi eyi ongwɛ onene, mi owitukwu mgbi Otseyi Imgbasho nani.

⁵ Okwɔkwɔ no dze mbon gyegwu-gyegwu. No dze ngha.

Eso Osuse li onyi ta

⁶ I kwulu ani ewo kwuba gbɛɛ ema le kyata plɛ dzita ongwu nkwa ema ela mi elela ngwi o di ema ikpewo iKrestu le lu eso oka idzidza

⁷ ngwi li Eso Osuse ba du. Omwonya bayo, inggise angbeka le wo ema ende di mina okyata ema itukwu mi Eso Osuse mgbi iKrestu.

⁸ Nghaduu ni eyi abueyi hona ongyeso ongwɛ esho gbɛɛso oka idzidza yi ongwɛ eyi tsekise gbo nya ema na yɔ, ni inggise na dzili gyegwu!

⁹ Dafi eyi tsekise gbo mani, onene n dile gbɛɛ: Kini inggise ta le gbɛɛso oka idzidza nya ema yi ongwɛ ema tsekise gbe na yɔ, ni inggise na dzili gyegwu!

¹⁰ Ani le kyungwo gbɛɛ no kpa inggise naa Imgbasho? Ani le fya gbɛɛ nin to iyi mbi inggise? Ni ani kale fya okyɔ itukwu inggise yɔ, n ka li ongbido mgbi iKrestu wuba.

Imgbasho kwu iPol ela

¹¹ Mina ongwunani, i mina ani ni ema ye gbɛɛ, Eso Osuse ngwi ani le gbo ne kye mbi inggise owamye ba.

¹² N gbe mbi inggise owamye onyi ba, hona inggise onyi tso ani ba. Li iYesu iKrestu abuan kye tso ani mi ine odiidi.

¹³ Lubana ema fwo odzɛɛdɛ mgbi ani mi onɔ nose ngwi ani le kyɔ odzimgbasho mgbi emi iJuda mani, dafi ani nu emi iKrestu adze kpakpa yi elela odiidi ba, di fya mi ofyaafya mgben duu odzili ma mani.

¹⁴ Ani nose le shewo mi odzimgbasho mgbi emi iJuda ngha atse ani ibyibyi di dze

yi ewe ogbebyi kwuba mi aletɔ mgbi emi otsani.

¹⁵ Nghaduu Imgbasho, dula ani mi elela mgban duuse a wa mba ani di kwu ani ela gbɛɛ ni ani wa kyɔn ido mi onɔ ngwi i gyolon mani.

¹⁶ O kye ongwɛn tso ani ikye ni ani gbɛɛso mgban nya Udzengye. N ke ka gbe ewodze mbi inggise onyi,

¹⁷ naadi ke iJerosalin oka di ama nli ama ogbikye iYesu teyi ani na ba, kpaa n byakpa lu Arabia di wa yido luba iDamasiiko.

¹⁸ Ta ngwi i wa nye onova eta ne, n ke iJerosalin oka ye iPyita, n di la yan egbe iwyodeda.

¹⁹ N di ama ogbikye iYesu angbeka ntona ba, se li iJensi ongwunɔ Otse iYesu ta.

²⁰ N le nya ema otsitsi mi ine Imgbasho gbɛɛ ungwɔ ngwi ani lo le ke mbi ema ne li atsika ba.

²¹ Ngwi i wa nye ne, n lu iSiria yi iSilisia.

²² Emi iKrestu mi iJudia duu ye ani ba.

²³ A fwoofwo ta gbɛɛ: <<Ongyulo nose nle nu eyi iso ma ye le gbo oyeye onuunu ngwi nose o le fya odzilin mani.>>

²⁴ Man a si tse Imgbasho mi ikye ani.

2

Ama Ogbikye iYesu gbe iPol

¹ Onova wa nye iwyodene man n diye ke iJerosalin yi iBanabasi, n kye iTaitusu wafɔ yi ani.

² N ke ikyegbɛ Imgbasho kye tso ani gbɛɛ ni ani ke dika kye Eso Osuse ngwi ani le gbo nya Udzengye (ama nli emi iJuda ba) ma tso engyukwo. Kpaa n kyungwɔne daada mbi ama ndze dafi li ama ogbe inggise teyi mani, ikyegbɛɛ onya ngwi ani le tse hona tsekise tse ma, no ka labo ba.

³ Nghaduu iTaitusu nli Udzengye dze yi ani ne kpaa, a siin gbɛɛ non kyii kye ba.

⁴ Odze ne to ikyekye emi iKrestu emi atsika angbeka wule kaka idzidze eyi oye eyi iba ngwi eyi dzezan mi iKrestu di nu eyi ye ofyee mgbi ola mgbi emi iJuda.

⁵ Eyi nu ma ofe gyengye ba, ikyegbɛɛ ni otsitsi mgbi Eso Osuse tila dze mbi ema.

⁶ Mbi ama ndze dafi ama ogbe inggise teyi ntona, ungwɔ ngwi a dze duu kyata unkonyi mbi ani ba; Imgbasho li di mi odzɛɛdɛ mgbi inggise mi ikpewo ba. Edze ntona mbwo ungwɔ onyi mi eso mgben ba.

⁷ Nghaduu, a di gbɛɛ Imgbasho kye ido ogbo Eso Osuse nya Udzengye (ama nli emi iJuda ba) wo ani abɔ, yeye dafi o kye wo iPyita ogbo nya emi iJuda nani.

⁸ Bana Imgbasho nle kyido nye mbi iPyita ke mbi emi iJuda na, le kyido nye mbi ani kpaa dafi onyi mbi ama ogbikye iYesu ke mbi Udzengye (ama nli emi iJuda ba nani).

⁹ Dafi ijensi yi iPyita beyi iJon, ama ngwu a ye ma gbɛɛ a li otɛsɛ mgbi emi iKrestu, difwi elela ngwi Imgbasho kye nu ani nɛ, a gbela yi ani yi iBanabasi gbɛɛ ni eyi kyidɔ mbi Udzengye (ama nli emi iJuda ba) ni ama kyidɔ mbi emi iJuda.

¹⁰ Ungwɔ onyi ngwi a nghao mina gbɛɛ ni eyi kyo yɔ, ni eyi le wɛ emi adzɛ, nli ungwɔ nteyi wo ani itukwu okyɔɔkyɔ yɛyɛ aali.

IPol kyɔkyɔ odzɛ yi iPyita

¹¹ Ngwi iPyita wa kaka Antiokko nɛ, n fwa odzɛ yan mi ododa, bana o kyungwɔ nli ayin ba saan.

¹² Duuse ni engyulɔ ama nkyɛ mbi ijensi mi iJerosalin ma ba yɔ, o li le gye ungwogye yi Udzengye (ama nli emi iJuda ba). Nghaduu ngwi edzɛ ntona wa kaka nɛ, o wita odulu abɔ dzɛ enggengga yi Udzengye (ama nli emi iJuda ba) ikyekyɛ o le mio emi iJuda ntonani.

¹³ Emi iJuda angbeka ntona kpaa beke yan le kyo ikpala, ikyenghanɛ a nu iBanabasi kpaa boofɛ le kyɛdɔ ma mi ikpala mgbi ama.

¹⁴ Ngwi ani di gbɛɛ a le kyo ali ndzɛ mi otsitsi mgbi Eso Osuse ba nɛ, n nya iPyita mi inai ma duu gbɛɛ, <<Abu li inggisɛ iJuda, kpaa le kyungwɔ dafi Udzengye, ma kyɔsinɛse abu ka si Udzengye gbɛɛ nu ma kyo aletɔ mgbi emi iJuda?>>

¹⁵ Ani yi abu a mba eyi li emi iJuda, eyi li <emi ali ibwubwe dafi Udzengye ba>

¹⁶ eyi ye gbɛɛ inggisɛ li gye emyemyɛ mi ongyo ola mgbi iMose ba, kpaa li mi oyeyɛ onuuu mbi iYɛsu iKrestu. Nghane eyi kpaa noyeyɛ mbi iKrestu iYɛsu ikyegbɛɛ ni eyi gye emyemyɛ mi oyeyɛ onuuu mbi iKrestu di li mi ongyoongyo mgbi ola mgbi iMose ba. Ikyesinɛ no li mi ola mgbi iMose ongyoongyo yɔ, inggisɛ onyi kpaa ka gye emyemyɛ mi inɛ Imgbasho ba.

¹⁷ Ni i dzɛ gbɛɛ eyi emi iJuda mina ogye emyemyɛ mi inɛ Imgbasho ikpewo iKrestu yɔ, i tso gbɛɛ eyi kpaa li emi ali ibwubwe, taman li iKrestu nu eyi li emi ali ibwubwe wadaa? Onoka lo!

¹⁸ Ni ani yile ungwɔ ngwi ani teyi bulu mbɛ yɔ, i tso amɛ gbɛɛ ani li inggisɛ omɛbe ola.

¹⁹ Bana mi ikpewo ola ani kwulu yi ola gbɛɛ n ki dzɛ oshishe ikyɛ Imgbasho.

²⁰ A gbokwo ani mi ekwatsi yi iKrestu ungwonyi; n dzɛ oshishe wuba, kpaa iKrestu dzɛ oshishe mbi ani. Oshishe ngwi ani dzɛ mi ewo onɛnɛ nɛ, n dzɛ li mi oyeyɛ onuuu mbi Ongwɛ Imgbasho, ngwu ani kpaan itukwu di kye ewon nu mi ikyɛ ani.

²¹ Ani kye elela mgbi Imgbasho dzeke enggengga ba, bana a ki li tu osaan mi ongyo ola yɔ, iKrestu kwulu mi itodzɛ ba!

3

Oyeyɛ onuuu hona ongyo ola

mgbi iMose

¹ Ikwangha inggisɛ emi iGalatia! Li emɛ ta emɛ untɛ? Mi inɛ emɛ a kye iYɛsu iKrestu tso saan dafi a gbokwon mi ekwatsi mani.

² I minen odifwi ungwɔ onyi ta mbi emɛ: Emɛ gbɛ Onodzi mgbi Imgbasho mi ikyegbɛɛ emɛ ngyo ola mgbi iMose naadi li ikyɛ esɔ ngwi emɛ fwo diyɛ noyeyɛ ma?

³ Emɛ yodzɛ ba nghadɛn? Emɛ wita yi Onodzi mgbi Imgbasho, ma onɛnɛ emɛ tɛwɛ ongyɛlu mi ofyaafya mgbi emaa?

⁴ Ungwɔ ngwi emɛ gyadzɛ mi ele kpakpa nɛ li mi ayayi taa? Emɛ gyadzɛ labɔ ba.

⁵ Imgbasho nu emɛ Onodzi mgban di kyo amɛ okwulewo mbi emɛ ikyegbɛɛ emɛ ngyo ola? Ei yama li ngha ba! Li mi ikyegbɛɛ emɛ noyeyɛ mi ungwɔ ngwi emɛ fwo mani.

⁶ Li ngha Abraham kpaa noyeyɛ ngwi Imgbasho kwun gbɛɛ: <<O li inggisɛ osaan ikyɛ oyeyɛ onuuu mgban aali.>>

⁷ Nghane, ye na gbɛɛ ali inggisɛ ndzɛ yi oyeyɛ onuuu duu li ongwɛ Abraham.

⁸ Lubana Afɛ mgbi Imgbasho teyi gbɔ dzɛsɛ gbɛɛ Imgbasho ka gbela yi Udzengye (ama nli emi iJuda ba) ikyɛ oyeyɛ onuuu mgbi ama, nɛ o teyi nya Abraham dzɛsɛ gbɛɛ, <<Inggisɛ mi ali udzɛ duu ka gbumsɛ mgbi ani mi ikpewo abu.>>

⁹ Nghane ama ndzɛ yi oyeyɛ onuuu duu Imgbasho nu ma mɛ ungwonyi yi Abraham, inggisɛ onoyeyɛ.

¹⁰ Ama ngbeka dzɛ ongyo ola duu, a dzɛ yi ikamba ewo, bana a lo gbɛɛ: <<Ali inggisɛ ngwu ngyo ungwɔ ngwi a lo to Afɛ ola ba duu dzɛ yi ikamba.>>

¹¹ Onɛnɛ i tso saan gbɛɛ inggisɛ onyi ka yagba gye emyemyɛ mbi Imgbasho mi ola ongyoongyo ba, ikyekyɛ <<Ama osaan ka dzɛ oshishe mi oyeyɛ onuuu.>>

¹² Ola li oyeyɛ onuuu ba; nɛ, <<Inggisɛ ngwu ngyo ola ka dzɛ oshishe mi ele.>>

¹³ iKrestu dula eyi to mi ikamba mgbi ola mi ogbɛ ikamba mi ikyɛ eyi, lubana Afɛ lo gbɛɛ: <<Ikamba no kwu ali inggisɛ ngwu a gbokwon mi ekwatsi.>>

¹⁴ O dula eyi to ikyegbɛɛ ni mɛ ngwi Imgbasho nu Abraham na no ba mbi Udzengye kpaa mi ikpewo iKrestu iYɛsu, ikyegbɛɛ mi oyeyɛ onuuu ni eyi gbɛ Onodzi ngwi Imgbasho zondɔ nani.

Ola beyi ondu odzɛdzɛ

¹⁵ Emi ongwunani, dzɛsɛ nin tso emɛ amɛ mi odzɛdzɛ mgbi oshishe ongyi alegbe-alegbe. Dafi Inggisɛ onyi ka yagba kye mwalu hona mbwumbwo mi ondu odzɛdzɛ ntsekisɛ dzɛsɛ ba nɛ, li ngha ngwi i dzɛ mi itodzɛ nɛ kpaa aali.

¹⁶ Ikyenghane, Imgbasho nose zonu di Abrahan beyi eto mgbah. Afe lo gbæe li <<Eto kwuba>> ba, kpaa ongwani onyi ta, ne i tso gbæe li iKrestu joaali.

¹⁷ Ungwo n le gbo ma li ongwu aani: Ondu odzæedze ngwi Imgbasho teyi dze yi Abrahan na, nye me onova ideli ene don osudiwo (430) duuse a wa kye ola nu iMose, nghane ola ka yagba ndelu ondu odzæedze na ba.

¹⁸ Lubana ni okwude ogyeegye li mi ola ongyoongyo yo, i tso gbæe li mi ondu odzæedze wuba; kpaa Imgbasho mi elela mgbah teyi kye nu Abrahan mi ondu odzæedze.

¹⁹ Nghane, oyabo mghi ola li ekye? A wa kye nu mi olele ikye ali ibwubwe nghataa ba ongwani ongwæ Abrahan ngwu a zonu ikyen na wa ba mani. Mi otsitsi, li engyeso kye ola ne nu iMose, se o kye nu inggise.

²⁰ Ongye okwabo odze li kwudze ikye inggise agya onyi ba; nghadu Imgbasho yo li onyi.

²¹ Nghama ola mghi iMose fwa ondu odzæedze mghi Imgbashoo? Ei, lubadu! Ikyesine ni ola ki li nu oshishe yo, osaan kika li mi ongyo ola.

²² Kpaa Afe gbo to gbæe inggise owamye duu woto obawi mghi ali ibwubwe, ikyegbæe ungwani ngwi a zonu okye nu mi oyeye onuunu ikpewo iYesu iKrestu ma, a ki kye nu ama onoyeye.

²³ Duuse ni oyeye onuunu ne wa ba yo, ola gbe eyi tukwu mi obawi nghataa nu ma wa kye oyeye onuunu tsoto.

²⁴ Nghane a kye ola dzeke otso eyi ofe mbi iKrestu ikye ni eyi gye emyemye mi oyeye onuunu.

²⁵ Onene dafi oyeye onuunu ba ne, eyi byidze abo ola wuba.

Emi ongwæ Imgbasho

²⁶ Ema duu li emi ongwæ Imgbasho mi oyeye onuunu mbi iYesu iKrestu,

²⁷ bana ema ngwu a kyo ema iBatisima mbi iKrestu gbe iKrestu wo ewo dafi angwuto mani.

²⁸ Idzidza dze mbi emi iJuda naadi Udzengye wuba, ongwu nli ofyee hona ongwæ ba, ongyulo naadi ongyaa ba, lubana ema duu li onyi mbi iYesu iKrestu.

²⁹ Ni ema li mghi iKrestu yo, ema li eto mghi Abrahan, di li ama gyokwude dafi a zonu mani.

4

Engbe yi ama gyokwude

¹ Odze ngwi ani le gbo ma li ongwu aani, dafi alungwo duu li mghi ongye gyokwude ne kpaa ngwi o ka li ongbæ jo, idzidza mgbah yi ofyee dzema ba.

² O ka byidze abo ama odi mbon yi ama ongyon nghataa ba ongwani ongwotson kye dze mani.

³ Li nga ngwi i dze yi eyi kpaa aali, ongwani eyi ka li engbæ mmafa ma, eyi wodze adi mghi ungwani ongwani ese neni.

⁴ Kpaa ngwi ongwani wa gyo yeye ne, Imgbasho kye Ongwan deso ni ongyaa wa mban, a mban mi abo ola mghi iMose,

⁵ owa dula ama nto mi abo ola na to, ikye ni eyi tu ofe saan oyee engwæ Imgbasho.

⁶ Ikyegbæe ema li engwæ ne, Imgbasho kye Onodzi mghi Ongwan deso wa kaka itukwu mghi eyi, Onodzi nkwo ela gbæe, <<Otso, Otsani nani.>>

⁷ Nghane abu li ofyee wuba, kpaa ongwæ; ma dafi abu li ongwæ ne, Imgbasho nu abu kpaa yee ongye gyokwude.

Oweka mghi iPol ikye emi iGalatia

⁸ Tugbe ngwi ema ye Imgbasho waba ma, ema li ofyee mghi onodzi emi otsitsi ba ntonani.

⁹ Nghadu onene ngwi ema wa ye Imgbasho, ngwi Imgbasho kpaa di ye ema ne, i kyone ngwi ema dile kyata lu mbi onodzi ama osheshe ongwani ese ne? Ema mina odi yee ofyan naadi?

¹⁰ Ema le nghao gbewedze egbe yi ofyia beyi iye ungwani yi onova!

¹¹ Imio wo ani yi ema, i dze dafi ofyaafya mghi ani ikye ema duu weeni mani.

¹² Emi ongwunani, n tekye nu ema, yee dafi ani na, bana ani yee dafi ema. Ema kyo ani obube onyonyi ba.

¹³ Dafi ema ye ma, ani dze mi ootse ongwani ani gbo Eso Osuse nya ema ababo mani.

¹⁴ Ootse mghi ani nose li undo mbi ema, nghadu, ema di ani tsiidza hona fwa ani ba. Kpaa, ema gbe ani dafi ema kika gbe ongyeso mghi Imgbasho mani; ema gbe ani dafi ani li iYesu iKrestu abuon.

¹⁵ Atsa ndze ema nose ma ko onene? N ka kyo obwende gbæe ni ema ki kyo nga yo, ema kika todulu ine mghi ema gbe nu ani.

¹⁶ Ani yee ongyikyili mghi ema onene ikyegbæe di ani nya ema otsitsii?

¹⁷ Inggise ntona dze yi oweka ogbe ema luba agya mboma, kpaa li mi mse ba. Ungwani ngwi a mina li ogha ema beyi eyi, ikyegbæe ni ema kye itukwu byi mboma.

¹⁸ I tishi ofyumfye itukwu ni itodze ma li osuse yo, odi dze nga alono duu, no ka li ongwani ani dze yi ema ta ba.

¹⁹ Emi ongwani osuse, dafi imba li wulu onongwe ne, li nga ngwi i le wulu ani ikye ema aani, nghataa sede odzæedze mghi iKrestu na ka gyuto mbi ema.

²⁰ I dze ani gbæe ani ki dze yi ema onene di kyata ali yi ema, ikyekye i kaka ani ewo mi odze mghi ema saan!

iHaga beyi iSara

²¹ Nya ani na, ema ama nmina odze abo ola mgbi iMose mani, ema ye ungwo ngwi ola na gbo lo?

²² Bana a lo gbæ Abrahan nose dze yi engwengwulo efa, onyi mbi ongyaa nli ofyæ, oka ma li mbi ongyaa nli owan yeye mani.

²³ Ongwan mbi ofyæ ma, a mban dafi ali inggise mani; kpaa ongwan mbi owan yeye na, a mban mi ondu odzædæ mgbi Imgbasho.

²⁴ Ungwontone li otso ambe ta, engyaa ntone gbikye ondu odzædæzæ nghi efa. Ondu odzædæzæ oka kye mi Unggwæ mgbi iSinai imbe ngwi a kye ola mgbi iMose nu nani, emi ongwan duu li ofyæ. Nana li ondu odzædæzæ mgbi iHaga joaali.

²⁵ Nghane iHaga dze dafi Unggwæ mgbi iSinai mi Arabia mani, o gbikye ogalu iJerosalin ongwi oneneni, ikyekye iJerosalin dze mi ofyæ yi engbe mghan duu.

²⁶ Nghaduu iJerosalin ongwi esho li ofyæ ba, di li on oyi aali.

²⁷ Bana a lo mi Afe gbæ:

<<Abu ongyaa ogyoma, dze yi atsa,

abu mba engwe ba,

tsatsa mi ela okwukwo,

abu n ye owulewo mgbi imba ba nani; ikyekye ongyaa ndze yi engbe kwuba na dze yi iso nga ongyaa ogyoma ndze yi oban mani.>>*

²⁸ Nghane emi ongwunani, dafi Adziki ongwe iSara li ongwe ondu odzædæzæ na, li nga ngwi ema kpaa dze onene aani.

²⁹ Mi on o na ongwe ngwi iHaga mba dafi inggise owamye ma nu ongwe ngwu a mba mi ondu odzædæzæ na iso kpakpa. Li nga ndze onene kpaa aani.

³⁰ Nghaduu li ekye ngwi a lo mi Afe mgbi Imgbasho? <<Lo ongyaa ofyæ na yi ongwan onya, lubana ongwe mgbi ofyæ no ka gyokwude yi ongwe mgbi ongyaa ude yeye na badu.>>

³¹ Ikyenghane, emi ongwunani, eyi li engwe ongyaa ofyæ ba, kpaa li mgbi ongyaa ude yeye.

5*Omyæ-myæ mi iKrestu*

¹ Li mi ikye omyæ-myæ ngwi iKrestu dulo eyi to. Nghane kwudze kpoklo, dika nu ewema yæ ofyæ mgbi ola mgbi iMose ba na.

² Gbewædæ odze mgbi ani na, ani iPol nya ema gbæ ni ema nu ma kye ema ikye yo, i tso gbæ iKrestu dze yi ema oyabo wuba du.

³ N di nya ali inggise mi ododa gbæ, inggise nnu ma kyan ikye yo, i yæ kyeme ngwi o ka ngyo ola na duu.

⁴ Ema nle fya ongyo ola mgbi iMose duu ma, a gha ema yi iKrestu wa; ema ka tu elela mgbi Imgbasho ba.

⁵ Nghaduu Onodzi mgbi Imgbasho nu eyi ye saan gbæ Imgbasho ka gbæ eyi dafi emi onyaan mani, ikyekye eyi noyeye mbi iKrestu.

⁶ Lubana mi ifu iYesu iKrestu yo, ikye okyækye hona ikye okyækye ba dze yi oyabo onyi ba. Li oyeye onuuu nli tso ewon to mi okpitukwu na ta dze yi oyabo.

⁷ Ema nose le kyo saan. Li eme wa kaka ema idzidze ni ema le kyo otsitsi wuba?

⁸ Ito otuutuwo na kye mbi Imgbasho ongwu nkwu ema ela na ba.

⁹ <<Ongwe okwuna gwee li gbæ ofumbu so.>>

¹⁰ Ani dze yi abo otsigege mbi Otse iYesu gbæ ema ka gbæ ewodze oka idzidza ba. Inggise nle kye ema wende ma a ka kwon ado, ki non li ememe kpaa.

¹¹ Emi ongwunani, ni ani kale gbeeso mi odze ikye okyækye nghataa ba onene ma, kyone ngwi a kale nu ani iso? Ki li nga yo, eso ekwatsi ngwi ani le gbo ki ba yi ani okakewo ba.

¹² I mina ani gbæ ama nle kaka ema ewo ma, nu ma kiyayi owo ewoma elozu.

¹³ Ema, emi ongwunani, a kwu ema ela gbæ ni ema dze myæmyæ. Kpaa ka kye omyæ-myæ mgbi ema yæ okaka ungwo obube okyockyo ba; tatase yo kyo ewema ido mi okpitukwu.

¹⁴ Bana a kye bwalu ola duu yæ onyi gbæ: <<Di inggise nwatse do abu kpa abu itukwu dafi ewabu mani.>>

¹⁵ Ni ema le kiyayi ola ewema aba dile tangha ewema yo, gbæwebyi na bana ema ka dzili ewema.

Oshishe ongwi Onodzi

¹⁶ Nghane n gbæ, ni Onodzi mgbi Imgbasho kye ema teyi, ta ema kale kyungwo ngwi imina ibwubwe mgbi mmbwe yi eyi mina ma wuba.

¹⁷ Bana imina ibwubwe mgbi ewo li gbela yi imina mgbi Onodzi mgbi Imgbasho ba, imina mgbi Onodzi na kpaa li gbela yi imina ibwubwe mgbi ewo ba. A li dze gblagblo yi ewoma alono duu, ikyegbæ ni ema ka kyungwo ngwi ema mina ma ba.

¹⁸ Nghaduu kini Onodzi Imgbasho kye ema le teyi yo, ema byidze abo ola ba.

¹⁹ Okyockyo mgbi imina ibwubwe mgbi mmbwe yi eyi li ama aani: okyo amah yi ungwo ama okpeke, ungwo ayiwi;

²⁰ osunu angwula, okyo mtse, okyili inggise, ogblibe, okyo inggise ogye, itingga okyockyo, oye ewabu yuwoo, odi ba yi ogbua-gbua,

* 4:27 4:27 Di gbo mi: Adza 54:1.

²¹ okyoofu, ebye ofyaafya, okwakye ngwi ungwɔ obube she mi ele beyi ungwɔ angbeka. N kwo ema ado, dafi ani teyi kyo mani, gbɛɛ ama nle kyo ngha ka gyokwude esuto mgbi Imgbasho ba.

²² Kpaa owawa mgbi Onodzi mgbi Imgbasho li okpitukwu, atsa, iyu, itukwu oshihi, itukwu osuse, okyo osuse, oyeye okyɔɔkyɔ,

²³ odzɛ shilididi beyi obwalu ewo fyii. Ola fwa ito ungwɔ ntonɛ ba.

²⁴ Ama nli mgbi iYesu iKrestu kye odzɛɛdze atta ibwubwe mgbi ama yi nggwɔ yi imina duu gbokwo ekwatsi.

²⁵ Dafi Onodzi mgbi Imgbasho nu eyi oshishe nɛ, ba ni eyi kyɛdo Onodzi na.

²⁶ Ni eyi ka kyile ewo esho yi eka, naadi le nu eweyi itukwu owulu-wulu, hona kyoofu yi ewee ba.

6

Okyo osuse yi ali inggise duu

¹ Emi ongwunani, kini inggise gbɛɛ mi ungwɔ obube yɔ, ema ngwu dze kpɔklɔɔ mi Onodzi mgbi Imgbasho ma yilen dze ofɛ dumɔɔ. Nghaduu gbɛwɛbyi ewema na, bana ema kpaa wa gbɛɛ mi imbadi.

² Ya eka abɔ mi okakewo mgbi ewema na, mi ito ofɛ nɛ ema le kyo ola mgbi iKrestu.

³ Kini inggise tsewe gbɛɛ ongwu li ungwɔ ngwi o li unkonyi bayɔ, o kpagya ewon wo.

⁴ Ali inggise no mbadi okyɔɔkyɔ mgban. Ki non tishi yɔ, o ka dze yi abɔ otsigege di kye ewon mba yi inggise oka badu,

⁵ lubana ali inggise no kye okye mgban abuon.

⁶ Ali inggise ngwu a tson ungwɔ yɔ, li kyɛmɛ no gha ungwɔ osuse yi inggise ntson nani.

⁷ Ka kpagya ewema wo ba: Inggise ka yagba nya Imgbasho agya ba. Inggise li she eto ngwi o kya mani.

⁸ Inggise nkyɛdo imina ibwubwe mgbi mmbwe yi eyi yɔ, ka she odzili-dzili; ongwu nkyɛdo Onodzi mgbi Imgbasho yɔ, mi Onodzi o ka she oshishe ogyegwu.

⁹ Ni eyi ka ndɛ yi osuse okyɔɔkyɔ ba, bana eyi kawa she eto osuse mi onɔ yeyɛ ni eyi yeyikpa bayɔ.

¹⁰ Nghane, dafi eyi tu ofɛ nɛ, ni eyi kyo osuse yi inggise duu, onghaangha duu mbi ama ndze mi eto mgbi ama onoyɛɛ mani.

Li ikyɛ ba kpaa otaata ofufe

¹¹ Di ambɛ olungwɔ gbadagbada ngwi ani lo mi abɔ mgbi ani kɛ mbi ema nɛni!

¹² Ama nmina okye ewoma tso mi ikpewo gbɛɛ ama li osuse ma, tole fya osi ema gbɛɛ ni ema kyiikyɛ. Itɔdze ngwi a le kyungwɔnɛ ma li ikyegbɛɛ ni ama ka gbiiso ikyɛ ekwatsi mgbi iKrestu ba.

¹³ Ama nkyiikyɛ kpaa ngyo ola tsatsa ba, nghaduu a mina gbɛɛ ni ema kyiikyɛ ikyɛ ni ama tsaabɔ igɛgɛ mi ikpewo ema.

¹⁴ Nghaduu n ka yama tsaabɔ igɛgɛ mi unkonyi ba, sede mi ekwatsi mgbi Otse iYesu iKrestu mgbi eyi ta. Mi odzɛ ekwatsi na yɔ, ɛsɛ kwulu ikyɛ ani, ani kpaa kwulu ikyɛ ɛsɛ.

¹⁵ Ikyɛ okyɛɛkyɛ hona ikyɛ okyɛɛkyɛ ba tso unkonyi ba; ungwɔ nwuuta li atta ofufe.

¹⁶ Iyu yi elela odiidi no dze yi ama nkyɛdo ola nɛ beyi emidi Imgbasho duu.

¹⁷ Ongyɛngye yɔ, ni inggise onyi ka ba yi ani okakewo ba, ikyɛna ani dze yi ambɛ mgbi iYesu mi ewo.

¹⁸ Emi ongwunani, ni elela mgbi Otse mgbi eyi iYesu iKrestu dze yi onodzi mgbi ema. No dze ngha.

Afe mgbi iPol mbi ama onoyeye Emi Efesu

¹ Afe ne kye mbi ani iPol, inggise ogbikye iKrestu iYesu mi oweka mgbi Imgbasho, le ke mbi emi osaan mi Efesu, dafi ema duu le kyo saan mi ifu iKrestu iYesu mani.

² Elela yi iyu mgbi Imgbasho Otseyi beyi Otse iYesu iKrestu no dze yi ema.

Mse nkye mbi iKrestu mi onodzi

³ Ba ni eyi tse Imgbasho Otso Otse mgbi eyi iYesu iKrestu, nkye mse ongwɔ onodzi duu be eyi ewo mi esho mbi iKrestu nani.

⁴ Ikyesine o sadu eyi mbi iKrestu gbɛɛ ni eyi li mgban duuse o wa ta ese ikyegbɛɛ, ni eyi le saan di dze yi okpekpe ewo ba mi inai ongwu.

⁵ Mi okpitukwu, Imgbasho teyi weka gbɛɛ ikpewo iYesu iKrestu, ongwu ka nu eyi yɛɛ emi ongwan, mi omyɛɛ-myɛɛ beyi oweka mgban mani.

⁶ Ba ni i tse Imgbasho mi elela mgban okwɔkwɔ, ngwi o kye nu eyi ayayi mi ikpewo ongwan nkpan itukwu nani.

⁷ Mi eyi mgbi ongwan ma, eyi tu owato-wato beyi odzita inggise yi ali ibwubwe, mi aludu elela mgbi Imgbasho

⁸ ngwi o kye nu eyi dzii mi ali ozoyeye beyi odifiwi-difiwi duu mani.

⁹ O di nu eyi ye ungwɔ odaada mgbi owitukwu mgban mi oweka mgban osuse, ngwi o tsewe mbi iKrestu nani.

¹⁰ Ikyegbɛɛ ni onɔ ma wa gyo yɔ, o ka kyi gbelu alungwɔ mi esho yi ese duu kwakye mbonyi mbi iKrestu.

¹¹ Mbi iKrestu Imgbasho nu eyi okwude, bana o teyi sadu eyi di kyo alungwɔ duu mi oweka mgban.

¹² Imgbasho kyungwɔne ikyegbɛɛ, eyi ama nli emi ababo onoyeye mbi iKrestu ma, ni eyi kye otseetse yi okwɔkwɔ ba mbi Imgbasho.

¹³ Nghane ema kpaa woto mbi iKrestu onɔ ngwi ema fwo elodze otsitsi, Eso Osuse mgbi owato-wato mgbi ema mani. Ngwi ema noyeye ne, a kye ambɛ mgban mgbi ondu odzɛɛdze mgbi Onodzi Osaan na dze ema.

¹⁴ Onodzi na di nu eyi ye saan gbɛɛ, Imgbasho ka kye okwude ngwi o kye dze emidan ma nu eyi, di tso gbɛɛ eyi li mgban, taman a ka nu Imgbasho mmwe di tsan.

Angba otaata yi ibo

¹⁵ Mi itɔdze ne, kye onɔ ngwi ani fwo oyeye onuunu mgbi ema mbi Otse iYesu yi okpitukwu mgbi ema mbi emi osaan duu ma,

¹⁶ n yama nya ota Imgbasho angba ikye ema waba, dile we ema mi ibo mgben alono duu.

¹⁷ Alonani li le bibo gbɛɛ ni Imgbasho mgbi Otse mgbi eyi iYesu iKrestu, Otso okwɔkwɔ, no nu ema onodzi mgbi ozoyeye yi iba, adzi ni ema yen saan.

¹⁸ N di bibo gbɛɛ o ki kwulu ema ine ongwɔ itukwu ikyegbɛɛ ni ema ye ewe ogbe byiibyi ngwi o kwu ema ela ikyen, yi okwude aludu mgban okwɔkwɔ ngwi o kye dze ikye emi osaan mani.

¹⁹ N di bo gbɛɛ ni ema ye ogbagbadzidzi mfye mgban ngwi dze ikye ama onoyeye ngwi a ka kye ungwɔ mba yan ba nani. Mfye na li mfye mgban okwulewo,

²⁰ ngwi o kyo mbi iKrestu onɔ ngwi o kyilen mi ikwongye di kyon sɔke abugye mgban mi esho mani.

²¹ O non ngha ali uto okyɔɔkyɔ duu yi mfye yi enepe beyi onghaangha, beyi ali ito iyi ongwɔ a ka kwu inggise mi ese ne duu, li mi ese ongwɔ onene ta ba, ongwɔ iyayi kpaa.

²² Nghane Imgbasho kye alungwɔ duu don ubo di non li ikye mi alungwɔ duu mi okwakye mgbi emi iKrestu.

²³ Okwakye mgbi emi iKrestu na li ewo mgbi iKrestu, ngwi li ombwumbwo mgbi alungwɔ duu mi ali ofe duu aali.

2

Odze oshishe mi iKrestu

¹ Nose ema li ikwukwɔ mi afo okye twese yi Imgbasho mi ali ibwubwe mgbi ema.

² Ngwi ema nose kale kyɛdo ofe mgbi ese ne beyi ongwu nkye esuto mgbi awo teyi, onodzi na li ongwu le kyido onene mbi ama ongha Imgbasho ado aani.

³ Eyi duu kpaa nose dze mi ito ali neni, le kyɛdo imina mgbi itukwu mgbi eyi beyi ewo mgbi eyi, ikyenghane eyi kyo Imgbasho itingga, ne ni eyi ki nya bayo a kika wa kwo eyi ado.

⁴ Nghadu Imgbasho nshewo mi elela odiidi, mi ikye okpitukwu mgban okwulewo mi ikye eyi ne,

⁵ o nu eyi dze oshishe yi iKrestu onɔ ngwi eyi li ikwukwɔ mi alobube ma kpaa, li mi elela mgbi Imgbasho ngwi a nu ema wato aani.

⁶ Imgbasho di kyile eyi mi ikwu ungwɔni yi iKrestu iYesu di nu eyi so biyan mi esuto ongwɔ esho,

⁷ ikyegbɛɛ ni ongwu wa kye aludu mgbi elela mgbi ongwu ngwi o kye tso eyi mi mse mgban mbi iKrestu iYesu, ngwi a ka kye unkonyi mba yan gbɛ ba na tso eto ama nkawa ba mani.

⁸ Lubana li mi elela ngwi a nu ema wato, ikpewo oyeye onuunu, li mi ido mgbi ema abuema ba, li umba mgbi Imgbasho.

⁹ Li mi ido okyockyo ba, nghanne inggise onyi no ka tsaabo igege ba.

¹⁰ Bana eyi li idabo mgbi Imgbasho, ngwi o ta mbi iKrestu iYesu okyido ama osuse, ngwi Imgbasho tsekise kye melu dzeke mi ikye eyi gbee ni eyi wa kyo mani.

Ondonyi mi ifu iKrestu

¹¹ Nghanne, we na gbee ama nli imba mgbi Udzengye ngwu ama nkwi ewoma gbee emi ikye na (ikye ngwi a li kye mi abo) li kwu ema gbee ama okyiikye ba,

¹² mi ono na ema dze yi iKrestu waba. Ema li imba mgbi emi Israi ba, ema di wodge ondu odzeedze ngwi Imgbasho dze yi ama ma ba. Ema to ese ne yi ewe ogbe byiibyi ba ema di dze yi Imgbasho ba.

¹³ Nghaduu onene mbi iKrestu iYesu yo, ema ama nose ndze mbombo ma, mi eyi mgbi iKrestu a yile ema ba kwekwe.

¹⁴ Lubana iKrestu aboon li iyu mgbi eyi, emi iJuda beyi Udzengye. Yi ewo mgban o kyi ngwado ogbua-gbua yi ikylili ndze idzidze mgbi ama mani.

¹⁵ Ikye okyi ngwado ola yi ado okwookwo beyi mfyem mgban duu. iKrestu yile emi iJuda beyi Udzengye kwakye yi eka dafi a li onyi mani, ikyenghane o ba yi iyu.

¹⁶ Ma mi ikpewo mgban onyi ne, o yile emi iJuda beyi Udzengye gyiide yi Imgbasho mi ekwatsi, mi okyi ngwado ikylili mgbi ama.

¹⁷ O ba wa gbeeso iyu nya ema Udzengye ama nfyata yi Imgbasho yi emi iJuda ama nto kwekwe yi Imgbasho.

¹⁸ Ikyesine ikpewo iYesu yo, eyi duu ka ba mbi Otseyi Imgbasho yi Onodzi onyi.

¹⁹ Nghanne ema li ingyoga naadi Udzengye wuba, kpaa ema li imba yi emi osaan di li eto mgbi Imgbasho kpaa,

²⁰ ngwi a mbe mi itozu mgbi ama ogbikye iYesu beyi ama ogbeese, ngwi iKrestu iYesu aboon li okotondzi ikwutse okwulu ikye ozu nani.

²¹ Li iYesu kwulu ozu ne blii di non she yee ozu osaan mgbi Otse aani.

²² Ma ema kpaa li aye ozu ngwi iKrestu mbe nli imbe ngwi Onodzi mgbi Imgbasho li la.

3

iPol ongye ogbeeso nya Udzengye

¹ Ikyenghane, ani iPol, ani li inggise obawi mgbi iKrestu iYesu mi ikye eso ngwi ani le gbo nya ema Udzengye neni.

² Li otsitsi ema fwo odze ido mgbi elela mgbi Imgbasho ngwi o kye nu ani mi ikye ema neni,

³ ngwi li, iba ngwi Imgbasho kye tso ani, ngwi ani teyi lon gwee mani.

⁴ Ni ema gbón ta, ema ka yagba tu osa ngwi ani dzeyan mi iba mgbi iKrestu neni,

⁵ ngwi a nu eto emi iyikpa ntona yen ba, dafi Onodzi kye tso emidi Imgbasho ama osaan ama ogbikye iYesu beyi ama ogbeese onene neni.

⁶ Ungwo odaada ne tso gbee, Eso Osuse ne nu Udzengye yee ama ogyokwude ungwonyi yi emi Israi, di yee emi ongwe inggise onyi, di me ogbumba mgbi ondu odzeedze mgbi iKrestu iYesu.

⁷ Imgbasho kyungwo osuse yi ani. O nu mfyem mgban kyido mbi ani, man i yee ido mgbi ani ole gbeeso osuse kye.

⁸ Dafi ani nghao yeyikpa mbi emidi Imgbasho duu ne kpaa, Imgbasho di ani elela dula ani gbee ni ani gbo Eso Osuse nya Udzengye gbee, mbi iKrestu mse le dzii,

⁹ di nu ungwo odaada ama nose ngwi Imgbasho nta alungwo duu kye da ma, kye ma tsoto mi ododa mbi ali inggise duu.

¹⁰ Ta Imgbasho ka nye ikpewo okwakye mgbi emi iKrestu tso ozoyeye mgban ita idzidza-dzidza mbi ali uto yi mfyem mi esho duu.

¹¹ Nene li oweka mgbi Imgbasho ndze gyegwu mani. Ongwi o kyo mbi iKrestu iYesu Otse mgbi eyi duu nani.

¹² Mbi iKrestu beyi oyeye onuunu mbon yo, eyi ka gbo tu Imgbasho yi ewo osheta beyi abo otsigege.

¹³ Nghanne n tekye nu ema, ka yile itukwu iyikpa ikye adze mgbi ani ikye ema ba na, ikyena ka ba yi ema oyabo.

Ibo ikye emi Efesu

¹⁴ Mi itodze ne n kye akwafu kwo ese mi inai Otseyi,

¹⁵ ongwu eto mgban mi esho yi ese duu tu yi mgbi ama nani.

¹⁶ N bo gbee ni Imgbasho mi okwakwo mgbi aludu mgban nu ema mfyem mgbi onodzi mgban ni ema yee ama okyedon kpoklo.

¹⁷ Adzi ni iKrestu wa gyuto mi itukwu mgbi ema mi oyeye mgbi ema onuunu. N di bibo gbee, ni ema kye akpa takwulu ese di shewo mi okpitukwu,

¹⁸ di dze yi mfyem, ungwonyi yi emi osaan, odifwi dafi okpitukwu mgbi iKrestu tsee di tunto di shigbo diye ke byulu mani,

¹⁹ odi ye okpitukwu mgbi iKrestu nshewo nga ozoyeye neni, adzi ni Imgbasho kyi gbelu odzeedze mgbi ema duu so.

²⁰ Onene okwakwo duu no dze mbi Imgbasho! Mfyem mgban nle kyido mbi eyi ne ka kyido lu kpini nga ungwo ngwi eyi bo di tsewe mani.

²¹ Okwakwo no dze mbon dafi ngwi a li di mbi iKrestu iYesu yi okwakye mgbi emi iKrestu na nghataa gyegwu-gyegwu! No dze nga.

4

Ondonyi mi iKrestu

¹ Ngwi ani wodze obawi ikyegbæ di ani le kyo Otse idɔ nɛ, n tekye nu ema, kyungwo ama nme mi ela ngwi a kwu ema nɛ na.

² Yile ewema esɛ klekle di dze dumɔɔ, dze yi itukwu oshiishi, to yi ewema di di ewema kpa ewema itukwu.

³ Fya mi ali ito ofe ni ema dze mi ondonyi mi onodzi. Kyungwɔne mi odze yi eka mi iyu.

⁴ Ikpewo li onyi onodzi kpaa di li onyi, yeye dafi a kwu ema ela ba ewe ogbe byiibyi onyi mi onɔ ngwi a sadu ema gbæ ni ema li emi ongwɛ Imgbasho mani.

⁵ Otse li onyi, oyeye onuunu li onyi, iBatisima kpaa li onyi;

⁶ Imgbasho li onyi di li Otso ali inggise duu. Li ongwu li ikye duu, o li kyidɔ mbi ali inggise, di dze mbi ali inggise duu.

⁷ iKrestu kye umba mgban gha nu eyi dzii dafi i minan mani.

⁸ Dafi Afe lo mani gbæ,
<<Onɔ ngwi o lu esho ma, o gbe ama nwoto obawi teyi di nu inggise umba.>>

⁹ Elodze ngwi a gbæ, <<O lu esho>> nɛ tso gbæ o tsekise lu ibe.

¹⁰ Ongwu nlu ibe na di li ongwu kpɔɔ lu nye-nye esho aali, ikyegbæ ni ongwu kpatse ali imbe duu.

¹¹ Li ongwu nu angbeka umba nu ma yɛ ama ogbikyon, angbeka yɛ ama ogbæse, angbeka yɛ ama ogbæso kye, angbeka yɛ ama ogbe okwakye mgbi emi iKrestu teyi, angbeka di li etsetse,

¹² ikye owo emi osaan ewo okyidɔ mgbi iKrestu, ni ewo mgbi iKrestu she.

¹³ Ungwɔne ka kiyayi nghataa se eyi ka yɛ ondonyi mi oyeye onuunu beyi ozoyeye mgbi Ongwe Imgbasho. Taman eyi ka myotse di dze yeye dafi iKrestu nghataa ka bese.

¹⁴ Ta eyi ka dze dafi engweyeyi ngwu akpeni li gbe ma kiyayi ye ba iyikpa, ngwu awo mgbi ali otsootso duu li le fa ma kye yi ikpala, beyi ama ngwu ali mgbi ama wende ntona wuba.

¹⁵ Nghaduu ni eyi le gbo otsitsi mi okpitukwu yɔ, eyi ka she mi alungwo duu mbi ongwu nli ikye, iKrestu nani.

¹⁶ Li mbon ngwi alewo yi anini duu kwokyi, she di dze yi ewoma mi okpitukwu di li kyidɔ mgbi ama idzidza-dzidza aani.

Oshishe ofufe mi ifu iKrestu

¹⁷ Nghane mi iyi mgbi Otse n le gbodze nɛ yilen gbo nya ema gbæ, ka yama le kyo ali ikwangha dafi Udzenye li kyo mi ewe otsetse mgbi ama na ba.

¹⁸ Odifwi-difwi mgbi ama yifu di gha ma yi oshishe mgbi Imgbasho, ikyekye oyeye

ba beyi itukwu otiishu mgbi ama nu ma boofe.

¹⁹ A dze yi ayiwi wuba; a kye ewoma tswoke ungwo ayayi di li kyo alungwo idza duu yi imina okiyayi.

²⁰ Ma li ofe ngwi a tso ema odze iKrestu daaba.

²¹ Mi otsitsi yɔ, ema fwo odze mgban a di tso otsitsi ndze mbi iYesu mani.

²² A tso ema gbæ ni ema dzata oshishe mgbi ema ogbugbe nteyi mbee yi imina atsika nani.

²³ Ta a ka kyata ali ongwu itukwu mgbi ema na yɛ ofufe.

²⁴ Kye ewo ofufe ngwi a ta dze dafi mgbi Imgbasho mi osaan yi osaan otsitsi na wo ewo.

²⁵ Nghawane i yɛ kyemɛ ngwi ali inggise mbi ema ka nya yi onya omwaamwa dile gbo otsitsi nya inggise owatse dɔn; lubana eyi duu li imba mgbi inggise onyi.

²⁶ <<Mi itingga mgbi ema okyɔɔkyɔ duu kpaa ka kyungwo obube ba na>>: Ka nu onɔ gbæse tu ema yi itingga okyɔɔkyɔ ba,

²⁷ adzi ni olodu tu imbe okye abo byi ba mani.

²⁸ Inggise nli teyi yimi yɔ, i yɛ kyemɛ ngwi o ka nya yi mmyi. I gbuo no kye abo byi ungwo imɔ nka yan abo, gyo ngwi o ka tu ungwo mwa gha ama nsulun ba mani.

²⁹ Ka yama nu elodze ikwangha to lo ema mi ondu ba, kpaa no li ungwo ingblimo nka tobyi angbeka mi imina mgbi ama, ikye ama nfwɔ ma, no ya ma abo.

³⁰ Dika wulu Onodzi Osaan mgbi Imgbasho itukwu ba na, lubana li mbon ngwi a kye ambe mgbi egbe onagbe ema na dze aali.

³¹ Dzita ali itukwu nno yi itukwu olola yi itingga yi idze yi ito ofyaafya beyi ali ito ali ibwubwe duu.

³² Tatase dze yi itukwu osuse yi ewema na, le kye odze ta ewema mkpa, dafi Imgbasho kpaa kye ta ema ikpewo iKrestu nani.

5

¹ Nghawane, ngwi ema li emi ongwɛ Imgbasho ama okpan itukwu saan nɛ, gbaman na.

² Di dze mi oshishe mgbi okpitukwu, yeye dafi iKrestu kpaa di eyi kpan itukwu kye ewon fife osuse nu Imgbasho ikye eyi nɛni.

³ Nghaduu mi idzidze ema yɔ, nu ma ka fwo ayini odze amah kpaa ba, hona ungwo idza onyi ba, naadi nggwo kpaa ba, ikyekye ungwo ntone li ungwo ama ntishi ngwi emidi Imgbasho ka kyo ba.

⁴ Ka gbodze ibwubwe hona odze ikwangha hona odze asha owulewo ba, ungwo ntone duu gbuo yi emidi Imgbasho ba. Tatase yɔ ta Imgbasho angba.

⁵ Ye saan ta gbæ, inggise amah yi inggise idza hona inggise okyo nggwɔ ka kaka esuto mgbi iKrestu hona mgbi Imgbasho ba. Lubana inggise okyo nggwɔ li ungwonyi yi inggise angwula, nli sunu ungwɔ emi ese ne mani.

⁶ Inggise onyi no ka kpagya ema wo yi ayayi odzæ ba, lubana li mi ungwɔ ntone ngwi Imgbasho li kyitingga yi ama onghaado aali.

⁷ Ikyenghane ka yama kyungwɔ yi ama ba na.

⁸ Lubana nose ma ema to mi iifu, ng-haduu onene ema to mi osa mgbi Otse. Ne kyungwɔ dafi emi ongwæ osa na.

⁹ (Lubana owaawa mgbi osa dze yi alungwɔ osuse mi ele duu, yi osaan beyi otsitsi)

¹⁰ di fya ye ungwɔ nkpa Otse mani.

¹¹ Ka sulu unkonyi okyo yi idɔ mgbi iifu nsulu owawa ba na ba, tatase yɔ kye ma dɔdɔdɔ ese.

¹² Lubana i kwayiwi okwu iyi ungwɔ ngwi ama onghaado li kyo mi odaada.

¹³ Kpaa ungwɔ ngwi osa non dɔ ododa yɔ ine li di,

¹⁴ lubana li osa li nu inggise di alungwɔ duu. Li ngha ngwi a gbæ, <<Kyato mi ikwongye, ongye onuna, ta iKrestu ka nu abu osa.>>

¹⁵ Nghane gbeweyi saan mi odzæedzæ mgbi abu, ka yama li ikwangha ba kpaa kwiine,

¹⁶ ka lele yi onɔ mgbi abu ba, ikyekye egbe ne li egbe obube.

¹⁷ Ikyenghane ka li ikwangha ba, kpaa difwi owitukwu mgbi Otse.

¹⁸ Ka wa ebye fya ba, ka nu abu yæ gbɔɔgbɔ, tatase yɔ ni Onodzi gbe abu sɔ.

¹⁹ Le gbɔdzæ yi ewee mi ashi obibo yi ashi osunu Imgbasho beyi ashi ongwɔ onodzi. Shashi di gbo ungwɔ mi itukwu nu Otse.

²⁰ Dile ta Imgbasho Otseyi angba mi alungwɔ duu, mi iyi mgbi Otse mgbi eyi iYesu iKrestu.

²¹ Siikye nu ewema ikye mmwe mgbi iKrestu.

Engyaa yi emi Oba ma

²² Engyaa, siikye nu obeema dafi ema li sunu Otse mani.

²³ Lubana ongyulo li ikye mgbi owan dafi iKrestu kpaa li ikye yi ongye onagbe mgbi okwakye mgbi emi iKrestu, nli ewo mgban neni.

²⁴ Ikyenghane, dafi okwakye mgbi emi iKrestu li sunu iKrestu ne, li ngha ngwi engyaa kpaa ka siikye nu oba ma mi alungwɔ duu aali.

²⁵ Engyulo, ema kpaa di emi oweema kpa ema itukwu na, yeye dafi iKrestu di

okwakye mgbi emi iKrestu kpan itukwu di kye oshishe mgban lasæ ikyon neni.

²⁶ Ikye non yæ saan, san yi eni mi elodzæ Imgbasho.

²⁷ iKrestu kyungwone ikye ni ongwu kye okwakye mgbi emi iKrestu dzeke mi okwɔkwɔ di kwanghle hona ndzili ba, naadi boya ba, kpaa dze saan yi obube ba mani.

²⁸ Mi ito ofe ne kpɔɔ, i wogyɔ ngwi engyulo ka di owama kpa ma itukwu dafi ewoma mani. Inggise ngwu owan kpan itukwu yɔ, li ewon ngwu o di kpan.

²⁹ Lubana inggise onyi di ewon tanyi ye ba, ngaduu o li byi ewon enbwa di gbeweyi ewon, yeye dafi iKrestu li gbeweyi okwakye mgbi emi iKrestu neni,

³⁰ lubana eyi duu li emidan.

³¹ <<Mi itodzæ ne ongyulo ka dzita otson yi onɔn ye kwokyeba yi owan man ama efa ka yæ ikpewo onyi.>>

³² Ungwone li ungwɔ odaada kpini, ng-haduu n le gbɔdzæ iKrestu yi okwakye mgbi emi iKrestu.

³³ Dafi i dze duu kpaa, ali inggise mgbi ema no di owan kpan itukwu kyeme dafi ewon mani, ali ongyaa no di nu oban mmwe.

6

Engbe yi ama omba ma

¹ Engbe, li ayin ni ema sunu ama omba ema dafi OTSE tso mani.

² <<Nu otsema yi oneema mmwe.>> Lubana li ola ongwɔ ababo ndze yi ondu odzæedzæ mi ele aani.

³ <<Gyɔ no tɔ lo ema tishi, ni abu di gyiye mi ese ngwi OTSE kye nu ema neni.>>

⁴ Etsengwæ, ka dze moga-moga yi engwæ ema ba na; tatase yɔ nye ma mi ofe mgbi OTSE.

Ofyæ yi engyukwo mgbi ama

⁵ Ofyæ, siikye nu engyukwo mgbi ema emi ese ne yi mmwe yi imio ewo, yi itukwu asisa, yeye dafi ema ka sunu iKrestu mani.

⁶ Ka siikye nu ma ikyegbæ, ni ema tu umba mboma mi onɔ a kye ine byi ema ma ta ba, kpaa no li dafi ofyæ mgbi iKrestu, nle kyo owitukwu Imgbasho mi itukwu asisa mani.

⁷ Kyon itukwu asisa, dafi ema le kyo Otse idɔ mani, no ka dze dafi ema le kyido mgbi inggise ba.

⁸ Lubana ema ye Otse ka nu ali inggise duu umba mi alungwɔ osuse ngwi otsungwɔ kyo, kini otsungwɔ li ofyæ hona dubewon kpaa.

⁹ Engyukwo mgbi emi ofyæ, ema kpaa kyo yi ofyæ mgbi ema saan nghan na. Ka tongwine wo ma ba, ikyesine ema duu dze

yi ongyukwo onyi ndze esho, o di li tso osadu-sadu ba.

Okyiika mgbi Imgbasho

¹⁰ Ongyeengye ya, kwudze kpoklɔɔ mbi Otse beyi mfye mgban onghaangha na.

¹¹ Gbe okyiika mgbi Imgbasho duu wo ewo zukwu ni ema twafɔ ese yi ewe mgbi olodu.

¹² Lubana ika mgbi eyi li mgbi mmbwe yi eyi ba, kpaa li okye afo twese yi emi otu, ama okye ese teyi, yi ama a kye mfye nu ma, beyi abumfye mgbi onodzi ibwubwe emi esho.

¹³ Nghawane, gbe okyiika mgbi Imgbasho duu wo ewo na, ikye ni egbe obube na wa ba ya, ni ema yagba kwudze kpoklɔɔ, ni ika wa ngye kpaa, ni ema di yagba kwudze kpoklɔɔ mani.

¹⁴ Nghane kwudze kpoklɔɔ, kye okpa mgbi otsitsi bwa oshi, kye abu ika mgbi osaan wo ewo.

¹⁵ Ewo owoowo mgbi ema ogbeeso iyu ne, no dze dafi okpafɔ mi afo mani.

¹⁶ Ombwo ikye ungwɔ ntone ya, oyeye onuunu mgbi ema no dze dafi okpalika mani, ta ema ka yagba na ewema mi ali oshi nkye yi amoola mbi ibwubwe inggise nani.

¹⁷ Kye osakye ika mgbi owato-wato tukwu beyi okwusunkli mgbi Onodzi, nli elodze Imgbasho nani.

¹⁸ Dika tonya obibo ba. Alono duu le bo ali itiibo mi mfye mgbi Onodzi. Kwasisa dile bibo alono ikye emi osaan duu.

¹⁹ Bibo ikye ani kpaa na, adzi ni alono ngwi ani kwulu ondu duu ya, ni a nu ani elodze ngwi ani ka gbo iba mgbi eso osuse ne yi imio ba mani.

²⁰ Ani kale gbeeso ne kye ngwi ani wodze itse ne kpaa, dafi inggise ogbikye Imgbasho mani. Nghane bibo na ni ani kiyayi ogbeeso ne yi abo otsigege dafi ani kika gbɔn mani.

Angba ongwɔ olele

²¹ N le do iTaciko ongwuneyi osuse ongbido otso oyeye mbi Otse ne eso mbi ema, ikye ni ema ye alungwɔ duu ni ema di ye dafi ani dze beyi ungwɔ ama ani le kyo mani.

²² Itodze yeye ngwi ani le don eso mbi ema ya, li ikye ni ema ye dafi eyi dze mani, no di fyi ema mfye itukwu.

²³ N bibo gbɛ Imgbasho Otseyi yi Otse iYesu iKrestu no nu iyu, yi okpitukwu, beyi oyeye onuunu mbi emi iKrestu duu!

²⁴ Elela mgbi Imgbasho no dze yi ali inggise nle kiyayi odi Otse mgbi eyi iYesu iKrestu kpan itukwu mani. No dze nga.

Afe mgbi iPol mbi ama onoyeye Emi iFyilipi

¹ Afe ne kye mbi iPol beyi iTimoti, engbido mgbi iYesu iKrestu,
Le ke mbi emi osaan ama nto mbi iYesu iKrestu, mi iFyilipi beyi emi ibishopu yi emi iDikin tsatsadu gbɛɛ:

² Ni iyu mgbi Otseyi Imgbasho beyi Otse iYesu iKrestu dze yi ema duu.

Angba beyi ibo obɔɔbo

³ N li ta Imgbasho mgbi ani angba alo-nani wɛ ema duu.

⁴ Alono duu Ani li bibo ikye ema yi atsa

⁵ ikyekye ema kye abo wo yi ani mi Eso Osuse mi egbe ongwɛ ababo nghataa ba oneneni.

⁶ Ani dze yi abo otsigege saan gbɛɛ, Imgbasho ongwɛ nwita ido osuse yi ema ne, ka kyɔn nghataa ka bese mi egbe iYesu iKrestu ka ye mani.

⁷ Li ayin ni ani tsewe ofe ne ikye ema duu, ngwi ema woto itukwu mbi ani ne; ni ani wodze adi hona le natsondu dile gbela wo Eso Osuse kpaa, ema duu woto elela mgbi Imgbasho na yi ani ungwonyi.

⁸ Imgbasho li obwende mgbi ani dafi ema kpa ani itukwu kpakpa mi okpitukwu mgbi iYesu iKrestu neni.

⁹ Nene li ibo mgbi ani aani, gbɛɛ: Okpitukwu mgbi ema no le keekiyayi yi ozoyeye yi odifwi-difwi duu,

¹⁰ ikye ni ema yagba difwi ungwɛ nnghao tishi dile saan di dze yi idza ba nghataa ba egbe ngwi iKrestu ka ye mani.

¹¹ Nghane ema mbwo yi owawa mgbi osaan nkye mbi iYesu iKrestu nka nu Imgbasho okwɔkwɔ beyi otsetse mani.

*Adi ngwi a bwa iPol nu okiyayi
mi Eso Osuse*

¹² Emi ongwunani, onene ani mina onya ema gbɛɛ, ungwɛ nkyo ani ne i nu okiyayi mgbi Eso Osuse kpakpa.

¹³ Ikyenghane, ungwone tsoto mi ododa mbi ama ongyo ude uto yi ali inggise duu gbɛɛ, a kye ani wo adi ikye iKrestu.

¹⁴ Mi ikye adi mgbi ani ne, emi oyeye angbeka kpakpa dze yi itukwu ofyumfyefyumfyegbo elodzimgbasho yi abo ot-sigege yi imio ba.

¹⁵ Li otsitsi angbeka li gbɔdze iKrestu yi anyi yi uwaba, nghaduu angbeka li gbo yi itukwu osuse.

¹⁶ Ama ngbeeso yi itukwu osuse na, le gbo ikye okpitukwu ngwi a dzezan mbi ani mani, ikyekye a ye gbɛɛ ani dze mmene ikye Eso Osuse.

¹⁷ Emi ababo ntona yo, a le gbeeso ikye okye ewoma wuuta ta ngwi a le gbɔdze iKrestu aali, li mi otsitsi ba, a dze yi oweka ombwo ani adze mi adi mgbi ani.

¹⁸ Nghama nana wuuta mi ekye? Ungwɔ oyabo ndze duu yo, yeba ni li mi atsika hona otsitsi kpaa, a gbɔdze iKrestu. Mi itɔdze ne ani dze yi atsa.

Eɛn, n dika kiyayi odze yi atsa,

¹⁹ ikyena ani ye gbɛɛ mi ibo mgbi ema beyi abo oyaaya ngwi a kye nu nye mbi Onodzi mgbi iYesu iKrestu na, ungwɛ nkyo ani ne ka ye dula ani to.

²⁰ Lubana ani dze yi ewe ogbe byiibyi kpakpa gbɛɛ mi ofe onyi kpaa ani kawa gyayiwɛ ba, kpaa n ka dze yi itukwu ofyumfyefyepkpakpa adzi ni iKrestu dze yi mmwe mbi ani alono duu, kini ani dze oshishe naadi kwulu kpa.

²¹ Ni ani dze oshishe yo, li ikye iKrestu, ni ani kwulu ka nghao tobyi ani.

²² Ni ani ka kiyayi odze oshishe mi ikpewo yo, ka nu ido osuse mgbi ani kiyayi. Nghane li ole ani ka kye? Ani yama ye ba!

²³ Itukwu yɛɛ efa lo ani mi ungwɛ ntoneni: I mina ani olu ka dze yi iKrestu, ngwi nghao tatase aali;

²⁴ nghaduu mi ikye mgbi ema yo, i nghao tatase ni ani dze oshishe.

²⁵ Ngwi i gbosa lo ani nghane, n ye ta gbɛɛ n ka tilla dzeke, di kiyayi yi ema duu, ikye okiyayi mgbi ema yi atsa mi oyeye onuunu,

²⁶ ikyegbɛɛ odzɛɛdze ngwi ani dika dze yi ema ne no nu atsa mgbi ema mi ifu iYesu iKrestu mbwo fe-fe ikye ani.

²⁷ Ni alungwɛ kyo duu kpaa, odzɛɛdze mgbi ema no me mi Eso Osuse mgbi iKrestu. Yeba ni ani wa kwokyi ine yi ema hona fwo odze mgbi ema mi iyikpa kpaa, n ka ye gbɛɛ ema kwudze kpɔklɔ mi onodzi le kyungwɔ ondonyi mi oyeye onuunu mi Eso Osuse.

²⁸ Imio kpaa no ka wo ema mi ofe onyonyi mi ikye ama nfa ema ba. Okwudze kpɔklɔ mgbi ema ne li ambe mboma gbɛɛ, Imgbasho kawa dzila ma, kpaa ema yo Imgbasho ka dula ema to.

²⁹ Lubana a nu ema ofe gbɛɛ ni ema nu iKrestu oyeye ta ba, kpaa ni ema di gyadze ikye mgban.

³⁰ Ngwi ema kpaa le nye mi ito ika ngwi ani teyi nye ngwi ema di ne, li ika ma kpɔ ngwi ani kale gbo aani.

2

Ogbama iKrestu mi ewo oyile ese

¹ Okwokyi mgbi ema yi iKrestu nu ema itukwu ofyumfyefyepkpakpa mgban di gyila ema. Ema di dze yi okwakye yi Onodzi mgbi Imgbasho, di dze yi itukwu iyu yi elela odiidi.

² Nghane, ema nu ani dze yi atsa mi odze itukwu onyi yi ewema beyi okpitukwu di dze mi onodzi onyi yi ewodze otseetse mgbi ema ondoni na.

³ Ka kyo unkonyi mi ofu okyeekye ba, naadi mi ewo okyile esho ayayi ba, kpaa mi ewo oyile ese, di gbɛɛ inggise angbeka kpaa nga ema.

⁴ Ali inggise mgbi ema no ka kyinebyi ungwɔ nka yan abɔ kyoon ta ba, kpaa no li ikye oyabɔ mgbi angbeka kpaa.

⁵ Ali mgbi ema no li ungwonyi dafi mgbi iYesu iKrestu nani:

⁶ O dze mi odzɛɛdze mgbi Imgbasho yeye, kpaa o kye ewon gbɛɛ mfye mgbi ongwu li ungwonyi yi Imgbasho ba.

⁷ Nghaduu o kye ewon gbɛɛ ongwu li unkonyi ba, o kye ewon dafi ongbido a mban yeye dafi inggise owamye mani.

⁸ Ngwi a din mi odzɛɛdze mgbi inggise owamye ne kpaa, o yile ewon ese di siikyenu ngkataa kaka ikwongye, ma di li ikwu ongwɔ ekwatsi kpaa.

⁹ Nghaduu Imgbasho kyilen esho lu imbe ngwi nga duu,

di nun iyi ngwi nga ali iyi duu,

¹⁰ gbɛɛ mi iyi mgbi iYesu ali akwafɔ duu ka kwese

mi esho yi ese beyi iteese.

¹¹ Ma ali ikyide duu dika kyo obwende gbɛɛ iYesu iKrestu li Otse,

mi ikye okwɔkwɔ mgbi Imgbasho Otson.

Tso osa ni ese di

¹² Nghane, emi okani ama okpa ani itukwu, dafi ema li teyi siikyenu ani ne, no ka li inai ani ta ba, kpaa no ng hao she mi onɔ ngwi ani dze ba kpaa; kiyayi okyido owato-wato mgbi ema ne yi imio beyi igakwu oshiishi.

¹³ Lubana li Imgbasho li kyido mbi ema onu ema imina beyi mfye okyungwɔ nkpan mani.

¹⁴ Mi alungwɔ ngwi ema kyo duu, ondukwɔ hona angwodze no ka dze ele ba,

¹⁵ adzi ni inggise onyi ka kye ondu wo ema ewo ba, ni ema di dze saan. Dafi emi ongwɛ Imgbasho ama ndze yi obube ba dile kwɔ gbosa dafi mce mi ese ngwi imbaali yi okpagyewo she mi ele nani.

¹⁶ Ema kye elodze oshishe nu ma, ne kwudze kpɔkwɔ mi ele na, adzi nin wa tsaabo igege mi egbe iKrestu wa ye ma gbɛɛ ani tsinya hona kyido mbi ema ayayi ba mani.

¹⁷ Nghaduu oyeye onuunu beyi ido mgbi ema dze dafi ife ofe-fe mbi Otse Imgbasho mani. Kyayina a ka kye eyi mgbi ani kpaa yangwuta yi ife nani. Ngwi i dze nga yo, ani di dze yi atsa yi ema duu.

¹⁸ Nghane ema kpaa ewo no sheta lo ema di tsatsa yi ani.

ITimoti yi Epafrodito

¹⁹ Ni Otse iYesu gbela yo; n kye eka byi gbɛɛ n ka dɔ iTimoti eso mbi ema dzikan-dzikan ikyegbɛɛ no ka ye odzɛɛdze mgbi ema ye wa nya ani, adzi ni itukwu yi ani iyu.

²⁰ Ani dze yi inggise oka ngwu nga iTimoti nka gbewɛbyi ungwɔ mgbi ema saan wuba.

²¹ Bana inggise angbeka duu le pita ungwɔ iboma yama li ungwɔ mgbi iYesu iKrestu ba.

²² Nghaduu ema ye odzɛɛdze mgbi iTimoti, ikyekye o dze yi ani dafi ongwɛ yi otsɔn mani, o kyido yi ani mi Eso Osuse nani.

²³ Nghane, ani kye itukwu byi gbɛɛ, n ka dɔnsɔ mbi ema dzikan-dzikan jo dafi ani di gbɛɛ kawa dze yi ani mani.

²⁴ Ani di noyeye mbi Otse iYesu gbɛɛ ani abuani kpaa kawa kpadi ema vla.

²⁵ Nghaduu ani tsewe gbɛɛ li kyeme-kyeme oyile Epafrodito deso ye ka tu ema, o li ongwunani, di li inggise ido beyi oblakwutse mgbi iKrestu yi ani ungwonyi. Ema dɔnsɔ gbɛɛ no wa tobyi ani.

²⁶ Bana o mina kpakpa odi ema duu, ikyekye itukwu kakan ewo dafi ema fwo gbɛɛ i kpan ewo ba nani.

²⁷ Ma li otsitsi i kpan ewo ba, ke ondu ikwongye. Kpaa Imgbasho din elela, beyi ani kpaa, bana o dulu ani tɔ mi ifu elela okyɔkyɔ.

²⁸ Nghane, i ng hao fyi ani okyon deso lu mbi ema, ikyegbɛɛ ni ema ye din yo, ewo ka sheta lo ema, ani kpaa itukwu ka be ani ese.

²⁹ Ne gban mi ifu Otse iYesu yi atsa kpakpa, di kye ito inggise ama nto dafi ongwu wuuta na.

³⁰ Ikyekye i sisi mi ikyifo ngwi o kika kwulu mi ikye ido mgbi iKrestu, o kye oshishe mgban lase oya ani abɔ mi ungwɔ ngwi ema yagba kyo gbe ba mani.

3

Oyaabɔ ndze mi oye iKrestu

¹ Mi ongyeengye yo, emi ongwunani, dze yi atsa mbi Otse na! I kaka ani ewo odi yile ungwɔne lo ke mbi ema ba, kpaa li abɔ oyaaya mbi ema.

² Gbewɛbyi inggise ama ndze yi ali dafi obwe ntonɛ nani! A li ibwubwe inggise di mina osi ema ni ema kyiikye.

³ Lubana li eyi ama nkyiikye mi otsitsi ma aani, eyi ama nli sunu Imgbasho mi mfye mgbi Onodzi mgbi Imgbasho, di li tsaabo igege mbi iYesu iKrestu. Eyi dze yi abɔ otsigege mi mmbwe yi eyi ba,

⁴ Nghaduu kpaa ani abuani dze yi itodze otsabo igege mi mmbwe yi eyi.

Ni inggise tsewe gbæe ongwu dze yi itodze otsabo igege mi mmbwe yi eyi yɔ, ani dzeayan ngahaabo nani:

⁵ A kye ani ikye ngwi ani mbwo egbe egyata, ani li imba mgbi Israi, mi eto mgbi iBenjamin. Ani li inggise iHibru yeye. Dafi inggise iFarasi yɔ, n ongyo ola mgbi iMose klekle.

⁶ Dafi i tse ani olo okyido mi ewewa ba nɛ, n nu emi iKrestu iso kpakpa. N kyungwɔ ntone dafi ola mgbi iMose gbela gbæe inggise ka dze saan mi inɛ Imgbasho mani.

⁷ Nghane ungwɔ ama ndze yi ani oyabo nose duu, onene ani dzata ma nyanya ikye iKrestu.

⁸ Nghane, unkonyi ngba oye Otse iYesu iKrestu mgbi ani ba! Ani dzita alungwɔ duu kye ma gbæe a li ayayi mbi ani ikye Otse iYesu iKrestu mgbi ani. Bana ungwɔ ngwi ani mina yɔ, li iKrestu kyoon ta,

⁹ odi ye gbæe ani li mgban. Li mi ongyo ola mgbi iMose ngwi ani le saan mi inɛ Imgbasho ba, kpaa li mi oyeye mgbi ani onuunu mbi iKrestu kyoon.

¹⁰ I mina ani oye iKrestu yi mfye mgban okyee mi ikwu, di kwakye yan mi adze mgban oyeegeye, di kwikwu ungwonyi yan,

¹¹ ikye ni a wa kyile ani luba oshishe yan.

Onya otse ka tu umba

¹² Li ogbæe ani teyi tu ungwɔ ntone duu naadi teyi yee saan waba, kpaa ani le tsinya oka kye abo byike ungwɔ ongwɔ iYesu iKrestu kye dze ani mi iyayi nani.

¹³ Emi ongwunani, ani kye ewani wuuta gbæe ani kye abo byike ele waba. Kpaa ungwɔ onyi ani kyo yɔ, li odzita ungwɔ emi iyikpa kyinebyi ongwɔ iyayi.

¹⁴ Ani kale tsinya ikye oka tu umba oshishe ongwɔ esho ngwi Imgbasho kwu ani ela mbi iYesu iKrestu nani.

¹⁵ Eyi ama nmyotse mi onodzi duu, ni eyi dze yi ito ali ntoseni. Ni ema tsewe mi ofe angbeka idzidza yɔ, Imgbasho ka non gbosa lo ema.

¹⁶ Nghane ba ni eyi kiyayi okyedɔ otsootso ngwi eyi teyi kyedɔ nani.

¹⁷ Emi ongwunani, kwakye yi inggise angbeka okyedɔ ambe mgbi ani na, di gbewæbyi inggise angbeka nle kyo mi otsootso ngwi eyi tso ema neni.

¹⁸ Bana, dafi ani teyi li nya ema ma, onene kpaa n dile nya ema yi etse inɛ gbæe, angbeka kwuba to dafi engyikyili mgbi ekwatsi mgbi iKrestu mani.

¹⁹ Ongyeengye mgbi ama li odzili-dzili, a li sunu ifu mgbi ama. Abɔ otsigege mgbi ama li mi ungwɔ ayiwi. Itukwu mgbi ama byito mi ungwɔ ongwɔ ese neni.

²⁰ Nghaduu eyi yee imba ongwɔ esho. Eyi dile tsoolo le fɛ Onagbe Otse iYesu iKrestu nka kye esho kye nani.

²¹ O ka kye nyine ikpewo mgbi eyi mgbi mmbwe yi eyi ndze yi mfye ba nɛ ye kwɔ dafi mgban. O ka kyon yi mfye ngwi o kyi gbɛlu alungwɔ duu byike aboon nani.

4

¹ Nghane, emi ongwunani, ama nkpaani itukwu saan, n di mina odi ema. Ema li atsa yi okpapyi mgbi ani, nɛ ema ama okpa ani itukwu kwulesɛ mbi Otse iYesu kpɔklɔɔ na!

Ewe okwu wo

² N le tekye yi Eyudia beyi iSintace gbæe nu ma gbela yi ewoma mbi Otse.

³ Ema abuge ido mgbi ani, ya engyaa ntone abo na, lubana ama yi iKlementi beyi emi abuge ido mgbi ani angbeka, ama ngwu a lo ma iyi mi afe mgbi oshishe, tobyi ani mi ido Eso Osuse ogbo kpɔklɔɔ.

⁴ Tsatsa mbi Otse iYesu alono na. N di yilen gbo: tsatsa na!

⁵ Ali osuse mgbi ema no li obwendɛ mbi inggise duu. Lubana oyeege mgbi Otse dze kwekwe.

⁶ No ka kaka ema ewo mi unkonyonyi ba, kpaa bibo mi ali imina mgbi ema yi angha otaata mbi Imgbasho na.

⁷ Ta iyu mgbi Imgbasho nshe ngba ozoyeye mgbi inggise duu nɛ, ka ngwo itukwu yi eka mgbi ema mi ifu iKrestu iYesu.

⁸ Ongyeengye yɔ, emi ongwunani, kye itukwu mgbi ema byi alungwɔ nli otsitsi, li imo di li ayin, ndze yi idza ba di tishi beyi ongwɔ ndze yi mmwe.

⁹ Alungwɔ ngwi ema kpai naadi gbe naadi fwo mbi ani, hona di mbi ani yɔ, le kyon na. Ta Imgbasho nli nu iyu na ka dze yi ema.

IPol nu angba mi umba ngwi a ghan

¹⁰ Ani dze yi atsa mi ifu Otse kpakpa gbæe mi ongyeengye yɔ itukwu wa sheta lo ema yi ani. Mi otsitsi ema dze yi oweka osuse ikye ani, nghaduu ema tu ofe okye tso ba.

¹¹ Ani le gbɔdze nɛ ikyegbæe ani dze abubo ba, bana ani teyi kpai okye alungwɔ ngwi ani dzeayan duu gbæe no gyolo ani.

¹² Odze abubo kpaa ani ye, odze yi ungwɔ gwuba kpaa ani ye. Ani kpai odaada mgbi ali odzeedze beyi ali ito ofe duu, otolo hona odze enbwa, odze yi ungwɔ kwuba naadi gwee kpaa ani ye.

¹³ iKrestu nu ani mfye otsigege yi alungwɔ duu.

¹⁴ Kpaa i tishi kwuba ni ema ya ani abo mi ono okakewo mgbi ani.

¹⁵ Nghaduu, dafi ema emi iFyilipi ye mi ono ngwi ema gbe Eso Osuse nɛ mani, ono ngwi ani dzata iMasidonia ma, okwakye

emi iKrestu onyi kpaa ya ani abo mi odze ungwo onuunu yi ogbe-gbe ba, se li ema ta.

¹⁶ Bana ngwi ani dze iTesalonika ma kpaa, ema deso oyabo mbi ani dudo-dudo mi onzo ngwi ani dze abubo mani.

¹⁷ Li ikyegbe ani le pita umba ba, kpaa ani le mina gbe ni ema tu mse mgbi umba oghaagha.

¹⁸ Ungwo ngwi ema kye do Epafrodito wa nu ani ma ani tu duu. Umba ngwi ema kye deso nu ani ne, dze mbi ani dafi ungwo ama ogbungbe tishi ngwi a kye fife nu Imgbasho ngwi kpan mani.

¹⁹ Imgbasho mgbi ani ka nu ema alungwo ngwi ema mina duu, mi aludu okwokwo nkye mbi iKrestu iYesu nani.

²⁰ Okwokwo no dze yi Otseyi Imgbasho nghataa mbinose. No dze nga.

Angba ongwi olele

²¹ Ta emidi Imgbasho ama nli mgbi iYesu iKrestu duu angba nu ani na. Ama okyedso iYesu nto yi ani kpaa le ta ema angba.

²² Emi oyeye duu le ta ema angba, onghaangha duu yo, emidi Uto iSidza nani.

²³ Elela mgbi Otse iYesu iKrestu no dze yi onodzi mgbi ema duu. No dze nga.

Afe mgbi iPol mbi ama onoyeye Emi iKolose

iPol lo afe ke mbi emi iKolose

¹ Afe ne kye mbi iPol, inggise ogbikye iYesu iKrestu mi oweka mgbi Imgbasho, beyi iTimoti ongwuneyi.

² Ni elela beyi iyu mgbi Imgbasho Otseyi dze yi emi engwunee yi ama nle saan di noyeye mbi iKrestu mi iKolose ntonani.

Angba otaata beyi ibo

³ Eyi li le ta Imgbasho angba alono, Otso Otse mgbi eyi iYesu iKrestu, mi ono ngwi eyi le bibo ikye ema,

⁴ ikyesine eyi tsekise fwo oyeye onuunu mgbi ema mbi iYesu iKrestu beyi okpitukwu ngwi ema dzeyan mbi emi osaan duu.

⁵ Ono ngwi Eso osuse nli otsitsi ne ba mbi ema ababo ma, ema fwo ewe ogbe byiibyi ngwi eso na li nu mani, nghane okpitukwu yi oyeye onuunu mgbi ema dze mi ungwō ngwi ema gbekabyi ele, ngwi a kye dzeke ikye ema mi esho

⁶ nba mbi ema neni. Mi ese ololo duu Eso osuse ne le wa owawa dile gbafwe, yeye dafi i le kyo mi idzidze mgbi ema kye egbe ngwi ema fwon diye difwi elela mgbi Imgbasho mi otsitsi mgban duu mani.

⁷ Ema yen mbi Epafra, ongbido itukwu-tukwu yi eyi, ongbido oyeye mgbi iKrestu nle ya eyi abo gbikye ema,

⁸ di li ongwu nya eyi okpitukwu mgbi ema mi Onodzi.

⁹ Mi itodze ne, kye egbe ngwi eyi fwo odze mgbi ema ma, eyi tonya obibo ikye ema waba dile bo Imgbasho gbee non mbwo ema yi ozoyeye ongwu itukwu mgban mi ali odifwi-difwi beyi ozoyeye ongwu onodzi duu.

¹⁰ Eyi bibo ne ikyegbee ni ema ki dze mi oshishe nme mbi Otse mani, ni ema ki kyungwo okpan mi ali ofe duu: owa owawa mi ali ido osuse, di she yi ozoyeye mgbi Imgbasho,

¹¹ onu ema mfye mi odzedze mgbi ali mfye nkye mi okwokwo mgban mani. Ikyegbee ni ema dze yi onyotse okwu-kwu mi itukwu oshiishi, beyi atsa kpakpa

¹² ota Otsema, ongwu nnu ema me otu umba mi okwude mgbi emi osaan mi esuto mgbi osa na angba.

¹³ Lubana O dulu eyi to mi abumfye mgbi iifu kye eyi kaka esuto mgbi Ongwan itukwu-tukwu,

¹⁴ mbi ongwu eyi tu owato-wato, ngwi a di kye alobube ta eyi mkpa nani.

Onghaangha mgbi iKrestu

¹⁵ iKrestu li onodzi mgbi Imgbasho ongwu a li din ba nani, ongwovle mgbi ungwō ngwi a ta duu.

¹⁶ Lubana li mbon ngwi a ta alungwo duu; ungwō emi esho beyi mi ese, ama ngwi a li di ma beyi ama ngwi a li di ma ba, yeba no li itsuuto, naadi mfye, hona ama okyuuto, naadi mfye ama ogbe-gbe, alungwo duu a ta ikpewon beyi ikyon.

¹⁷ O dze kise alungwo duu, ma di li mbon ngwi alungwo duu kwakye.

¹⁸ O di li ikye mgbi ewo mgban ngwi li okwakye mgbi ama onoyeye, O di li owita-wita di li ongwovle mi idzidze mgbi emi ikwukwo duu, adzi no dze yi onghaangha mi alungwo duu.

¹⁹ Lubana li oweka mgbi Imgbasho gbee onganon no dze dafi Ongwu mi ali ofe duu.

²⁰ Di li mbon ngwi O yile ese duu gyiide yi ewon. Ungwō emi ese ne hona ungwō emi esho ikye oba yi iyu mi eyi mgbi onganon ngwi O kye fife mi ekwatsi nani.

²¹ Ono nnye ma ema dze mbotunto yi Imgbasho di li engyikyili mgban mi ewe ibwubwe mgbi ema otseetse.

²² Nghaduu onene, O yile ema gyiide mbi iKrestu mi mmbwe yi eyi nye mi ikwongye ikye okye ema tso dafi inggise ama osaan mi ine mgban, ama odze yi idza ewo ba beyi ama ngwu a ka dulu abo mboma ba.

²³ Ni ema kiyayi yi oyeye onuunu mgbi ema yo, ema ka kwulese kye afō twese kpoklō, ka suusu mi ewe ogbe byiibyi ngwi ema tu mi Eso osuse ne ba, di dze nyaan mi ine Imgbasho. Nene li Eso osuse ngwi ema tsekise fwo di li ongwu ngwi a tsekise gbo nya ali ito inggise mi ese duu, li mi eso ne ngwi ani, iPol, yee ongbido aani.

*Ido ngwi iPol kyo ikye okwakye
mgbi ama onu oyeye*

²⁴ Onene ani dze yi atsa mi adze ngwi ani gye ikye mgbi ema, lubana mi adze mgbi ani ogyeegye mi mmbwe yi eyi ne, ani le yaabo ongyelu ido nsisi mi adze mgbi iKrestu mi ikye ewo mgban, nli okwakye mgbi ama onu oyeye nani.

²⁵ Ani yee ongbido mgban mi ido ngwi Imgbasho kye wo ani abo ogbeeso mgbi Imgbasho ngye klekle,

²⁶ nene li ungwō odaada ngwi a kye da mi onova ibyibyi beyi eto ibyibyi, nghaduu onene a kye tso emi osaan.

²⁷ Imgbasho kyungwone yi ema Udzengye ama nli imba mgbi ifuda ba ne kpaa, ni ema tu osa mgbi aludu mgbi ungwō okwokwo odaada neni. Odaada ne li iKrestu ndze mbi ema ndi nu ema ewe ogbe byiibyi mgbi okwokwo mani.

²⁸ Nghane eyi gbo iKrestu nya ali inggise duu, yi ali ozoyeye duu, eyi kwo ma ado di

tso ma ikye ni ali inggise ba inai Imgbasho dafi inggise ama nmyiine mi okwakye mi ifu iKrestu.

²⁹ Ikye okyungwone nghataa ngye yo, mfye mgbi iKrestu nwodze le kyido mbi ani ne, nin le gbili yi ido ne aani.

2

¹ Ikyenghane ani mina onu ema ye dafi ani le kwunewo mi ikye mgbi ema yi ama nto mi iLaodisia, beyi ama ntsa yi ani ine-ine waba ntonani.

² Itodze mgbi ani li ikyegbee nu ma dze yi abo otsigge di yee ondoniyi mi okpitukwu, ikye nu ma dze yi odifwi-difwi kpakpa, adzi nu ma ye ungwō odaada mgbi Imgbasho, ngwi li iKrestu aboon nani.

³ Aludu mgbi ozoyeye tsatsa dze mbon.

⁴ Ani nya ema ungwone ikyegbee ni inggise onyi kpaa wa kpagya ema wo mi angwodze ama ofyumfya mgbi atsika ba.

⁵ Lubana dafi ani dze yi ema ine-ine ba ne kpaa, ani dze yi ema mi onodzi di dze yi atsa odi dafi ema le siikye nu, beyi oyeye mgbi ema onuunu mbi iKrestu mani.

*Oshishe mi iKrestu
she inggise adi ta*

mi ola mgbi inggise owamye

⁶ Nghawane, dafi ema gbe iKrestu iYesu dafi Otse ne, kiyayi odze mbon na,

⁷ kye afo kwulese di mbe mbon, fyumfye mi oyeye onuunu dafi a teyi tso ema mani, angba otaata no di mbwo le fe yangwuta mbi ema.

⁸ Di na gbee, inggise onyi kpaa kwu ema ofyee mi ofe mgbi okpagyewo ayayi mi ozoyeye mgbi inggise owamye, nkye mi otsootso mgbi aleto mgbi inggise owamye yi odzeedze mgbi ese ne ngha mbi iKrestu ba.

⁹ Lubana odzeedze mgbi Imgbasho duu wodze mbi iKrestu mi mmbwe yi eyi,

¹⁰ a di nu ema kwogwudu mbi iKrestu, o li ikye mgbi ali mfye beyi mfye ogbe-gbe duu.

¹¹ A di kye ema ikye mbon, ngwi li odulu ema to mi mfye mgbi ali ibwubwe mgbi atta. Ikye okye-kye ne a kye mi abo mgbi inggise owamye ba kpaa, li ikye ngwi iKrestu aboon kye ema.

¹² Bana ngwi a kyo ema iBatisima ma, li ungwonyi yi okye ema ndzi yi iKrestu. A di kyile ema mi ikwu ikyekye ema noyeye mi mfye mgbi Imgbasho, Ongwu nkyile iKrestu mi ikwu nani.

¹³ Mi ono ngwi ema li ikwukwo mi ali ibwubwe mgbi ema beyi mi ikye okye-kye ba mgbi ali ibwubwe mgbi atta ne kpaa, Imgbasho nu ema oshishe mbi iKrestu. O kye ali ibwubwe mgbi ema duu ta ema mkpaa,

¹⁴ Imgbasho kyi ngwodo mkpa mgbi ungwō obube beyi ola mgbi ungwō obube ama ndoto eyi ikye duu, o kyi gbelu ma klekle, kyi gbokwo mi ekwatsi.

¹⁵ Li imbe na iKrestu ngha ali mfye duu. Onghaangha mgban ma ekwatsi na, o nu ese duu di ayiwi mgbi ama mi ododa dafi emi obawi mani.

¹⁶ Inghawane, ka nu inggise onyi kpaa wo ema ola mi ungwogye naadi ungwō owawa mgbi ema naadi mi odze oga mgbi odzimgbasho, oga mgbi ofyia ofufe hona egbe otonyido ba.

¹⁷ Ungwō ntone li ambe mgbi ungwō ama nkawa ba; nghaduu, ingblimo mgban ma li iKrestu.

¹⁸ Ka nu inggise onyi nli yilewo ese mgbi atsika dile sunu engyese ndulu ema umba na ba. Bana inggise ntona li kye mfye mgbi ama byike mi ine odiidi, dile kyile ewo esho mi itodze ba ikyegbee itukwu ibwubwe mgbi ama le kye ma teyi.

¹⁹ A dze yi okwokyiikwokyi yi iKrestu nli ikye mgbi ewo duu na wuba. iKrestu li nu ikpewo mfye, o di li gbe imbe okwokyiikwokyi yi mmbwewo kwokyi mbonyi, di li she dafi Imgbasho mina gbee no she mani.

²⁰ Ema teyi kwulu yi iKrestu a di dudu ema to mi ola ongi ese neni, kyosinene ngwi ema le kyo dafi ema ka li mgbi ese ne ngha? Kyosine ngwi ema kale ngyo ola ntona:

²¹ <<Ka kye abo byi ungwone ba! Ka mbadi ungwō na ba! Ka kye abo gbo oka na ba!>>?

²² Ungwō ntone duu dze yi oyabo ba, bana a ka wa nye, ikyekye a dze mi ola beyi otsootso mgbi inggise owamye.

²³ Ongyo ito ola ntone dze dafi li okyungwō nli ayin mani. A li dze dafi a nu abu nghao dze yi okpitukwu mbi Imgbasho di dze yi ewo oyile ese saan di dze yi obwa ewo fyii. Nghaduu a yama dze yi mfye onyonyi mi ikye imina mgbi abu ba.

3

Kyo ali ofufe.

¹ Dafi a teyi kyile ema yi iKrestu ne, kye itukwu mgbi ema byi ungwō emi esho, imbe ngwi iKrestu sodze abugye mgbi Imgbasho nani.

² Kye itukwu mgbi ema byi ungwō emi esho na, no ka li ungwō emi ese ne ba.

³ Lubana ema kwulu, a di kye oshishe mgbi ema da onene yi iKrestu mbi Imgbasho.

⁴ Ono ngwi iKrestu, nli oshishe mgbi ema na, wa mblegba to ta, ema kpaa ka mblegba to yan mi okwokwo.

⁵ Ikyenghane, kyi ngwolu alungwō mgbi atta ongi ese ndze mbi ema duu: ungwō

dafi, amah idza yi okpekpe yi imina mgbi amah yi imina ibwubwe yi nggwo ngwi li osunu adagye nani.

⁶ Ikye ungwo ntonɛ, itingga mgbi Imgbasho kyema.

⁷ Ema tsekise kyikye mi ito ofe ntoneni, mi oshishe nose ngwi ema kyo mani.

⁸ Nghaduu onene li kyeme ema ka nya okyungwo ntoneni: itingga, ibe, anyi, idze, beyi ito mi ikpondu mgbi ema.

⁹ Ka kpagya ewema wo ba na, bana ema to mi odzeedze mgbi ema ogbugbe beyi okyockyo mgban

¹⁰ di kyo ali ofufe, ngwi a ye tan mi ozoyeye mi odzeedze mgbi Imgbasho nani.

¹¹ Ikyenghane, ogbua-gbua dzema mbi inggise iGriki naadi inggise iJuda ba, ama nkyiikye naadi ama nkyiikye ba, ama nkwiine ba, inbwanaka, ofeye, hona ama nto myee, kpaa li iKrestu wuuta aali, iKrestu di dze mboma duu.

¹² Ema li inggise ama Imgbasho sadu, le osaan di kpan itukwu, ikyenghane, ema kye elela odiidi, mse okyockyo, ewo oyile ese, okyo dumoo beyi itukwu oshiishi wo ewo na.

¹³ Shitukwu yi ewema di dze ewema ta alono ngwi ema dze yi okakewo yi ewema. Dze ewema ta dafi Otse tsekise dze ema ta mani.

¹⁴ Ungwo ntonɛ duu kye okpitukwu wele. Bana li ongwu kyi kwulu alungwo duu woke mbonyi.

¹⁵ Ni iyu mgbi iKrestu gyuto mi itukwu mgbi ema, lubana ngwi ema li alewo onyi, ngwi Imgbasho di kwi ema ela kaka iyu neni. Di gbede na.

¹⁶ Ni elodze mgbi iKrestu gbɛlu ema so ngwi ema le tso diye kwi ewema ewe wo yi ali ozoyeye duu, dile shashi ibo beyi ashi ngwi onodzi nu yi mgbede mi itukwu mgbi ema nu Imgbasho.

¹⁷ Alungwo ngwi ema kyo duu, no li mi odze ogbocgo naadi okyockyo kpaa, kyo ma duu mi iyi mgbi Otse iYesu, ota Imgbasho Otseyi angba mi ikpewon.

Ola mi ude inggise iKrestu

¹⁸ Engyaa, sunu obeema na, ikyesine li ungwo ngbuo ngwi ema ka kyo dafi emi iKrestu aali.

¹⁹ Engyulo, di ewema kpa itukwu na, ka nuno wo ma ba.

²⁰ Engbe, fwo ama omba ema mi alungwo duu, lubana ungwone li kpa Otse.

²¹ Etsengwe, ka nu engwe ema itukwu owulu-wulu ba, di a wa yee tsantsan.

²² Ema ofeye, fwado engyukwo mgbi ema emi ese ne mi alungwo duu, di kyo mi ele, no ka li mi ono ngwi ine mgbi ama byi mbi ema ta ba ikyegbee ni ema tu mgbede mboma

kpaa no li mi itukwu otsitsi beyi osusunu mi ikye mgbi Otse mani.

²³ Alungwo ngwi ema kyo duu, kyo mi itukwu onyi, dafi ema le kyido mgbi Otse mani, no ka li ikye mgbi inggise ba,

²⁴ lubana ema ye ema kawa gyokwude tu umba mbi Otse. Li Otse iKrestu ngwi ema le kyon ido.

²⁵ Ali inggise nkyungwo obube a ka kpan mkpa mi obube mgban, ikyena Imgbasho li fwo ali inggise duu ikwo ungwonyi.

4

¹ Emi otsungwude, kyungwo nli ayin dile yeye ma yi ofeye mgbi ema, ikyesine ema kpaa ye ema dze yi Otsungwude mi esho.

Ola owo kiyayi

² Kwasisa mi ibo obocoo, di gbede na.

³ Di bibo mi ikye mgbi eyi kpaa gbɛɛ, Imgbasho ki kwulu ofe mi ikye eso mgbi eyi, adzi ni eyi ki gbo iba mgbi iKrestu, ongwu a ta ani itse ikyon neni.

⁴ Bibo na gbɛɛ ni ani gbɔn saan, dafi ani ki gbɔn mani.

⁵ Ema kwiine mi ofe ngwi ema le kyungwo yi emi ese, alono ngwi ofe nu ema okye iKrestu tso yo, kyo oyabo yan saan na.

⁶ Ni odze mgbi ema ogbocgo alono tishi di fyumfya, ema di ye dafi ngwi ema ka nu ali inggise duu uka osuse mani.

Angba ongwu olele

⁷ ITaciko ka nya ema ali odze mgbi ani duu. O li ongwunani itukwu-tukwu, inggise ogbeeso mi otsitsi, di li ongbido ungwonyi yi ani mbi Otse.

⁸ Ani le don eso mbi ema ikyegbee no ka kwi ema ewe wo di nya ema dafi eyi le kiyayi mani.

⁹ O kyema yi Onesimo, eyi noyeye o di li ongwuneyi itukwu-tukwu, o li onyi mbi ema. A ka nya ema alungwo nle kyo mi imbe ne duu.

¹⁰ Aristako, nwodze obawi yi ani ne kpaa deso angba mgban, iMaki kpaa kyo nga, o li ongwotso iBanabasi. (Ema teyi fwo dafi ani nya ema gbɛɛ o kyema mani. Ki non ba yo, gban na.)

¹¹ IYesu, ngwu a li kwun di iJostusu, na kpaa deso angba. Ama ntonɛ li emi iJuda ama nwoto yi ani le kyido mgbi esuto mgbi Imgbasho, a di dze yi ani oyabo kpakpa.

¹² Epafra, ongwu nli onyi mi idzidze mgbi ema di li ongwongbe ido mgbi iYesu iKrestu na kpaa, deso angba kwuba. O li le bibo kpokoo alono mi ikye mgbi ema, ikyegbee ni ema kwudze kpokoo mi ali oweka mgbi Imgbasho, di mye di dze yi eka ogbe byiibyi.

¹³ Ani kyo obwende ikyon gbɛɛ o le kwunewo ido mi ikye mgbi ema beyi ama nto mi iLaodisia beyi iHierapoli.

¹⁴ Okeyi itukwu-tukwu iLuku, inggise obwotse, beyi iDema kpaa dɛsɔ angba kwuba.

¹⁵ Kye angba mgbi ani nu emi engwunani mi iLaodisia, beyi ongyaa iNyimfa beyi okwakye mgbi emi iKrestu mi udan nani.

¹⁶ Ni a gbɔ afɛ nɛ nya ema ngye yɔ, fya nu ma di gbɔn mi kwakye mgbi emi iKrestu ongwɔ iLaodisia nani, ema kpaa di gbɔ ongwɔ ani lɔ mbi emi iLaodisia nani.

¹⁷ Nya Acipɔ no gbekabyi ongyɛlu idɔ ngwi Otse kye won abɔ nani.

¹⁸ Ani, iPol, lɔ angba nɛ mi abɔ mgbi ani abuen. We dafi ani wodze obawɔ mani. Elela mgbi Imgbasho no dze yi ema.

Afe mgbi iPol ongwi ababo mbi ama onoyeye Emi iTesalonika

¹ IPol yi iSaila beyi iTimoti lo Afe ne,

Le ke mbi okwakye emi iKrestu mi iTesalonika, emidi Otse Imgbasho beyi Otse iYesu iKrestu:

Ni elela beyi iyu dze yi ema duu.

*Angba ota-ta mi ikye oyeye onuunu
mgbi emi iTesalonika*

² Eyi li ta Imgbasho angba mi ikye ema alono duu, di kwu iyi ema mi ibo mgbi eyi.

³ Eyi li le we alono mi inai Otseyi Imgbasho odze ido nto mi oyeye onuunu mgbi ema yi ongwi nkye mi okpitukwu kpaa nani, beyi itukwu oshiishi mgbi ema ngwi ema tu mi eka ogbe byiibi mbi Otseyi iYesu iKrestu nani.

⁴ Emi okani osuse, ema kpa Imgbasho itukwu, eyi di ye o dulu ema gbee ni ema li emidan,

⁵ ikyekye Eso Osuse mgbi eyi ba mbi ema li mi elodze ayayi ta ba, kpaa li mi mfye mgbi Imgbasho beyi Onodzi Osaan beyi okyata-kyata ongwi itukwu. Ema ye ito inggise ngwu eyi dze nose, beyi abo ngwi eyi ya ema mani.

⁶ Ema kye afo eyi beyi Otse iYesu; dafi ema nose le gyadze kpakpa ne kpaa, ema gbe eso ne yi atsa ongwi Onodzi Osaan kye nu ema mani.

⁷ Ma ema di yee ambe mbi ama onoyeye mi iMasidonia beyi Acaya duu.

⁸ Eso mgbi Imgbasho to mbi ema gbafwe kpaa i tase li mi iMasidonia yi Acaya ta ba, kpaa oyeye onuunu mgbi ema mbi Imgbasho yee ungwō ngwi a yen kpatse ali imbe duu. Nghawane eyi mina ogbodze onyonyi mi efu ba,

⁹ lubana ama abuoma gbo ito ogbe-gbe ngwi ema gbe eyi mani. A gbo dafi ema kyata ba mbi Imgbasho dzata emi angwula ikye osunu Imgbasho oshishe yi otsitsi mani.

¹⁰ Ema di fe Ongwan ongwu nkye mi adopo, ongwu o kyilen mi ikwu; nli iYesu, ongwu nnagbe eyi mi itingga nkye le ba nani.

2

Ido mgbi iPol mi iTesalonika

¹ Emi ongwunani, ema ye gbee okæke mgbi eyi mbi ema weese ba.

² Eyi teyi gyadze di gbe ito mi iFyilipi, dafi ema ye nani, nghaduu yi abo oyaaya mgbi Imgbasho mgbi eyi yo, ngwi a fwa eyi

kpakpa ne kpaa, eyi yeyikpa onya ema Eso Osuse ba.

³ Lubana ekye mgbi eyi otooto yi ema kye mi ende hona oweka obube naadi eyi le fya okyo ema ikwangha ewo kpaa ba.

⁴ Nghaduu eyi le gbodze dafi ama ngwu Imgbasho sadu ma di kye Eso Osuse wo ma abo. Eyi le fya okyungwo okpa inggise owamye ba kpaa li Imgbasho, ongwu nli di itukwu mgbi eyi nani.

⁵ Ema ye, eyi le fyumfya ondu yi ema ba. Imgbasho li obwendē gbee eyi kyo nggwō ba.

⁶ Eyi le mina otseetse mbi inggise ba, mbi ema ba naadi inggise oka mbeka kpaa ba.

Dafi ama ogbikye iKrestu ne, eyi kika yee okye mbi ema,

⁷ nghaduu eyi kwu blii mi idzidze ema, dafi onongwe li kyinebyi engbe mgban ama oshilele mani.

⁸ Ema kpa eyi itukwu kpakpa, nghane eyi dze yi atsa okye ghalu Eso Osuse mgbi Imgbasho yi oshishe mgbi eyi kpaa yi ema, ikyesine ema yee abugye mgbi eyi itukwu-tukwu.

⁹ Emi ongwuneyi, otsitsi ema we ido beyi adze mgbi eyi mbi ema wulo? Eyi kyido otu yi ono ikyegbee ni eyi ka yee okye mbi inggise onyi ba mi ono ngwi eyi gbo Eso Osuse mgbi Imgbasho nya ema mani.

¹⁰ Ema li obwendē, di li ngha Imgbasho kpaa li obwendē, mi ofe ngwi eyi le saan, le nyaan, di dze yi idza ewo ba mi ono ngwi eyi dze yi ema ama onoyeye mani.

¹¹ Lubana ema ye dafi eyi kyo yi ali inggise mgbi ema dafi otsongwe li kyo yi emi ongan mani.

¹² Eyi le kwu ema ewe wo, le gyila ema di we ema odze gbee ni ema dze mi oshishe nme mbi Imgbasho, ongwu nkwo ema ela kaka esuto beyi okwōkwō mgban nani.

¹³ Ma eyi abueyi kpaa le kiyayi ota Imgbasho angba ikyesine, ono ngwi ema fwo elodzimbasho mbi eyi ma, ema gbela yan dafi elodze nkye mbi inggise ba, kpaa mbi Imgbasho abuon, lubana li Imgbasho na le kyido mbi ama nnoyeye aali.

¹⁴ Emi ongwuneyi, ema yee ama ogbama okwakye emi iKrestu mgbi Imgbasho mi ijuda, ama nto mbi iYesu iKrestu mani. Ema gyadze mi abo emidi ema ungwonyi dafi okwakye emi iKrestu ntona gyadze mi abo emi ijuda nani.

¹⁵ Emi ijuda ntona ngwo Otse iYesu beyi ama ogbeese mgbi Imgbasho, diye lo eyi onya tase mi ese mgbi ama. A kyungwo okpa Imgbasho ba, a di dze yi anyi yi ali inggise duu.

¹⁶ A di fya otukwu eyi ofe ogbo Eso Osuse mgbi owato-wato nya Udzengye ikye nu ma ka wato mi itingga mgbi Imgbasho ba. Mi okyo nghane, ali ibwubwe mgbi ama ke

byulu. Onene ikamba mgbi Imgbasho do ma ikye.

IPol mina odi emi iTsalonika

¹⁷ Emi ongwunani, onɔ ngwi a wa gbua eyi yi ema mi ongwonɔ gwee ma, (li mi ewo ta, li mi ewe otseetse ba), mi ofyaafya mgbi eyi, eyi fya mi ali ofe duu gbɛɛ ni eyi di ema.

¹⁸ Lubana eyi mina oba mbi ema; onghaanga duu yɔ, ani iPol, fya diye fya, kpaa iSatan nu eyi ofe ba.

¹⁹ Lubana li ema li ewe ogbe byiibi eyi, atsa mgbi eyi, beyi okpapyi ngwi eyi kawa kwɔ mi ine Otse mgbi eyi iYesu mi onɔ ngwi o kawa ba ma baa?

²⁰ Mi otsitsi yɔ, ema li okwɔkwɔ beyi atsa mgbi eyi.

3

¹ Ta ngwi eyi yagba okye afo twese mi ele gbɛ wuba ne, eyi gbela abueyi tila toke Aten yueyi.

² Eyi do iTimoti ongwuneyi esɔ mbi ema, o di li inggise ido mgbi Imgbasho ogbofwe Esɔ Osuse mgbi iKrestu. Eyi don esɔ no ka fyi ema mfyitukwu di kwu ema ewe wo mi oyeye onuunu mgbi ema,

³ ikyegbɛɛ ni itukwu ka sha inggise onyi mgbi ema anye ikye imbadi ntonɛ ba. Ema ye saan gbɛɛ okakewo ntona teyi to ikye eyi.

⁴ Odzimo, onɔ ngwi eyi to yi ema ma, eyi li le nya ema alonɔ gbɛɛ a kawa nu eyi iso, di li ngha yeye ngwi i wa dze, dafi ema ye saan neni.

⁵ Ngwi ani yagba fwo mbi ema wuba ne, ani do iTimoti esɔ oka kya di mi oyeye onuunu mgbi ema. Ani mio gbɛɛ kaba iSatan wa mbadi ema ta adze mgbi eyi ka labo.

Esɔ okwewewo mgbi iTimoti

⁶ Nghane iTimoti kwa ye mbi ema ba mbi eyi onene aani, o di ba yi eyi elodze osuse mgbi oyeye onuunu beyi okpitukwu mgbi ema. O nya eyi gbɛɛ alonɔ duu ema li le tsewe osuse mi ikye mgbi eyi dile mina odi eyi, yeye dafi eyi kpa mina odi ema neni.

⁷ Inghawane, emi ongwunani, mi okakewo mgbi eyi beyi iso ngwi a nu eyi duu ema nu eyi abo otsigege mi oyeye onuunu mgbi ema.

⁸ Lubana onene itukwu be eyi ese dafi ema kwudze kpoklɔ mbi Otse iYesu neni.

⁹ Eyi ka ta Imgbasho angba mi ikye mgbi ema sinese ngwi ka gyo okpan mkpa mi atsa ngwi eyi dzeyan mi inain ikye mgbi ema ne?

¹⁰ Otu yi onɔ eyi li bibo mi itukwu mgbi eyi onyi gbɛɛ eyi ki ye di ema ikye ombwo ema ungwɔ ama nkwo ba mi oyeye onuunu mgbi ema.

¹¹ Onene ni Otseyi Imgbasho abuan beyi Otse mgbi eyi iYesu kyi melu eyi ofe oba mbi ema.

¹² Otse iYesu ki nu okpitukwu mgbi ema mbwo le fe ikye ewema yi inggise angbeka duu, yeye dafi okpitukwu mgbi eyi dze ikye ema neni.

¹³ O ki fyi ema mfyitukwu ikyegbɛɛ nu ma ka tu ungwɔ okye ondu kwo ema ewo ba, ni ema dile saan inai Otseyi Imgbasho yi onɔ ngwi Otse mgbi eyi iYesu wa ye ba yi ama osaan mgban duu mani.

4

Oshishe okpa Imgbasho

¹ Ongwikpa yɔ, emi ongwunani, eyi teyi we ema odze mi ito oshishe ngwi ema ka dze se ka kpa Imgbasho mani, dafi ema le kyo nani. Onene eyi le nya ema dile tu ema wo mbi Otse iYesu gbɛɛ ni ema kiyayi ole kyo ngha.

² Lubana ema ye ola ngwi eyi wo ema mi mfye mgbi Otse iYesu mani.

³ Li owitukwu mgbi Imgbasho gbɛɛ ni ema le saan, ni ema nya yi amah okyɔkyɔ;

⁴ gbɛɛ ni ali inggise mgbi ema non kpayi obwa ewon fyii mi ofe osaan di dze yi mmwe,

⁵ no ka li mi ofe mgbi imina amah dafi ama nli emi iKrestu ba, di ye Imgbasho ba na ba.

⁶ Ma mi itodze ne, inggise onyi kpaa no ka kyo ongwunon obube naadi kyo ongwunon ogye ba. Otse Imgbasho ka kwo ali inggise duu adɔ mi ito ali ibwubwe ntoneni, dafi eyi teyi nya ema di kwo ema adɔ mani.

⁷ Bana Imgbasho kwu eyi ela gbɛɛ ni eyi wa le kpekpe ba, kpaa ni eyi dze mi oshishe osaan.

⁸ Ikyenghane, inggise nfwa otsootso ne, fwa ama ngwu tso ma ma ta ba kpaa li Imgbasho abuan, ongwu nnu ema Onodzi mgban Osaan nani.

⁹ Mi odze mgbi okpitukwu mgbi ongwuneka yɔ, eyi di oyabo olo afe desɔ nu ema mi ele ba, lubana ema abuema Imgbasho teyi tso ema dafi ema ka dze yi okpitukwu mbi ewema mani.

¹⁰ Ma mi otsitsi yɔ, ema teyi dze yi okpitukwu mbi ama okyedɔ iYesu kpatse ese iMasidonia duu. Nghaduu eyi kale gbo yi ema emi ongwuneyi, kiyayi mi okpitukwu na.

¹¹ Fya mi ofyaafya mgbi ema odze mi oshishe oshilididi, kye eka byi ungwɔ mgbi ema di kyidɔ mi abo mgbi ema, yeye dafi eyi teyi nya ema mani,

¹² ikye ni odzeddze mgbi ema nu etase nu ema mmwe, adzi ni ema ka kye ine byi mbi inggise onyi ba mani.

Oyeye mgbi Otse

¹³ Emi ongwunani, eyi mina gbɛɛ ni ema ka li inzunubu mi odze inggise ama nteyi kwulu hona wulu itukwu dafi inggise angbeka, ama ndze yi eka ogbe byiibi ba na ba.

¹⁴ Eyi noyeye gbɛɛ iYesu kwulu diye kyɛɛ di li nga ngwi eyi noyeye gbɛɛ Imgbasho ka yile ama nnuna mi ifu iKrestu ba yan aali.

¹⁵ Mi elodze mgbi Otse abun ma, eyi nya ema gbɛɛ eyi ama nka to oshishe ngwu a dzita eyi ngataa ba oyɛɛ mgbi Otse iYesu ma, ka yagba oteyi ama nteyi nuna mbon na ba.

¹⁶ Lubana Otse iYesu abun ka kye adopo ba ese, yi ola owoowo mi ela okwukwo, yi ela mgbi ongbodzi ongyeso beyi agba ofofo mgbi Imgbasho, man ama nkwalu mi ifu iKrestu ka teyi kyato ababo.

¹⁷ Ta eyi ama nka to oshishe ngwu a di dzita eyi to ese ne, a kawa gbe eyi ka kwakye yi ama mi akpa oka tu Otse mi awo. Ma di li nga ngwi eyi ka dze yi Otse iYesu gyegwu aali.

¹⁸ Inghawane le kwu ewema ewe wo yi elodze ntone na.

5

Wewo mi oyɛɛ mgbi Otse

¹ Nghane, emi ongwunani, mi odze onɔ yi egbe oyɛɛ yo, eyi di oyabo olungwo nya ema mi ele ba,

² lubana ema ye saan gbɛɛ oyɛɛ mgbi Otse iYesu kale bwabwa dafi emunyi mi otu mani.

³ Ono ngwi inggise kale gbɔgbɛɛ ama dze mi iyu yi omyɛ-myɛ mani, odzili-dzili ka ba mboma bwabwa, dafi imba li kwu ongyaa ifu mani. Ta a ka wato gbe ba.

⁴ Nghaduu, emi ongwunani, ngwi ema to mi iyifu ba ne, egbe na ka tu ema bwabwa dafi emunyi ba.

⁵ Ema duu li emi ongwɛ osa di li kyikye mi osa. Eyi li mgbi otu hona iyifu ba.

⁶ Nghane, ni eyi kwasisa di kwu blii, ni eyi ka nuna dafi angbeka ntona ba.

⁷ Lubana ama ngwu nuna, nuna mi otu, ama ndi fyebye, fyebye mi otu.

⁸ Kpaa dafi eyi li emi ongwɛ osa ne, ni eyi bwa eweyi fyii di kye oyɛɛ onuunu yi okpitukwu wo dafi abiika, odi kye eka ogbe byiibi mgbi owato-wato dafi angwikye ika mani.

⁹ Lubana Imgbasho dulu eyi gbɛɛ ni eyi gyadze mi itingga mgban ba, kpaa ni eyi tu owato-wato mbi Otse mgbi eyi iYesu iKrestu.

¹⁰ O kwulu mi ikye mgbi eyi ikyegbɛɛ, kini eyi dze oshishe naadi kwulu kpaa, mi onɔ oyɛɛ mgban ma, ni eyi dze oshishe biyan.

¹¹ Inghawane, kwu ewema ewe wo di fyii eka mfye itukwu, yeye dafi ema tsekise le kyo nani.

Ola ongwɛ olele

¹² Emi ongwuneyi, onene eyi le nya ema gbɛɛ ni ema kye mmwe nu ama nkyido kpoklɔɔ mi idzidze ema, ama nteyi ema mbi Otse iYesu di li we ema odze mani.

¹³ Kye mmwe onghaangha nu ma mi okpitukwu mi ikye ido mgbi ama. Dze mi iyu yi ewema.

¹⁴ Emi ongwuneyi, eyi dile nya ema gbɛɛ ni ema kwo emi okwulo ado, kwu ama nli wo imio ewe wo, ya ama osheshe abo di shitukwu yi ali inggise duu.

¹⁵ Di gbɛɛ inggise onyi kpaa kpumkpa alobube mi alobube ba, kpaa alono kyo osuse yi ewema yi ali inggise duu.

¹⁶ Dze yi atsa alono;

¹⁷ bibo alono duu,

¹⁸ Ta Imgbasho angba mi alungwo nkyo duu, lubana li oweka mgbi Imgbasho mi ikye ema mbi iYesu iKrestu aani.

¹⁹ Ka kye myunu ola mgbi Onodzi ba;

²⁰ ka kwu elodze oyegbo mgbi Imgbasho shanye ba.

²¹ Mbadi alungwo duu. Gbela yi osuse mani.

²² Dze enggengga yi alobube duu.

²³ N bibo gbɛɛ ni Imgbasho abun, ongwu nli nu iyu na, kye ema dze nyaan. Ni onodzi mgbi ema ololo yi oshishe beyi ewo duu dze yi idza ba, mi onɔ oyɛɛ mgbi Otse mgbi eyi iYesu iKrestu mani.

²⁴ Imgbasho nkwi ema ela na li wende ba, o dika kyo nga yeye.

²⁵ Engwunen, bibo ikye eyi na.

²⁶ Ta ama onoyeye angba di tsekwulu eka mi okpitukwu na.

²⁷ Mi iyi mgbi Otse iYesu, ani le tekye nu ema gbɛɛ ni a gbo afe ne nya ama onoyeye duu.

²⁸ Ni elela mgbi Otse mgbi eyi iYesu iKrestu dze yi ema.

Afe mgbi iPol ongwu fan mbi ama onoyeye Emi iTesalonika

¹ Afe ne kye mbi ani iPol, iSaila beyi iTimoti, le ke mbi emi odzimgbasho mi iTesalonika, ema nli mgbi Imgbasho Otseyi beyi Otse iYesu iKrestu nani.

² Ni elela beyi iyu mgbi Imgbasho Otseyi beyi Otse iYesu iKrestu dze yi ema.

Angba otaata beyi ibo

³ Dze mbiso eyi ka ta Imgbasho angba alono mi ikye mgbi ema, emi ongwuneyi, ma li nga yeye, ikyesine oyeye mgbi ema le sheeshe lu iyayi, okpitukwu mgbi ema mbi ewema kpaa le sheeshe.

⁴ Nghane, mi idzidze okwakye mgbi emi iKrestu duu eyi li tsaabo igge ikye ema mi itukwu oshiishi beyi oyeye onuunu mi iso yi ali imbadi ngwi ema to le nye mi ele duu.

⁵ Ungwo ntono duu li ambe otso gbex ikwo ogbwo mgbi Imgbasho li ayin, ikyenghane ema ka me okaka esuto mgbi Imgbasho, ongwu ema to le gyadze ikyen neni.

⁶ Mi ikwo mgbi Imgbasho ofwoofwo, o ka oyile mkpa adze kpa ama nle nu ema adze ntonani.

⁷ O dika nu ama a le nu ma iso ne tonya beyi eyi kpaa. Ungwone ka kyo mi ono ngwi Otse iYesu ka kye esho yi angbodzi engyeso mgban mi amoola mani.

⁸ O ka kwo ama n ye Imgbasho ba di noyeye mi Eso Osuse mgbi Otse mgbi eyi iYesu ba ntona ado.

⁹ A ka kwo ma ado yi odzili-dzili igyegwu, a dika ba inai Otse beyi mfye mgban okwoko ba

¹⁰ mi egbe ngwi o ka ba owa gbe okwoko mbi inggise mgban ama osaan beyi otsetse mbi ama onoyeye duu mani. Ema kpaa ka wele yi ama, ikyesine ema noyeye mi obwende mgbi eyi mbi ema.

¹¹ Ikyenghane, eyi bibo tonya ba ikye ema, gbex ni Imgbasho nu ema me ela okwuukwu mgban, odi nu ali oweka mgbi ema osuse duu beyi ali ido mgbi oyeye onuunu mbwumbwo mi mfye mgban.

¹² Mi ito ofe ne iyi mgbi Otse iYesu mgbi eyi ka tu okwoko ikpewo ema, ongwu kpaa dika nu ema okwoko, mi elela mgbi Imgbasho mgbi eyi beyi Otse iYesu iKrestu.

2

Inggise imbaali

¹ Mi ikye odze oyeye mgbi Otse mgbi eyi iYesu iKrestu, beyi owa gbe eyi kwakye mbonyi yan ne, ani tekye nu ema emi ongwunani gbex,

² ka wende hona kye itukwu feesho ba na. Odze ama ogbex atsika gbo yi eso ema fwo hona afe ngwi a lo nu ema gbex, egbe mgbi Otse teyi ba wa na, kye mbi eyi ba.

³ Ka nu inggise onyi kpaa kpagya ema wo mi ofe onyoni ba, lubana egbe na ka ba ba sede inggise ibyibyi ka kye afo twese yi elodzimgbasho, a dika kye inggise imbaali ongwu a kyon dze ikye owa dzilin na tsoono se.

⁴ O ka fwa di kyile ewon esho nga alungwo a li kwun di Imgbasho beyi ungwo a li sunu duu, jo o ka kye ewon tuo mi ozu okwukwo osunu Imgbasho mi iJerosalin, le tekpo gbex ongwu li Imgbasho.

⁵ Ema we dafi ono ngwi ani ka dze yi ema ma ani li nya ema ungwo ntono baa?

⁶ Onene ema di ye ungwo nkwo inggise imbaali na kwulese mani, ikye ni a wa kyon tso mi ono ma yeye.

⁷ Lubana mfye odaada mgbi inggise imbaali na teyi le kyido wa; kpaa ongwu nbwan kwulese onene ne ka kiyayi okyo nga nghataa mbiso a kawa dulun to mi ofe nani.

⁸ Ta a kawa kye ongwu nli ngwo ola ba na do ododa, nghaduu Otse iYesu ka kyi gbelun mfye mi mnye ongwu ondu mgbi ongwu di dzilin mi okwoko mgbi obaaba mgbi ongwu mani.

⁹ Ongwu nli ngwo ola ba na ka ba yi mfye mgbi iSatan di wa kyo ali ambe ikpaflo beyi ungwo ama okwulewo duu,

¹⁰ dika kye ali ito ofe ibwubwe duu okpaga ama nkawa dzili ma wo. A ka dzili ikyekye a fwa ogbe Eso Osuse ne yi atsa adzi ni a dula ma wat.

¹¹ Ikyenghane Imgbasho kye onodzi owende ofumfye nu ma ikyegbe nu ma noyeye mi atsika,

¹² adzi ni ama nnoyeye mi otsitsi ba kpaa gbela yi imbaali ma gyobube.

Kwudze kpoklo

¹³ Nghaduu i tishi ngwi eyi kile ta Imgbasho angba alono mi ikye ema, emi ongwuneyi ama nkpa Imgbasho itukwu, ikyesine mi owita-wita ma Imgbasho sadu ema ikyegbe ni ema wat mi ido mgbi Onodzi Osaan ngwi a kyi salu ema beyi ikye oyeye onuunu mi otsitsi nani.

¹⁴ O kwu ema ela nye mi Eso Osuse ngwi eyi le gbo nani, ikyegbe ni ema tu okwoko mgbi Otse mgbi eyi iYesu iKrestu.

¹⁵ Nghane, emi ongwunani, kwudze kpoklo na di kye abo byi mi otsooto ngwi eyi tso ema nani, ki no li mi odze ondu naadi mi afe ololo kpaa.

¹⁶ Ni Otse mgbi eyi iYesu iKrestu abun beyi Imgbasho Otseyi, ngwu eyi kpan itukwu beyi mi elela mgban nu eyi ewe

okwuwo igyegwu beyi eka ogbe byiibyi osuse,

¹⁷ kwu ewema ewe wo di fyumfye mi itukwu na mi ali ido osuse beyi odze ogboogbo duu.

3

Bibo ikye eyi

¹ Ongyεngyε yɔ, emi ongwunani, bibo ikye eyi adzi ni esɔ mgbi Otse gbɔfwε pleple di dze yi mmwe, dafi i dze yi ema nose mani.

² Di bibo na gbεε nu ma dulu eyi mi abo emi imbaali beyi emi ibwubwe, lubana li inggise tsatsa dze yi oyεye onuunu ba.

³ Nghaduu Otse li ndu ba, o dika nu ema mfye di ngyo ema mi abo ibwubwe inggise nani.*

⁴ Eyi dze yi abo otsigεge mbi Otse gbεε ema le ngyo dika kiyayi okyungwo ngwi eyi wo ema ola nani.

⁵ Ni Otse kye ema itukwu byi okpitukwu mgbi Imgbasho beyi itukwu oshiishi mgbi iKrestu.

Adɔ okwookwo mi ikye emi ewewa

⁶ Mi iyi mgbi Otse iYesu iKrestu, eyi wo ema emi ongwuneyi ola gbεε, ni ema dze mbombo yi ali emi ongwunema ama nli kyido ba di dze mi otsootso ngwi ema gbε mbi eyi ba duu.

⁷ Lubana ema abuema ye dafi ema ka kyεdɔ ambε mgbi okyɔkyɔ mgbi eyi. Eyi li ama odze abo ayayi mi onɔ ngwi eyi dze yi ema ma ba,

⁸ hona eyi gye ungwogye mbi inggise onyi mi ayayi ba. Mi ayε oka yɔ, eyi li kyido otu yi onɔ, le gyadze dile kwunewo ikyegbεε ni eyi ka li okye mbi inggise onyonyi ba.

⁹ Eyi kyungwɔnε, ikyegbεε di eyi dze yi ofε ngwi a ka ya eyi abo ba ba, nghaduu li ikye onu eyi li ambε ngwi ema ka kyεdɔ.

¹⁰ Lubana onɔ ngwi eyi dze yi ema ma kpaa, eyi wo ema ola nε gbεε, <<Kini inggise ka kyido bayɔ, non ka gye ungwogye ba.>>

¹¹ Eyi fwo gbεε angbeka mi idzidze ema li emi okwulo. A li gbela okyido ba; sede okye ondu wo inggise ewo.

¹² Li ito inggise ntona ngwi eyi le gbo yi ama dile wo ma ola mbi Otse iYesu iKrestu gbεε, nu ma yile igεge bεsε di kyido otu ungwogye ngwi a ka gye.

¹³ Nghaduu mbi ema, emi ongwunani yɔ, ka yama ndε okyɔ osuse ba.

¹⁴ Kini inggise fwa ofwo odze owεεwε ngwi eyi lɔ mi afε nε yɔ, kye ewε byin saan na, dze enggengga yan, adzi ni ayiwi kwun.

¹⁵ Kpaa ka kyen dafi inggise ikyili mgbi ema ba, nghaduu kwon adɔ dafi ongwuno mani.

Elodze ongwi olεle

¹⁶ Ani bibo gbεε ni Otse Imgbasho mgbi iyu abuon nu ema iyu alonɔ beyi mi ali ofε duu. Otse no dze yi ema duu.

¹⁷ Ani, iPol, lɔ angba nε mi abo mgbi ani, nli ambε otso idzidza mi afε ngwi ani lɔ duu. Ikye otso gbεε li ani iPol lɔ.

¹⁸ Elela mgbi Otse mgbi eyi iYesu iKrestu no dze yi ema duu. No dze ngha.

* 3:3 3:3 Ibwubwe inggise: Na li iSatan.

Afe mgbi iPol ongwi ababo mbi iTimoti

¹ Afe ne kye mbi ani, iPol, ongye ogbikye iYesu iKrestu mi Ola mgbi Imgbasho Onagbe eyi beyi iYesu iKrestu nli ewe ogbe byiibyi mgbi eyi nani.

² N le lo mbi iTimoti ongwani mi oyeye onuunu na gbæ:

Ni Otseyi Imgbasho beyi Otse iYesu iKrestu mgbi eyi na nu abu mse yi elela beyi iyu.

*Ado okwookwo ikye ama otso
ola atsika*

³ Ono ngwi ani le lu iMasidonia ma, ani nya abu gbæ ni abu tila dze Efesu dile fwa yi ama ngwu otsootso mgbi ama li otsitsi ba ntonani.

⁴ Nu ma ka yama gbekabyi utsa otsaatsa beyi odze eto ogboogbo nli dondu ba na ba. Ungwo ntono li ba yi angwodze ayayi ta, li yama ba yi okiyayi mgbi ido mgbi Imgbasho nli mi oyeye onuunu na ba.

⁵ Itodze mgbi otsootso ne yo, li okpitukwu, nkye mi itukwu osaan, yi ewodze osuse mi itukwu beyi oyeye onuunu otsitsi mani.

⁶ Angbeka dzata ungwo ntono di kyata le gbodze ama nli ayayi ta.

⁷ A mina oli etsetse mgbi ola, kpaa a ye ungwo ngwi a tole gbo ma ba, nghaduu a di tole gbon yi abo otsigege.

⁸ Eyi ye gbæe ola mgbi iMose tishi, kini inggise kyo oyabo yan saan yo.

⁹ Eyi di ye dafi ola dze mi ikye mgbi ama osaan ba mani, kpaa dze mi ikye mgbi ama ofoola, yi ama onghaado, yi ama n ye Imgbasho ba, beyi emi ali ibwubwe, yi ama nle saan ba, yi ama okyo Imgbasho ido ba, yi ama nngwo ama omba ma, beyi ama ogbonngwo inggise.

¹⁰ Di dze ikye inggise ama okyo amah yi ali ito idza duu, yi ama ogbe ofyæe gya, yi ama ogbatsika, beyi ama ofa mi otsitsi ba, beyi ama nli kyo alungwo angbeka duu ndze idzidza yi otsootso osuse,

¹¹ ngbela yi Eso Osuse okwokwo mgbi Imgbasho onghaangha, ngwi o kye wo ani abo ne ba mani.

Elela mgbi Imgbasho mbi iPol

¹² Ani ta Otse mgbi eyi iYesu iKrestu angba, ongwu nnu ani mfye di kye ani gbæe ani li inggise oyeye, di dudu ani gbæe ni ani kyon ido neni.

¹³ Ngwi ani nose li inggise okwu iyi iYesu fyito di nu emidan iso kpakpa, yi ablodze okyokyo ne kpaa, Imgbasho di ani elela

ikyekye n kyo mi ine obuubu yi oyeye onuunu ba.

¹⁴ Otse Imgbasho mgbi eyi kye elela mgban yawo ani dzii, di kye yi oyeye onuunu beyi okpitukwu ama ndze mbi iYesu iKrestu nani.

¹⁵ Odze ne, li odze ogbelan mi itukwu onyi gbæ: iYesu iKrestu ba ese owa dudu emi ali ibwubwe ama ngwu ani nghao li inggise obube mboma ne to.

¹⁶ Mi itodze ne, Imgbasho di ani nnghao li inggise obube ne elela, adzi ni ani li ambe mgbi itukwu oshiishi mgbi iYesu iKrestu nle dzii mbi ama nkawa nun oyeye di tu oshishe igyegwu mani.

¹⁷ Oshewo yi okwokwo duu no dze yi Uto nli gyegwu, nka kwulu ba, ngwi ine li din kpaa ba, ongwu nli Imgbasho yuon nghataa mbinose nani. No dze ngha.

¹⁸ ITimoti, ongwani, ani le wo abu ola mi odze ngwi a tsekise yegbo mi ikpewo abu ma, ikyegbæe ni abu kyo mi ele yo, o ka li inggise ogbika saan.

¹⁹ Onu abu kyungwone yo, o ka dze yi oyeye onuunu kpoklo yi ewodze osuse mi itukwu, ngwi inggise angbeka fwan ni oyeye onuunu mgbi ama ngwiingwi.

²⁰ Mi idzidze ma, li iHimenayo yi Alekidzanda, ngwu ani kye ma wo iSatan abo ikye no ngwunu ma, adzi nu ma nya okwu Imgbasho shanye ntonani.

2

Ola ikye osusunu

¹ Nghane ungwo ongwani ababo yo, n mina gbæe ni abu bibo di tekye yi angba otaata kpakpa nu Imgbasho ikye ali inggise duu.

² Ne bibo ikye emi utu yi ama mfye byito abo ma duu adzi ni eyi dze mi iyu yi oshishe oshilididi dafi eyi le sunu Imgbasho di kwakwafæ ese nun neni.

³ Ungwone tishi di li ungwo okpa Imgbasho ongye Onagbe eyi,

⁴ ongwu nmina gbæe ni ali inggise duu tu owato-wato di ye otsitsi nani.

⁵ Bana Imgbasho li onyi ta, inggise oyile inggise gyiide yi Imgbasho kpaa li onyi, li iYesu iKrestu,

⁶ nkye ewon nu ikye odulu ali inggise duu wato nani. Imgbasho kye ungwone tso eyi ngwi ono wa gyo yeye mani.

⁷ Di li itodze ne ngwi a dudu ani ali inggise ogbeeso di gbikye iYesu, otso Udzengye duu eso mgbi oyeye. N le gbo otsitsi, yama li atsika ba.

⁸ Nghane ani mina engyulo nu ma kyile abo mgbi ama osaan mi ali imbe ngwi a to duu bibo, no ka li mi itukwu owulu-wulu hona angwodze ba.

⁹ Ani di mina gbæe engyaa nu ma me ewo saan, yi ozoyeye no di gyogyo kpaa. No ka

li mi otu om̄eme mgbi ala hona mi abashi naadi mi ungwō ama ofyunfyummya hona tagwude naadi angwuto ofyunfyummya ba,

¹⁰ kpāa no li mi okyō̄kyō̄ osuse ngwō mbi engyaa ama nli sunu Imgbasho mani.

¹¹ Ongyaa no kpayi ungwō shilididi yi ewo oyile ese menemene.

¹² Ani nu ongyaa ofe otsungwō naadi dze yi mfyē mi ikye ongyulo ba, kpāa no dze shili.

¹³ Lubana a teyi m̄e Adan se Ifa.

¹⁴ Li Adan ngwu a kpagyanwō ba, li Ifa ngwu a kpagyanwō di yē okyō̄ obube aali.

¹⁵ Nghadu engyaa ka wato mi on̄o om̄imba kini a kiyayi yi oyeyē onuunu yi okpitukwu yi osaan yi okwu blii yō.

3

Engyukwo emi iKrestu

¹ Elodze n̄e li otsitsi gb̄e: kini inggise kye itukwu mgban byi ogbe inggise teyi mi okwakye mgbi emi iKrestu yō, o mina ido osuse.

² Nghane inggise ogbe inggise teyi li ongwō ndze yi iyi osuse kyeme-kyeme, o ka li inggise ndze yi ongyaa onyi, o ka li inggise okyitingga ba, ka li inggise obwa ewon fyii, inggise ngwu a li nun mm̄we, inggise nle wawa, inggise nka yagba otsungwō,

³ no ka li inggise ngwu ebye gban itukwu so ba, inggise ohaha ba kpāa inggise ngwu dze dumwō, inggise ogbon̄ogbe ba, beyi inggise nli tsōsho awuya ba.

⁴ O ka li inggise nka gbew̄ebyi eto mgban saan kyeme-kyeme diye di gb̄e engbe mgban siikyenun mi ofe oyeyē.

⁵ (Ni inggise ye ogbew̄ebyi eto mgban ba ma, kȳnese o ka gbew̄ebyi okwakye mgbi emi iKrestu?)

⁶ Ka dulu inggise nkwa kyatitukwu nu ogbe inggise teyi mi okwakye mgbi emi iKrestu ba, bana, o ka yē okyile ewo esho a dika ngwōn ikwō dafi olodu tugbe nani.

⁷ O ka li inggise ngwu ama nnoyeyē ba kpāa li nun mm̄we, ikye ngwi o ka gyayiwi di gb̄ese mi ukya mgbi olodu ba mani.

⁸ IDikin kpāa, ka li inggise ama ndze yi ali osuse, ama ndze yi otsitsi, ama ngwu ebye gbe ma itukwu so ba, a dika li inggise ama otsōsho awuya ba.

⁹ Li ikyeme ngwi a ka kye abo byi otsitsi mgbi oyeyē onuunu kpini yi itukwu asisa.

¹⁰ A ka teyi mbadi ma kyeme se, ni a wende bayo, ni a kye ma ido iDikin.

¹¹ Li ngha yeyē ngwi owa ma kpāa ka dze yi ali osuse aali, a ka li ama okye ondu wo inggise ewo ba kpāa, a ka li ama nbwa ewoma fyii di li ama a nu ma oyeyē mi alungwō duu.

¹² IDikin ka li inggise ndze yi ongyaa onyi dika yagba gbew̄ebyi engbe mgban beyi eto mgban saan.

¹³ Ama nkyido iDikin saan yō, a ka tu iyi osuse a dika nghao dze yi abo otsigegē mi oyeyē onuunu mgbi ama mbi iYesu iKrestu.

¹⁴ Ani dze yi oweka oba mbi abu vla, kpāa n le lo abu afe ntone ikyegb̄e,

¹⁵ ni ani wa mbe on̄o kpāa, abu ka ye dafi inggise ka kye ewoma dze mi idzidze emidi Imgbasho, ngwi li okwakye mgbi emi iKrestu mgbi Imgbasho oshishe, otlesē yi itozu mgbi otsitsi nani.

¹⁶ Iba mgbi odzimgbasho mgbi eyi shewo, inggise kpāa ka yagba tangwe ba:

O ba dafi inggise owamyē,

Onodzi kyon tso gb̄e o li otsitsi mi ine Imgbasho,

engyēso din,

a kyon gbo kpatse ali

udze mi ese duu,

a nun oyeyē mi ese,

a kyon lu esho mi okwōkwō.

4

A kwo iTimoti ado

¹ Onodzi Osaan gbo saan gb̄e on̄o kyema ngwi inggise angbeka ka dzata oyeyē onuunu di kyēdo onodzi ama okpagya inggise wo beyi otsootso mgbi enedzi ibwubwe.

² Otsootso ntona kye mbi emi ikpala ama omwonya, ngwi ewodze mgbi ama li ikwukwō, a yama ye idzidza mgbi ungwō obube yi osuse wuba.

³ A li kwō inggise ongyaa okyeekye di li wo inggise ola gb̄e nu ma ka gye ungowgye angbeka ba, ungowgye ama Imgbasho ta gb̄e ni inggise ama nnoyeyē di ye otsitsi nu ma gye yi atsa neni.

⁴ Bana alungwō ngwi Imgbasho ta duu tishi, unkonyi ngwi a ka fwan dzema ba ni a gb̄e yi angba yō,

⁵ lubana a kye melu dzeke saan mi ibo beyi elodzimgbasho.

⁶ Ni abu gbo ungwō ntone nya ama onoyeyē yō, abu ka li ongbido osuse mgbi iYesu iKrestu, ngwu a nye abu mi ofe otsitsi mgbi oyeyē onuunu beyi otsootso osuse ngwi abu kyēdo mani.

⁷ Odze no ka kwōkyi abu yi utsa ayayi beyi utsa ogbugbe mgbi enengyaa ntona ba; tatase nye ewabu ni abu li inggise Imgbasho.

⁸ Lubana onye ewabu mi mmbwē yi eyi dze yi oyabo, kpāa onye ewabu mi ofe mgbi Imgbasho yō, nghao yaabo duu, ikyekye ondu odzēdze mgban dze ikye oshishe ongwō onene beyi oshishe nkawa ba nani.

⁹ Elodze n̄e li elodze otsitsi, ngwi i wogyo ogban abo efa.

¹⁰ Ikyenghane, eyi le kyidɔ kpakpa dile gbili gbɛɛ ni eyi kye ɛwɛ mgbi eyi byi mbi Imgbasho oshishe, ongwu nli Onagbe mgbi inggise duu, onghaangha duu yɔ, mgbi ama nnoyeye nani.

¹¹ Tsungwo ntonɛni diye di gbɛɛ ali inggise duu kyo mi ele.

¹² Ka nu inggise onyi kpaa kwu abu shanye gbɛɛ abu li mmafa ba, nghaduu tso ama onoyeye ambe mi odze ogboɔgbo yi oshishe mgbi abu yi okpitukwu yi oyeye onuunu beyi mi odze saan kpaa.

¹³ Duuse ni ani wa ba yɔ, kye ewabu tswoke ole gbo Afe mgbi Imgbasho nya inggise mi ododa, nu ma osa mi ele dile tso ma.

¹⁴ Ka dzita umba mgbi abu ngwi Imgbasho kye nu abu nye mi eso mgbi oyegbo mi onɔ ngwi engyukwo kye abo do abu ikye na ba.

¹⁵ Gbekabyi ungwo ntonɛni, kye ewabu duu nu mi efu, ikye ni ali inggise di okiyayi mgbi abu.

¹⁶ Kyidi oshishe yi otsootso mgbi abu saan. Byi ma kpoklo, ikyekye ni abu kyo nga yɔ, abu ka dulu oshishe mgbi abu yi ama nle fwo abu ma wato.

5

Odze owe emi owakwade yi engyukwo beyi ofyee

¹ Ka kyokyo odze yi ishongye mi okwushanye ba, kpaa gbo yan mi iyu dafi o li otsabu mani. Kyo yi mmafa dafi emi ongwunabu,

² kyo yi enengyaa kpaa dafi emi onabu, yi engyaa ikyakyawa dafi emi ongwunabu mi ofe osaan.

³ Gbewebeyi owakwade ama ndze abubo mani.

⁴ Nghaduu ni owakwade dze yi engbe naadi engwiba yɔ, ni engbe ntona di mbi eto mgbi ama saan oto oyeye onuunu mgbi ama mbi Imgbasho di kpa ama nmba ma mkpa, bana li ungwo okpa Imgbasho.

⁵ Owakwade ngwu dze abubo di dze yi inggise oyan abo bayo, no kye itukwu mgban byi mbi Imgbasho di bibo otu yi onɔ gbɛɛ no yan abo.

⁶ Nghaduu owakwade nkye ewon nu mi ese ogyeeye yɔ, dafi o li oshishe ne kpaa o li ikwukwo mi onodzi.

⁷ Tso ama onoyeye kpaa ungwo ntonɛni, ikye ni a ka nu ma obube ba mani.

⁸ Kini inggise ya odon abo ba, onghaangha duu eto mgban ongwu ozu yɔ, o tangwe oyeye onuunu di timbi nga inggise ngwu nu iYesu oyeye ba.

⁹ Ka lo owakwade onyi kpaa iyi mi mmbwo mgbi emi owakwade ba, se ni

onova mgban nye ngwuseta, ongwu nsi-ikye nu oban mi eba mgban,

¹⁰ a di yen yi ali osuse saan, dafi ongwu nnye engbe mgban saan, gbe ingyoga beyi ama onoyeye mi ude mgban, di ya ama nto yi okakewo abo di kye itukwu mgban nu mi alungwo osuse okyɔɔkyo duu.

¹¹ Owakwade ama nka li ikyakyawa yɔ, ka kye ma iyi wo mmbwo owakwade ba na. Bana ni imina mgbi ongyulo wa lamye nga osunu iKrestu yɔ, a li mina obongyulo.

¹² Nghane ungwɔne li nu ma me ogbo ma ikwo, ikyekye a mbe ondu odzeedze ngwi a dze ababo mani.

¹³ Ongyeeengye yɔ, a li yee emi ewewa dile kyikye mi ude ude kye. Onghaangha yɔ, a li yee ama odziidze di gbe abo sha odze kye di kye ondu wo odze ngwi a kika kye wo ba.

¹⁴ Nghane ani le we owakwade ama nka li ikyakyawa odze gbɛɛ nu ma bongyulo, nu ma mba engbe, nu ma kyinebyi ude mgbi ama dika nu engyikyili mgbi eyi ofe ogbodze wɔɔ ikye eyi ba.

¹⁵ Mi odzimo yɔ, angbeka teyi kyata le kyedo iSatan kpaa wa.

¹⁶ Ni ongyaa ngwu nnoyeye dze yi engyaa owakwade mi eto mgban yɔ, non ya ma abo, nu ma ka yee undo mbi emi iKrestu ba, adzi ni okwakye mgbi emi iKrestu kyinebyi owakwade ama ndze abubo mani.

¹⁷ Engyukwo ama nli di mi okwakye mgbi emi iKrestu saan ma, a me onu ma mmwe dudo-dudo, onghaangha duu yɔ, ama ngwu ido mgbi ama li onu osa di tso mani.

¹⁸ Bana Afe gbɛɛ, <<Ka kye ikpɛɛ wo mnda nle gbo ongwogyowe ondu ba,>> inggise ido <<Di me akpan.>>

¹⁹ Ka yama gbela odze ngwi a gbe tukwu ongyukwo ogbe emi iKrestu teyi ewo ba se ni obwendɛ me efa hona eta se.

²⁰ Kyokyo yi engyukwo ama nkyo obube mi ododa, ikyegbɛɛ angbeka nu ma wimio.

²¹ N le wo abu ola mi ine Imgbasho yi iKrestu iYesu beyi engyeso ama a sadu ma gbɛɛ, ka ngyo tsootso ntonɛni yi ogbua-gbua ba, dika kyo unkonyi mi osadu-sadu ba.

²² Ka kye abo do inggise ikye mi ido mgbi Imgbasho tsoli ba, dika gbe abo wo ali ibwubwe mgbi inggise angbeka ba, kye ewabu dze saan.

²³ Nya ole weni ewewe yuon, kpaa wa ebye gwee mi ikye ifu owulu-wulu mgbi abu beyi ikye ootse nli kaka abu ewo alono-alono nani.

²⁴ Ali ibwubwe mgbi inggise angbeka li daada ba, di li teyi ma kaka imbe ogbiikwo; kpaa ali ibwubwe mgbi angbeka li daada, li wa fwito mi iyikpa.

²⁵ Li nga ngwi ungwo ama osuse kpaa li to ese gedee aali, ama nto ese ba kpaa a ka kye ma da gbɛɛ ba.

6

¹ Inggise ama nwoto iso mgbi ofyee duu, nu ma kye engyukwo mgbi ama wuuta onu ma mmwe saan, ikyegbee inggise onyi no ka gbodze obube mi iyi Imgbasho beyi otsootso mgbi eyi ba mani.

² Ofyee ama engyukwo mgbi ama li ama onoyeye yo, nu ma ka kwu ma shanye ba ikyekye engyukwo mgbi ama kpaa li engwuno yi ama ungwonyi. Tatase yo, ni a nghao kyo ma ido saan, ikyesine ama nle tu oyabo mi ido mgbi ama li ama onoyeye yi ama nkpa a mi itukwu. Ntone li ungwɔ ama abu ka tso diye di gbɛ ali inggise duu kyo mi ele aani.

Osho awuya

³ Ni inggise le tsungwo ngbela yi otsootso mgbi Otse mgbi eyi iYesu iKrestu beyi odzimgbasho otsitsi bayo,

⁴ o le kyile ewo esho, di ye unkonyi ba. Angwodze kpan, o di li gbɔɔgbɛ mi odze. Ungwone li ba yi anyi yi ogbodze mi oweka yi ogbodze obube yi otsewe gbɛ angbeka li inggise osuse ba,

⁵ yi angwodze kpakpa. Inggise ntone dze yi itukwu obube, di dze yi otsitsi mboma ba. A di tsewe gbɛ, okyo odzimgbasho li ofe otu awuya.

⁶ Okyo odzimgbasho yi nggwɔ ba, li aludu ogbagbadzidzi.

⁷ Ikyesine eyi kye unkonyi ba ese ba, eyi dika yagba kye unkonyi mi ese lu ba.

⁸ Nghane ni eyi dze yi ungwogye yi angwuto yo, no me eyi.

⁹ Inggise ama nmina oyee emi awuya yo, a li gbo mi igyila yi ukya yi ikwangha ungwɔ kwuba beyi imina ama obube nli nu inggise boofe di dzili mani.

¹⁰ Bana akpa alungwo ibwubwe duu, kye mi imina mgbi awuya. Inggise angbeka yo, ngwi i fyi ma mi awuya nghane, a boofe a dzata oyeye onuunu di kye ewoma woke ifu adze kpakpa.

IPol we iTimoti odze ongwɔ olele

¹¹ Nghaduu abu inggise Imgbasho yo, tsinya ungwɔ ntone duu, kyedɔ ofe osaan, kyo Imgbasho ido yi oyeye onuunu yi okpitukwu mi itukwu oshiishi beyi odze dumɔɔ.

¹² Gblikasuse mgbi oyeye onuunu nani. Kye abo byi oshishe ogyegwu ngwi Imgbasho kwu abu ela kye nu abu, ngwi abu kyo obwende mi inai inggise ibyibi nani.

¹³ N le we abu odze mi ine Imgbasho nli kye oshishe nu alungwo duu na beyi iYesu iKrestu ongwɔ nkyo obwende osuse mi inai iPontu iPlatu na gbɛ

¹⁴ ngyo ola ne saan, ende hona obube no ka dze ele ba mbise ngwi Otse mgbi eyi iYesu iKrestu ka yido.

¹⁵ Li Imgbasho ka kye ungwone ba mi ono ngwi i gyolon mani; o li Imgbasho okwɔkwɔ di li Uto yuon, o li Uto mgbi emi uto di li Otse mgbi emi otse.

¹⁶ Ongwu yuon ta ka kwulu ba, di li ongwu dze mi osa ngwi inggise ka yagba ke kwekwe yan ba, ongwu inggise din ye ba dika yagba din kpaa ba. Oshewo yi mfye duu li mgban gyegwu. No dze ngha.

¹⁷ Nya emi awuya mi ese ongwɔ onene ne gbɛ, nu ma ka kyile ewo esho naadi gbe itukwu byi aludu nli nye suno ba ne ba, nghaduu nu ma kyi itukwu mgbi ama byi mbi Imgbasho ongwu nli nu eyi alungwo nka nu eyi dze myeemye mi oshishe dzii nani.

¹⁸ Tso ma okyo osuse, nu ma li emi aludu mi ungwɔ osuse okyɔkyɔ, nu ma dze yi itukwu oghumba di shabota dzii.

¹⁹ Mi ito ofe ne, a ka kye aludu dze ewoma mi esho dafi itozu okpɔkɔɔ mi ono ongwɔ iyayi, adzi nu ma kye abo byike oshishe nli oshishe oyeye nani.

²⁰ ITimoti, gbewedze ungwɔ a kye wo abu abo nani, dzita ayayi onya okpaakpa nli mgbi Imgbasho ba yi angwodze ikwangha ngwi a li kwun di ozoyeye nli kye afo twese yi otsootso mgbi eyi otsitsi nani.

²¹ Ngwi inggise angbeka gbela ungwone di kyo ngha ne, a boofe mi oyeye onuunu. Elela mgbi Imgbasho no dze yi ema duu. No dze ngha.

Afe mgbi iPol ongwu fan mbi iTimoti

¹ Afe ne kye mbi ani iPol, ongye ogbikye iKrestu iYesu mi oweka mgbi Imgbasho. O do ani eso gbee ni ani wa nya inggise angbeka oshishe ongwu o zondum mbi iKrestu iYesu nani.

² Ongwani ongwu itukwu-itukwu iTimoti, Elela yi elela odiidi beyi iyu nto mbi Imgbasho Otseyi yi iKrestu iYesu Otse mgbi eyi nu ma dze yi abu.

iPol kwu iTimoti ewe wo

³ Ani ta Imgbasho ongwu ani le sunun na angba dafi emi otsikyani tugbe li kyo nani, mi itukwu asisa ani li le we abu mi ibo mgbi ani otu yi ono duu.

⁴ Ngwi ani we etse mgbi abu ne, i mina ani odi abu, ikye ni atsa mbwo ani itukwu.

⁵ Ani li we oyeye onuunu otsitsi ndze mbi abu, nteyi dze mbi onikyabu iLoisi beyi onabu iYunisi kpaa nani, n di ye saan ta gbee dze mbi abu kpaa onenen.

⁶ Mi itodze ne n le we abu ikyegbee umba mgbi Imgbasho ongwu o kye nu abu mi ono ngwi ani kye abo do abu ikye na, no kiyayi okyido saan.

⁷ Lubana Imgbasho kye onodzi imio nu eyi ba kpaa, li onodzi mgbi mfye, yi okpitukwu beyi onye eweyi.

⁸ Nghanε ka kwayiwi okyo obewnde mi ikye Otse mgbi eyi ba, naadi ayiwi no ka kwu abu yi ani inggise obawi mban ne ba. Nghaduu kye abo be yi ani mi mfye mgbi Imgbasho ni i gyadze mi ikye Eso Osuse,

⁹ ongwu Imgbasho dulu eyi to, di kwu eyi ela gbee ni eyi dze mi oshishe osaan li ikye unka ngwi eyi kyo ba, kpaa li ikye itodze beyi elela mban. O kye elela ne nu eyi mbi iKrestu iYesu duuse ese wa wuta,

¹⁰ kpaa onene a tson to mi ododa mi oobaaba mgbi Ongye onagbe eyi iKrestu iYesu ongwu ndzili ikwongye di kye oshishe igyegwu ba beyi oshishe nka bwa ba na nye mi eso mban osuse tsoto mi osa nani.

¹¹ Di li mi eso ne ngwi Imgbasho dulu ani oli ongye ogbeeso di li inggise ogbikye iYesu di li otsetse aani.

¹² Li ikye ungwε ngwi ani le gyadze ne ngha aani, kpaa ayiwi kwu ani mi ele ba, ikyekye ani ye ongwu ani nun oyeye nani, n di ye saan ta gbee o ka yagba ongyo ungwu ngwi ani kye don ubo ikye egbe nani.

¹³ Ungwu ngwi abu fwo mbi ani yo kyedo, no li ambe mgbi ungwu otsootso osuse yi oyeye onuunu beyi okpitukwu mi ifu iKrestu iYesu.

¹⁴ Gbewebyi ungwu osuse ongwu a kye wo abu abo nani, ni Onodzi Osaan nwodze mbi eyi ne ya abu abo.

¹⁵ Abu ye dafi ali inggise mi ayese Asia duu kyata iyikpa tse ani mani, iFigelu beyi iHemogene jokpaa kyo ngha.

¹⁶ Nghaduu Otse no di ude mgbi Onesiforu duu elela, ikyesine o kyile ani itukwu esho ono ibyibyi, o di yama kwayiwi ani gbee ani wodze itse ba.

¹⁷ Ngwi o wa kaka iRoma ma, o gbili ani kpatse nghataa o wa tu ani.

¹⁸ Abu ye saan dafi mi Efesu ma kpaa, o ya ani abo mi ofe gwuba mani. N bibo gbee Otse no di Onesiforu elela mi egbe ikwo mani.

2

¹ Nghanε, ongwani, Imgbasho no nu abu kwudze kpoklɔɔ mi elela ndze mbi iKrestu iYesu nani.

² Odze ama abu di teyi fwo ani le gbo mi ine obwende ibyibyi na, yilen wo ama okyedo abo, ama nme odi otso angbeka mani.

³ Shitukwu adze ne yi eyi dafi inggise oblakwutse osuse mgbi iKrestu iYesu mani.

⁴ Inggise oblakwutse nli kyido oblakwutse yo, li kye abo mban wo ungwu mgbi emi ewewe ba, o li mina okyungwu no kpa ongyukwo mban.

⁵ Li ungwonyi yi inggise nle dayayi ole yi angbeka, o li tu okpapyi mgbi onghaangha ba, se o ka dayayi na mi ola ngwi a wo mani.

⁶ Inggise okwo nkyido kpoklɔɔ yo, ka li inggise ongwu ababo ogye ungwogye ongwu okwo nani.

⁷ Tsewe mi odze ani le gbo neni, bana Otse Imgbasho ka nu abu odifwi-difwi mi ungwu ntone duu.

⁸ We iYesu iKrestu, o kye mi eto mgbi iDevedi, a kyilen mi ikwu. Li Eso Osuse ngwi ani gbo,

⁹ ngwi ani le gyadze ikyon nghataa ngwi i yee ungwu a bwa ani adi dafi emumyi ma aani, nghaduu elodzimgbasho yo a bwan adi ba.

¹⁰ Nghanε ani shitukwu alungwu duu mi ikye ama a sadulu ma gbee ni ama kpaa tu owato-wato ndze mbi iKrestu iYesu, yi okwɔkwɔ ogyegwu nani.

¹¹ Elodze ne li otsitsi:

kini eyi kwulu yan yo,
eyi dika dze oshishe yan kpaa;

¹² kini eyi shitukwu yo,
eyi dika kyuuto yan,

ni eyi tangwan yo,
ongwu kpaa ka tangwe eyi,

¹³ ni eyi dze mi oyeye onuunu ba kpaa,
ongwu ka tila dze mi oyeye onuunu,
bana o ka yama otangwe ewon ba.

Inggise ido ngwu Imgbasho gbela yan

¹⁴ Kiyayi owe ma odze ntoneni. Kwo ma ado mi inai Imgbasho mi ikye odze oshiishi mi ayayi odze, dze yi abo oyaaya ba, li nu ama nkye ado ge ele dzili.

¹⁵ Fya mi ofyaafya mgbi abu saan okye ewabu nu Imgbasho dafi inggise ngwu Imgbasho gbela yan, dafi inggise ido ndze gyo o ki kwayiwi wuba di li kye abo byi elodze otsitsi mani.

¹⁶ Dulu abo mi onya okpaakpa mgbi ayayi odze bana ama nkye ewoma tswoke ele ka dze mbotunto yi Imgbasho saan.

¹⁷ Otsootso mgbi ama ka ganya dafi ifwa nshe wo inggise ewo mani. Dafi i dze yi iHimenayo yi iFiletu,

¹⁸ ama nboofe dzata otsitsi nani. A gbagbæ okyæ-kyæ mi ikwu nye wa, a di li ngwolu oyeye onuunu mgbi angbeka.

¹⁹ Nghaduu itozu mgbi Imgbasho nfyumfye ne ka kwudze kpoklɔɔ ma, a lo ungwɔ to ele gbæ: <<Otse ye ama nli mgban, ma ali inggise nkyo obwendæ mi iyi mgbi Otse tayo, li kyæmæ o ka dzata imbaali.>>

²⁰ Mi ude okwukwo yo, li okye dafi abashi beyi iyudza onzundze ta li to ele ba, kpaa okye dafi ekwo yi ibe kpaa li to ele, angbeka li ama okye kyungwɔ imɔ mi efu, angbeka yo li ama okyungwɔ imɔ yan ba.

²¹ Kini inggise gbosa ewon mi odzædze mgban ogbugbe yo, o ka li okyiido imɔ, o ka yæ saan, dika dze yi abo oyaaya mbi Ongyukwo mgban, o dika wewo okyo ali ido osuse duu.

²² Nghane tsinya imina ibwubwe mgbi mmafa di kyedɔ Osaan yi oyeye onuunu yi okpitukwu beyi iyu yi ama nle kwu mi iyi Otse yi itukwu osaan mani.

²³ Ka yama kyungwɔ yi ikwangha yi ayayi angwodze ba, ikyena abu ye, a li ba yi odze oshiishi.

²⁴ Nghaduu ongbido mgbi Otse yo, li kyæmæ o ka gbonogbe ba; kpaa o ka dze wawa yi ali inggise duu, o ka li inggise nka yagba tsungwɔ, di dze yi itukwu oshiishi yi inggise ama nyumfyali.

²⁵ Ama nli gbela yan ba duu, li kyæmæ ngwi o ka wæ ma odze mi itukwu iyu, ikyayina Imgbasho ka nu ma k yatitukwu tso ma ofe kaka otsitsi,

²⁶ di nu ma ye luba mi odzædze mgbi ama di to mi ukya mgbi olodu, ongwu nteyi kwu ma ofyæ tole kyo itukwu mgban nani.

3*Ali mgbi inggise mi egbe ongwilele*

¹ Ye ungwɔneni, iTimoti, gbæ mi egbe ongwilele ma adze okwulewo ka dze.

² Bana inggise ka nghao di ewoma kpama itukwu beyi awuya mgbi ama. A kale tsaabo igæge, dile kyile ewo esho, le fyito,

le sunu ama omba ma ba, a ka tse unkonyi ba, a dika dze saan ba,

³ a ka dze yi okpitukwu ba, a ka dzita inggise yi obube ba, a kale mwonya bæ inggise, a ka bwa ewoma fyii ba, a ka di inggise elela ba, ungwɔ osuse ka kpa ma ba,

⁴ ka kye okama gya, a ka kyungwɔ mi ozoyeye ba, a ka kyile ewo esho, imina mgbi oshishe ka kpa ma ngha Imgbasho,

⁵ a ka dze dafi emi odzimgbasho mani, kpaa a ka tangwæ mfyæ mgban, ungwɔ onyi no ka wo abu yi ama ba.

⁶ A li ito inggise ama nli dze yi ofæ le kyikye mi ude inggise kye dile kpagya engyaa ama nkwo eka ba wo, ama ngwu ali ibwubwe mbwo ma itukwu, di dze yi ali ito imina ibwubwe duu,

⁷ a li kpai ungwɔ alono kpaa a li yagba gbela otsitsi ba.

⁸ Dafi iJanesi yi iJambresi nose kye afo twæse yi iMose ma, li ngha ngwi inggise ama itukwu le kplekple di dze yi oyeye onuunu otsitsi ba ntonæ kpaa, kye afo twæse yi otsitsi aani.

⁹ Nghaduu a ka kæ mbombo yi ikwangha mgbi ama na ba, ikyekye inggise duu kawa difwi ikwangha mgbi ama saan saan dafi nose a difwi mgbi iJanesi beyi iJambresi nani.

IPol wo iTimoti ola ongwilele

¹⁰ Mbi abu iTimoti yo, abu ye ali otsootso mgbi ani duu beyi ofæ oshishe mgbi ani yi oweka mgbi ani yi oyeye onuunu mgbi ani yi itukwu oshiishi mgbi ani yi okpitukwu mgbi ani yi onyotse mgbi ani okwuukwu,

¹¹ iso yi adze ito ntonæ duu kyo ani mi Antioku, iKonu beyi iListra, Nghaduu Otse dula ani to mi ele tsatsa.

¹² Mi otsitsi yo, ama nmina odze mi oshishe osunu Imgbasho mbi iKrestu iYesu yo, a ka gbiiso,

¹³ kpaa emi ibwubwe yi ama okpagya inggise wo duu ka nghao timbi-timbi, ama okpagya inggise wo kpaa a dika kpagya ma wo.

¹⁴ Nghaduu abu yo, kiyayi mi ungwɔ ngwi abu kpai di gbela yan nani, ikyekye abu ye ama ngwu abu kpai mboma mani,

¹⁵ di ye dafi wita kye eyeyi ta abu ye esɔ mi Afe osaan, ama n yagba nu abu kwiine ogbe owato-wato nkye ikpewo oyeye onuunu mbi iKrestu iYesu nani.

¹⁶ Ali afe mi ibiyibilo duu kye mbi Imgbasho, di dze mi ikye abo oyaaya mi otsootso yi okyokyo odze yi oyile inggise dze ofæ di dze ikye otso inggise ofæ odze saan,

¹⁷ ikye ni inggise Imgbasho yile afo kwulesse saan okyo ali ido osuse duu mani.

4

¹ N le wo abu ola ne mi inai Imgbasho yi iKrestu iYesu, ongwu nkawa ba yi esuto mgban owa gbo emi oshishe yi emi ikwukwo ikwo na gbee:

² Gbeeso; wewo alono duu; kyokyo odze yi inggise di kwu inggise ewe wo yi itukwu oshiishi kpakpa yi odze oweewe mi ola mi ola.

³ Lubana ono kyema ngwi inggise ka gbela wo otsootso osuse wuba. Ikyenghane, mi okyo imina mgbi ama a ka gbe etsetse kwuba kwutoke yi ama nu ma le nya ma odze ngwi ado le gba ma gbaagba ofwo mani.

⁴ A ka fwa otsitsi diye tsootso okyeddo ayayi utsa.

⁵ Nghaduu abu yo, kwu ewabu blii mi ali ofe duu, shitukwu mi adze ogyeegye di kyido mgbi inggise ogbo Eso Osuse. Di kyo ali ido ngwi Imgbasho kye wo abu abo duu.

⁶ Lubana ani yo a teyi kye ani yangwuta dafi ungwu owaawa mgbi ife ofe-fe mani, ono mgbi ani okwulu le gyo.

⁷ Ani gblika osuse, ani ngyelu ido ndze mi ikye ani di kwulese mi oyeye onuunu.

⁸ Onene okpapyi ngwi Imgbasho kye dze ama asaan dze le fe ani feefe, ngwi Otse, ongye ogbiikwo mi otsitsi, kawa kye nu ani mi egbe nani, li ani ta ba, kpaa yi ama nle fe oyeye mgban duu.

Ola mgbi iPol abuan

⁹ ITimoti, Fya mi ofyaafya mgbi abu ba mbi ani ple,

¹⁰ lubana iDema, ikyegbee ese ne kpan itukwu ne, o dzita ani lu iTesalonika. IKresken lu iGalatia, iTaitusu di lu iDamatia.

¹¹ I sisi iLuku ta dze yi ani, kye iMaki wafu yi abu ba ikyesine o dze yi ani abo oyaaya mi ido mgbi ani.

¹² Ani do iTaciko eso lu Efesu.

¹³ Ni abu ka ba yo, kye angwuto otukwu ofu ngwi ani dzanta yi iKapu mi iTroa, yi afe ofulufulu, onghaangha duu ama nghao li imo ngwi a me mi okpa ntona byi.

¹⁴ Alekidzanda inggise onduufa kyo ani ungwu obube kpakpa. Otse iYesu ka yile mkpa kpan mi ungwu ngwi o kyo nani.

¹⁵ Abu kpaa gbewebyi ewabu mi ikye mgban, ikyekye o kye afo twese kpoklo yi eso mgbi eyi.

¹⁶ Ababo ngwi a kye ani ba mbi ongye ogbiikwo ma, inggise onyi kpaa kye ani iyikpa ba, ali inggise duu tse dzenta. No ka yee ungwu obube mi ikye ma ba.

¹⁷ Nghaduukpaa Otse Imgbasho fyi ani anya di nu ani mfye, ikyegbee mi ikpewo ani nu ma gbeeso na saan ni Udzenge duu fwon. A di dula ani to mi ondu ugaba.

¹⁸ Otse ka dula ani to mi ali ika ibwubwe dika kye ani kaka esuto mgban ongwu esho saan. Mbon okwokwo dze nghataa gyegwu. No dze nga.

Angba ongwu olele

¹⁹ Ta iPrisila angba yi Akwila beyi eto mgbi Onesiforu duu.

²⁰ Erastu dze iKorinti ma, ani di dzata iTrofimu ladze ootse mi iMiletu.

²¹ Fya mi ofyaafya mgbi abu ni abu ba wa kaka mmene duuse ni owa bese. Eyubulu yi iPuden yi iLainusu yi iKladia beyi ama onoyeye duu le ta abu angba.

²² Otse no dze yi onodzi mgbi abu. Elela mgban no dze yi ema duu.

Afe mgbi iPol mbi iTaitusu

¹ Afe ne kye mbi iPol, ongbido mgbi Imgbasho ongye ogbikye iYesu iKrestu ikye oyeye onuunu mgbi ama Imgbasho sadu ma beyi oye-ye mgbi otsitsi nli nu inggise yee inggise Imgbasho,

² oyeye onuunu beyi oye-ye nfyidze mi ewe ogbe byiibyi mi oshishe ogyegwu, ngwi Imgbasho, nli gbatsika ba, zonu duuse owita-wita mgbi ese,

³ ngwi ono ma wa gyo yeye ne, Imgbasho onagbe eyi wo ani ola ni ani gbeeso mgban ngwi o kyi wo ani abo ne to mi ododa.

⁴ Ani lo afe ne ke mbi iTaitusu, ongwani otsitsi-otsitsi ngwu oyeye oyeye onuunu mgbi eyi li ungwonyi na gbæ:

Elela yi iyu mgbi Imgbasho Otseyi yi iYesu iKrestu ongye onagbe eyi no dze yi abu.

Ido mgbi iTaitusu mi iKrete

⁵ Itodze nnu ani dzata abu mi iKrete yo, li onu abu yile ungwā nsisi ma dzeke yeye diyē sadu engyukwo mi ali igeli, dafi ani ple tso abu ofe nani.

⁶ Inggise ngwu a sadun gbæ no li ongyukwo yo, li kyeme-kyeme no li inggise ngwu a ka du ongwufabo mbon ba, o ka li obongyaa onyi, ngwu emi ongan noyeye, li ngbaado hona ga kye wuu ba.

⁷ Ngwi a kye ido mgbi Imgbasho wo engyukwo ama okye okwakye mgbi emi iKrestu teyi abo ne, li kyeme ngwi o ka li inggise ngwu a ka du ongwufabo mbon ba, o ka li inggise okyile ewo esho ba, o ka li inggise okyitingga ple-ple ba, o ka kye ewon nu ebye owa fya ba, o ka li inggise imoga ba, o ka li inggise okyo nggwā mi udza ba.

⁸ Tatase no li inggise ogbe ingyoga kyeme, inggise ngwu ungwā osuse kpan, nli bwa ewon fyil, no li inggise ogbo otsitsi, ka li inggise osaan di nye ewon mani.

⁹ No li inggise nbyi eso otsitsi ne saan dafi a tso mani, ikyegbæ no kwu inggise angbeka ewe wo mi otsootso osuse di yile ama nkye afw twese yi otsitsi ma dze ofe.

¹⁰ Lubana ama ntangwe otsitsi mbwo, ama ogbodze wā beyi ama okpagya inggise wo, onghaangha duu yo mbi ama okyilikye ntoneni.

¹¹ Ni a tukwu ma ondu kyeme, ikyekye a le kyi bulu eto ololo duu mi otsungwā ndze mbiso ngwi a kile tso ba, mi ikye ifu mgbi ama.

¹² Inggise oyodze mgbi ama oka ple gbæ, <<Emi iKrete teyi li ama omwonya, a li mmbwaba ibwubwe, emi ewewa ama okyo nggwā.>>

¹³ Obwende ne li otsitsi. Nghane, kyokyo yi ama saan. Ta a ka kwulu afw ese mi oyeye onuunu mgbi ama.

¹⁴ A dika gbekabyi ayayi utsa mgbi emi ijuda hona ola mgbi ama nfwa otsitsi na ba.

¹⁵ Mbi emi osaan yo, ungwā duu le saan, kpaa mbi ama ngwu a kye ma itukwu kyi mbee di noyeye ba ma ungwā onyi kpaa le saan ba. Otsitsi, itukwu yi ela ongwā itukwu mgbi ama duu a kyi mbelu.

¹⁶ A li kye gbæ di ama ye Imgbasho, kpaa a li tangwan mi okyokyo mgbi ama. A li ama okyile inggise itukwu, a li ama onghaado di me okyo unkonyi osuse ba.

2

Otsootso nli ayin

¹ iTaitusu, li ungwā ama ngbela yi otsootso osuse kyeme ma ngwi abu ka tso.

² Le tso emyine nu ma gbewebyi oshishe mgbi ama, nu ma sulu mmwe ewo, nu ma bwalu ewoma, kpoklō mi oyeye onuunu, mi okpitukwu beyi itukwu oshiishi.

³ Mi ito ofe ne kpō, tso engyaa emyine ni a li ama otso Imgbasho, ni a li ama ogbaagya hona kye oshishe fado ebye kwuba ba, kpaa otsungwā ntishi.

⁴ Ikye nu ma tso engyaa engbe odi obama yi engwe kpa ma itukwu,

⁵ obwalu ewoma di dze nyaan, nu ma wa sōsō mi ude ba, nu ma tishali, nu ma le fwoofwo yi obama, adzi ni inggise ka kwu elodze Imgbasho shanye ba.

⁶ Di fyi mmafa kpaa mfye itukwu nu ma bwalu ewoma.

⁷ Mi alungwā duu tso ma ambæ mi osuse okyokyo. Ono ngwi abu le tso ma yo byi otsitsi dika kyo asha ba.

⁸ Elodze mgbi abu no menbwa gyo ni a ka kwushanye ba mani, adzi ni ama ofwa ema gyayiw ikyekye a tu ungwā obube okye abo byi ele ba.

⁹ Tso ofyæ nu ma yile ewoma ese mbi engyukwo mgbi ama mi alungwā duu, ni a kyungwā okpa ma, ni a ka datsondu yi ama ba.

¹⁰ Ni a ka yi ma mmyi ba, kpaa nu ma kyungwā ngwi a ka nu ma oyeye mani, adzi ni a nu otsootso mgbi Imgbasho ongye Onagbe eyi mmwe mi ali ito ofe duu mani.

¹¹ Lubana elela mgbi Imgbasho nkye owato-wato ba ma kaka tu ali inggise duu.

¹² I tso eyi odulu abo mi ungwā ama nli mgbi Imgbasho ba, beyi imina mgbi ese, di bwa eweyi blii, dze saan, ni eyi di dze mi oshishe oye Imgbasho mi ono ngwi eyi woto ele neni,

¹³ dafi eyi kale fæ ewe ogbe byiibyi osuse, oyeye okwōkwō mgbi Imgbasho mgbi eyi odatu beyi onagbe, iYesu iKrestu,

¹⁴ ongwu nkye ewon nu ikye eyi, onagbe eyi mi ali imbaali di kyi salu eyi gbɛɛ ni eyi yɛɛ inggise ama nli idzidza ikye ewon, di dɛɛ yi oweka okyungwɔ osuse mani.

¹⁵ Nghane, ungwɔ ntonɛ li ungwɔ ama ngbuo ni ema le tso joani. Le fyi inggise mfye itukwu dile kyaka yi ali mfye duu. Ka yama nu inggise onyi kwu abu shanye ba.

3

Okyungwɔ ntishi

¹ Wɛ inggise nu ma siikyenu ama oteyi ɛɛɛ beyi mfye, nu ma le siikyenu, di wewo okyɔ alungwɔ ntishi duu.

² Ni a ka nya inggise onyi odzagya ba, nu ma le ba yi iyu di fwo mgbi odo ma, nu ma tso ewo oyile ɛɛ mbi ali inggise duu.

³ Onɔ nnye ma eyi kpaa li ikwangha, nghaado, osho yi imina gya eyi ofyɛɛ di kpagya eyi wo. Eyi mbwo yi ikyili yi uwaba, ali inggise di eyi lanyi eyi kpaa di ewee tanyi.

⁴ Nghaduu ngwi osuse okyɔɔkyɔ yi okpitukwu mgbi Imgbasho Onagbe mgbi eyi wa kaka nɛ,

⁵ o nagbe eyi, kpaa li mi osaan mgbi eyi okyɔɔkyɔ ba, li mi elela mgban odiidi. O nagbe eyi mi osa-sa mgbi oyile mba akpe fa beyi okyata yɛɛ ofufe mi Onodzi Osaan,

⁶ ongwu o kye nye abo iYesu iKrestu onagbe mgbi eyi yawo eyi dzii nani,

⁷ ikyegbɛɛ, ngwi o nu eyi emyɛmyɛ mi elela mgban nɛ, ni eyi yɛɛ ama gyokwude di sulu ɛwɛ ogbe byiibyi mgbi oshishe ogyegwu.

⁸ Elodze nɛ li elodze otsitsi. N mina gbɛɛ ni abu kwunewo ogbo ungwɔ ntoneni, adzi ni ama nnoyeye mbi Imgbasho nɛ kyo dumɔɔ di kwunewo okyungwɔ osuse. Ungwɔntone tishi di sulu abo oyaaya mbi ali inggise duu.

⁹ Kpaa dulu abo mi angwodze ikwangha yi odze inyabyi ogboɔgbo yi angwe beyi onogbe mi odze ola, ikyesine ayayi ungwɔ ntonɛ sulu abo oyaaya ba.

¹⁰ Kwo inggise ntodze ado akponyi, di kwon akpe ongwu fan. Non nya bayo, dulu abo mi odzan.

¹¹ Difwi gbɛɛ ito inggise na fashi iyikpa tse otsitsi; alobube mgban abɔn dulun otse.

Odze ongwikpa

¹² Ni ani do Atemasi hona iTaciko ba mbi abu majo, fya mi ofyaafya mgbi abu ba mbon mi iNikopoli, ikyekye n weka odze mmana mi onova neni.

¹³ Fya mi ofyaafya mgbi abu duu otobyi iDzena inggise oye ola beyi Apolo mi okyɛɛ mgbi ama di di gbɛɛ unka kwoma oba ba.

¹⁴ Emideyi nu ma kpayi okye ewoma nu mi ungwɔ osuse okyɔɔkyɔ kyɛmɛ, ikye nu ma sulu ungwɔ ngwi a kale kyo abo oyaaya

ele alegbe-alegbe ni a ka li ama odiidi ine ba.

¹⁵ Ali inggise ndze yi ani duu le ta abu angba. Ta ama onoyeye ama eyi kpa ma itukwu ma duu angba. Elela mgbi Otse no dze yi ema duu. No dze ngha.

Afe mgbi iPol mbi iFyilimɔn

¹ Ani iPol inggise obawi mgbi iKrestu iYesu, beyi iTimoti ongwuneyi,

Deso angba mbi iFyilimɔn okeyi osuse yi ibuge ido mgbi eyi,

² yi Afyia ongwuneyi ongwu ongyaa, yi Acipo inggise oblakwutse ibuge mgbi eyi mi ifu iKrestu, beyi emi odzingbasho ama nli kwakye mi ude abu duu gbɛɛ:

³ Elela beyi iyu nkye mbi Imgbasho Otseyi beyi Otse iYesu iKrestu na no dze yi ema.

Ibo yi angba otaata

⁴ N li ta Imgbasho mgben angba alono duu dafi ani li we ema mi ibo mgbi ani mani,

⁵ ikyekye n fwo odze oyeye onuunu mgbi ema mbi Otse iYesu beyi okpitukwu ngwi ema le tso mbi emi osaan duu.

⁶ Dafi ema le kyo oyeye onuunu mgbi ema yi angbeka ne, n bibo gbɛɛ nu ma wa ye ali mse ngwi iKrestu kye nu eyi neni.

⁷ Okpitukwu mgbi ema nu ani atsa kpakpa beyi itukwu ofyumfye-fyumfye, ikyekye ema ama onoyeye nu itukwu mgbi emi osaan bese.

IPol tekye mi ikye Onesimo

⁸ Nghane, mi ifu iKrestu n dze yi abo otsigege di wo ema ola ni ema kyungwo nwogyo ema ki kyo mani,

⁹ nghaduu mi ikye okpitukwu yo tatase nin tekye nu ema. Ngwi Ani iPol ishongye ndi li inggise obawi mgbi iKrestu onene neni.

¹⁰ N le tekye nu abu ikye ongwani Onesimo, ngwu n yee ongwani ono ngwi Ani wodze obawi nani.

¹¹ Nose ma o dze yi abu abo oyaaya ba, kpaa onene o dze yi abu beyi ani duu abo oyaaya.

¹² Ani yilen le deso nu abu, o li ongwɛ itukwu mgbi ani.

¹³ N kika dzanta dzeke yi ani ikye no gbikye abu le ya ani abo dafi ani wodze itse ikye Eso Osuse neni.

¹⁴ Nghaduu i mina ani okyo unkonyi mi iyikpa abu ba, adzi ni ali oyabo abu ya ani duu no li mi itukwu mgbi abu no ka li mi osiisi ba.

¹⁵ Kaba itɔdze ngwi o gha yi abu mi ongwono gwee ma li ikyegbɛɛ no ye wa dze yi abu gyegwu.

¹⁶ No ka dze yi abu dafi ofyee wuba, kpaa no tatase ngha ofyee, di dze dafi ongwunabu itukwu-itukwu mani. O dze yi ani abo oyaaya kpaa o nghao dze yi abu abo

oyaaya, mi odzɛɛdze mgbi mmbwe yi eyi beyi mbi Otse iYesu kpaa.

¹⁷ Kini abu kye gbɛɛ eyi le kyido ungwonyi yo, gban dafi abu kika gbɛ ani mani.

¹⁸ Ki non kyo abu ungwo oka obube hona dze yi abu mkpa ungwo yo, yilen do ani ikye.

¹⁹ Ani, iPol, n le lo ungwone aben. N ka yilen kpa abu, kpaa n ka gbo ba ikyesine abu dze yi ani mkpa oshishe mgbi abu yeye.

²⁰ Nghane ongwunen, i dze ani gbɛɛ n ki tu oyabo angbeka mbi abu mi ifu Otse; yile ani itukwu bese mi iKrestu.

²¹ Ngwi ani dze yi abo otsigege mbi abu ne, n le lo abu afe, n di ye gbɛɛ abu ka kyo nghaabo ngwi ani gbo mani.

²² Ungwo oka nsisi yo: Melu ozu ingyoga dzenke, ikyekye ani ye Imgbasho ka fwo ema ibo dika nu ani ye ke mbi ema.

Angba ongwɛ olele

²³ Epafra, inggise nwodze obawi iKrestu iYesu yi ani, deso angba mbi ema.

²⁴ Ama okyido yi ani, iMaki yi Aristako yi iDema beyi iLuku kpaa deso angba.

²⁵ Ni elela mgbi Otse iYesu iKrestu dze yi onodzi mgbi ema duu. No dze ngha.

Afe ngwi a lo ke mbi ama onoyeyē Emi iHibru

Ongwe shewo nga engyeso emi esho

¹ Tugbe ma Imgbasho gbodze yi emi ot-sikyeyi nye mbi ama ogbēese akpe ibiyibi mi ofe idzidza-dzidza,

² kpaa mi egbe emi olele ntone yo, o gbodze yi eyi nye mbi Ongwan, ongwu o kyon dze ogyokwude alungwo duu, ngwu ese ne kpaa o ta ikpewon nani.

³ Ongwe ne tso osa mgbi okwōkwō mgbi Imgbasho beyi odzēdzē mgban yeye, o bwalu alungwo mi ese duu fyii mi mfyē mgbi elodze mgban. Ngwu o wa tso ofe okyi salu ali ibwubwe ngye ne, o ka sōke abugye mgbi ongwu Nnghaangha mi esho nani.

⁴ Nghane ongwu beyi iyi mgban duu shewo nga engyeso beyi iyi mgbi ama kpaa.

⁵ Lubana li ali ongyeso Imgbasho gbo yan ye gbēe, <<Abu li ongwē Ani; inē nē Ani yēe Otsabu>>? Hona gbēe <<Ani ka li Otsōn; o dika li ongwen>>?

⁶ Mi ofe oka yo, ngwi Imgbasho kye ongan ovle deso ba ese ne ma, o gbēe, <<Ni engyeso duu su nun.>>

⁷ Odze mi ikpewo engyeso yo o gbēe, <<Ongwu kyata engyeso ama nli engbido mgbi Ongwu yēe awo yi amoola.>>

⁸ Nghaduu mi ikpewo ongwē yo o gbēe, <<Ewe Imgbasho, itsuuto mgbi abu ka dze nghataa gyegwu, osaan dika li olande mgbi esuto mgbi abu.

⁹ Osaan kpa abu itukwu kpaa imbaali ta abu anyi; li ikyengha ngwi Imgbasho mgbi abu kye engyie mgbi atsa kyi abu ikye nga abuge mgbi abu angbeka aali.>>

¹⁰ O di gbēe, <<Ewe Otse, mi owita-wita ma, li abu kwo afō kye ese tuo, esho kpaa di li idabo mgbi abu.

¹¹ A ka dzili, kpaa abu yo ka tila dze; a ka sila dafi angwuto mani.

¹² Abu ka fulu ma dafi abu; o dika nyine ma dafi angwuto ogbugbe mani. Nghaduu abu yo o ka li ungwonyi kpete ta aali, onova mgbi abu ka yama dondu ba dududu.>>

¹³ Li ali engyeso ngwi Imgbasho gbo yi ama ye gbēe, <<Senke abugye nghataa nin kyata engyikyili mgbi ema yēe itse mgbi ema ogbe afō do ele>>?

¹⁴ Engyeso duu li onodzi ama okyido ngwi a do ma eso ikye otobyi ama nka gyokwude owato-wato ma ba na?

2

Ado okwookwo ikye ogbewebyi

¹ Nghane, i yēe kyeme ngwi eyi ka gbewebyi ungwō ama ngwi eyi teyi fwo na saan, ikye ni eyi wa boofe ba mani.

² Lubana ni eso ngwi engyeso gbo na li otsitsi, ni ali ola ofaafa yi ado onghaangha li tu ado okwookwo mgban yeye wali,

³ eyi ka nye ole kini eyi fwa owato-wato ogbagbadzidzi ngwi Otse woolan, ngwi ama nfwō kyo obwendē nya eyi ne?

⁴ Imgbasho kpaa kyo obwendē mi ele, mi okyo ambe ungwō ama okwulewo ita idzidza-dzidza, O di gha inggise umba on-dzi osaan dafi O mina mani.

IYesu yēe dafi emi ongwunon mani

⁵ Imgbasho kye engyeso dzēke gbēe nu ma wa kye ese nkyiyayi ngwi eyi le gbodzan ne teyi ba.

⁶ Kpaa imbe dzema ngwi inggise oka nu obwendē gbēe, <<Inggise li ekye se ngwi abu kyon wuuta nghaa, naadi ongwē inggise ma li ekye se ngwi abu gbekabyin nghaa?

⁷ Abu yilen ese gwēe nga engyeso; abu tukwun okpapyi mgbi okwōkwō yi mmwe

⁸ di non li ikye mi alungwo duu.>> Ngwi Imgbasho kyo nghane, alungwo duu dubon. Nghaduukpaa onene li ungwō duu dubon waba.

⁹ Kpaa eyi di iYesu ngwu a non yēse gwēe nga engyeso na, onene a tukwun okpapyi okwōkwō oshewo beyi mmwe ikyekye o gbiiso ikwongye, ikye no kwikwu ikye ali inggise duu mi elela mgbi Imgbasho.

¹⁰ Imgbasho ongwu alungwo duu byito abon na, di gbēe i gbuo ni ongye onagbe na yēe saan mi iso ogyeegye se no wa gbe emi onganwān kaka okwōkwō oshewo.

¹¹ Ongwu nnu inggise yēe saan na beyi ama n yēe saan duu li eto onyi. Nghane ayiwi yama kwu iYesu okwu ma di emi ongwunon ba du.

¹² O gbōgbēe, <<N ka kwu iyi abu nya emi ongwunani; n ka shashi otse iyi abu mi inai okwakye mgbi emidabu.>>

¹³ O di gbēe, <<N ka kye oyēye onuunu mgbi ani byi mbon.>> O di kiyayi gbēe, <<Ani dzena yi engbe ama Imgbasho gbe nu ani duu.>>

¹⁴ Ngwi engwe dze mi mmbwe yi eyi ne, ongwu kpaa wa yēe inggise owamyē adzi no wa kyi dzili ongye nsulu mfyē mgbi ikwongye nani, li owape olodu waali

¹⁵ di dula ama imio ikwongye kwu ma ofyēe mi oshishe mgbi ama duu ntona wato mani.

¹⁶ Lubana otsitsi-otsitsi yo, li engyeso ngwu o ya ma abo ba kpaa li eto mgbi Abraham.

¹⁷ Mi itōdze nē i yēe kyeme-kyeme no yēe dafi emi ongwunon mi ali ito ofe duu, ikyegbēe no yēe inggise ofife okwukwo odi

elega byi otsitsi mi ido mgbán okyó Imgbasho ele, di kyi kyelu ali ibwubwe mgbi inggise.

¹⁸ Ikyegbée ongwu aboon kpaa gbiişo mi onó ngwi a gyilan ne, o ka yagba tobyi ama nkaka igyila ntoneni.

3

IYesu shewo ngha iMose

¹ Nghawane, emi ongwunani ama osaan, ama nli ungwonyi yi ani mi ela okwu-kwu ongwí esho, gbe ewe otseetse mgbi ema byike mbi iYesu na, ongye ogbikye yi okwukwo inggise ofife ongwu eyi gbela odzan mi ododa nani.

² O tso otsitsi mbi Ongwu nsadun nani, yeye dafi iMose tso otsitsi mi ozu Imgbasho duu mani.

³ A difwi gbée iYesu dze yi mmwe odatu ngha iMose, yeye dafi otsungwo ozu li sulu mmwe datu nga ozu abon neni.

⁴ Lubana ali ozu duu li inggise mbe, nghaduu li Imgbasho mbe alungwo duu.

⁵ iMose tso oyeye dafi ongbido mi ozu Imgbasho duu, di kyo obwende mi ungwó ngwi a ka gbón mi iyayi mani.

⁶ Nghaduu iKrestu tso oyeye imbisó Ongwe mi ozu Imgbasho. Eyi di li ozu mgbán, kini eyi byi itukwu ofyumfye yi ewe ogbe byiibi mgbi eyi dafi eyi li tsaabo igege ma yo.

Ado okwookwo mbi ama n yeyikpa

⁷ Yeye, dafi Onodzi Osaan gbo mani, <<Ine ne, ni ema fwo elan yo,

⁸ ka kye itukwu mgbi ema tiishu dafi emi Israi

kyo mi onó ngwi a kye iga fyese, onó ngwi a mbadi ani mi okwese na ba.

⁹ Imbe ngwi emi otsema mbadi ani onova ngwusefa diye di ungwó ngwi ani kyo nani.

¹⁰ Li ikyengha ngwi ani yee itingga yi eto na aali, n di gbée,

<Itukwu mgbi ama li boofe along duu, a di yama ye ofe mgbi ani waba.>

¹¹ Nghane ani fa mi itingga gbée,

<A ka yama kaka mi onya oto-to mgbi ani ba.> >>

¹² Emi ongwunani, onyi mi idzidze ema kpaa no ka sulu itukwu obube hona itukwu onoyeye ba na, ye kyata iyikpa tse Imgbasho oshishe na ba.

¹³ Nghaduu fyi ewema mfye itukwu alegbe-alegbe na, ngwi onó ka desho neni, adzi ni itukwu mgbi inggise onyi no wa ti-ishu mi okpagyewo mgbi alobube ba mani.

¹⁴ Eyi ba owa gyokwude ungwonyi mbi iKrestu kini eyi kwudze kpoklao mi abo otsigege ngwi eyi tsekise dze yan ababo na nghataa ka dondu yo.

¹⁵ Dafi a kwa le gbón neni gbée,

<<Ine ne, kini ema fwo ela gban yo, ka yama kye itukwu mgbi ema tiishu dafi ema kyo mi ado onghaangha na ba.>>

¹⁶ Li ele fwo diye ngaado den? Li ama iMose gbe ma tase mi Igyibiti duu na baa?

¹⁷ Di li ele ngwu o kyitingga yi ama onova ngwusefa ntona? Li ama nkyo ali ibwubwe, kwulu mi okwese ntona baa?

¹⁸ Di li ele Imgbasho fa gbée a ka kaka imbe otonya mgbi ongwu ba? Li ama onghaado ntona baa?

¹⁹ Ikyenghane eyi di a yagba kaka ba, ikye oyeye mgbi ama onuunu ba nani.

4

Egbe otonyewo dze ikye

emidi Imgbasho

¹ Nghane, dafi ondu odzædæ okaka onya mgbán ka dze ne, i gbewebyi saan na adzi no ka nde inggise onyi okaka ele ba mani.

² Lubana eyi kpaa a gbo Eso Osuse ne nya eyi ungwonyi yi ama; nghaduu eso ngwi ama fwo na dze ma abo oyaaya ba, ikyekye ama nfwo ma kye oyeye onuunu byi mi ele ba.

³ Onene eyi ama nnoyeye ma kaka onya nani, yeye dafi Imgbasho gbo mani gbée, <<Nghane ani tsekise fa mi itingga gbée, <A ka yama kaka onya mgbén luba.> Nghaduu o teyi ngvelu ido mgbán mi onó ngwi o ta ese majo.

⁴ Lubana o ple gbodze kwu iyi egbe ongwu gyafa mi imbe oka ma gbée: <<Mi egbe ongwu gyafa ma Imgbasho tonya mi ali ido mgbán duu.>>

⁵ Imbe ngwi eyi di gbo nye na o gbée, <<A ka yama kaka imbe otonya mgbén na ba.>>

⁶ Ikiyayi otso gbée angbeka ka kaka onya nani, angbeka yo nose a gbeeso ne nya ma kpaa a kaka ba mi ikye ado onghaangha mgbi ama.

⁷ Nghane Imgbasho di kye egbe oka dzeke, kwun gbée ine, ngwi i wa kye onó tunto ne, o gbodze nye mbi iDevedi mi ele dafi a teyi gbo mani gbée, <<Ine ne, ni ema fwo ela mgbán yo, ka yama kye itukwu tiishu ba na.>>

⁸ Lubana iJoshua ki nu ma onya yo, Imgbasho ki yama gbodze kwu iyi egbe oka wuba.

⁹ Nghane onya sisi ikye mgbi emidi Imgbasho.

¹⁰ Lubana inggise ta nkaka onya mgbi Imgbasho wa yo ka tonya ido mgbán kpaa, dafi Imgbasho kpaa tonya mgbán nani.

¹¹ Nghane, ni i fya mi ofya-fya mgbi eyi duu ikye okaka onya nani, adzi ni inggise onyi ka kyedo ado onghaangha mgbi ama na dzili ba mani.

¹² Lubana elodzimbasho dze oshishe di dze yi ido. I gyigye ngha okwusunkli ondu efa, li dze kaka kpini kyi ghalu oshishe yi onodzi, okwokiyikwokiyi yi ifyee ongwu akpukpu, di li gbo ewodze otsetse beyi ali ongwu itukwu duu ikwo.

¹³ Nkonyi ngwi a ta se da Imgbasho daada dzema ba. Alungwo duu do ododa dile gedee mi ine mgbi Ongwu eyi ka wa nu uka mbon nani.

IYesu anghodzi inggise ofife

¹⁴ Nghane, ngwi eyi sulu anghodzi inggise ofife, iYesu Ongwe Imgbasho nlu kedze esho ne, ba ni i kye abo byike kpoklɔɔ mi oyeye onunu ngwi eyi le tso mi odze mban nani.

¹⁵ Lubana eyi sulu okwukwo inggise ofife nli di eyi elela mi oshanye-shanye mgbi eyi, ikyekye ongwu kpaa a mbadin mi ali ito ofe duu, dafi eyi kpaa a mbadi eyi nani, ma o gbo mi alobube onyi ba.

¹⁶ Ba i gbleke kwekwe yi itsuuto mgbi elela ne yi imio ba na, ikye nu ma di eyi elela ni eyi di tu elela mgbi Imgbasho no otobyi eyi mi onɔ imina mgbi eyi.

5

¹ A li sadu ali okwukwo inggise ofife duu mi idzidze inggise di li san no gbikye ma mi ungwɔ ngbo ke mbi Imgbasho yo, onu umba di fife ikye ali ibwubwe.

² O li yagba kyo dumɔɔ yi ama ndifwi ba dile boofe mani, ikyena ongwu abɔn kpaa dze yi ofe ama ngwi o dzitsi.

³ Li ikyengha ngwi i dze mbiso o ka fife ikye ali ibwubwe mban beyi ali ibwubwe mgbi inggise angbeka kpaa aali.

⁴ Inggise onyi kpaa ka yagba kye ewon ido ne ba; li Imgbasho kyeme ka kwun ela, dafi Eron kpaa Imgbasho kwun ela nose nani.

⁵ Li ngha iKrestu kpaa kye okwokwo oyee okwukwo inggise ofife nu ewon ba aali. Nghaduu Imgbasho nyan gbɛɛ,

<<Abu li Ongwani; ine ne Ani yee Otsabu.>>

⁶ O di gbo mi imbe oka ma gbɛɛ,

<<Abu li inggise ofife gyegwu, ito mgbi iMelkidzede nani.>>

⁷ Ono ngwi iYesu ka dze ese ne ma, o bibo yi ekye oto-to yi akwo mi ela okwukwo, yi etse ine mbi Ongwu nka dulun to mi ikwu mani, Imgbasho di fwon mi osiikyenu mban.

⁸ Dafi o li ongwɛ ne kpaa, o kpayi osi-ikyenu mi iso ngwi o gye nani.

⁹ Dafi a non yee saan ne, o yee ofe owato-wato gyegwu mbi ama nnun oyeye duu.

¹⁰ Li Imgbasho kyon dze okwukwo inggise ofife ito mgbi iMelkidzede nani.

Ado okwookwo mi oyeyikpa

¹¹ Eyi sulu odze kwuba ogboɔgbo mi ungwɔnani, kpaa i sunɔ onu osa ikyena ema li difwi ungwɔ plɛ ba.

¹² Mi otsitsi ma, i gbuo ngwi ema ki li etsetse onenani, kpaa i wogyo ngwi inggise oka kika tso ema owita-wita otsitsi mgbi elodzimbasho dudo-dudo se. I gbuo ngwi ema ka wa enaabe, li ungwogye okpoklɔɔ waba!

¹³ Inggise nkale nghabe mi onɔ ngwi o ka li ongweyeyi ne, ka yagba be yi otsootso mgbi odze osaan ba.

¹⁴ Nghaduu ungwogye okpoklɔɔ dze ikye ama nmyotse, ngwi a gye be ne, a kye ewoma kye nyelu odifwi idzidza mgbi ungwɔ osuse yi obube.

6

¹ Nghane ni eyi dzata otsootso owita-wita mi odze iKrestu ye lu otsootso nmyotse, no ka li okyatitukwu mi alobube nka kye inggise kaka ikwongye hona noyeye mbi Imgbasho,

² naadi odze otsootso mgbi iBatisima yi abo okye do inggise ikye yi okyee-kyee mgbi emi ikwukwo beyi ikwo ofwoofwo ogyegwu na ta ba.

³ Ni Imgbasho noofɛ yo, eyi ka kyo ngha yeye.

⁴ Ka li kyeme-kyeme ba mbi ama nteyi tu osa ye, ama nteyi tu umba ongwɛ esho, di dze yi Onodzi Osaan,

⁵ ama n ye mfya mgbi elodzimbasho beyi mfye ama nka kiyayi,

⁶ kini a yeyikpa yo, oyile ma dze ofe nu ma kyatitukwu ka fyumfye, ikyekye oyeyikpa mgbi ama na, nu ma le yile Ongwe Imgbasho gbokwo ekwatsi akpe ongwu fan di non gyayiwɛ mi ododa.

⁷ Ikpeɛ ngwi mmbwo le kya won alono ni eni man yo, li nu ungwogye wa lo inggise nshin mani. Inggise na li tu mse mbi Imgbasho.

⁸ Kpaa ikpeɛ nlu oshe atato tayo li ayayi ikpeɛ. Imgbasho ka won ikamba, owa ngye-ngye yo a ka kye toola.

⁹ Emi okani osuse, dafi eyi le gbo ngha ne kpaa, eyi nu ema oyeye, eyi ye ta gbɛɛ ema dze yi ungwɔ ingblimo nka ba yi ema owato-wato mani.

¹⁰ Imgbasho li emyemye; O ka yama gblimo ido mgbi ema yi okpitukwu ngwi ema tson ba, dafi ema tobyi emidan dile kiyayi otobyi ma nani.

¹¹ Eyi mina gbɛɛ ali inggise mbi ema no tso okwunewo nani nghataa dondu, ikye ni ewe ogbe byilibyi mgbi ema yee otsitsi mani.

¹² Eyi mina gbɛɛ ni ema ka li emi okwulo ba, kpaa ni ema gbama ama nnoyeye di shitukwu gyokwude ungwɔ ngwi Imgbasho zonu ntonani.

Ondu odzeedze mgbi Imgbasho li weese ba

¹³ Ono ngwi Imgbasho zonu mgban yi Abraham ma, ngwi o di inggise oka nshe nga ongwu ofa mi iyi mgban ba ne, o fa mbi ewon,

¹⁴ gbæ, <N ka kye mse bæ abu ewo di nu abu engwiba kwuba kyeme-kyeme.>

¹⁵ Ngwi Abraham fe yi itukwu oshiishi ne, o wa tu ungwu ngwi Imgbasho zonu mani.

¹⁶ Inggise li fa yi iyi inggise ndatu nga ma mani, ma ofaafa na li menbwa yi odze ngwi o gbo mani, ta angwe otaata na duu li ngye.

¹⁷ Ikyegbæ Imgbasho mina gbæ ama ogyokwude mgbi ongwu nu ma ye gbæ ongwu li nyine mi ungwu ngwi ongwu zonu ba ne, o li gbõn mi ofaafa.

¹⁸ Imgbasho li gbatsika ba! Ikyenghane ondu odzeedze mgban yi ofaafa ka yagba nyine ba. Eyi tsinya luba mbi Imgbasho ikye owato. Inghawane ondu odzeedze mgban ntona nu ma nu eyi itukwu ofyumfye-fyumfye kpoklõ okye abo byike ewe ogbe byiiby ndze eyi iyayi nani.

¹⁹ Ewe ogbe byiiby ne nu oshishe mgbi eyi kwitse, kpoklõ di wato. Li kye eyi lu kpini mi iyikpa ayangwuto imbe mgbi Imgbasho Nghao le saan,

²⁰ imbe ngwi iYesu, Ongwu nteyi eyi lu, ka kaka mi ikye mgbi eyi nani. O yæ okwukwo inggise gyegwu, ito mgbi iMelkidzede nani.

7

iMelkidzede inggise ofife

¹ iMelkidzede ne nose li uto mgbi iSalen di li inggise ofife mgbi Imgbasho onghaangha. O kpatse Abraham ono ngwi o ka nga emi uto ika ye kye mani, man kye mse ban ewo.

² Ne Abraham kye onyi mi ikye iwyo mi alungwu ngwi ongwu sulun duu nun. Ababo ita iyi mgban gbæ, <<Uto mgbi osaan>>; oka yo, <<Uto mgbi iSalen>> na itan gbæ, <<Uto mgbi iyu.>>

³ O sulu otson hona onon ba, inyabyi ba, o sulu owita-wita mgbi egbe naadi odo-do mgbi oshishe ba. O li inggise ofife gyegwu dafi Ongwe Imgbasho mani.

⁴ Tsewe ito angbodzi inggise ngwu o dze mani, otsikyeyi Abraham jokpaa kye onyi mi ikye iwyo mi mngbe ngwi o gye mi ika nun!

⁵ Onene i yæ ola gbæ emi ongwe iLevi ama n yæ inggise ofife duu nu ma le gbæ onyi mi ikye iwyo mbi emi ongwuno ma, ama nli ama ofife ba li engwiba mgbi Abraham neni.

⁶ Abraham ngwu gbe ondu odzedze mgbi Imgbasho ne, iMelkidzede nto mi eto mgbi

iLevi ba ne kpaa, gbæ onyi mi ikye iwyo mbon di kye mse ban ewo.

⁷ Li otsitsi inggise nshewo nga ma li kye mse bæ ongwu n yeyikpa ewo.

⁸ Inggise ama ofife angbeka ngwu a li nu ma onyi mi ikye iwyo ne duu a li kwulu; kpaa ongwu yo Afe tso gbæ o ka dze oshishe.

⁹ Inggise ka yagba ogbæ iLevi nli gbæ onyi mi ikye iwyo ne kpaa, kye onyi mi ikye iwyo nu iMelkidzede ikpewo Abraham,

¹⁰ ikyekye ono ngwi iMelkidzede kpatse yi Abraham ma, a mba iLevi waba.

iYesu dze dafi iMelkidzede mani

¹¹ Dafi ola mgbi iMose gbogbæ ngwi ama ofife to mi eto mgbi iLevi ne kpaa, ama ofife ntona ka yagba nu inggise yæ saan ba. Ikyenghane i gbuo ni inggise ofife oka dafi iMelkidzede no dze, nga ogbæ no li inggise mi eto mgbi Eron.

¹² Lubana ni a le nyine eto ofife yo, ola kpaa li kyeme a ka nyinan.

¹³ Ongwu a le gbodze ntone kwu iyin na tokye onudze oka idzidza, ma inggise onyi mi udze na fife mi iwashi ye ba.

¹⁴ I tso saan gbæ Otse mgbi eyi tokye iJuda, ma iMose gbodze kwu iyi inggise ofife mi eto na ba.

¹⁵ Ma ni inggise ofife oka dafi iMelkidzede ne to yo, ungwu ngwi eyi gbo ne nghao ba yi osa,

¹⁶ ikyesine o yæ inggise ofife li mi odzeedze mgbi ola ba, kpaa li ikye mfye mgbi oshishe mgban nka dzili ba mani.

¹⁷ Lubana Afe lo gbæ, <<Abu li inggise ofife gyegwu, dafi iMelkidzede nani.>>

¹⁸ A kye ola ongwu ababo na geke ese ikyekye i fyumfye ba di dze yi oyabo kpaa ba

¹⁹ (lubana ola na nu unkonyi yæ saan ba), a di kye ewe ogbe byiiby otatase ba, nka gble eyi ke kwekwe yi Imgbasho.

²⁰ Ikrestu yæ inggise ofife gyegwu mi ofaafa! Kpaa ama ofife angbeka yo, li mi ofaafa ba.

²¹ Nghaduu o yæ inggise ofife mi ofaafa mi ono ngwi Imgbasho nyan gbæ: <<Otse fa wa

o dika nyine ondu ba:

<Abu li inggise ofife ogyegwu.>>

²² Mi ikye ofaafa ne, iYesu yæ ondu odzeedze mgbi ondu obwa-bwa ofufe ntatase nga ogbugbe nani.

²³ Ama ofife angbeka kwuba kpaa ki toma, nghaduu ikwongye gbalo ma ba.

²⁴ Kpaa ikyegbæ iYesu dze oshishe gyegwu ne, o ka li inggise ofife gyegwu.

²⁵ Nghane o ka yagba dula ama nnye mbon ba mbi Imgbasho ma wato klekle, ikyekye o dze oshishe alono duu ikye otsekye yi Imgbasho ikye ma.

²⁶ IYesu li ito okwukwo inggise ofife ngwu eyi mina mani, ikyekye o le saan, a ka du ongwufabo mbon ba, o dze yi obube onyi ba, a dulun dze enggengga mbi emi obube, a kyilon esho nga ali mfiye mi esho duu.

²⁷ Dafi okwukwo inggise ama ofife angbeka li fiye ma, ongwu yo, i wogyo ngwi o ka fiye mi ikye alobube mgbi ongwu beyi mgbi inggise angbeka alegbe-alegbe ba. O fiye ikye ali ibwubwe mgbi ama akponyi ta mi ono ngwi o kwikwu mi ekwatsi mani.

²⁸ Lubana ola li sadu ama nfyumfiye ba nu ma li okwukwo inggise ama ofife; kpaa ofaafa nba mi iyikpa ola ma, sadu Ongwe, ongwu nle saan gyegwu nani.

8

Okwukwo inggise ofife mgbi ondu odzeedze ofufe

¹ Odze ngwi eyi le gbo ma li ongwu aani: Eyi sulu ito okwukwo inggise ofife neni, o sdze abugye angbodzi itsuuto mgbi Ugabaidu mi esho,

² o li kyido mi imbe osaan mgbi Imgbasho, mi iTabenako otsitsi ngwi li inggise kye tse ba, kpaa li Otse aboon nani.

³ Ali okwukwo inggise ofife duu a li kyon dze ikye onu umba di fiye, nghane ongwune kpaa i gbuo no sulu ungwō okye nu.

⁴ O ki dze ese ne yo o kika li inggise ofife ba, ikyekye ola teyi gbe inggise ama ofife toke wa.

⁵ Imbe osaan ngwi a li kyido mi ele ma li ambe yi onodzi mgbi ungwō ndze esho mani. Li ikyengha ngwi a kwo iMose ado mi ono ngwi o le wewo ombē iTabenako ma gbē: <<Gbīnebyi saan ni o kyo alungwō yeye dafi a tso abu mi ungwō nani.>>

⁶ Nghaduu ido ngwi a kye wo iYesu abo na datu nga mgbi ama dafi ondu odzeedze ngwi o li inggise oyile inggise gyiide yi Imgbasho na shewo nga ogbughe nani, ikyekye a wo itan mi ondu odzeedze ntatase.

⁷ Ni ondu odzeedze ongwī ababo ki sulu okakewo bayo, itodze opita ondu odzeedze oka ki dzema wuba.

⁸ Kpaa Imgbasho di ungwō sisi lon yi inggise man o gbē,

<<Otse noola gbē, onk kyema,
ngwi ani ka dze mi ondu odzeedze
ofufe yi emi iSrai beyi emi iJuda.

⁹ Otse gbē, ka yama dze dafi ondu odzeedze ngwi Ani dze yi otsikyoma ono ngwi Ani byi ma abo kye ma tase mi iGyibiti na ba,

ikyesine a kwulese dze mi otsitsi
mi ondu ngwi Ani dze yi ama ma ba,
man N kyata iyikpa tse ma.

¹⁰ Otse gbē, <<Ni egbe ntona wa nyē yo,

li ondu ngwi Ani ka dze yi emi iSrai aani.

N ka gbe ola mgben wo ma ke itukwu di lo ola

Mgben mi eka mgbi ama.

N ka li Imgbasho mgbi ama a dika li emi-dani.

¹¹ Mi onō na, inggise ka nya inggise nwatse don hona ongwunon gbē,

<Ye Otse wuba,> ikyekye ama duu ka ye ani, wita mbi engbe mgbi ama nghataa lu mbi engyukwo.

¹² Lubana N ka dzamata yi imbaali mgbi ama dika we ali

ibwubwe mgbi ama wuba.>>

¹³ Dafi o kwu ondu odzeedze ne gbē <<ofufe ne,>> o nu ongwī ababo na sila; ma ungwō nla sila di kye yo, ka byulu mbe onō ba.

9

Osusunu mi iTabenako ongwī ese neni

¹ Ondu odzeedze ongwī ababo dze yi ola mgbi osunu beyi ozu ongwī a ka sunu mi ele mi ese neni.

² A kye iTabenako wēese. Mi ifu egli ozu mgban ongwī ababo ma otse ipitila dze ele yi adinyatse beyi ibredi ngwi a kye mse be ele; a kwu imbe na gbē imbe Osaan.

³ Mi iyikpa ayangwuto ongwō fan ma ifu egli ozu dze ele ngwi a kwun di Imbe Nghao le Saan.

⁴ Iwashī abashi okye ungwō ogbungbe toola yi ikwulu imu mgbi ondu odzeedze ngwi li abashi-abashi. Imu ne dze yi ikpokpo abashi ngwi imana wele yi okwuta mgbi Eron ngwi tsaabo beyi anggaye akwutse ngwi a lo ola iwyo ntona mi ele mani.

⁵ Mi ikye imu na Icerubyin (Icerubyin li ambe ngwi a kpa dzeke otso okwōkwō mgbi Imgbasho) dodze ele gbiuwulu tukwu imbe elela odiidi. Nghaduu onō gyo ngwi eyi ka tufya odze ne shilele waba.

⁶ Ngwi alungwō duu toke ondondan ng-hane, ama ofife li kaka ifoozu ongwī ese na alono-alono ikye okiyayi yi ido mgbi ama.

⁷ Kpaa li okwukwo inggise ofife ta li kaka ifoozu ongwī idzidze na akponyi mi onova, o li kaka yi eyi kyeme ngwi o li ka kye fiye ikye ewon beyi ikye ali ibwubwe ama inggise kyo mi ine obuubu mani.

⁸ Mi ungwōne Onodzi Osaan le tso gbē, ngwi iTabenako ongwī ababo na ka wodze ne, ofe olu Imbe Nghao le Saan na, a kye kwulu lasisa waba.

⁹ Nene li otso ambe mi onō ongwī onene gbē, umba yi ife ofefe ngwi a kye nu na yagba onu ela ongwī itukwu mgbi ama osunu ntona gbosa ba.

¹⁰ Ola ntone to ikye ungwōgye yi ungwō owaawa beyi oga ewo osa-sa. Ola ikye

ungwō ama ngwi inē li di ntone ka to nghataa ba onō ola ofufe.

Eyi iKrestu

¹¹ Onō ngwi iKrestu ba dafi okwukwo inggise ofife mgbi ungwō osuse ama nteyi to mmene ma, O nye anghodzi iTabenako ngwi nghao shewo di tishi nga ongwī inggise me, alima li otso gbē, li ungwō ngwi a ta mi ese ne ba.

¹² IYesu kaka Imbe Nghao le Saan na akponyi ta, nghaduu li mi eyi mgbi mndo naadi mnda ba; kpaa li mi eyi mgban abuson ngwi o kye fife se dula eyi to gyegwu.

¹³ Ola mgbi iMose gbē, eyi mndo yi mnda beyi utō mgbi ibidrua mnda ngwi a kye fwe inggise ama ntsiidza li salu ma nu ma yē saan mi ikpewo.

¹⁴ Nghaduu, iKrestu dze yi alobube ba, o di kye ewon fife dafi mfye mgbi onodzi ogyegwu nu Imgbasho. Li ikyengha ngwi eyi mgban nghao fyumfye di nu ewodze mgbi eyi gbosa aali. Ngwi i dze nga duu ne kpaa, eyi ka kyo Imgbasho oshishe ido, i ka kyungwō ama nka ba yi eyi ikwongye wuba.

¹⁵ Mi itōdze ne iKrestu li inggise oyile inggise gyiide yi Imgbasho, ikyesine li ongwu ba yi ondu odzēdze ofufe, ikye ni ama ngwu a kwu ma ela ma tu okwude ngwi a zondun ogyegwu nani. Ngwi o kwulu dafi inggise onagbe ikye oshē ma adi mi ali ibwubwe ngwi a kyo mi onō mgbi ondu odzēdze ababo neni.

¹⁶ Mi odze ofe ogyokwude yō, sede ot-sungwō nlo ma li kwulu se a ka kyido mi ele,

¹⁷ ikyekye a li kyungwō yi afe ogyokwude mi onō ngwi inggise nlo ma kwulu se; li sulu mfye onō ngwi ot-sungwō nlon ma ka dze oshishe ba.

¹⁸ Li itōdze ne ngwi ondu odzēdze ongwī ababo na kpaa li kyido ba, sede a ka dze eyi mmbwaba kyi ele aali.

¹⁹ Ngwi iMose gbo ali ola duu nya inggise ntona ne, o kye eyi mnda yi eni yi itu omuma beyi abo ihiso kye fwe afe ofulu-fulu yi inggise ntona duu.

²⁰ O gbē, <<Nene li eyi mgbi ondu odzēdze, ngwi Imgbasho woola gbē ni ema ngyo mani.>>

²¹ Mi itō ofe ne kpō, o kye eyi na fwe iTabenako na beyi alungwō ngwi a kyo oyabo ele duu.

²² Mi otsitsi, ola mina gbē ungwō angbeka kwuba ni a kyi salu yi eyi. Ni eyi okyi ese dzema bayo odzata inggise yi alobube kpaa dzema ba.

²³ Ne, i yē kyeme-kyeme gbē, ungwō emi ese ne nto dafi ambē ungwō emi esho duu, a ka kyi salu ma yi ife ntoneni, nghaduu

ungwō emi esho abuoma yō, a ka kye salu ma mi ife ntatase nga ntoneni.

²⁴ Lubana iKrestu yama kaka imbe osaan ngwi a mbē mi abo nli ambē mgbi ude otsitsi na ba; o kaka ude Imgbasho yeye, ikye oka kwudze inē Imgbasho ikye eyi.

²⁵ O yama kaka esuto ongwī esho ikye ole yile ewon fife alonō-alonō dafi okwukwo inggise ofife li kaka Imbe Nghao le Saan ali onova oka fife yi eyi nli mgban ba na ba.

²⁶ Ki li nga yō, iYesu ki gyadze akpe ibyibyi kye onō ngwi a ta ese ma jo. Kpaa onene ese dze kwekwē ongyēngye se o wa kye ewon fife akponyi ikye ali ibwubwe.

²⁷ Dafi a kye dze gbē inggise ka kwulu akponyi ta a ka gbōn ikwō ne,

²⁸ Li nga a kye iKrestu fife akponyi ikye okyelu ali ibwubwe mgbi inggise kwuba aali. O dika ye ba akpe ongwu fan, li owa kyi kyelu ali ibwubwe wuba, kpaa li okye owato-wato ba wa nu ama nto le fan mani.

10

IYesu fife akponyi

¹ Ola mgbi iMose dze dafi li onodzi mgbi ungwō osuse nkye iyayi ka ba mani. Yama li ungwō otsitsi ma yeye ba. Nghane ife ofēfē ali onova ka yagba nu ama ogbleba kwekwē sunu Imgbasho yē saan gbē ba.

² Ni i kika yagbayō, a ki nya yi ife na ofēfē wa. Lubana akponyi mata, ama osunu ntona duu kika nu ma yē saan, itukwu mgbi ama kika nu ma obube mi ali ibwubwe mgbi ama wuba.

³ Nghaduu ife ofēfē ntonē yē ungwō okyō ali iye ikye owe ma gbē a ka dze yi alobube ma,

⁴ ikyekye eyi mnda yi mndo ka yagba kyi kyelu ali ibwubwe ba.

⁵ Li ikyengha onō ngwi iYesu ba ese ne ma, o gbo yi Imgbasho gbē, <<Li ife ofēfē yi umba ngwi abu mina ba, kpaa abu kye ewo nu ani ikyegbē ni ani kyo abu ido;

⁶ Ife otoola beyi ife mgbi alobube li nu abu itukwu osheta ba.

⁷ Ta ani gbē, <N dze na, Afe lo kwu iyi ani gbē, N ba owa kyo itukwu abu, Imgbasho.>>

⁸ Ababo o gbē, <<Ife ofēfē yi umba onu-unu, umba otoola yi umba mgbi alobube mina abu ba, a di li nu abu itukwu obese kpaa ba>> (ola yō gbē ni a kyo ma).

⁹ Ne o gbē, <<N dze na, ani ba owa kyo itukwu abu.>> O kye ofe ofiife ongwī ababo na gekē ese di ba yi ofe ofufe ngwi li ongwu fan.

¹⁰ Ma mi oweka mgbi Imgbasho na, a nu eyi yē saan mi ikpewo ife ngwi iYesu iKrestu kye ewon fē akponyi nani.

¹¹ Alegbe-alegbe, ama ofife duu li kwudze le kyido ife ofeefe mgbi ama; alonɔ-alonɔ a li fe ito ife ngwi ka kyi salu ali ibwubwe gbe ba mani.

¹² Nghaduu ngwi iKrestu kye ewon fife akponyi neman, o lu ka sɔke abugye mgbi Imgbasho.

¹³ Kye onɔ na jo o le fe ni a kyata engyikyili mgban nu ma yee itse mgban ogbe afo to ele,

¹⁴ ikyekye mi ife mgban ofeefe akponyi na o kyi salu ma gyegwu nu ma yee saan.

¹⁵ Onodzi Osaan kpaa kyo obwende mgbi ungwɔnɔ nya eyi. Ababo o gbɛɛ,

¹⁶ <<Otse gbɔgbɛɛ, mi onɔ na, li ondu odzɛɛdɛ ngwi ani ka dze yi ama aani. N ka kye ola mgbɛn wo ma ke eka dika lo ma mi itukwu mgbi ama.>>

¹⁷ O di mbwumbwo gbɛɛ, <<N ka we ali ibwubwe yi adɔ okyeekye mgbi ama wuba.>>

¹⁸ Kini a to ma mkpa mi ali ibwubwe yi adɔ okyeekye mgbi ama yo, ife ofeefe ikye alobube dzema wuba.

I gbo ba mbi Imgbasho

¹⁹ Nghawane, emi ongwunani, dafi eyi dze yi imio ewo ba okaka Imbe Nghao le Saan mi eyi mgbi iYesu,

²⁰ mi ofe ofufe ngwi nye kaka oshishe ne! Ofɛ ne kye ikpewo ayangwuto nli iKrestu abɔn neni.

²¹ Ngwi eyi dze yi anghodzi inggise ofife nle di mi ozu Imgbasho ne,

²² ni i ba kwekwe yi Imgbasho itukwu onyi mi oyeye onuunu mgbi otsitsi, beyi itukwu ngwi a kye salu mi itukwu mgbi eyi ogye obube di kyi salu eweyi mi eni oglododo.

²³ Ni i ka suusu mi ewe mgbi eyi ogbe byilbyi ngwi eyi le gbɔn mi ododa ne ba, lubana ongwɔn zɔndu ma li nyine ba.

²⁴ Ni eyi di di ofɛ ngwi eyi ka kwu eweyi ewe wo ikye otso okpitukwu di kyungwo osuse mani.

²⁵ Ni i ka ndɛ okwakye yi eka dafi angbeka le kyo na ba, kpaa i kwu eweyi ewe wo onghaangha duu yo ngwi onɔ le mba neni.

²⁶ Kini eyi kiyayi okyo alobube mi oshu onɔ ngwi eyi sulu odifwi-difwi mgbi otsitsi ne yo, ife ofeefe ikye alobube onyonyi kpaa dzema wuba,

²⁷ kpaa li imio mgbi ikwo ogbɔɔgbɔ yi amoola itingga nkye iyayi kawa gye engyikyili mgbi Imgbasho nani.

²⁸ Ni inggise efa hona eta kyo obwende mi ikye inggise gbɛɛ o foola mgbi iMose yo, a li ngwɔn yi elela odiidi ba.

²⁹ Tsɛwe di dafi adɔ okwookwo mgbi ama nkye afo si Ongwe Imgbasho di kyo yi eyi mgbi ondu odzɛɛdɛ wɔɔ dafi li ungwo nle

saan ba ka dze mani. Ito inggise ntona fya Onodzi Osaan nkye elela mgbi Imgbasho ba mbi emidan na ito.

³⁰ Lubana eyi ye ongwu ngbɛɛ, <<Li ido mgbi ani okpa mkpa; N ka kwo ma adɔ,>> <<Otse dika fwo emidan ikwo.>>

³¹ Li ungwo okwulewo ni inggise gbese wo Imgbasho oshishe abɔ.

³² We dafi ema gyadzɛ kpakpa mi owita-wita ngwi osa mgbi Imgbasho ba mbi ema mani.

³³ Onoka a li fya ema ito mi ododa di nu ema iso; onɔ angbeka yo li dze ema gbɛɛ ema ki ya ama a le nu ma iso na abɔ.

³⁴ Ema li tobyi ama nwoto obawi, ni a kyi gbelu ungwo ngwi ema dze yan duu kpaa ema li dze yi atsa, ikyekye ema abuema ye gbɛɛ ema dze yi ungwo ama ntatase di li gyegwu.

³⁵ Nghane ka gbewengwuta yi abɔ ot-sigege mgbi ema ba na; ema kawa tu umba mi ele shewo.

³⁶ I wogyo ema ka shitukwu ikye ni ema kyo itukwu Imgbasho, ema ka tu ungwo ngwi O zɔndu mani.

³⁷ Lubana mi ongwɔnɔ gwee ta, <<Ongwu nka ba ma ka ba yi onɔ ombeembe wuba.

³⁸ Emidani ama osaan ka dze oshishe mi oyeye onuunu.>> Kpaa ongwu n yeyikpa yo, ka kpɛn yan ba.

³⁹ Nghaduu eyi li ama n yeyikpa ngwi a di dzili ma na ba, kpaa eyi li ama nnoyeye ngwi a dula ma wato nani.

11

Oyeye onuunu

¹ Oyeye onuunu li ungwo ama nka wa dze kyeme ngwi eyi gbewebyi ele, ambe mgbi ungwo ngwi eyi li di ma ba mani.

² Li oyeye onuunu nu ma tse emi otsikyeyi tugbe aali.

³ Li mi oyeye onuunu ngwi eyi tu osa gbɛɛ Imgbasho ta ese mi elodze mgbɛn, nghane ungwo ngwi a ta ma ngwi eyi li di ntonɛ, a ta ma mi ungwo ngwi ine li di ba mani.

⁴ Mi oyeye onuunu Ebel fife ntatase nu Imgbasho nga mgbi iKain. Mi oyeye onuunu a tsan gbɛɛ o li inggise osaan, onɔ ngwi Imgbasho she ine ta ikye yi umba mgbɛn mani. Ngwi Ebel kwulu ne kpaa, o kale gbɔdzɛ oyeye onuunu mgbɛn yi eyi.

⁵ Enɔku nose noyeye o di ikwongye ine ba, a kyon lu esho oshishe a din wuba. Kpaa duuse ni a kyon lu esho yo, a tsan gbɛɛ o li inggise nkyo owitukwu Imgbasho.

⁶ Ma ni li mi oyeye onuunu bayo inggise onyi ka kyungwo kpa Imgbasho ba, ikyekye ali inggise nba mbon yo li kyeme no noyeye gbɛɛ o dzema, o di li nu ama npitan mi otsitsi ma umba.

⁷ Ikyegbɛɛ iNua noyeyɛ nɛ, Imgbasho kye ungwɔ nka wa kyo mi iyayi tson. O fwo Imgbasho di kpa uwaa ngwi dulun to yi eto mgban. Mi itɔdze nɛ a gbɔ ɛsɛ ikwɔ, man a kye mse ndzɛ ikye ali inggise osaan ma kye nun.

⁸ Abrahan noyeyɛ di fwo Imgbasho. A nyan gbɛɛ no lu imbe ngwi o kawa gyokwudan, ngwi Abrahan nu Imgbasho oyeyɛ nɛ, o ye ɛsɛ na ba kpaa o lu.

⁹ Mi oyeyɛ onuunu o lu dafi ingyoga ka mbɛ udɛ mgban mi ɛsɛ ondu odzɛɛdze mi anengye; o la afu, dafi Adziki yi iJeko ama ngwokwude ngwonyi yan kpaa la mani.

¹⁰ Lubana o gbinebyi ogalu ngwi a wo itan, ngwi inggise ombaamba yi ombɛɛmbe li Imgbasho nani.

¹¹ Abrahan noyeyɛ gbɛɛ Imgbasho ka mbwo ondu odzɛɛdze mgban, li ikyengha ngwi Abrahan kye ngwi iSara di li ogyoma kpaa yɛɛ ungwɔ otu ongwɛ aali.

¹² Nghane li ikpewo Abrahan onyi ngwi kye kika mbongwɛ gbɛ wuba nɛ, ngwi engwiban to mbwo dafi mce mi akpa beyi mfyɛn mi ekyyo aani.

¹³ Inggise ntonɛ duu kale noyeyɛ se a kwa kwulu. A yama tu ungwɔ ama ngwi a zondɔ yi ama ntona ba; a di kɛ mbombo ma i tsa ma atsa. A di gbela gbɛɛ ama baaba di li ingyoga mi ɛsɛ neni.

¹⁴ Inggise ama ngbɔ ito odzɛ ntonɛ le tso gbɛɛ a le mina ɛsɛ nka li mgbi ama.

¹⁵ Ni a kile tsewɛ ɛsɛ ngwi a dzanta na yo, a kika tu ofɛ oye lu ele.

¹⁶ A yɛ le tsewɛ ɛsɛ ntatase ongwɛ esho nani. Nghane i kwu Imgbasho ayiwi onu ma kwu ongwu gbɛɛ Imgbasho mgbi ama ba, ikyekyɛ o mbe ma ogalu.

¹⁷ Li mi oyeyɛ onuunu ngwi Abrahan kye ongwɛ Adziki nu onɔ ngwi Imgbasho mbadin na aali. Abrahan ngwi Imgbasho zondɔ yan nɛ wewo okye ongwɛ onyi kpokpo fifɛ.

¹⁸ Dafi Imgbasho zondɔ yan gbɛɛ, <<Ka li mbi Adziki nɛ ngwi a ka wita ogbɔ eto mgbi abu.>>

¹⁹ Abrahan ye ta gbɛɛ Imgbasho li kyile emi ikwukwɔ, i kɛ dafi li mi ikwu ngwi o yile Adziki mani.

²⁰ Li mi oyeyɛ onuunu ngwi Adziki kye mse bɛ iJeko yi Isol ewo ikye odzɛɛdze mgbi ama ongwɛ iyayi aali.

²¹ IJeko mi oyeyɛ onuunu mgban duuse no kwulu yo, o kye mse bɛ emi ongwɛ iJose duu ewo, di fyiɛ okwuta mgban ye sunu.

²² IJose mi oyeyɛ onuunu mgban, ngwi o wa dze kwɛkwɛ okwulu jokpaa, o gbɔdze otɔ-to mgbi emi Israi mi Igyibiti, o nya ma gbɛɛ nu ma wa kye akpukpu mgbi ongwu byi lu yi ama.

²³ Li mi oyeyɛ onuunu ngwi ama omba iMose kyon da mɛ ofyia eta mi onɔ ngwi

a mban mani, ikyekyɛ ama omban di gbɛɛ odzɛɛdze mgban li idzidza yi engbɛ angbeka, a di wimio ola ngwi utɔ wo ma ba.

²⁴ Mi oyeyɛ onuunu ngwi iMose wa she kpaa o gbela nu ma yon gbɛɛ ongwu li ongwiba mgbi iFaro mbi ongwɛ ongwu ongyaa ba.

²⁵ O di gbɛɛ i tatase ni ongwu gyadze ungwonyi yi emidi Imgbasho ngha onu ongwu gye ɛsɛ mi alobube mi ongwɔnɔ gwee.

²⁶ O kye ayiwi ogyeegye mi ikye iKrestu wuuta ngha aludu mgbi emi Igyibiti nani, ikyekyɛ o kyinebyi umba mgban nkyɛ iyayi mani.

²⁷ O dzata Igyibiti mi oyeyɛ onuunu, o yama wimio itingga mgbi utɔ ba dududu, o shitukwu kpɔɔ ikyekyɛ o di ongwu a li dun ba nani.

²⁸ Li mi oyeyɛ onuunu ngwi iMose wo emi Israi ola gbɛɛ nu ma le gye oga owɛ owatowato di kye eyi kyi onufɛ ikyegbɛɛ ongwu nka wa dzili engwɛvɛ na no ka kye abɔ gbo ongwovɛ emi Israi ba aali.

²⁹ Mi oyeyɛ onuunu inggise ntona kyikye mi ikpɛsɛ nye onekyyo omuma, kpaa ngwi emi igyibiti fya gbɛɛ ama kpaa ka kyɛdɔ ma nɛ, emi dzili ma.

³⁰ Mi oyeyɛ onuunu ogalu iJeriko bulu tukwu ɛsɛ, onɔ ngwi emi Israi kyikye kpasɛ ikpishi ogalu na egbe egyafa mani.

³¹ Li mi oyeyɛ onuunu ngwi a ngwɔ owagbai iRaha yi ama onghaadɔ emi iJeriko ntona ba aali, ikyekyɛ o gbɛɛ ama owodi ntona abɔ efa.

³² Nin di gbɔ ali odzɛ? N sulu onɔ ogbɔdze mgbi iGidon, iBaraki, iSansin, iJetta, iDevedi, iSamue beyi ama ogbɛɛsɛ ba,

³³ ama nkyi gbelu esuto kwuba mi oyeyɛ onuunu di li gbiikwɔ mi emyɛnyɛ di tu ungwɔ ngwi a zondɔ yi ama nani; a tukwulu ugaba ondu,

³⁴ di myunu amoola okwusunkli di gye ma ba; ewo odzaatsi mgbi ama kyata yɛɛ enɛpɛ; a yɛɛ engyilika di ngha oblakwutse emi iyikpɛsɛ ika.

³⁵ Engyaa di emidama nkwulu se ngwi a di kyile ma mi ikwu mani. A nu angbeka iso kpaa a fwa odzata Imgbasho, ikye nu ma wa tu okyɛ-kyɛ mi ikwu osuse.

³⁶ Angbeka gbiiso mi agya yi ibe ogboogbo, a kwa di bwa angbeka adi gbe ma ka wɔkɛ obawi.

³⁷ A tsengwo angbeka mi akwutse, kwɔdze angbeka efa; a ngwɔ angbeka mi okwusunkli. A le ga kye yi okpa mmala yi okpa mndɔ ewo, a tundzɛ yi adzɛ, a nu ma iso di kyo yi ama timbi-timbi.

³⁸ Eɛe ne gbuo yi ama wuba. A le ga kye imbe okplagada yi unggwo yi ifo akwutse beyi ishe mi ikpese.

³⁹ Ama duu, a tse ma ikye oyeye onuunu mgbi ama, nghaduu kpaa a yama tu unggwo ngwa a zondou onu ma ba.

⁴⁰ Imgbasho tsewe unggwo osuse ikye eyi, ikyegbee nu ma beewo yi eyi yo a ka nu ma yee saan.

12

Imgbasho nye emi onghan

¹ Ikyenghane, ngwi obwende lokawo eyi wane, ni i gbe unggwo ama otukwu eyi ofe beyi alobube ama nli wo eyi ekle suno ba duu ngwuta, adzi ni eyi gbili ikye unggwo ngwi a kye dze ikye eyi ma yi itukwu oshiishi.

² I gbe ine mgbi eyi byi mbi iYesu na, o li owita-wita yi ongyeengye mgbi oyeye onuunu mgbi eyi, ikye atsa ndzan iyayi nani. O shitukwu mi ekwatsi kye ayiwi wuuta ba. Nghane o sodze itsuuto mi abugye mgbi Imgbasho oneneni.

³ Tsewe di dafi iYesu shitukwu kpakpa mi ofwaafwa ngwi emi alobube fwan mani, ta sika kaka abu ewo ba, itukwu dika sha abu anye wuba.

⁴ Ofyaafya ngwi ema fya gbee ni ema ka kyo alobube ba duu kpaa, ema yagba dzeeyi kyese dafi iYesu kyo na waba.

⁵ Ema gblimo elodze ngwi Imgbasho kwu ema ewe wo mi ele dafi emi onghan maa? O gbee:

<<Ongwani, ka kwu onyeenye mgbi Otse shanye ba,

itukwu no dika sha abu anye ono

ngwi o kyokyo odze yi abu ba,

⁶ ikyekye Otse li nye ama nkpan itukwu mani.

O di li kwo ali inggise ngwu o gbelan gbee li onghan duu ado.>>

⁷ Shitukwu mi iso ikyekye li ofe mgbi onyeenye; Imgbasho le kyo yi ema dafi engwe. Lubana li ali ongwengwi otson li nyan ba?

⁸ Kini a nye ema ba (ma angbeka duu gbe onyeenye yo), ema li engwe yeye ba kpaa engwe uka.

⁹ Lubana eyi duu to yi otso emi ese ne ama nli nye eyi, eyi di li nu ma mmwe kpaa. Nghane Otseyi ongwengwi onodzi ndi dze oshishe se eyi ka kye eweyi nun no nye ba daa?

¹⁰ Emi otseyi li nye eyi mi ongwono gwee dafi a di gbee i gbuo mani, kpaa Imgbasho li nye eyi gyo no to tishi lo eyi, adzi ni eyi dze saan dafi Ongwu mani.

¹¹ Onyeenye onyonyi kpaa li tishi mi ono ngwi a le nye ma ba, li wulewo. Ama ngbe

onyeenye ma a li wa tu owaawa mgbi osaan beyi iyu mi ono ongwengwi iyayi.

¹² Nghawane, ni abo mgbi ema yi akwafso otsaatsa kwumfye.

¹³ Melu ofe oshishe mgbi ema no dze yeye ikye ni ama nfyumfye ba ka wende ba, kpaa ye fyumfye mi oyeye onuunu mgbi ama.

Ado okwookwo mbi ama nfwaw Imgbasho

¹⁴ Fya mi ofyaafya mgbi abu ni abu dze mi iyu yi ali inggise duu di dze saan; no li mi osaan bayo inggise onyi ka di Otse ba.

¹⁵ Fya ni elela mgbi Imgbasho ka nye inggise onyi ba dika nu inggise oka itukwu owulu-wulu ikye oba yi ema angbeka okakewo di gbe inggise kwuba woke idza ba na.

¹⁶ Fya saan gbee ni inggise onyi kyo amah hona ye Imgbasho ba ito mgbi iSol ongwu nkye ongyukwo mgban gya ikye ongwogye na ba.

¹⁷ Ngwi ongwone wa nye ne, i minan gbee otson no kye mse ne ban ewo, nghaduu o kwon. iSol tsukwu yi etse ine kpakpa kpaa ono nye oke mse na nun.

¹⁸ Ngwi ema ba mbi Imgbasho ne, ema yama ba mbi unggwo ngwi inggise owamye ka yagba kye abo gbon ito ngwi emi Israi di mi unggwo iSinai na ba. A kpatse yi ola ogbaamu nle gbe di yifu di fa dafi idablu.

¹⁹ Ema fwo ofofo mgbi agba beyi elodze nle sandu jo ngwi emi Israi fwo di tekye gbee Imgbasho no ki gbodze yi ama mi ela na wuba, na ba.

²⁰ Emi Israi tekye ikyekye ama ka yagba yi ito ola ngwi a wo na ba: <<Kini mmbwaba jokpaa kye ewo gbo unggwo na yo, ni a tsengwon mi akwutse kyeme-kyeme.>>

²¹ Ungwo ngwi a di na wimio jo iMose gbee, <<N le shi adagba yi imio.>>

²² Kpaa ema bato unggwo iDzayon, mi iJerosalin ongwengwi esho, ogalu mgbi Imgbasho oshishe nani. Ema bato okwakye atsa oshewo mgbi engyeso idubu-idubu.

²³ Ema bato okwakye mgbi ongwovle, ama ngwu a lo iyi ma mi esho mani. Ema bato mbi Imgbasho, ongye ofwo ali inggise duu ikwo nani yi mbi onodzi mgbi inggise ama onyaan ngwu a nu ma yee saan,

²⁴ ema bato mbi iYesu ongye oyile inggise gyiide yi Imgbasho mi ondu odzeedze ofufe beyi eyi ngwi a kye kyi ngbo elodze tatase ngha eyi mgbi Ebel nani.

²⁵ Fya ni ema di gbee ema kwu ela mgbi ongwu ngbodze na fungbe ba. Kini a yagba tsebyulu wo ongwu nkwo ma ado mi ese ne ba ma, eyi ma ka tsebyulu wo ongwu esho nkwo eyi ado na gbee?

²⁶ Tugbe ma ela mgban nu ese suusu, kpaa onene o zondou gbee, <<N dika nu ese kyo on suusu ba esho kpaa ka suusu.>>

²⁷ Elodze <<dika>> ne tso gbæ, ungwɔ ama Imgbasho ta duu, a ka su ma di kye kwɔlu ma, ikyegbæ ungwɔ ama nka suusu ba ma nu ma dze gyegwu.

²⁸ Nghawane, dafi eyi le tu esuto nka suusu ba ne, i ta Imgbasho angba ye sunun yi ewo oyile ese yi imio,

²⁹ lubana <<Imgbasho mgbi eyi li ola nli gye sisi ba.>>

13

Odze owe-we ongui olele

¹ Kiyayi odi ewema kpitukwu dafi engwun ewee mani.

² Le gbæ ingyoga mi ude ema na, li mi ito ofe ne ngwi inggise angbeka gbæ engyeso saan kpaa yama ye ba aali.

³ We ama nwoto obawi yeye dafi ema kpaa wodze ele yi ama mani, dika gblimo ama ngwu a le nu ma adze ba, dafi ema kpaa wodze ifu adze na yi ama mani.

⁴ Wo eba okwokyiikwokyi okpa na, di kye akwulo eba okwokyiikwokyi dze saan, lubana Imgbasho ka gbo emi amah beyi ama okyo amah idza ikwo.

⁵ Oshishe mgbi ema no dze enggengga mi imina mgbi udza, ungwɔ ngwi ema dzeyan no gyɔlo ema, ikyekye Imgbasho teyi gbæ, <<N ka yama dzata ema hona gblimo ema ba.>>

⁶ Nghane eyi gbo yi abo otsigege gbæ, <<Otse li ongye otobyi ani; n ka yama tsimio ba. Li ekye ngwi inggise owamye ka kyo ani?

⁷ We ama ngbe ema teyi di gbæso Imgbasho nya ema ntonani. Kyidi ito oshishe nose ngwi a sulun mani di kye afo ma.

⁸ iYesu iKrestu li ungwonyi edede yi ine nghataa gyegwu.

⁹ Nu ma ka kpagya ema wo yi otsootso angbeka ba. I tishi ni itukwu mgbi eyi fyumfye mi elela mgbi Imgbasho, no ka li mi ola mgbi ungowgye, ndze yi abo oyaaya mbi ama nle gye ma ma ba.

¹⁰ Eyi sulu iwashi ngwi ama okyido mi imbe ofife kpaa dze yi ofe ogye ungowgye mi ele ba.

¹¹ Okwukwo inggise ofife li kye eyi mmbwaba kaka Imbe Nghao le Saan ikye ofife mgbi alobube, nghaduu mmbwe yo a li gbe toola mi esise.

¹² Li ikyengha ngwi iYesu kpaa gyadze tase dzata ogalu ka kwulu ikye onu inggise ye saan mi eyi mgban aali.

¹³ Nghane ni eyi kpaa tase dzata ogalu ka tun di gyayiwi yan ungwonyi.

¹⁴ Lubana mi ese ne eyi sulu ogalu nka dze gyegwu ba, kpaa eyi le fe ogalu nka wa ba nani.

¹⁵ Mi ikpewo iYesu, ba ni eyi fife nu Imgbasho le tse iyin dile gbodzan alono duu.

¹⁶ Dika gblimo okyumse di ghumba ba, lubana ito umba ntona li kpa Imgbasho.

¹⁷ Siikyenu ama ogbe ema teyi di gbela yi ola mgbi ama. A le di mbi ema dafi inggise ama nka wa nu uka ikye ema mani. Fwo ma adzi ni ido mgbi ama no dze yi ama atsa. Ni ema ye ma okye yo, ka ya ema abo ba.

¹⁸ Bibo ikye eyi na. Eyi ye ta gbæ itukwu mgbi eyi gbosa eyi di mina ole kyo oshishe nka ba yi mmwe ali ofe duu.

¹⁹ Ani abuen tekye nu ema gbæ ni ema bibo ikyegbæ ni ani ye ba mbi ema dzikan-dzikan.

²⁰ Ni Imgbasho mgbi iyu, Ongwu mi ikpewo eyi mgbi ondu obwa-bwa ogyegwu, nkyile Otse mgbi eyi iYesu, okwukwo inggise ongyo mmala mi ikwongye na,

²¹ kye alungwo ntishi okyo itukwun duu nu ema, no di kyido mbi eyi mi ofe nkpan mani, ikpewo iYesu iKrestu, ngwu okwokwo dze mbon gyegwu-gyegwu nani. No dze ngha.

²² Emi ongwunani, n lo ema ongwæ afe ne ikye okwu ema ewe wo, nghane n tekye gbæ ni ema gbewebyi saan mi ungwɔ ani gbo ma ntoneni.

²³ I mina ani onu ema ye gbæ a duu ongwuneyi iTimoti mi obawi wa. No wa kaka vla yo, n ka kyon wafɔ yen ba wa kpadi ema.

²⁴ Ta ama ogbe ema teyi yi emi osaan duu angba. Emi iKrestu mi iTali desɔ angba mbi ema.

²⁵ Elela mgbi Imgbasho no dze yi ema duu.

Afe mgbi ijensi

¹ Ani ijensi, ongbido mgbi Imgbasho beyi Otse iYesu iKrestu, le ta agwo iwyoodefa ama nganya kpatse ese duu na angba.

Imbadi beyi igyila

² Emi ongwunani, no li ungwō atsa mbi ema saan mi onō ngwi imbadi ba mbi ema ita idzidza-dzidza mani,

³ bana ema ye imbadi ngwi a le mbadi oyeye onuunu mgbi ema ne, ka nu ema itukwu okwu onyotse.

⁴ Onyotse okwu-kwu ne ka nu ema myotse di ye saan, adzi ni unkonyi ka kwo ema oba ba mani.

⁵ Kini ozoyeye kwo inggise oba yo, no bō mbi Imgbasho nli nu ali inggise duu dzii yi okakewo ba nani, ta o ka kye nun.

⁶ Ki non bō yo, no noyeye dika dze yi itukwu efefa ba, bana inggise nli tsewe itukwu efefa dze dafi akpeni mi ekyoo okwukwo ngwi awo li gben le gyeke nani.

⁷ Ito inggise na no tsewe gbee ongwu ka tu unkonyi mbi Otse ba;

⁸ o li inggise otsewe itukwu efefa dile wwojwo mi ungwō mgbā okyockyo duu.

⁹ Ali inggise onoyeye ndze abubo yo, no tsatsa ikyesine Imgbasho kyon wuuta.

¹⁰ Nghaduu ongwu ndze aludu ma, no dze yi atsa gbee Imgbasho yilen ese, ikyekye o kawa nye dafi ongaanga oshe mani.

¹¹ Lubana onō li to yi olola mgbā tse ni oshe ndzili, ongaanga mgbā li wulo di nu mse mgbā nye. Mi ito ofe ne kpoo, inggise aludu ka sila ngwi o le kyummya kye ne kpaa.

¹² Imgbasho ka kye mse be inggise nshitukwu mi imbadi ma ewo, bana o kwulese mi imbadi mgbā kpoklō ne, o ka gbe okpapyi mgbi oshishe ngwi Imgbasho zonu okye nu ama ongwu kpa ma itukwu mani.

¹³ Kini igyila ba mbi inggise yo, ni inggise onyi ka gbee, <<Imbadi na kye mbi Imgbasho ba.>> Ikyena inggise onyi ka yagba gyila Imgbasho mi ungwō obube ba, ongwu kpaa di li gyila inggise ba;

¹⁴ kpaa li imina mgbi eyi ma li gyila eyi ka kwu ukya aali.

¹⁵ Nghane ni imina wa byifu yo, li mba alobube, ni alobube kpaa wa she kpakpa yi, li mba ikwongye.

¹⁶ Nu ma ka kpagya ema wo ba emi ongwunani ama okpa ani itukwu.

¹⁷ Ali umba osuse beyi ongwu nghao tishi duu kye esho, mbi Otso osa, ongwu nli nyine ba dududu nani.

¹⁸ Li mi oweka mgbā ngwi o mba eyi nye mi elodze otsitsi na aali, ikyegbee ni eyi li eto emi ababo mi ungwō ama ngwi o ta duu.

Ofwoofwo beyi okyockyo

¹⁹ Emi ongwunani okpa ani itukwu ye ungwōne na: Ali inggise no dze pepe mi ofwoofwo kpaa kyo dumō mi ogbōgbo beyi itingga okyockyo,

²⁰ lubana itingga ka yagba nu inggise le saan dafi Imgbasho mina ma ba.

²¹ Nghane dzata alungwō idza beyi alobube ngwi ema li kyo alono duu nani. Kyi gbelu eso ngwi a kye kya mi oshishe mgbi ema nka dulu ema wato ne yi ewo oyile ese.

²² Ka fwo elodzimgbasho ta ba, kpaa kyo kyo mi ungwō ngwi ela na gbo mani, bana o le kpagya ewoo wo.

²³ Ali inggise nfwo elodze na kpaa le kyo dafi i gbo ma bayo, dze dafi inggise nle di ewon mi idzinggi,

²⁴ ma labolabo ngwi o di ewon lu mata, o li gblimo odzeedze mgbā dafi ongwu dze mani.

²⁵ Nghaduu inggise nkyinebyi kpoklō mi ola nnghao tishi li nu ewo sheta na, gblimo ungwō ongwu teyi fwo ma ba kpaa kiyayi okyo mi efu yo, a ka kye mse ban ewo mi ungwō ngwi o kyo mani.

²⁶ Kini inggise kye ewon gbee, ongwu le kyo Imgbasho ido kpaa yagba bwa ide mgbā fyii bayo, o le kpagya ewon wo, odzimgbasho mgbā duu li ayayi.

²⁷ Odzimgbasho ngwi Imgbasho Otseyi gbela gbee le saan di dze yi okakewo ba ma li ongwu aani: ogbekabyi emi ongwokwu yi emi owakwade mi okakewo mgbi ama beyi okye ewabu dze enggengga mi idza ongwu ese neni.

2

A fwa osadu-sadu mgbi okpitukwu

¹ Emi ongwunani, ngwi ema li ama onoyeye mbi Otse mgbi eyi okwulewo iYesu iKrestu ne, ka tso okpitukwu mgbi osadu-sadu ba na.

² Kyi kye gbee inggise wo ongwashi abashi mi abo beyi angwuto osaan wa kaka okwakye mgbi ema, inggise adze kpaa wo ishisha angwuto wa kaka.

³ Kini ema nghao kye mmwe nu inggise nwo angwuto osaan na di nyan gbee, <<Soke itse osuse neni,>> kpaa nya inggise adze na gbee, <<Dzekunto mmanani hona Soke ombulu mi ewafō mgbi ani yo,>>

⁴ li idzidza ngwi ema le tso dile gbo ewema ikwō mi ewodze ibwubwe daa-bana?

⁵ Gadō na, emi ongwunani ama okpa ani itukwu li Imgbasho dulu ama ndze abubo mi ine mgbi ese gbee nu ma li aludu mi

oyeye onuunu, nu ma di gyokwude esuto ngwi ongwu zonu yi ama ongwu kpa ma itukwu ma ba wɛ?

⁶ Nghaduu ema li fya emi abubo ito. Ma li emi aludu li le kwo ema ese di li le kwo ema ke opo ikwo baa?

⁷ Li ama le kwu iyi osuse ngwi ema noyeye mi ele ne shanye baa?

⁸ Mi otsitsi-otsitsi ni ema ngwo ola mgbi esuto ngwi a lo mi Afe gbɛɛ, <<Di inggise nwatse do abu kpa abu itukwu dafi ewabu na yo,>> ema le kyo ayin.

⁹ Kpa kini ema tso osadu-sadu yo, ema kyo obube, ola di nu ema obube gbɛɛ ema li ama ofoola.

¹⁰ Bana inggise ngwu ngwo ola duu kpa foola onyi yo, o gyobube mi ola angbeka duu.

¹¹ Ikyesine li Imgbasho ongwu ngbɛɛ, <<Ka kyo amah ba ma,>> di gbɛɛ, <<Ka ngwo inggise ba aali.>> Kini abu kyo amah ba kpa ngwo inggise yo, abu yɛ inggise ofoola.

¹² Nghane le gbodze dile kyungwo dafi inggise ngwu a ka fwo ma ikwo mi ola nli she inggise adi nani,

¹³ ikyekye inggise nli di elela bayo, Imgbasho kpa ka din elela mi ikwo ogbɔɔgbɔ ba. Elela odiidi nga ikwo ogbɔɔgbɔ!

Oyeye onuunu yi okyɔɔkyo

¹⁴ Emi ongwunani, oyabo li ekye, ni inggise tso gbɛɛ ongwu dze yi oyeye onuunu kpa okyɔɔkyo dzema ba? Ito oyeye onuunu na ka dulun to gbɛɛ?

¹⁵ Kyi kye gbɛɛ ongwunabu ongwu ongyulo hona ongwu ongyaa, dze yi angwuto yi ungwogye ba.

¹⁶ Ni onyi mbi ema gbɛɛ, <<Ke ise na; wo angwuto di gye ungwogye saan na,>> kpa kyo unkonyi otobyi ma ba ma, i yaabo mi ekye?

¹⁷ Mi ito ofe ne kpɔɔ, oyeye onuunu ndze yi ido bayo, li ikwukwo.

¹⁸ Kpa inggise oka ka gbɛɛ, <<Abu dze yi oyeye onuunu, ani dze yi okyɔɔkyo,>> tso ani oyeye mgbi abu ndze yi ido ba nani, ni ani tso abu oyeye mgbi ani mi okyɔɔkyo.

¹⁹ Abu noyeye gbɛɛ Imgbasho li onyi. I tishi! Emi onodzi ibwubwe kpa noyeye nga, ungwone li nu ma shadagba.

²⁰ Abu ikwangha inggise ne, abu mina ambe odi gbɛɛ oyeye onuunu ndze yi ido ba li ayayii?

²¹ Li otsikyeyi Abraham ngwu a kyon gbɛɛ o le saan mi ungwɔ ngwi o kyo onɔ ngwi o kye ongan Adziki dɔke iwashi okyon fifɛ ma baa?

²² Ema di dafi oyeye onuunu mgban yi okyɔɔkyo ke ungwonyi mani, oyeye onuunu mgban di mbwumbwo mi ungwɔ ngwi o kyo.

²³ Nghane Afe ngwi a lo gbɛɛ, <<Abraham nu Imgbasho oyeye Imgbasho di kyon gbɛɛ o le saan,>> inggise di li kwun di oka Imgbasho na mbwumbwo.

²⁴ Ema ka yagba di gbɛɛ inggise li gye emyemye mi osuse ngwi o kyo li mi oyeye onuunu ta ba.

²⁵ Li mi ito ofe ne kpɔɔ ngwi a kye iRaha ongyaa ogbaabo wuuta dafi o le saan mi okyɔɔkyo mgban ngwi o kye ozu nu ama okyaakya la efu di nu ma to mi ofe oka idzidza lu na baa?

²⁶ Dafi ewo ndze yi onodzi ba li ikwukwo ne, li nga oyeye onuunu ndze yi ido ba li ikwukwo aali.

3

Kye ide si

¹ Emi ongwunani, li ema tsatsa ka yɛ etsetse ba, ikyena eyi ama nle tso ne, a ka nghao gbo eyi ikwo fyumfyɛ.

² Eyi duu li boofɛ mi ofe idzidza-dzidza. Kini inggise kye ide si mi odze ogbɔɔgbɔ yo, o myotse, o ka yagba gbekabyi odzeedze mgban kpa.

³ Eyi li kye alijan wo mmya ondu ikye no fwo eyi, ni eyi di yan akye gbɛ.

⁴ Di ambe mi iwudza ongwɛ eni, dafi a she ngwi alewo duu, ka yagba nu inggise ololo dzili, li me ola wo oshishe mgbi inggise duu yi ola ntɔkye udola nani.

⁵ Li nga ngwi ide li alewo ogyengye kpa li kyungwo ama oshewo aali. Di dafi ongwɛ ola ogbambɛ kpa li kye ivu okwukwo gye tukwu ese mani.

⁶ Ide kpa dze dafi ola, li ibwubwe ungwɔ mi alewo duu, ka yagba nu inggise ololo dzili, li me ola wo oshishe mgbi inggise duu yi ola ntɔkye udola nani.

⁷ Inggise li yagba byi ali ito mmbwaba yi ingwuno yi ungwɔ ama okwo ifu ese beyi mmbweni alono duu,

⁸ kpa inggise onyi li ye ide akye gbɛ ba. Li ungwɔ obube ngwi a li yagba siin gbɛ ba, i mbwo yi unka ibwubwe.

⁹ Li mi ide ngwi eyi li tse Otse yi Imgbasho Otseyi, di li mi efu kpa ngwi eyi li wo inggise ama Imgbasho ta mi odzeedze mgban ikamba aali.

¹⁰ Li mi ondu onyi kpɔɔ ngwi otsetse li to mi efu beyi ikamba kpa aali. Emi ongwunani i tishi ni ungwone dze nga ba.

¹¹ Eni osuse yi eni mmwaa ka yagba fe nye ifogbe onyi gbɛɛ?

¹² Emi ongwunani, ekwo andundu ka yagba wa owawa mgbi olumu naa ekwo mntsa ka yagba wa owawa andundu gbɛɛ? Li nga ifogbe mmwaa kpa ka lu eni osuse gbɛ ba aali.

¹³ Li eme mbi ema dze yi ozoyeye yi odifiwi-difiwi? No kye tso ambe mi oshishe mgban osuse, mi okyockyo osuse mi ewo oyile ese nkye mi ikpewo ozoyeye mani.

¹⁴ Nghaduu kini ema dze yi uwaba kpakpa mi itukwu di zofu yo, ka kye tsaabo igge di tangwe otsitsi ba na.

¹⁵ Ito <<Ozoyeye na>> kye esho ba kpaa li mbi inggise owamyɛ di kye mbi onodzi ibwubwe.

¹⁶ Bana imbe ngwi uwaba beyi ali ofu dze yo, o ka di ende yi ali ito ali ibwubwe duu.

¹⁷ Nghaduu ababo yo ozoyeye nkye esho na li nu odze saan, di dze mi iyu yi eka, okye angbeka wuuta, ongyo ola, ombwo yi elela odidi di dze yi ali osuse, otso osadu-sadu ba kpaa otso otsitsi.

¹⁸ Ama ndze yi iyu li kya eto mgbi iyu, di li she eto mgbi osaan.

4

Kye ewema nu Imgbasho

¹ Li alungwo li kye odze oshiishi yi ibe ba idzidze ema? Ungwo ntona kye mi imina nle fu mi itukwu mbi ema na bawɛ?

² Ema li mina ungwɔ kpaa li tuun ba. Ema li gbongwo inggise di di ungwɔ mgbi inggise tanyi, kpaa ema li yagba tu ba. Ema li gbongwe di gblibe. Ema di li tu ungwɔ ema mina ma ba, ikyekye ema bo mbi Imgbasho ba.

³ Ni ema di bo kpaa ema li tu ba, ikyesine ema li bo yi oweka ibwubwe, ikye ni ema ka mbe mi imina mgbi ema.

⁴ Ema emi ama ntona ema ye dafi odze uka yi ese ne li odi Imgbasho tanyi mawɛ? Ali inggise nkwuuka yi ese ne duu, o yɛ ongyikyili mgbi Imgbasho.

⁵ Naadi ema tsewe gbɛɛ Afe lo odze ne mgbanta gbɛɛ, <<Onodzi ngwi Imgbasho kye woke mbi eyi ne li kyo uwaba kpakpaa>>?

⁶ Nghaduu o di eyi elela kpakpa. Li ikyengha Afe gbɛɛ: <<Imgbasho li gbela yi ama okyile ewo esho ba kpaa li kye mse be ama oyile ewo ese duu aali.>>

⁷ Nghane kye ewema nu Imgbasho. Tuwo afo ese yi olodu, ta o ka tse dzata ema.

⁸ Ba kwekwe yi Imgbasho ta ongwɔ kpaa ka ba kwekwe yi ema. Kye oshishe mgbi ema dze saan ema emi ali ibwubwe di salu itukwu mgbi ema, ema ama itukwu dze ema efefa ntoneni.

⁹ Kyelela, makwo di tsukwu na. Kyata isha mgbi ema no yɛ ikwu otseetse, atsa mgbi ema no yɛ mtse obaaba.

¹⁰ Yile ewema ese mi ine Otse Imgbasho, ta o ka kyile ema esho.

¹¹ Emi ongwunani ka gbodze obube ikpewo ewee ba. Ali inggise ngbodze obube naadi fwo ongwunon ikwo yo, o gbodze obube mi ikpewo ola diyɛ fwon ikwo. Ni

ema fwo ola ikwo yo, ema le ngyo ola ba kpaa le fwon ikwo.

¹² Li Imgbasho yuon ta li kye ola nu di gbiikwo, li ongwu yuon dze yi mfyɛ onu owato-wato beyi odzili-dzili. Nghane abu li eme ogbo inggise nwatse do abu ikwo?

Abɔ otsigege ikye egbe ongwɛ ekeka

¹³ Nghane gado na, ema ama nli gbɛɛ, <<Inɛ hona ekeka eyi ka lu ogalu ne naadi ogalu nani, ka kye onova mi ele, ka kyum-mya di tu awuya mani.>>

¹⁴ Ma ema ye dafi oshishe mgbi ema ka dze ekeka ba. Ema dze dafi ombe nli ta mboono ba ta fwo mani.

¹⁵ Seese ema ki li gbɛɛ, <<Ni li oweka mgbi Otse gbɛɛ ni eyi dze oshishe yo, eyi ka kyungwɛɛ hona ungwɔ nani.>>

¹⁶ Nghaduu onene, ema le kyile ewo esho di tsaabo igge. Abɔ otsigege ne li ungwɔ obube.

¹⁷ Nghane ali inggise n ye ungwɔ osuse ngwi o ki kyo kpaa kyon bayo, o kyo obube.

5

A kwo emi awuya ado

¹ Emi awuya gado na, tsukwu di makwo ikye adze okwulewo nkye ka ba ema ese mani.

² Aludu mgbi ema tunkpe, mbalifyɛ di kye ema angwuto gye.

³ Abashi beyi iyudza onzundze mgbi ema kawa teka. Eka na ka kyo obwɛnde obube ikye ema dika gye ema ikpewo dafi ola mani. Nghaduu ema ogbe aludu da mi egbe ongwɛ olele neni.

⁴ Dika! Uda ngwi ema fwa okpa ama nkɔɔ ema ido mi okwo ntona le waakwo mi ikye ema. Akwo mgbi ama oshe eto ntona kaka ado mgbi Otse onghaangha.

⁵ Ema to ese myɛmyɛ dile gye ewema ese. Ema yɛ drudru le fe egbe a ka kye eba do ema onbukwo.

⁶ Ema li ngwo inggise ikwo di gbongwo ama ndze yi obube ba, di kye afo twɛɛ yi ema kpaa ba mani.

Itukwu oshiishi mi adze

⁷ Nghane emi ongwunani, shitukwu ng-hataa ba oyɛɛɛ mgbi Otse na. Di dafi inggise okwo li shitukwu fe mmbwo ongwɛ ababo no kya ni ongwu kye eto kya di fe ongwɛ olele ni ongwu she eto mani.

⁸ Ema kpaa shitukwu diyɛ kwudze kpoklo na, ikyekye oyɛɛɛ mgbi Otse dze kwekwe.

⁹ Emi ongwunani, ka kwu ewema ondukwo ba na, di a wa gbo ema ikwo. Otse ogbiikwo kwudze onufe le feɛɛ aali.

¹⁰ Emi ongwunani, kyɛdo ambe itukwu oshiishi mi adze ogyeegye, mgbi oyegbo ama ngbodze mi iyi mgbi Otse ntonani.

¹¹ Dii, eyi li kye gbɛɛ ama nshitukwu mi adzɛ ogyeegye ma a gbɛ mse. Ema fwo itukwu oshiishi mgbi iJobu diyɛ di dafi Otse wa kyɔ owitukwu mgban mi ongyɛngye mani, Otse mbwo yi elela odiidi, elela di li kyon wo inggise kpaa.

¹² Onghaangha duu yɔ, emi ongwunani ka fa ba na, no li mi esho naadi mi esɛ hona mi ungwɔ oka kpaa. Ni <<Eɛn>> mgbi ema li ɛɛn. <<Ei>> mgbi ema kpaa no li ei, bana ema ka gyobube.

Ibo mgbi oyeyɛ onuunu

¹³ Inggise onyi mbi ema dze yi okakewoo? No bibɔ. Oka mbi ema di dze yi atsaa? Non shashi otseɛtse.

¹⁴ Inggise onyi mbi ema dotsee? Non kwu engyukwo emi iKrestu ela nu ma wa bibɔ won, di gyuon engyie mi iyi mgbi Otse.

¹⁵ Ibo obo mi oyeyɛ onuunu na ka nu inggise ootse yɛɛ saan; Otse ka kyilon. Ki non dze yi alobube kpaa Otse ka dzanta yan.

¹⁶ Nghane, fwi ali ibwubwe mgbi ema nya ewema na, di bibɔ mi ikye ewema ikye ni ema yɛɛ saan. Ibo mgbi inggise osaan li fyumfye di li kyido saan.

¹⁷ Elaija nose li inggise dafi eyi nɛni. O bibɔ mi otsitsi gbɛɛ ni mmbwo ka kya ba ta mmbwo di kya ba mi onova eta dɔ itsitsi.

¹⁸ O diyɛ bibɔ man esho kyummbwo, di nu ungwogye lumbye.

¹⁹ Emi ongwunani kini onyi mi idzidzɛ ema dzata ofɛ mgbi otsitsi ma inggise oka ka yilen yɔ,

²⁰ wɛ gbɛɛ naa: Inggise nkyata inggise obube mi ofɛ mgban nwendɛ na yɔ, o ka dulun tɔ mi ikwongye diyɛ tukwun ofɛ alobube ibyibi.

Afe onzwi ababo mghi iPyita

¹ Afe ne kye mbi iPyita, inggise ogbikye iYesu iKrestu.

Le ke mbi ama Imgbasho sadu ma, ganya kpatse ese dafi iPontu yi iGalatia yi iKapadokia yi Asia beyi iBitinia.

² Imgbasho Otseyi sadu ma tugbe mi oyeeye mgban, di nu Onodzi mgban salu ma yee saan. Nghane, ema su nun a di salu ema mi eyi mghi iYesu iKrestu.

Elela beyi iyu no dze yi ema kpakpa.

*Ewe ogbe byiibyi mghi
oshishe ogyegwu*

³ Tse Imgbasho Otso Otse mghi eyi iYesu iKrestu! Mi elela odiidi mgban odatu o yile eyi mba kaka ewe ogbe byiibyi ogyegwu mi okyile iYesu iKrestu mi ikwongye.

⁴ O di kye okwude nka nyanya naadi mbee hona sila ba dze ema mi esho.

⁵ Ema ngwu a gbe ma to mi mfyemghi Imgbasho ikpewo oyeye onuunu luba owato-wato ngwi a ka kye tso mi ono onzwi olele mani.

⁶ Ni i dze gbee ema ka nye mi iso yi owulewo mi ali imbadi duu mi ongwono gwee ne kpaa, dze yi atsa mi ele saan na.

⁷ Lubana ungwano tone li odi gbee oyeye onuunu mghi ema li otsitsi. Bana abashi nka nyanya ne kpaa a li mbadin mi ola, nghane oyeye onuunu mghi ema nsumse ngha abashi ne kpaa, a ka mbadin ikyegbee no fyumfyem. Ta a ka tse ema di nu ema mume mi egbe ngwi a ka kye iYesu iKrestu tsoto mani.

⁸ Ngwi ema di iYesu ba ne kpaa, o kpa ema itukwu, ngwi ema di din onene ba ne kpaa, ema nun oyeye di mbwo yi atsa yi okwokwo ngwi a ka gbon gbe ba.

⁹ Lubana ema le tu ungwano ndze mi oyeye onuunu mghi ema, owato-wato mghi oshishe mghi ema mani.

¹⁰ Mi odze owato-wato ne, ama ogbeese ama ngbadze elela odiidi nka ba mbi ema na, kyidi yeye yi ewe ogbe byiibyi nnghaangha duu.

¹¹ A le fya odifwi ono yi odzeedze mghi odze ngwi Onodzi mghi iKrestu nwodze mboma na le gbodze adze ogyeegyemghi iKrestu beyi okwokwo nka kyedo mi ono ngwi o gyadze nye mani.

¹² A kye tso ma gbee di a le kyo ewoma ido ba kpaa li abu, a gbo Eso Osuse nya ema mi mfyemghi Onodzi Osaan ngwu a donso kye esho nani. Eso mghi ama na li ikyemghi

ema. Engyeso kpaa i mina ma gbee ama ki kye ine ke ungwano ntoneni.

Dze Saan

¹³ Nghane, kye itukwu mghi ema dzeke mi okyokyo, bwa ewema fyii na, kye ewe ogbe byiibyi mghi ema duu dzeke mi elela ngwi a ka kye nu ema ono ngwi a kawa kye iYesu iKrestu tsoto mani.

¹⁴ Dafi ema li engbe ama onghaado ba ne, ka nu imina ibwubwe ngwi ema dzezan tugbe na kye ema teyi dafi ono ngwi ema to mi ine obuubu na ba.

¹⁵ Kpaa dze saan mi alungwano ngwi ema le kyo duu, dafi inggise nkwo ema ela kpaa dze saan nani.

¹⁶ Lubana a lo gbee, <<Dze saan, ikyesine Ani kpaa le saan.>>^{*}

¹⁷ Ngwi ema li bibo mbi Imgbasho nli fwo ali inggise duu ikwo mi osadu-sadu ba ne, sunu Imgbasho yi imio ngwi ema ka to ese ne dafi ingyoga nani.

¹⁸ Lubana ema ye dafi Imgbasho fife ikye odulu ema to mi oshishe ayayi ngwi ema gyokwudan mbi emi otsikyema mani. Ma ungwano ngwi o kye fife ma, li ungwano ayayi dafi iyudza onzundze hona abashi ba,

¹⁹ kpaa li mi eyi mghi iKrestu nle glododo nani, ongwummala nboya hona tummya ba.

²⁰ Imgbasho tsekise dulun se a wa ta ese, nghaduu a kyon tso mi egbe onzwi olele ne ikyemghi ema.

²¹ Mi ikpewon ema noyeye mbi Imgbasho, ongwano nkyilon mi ikwu di kye okwokwo nun, nghawane oyeye onuunu beyi ewe ogbe byiibyi mghi ema dze mbi Imgbasho.

²² Onene ngwi ema kyi salu ewema saan mi oghela yi otsitsi ikyegbee ni ema dze yi okpitukwu mghi otsitsi ikye engwunema ne, dze yi okpitukwu mbi eka kpini, mi itukwu.

²³ Ikyesine a yile ema mba akpe efa, ema yama li mi eto odzili-dzili na ba, kpaa mi eto odzili ba nani, li mi elodze mghi Imgbasho ndze oshishe di li gyegwu nani.

²⁴ Lubana,
<<Inggise duu to dafi afutse,
okwokwo mghi ama duu di dze dafi
onggangga mghi afutse mi okwo mani,
ni afutse wa ngwo ta ongangga li wulo,
²⁵ nghaduu elodze mghi OTSE dze
gyegwu.>>[†]

Ma li elodze ne ngwi a gbon nya ema aani.

2

¹ Nghane, dule ewema mi okye inggise wo ifu yi okpagyewo duu yi ikpala yi odi

^{*} 1:16 1:16 iLiv 11:44,45; 19:2; 20:7. [†] 1:25 1:25 : Adza 40:6-8.

tanyi beyi ali elodze ibwubwe ogboogbo duu.

² Dafi ongweyeyi ngwu a kwa mba ne, dze yi imina mgbi enaabe onzwi onodzi nle saan, ikye ni ema she mi owato-wato mgbi ema,

³ ngwi ema difwi onene gbee Otse tishi neni.

Ikwutse oshishe yi inggise ngwu a sasadu ma

⁴ Dafi ema ba mbi iYesu nli ikwutse oshishe ngwi inggise fwan ne kpaa, Imgbasho dulun o di kpan itukwu saan.

⁵ Ema kpaa, ngwi ema li ikwutse ndze oshishe ne, a mbe ema kaka ozu onodzi ikye ni ema li eto ama ofife osaan, le fife onzwi onodzi ngwi a gbela yan nye mbi iYesu iKrestu nu Imgbasho.

⁶ Lubana Afe gbee:

<<Dika, Ani kye ikwutse okwulu ikye ozu ngwu ani dula di kpa Ani saan, kye dzeke iDzayon, ali inggise nnun oyeye tayo, a ka nun ayiwi ba.>>

⁷ Nghane mbi ema ama nnoyeye yo, ikwutse ne sunse saan. Nghaduu mbi ama nnoyeye ba ma,

<<Ikwutse ngwi ama ombe ozu fwa ma yee ikwutse okwulu ikye ozu,>>

⁸ beyi,

<<Ikwutse nka nu inggise tsiishi di li ofishi nka nu ma gbese.>>

A tsiishi ikyekye a noyeye mi eso na ba, ungwone dze nga ikyegbee a tsekise kye dzeke ikye ma.

⁹ Nghaduu ema li inggise ngwu Imgbasho sadu ema, emi ongwuuto mgbi ama ofife, ese osaan, inggise ama nli mgbi Imgbasho yeye, ikyegbee ni ema tso otseetse mgbi ongwu nkwi ema ela to mi iifu luba osa mgban okwulewo nani.

¹⁰ Nose ema yama li inggise ba, kpaa onene ema li inggise mgbi Imgbasho, nose ema tu elela odiidi ba, kpaa onene ema tu elela odiidi.

¹¹ Emi okani osuse, n tekye nu ema, dafi ema kye anengye di li ingyoga mi ese ne, dula ewema to mi imina mgbi ungwu ibwubwe, nle gblika yi oshishe mgbi ema nani.

¹² Dze mi ito oshishe osuse na mi idzidze ama ola angwula ikyegbee, nu ma le mwonya be ema gbee ema le kyungwo obube kpaa, a ka di osuse mgbi ema okyockyo di kye okwoko nu Imgbasho mi egbe ngwi o ka ba eyi ese mani.

Okye mmwe nu inggise ama mfye byabo ma

¹³ Siikyenu ali inggise ngwu a kye abuto don ikye mi ikye mgbi Otse Imgbasho: onghaangha duu ongyufa, ngbe inggise duu le teyi nani,

¹⁴ hona emi iGona, ama ngwu o do ma eso gbee nu ma kwo ama nkyo obube ado di nu ama nkyo ali osuse okiyayi ntonani.

¹⁵ Ikyesine li oweka mgbi Imgbasho gbee ni abu le kyo osuse yo, abu yile abo tukwu emi ikwangha ondu mi elodze mgbi ama onbwaa ntonani.

¹⁶ Dze mi ewo osheta na, kpaa ka kye ewo osheta mgbi ema no yee anggwu oge ine kyungwo ibwubwe ba, dze dafi engbido mgbi Imgbasho mani.

¹⁷ Kye mmwe nu ali inggise duu saan na: Di emi ongwunema emi iKrestu kpa ema itukwu, tsio Imgbasho, nu utu mmwe.

¹⁸ Engweyee, gbe agyaagye nu engyukwo mgbi ema yi ali ito oshewo duu, no ka li mbi ama nwaali ngwu a kye ma wuuta ta ba, nghaduu no li mbi ama nwaali ba kpaa.

¹⁹ Lubana Imgbasho ka kye mse be inggise nle gyadze mi itodze ba ikye ongwu mani.

²⁰ Kpaa li ali oyabo ngwi abu ka tu ni abu kyungwo obube se a le nye abu, abu di shitukwu? Nghaduu ni abu gyadze mi ikye ungwu osuse di shitukwu yo, Imgbasho ka kye mse be abu ewo.

²¹ Li ikyengha ngwi Imgbasho kwu abu ela aali, lubana iKrestu gyadze ikye abu, dzata ambe dze abu, gbee ni abu kyedo afokyeeg mgban.

²² <<O kyo obube onyi ba, a di fwon yi onya omwaamwa onyi ba.>>

²³ Ono ngwi a gbe ito tukwun ma, o yile mkpa kpa ma ba, ngwi o gyadze ma, o tongwa ine wo ma ba. Ungwu ngwi o kyo yo, o yile ewon wo ongwu nli gbiikwo mi emyemye na abo.

²⁴ Ongwu abuon gbe ali ibwubwe mgbi eyi tukwu ewo mi ekwatsi, ikyegbee ni eyi nya yi alobube okyockyo di dze oshishe ikye osaan, mi ifwa ngwi a dzan nani ootse mgbi ema ngye.

²⁵ Lubana ema to dafi mmala nganya mani, nghaduu onene ema ye luba mbi inggise ogbe mmala teyi beyi inggise ogbinebyi oshishe mgbi ema.

3

Engyaa yi emi obama

¹ Engyaa, mi ito ofe na kpoo siikyenu obeema na ikyegbee, ni a wa noyeye mi elodze Imgbasho wuba kpaa, okyockyo mgbi ema ka ye kyata ma luba mbi Imgbasho shilididi,

² nu ma di osaan beyi osu-su nu Imgbasho mi oshishe mbi ema yo.

³ INgwinda mgbi ema no ka li mgbi ikpewo, dafi otu odzile-dzile yi tagwude ngwi a me mi abashi beyi angwuto ama osuse ba.

⁴ Tatase, no li ungwō nwodze mi idzidze mbi abu nani, ingwinda mgbi onodzi obwa fyii di dze shilididi nli sila ba, ngwi li ungwō olele efu ba mbi Imgbasho nani.

⁵ Lubana li ito ofe ngwi engyaa ama nle saan nkye ewe ogbe byiibyi mgbi ama dze mbi Imgbasho tugbe li me ingwinda mgbi ama aali. A li siikyenu emi obama,

⁶ dafi iSara, ngwu siikyenu Abrahan di li kwun di otungwude nani. Ema li emi ongwān emi engyaa ni ema le kyungwō nli ayin yi imio ewo bayo.

⁷ Ebengyaa, ema kpaa mi ito ofe ne, nu oweema mmwe dafi a fyumfye ba ne kpaa, a li ama ngwokwude mgbi oshishe ofufe mi elela neni, ikye ni unkonyi ka tukwu ofe ibo mgbi ema ba.

Ogyadze mi ikye ungwō osuse okyōkyō

⁸ Ongyeengye yō, ema duu dze mi ogbela-gbela yi ewema, di ewema elela, di eka kpa eka itukwu, dze yi itukwu osuse di yile ewo ese nu ewema.

⁹ Ka yama kye ungwō obube kpa inggise mkpa yi ungwō obube ba naadi ito ofya-fya mi ito ofya-fya ba, kpaa, kpa yi mse, ikyekye li ikye ungwōne ngwi a kwu abu ela gbēe ni abu gyokwude mse aani.

¹⁰ Lubana, <<Ali inggise nmina odi oshishe kpan itukwu di di egbe osuse yō, ka bwa ide mgban fyii mi ogbōdze ibwubwe di bwa ondu mgban mi odulu elodze atsika.

¹¹ Li kyeme ngwi o ka kyata mi ungwō ibwubwe ye kyō osuse, li kyeme ngwi o ka mina iyu di kyedō mi ele.

¹² Lubana ine mgbi Otse byidze mbi ama osaan,
adō mgban di lasisa ofwo ma ibo,
Otse li gbela yi ama okyungwō ibwubwe ba.>>

¹³ Li eme ka kyō abu ungwō obube ni abu dze yi oweka okyungwō osuse?

¹⁴ Kpaa kini abu le gyadze mi ungwō nli ayin kpaa, mse be abu ewo. <<Ka yama tsio ungwō ngwi a le tsio ma ba, eyi no ka ta abu ba.>>

¹⁵ Nghaduu kye iKrestu saan mi itukwu mgbi ema gbēe o li Otse. Wewo onu ali inggise nbyi ema ita uka mi itōdze mgbi ewe ogbe byiibyi mgbi ema alonō duu. Nghaduu kyungwōne mi ofe iyu beyi mmwe,

¹⁶ itukwu mgbi ema no gbosa, adzi ni ama nli gbōdze ibwubwe mi ikye ali mgbi ema osuse ikye iKrestu ma gyayiwi mi iyi ngwi a le mbe ema ele nani.

¹⁷ I tatase, no li oweka mgbi Imgbasho gbēe, ni abu gyadze mi okyō osuse nga okyō obube.

¹⁸ Lubana iKrestu kwulu ikye ali ibwubwe akponyi ta, inggise osaan kwulu ikye emi ibwubwe, ikye oyile ma ba mbi Imgbasho. A ngwōn mi ikpewo kpaa a non dze oshishe mi Onodzi.

¹⁹ Li mi ofe na ngwi o ke ka gbeeso nya onodzi ama ngghaadō tugbe ngwi a gbe ma woto obawi

²⁰ ngwi Imgbasho shitukwu onō ngwi iNua kpa uwaa nani. Mi efu inggise gwee, duudu yō li egyata ta, wato mi ikwu eni.

²¹ Ma eni ne tso ambē iBatisima ndulu ema tō onene neni, nghaduu yama li osa mmbyi mi ewo ba kpaa li mi ondu odzēdze mgbi itukwu osaan mbi Imgbasho. I nagbe abu mi okyē-kyē mgbi iYesu iKrestu,

²² nlu esho di sōdze abugye mgbi Imgbasho, ngwu engyesō, mfye beyi enepē duu byidze abōn nani.

4

Odze oshishe ikye Imgbasho

¹ iKrestu gyadze mi ewo mgban. Nghane ema kpaa wewo ogyadze kyeme dafi ongwō kpaa gye nani, ikyekye adze ogyeegye tso gbēe ema nya yi ali ibwubwe okyōkyō.

² Ikyenghane, ka yama dze mi itō oshishe mgbi ese ne mi imina ibwubwe mgbi inggise owamyē ba, kpaa dze mi oweka mgbi Imgbasho.

³ Lubana ema mbe onō kpakpa mi iyikpa ole kyungwō ngwi ama oye Imgbasho ba le kyō mani, ema woto mi ayayi oshishe yi imina mgbi amah yi ēbye owaawa yi oyē klakla ikye okyungwō obube beyi owa ēbye yē tototo di sunu adagye ngwi li ungwō nta Imgbasho anyi.

⁴ Li su ma unō gbēe di ema wōdze ats yi ama okyō oshishe ikwangha ntona yi ama wuba ba, man a li gbe ito le tukwu ema ewo.

⁵ Nghaduu a kawa nu uka mbi ongwō nka gbō emi oshishe beyi emi ikwukwō ikwō dzikan-dzikan nani.

⁶ Ikyesine li itōdze ne ngwi a gbeeso nya emi ikwukwō kpaa aali, ngwi a kwulu dafi inggise li kwulu ne kpaa, onene a dze oshishe mi onodzi yi Imgbasho gyegwu.

⁷ Ongyeengye mgbi alungwō duu dze kwekwe. Nghane itukwu mgbi ema no gbosa, di bwa ewee fyii ikye ni ema bibo.

⁸ Onghaangha duu yō, kpa ewema itukwu kpakpa, ikyekye okpitukwu li tukwu alobube ibyibyi.

⁹ Gbe ewema yi ondukwō okwu-kwu ba.

¹⁰ Ali inggise no kyō oyabo yi umba ngwi a nun mani ikye oya angbeka abō, mi okyidō

mgbi elela mgbi Imgbasho ne saan mi ali ofe duu.

¹¹ Ali inggise nle gbodze duu, no gbo dafi inggise nle gbo elodze Imgbasho yeye mani. Ali inggise nle kyido yo, no kyo yi mfye ngwi Imgbasho nun mani, Ikye ni a tse Imgbasho mi alungwo duu ikpewo iYesu iKrestu. Okwokwo yi mfye no dze mbon nghataa gyegwu. No dze ngha.

*Adze ogye gbæ di abu li
inggise iKrestu*

¹² Emi okani osuse, no ka kwulu ema ewo mi imbadi owulewo ngwi ema le nye ele ne ba, ngwi dze dafi ungwo oka idzida le kyo ema neni.

¹³ Nghaduu dze yi atsa gbæ di ema wodze mi adze ogyeegye mgbi iKrestu, ikye ni abu wa dze yi atsa oshewo ono ngwi a ka kye okwokwo mgban tso mani.

¹⁴ Kini a fya abu ito mi ikye iyi mgbi iKrestu yo, mse be abu ewo, lubana Onodzi mgbi okwokwo beyi mgbi Imgbasho dze mbi ema.

¹⁵ Ni ema gyadze yo, no ka dze dafi mgbi inggise ongwō inggise naadi emunyi naadi ama okyo ali ibwubwe angbeka hona inggise ogbe abo sha odze mgbi inggise angbeka ba.

¹⁶ Nghaduu, ni abu le gyadze dafi inggise iKrestu yo, ka yama kwayiwi ba, kpaa tse Imgbasho ikyekye abu dze yi iyi nani.

¹⁷ Lubana ono gyo ngwi ikwo ka wita yi eto mgbi Imgbasho wa, ma ni i wita yi eyi wali, ama nfwā osunu mi Eso Osuse mgbi Imgbasho ntona, mgbi ama ma kawa dze sine?

¹⁸ Ma, <<Ni i fyumfye ni inggise ama osuse wato ma, ama ongha Imgbasho ado beyi emi ali ibwubwe ma ka dze sine loma? >>

¹⁹ Ikyenghane, ama nle gyadze mi oweka mgbi Imgbasho ma nu ma kye ewoma wo ongye ngwu ta ma na abo di kiyayi okyo osuse.

5

Mbi engyukwo beyi mmafa

¹ Ema ama ogbe inggise teyi mi okwakye mgbi emi iKrestu, n le lo afe ikye okwu ema ewe wo. Ani kpaa li inggise ogbe inggise teyi, di li obwendē mi adze ogyeegye mgbi iKrestu, dika wodze mi okwokwo mgban ono ngwi a kawa kye tso eyi mani.

² Ngyo ifyungwo mgbi Imgbasho nto abo mgbi ema nani, gbinebyi ma itukwu asisa, ka kyo dafi a le si abu siisi ba. Ka kyo ikye ungwo ngwi abu ka tu mi ele ma ba, nghaduu kyo ikyegbæ di abu dze yi imina okyo Imgbasho ido.

³ Ka kye okye egyegye do ama ngwu a gbe wo abu abo ntonē ba, kpaa tso ma ambæ osuse mgbi abu.

⁴ Ono ngwi ikye mgbi ama ongyo ifyungwo wa ba yo, abu ka gbæ okpapyi okwokwo nka sila ba nani.

⁵ Mi ito ofe na kpoo, ema mmafa, siikyenu ama nli engyukwo ema mani. Ema duu, yile ewo ese nu ewema ikyekye, <<Imgbasho li gbela yi ama okyile ewo esho ba,

kpaa li kyumse yi ama oyile ewo ese.>>

⁶ Ikyenghane yile ewema ese, mi iwulu abo odatu mgbi Imgbasho, gyo ngwi o ka kyile ema esho ni ono wa gyo yo.

⁷ Gbe okakewo mgbi ema duu don ubo ikyekye li ongwu li gbinebyi ema.

⁸ Gbewedze ngyo ewema di kwasisa. Ongyikyili mgbi ema olodu, dze dafi ugaba nle tsagwudu mani, le pita inggise ni ongwu tangha.

⁹ Fwa ikwangha yan, kwulese kpokloo mi oyeye onuunu, lubana ema ye dafi emi ongwunema mi ese duu le nye mi ito adze ntonē mani.

¹⁰ Ma Imgbasho mgbi elela duu, nkwo ema ela ba okwokwo mgban ogyegwu ndze yi odondu ba mbi iKrestu na, ongwu abuon ka yile abu kwitse di nu abu fyumfye di nu abu kwudze kpokloo, ni abu gyadze ongwono gwee nye yo.

¹¹ Mfye no dze mbon gyegwu gyegwu. No dze ngha.

Angba olele

¹² Yi abo oyaaya mgbi iSaila ngwu ani kyon wuuta gbæ o li inggise iKrestu oyeye na, n lo ongye afe na ke mbi ema, le kwu ema ewe wo dile kyo obwendē gbæ nene li elela mgbi Imgbasho otsitsi. Kwudze mi ele fyumfye.

¹³ Okwakye mgbi emi iKrestu ongwu iBabylon mgbi Imgbasho sadun ungwonyi yi ema na, dso angba mbi ema. Ongwani iMaki kpaa dso angba.

¹⁴ Ta ewema angba tsækwulu eka otso okpitukwu. Iyu no dze yi ema ama ndze mbi iKrestu duu. No dze ngha.

Afɛ ongwu fan mgbi iPyita

Angba otaata

¹ Afɛ nɛ kye mbi ani iSaimon iPyita, ong-bido yi inggise ogbikye iYesu iKrestu,

Le kɛ mbi ama ngwu a kye oyeye onuunu nkwo dafi mgbi eyi nɛ mi osaan mgbi Imgbasho mgbi eyi yi ongye Onagbɛ iYesu iKrestu nu ma nani gbɛ:

² Elela yi iyu mgbi Imgbasho bɛyi mgbi iYesu Otse mgbi eyi no dɛ yi ema dzii dafi ema le she mi ozoyeye mgbi Imgbasho neni.

Onu ela okwuukwu yi osadu-sadu mgbi eyi yɛ otsitsi

³ Eyi tu alungwo ngwi eyi mina duu ikye odɛ mi oshishe nkpa Imgbasho. Eyi tu ungwɔ ntone duu mi mfye mgbi Imgbasho, onɔ ngwi eyi wa difwi gbɛ, o bɔ eyi gbɛ ni eyi wa kaka mi okwɔkwɔ mgban yi ali osuse nani.

⁴ Mi ofɛ nɛ o kye angbodzi ondu odɛɛdɛ ama nsumse nu eyi, ikyegbɛ ni ema dɛ mi odɛɛdɛ mgbi atta mgbi Imgbasho di tase mi ombeembee mgbi ɛɛ ngwi imina mgbi ali ibwubwe li ba yan nani.

⁵ Mi itɔdɛ nɛ nɛ, fya mi ofyaafya mgbi ema duu ni ema mbwo mse okyɔkyɔ mi oyeye onuunu mgbi ema, di kye ozoyeye beke yi mse okyɔkyɔ,

⁶ di kye obwa ewema fyii beke yi ozoyeye, di kye ogbili-gbili beke yi obwa ewema fyii, di kye odɛɛdɛ mgbi Imgbasho beke yi ogbili-gbili,

⁷ di kye mse mgbi ongwuneka beke yi odɛɛdɛ mgbi Imgbasho, diye kye okpitukwu beke yi mse mgbi ongwuneka nani.

⁸ Lubana ni ema kiyayi oshe mi ito ofɛ nɛ yɔ, ka tso gbɛ ungwɔ ngwi ema ye mi odɛ mgbi Otse mgbi eyi iYesu iKrestu nɛ, nu oshishe mgbi ema dɛ yi oyabo di dɛ mi itɔdɛ kpaa.

⁹ Nghaduu inggise ndɛ yi ambɛ ntone bayo, o li di puu di binɛ, di gblimo gbɛ a kye ongwu kyɛ salu mi ali ibwubwe mgban ogbugbe.

¹⁰ Nghane, emi ongwunani, kwunewo kpakpa ni ema nu ela ngwi a kwu ema beyi osadu-sadu ngwi a sadu ema nɛ yɛ otsitsi. Ikyekye ni ema kyungwo ntone yɔ, ema ka gbɛɛ ba,

¹¹ a dika kyo ema onɔ saan kaka esuto ogyegwu mgbi Otse mgbi eyi yi ongye Onagbɛ iYesu iKrestu nani.

Okye itukwu nu mi Ibyibiyi

¹² Nghane ngwi ema teyi ye ma di kye afɔ kwulesɛ saan mi otsitsi ngwi a tso ema nɛ kpaa, n kale we ema ungwɔ ntone alono duu.

¹³ Dɛ ani gbɛ li ayin ni ani le we ema odɛ neni ngwi ani ka dɛ oshishe nɛ tayo,

¹⁴ ikyekye ani ye gbɛ ani ka kwulu dzikan-dzikan, dafi Otse mgbi eyi iYesu iKrestu nya ani saan mani.

¹⁵ N dika fya mi ofyaafya mgbi ani odi gbɛ ni ani wa kwulu kpaa, ema ka yagba ole we ungwɔ ntone duu.

¹⁶ Onɔ ngwi eyi nya ema odɛ mfye bɛyi obaaba mgbi Otse mgbi eyi iYesu iKrestu ma, eyi yama kyedɔ mi utsa ngwi a du-du ba, kpaa eyi li obwendɛ inɛ-inɛ mi okwɔkwɔ oshewo mgban.

¹⁷ Lubana o gbɛ mmwe yi okwɔkwɔ mbi Imgbasho Otson mi onɔ ngwi ela kye mi okwɔkwɔ oshewo ba mbon gbɛ, <<Nɛnɛ li ongwani, o kpa ani itukwu, ani dɛ yi atsa biyan saan mani.>>

¹⁸ Eyi abueyi fwo ela nkyɛ esho ba nɛ mi onɔ ngwi eyi dɛyan mi unggwo Osaan nani.

¹⁹ Ungwo ntone duu nu eyi nghao noyeye mi elodɛ mgbi ama ogbɛɛɛ, ema dika kyo ayin ni ema gadɔ mi ele yɔ. Lubana elodɛ mgbi ama dɛ dafi ola nle gbɛ mi imbe iifu mani, nghataa ikyegbe adzi ni osa mgbi oshebe iKrestu gbɛ mi itukwu mgbi ema.

²⁰ Onghaangha duu, li kyemɛ ni ema difwi gbɛ elodɛ mgbi ama ogbɛɛɛ mi Afɛ kye mi odifwi-difwi mgbi ama ba.

²¹ Ikyesinɛ elodɛ ongye ogbɛɛɛ tiita mi oweka mgbi inggise owamɛ ba, kpaa inggise le gbɛɛɛ mgbi Imgbasho dafi Onodzi Osaan kye ma teyi mani.

2

Etsetse emi atsika beyi odzili-dzili mgbi ama

¹ Nghaduu ama ogbɛɛɛɛ atsika kpaa nose woto idzidɛ inggise ntonani, yeye dafi etsetse atsika kawa wo idzidɛ ema mani. A ka kye otsootso odzili-dzili ba ɛɛ daada, di tangwe Otse ngwu gya ma ma kpaa diye dzili ewoma tsoi.

² Inggise ibiyibi kya kyedɔ ofɛ ayiwi mgbi ama dika nu inggise kwu ofɛ otsitsi fyito.

³ Mi nggwɔ okyɔkyɔ mgbi etsetse ntone, a ka kye ema yɛ ungwɔ okyummɛ. A teyi ngwɔ ma ikwɔ le fɛfɛ, odzili-dzili mgbi ama kpaa dika mboono ba dududu.

⁴ Lubana Imgbasho di engyɛɛ elela ba mi onɔ ngwi a kyo obube ma, kpaa gbɛ ma kwuoke udola, gbɛ ma woke ikplishe le fɛ egbe ikwɔ.

⁵ O diye di emi tugbe elela mi onɔ ngwi o nu eni tayo mbi ama n ye Imgbasho

ba, kpaa dulu iNua, inggise ogbeeso mgbi osaan, beyi angbeka nghi egyafa.

⁶ O di dzili ogalu iSodon yi iGomora mi okye ma toola yee uto, di nu ma yee ambe ungwō nkawa kyo ama n ye Imgbasho ba mani.

⁷ O di dulu iLoti inggise nle saan, le gyadzē mi idzidzē inggise ama n ye ola ba le kyo amah idza

⁸ (bana inggise osaan na, wodzē idzidzē ma alegbe-alegbe, le gbiso mi ali ibwubwe ngwi o le di diye fwo mani).

⁹ Dafi ungwōnē dze nḡa nē, Otse ye dafi ongwu ka dulu ama onoyeye mi imbadi di kwo emi ali ibwubwe ado ngwi a kale fē egbe ikwō neni.

¹⁰ Onghaangha duu, mbi ama nli kyedō imina mgbi ali ibwubwe mgbi atta di fwa mfye mgbi Imgbasho mani.

A dze yi abo otsigēge di li kyile ewo esho, a li mio ofya mfye ama okwulewo mi esho kpaa ito ba.

¹¹ Nghane engyeso abuoma dafi a nḡhao dze yi enepē di fyumfye kpakpa nē kpaa, a li fya mfye ntona ito mi inai Otse ba.

¹² Nghaduu inggise ntone li fyito mi odzē ngwi a ye itan ba. A dze dafi mmbwaba ama ndzē yi ozoyeye ba mani, ama ndzē oshishe mi imina mgbi ama, ngwi a mba ma ikye okwu ma ta ngwō, ama kpaa a ka dzili ma dafi mmbwaba ntonani.

¹³ A kawa yile obube kpa ma ikye obube ngwi a teyi kyo mani. Li kpa ma okyungwō obube mi onō gedē-gedē. A li emi idza, ungwō ayiwi li kpa ma, ngwi a li gye ungwogye yi ema nē kpaa.

¹⁴ Amah mbwo ma inē, a li nya yi ungwō obube okyōkyō ba, a li nu inggise ama ndzē glagla gbese mi amah, a bē mi nggwō okyōkyō, a li eto ngwi a wo ma ikamba!

¹⁵ A teyi dzata ofe nbyi klididi mani ye kyedō ofe mgbi iBalan ongwē iBēo, ngwi umba otu mi alobube okyōkyō li kpa ma nani.

¹⁶ Nghaduu Itaklimyi kyōkyō yan mi ungwō ngwi o le kyo ayin ba nani, mmbwaba ndzē yi elodzē ba, gbodzē yi ela inggise di kyōkyō odzē ede yi inggise ogbeese.

¹⁷ Inggise ntone li ibuga ama ndzē yi eni ba beyi akpesho ntseto ngwi awo ganyan. A kye imbe n yifu kpini-kpini dze ma.

¹⁸ A li gbō elodzē okyile ewo esho beyi elodzē ikwangha, di kye imina mgbi ese kya ama nkwa le fya owato mi idzidzē inggise nto mi ende ma ukya.

¹⁹ A zondū oshē ma adi ta, ngwi ama abuoma li ofyēē mgbi odzili-dzili neni. Ikyesine inggise li ofyēē mgbi alungwō ngyuto mbon duu.

²⁰ Ni a dzidzē tō mi idza mgbi ese nē mi oye Otse mgbi eyi beyi Onagbē iYēsu iKrestu diye gbukoē efu yēē ofyēē ali ibwubwe yō,

ongyēengyē mgbi ama ka timbi nḡha owita-wita.

²¹ Kika tatase loma nu ma ki ye ofe mgbi osaan ba, nḡha onu ma ye di fashi iyikpa tse ola osaan ngwi a kye nu ma nani.

²² Nghane, a tso otsitsi mgbi itodzē ngbēē: <<Obwe yile akpa mgbān gye, Obyia ngwi a shon ewo yē lu ka myini mi amwa.>>

3

Egbe oyēēye mgbi Otse

¹ Emi okani osuse, nēnē li afe mgbi ani ongwu fan ngwi ani lō kē mbi ema aani. N lō ma nḡhi efa duu ikye owē ema, kyile ema itukwu esho ikye ni ema le wē di dze mi ēwē otsetse ingblimo.

² I mina ani gbēē ni ema wē odzē ogbugbe ngwi ama ogbeese ama osaan gbō mani beyi ola ngwi Otse mgbi eyi yi Onagbē kye nu ema nye mbi emidema ama ogbikyē iYēsu ntonani.

³ Ababō yō, ema ka difwi kyemē gbēē mi egbe ongwī olele ama otangwē iYēsu ka ba, le kyedō ofe ibwubwe mgbi ama.

⁴ Dile gbēē, <<Ondu ngwi o dze gbēē ongwu ka ye ma kō? Lubana kye onō ngwi emi otseyi kwulu mani, alungwō duu kale kiyayi dafi i teyi dze mi owita-wita ngwi a ta ese mani.>>

⁵ A gblimo mi oshu gbēē tugbe Imgbasho ta esho mi elodzē mgbān di ta ikpese mi ikpewo eni di kye mi eni.

⁶ Li mi eni ntonē kpaa ngwi eni tayo, di dzili ese tugbe aali.

⁷ Li mi elodzē na kpōō, ngwi Imgbasho kye esho yi ese ongwī onenē dze le fē ola, ngwi o kye dzake ikye egbe ikwō beyi odzili-dzili mgbi emi ali ibwubwe aani.

⁸ Nghaduu ka gblimo odzē onyi nē ba na, emi okani mgbi itukwu-itukwu: Mbi Otse Imgbasho egbe onyi dze dafi onova idubu onyi, onova idubu onyi di dze dafi egbe onyi mani.

⁹ Otse le dumō ombwo ondu odzēedzē mgbān dafi inggise angbeka tsewe gbēē o dze na ba. O li kwu onyotse yi ema, o mina gbēē inggise onyi kpaa no dzili ba, kpaa ali inggise duu no kaka mi itukwu okyata-kyata.

¹⁰ Nghaduu egbe mgbi Otse oyēēye ka ba bwabwa dafi emunyi mani. Esho ka tsagwudu kpakpa di nye, a dika dzili ungwō ama nto ele yi ola, man ese yi ungwō ama nle kyo mi ele duu a ka kye dēese.

¹¹ Ngwi i dze gbēē a ka dzili alungwō duu mi ito ofe nē nē, li ali ito inggise ngwi i wo gbēē ema ka dze? I wo gbēē ema ka dze mi oshishe nle saan beyi oshishe inggise Imgbasho

¹² dafi eyi kyinebyi egbe mgbi Imgbasho gbēē no ba plē-plē neni. Egbe na ka ba yi

odzili-dzili mgbi esho mi ola, ungwɔ ama nto ele tsatsa dika yile mi olola.

¹³ Nghaduu ogbewebyi mi ondu odzeedze mgban yɔ, eyi gbinebyi esho yi ese ofufe, ude mgbi osaan.

¹⁴ Nghane, emi okani osuse, ngwi i yee gbɛɛ ema gbinebyi iyayi ikye ungwɔne ne, fya mi ofyaafya mgbi ema duu nu ma ka tu ema boya ewo ba, yi obube ba di dze mi iyu biyan.

¹⁵ Di we gbɛɛ onyɔtse okwu-kwu mgbi Otse mgbi eyi li ikye onu inggise onɔ gbɛɛ nu ma tu owato-wato, yeye dafi ongwuneyi itukwu-tukwu iPol kpaa lo ema afe mi ozoyeye ngwi Imgbasho kye nun nani.

¹⁶ O lo afe mgban duu ungwonyi, le gbɔdze mi ele mi itɔdze ntoneni. Ungwɔ to mi afe mgban nfyumfye odifwi-difwi, ngwi emi mnana beyi ama owɔɔwo li gbɔn ayin ba, dafi a li kyo mi Afe elodze Imgbasho angbeka, odzili ewoma mani.

¹⁷ Nghane, emi okani ingblimo, dafi ema tsekise ye ungwɔne ne, kwasisa na ikye ni ama n ye ola ba ntona ka kye ema woke ende di dzata okwu-kwu ngwi ema kwu fyii na ba.

¹⁸ Nghaduu she mi elela beyi ozoyeye mgbi Otse mgbi eyi yi Onagbe iYesu iKrestu. Okwɔkwɔ no dze biyan onene nghataa gyegwu! No dze ngha.

Afe ongwi ababo mgbi ijon

Elodze oshishe

¹ Ungwo ndze mi owita-wita, ngwi eyi fwon, ye din mi ine mgbi eyi, di kyidin, ngwi abo mgbi eyi kpaa gbon ma, li Elodze Oshishe ongwu eyi le tso odzan aani.

² Oshishe na tsoto; eyi dun di kyo obwende ikyon, eyi di gbodze oshishe igyegwu nya ema, ongwu nteyi dze yi Otsan di kye ewon tsoto mbi eyi nani.

³ Eyi gbo nya ema ungwo ngwi eyi teyi di diye fwo, ikyegbe ni ema kpaa kwakye yi eyi. Ma okwakye mgbi eyi li okwakye yi Otseyi Imgbasho beyi Ongwan iYesu iKrestu.

⁴ Eyi lo ungwone ikye onu atsa mgbi eyi mbwumbwo.

Imgbasho li osa

⁵ Nene li eso ngwi eyi fwo mbon di gbo nya ema mani gbee: Imgbasho li osa; mbon iifu dzema ba dududu.

⁶ Ni eyi kye gbee eyi dze mi okwakye yan kpaa le kyikye mi iifu yo, eyi mwonya dile kyo mi otsitsi ba.

⁷ Kpaa ni eyi kyikye mi osa dafi ongwu dze mi osa ne yo, eyi dze mi okwakye yi eka, eyi mgbi iYesu Ongwan, di kyi salu eyi saan mi ali ibwubwe mgbi eyi duu.

⁸ Ni eyi gbee di eyi kyo alobube bayo, eyi kpagya eweyi wo, otsitsi na di dze mbi eyi ba.

⁹ Kini eyi fwi ali ibwubwe mgbi eyi nya Imgbasho yo, o ka mbwo ondu odzeedze mban di kyo mi efu, o ka dzita eyi di kyi salu eyi saan mi ali ibwubwe mgbi eyi duu.

¹⁰ Kini eyi gbee eyi kyo alobube bayo, eyi nu Imgbasho ye ongye omwonya, elodze mban kpaa gyuto mi oshishe mbi eyi ba.

2

IYesu ongye oya eyi abo

¹ Emi ongwani, ani lo ungwone ke mbi ema ikyegbe ni ema ka kyo alobube ba. Kpaa kini inggise kyo alobube yo, eyi dze yi inggise nli gbodze yi Otseyi Imgbasho mi ikye eyi; iYesu iKrestu, nle saan nani.

² Li ongwu a kyon fife ikye ali ibwubwe mgbi eyi, ma li mi ikye mgbi eyi ta ba kpaa mi ikye ali ibwubwe mgbi inggise mi ese duu.

³ Ni eyi ngyo ola mban yo, i tso gbee eyi yon wa.

⁴ Inggise ngbee, <<Ani yon,>> kpaa kyo mi ola ngwi o wo bayo, li inggise omwonya, otsitsi kpaa di dze mbon ba.

⁵ Nghaduu ali inggise nkya mi elodze mban yo, i tso gbee okpitukwu mgbi Imgbasho tsoto mbon saan. Li ito ofe oye gbee eyi dze mbon aali.

⁶ Nghané inggise nkye gbee ongwu dze mbi Imgbasho yo, li kyeme no kye afokyee mgbi iYesu.

⁷ Emi okani osuse, ani le lo ema ola ofufe ba kpaa li ogbugbe ongwi ema tsekise dzevan mi owita-wita nani. Ola ogbugbe ne li eso ngwi ema teyi fwo mani.

⁸ Nghaduu ani le lo ema ola ofufe; a di otsitsi mban mbi iYesu yi mbi ema kpaa. Lubana iifu le nye, osa otsitsi na dile tso kpaa wa.

⁹ Ali inggise nkye gbee ongwu dze mi osa kpaa di ongwunon tanyi yo, o ka dze mi iyifu kpoo.

¹⁰ Ali inggise ndi ongwunon kpan itukwu yo dze mi osa, ungwo onyi dze mbon nka non tsiishi wuba.

¹¹ Kpaa ali inggise ndi ongwunon tanyi yo, dze mi iifu dile kyikye mi iifu; o ye imbe ngwi o le ke ba, ikyesine iifu bulun ine.

¹² Ani lo ke mbi ema, emi ongwani, ikyeye a kye ali ibwubwe mgbi ema ta ema mkpa mi ikye iyi mban.

¹³ N le lo ke mbi ema, emi otsani, ikyesine ema teyi ye ongwu ndze mi owita-wita nani.

N le lo ke mbi ema, engwengyulo mmafa, ikyeye ema nga Inggise Obube na wa.

Ani le lo ke mbi ema, engbe ama okpa ani itukwu, ikyeye ema teyi ye Otseyi nani.

¹⁴ N le lo ke mbi ema, emi otsani, ikyeye ema teyi ye ongwu ndze mi owita-wita nani.

N le lo ke mbi ema, engwengyulo mmafa, ikyesine ema fyumfyewo, elodzimgbasho di wodze mbi ema, ema di nga Inggise Obube na wa.

Ka di ese ne kpa abu itukwu ba

¹⁵ Ka di ese kpa abu itukwu hona ungwo onyi mi ese ba. Ni inggise ta di ese ne kpan itukwu yo, okpitukwu mgbi Otseyi Imgbasho dze mbon ba.

¹⁶ Lubana alungwo mi ese duu; kye mi imina mgbi ali ibwubwe yi odi ungwo mina, beyi otsabo igege mi ungwo. Ungwo ntone duu, onyi kpaa kye mbi Otseyi ba, kpaa li ungwo ongwi ese neni.

¹⁷ Ese yi imina mban ka nye, nghaduu inggise nkya itukwu Imgbasho ka dze oshishe gyegwu.

Engyikyili mgbi iKrestu

¹⁸ Engbe ama okpa ani itukwu, onene egbe ongwi olele dze kwekwe. Dafi ema teyi fwo gbee engyikyili mgbi iKrestu na kawa ba ma, onene kpaa engyikyili mgbi iKrestu

ntona gbeka bato wa. Li ngha ngwi eyi ye gbɛɛ egbe ongwɔ olele dze kwɛkwɛ aali.

¹⁹ Inggise ntone tase mbi eyi, kpaa a li mgbi eyi yeye ba. Ikyekye ni a ki li mgbi eyi yo, a kika tila dze yi eyi; nghaduu oluulu mgbi ama tso gbɛɛ onyi mboma kpaa li mgbi eyi ba.

²⁰ Nghaduu iKrestu kye Onodzi Osaan mgban na nu ema, ikyenghane ema duu ye otsitsi.

²¹ Ani lo ke mbi ema li ikyegbɛɛ di ema ye otsitsi ba ba, kpaa li ikyegbɛɛ di ema ye, ema di ye gbɛɛ atsika onyi kpaa li to mbi otsitsi ba.

²² Li emɛ li inggise omwonya? Li inggise ntangwe gbɛɛ iYesu li iMedzaya ba mani. Ito inggise na li ongyikyili mgbi iKrestu; o tangwe Otsongwe yi Ongwe.

²³ Lubana ali inggise nfwa Ongwe duu fwa Otsɔn kpaa. Nghaduu inggise ngbela Ongwe yo, o dze yi Otsɔn kpaa.

²⁴ Kiyayi otsewe mi esɔ ngwi ema fwo mi owita-wita nani. Ni ema kyo mi ele yo, ema kpaa ka dze mbi Ongwe beyi Otsɔn.

²⁵ iKrestu abuon nli Ongwe na di zonu okye oshishe ogyegwu nu eyi.

²⁶ Ani le lo ungwɔ ntone mbi ema okwo ema adɔ ikye ama nle fya okye ema boofɛ ntonani.

²⁷ Kpaa mbi ema yo, iKrestu kye Onodzi mgban nu ema dzi. Ngwi Onodzi mgban ka dze mbi ema ne, ema mina otsetse oka wuba. Lubana Onodzi mgban le tso ema alungwo duu ma ungwɔ ngwi o le tso ma, li otsitsi dze yi ikpaaflo ba. Nghane dze mbon yeye dafi Onodzi na tso ema mani.

Emi ongwɛ Imgbasho

²⁸ Onene, emi ongwani, kiyayi odze mbon na, ikyegbɛɛ onɔ ngwi o wa mblegba yo, eyi ka dze yi abɔ otsigege, di ka kwayiwi mi oyɛɛɛ mgban ba.

²⁹ Kini ema ye gbɛɛ o le saan yo, ye na ta gbɛɛ ali inggise nkyungwo nli ayin duu li ongwɛ Imgbasho.

3

¹ Di ito okpitukwu ngwi Otseyi Imgbasho di eyi kpan itukwu neni. Okpitukwu mgban shewo jo o nu ma kwu eyi di emi ongwani! Ma eyi di dze ngha mi otsitsi. Itɔdɛ ngwi inggise emi esɛ ne ye eyi ba ma, li ikyegbɛɛ a yama ye Imgbasho ba.

² Emi okani okpa ani itukwu, onene eyi li engwɛ Imgbasho, ma ungwɔ ngwi eyi kawa dze ma, eyi ye waba. Kpaa eyi ye ta gbɛɛ onɔ ngwi iYesu wa ye yo, eyi ka dze dafi ongwu mani, lubana eyi ka din dafi o dze ma yeye.

³ Ali inggise ndze yi ito ewe ogbebyi ne mbon yo, kye ewon dze saan dafi iYesu kpaa le saan neni.

⁴ Ali inggise nkyo alobube yo, mbe ola mgbi Imgbasho; ikyesine alobube ka li ungwonyi yi ofoola mgbi Imgbasho.

⁵ Nghaduu ema ye dafi iKrestu ba ikye owa kyi kyelu ali ibwubwe mgbi eyi mani. Ma mbon alobube dzema ba.

⁶ Inggise onyi ndze mbi iKrestu se li kiyayi okyo alobube dzema ba. Inggise onyi nle kiyayi okyo alobube ndun hona yon wa dzema ba.

⁷ Engbe ama oshilele, ka yama nu inggise onyi kpagya ema wo ba. Inggise nkyungwo nli ayin ma le saan mi ine Imgbasho, dafi iKrestu kpaa le saan neni.

⁸ Inggise nkyungwo obube yo, o li mgbi Olodu nani, ikyekye Olodu teyi le kyo alobube mi owita-wita jo. Itɔdɛ ngwi Ongwɛ Imgbasho ba ma, li owa kye mbelu idɔ mgbi Olodu.

⁹ Ama nli engwɛ Imgbasho ntone li kiyayi okyo alobube ba, lubana atta mgbi Imgbasho wodze mboma; ma ikyegbɛɛ Imgbasho li Otsoma ne, a ka kiyayi okyo alobube ba.

¹⁰ Li ito ofɛ ne ngwi eyi li ye ama nli engwɛ Imgbasho beyi ama nli engwɛ Olodu aani: Inggise nkyungwo nli ayin ba diye di ongwunon kpan itukwu bayo, li ongwɛ Imgbasho ba.

Di eka kpa eka itukwu

¹¹ Nene li esɔ ngwi ema fwo mi owita-wita ma aani gbɛɛ: Ni eyi di eka kpa eka itukwu.

¹² Ka dze dafi iKain ba, ongwu ndze dafi ongwɛ Olodu di ngwo ongwunon Ebel nani. Ma o ngwon gbɛɛ di ekye? Li ikyegbɛɛ okyɔkyɔ mgbi ongwu li obube kpaa mgbi ongwunon le saan.

¹³ Nghane, emi ongwunani, no ka kwulu ema ewo ba, kini esɛ ne di ema tanyi yo.

¹⁴ Eyi teyi ye gbɛɛ eyi to mi ikwongye luba oshishe, ikyegbɛɛ eyi di emi ongwuneyi kpa eyi itukwu. Ali inggise ndi ongwunon kpan itukwu bayo, o ka dze mi ikwongye.

¹⁵ Ali inggise ndi ongwunon tanyi li inggise ongwɔ inggise, ma ema ye gbɛɛ inggise ongwɔ inggise onyi dze yi oshishe ogyegwu mbon ba.

¹⁶ Nene li ito ofɛ ngwi eyi ye ungwɔ ngwi okpitukwu dze aani: iYesu iKrestu kye oshishe mgban lase mi ikye eyi. Eyi kpaa i wogyo ngwi eyi ka kye oshishe mgbi eyi lase ikye emi ongwuneyi.

¹⁷ Ni inggise dze yi ungwɔ ongwɔ esɛ ne, ma di ongwunon dze mi imina kpaa din elela ba ma, Imgbasho kpan itukwu mi ali ofɛ?

¹⁸ Emi ongwani, ni eyi ka di eka kpa eka itukwu mi ikpondu yi elodze ta ba, kpaa mi ambe otsootso beyi mi otsitsi.

¹⁹ Nghane li ito ofe ngwi eyi ka ye gbæ eyi dze mi aye mgbi otsitsi di tu onya mi itukwu mi inai Imgbasho aani.

²⁰ Alonɔ ngwi itukwu mgbi eyi nu eyi obube yɔ, Imgbasho shewo nga itukwu mgbi eyi, o di ye alungwo duu.

²¹ Emi okani itukwu-tukwu, ni itukwu mgbi eyi nu eyi obube bayɔ, eyi dze yi abo otsigege mi inai Imgbasho

²² di tu alungwo ngwi bɔn duu, ikyesine eyi ngyo ola mgban di kyo oweka mgban.

²³ Nene di li ola mgban aani: ni eyi noyeye mi iyi mgbi Ongwan, nli iYesu iKrestu nani. Ni eyi diyɛ di eka kpa eka itukwu dafi o wo eyi ola mani.

²⁴ Ama nngyo ola mgban ma dze mbon, ongwu kpaa di dze mboma. Di li ito ofe ngwi eyi ye gbæ o dze mbi eyi aani: Eyi li ye mi mfye mgbi Onodzi ngwi o kyi nu eyi nani.

4

Oye onodzi otsitsi beyi onodzi atsika

¹ Emi okani osuse, ka nu ali inggise ngbæ ongwu dze yi Onodzi mgbi Imgbasho oyeye ba, kpaa mbadi onodzi mani odi kaba kye mbi Imgbasho, ikyekye oyegbo ama omwonya kwuba tase tole ga mi eɛ wa.

² Li ofe ngwi ema ka difwi Onodzi mgbi Imgbasho aani: Ali inggise ngbela gbæ iYesu iKrestu ba mi mmbwe yi eyi yɔ, kye mbi Imgbasho.

³ Kpaa ali inggise ngbela iYesu ba wa, dze yi onodzi nkye mbi Imgbasho ba. Nene li onodzi mgbi Ongyikyili mgbi iKrestu, ngwu ema fwo gbæ kyema mani, onene kpaa o ba dze eɛ wa.

⁴ Ema, emi ongwani, ema kye mbi Imgbasho di nga onodzi atsika ntona wa, ikyesine Onodzi ndze mbi ema ma shewo nga onodzi ndze mbi eɛ nani.

⁵ Oyegbo atsika ntona li mgbi eɛ neni, ikyenghane, a li gbodze ongwɛ eɛ neni, inggise emi eɛ di li fwo ma.

⁶ Nghaduu eyi li mgbi Imgbasho, ma ali inggise n ye Imgbasho ta li fwo eyi; kpaa inggise ta nli mgbi Imgbasho bayɔ li fwo eyi ba. Li ito ofe ngwi eyi li difwi Onodzi mgbi otsitsi beyi onodzi mgbi atsika joali.

Imgbasho li okpitukwu

⁷ Emi okani osuse, ba ni eyi di eka kpa eka itukwu na, lubana okpitukwu kye mbi Imgbasho kye. Ali inggise ndi ongwunɔn kpan itukwu li ongwɛ Imgbasho di ye Imgbasho.

⁸ Inggise ta ndi ongwunɔn kpan itukwu bayɔ, ye Imgbasho ba, ikyekye Imgbasho li okpitukwu.

⁹ Nene li ofe ngwi Imgbasho tso okpitukwu mgban mbi eyi aani: O dɔ

Ongwan onyi kpokpo eɛ ba eɛ ikyegbæ ni eyi dze oshishe ikpewon.

¹⁰ Li okpitukwu aani: li ikyegbæ eyi teyi di Imgbasho kpa eyi itukwu ba, kpaa li ikyegbæ ongwu di eyi kpan itukwu di dɔ Ongwan eɛo ikye owa kye ewon fifɛ ikye ali ibwubwe mgbi eyi.

¹¹ Emi okani, dafi Imgbasho di eyi kpan itukwu kpakpa nghane, i wogyɔ ngwi eyi kpaa ka di eka kpa eka itukwu.

¹² Inggise onyi kpaa di Imgbasho ye ba; kpaa ni eyi di eka kpa eka itukwu yɔ, Imgbasho wodze mbi eyi, okpitukwu mgban di tsoto saan mbi eyi.

¹³ Eyi ye gbæ eyi wodze mbon ongwu kpaa wodze mbi eyi, ikyekye o teyi kye Onodzi mgban nu eyi.

¹⁴ Ma eyi teyi di diyɛ kyo obwendɛ gbæ Otsongwɛ dɔ Ongwan eɛo no li Onagbɛ mgbi eɛ.

¹⁵ Ali inggise nkyo obwendɛ gbæ iYesu li Ongwɛ Imgbasho tawa, Imgbasho wodze mbon ongwu kpaa wodze mbi Imgbasho.

¹⁶ Nghane, onene eyi ye di noyeye mi okpitukwu ngwi Imgbasho dzevan mi ikye eyi neni. Imgbasho li okpitukwu. Ali inggise ndze mi okpitukwu dze mbi Imgbasho, Imgbasho kpaa dze mbon.

¹⁷ Mi ito ofe nɛ, a nu okpitukwu tsoto saan mbi eyi ikyegbæ ni eyi wa dze yi abo otsigege mi egbe ikwo, ikyesine mi eɛ nɛ eyi dze dafi iKrestu mani.

¹⁸ Imio dze mi okpitukwu ba. Nghane okpitukwu nle saan li lo imio onya tase, ikyekye imio li dze ikye adɔ okwookwo. Inggise nli mɔo yɔ, okpitukwu mgban tsoto saan ba.

¹⁹ Eyi li tso eka okpitukwu, ikyekye o tsekise di eyi kpan itukwu.

²⁰ Ni inggise gbæ, <<Imgbasho kpa ani itukwu,>> kpaa di ongwunɔn tanyi yɔ, o li inggise omwonya. Lubana ali inggise ndi ongwunɔn ngwu o li din kpan itukwu bayɔ, o ka yagba di Imgbasho, ngwu o din ye ba na kpan itukwu gbɛ ba.

²¹ Ma o di wo eyi ola neni gbæ: Ali inggise ndi Imgbasho kpan itukwu yɔ, o ka di ongwunɔn kpaa kpan itukwu kyeme.

5

Onoyeye mbi Ongwɛ Imgbasho

¹ Ali inggise nnoyeye gbæ iYesu li iKrestu ma yɔ, li ongwɛ Imgbasho, ma ali inggise ndi otsongwɛ kpan itukwu yɔ, o li di ongwɛ kpaa kpan itukwu.

² Nene li ofe ngwi eyi li ye gbæ eyi di emi ongwɛ Imgbasho kpa eyi itukwu aani: mi odi Imgbasho kpa eyi itukwu di ngyo ola mgban.

³ Eyi li tso okpitukwu mgbi eyi mbi Imgbasho mi ongyo ola mgban. Ma ola mgban se eyi undo ba,

⁴ lubana ali ongwé Imgbasho duu nga ese. Ma eyi nga ese mi oyeye onuunu mgbi eyi.

⁵ Li eme ka nga ese gbe? Li inggise nnoyeye gbeé iYesu li Ongwé Imgbasho mani.

⁶ Nene li iYesu iKrestu ma aani, ongwu a mban dafi inggise owamye mi eni yi eyi mani. Li mi eni kyoon ngwi a mban ba, kpaa li mi eni beyi eyi. Ma li Onodzi mgbi Imgbasho kyo obwende mi odze neni, ikyekye Onodzi na li gbatsika ba.

⁷ Lubana ama eta duu kyo obwende mi otsitsi odze neni.

⁸ Onodzi, eni, beyi eyi; ama eta duu di kyo obwende ungwonyi.

⁹ Eyi noyeye mi obwende mgbi inggise, kpaa obwende mgbi Imgbasho shewo nga, ikyekye li obwende mgbi Imgbasho abuan, ngwi o nu mi ikye Ongwan.

¹⁰ Ali inggise nnoyeye mbi Ongwé Imgbasho tayo, dze yi obwende ne mi itukwu mbon. Nghaduu ali inggise nnu Imgbasho oyeye bayo, kwu Imgbasho onya, ikyekye o noyeye mi obwende ngwi Imgbasho nu mi ikye Ongwan ne ba.

¹¹ Di li obwende ma aani: Imgbasho kye oshishe igyegwu nu eyi, ma oshishe ne li mbi Ongwan.

¹² Inggise ndze yi Ongwé Imgbasho dze yi oshishe; kpaa ongwu ndze yi Ongwé na ba dze yi oshishe ba.

Okye odze ngwikpa

¹³ Ani lo ungwó ntoné ké mbi ema ama nnoyeye mi iyi mgbi Ongwé Imgbasho ma adzi ni ema ye gbée ema dze yi oshishe ogyegwu mani.

¹⁴ Nene li abo otsigegé ngwi eyi dzeayan mi oba kwekwe yi Imgbasho aani: gbée alungwó ngwi eyi bo mi oweka mgban tawa, o ka fwo eyi.

¹⁵ Ma ni eyi ye gbée o li fwo eyi yo, alungwó ngwi eyi bo duu, eyi noyeye ta gbée eyi tu wa.

¹⁶ Kini inggise di ongwunon kyo alobube nkyon ké ikwongye bayo, no bibo ikyon adzi ni Imgbasho nun oshishe. N gbo ikye ama ngwu alobube mgbi ama lu nghataa ké ikwongye na ba. Alobube dzema nli kye inggise ké ikwongye. N le gbée no bibo mi ikye ongwu na ba.

¹⁷ Ali imbaali duu li alobube, ma alobube toma nli kye inggise ké ikwongye ba gbe.

¹⁸ Eyi ye ta gbée inggise nli ongwé Imgbasho yo, li kyo alobube alono-alono ba; ikyekye Ongwé Imgbasho na li ngyon, Ongyikyili na ka yagba kyon unka gbe ba.

¹⁹ Eyi ye gbée ngwi Ongyikyili na kye ese ne duu le teyi ne kpaa, eyi li emi ongwé Imgbasho.

²⁰ Nghane, eyi di ye gbée Ongwé Imgbasho ba wa nu eyi odifwi-difwi, adzi ni eyi ye ongwu nli otsitsi nani. Ma eyi di wodze mbi Ongwan, iYesu iKrestu nli otsitsi nani. O li Imgbasho otsitsi beyi oshishe ogyegwu.

²¹ Nghane, emi ongwani, dulu abo mi angwula na.

Afe ongwu fan mgbi ijon

¹ Afe ne kye mbi ongyukwo okwakye mgbi emi iKrestu, le ke mbi ongyaa ngwu a sadu beyi engbe mgban, nkpa ani itukwu mi otsitsi, ma li ani yuwen ba, kpaa ama n ye otsitsi duu,

² ikye otsitsi nwodze mbi eyi nani, dika dze mbi eyi gyegwu.

³ Mse yi elela beyi iyu nkye mbi Otseyi Imgbasho beyi iYesu iKrestu; Ongwe Otseyi na, no dze yi eyi mi otsitsi beyi okpitukwu.

Otsitsi beyi okpitukwu

⁴ I nu ani atsa kwuba oye gbæ emi ongwabu angbeka le kyikye mi otsitsi, dafi Otseyi wo eyi ola ma yeye.

⁵ Ikyenghane, ongyaa, ani le lo abu ola ofufe ba kpaa li ongwi eyi teyi dzeyan mi owita-wita nani. Ani gbæ ni eyi di eka kpa eka itukwu.

⁶ Ma nene li okpitukwu aani: gbæ ni eyi ngwo ola mgban. Dafi ema fwo mi owita-wita mani, ola mgban li ogbæ ni eyi kiyayi mi okpitukwu.

⁷ Ama okpagyewo gwuba, ngbela gbæ iYesu iKrestu ba mi mmbwe yi eyi ba, gbeka ganya to ese. Ito inggise ntona li ama okpagyewo di li engyikyili mgbi iKrestu.

⁸ Gbewebyi adzi ni ungwo ngwi ema kyido ikyon na ka nyanya ba, kpaa ni ema wa gbæ umba mgbi ema kyæ.

⁹ Ali inggise ntila dze mi otsootso mgbi iKrestu bayo, dze yi Imgbasho ba; ali inggise nkiyayi mi otsootso mgbi iKrestu yo, dze yi Otseyi Imgbasho beyi Ongwan.

¹⁰ Kini inggise ba mbi ema kpaa gbela yi otsootso ne ba, ka gban mi ude ema hona kyon ono ba.

¹¹ Ali inggise ngban wo ewo yo, le kyido imbaali yan.

¹² Ani dze yi odze olo ke mbi ema kwuba, nghaduu i mina ani olo mi afe beyi enuntu ba. Nghaduu, i wo ani oke mbi ema ka gbodze yi ema ine-ine, adzi ni atsa mgbi eyi mbwumbwo.

¹³ Emi ongwe ongwunabu ongwu ongyaa ama a sadu-sadu ma ntona deso angba mbi abu.

Afe ongwu ta mgbi iJon

¹ Afe ne kye mbi ongyukwo okwakye mgbi emi iKrestu, le ke mbi okani iGayosu, nkpa ani itukwu mi otsitsi-otsitsi nani.

² Okani okpa ani itukwu, ani bibo gbæ unkonyi no ka wulu abu ba, alungwo duu no ke saan yi abu, dafi oshishe mgbi abu mi iKrestu kpaa le ke saan neni.

³ I nu ani atsa kpakpa ono emi ong-wuneyi mi iKrestu angbeka ye wa kyo obwende mi oyeye mgbi abu onuunu, dafi abu kale kiyayi okyikye mi otsitsi neni.

⁴ Mi ono ngwi ani fwo gbæ emi ongwani kale kyikye mi otsitsi ma, li kpani ngha alungwo duu.

⁵ Okani okpa ani itukwu, dafi emi ong-wunabu emi iKrestu ntonɛ li ingyoga mgbi abu ne kpaa, ungwɔ ama abu le kyo yi ama ntonɛ abu le kyo mi otsitsi.

⁶ A gbɔdze okpitukwu mgbi abu nya okwakye mgbi emi iKrestu mmeneni. Tsuutsu ya ma abo nu ma kiyayi yi agaba mgbi ama mi ito ofe nka kpa Imgbasho mani.

⁷ Li mi ikye Iyi mgbi iKrestu ngwi a tase, ngwi a mina oyabo onyi mbi emi esɛ ba, se li ama osunu Imgbasho ntona aali.

⁸ Wane, i dze mbiso ngwi eyi ka tobyi ito inggise ntoneni, zukwu ni eyi kyido yi eka mi ikye otsitsi.

⁹ Ani lo afe ne mbi emi okwakye mgbi iKrestu, nghaduu iDiotrefe nli mina oli ongyukwo mgbi ama na, fwa okye wuuta.

¹⁰ Ni ani ba yo, n ka nya ma ungwɔ ngwi o le kyo, idze ngwi o le dze kwu iyi eyi timbi-timbi nani. Nana ta ba, o fwa ogbe emi iKrestu ama nli ingyoga ntonani. O di kwo ama ngwu mina ogbe ma kpa, di lo ama nmina ogbe ma ma tase mi okwakye mgbi emi iKrestu.

¹¹ Okani osuse, ka gbama ungwɔ ib-wubwe ba kpaa gbama ungwɔ osuse. Ali inggise nkyungwɔ osuse yo li mgbi Imgbasho. Ali inggise nkyungwɔ obube yo teyi ye Imgbasho waba.

¹² Ali inggise duu gbɔdze osuse mi ikpewo iDemetru; otsitsi kpaa tso ngha. Eyi kpaa gbɔdze osuse mi ikpewon, ema di ye dafi obwende mgbi eyi li otsitsi mani.

¹³ Ani dze yi ungwɔ kwuba olo ke mbi abu, nghaduu, i mina ani okyo ngha mi igbo yi enuntu ba.

¹⁴ N weka odi abu dzikan-dzikan ta eyi ka gbɔdze ine-ine.

¹⁵ Ni iyu dze yi abu. Emi okeyi mmene le ta abu angba. Ta emi okeyi ama nto mmana duu angba onyonyi.

Afe mgbi iJudu

¹ Afe ne kye mbi ani iJudu, ongbido mgbi iYesu iKrestu di li ongwuno ifensi, le ke mbi ama ngwu Otseyi Imgbasho kwu ma ela, a kpan itukwu ngwu iYesu iKrestu kye abo ge ma ntonani.

² Imgbasho no nu ema elela yi iyu beyi okpitukwu dzii.

Ado okwookwo ikye otsootso atsika

³ Emi okani osuse, dafi i dze ani nghina-nghina olo ema afe ikye owato-wato mgbi eyi ne kpaa, n di gbee i yee kyeme-kyeme nin nlo wo ema ola gbee ni ema kwumewo mi oyeye onuunu ngwi a kye wo emi osaan abo akponyi ta gyegwu nani.

⁴ Lubana ani lo ungwone ikyegbee inggise angbeka tase wa kaka okwakye mgbi emi iKrestu mi idzidze ema le gbee, elela mgbi Imgbasho okwulewo na le nu eyi ofe okyo amah ibwubwe. Odzili-dzili mgbi ito inggise ntona a teyi lo dze ese gbege wa, ikyekye a tangwe Otse iYesu iKrestu Ugabaidu mgbi eyi nani.

⁵ Dafi ema teyi ye ungwone duu ne kpaa, i minen oye we ema gbee, Otse Imgbasho dulu emidan to mi ese Igyibiti, nghaduu o wa ye dzili ama nnun oyeye ba mani.

⁶ Mi ofe oka yo, Engyeso ama ndzata imbe yi ude mgbi ama na, o gbe ma toke iyifu, ta ma itse yi ashi nka dze ba, le fe egbe ikwo okwulewo mgbi Imgbasho nani.

⁷ Mi ito ofe na kpoo, iSodon yi iGomora beyi ogalu ama nkpaake woma duu kye ewoma nu mi amah beyi ali idza duu. A yee ambe mbi ama nkawa gyadze mi ola gyegwu mani.

⁸ Mi ito ofe na yeye, ama nkye gbee ama gbe ine odiidi ntona kye ewoma woke idza, a di fwa ofwo ama ogbe ma teyi di fya engyeso ito.

⁹ Nghaduu angbodzi ongyeso iMaikye ono ngwi o le natsondu mi ikwo mgbi iMose yi Olodu ma jokpaa, o kyo odzasha fyan ito ba, kpaa o gbee, <<Ni Otse kyokyo yi abu!>>

¹⁰ Nghaduu inggise ntone li fyito mi ungwō ama ngbosa lo ma ba beyi ama ngbosa lo ma kpaa mi odiidi mgbi ama, a li tsewodze dafi mmbwaba mani, ma di li ungwō ntone yeye li dzili ma kpaa aali.

¹¹ Ahoo mi ikye ma! A kyedo ofe mgbi iKain; a wende dafi iBalan mani, ikyena a gbe itukwu mgbi ama duu fake odze awuya; a ka dzili ma mi afo okye twese yi Imgbasho dafi iKora nani.

¹² Inggise ntone li inggise imbaali, a dze yi ayiwi ba, di zofu kpakpa, a le kyi mbelu ema okwakye mi ono ngwi ema le gye

ungwogyē owe okpitukwu mgbi iKrestu mani. A dze dafi akpumbwo nli gbe kpa, li kya ba nani. A to dafi ekwo ama nli wa owawaba mi ono oshe eto mani. Ni a kye kwolu man a li kwulu.

¹³ A dze dafi akpeni onghi onikyekyoo mani, ayiwi mgbi ama li tsoto dafi uvu; a dze dafi mce ama nle ga kye ngwi Imgbasho kye imbe nghao yifu duu dze ma gyegwu mani.

¹⁴ Enoku, nli ongwiba mgbi Adan ongwu gyafa na teyi yegbo mi ikye inggise ntone gbee: <<Dii, Otse kyema ka ba yi engyeso mgban ama osaan idubu-idubu

¹⁵ owa gbo ali inggise duu ikwo, di wa ngwo ama n ye Imgbasho ba ikwo mi alobube mgbi ama okyokyo duu, mi ofe ayin ba beyi elodze otimbi-timbi ngwi a gbo kwu iyi Imgbasho mani.>>

¹⁶ A li ama okwondukwo di pita imbe okye abo byi; a li kyedo imina ibwubwe mgbi ama nani; a li tsaabo igge ikye ewoma di fyumfya ondu yi angbeka ikye ni ama tu ungwō nmina ma mani.

Oshitukwu

¹⁷ Nghaduu, emi okani osuse, we ungwō ngwi ama ogbikyē Otse mgbi eyi iYesu iKrestu, teyi gbo nani.

¹⁸ A gbo nya ema gbee, <<Mi egbe onghi olele ma, ama okye ondu wo inggise ewo kawa to le kyedo ofe imina mgbi ama obube nli mgbi Imgbasho ba mani.>>

¹⁹ Inggise ntone li gha ema, a li kyedo ayayi imina mgbi ewoma di sulu Onodzi mgbi Imgbasho ba.

²⁰ Nghaduu ema, emi okani ingblimo, kwunewo kiyayi mi oyeye onuunu mgbi ema mbi Imgbasho, dile bibo mi mfye mgbi Onodzi Osaan na.

²¹ Kye ewema dze mi okpitukwu mgbi Imgbasho dafi ema le fe elela odiidi mgbi Otse mgbi eyi iYesu iKrestu ikye okye ema kaka oshishe ogyegwu nani.

²² Tobyi ama ngwu oyeye onuunu mgbi ama le ngwiingwi mani;

²³ lafwa angbeka to mi ola di dulu ma wato; angbeka yo di ma elela ikye imio mi oshishe mgbi abu, nghaduu kyili angwuto mgbi ama n yee kplekple yi ali ibwubwe mgbi ama nani.

Ibo onghi olele

²⁴ Nghane i kye angba otaata nu Imgbasho, nka nu ema ese ogboogbo ba, ndika kye ema tso mi inai okwokwo mgban yi obube onyi ba beyi atsa oshewo nani.

²⁵ Mbi Imgbasho Onagbe eyi na yuon, okwokwo yi onghaangha yi mfye beyi enepe no dze nye mbi Otse mgbi eyi iYesu iKrestu, dafi i teyi dze mani, onene nghataa gyegwu! No dze ngha.

Iba ngwi a kye tso ijon

Owita-wita

¹ Iba mgbi iYesu iKrestu, ongw iImgbasho kye nun ikye okye tso engbe mgban ungwo ama nka kye onɔ bata kawa kyo mani. O non tso to mi odo ongyeso mgban eso mbi onghido mgban ijon,

² ngwu nkya obwende mi alungwo ngwi ongwu di ngwi li, elodze mgbi iImgbasho yi obwende mgbi iYesu iKrestu.

³ Mse ka be inggise ngwu ngbo elodze mgbi oyegbo ne ewo, mse dika be ama nfwo di noyeye mi ungwo ngwi a lo to ele ne ewo, ikyekye onɔ ma dze kwekwe wa.

Angba beyi otseetse

⁴ Afe ne kye mbi ijon ke mbi okwakye mgbi ama onoyeye ngbi egyafa mi ese Asia gbee: elela beyi iyu nkye mbi ongw ndze onene, ongwu nteyi dze, dika wa dze na, yi mbi onodzi egyafa ama nkwoodze iyayi itsuto mgban na nu ma dze yi ema,

⁵ beyi mbi iYesu iKrestu ongwu nli obwende otsitsi, ongwovle mbi emi ikwukwo, beyi ongye oteyi mgbi emi utɔ mi ese.

Mbi ongwu ndi eyi kpan itukwu di dulu eyi to mi ali ibwubwe mgbi eyi mi eyi mgban,

⁶ di nu eyi yee esuto onyi beyi ama ofife ikye okyo iImgbasho beyi otsongwu ido mani, okwokwo yi mfye no dze mbon nghataa gyegwu! No dze ngha.

⁷ Dii o ka yekye mi akpa mi esho, ma ali ine duu ka dun, yi ama nton okpa ma kpaa; man inggise mi ese duu ka tsukwu ikyon. Li ngha nka dze aali! No dze ngha.

⁸ Otse iImgbasho gbgbee, <<Ani li owita-wita beyi ongyeengye, Ongwu ndze onene, yi ongwu nteyi dze, yi ongwu ndika wa ba, ongwu nghaangha duu mani!>>

Ine odiidi mgbi Ongwe Inggise

⁹ Ani, ijon, ongwunema yi ibuge mgbi ema mi adze ogyeegye yi esuto mgbi okwonyotse yi itukwu oshiishi mgbi eyi mbi iYesu, kedze ibu ongwu iPatimo mi ikye elodzimgbasho beyi obwende mgbi iYesu.

¹⁰ Mi egbe mgbi Otse ma Onodzi kye ani teyi, man ani fwo onikyo ela mi iyikpa mbi ani dafi agba mani,

¹¹ ela na gbee: <<Lo mi afe ungwo ngwi abu di mani kye dɛso nu okwakye mgbi ama onoyeye egyafa ntonani: Mbi emi Efesu yi iSimina yi iPegamu yi iTyatira yi iSadi yi iFyladefyia beyi iLaodisia.>>

¹² Ani kyata gbee ni ani di ela nle gbodze yi ani mani. Onɔ ngwi ani kyata ma, ani di otlese abashi mgbi ola ngbi egyafa,

¹³ ma mi idzidze otlese ntona <<Inggise oka dze ele dafi Ongwe Inggise mani,>> wo angwuto owulu-wulu kye esho lu afɔ mi ese yi ayangwuto abashi nye igege mgban.

¹⁴ Otu mi ikye mgban tundze dafi ofufutu, i tundze dafi akwummbwo, ine mgban di dze dafi abɔ onaana mgbi ola mani.

¹⁵ Afo mgban mi ese dze dafi iyudza ngwi a gyuon enotse omuma oshinishini mani, ela mgban di dze dafi adu eni nle kwobu mani.

¹⁶ O byi mce ngbi egyafa mi abugye mgban, ma mi ondu mgban okwusunkli ngyigye agya efa to mi ele. Ine mgban dze dafi onɔ le kwo mi idzidze ude mani.

¹⁷ Ngwi ani din ne, ani si gbese lanke iyayi dafi ani kwulu mani. Ne o kye abugye mgban do ani ewo si gbee: <<Ka mio ba. Ani li ongwu ababo beyi ongwu olele mani.

¹⁸ Ani li ongwu ndze oshishe mani; ani ple kwulu, kpaa onene dika ani dze oshishe nghataa gyegwu! Ani di dze yi ungwo okwulu ofe mgbi ikwongye beyi endzi.

¹⁹ <<Ne kye lolu, ungwo ngwi abu di, ngwi dze onene beyi ungwo nkawa kyo mi iyayi.

²⁰ Ungwo odaada mgbi mce egyafa ngwi abu di mi abugye mgbi ani beyi otlese mgbi ola okwokwo ma li ongwu aani: Mce egyafa ntona li engyeso mgbi okwakye mgbi ama onoyeye egyafa ntonani, otlese egyafa mgbi ola ntona li okwakye mgbi ama onoyeye egyafa ntonani.

2

Eso mbi emi Efesu

¹ <<Lo ungwo ntona ke mbi ongyeso mgbi okwakye mgbi ama onoyeye mi Efesu gbee: Nene li elodze mgbi ongwu nbyi mce ngbi egyafa mi abugye mgban di kyikye mi idzidze otlese mgbi ola okwokwo nani:

² Ani ye ido ngwi abu kyo mani, okwunewo ido mgbi abu yi itukwu oshiishi. Ani ye abu ka gbela yi emi imbaali ba, ikyesine abu mbadi ama ntso gbee di ama li ama ogbikyie iYesu kpaa a li ama ba, di difwi gbee a li ama omwonya.

³ Abu kwonyotse, di gyadze mi ikye mgbi ani, abu di yeyikpa ba.

⁴ Kpaa li ungwo nkpa ani yi abu ba aani: Abu dzata okpitukwu mgbi abu ongwu ababo nani.

⁵ We imbe abu gbese mani! Kyatitukwu diye kyungwo ama ngwi abu teyi kyo ma ababo mani. Ni abu kyatitukwu ba, n ka ba mbi abu wa kyi kwolu otlese mgbi ola okwokwo mgbi abu na mi imbe mgban.

⁶ Nghaduu li ikyese mgbi abu aani: Abu di okyockyo mgbi emi iNikoleti tanyi, dafi ani kpaa di tanyi neni.

⁷ Inggise ndze yi ado, otsungwon no fwo odze ngwi Onodzi gbo yi emi okwakye mgbi ama onoyeye neni. Ongwu ngha ma, n ka nun ofe no gye ekwo mgbi oshishe, ndze mi iPradiso* mgbi Imgbasho nani.

Eso mbi emi iSimina

⁸ Lo ungwo ntone ke mbi ongyeso ongwu okwakye mgbi ama onoyeye mi iSimina gbæ: Nene li elodze mgbi ongwu nli ababo di li olele, ongwu nkwalu diye kyato dze oshishe nani.

⁹ Ani ye okakewo yi adze mgbi abu nghaduu abu dze aludu! Ani ye odze ibwubwe ngwi inggise ama ngbæ ama li emi iJuda kpaa li emi iJuda ba le gbo mi ikpewo abu mani, kpaa a li ozu okwakye mgbi iSatan.

¹⁰ Ka wimio mi ungwo ngwi abu le ka gyadze mi ele na ba. N nya abu, Olodu ka gbe ema angbeka woke obawi ikye ombadi ema, ema dika gbiiso mi egbe iwyo. Shitukwu kpoo, nghataa ke ono ikwongye, man ani ka kye okpaapyi mgbi oshishe nu abu.

¹¹ Inggise ndze yi ado, otsungwon no fwo odze ngwi Onodzi gbo yi emi okwakye mgbi ama onoyeye neni. Inggise nnga ma, ka gyiso mi ikwongye ongwu fan na wuba.

Eso mbi emi iPegamu

¹² Lo ungwo ntone ke mbi ongyeso ongwu okwakye mgbi ama onoyeye mi iPegamu gbæ: Nene li elodze mgbi ongwu ndze yi okwusunkli ngyigye agya efa nani.

¹³ Ani ye imbe ngwi abu dze na li imbe ngwi itsuuto mgbi iSatan dze aali. Nghaduu abu kwudze mi oyeye onuunu mi iyi mgbi ani. Abu tangwe oyeye onuunu mgbi abu mbi ani ba, mi egbe mgbi Antipa ma kpaa, obwende mgbi ani otsitsi, a ngwon mi ogalu mgbi ema imbe ngwi iSatan dze nani.

¹⁴ Nghane kpaa, ani dze yi ungwo gwee ngwi ani ka bewo ema ba: Ema to yi inggise mmana ngwu gbela yi otsootso mgbi iBalan, ongwu ntso iBalaki ogbe emi iSrai teyi oka kyo alobube mgbi ogye ungwogye ngwi a kye fifi nu emi angwula beyi okyo amah nani.

¹⁵ Li ngha ngwi ema kpaa dze yi inggise ama ngbela yi otsootso mgbi emi iNikoleti aali.

¹⁶ Nghane kyatitukwu na! Lubana, ani ka ba mbi ema ple jo owa gblika yi ama mi okwusunkli ongwu ondu mgbi ani.

¹⁷ Inggise ndze yi ado no fwo odze ngwi Onodzi gbo yi emi okwakye mgbi ama

onoyeye neni. Mbi inggise ongwu ngha, n ka nun iManna angbeka odaada. N dika nun ikwutse onzundze ngwi a lo iyi ofufe mi ele, ngwi inggise ngbe ma ta ka ye.

Eso mbi emi iTyatira

¹⁸ Lo ungwo ntone ke mbi ongyeso ongwu okwakye mgbi ama onoyeye mi iTyatira gbæ: Nene li elodze mgbi Ongwe Imgbasho, ongwu ine mgban dze dafi ola onaabo ngwu afo mgban mi ese dze dafi iyudza ngwi a gyuon enotse shinishini nani.

¹⁹ Ani ye okyockyo mgbi abu, okpitukwu mgbi abu yi oyeye onuunu, ido yi okwonyotse mgbi abu, di ye gbæ abu le kyo onene ngha ongwu abu teyi kyo ababo mani.

²⁰ Nghane kpaa, li ungwo nkpa ani yi abu ba aani: Abu gbe ongyaa iJedzebe nkwi ewon di oyegbo na wo ewo. Mi otsootso mgban o nu engyiido mgbi ani boofe kaka amah ibwubwe, dile gye ungwogye ngwi a kye fifi nu angwula.

²¹ Ani nun ono gbæ no kyata mi amah mgban nani, kpaa o dze yi oweka ba.

²² Nghane n ka kyon ngwi dæke akwulo mgbi adze ogyeegye, n dika nu ama nle kyo amah yan gyadze kpakpa, sede nu ma kyatitukwu mi okyockyo mgban ntonani.

²³ N ka ngwon engbe. Ta okwakye mgbi ama onoyeye duu ka ye gbæ ani li kyidi ali inggise mi eka yi itukwu, ma n ka yile mkpa kpa ali inggise mgbi ema duu mi okyockyo mgbi ema.

²⁴ Onene nle gbo yi ema ama nsisi mi iTyatira ne gbæ, ema ama nkyedo mi otsootso mgban ba, di kpaiy ungwo mgbi iSatan ngwi a li kwun di iba olu byulu ba ma, (n ka kye okakewo oka do ema ikye wuba).

²⁵ Nghaduu gbæwebyi otsootso ngwi ema dzeyan na kyoon nghataa ni ani wa yido.

²⁶ Mbi inggise ngwu ngha di kyo owitukwu mgbi ani ka dondu ma, n ka nun mfye mi ikye ese ibyibi.

²⁷ O ka kye ma teyi yi okwuta uto ashashi; o ka gbobu ma ambulu-ambulu dafi ishe> yeye dafi ani gbe mfye mbi Otsani mani.

²⁸ N dika kye Oshebe† nun.

²⁹ Inggise ndze yi ado yo, no fwo odze ngwi Onodzi gbo yi okwakye mgbi ama onoyeye neni.

3

Eso mbi emi iSadi

¹ Lo ke mbi ongyeso ongwu okwakye mgbi ama onoyeye mi iSadi gbæ: Ntone li elodze mgbi ongwu nbyi Onodzi mgbi Imgbasho egyafa beyi mce egyafa nani. Ani ye okyockyo mgbi abu; ali inggise duu tsewe gbæ abu ka dze oshishe mi onodzi, kpa o li ikwukwo.

* 2:7 2:7 iPradiso Li imbe ngwi ungwo osuse kyoon to. ngha

† 2:28 2:28 Oshebe Li umba ngwi a ka kye nu ama ngwu

² Ngwo! Ni oyeye onuunu mgbi abu nsisi dze na fyumfye di i wa kwulu, ikyesine ani di okyockyo mgbi abu mbi Imgbasho mgbi ani saan ngye ba.

³ Nghane we, ungwō ngwi abu teyi gbe di fwo mani; kyo mi ele, di kyatitukwu. Kpaa kini abu ngyo bayo, n ka ba dafi emumyi mani, ma abu ka ye onō ngwi ani ka ba mbi abu ba.

⁴ Nghaduu ema to yi inggise gwee mi iSadi ama nnu angwuto mgbi ama shimbi ba mani. A ka wewo mi angwuto onzundze kyikye yi ani, ikyesine a me.

⁵ Inggise nngaha ma, ka wo angwuto onzundze dafi ama mani. Ani dika dulu iyi mgban mi afe mgbi oshishe ba, kpaa n ka kye iyi mgban tso mi ododa mi inai Otsani yi engyeso mgban.

⁶ Inggise ndze yi ado yo, no fwo odze ngwi Onodzi gbo yi emi okwakye mgbi ama onoyeye neni.

Eso mbi emi iFyiladefyia

⁷ Lo ke mbi ongyeso ongi okwakye mgbi ama onoyeye mi iFyiladefyia gbee: Nene li elodze mgbi ongwu nle saan di dze yi oyeye, ongwu nbyi ungwō okwulu ofe mgbi iDevedi. Ungwō ngwi o kwulu inggise onyi ka kye tukwu gbe ba, ungwō ngwi o di kye tukwu inggise onyi ka kwulu gbe ba.

⁸ Ani ye ungwō ngwi abu kyo. Di, ani kwulu ofe lake asisa ikye abu, ngwi inggise onyi ka kye tukwu gbe ba. Ani ye enepe me abu ba, nghaduu abu ngyo elodze mgbi ani di tangwe iyi mgbi ani ba.

⁹ N ka nu ama nto mi ozu okwakye mgbi iSatan, nli tso gbee ama li emi iJuda kpaa li ama ba, kpaa a li ama omwonya ntonani, N ka nu ma wa kwese mi iyayi mbi abu di difwi gbee abu kpa ani itukwu.

¹⁰ Ikyegbee ema ngyo ala mgbi ani di shitukwu kpoo ne, ani kpaa ka dulu ema to mi imbadi nka ba mi ikye ese duu owa mbadi ama nto ese mani.

¹¹ Ani kyema dzikan-dzikan. Kye abo byi ungwō ngwi abu dzeyan ma kpoklōo, ikye ni inggise onyi wa gbe abu okpapyi ba mani.

¹² Inggise nngaha ma, n ka non li otlese mi ozu okwukwo osunu Imgbasho mgbi ani. Akponyi kpaa o dika dzanta ba. Ani ka lo iyi Imgbasho beyi iyi ogalu mgbi Imgbasho mgbi ani mbon, iJerosalin ofufe nto mi esho mbi Imgbasho mgbi ani kye le ba nani; ani dika lo iyi ofufe mgbi ani mbon.

¹³ Inggise ndze yi ado, no fwo odze ngwi Onodzi gbo yi okwakye mgbi ama onoyeye neni.

Eso mbi emi iLaodisia

¹⁴ <<Lo ke mbi ongyeso ongi okwakye mgbi ama onoyeye mi iLaodisia gbee: Ntone li elodze mgbi No Dze Ngha mani,

ongwu ndze yi otsitsi beyi obwende otsitsi, ongwu nli ikye mi ungwō ama Imgbasho ta ntoneni.

¹⁵ Ani ye ungwō ama abu teyi kyo mani; ani ye dafi abu yuyu naadi zola ba mani. Dafi i dze ani ma gbee abu ki yuyu hona zola!

¹⁶ Kpaa ikyegbee abu tawewe, abu zola hona yuyu ba ne, n le ka kye abu ngwuta dafi angwō mi ondu mgbi ani mani.

¹⁷ Abu gbee, <ani dze aludu; ani tu aludu di mina unkonyi wuba.> Nghaduu abu difwi gbee, i ngha abu ewo, kyelela, dze adze, bine di dze ibiba ba.

¹⁸ Ani we abu ewe gbee, ni abu gya abashi ngwi a falufa won mi ola mbi ani, ikye ni abu yee aludu; yi angwuto onzundze owoowo, ikye ni abu tukwu iba ayiwi mgbi abu; yi otse okye wo ine mgbi abu, ikye ni abu di mani.

¹⁹ Ama nkpaani itukwu ma, ani li kyockyo di kwo ma ado. Nghane dze mi otsitsi, di kyatitukwu.

²⁰ Gado! Ani kwudze onufozu le tsaabo! Inggise ta nfwo ela mgbi ani di kwulu ofe yo, n ka kaka di gye ungwogye yan, ongwu kpaa ka gye yi ani.

²¹ Mbi ali inggise nngaha duu, n ka nun ofe no so yi ani mi itsuuto mgbi ani, yeye dafi ani kpaa ngha di so yi Otsani mi itsuuto mgban neni.

²² Inggise ndze yi ado yo, no fwo odze ngwi Onodzi gbo yi okwakye mgbi ama onoyeye neni.>>

4

Osuusununu ongi esho

¹ Ngwi ungwōne wa nye ne, ani ndine, ta mmana mi iyayi mgbi ani onufozu lasisa mi esho. Man ela ngwi ani teyi fwo le gbodze yi ani dafi agba ma gbee, <<Ba esho mmeneni, ta n ka tso abu ungwō nka kyo onō ngwi ungwōne wa nye mani.>>

² Labo mata ani dze mi Onodzi, man inggise sodze itsuuto mgbi Imgbasho wa dzeke ine mbi ani.

³ Ongwu ndi sodze mmana ma odzeedze mgban dze dafi ikwutse onyina-nyina beyi ikwutse nli omuma gloglo mani. Mmbwo olowa, nlu ikwutse ngwi dze yi enotse dafi indrakpakpa kwokwo, loka wo itsuuto nani.

⁴ Itsuuto angbeka nghi osudene kpakeke wo itsuuto nani, engyukwo osudene di soto efu tsatsadu. A wo angwuto onzundze di tukwu okpapyi abashi mi ikye mgbi ama.

⁵ Mi itsuuto na mmbwo naabo to, kwadu, akpala di gbo. Ola ipitila nghi egyafa tole gbe mi iyayi itsuuto nani. Ngwi li onodzi egyafa mgbi Imgbasho mani.

⁶ Mi iyayi itsuuto na ungwɔ oka di dze ele dafi onekyoo idzinggi, gbosa dafi ikwutse ola mani sɔdze idzidze.

Adan owamye nghi ene ngwu dze yi ine mi iyayi beyi iyikpa loka wo itsuuto nani.

⁷ Adan owamye ongwu ababo ma dze dafi ugaba, ongwu fan dze dafi mnda ngwi a won elozu, ongwu ta dze yi ine dafi inggise, ongwu ne dze dafi uyee nle bulu mani.

⁸ Ali atta owamye ene ntona dze yi asha egyin yi ine kpatse ele, kwo yi asha mgban mi ese kpaa. Ono yi otu duu a yama kwulese ogbɛ:

<<Osaan, osaan, osaan
li Otse Imgbasho onghaangha,
ongwu nteyi dze, di dze onene, dika dze
nghataa gyegwu ba.>>

⁹ Alono ni atta owamye ntona kye okwɔkwo yi mmwe beyi angba nu ongwu nsɔdze itsuuto di dze oshishe gyegwu-gyegwu na,

¹⁰ engyukwo osudene ntona li tukwuke ese nu ongwu nsɔdze itsuuto na, di sunu ongwu ndze oshishe gyegwu-gyegwu nani. A li gbe okpapyi mgbi ama lakiyayi itsuuto si gbɛ:

¹¹ <<Abu me, Otse beyi Imgbasho mgbi eyi, ogbɛ okwɔkwo yi mmwe beyi mfye, lubana abu ta alungwu duu,
ma mi oweka mgbi abu a ta ma
di dze mi odzeɛdze mgbi ama aani.>>

5

Afe ofulu-fulu yi ongwummala

¹ Ne ani di afe ofulu-fulu mi abugye mgbi ongwu nsɔdze itsuuto nani, ngwi a lo ungwɔ mi ali agyan duu kye kwobe imbe egyafa.

² Ani diyɛ di ongyeso odatu le noola mi ela okwukwo gbɛ, <<Li eme me okye fwelu okwobe di kwulu afe na?>>

³ Nghaduu inggise onyi mi esho naadi mi ese hona mi ikpese yagba okwulu afe na naadi wine di ifun kpaa ba,

⁴ Ani tsukwu diyɛ tsukwu ikyekye a tu inggise onyi nka kwulu afe na hona wine di ifun ba.

⁵ Ne engyukwo ntona onyi nya ani gbɛ, <<Ka tsukwu ba! Dika, Ugaba mgbi eto mgbi emi iJuda, Eto mgbi iDewedi nga wa. O ka yagba kwulu afe na yi okwobe-kwobe egyafa ntonani.>>

⁶ Ne ani di Ongwummala, le dine dafi a teyi ngwon mani, kwudze mi idzidze itsuuto, atta owamye nghi ene beyi engyukwo ntona loka won. O dze yi agbe nghi egyafa yi ine egyafa, ngwi li Onodzi egyafa mgbi Imgbasho ngwi a kye deso nu ese duu mani.

⁷ O ba wa kye gbelu afe ofulu-fulu na mi abugye mgbi ongwu nsɔdze itsuuto nani.

⁸ Man ngwi o kye gbelu ne, atta owamye nghi ene ntona beyi engyukwo osudene

ntona lake ese mi iyayi Ongwummala nani. Ama duu dze yi ozuna a di byi uga abashi nmbwo yi ungwɔ ogbungbe mi ifun, ngwi li ibo mgbi emi osaan.

⁹ A di shashi ofufe gbɛ:

<<Abu me okyi kyelu afe ofulu-fulu
di kye kwulu okwobe-kwobe mgban
ntonani,

ikyekye a ngwo abu,

ma yi eyi mgbi abu, abu gya inggise

mi ali udze beyi ondudze,

beyi inggise yi ese duu ikye Imgbasho.

¹⁰ Abu nu ma yeɛ esuto beyi ama ofife

ikyɛ osunu Imgbasho mgbi eyi,

a dika kye ese ne teyi.>>

¹¹ Ne ani ndine si fwo ela engyeso ibyibi, mmbwo mgbi ama li idubu idubu, yi idubu iwyo akpe idubu iwyo. A kpakeke wo itsuuto beyi atta owamye beyi engyukwo ntonani.

¹² Mi ela okwukwo a shashi gbɛ:

<<Omeeme li Ongwummala,

ongwu a ngwon,

o kye gbelu mfye yi

aludu yi ozoyeye yi eneɛ

yi mmwe yi okwɔkwo beyi otseetse!>>

¹³ Ne ani fwo ali atta mi esho duu beyi mi ese ne beyi mi ikpese beyi mi ekyoo okwukwo, beyi alungwu nto mboma duu, le shashi gbɛ:

Mbi ongwu nsɔdze itsuuto

yi mbi Ongwummala

ni otseetse yi mmwe yi okwɔkwo beyi mfye dze mbon, nghataa gyegwu!>>

¹⁴ Adan owamye nghi ene ntona gbɛ, <<No dze nga,>> man engyukwo ntona lake ese di sunu.

6

Okwulu okwobe egyafa ntonani

¹ Dafi ani di Ongwummala kwulu okwobe-kwobe ongwɔ ababo ne. Ani si fwo onyi mi idzidze atta owamye ntona gbo mi ela ngbela dafi akpala mani gbɛ, <<Kwa!>>

² Man ani ndine si di mmya onzundze dze iyayi mbi ani! Inggise nle ton ma byi uta, a di kye okpapyi nun, o ton tase dafi inggise onghaangha mani, le ka nga.

³ Ono ngwi Ongwummala kwulu okwobe na ongwu fan ma, ani fwo atta owamye ntona ongwu fan gbɛ, <<Kwa!>>

⁴ Ne mmya oka nma dafi ola tase, inggise nle ton ma, a nun gbɛ no kyi kyelu iyu mi ese neni, odi nu inggise kwobu ewoma. A kye okwusunkli ogbadaa nun.

⁵ Ono ngwi Ongwummala kwulu okwobe na ongwu ta ma, ani fwo atta owamye ntona ongwu ta gbɛ, <<Kwa!>> Ani di mmya onbyinbyi kwudze iyayi mbi ani!

Inggise nle tɔn ma, kye ungwo omba ungwo agya efa byabo.

⁶ Ani fwo ungwo gbela dafi ela mi idzidze mgbi atta owamye ntonani. Le gbɛɛ, awu alakama onyi okpa mi ikye idɔ egbe onyi, awu eneso ngbi eta okpa mi ikye idɔ egbe onyi, dika nu engyie yi eneekwo na nyanya ba!>>

⁷ Ono ngwi Ongwummala kye kwulu okwobe-kwobe ongwu ne ma, ani fwo ela mgbi atta owamye ongwu ne le gbɛɛ, <<kwa!>>

⁸ Ani ndine, man mmya nsila kwudze! Ongye otɔn ma a kwun di Ikwoyge, ta Endzi kyan iyikpa kwɛkwɛ. A kye mfyɛ nu ma gbɛɛ nu ma ngwo inggise mi ayɛɛ onyi mi idzidze ene mgbi ɛɛ yi okwusunkli yi onikyenbwa yi ootse, beyi mmbwaboshe emi ɛɛ neni.

⁹ Ngwi o kwulu okwobe-kwobe ongwu da ma, ani di oshishe mgbi ama ngwu a ngwo ikye elodzimgbasho ikyegbɛɛ a kyo obwende otsitsi mi ita iwashi mani.

¹⁰ A kwu ela mi ela okwukwo gbɛɛ, <<Ka kye ono sine, Otse Ongha yi mfyɛ, osaan yi otsitsi, se ngwi abu ka fwo inggise emi ɛɛ ne ikwo di kpa ma mkpa mi ikye eyi mgbi eyi ngwi a kye kyi ɛɛ na?>>

¹¹ Ta a nu ma angwuto onzundze di nya ma gbɛɛ nu ma mbata gwee, nghataa ni umbwo engbido angbeka beyi emi ongwuno ma ama ngwu a ka ngwo ma dafi ama abuoma kpaa a ngwo ma ma mbwumbwo se.

¹² N di dafi o kwulu okwobe-kwobe ongwu gyin na mani. Man ikpɛɛ suusu kpakpa. Ono kyata yɛɛ onbyinbyi dafi ishisha angwuto ngwi a mɛ mi andu mndɔ mani, ofyia ololo kyata yɛɛ omuma dafi eyi,

¹³ man mɛɛ mi akpa yangwuta luba ɛɛ, dafi onganga mgbi andundu li wulo ono ngwi awo fa fyumfyɛ nani.

¹⁴ Man esho byakpa byulu dafi afe ngwi a fulu mani, ne ali unggwo yi ibu duu a kye kwolu ma mi imbe mgbi ama.

¹⁵ Ta uto emi ɛɛ ne, uto engyaa, emi agyegika, emi aludu, ama odatu, yi ali ofyɛɛ beyi inggise ewewe duu gbe ewoma da mi ishe beyi ifo unggwo.

¹⁶ A kwu unggwo yi akwutɛɛ ela gbɛɛ, <<Yulu tukwu eyi kye eyi da mi ine mgbi ongwu nsodze itsuuto beyi itingga mgbi Ongwummala!

¹⁷ Ikyesine egbe itingga mgbi ama okwulewo ma ba wa, nghane li eme ka tsigege yan gbɛ?>>

7

*Inggise idubu ideli onyi
ngwusefa don ene
ngwu a kye ambe dze ma*

¹ Ngwi ungwone wa nye ne, ani di engyeso ngbi ene kwudze aye ene mgbi ɛɛ le kwulu awo mi aye ene mgbi ɛɛ gbɛɛ no ka fa mi ikpɛɛ naa mi ekyoo okwukwo hona mi ekwo onyi kpaa ba.

² Ne ani di ongyeso oka tokye mi onosa, yi ambe mgbi Imgbasho oshishe. O kwu ela mi ela okwukwo ke mbi engyeso ngbi ene ama ngwu a teyi kye mfyɛ nu ma gbɛɛ nu ma dzili ɛɛ beyi ekyoo okwukwo ntona gbɛɛ:

³ <<Ka dzili ɛɛ naa ekyoo okwukwo hona ekwo ba, nghataa ni eyi kye ambe dze engbido mgbi Imgbasho mgbi eyi mi ebeshu se.>>

⁴ Neman ani fwo mmbwo mgbi ama ngwu a kye ambe dze ma mani: Idubu ideli onyi ngwusefa don ene mi ali agwo mgbi iSrai duu.

⁵ Mi agwo mgbi iJuda a kye ambe dze inggise idubu iwyodefa, mi agwo mgbi iRuben idubu iwyodefa, mi agwo mgbi iGadi idubu iwyodefa,

⁶ mi agwo mgbi Ashe idubu iwyodefa, mi agwo mgbi iNaftali idubu iwyodefa, mi agwo mgbi iManase idubu iwyodefa,

⁷ mi agwo mgbi iSimion idubu iwyodefa, mi agwo mgbi iLevi idubu iwyodefa, mi agwo mgbi iSaka idubu iwyodefa,

⁸ mi agwo mgbi iDzebulun idubu iwyodefa, mi agwo mgbi iJose idubu iwyodefa, mi agwo mgbi iBenjamin idubu iwyodefa.

*Ibyi inggise ama nwo angwuto
onzundze*

⁹ Ngwi ungwone wa nye ne, ani di ibyi inggise mi iyayi mbi ani ngwu inggise onyi ka gbo ma gbe ba, kye mi ali ɛɛ yi agwo yi inggise yi ondudze duu, gbeka kwudze iyayi itsuuto beyi iyayi Ongwummala. A wo angwuto onzundze di byi abade mi abo mgbi ama.

¹⁰ A si kwu ela mi ela okwukwo gbɛɛ:

<<Owato-wato kye mbi
Imgbasho mgbi eyi,
Ongwu nsodze itsuuto,
beyi mbi Ongwummala.>>

¹¹ Engyeso ntona duu kwudzekɛ kpakeke wo itsuuto di kpatse engyukwo ntona yi atta owamye ntonani. A tukwuke ɛɛ gbe ikye weese mi iyayi itsuuto si sunu Imgbasho,

¹² le gbɛɛ:
<<No dze ngha!

Otɛ-tɛ yi okwokwo
yi ozoyeye yi angba yi
mmwe yi mfyɛ yi apa
no dze mbi Imgbasho mgbi eyi

nghataa imbisọ gyegwu.
No dze ngha!>>

¹³ Ne onyi mbi engyukwo ntone byi ani ita gbɛɛ, <<Ama nwo angwuto onzundze ntone ma, a li ele, a di kye ole kye?>>

¹⁴ Ani si nu uka gbɛɛ, <<Ongyukwo, abu ye.>>

Ta o gbɛɛ, <<Ntone li ama ntase mi adze okwukwo nani; a kye salu angwuto mgbi ama non yee onzundze mi eyi mgbi Ongwummala.

¹⁵ Ikyenghane,
<<a to iyayi itsuuto mgbi Imgbasho dile sunun onɔ yi otu mi ozu mgban okwukwo nani;
man ongwu nsodze itsuuto na ka kye iwulu abo mgban tukwu ma.

¹⁶ Akponyi kpaa enbwa ka dɔ ma ba; ekweni kpaa dika kwu ma ba.

Ono ka tse ma ba,
naadi olola onyi kpaa ba.

¹⁷ Ikyesine Ongwummala ndze mi idzidze itsuuto na ka li inggise ongyo ma;
o ka gbe ma teyi lu mi uteeni oshishe.
Man Imgbasho ka fɔ ma etse ine duu.>>

8

A kwulu afe ngwi a kye kwobe na ongwu gyafa mani

¹ Ngwi Ongwummala kye afe ngwi a kyi kwobe ongwu gyafa kye kwulu ne, esho dede me itsitsi obyi hini.

² Man ani di engyeso nghi egyafa nkwudze to inai Imgbasho na, a kye agba onyonyi nu ma kpatse.

³ Ongyeso oka, nbyi uga abashi mgbi ungwɔ ogbungbe ma, ba wa kwudzeke iwashi. Ongwune ne a kye ungwɔ ogbungbe kpakpa nun ikye okye toola yi ibo mgbi emi osaan mi iwashi abashi mi iyayi itsuuto.

⁴ Ne iwu mgbi ungwɔ ogbungbe na, beke yi ibo mgbi emi osaan, kye mi abo mgbi ongyeso na, lu iyayi Imgbasho.

⁵ Ta ongyeso na kyi kyelu uga ungwɔ ogbungbe na, mwa ola mi iwashi mbwoke ele, man kye ngwuta lake ese; ta imbe kwadu, akpala gbo, mmbwo naabo, ese di suusu.

Agba ntonani

⁶ Ne engyeso nghi egyafa ndze yi agba nghi egyafa ntona wewo ofo ma.

⁷ Ongyeso ongwu ababo fo agba mgban, ta mmbwakwutse yi ola ngwueke yi eyi, man a kye ma ngwuta luba ese. Ayese ongwu ta gyola, aye ekwo ongwu ta gyola, oshe okyinda duu di gyola.

⁸ Ongyeso ongwu fan fo agba mgban, man a kye ungwɔ dafi unggwɔ ogbagbadzidzi, nle gbe yi ola ngwuta woke

onekyoo. Man aye ongwu ta mgbi onekyoo ma yee eyi,

⁹ Ta ungwɔ ama ndze yi oshishe nwoto onekyoo mi aye ongwu ta duu kwulu, a kye iwudza eni mi ayese ongwu ta duu, kye sulu.

¹⁰ Ne ongyeso ongwu ta fo agba mgban, man mce okwulewo, nkwiine dafi itoci sini, ngwuta kye esho wa gyeke okwokyiikwokyi mgbi ekyoo mi aye ongwu ta beyi eni mgbi oshishe nani.

¹¹ Iyi mce na gbɛɛ Onuno. Aye eni ongwu ta na ye nuno, ne ibyi inggise ama nweni onuno na duu kwulu.

¹² Ongyeso ongwu ne fo agba mgban, ta a kyi kwɔdze aye ongwu ta mgbi onɔ yi ofyia beyi mce, man a yee iifu. Nghanɛ aye ongwu ta mgbi onɔ yi otu duu dze yi osa wuba.

¹³ Ngwi ani le kyidi ne, ani fwo uyee le bulu mi idzidze awo kwu ela mi ela okwukwo gbɛɛ: <<Ibli! Ibli! Ibli mbi imba mgbi ese neni, mi ikye agba ngwi engyeso angbeka eta ntona le wewo ofo mani!>>

9

¹ Ngwi ongyeso ongwu da fo agba mgban ne, ani di mce ngwuta mi esho luba ese. A kye ungwɔ okwulu ishe ndondu ba na nu mce nani.

² Ono ngwi o kyi kwulu ishe na ma, iwu kyee mi ele dafi iwu mgbi ola okwukwo mani. Iwu na nu onɔ yi akpesho duu yifu.

³ Man obagidi to mi iwu na kpatse ese a di kye mfye nu ma dafi ito mfye mgbi mnaa ongwɛ ese neni.

⁴ A nya ma gbɛɛ nu ma ka kyo oshe mi ese naadi afutse onyi hona ekwo unkonyi ba, kpaa li inggise ama ndze yi ambe mgbi Imgbasho mi ebeshu mgbi ama ba mata.

⁵ A nu ma mfye gbɛɛ nu ma ngwɔ inggise ba, kpaa li onu ma iso mi ofyia eda kyoon. Ma Iso ngwi a gye ma di dze dafi otooto mgbi mnaa onɔ ngwi i to inggise mani.

⁶ Mi egbe ntona ma, inggise ka pita ikwongye, kpaa a ka dun ba; a dika mina okwulu, nghaduu ikwongye ka tsinya dza-mata.

⁷ Obagidi ntona to dafi mmya ngwi a me ma ewo ika mani. A kye ungwɔ wo ma mi ikye dafi akata abashi mani, ine mgbi ama lu ine inggise owamyɛ.

⁸ Otu mgbi ama dze dafi otu mgbi engyaa, aba mgbi ama di dze dafi aba ugaba.

⁹ A dze yi okpalika ndze dafi okpalika ashashi mani, ma adu mgbi asha mgbi ama dze dafi akpala ogboogbo mgbi mmya beyi mmyikwukwo ibyibyi nkwa du tole ke ika mani.

¹⁰ A dze yi odu di li to dafi mnaa mani, ma mi odu mgbi ama, a dze yi mfye onu inggise iso mi ofyia eda.

¹¹ A dze yi uto nkye ma le teyi, ongyeso ongwu ishe ndondu ba nani, ongwu iyin mi ondu iHibru li Abadon, mi ondu iGriki li Apolion (Ongye odzili).

¹² Ibli ongwi ababo nye waali; ibli angbeka ngbi efa ka kye iyikpa ma.

¹³ Ongyeso ongwu gyin fo agba mgban, man ani fwo ela tokye mi okoko ene mgbi iwashi abashi ndze iyayi Imgbasho nani.

¹⁴ Ela na gbo yi ongyeso ongwu gyin ndze yi agba na gbæ, <<Kye shelu ongyeso ene ngwu a bwa ma adi mi ekyoo okwulewo mgbi iYufreti nani.>>

¹⁵ Man ongyeso ene ngwu a teyi kye ma dzeke le fe obyi ne yeye yi egbe yi ofyia beyi onova ma, a she ma ta gbæ nu ma ngwo inggise onyi ikye eta mani.

¹⁶ Ani fwo mmbwo oblakwutse ama ndoto mmya ma li imilion ideli efa.

¹⁷ Mmya yi ama oto ma ngwu ani di mi ine odiidi ma to ngha aani: Okpalika mgbi ama pita wo omuma, onbyinbyi vluvlu ye wo omuma dafi ofufu odaka mani. Ikye mmya ntona lu ikye ugaba, mi ondu mgbi ama ola, iwu beyi ofufu odaka le to mi ele.

¹⁸ A ngwo inggise onyi ikye eta ma yi iso eta ntoneni: Ola, iwu, beyi ola ofufu odaka nle to mi ondu mgbi mmya ntona mani.

¹⁹ Mfye mgbi mmya ntona dze mi ondu beyi mi odu mgbi ama; ikyesine odu mgbi ama dze dafi ifa, ndze yi ikye li laaba mani.

²⁰ Inggise owamye ama nsisi ngwu iso ntone ngwo ma ba ma, di kyatitukwu mi ungwo ibwubwe ngwi a le kyo ba kpoo; a nya osunu emese ba, yi adagye abashi, iyudza onzundze okwokwo, itigbla, ikwutse yi ekwo ikwukwo ngwi ka di naadi fwo hona kyikye ba na ba.

²¹ Naadi a nya yi inggise ongwongwo yi obudei okyokyo yi amah hona mmyi mgbi ama oyi yi kpaa ba.

10

Ongyeso yi ongwaafe ofulu-fulu

¹ Ne ani di ongyeso oka odatu kye esho le ba ese. A tukwun yi akpa, mmbwo di lowa nyan akye mi esho; ine mgban kwo dafi ono mani, afo mgban di dze dafi otlese ola.

² O kye ongwaafe ofulu-fulu nlasisa byabo. O kye afo mgban abugye tuoke mi onekyoo yi afo mgban abube mi ese,

³ man o si feela okwukwo dafi agwudu otseete mgbi ugaba mani. Ono ngwi o feela mata, ela mgbi akpala egyafa ntona sandu.

⁴ Ngwi akpala egyafa sandu ne, ani wewo okyi lolu; nghaduu ani fwo ela mi esho gbæ, <<Kye odze ngwi akpala egyafa ntona gbo na da dika kye lolu woke ese ba.>>

⁵ Ne ongyeso ongwu ani teyi din kye afo kwudze onekyoo yi ese na, kyile abugye mgban lu esho.

⁶ Man o fa mbi ongwu ndze oshishe nghataa gyegwu nani, ongwu nta esho yi ese yi onekyoo beyi ungwo ama nto mboma duu, di gbæ, <<Ono ombeembe ka dzema wuba!

⁷ Nghaduu mi egbe ngwi ongyeso ongwu gyafa ka wewo ofo agba mgban ma, ungwo odaada mgbi Imgbasho ka mmbwumbwo, yeye dafi o teyi noola nya engbido mgban ama ogbæse mani.>>

⁸ Ne ela ngwi ani teyi fwo mi esho na diye gbodze yi ani kpoo gbæ: <<Lu, ka kyi gbelu afe ofulu-fulu nlasisa mi abo ongyeso nkwoodze mi onekyoo beyi ese nani.>>

⁹ Nghane ani ke mbi ongyeso na ka nyan gbæ non kye ongwaafe ofulu-fulu na nu ani. O nya ani gbæ, <<Gbæ di kye gye. Ka nu ifu mgbi abu maama, kpaa ka fyumfya mi ondu mgbi abu dafi enewo mani.>>

¹⁰ Ani kye gbelu afe ofulu-fulu ongbungbe mi abo ongyeso na kye gye. I fyumfya mi ondu mgbi ani dafi enewo mani, kpaa ngwi ani kye gye mbe ne, ifu mgbi ani ye maama.

¹¹ Ta a nya ani gbæ, <<Abu ka yegbo kyeme mi ikye inggise ibyibyi, emi ese yi ondu dze beyi emi uto.>>

11

Obwende efa ntonani

¹ Ta a kye agida ndze dafi ashi omba ungwo mani kye nu ani: di nya ani gbæ, <<Lu ka kye mbalu ozu okwukwo osunu Imgbasho, beyi iwashi, di kye gbolu mmbwo inggise ama nle sunu mi ele duu.

² Kpaa ka mba ifyude ozu okwukwo osunu Imgbasho na ba, dzanta dzeke, ikyekye a kye nu Udzengye ntonani: a dika kyo itukwu ma mi ogalu osaan mi onova eta yi ofyia egyin.

³ Man ani ka kye mfye nu obwende mgbi ani ngbi efa ntonani, a ka kye angwuto ikwu wo di yegbo eso mgbi Imgbasho mi onova eta yi ofyia egyin.>>

⁴ Obwende efa ntone li ekwo olivi ngbi efa mani, beyi akoala ngbi efa nkwo to iyayi Otse Imgbasho mgbi ese neni.

⁵ Ma ali inggise nmima okyo ma ungwo yo, ola li to mi ondu mgbi ama kye ma gye: li ito ofe ngwi ali inggise nmima okyo ma ungwo duu ka kwulu joani.

⁶ A dze yi mfye okye esho tukwu, gbæ ni mmbwo ka kya ba, mi egbe ngwi ama le gbæso mgbi Imgbasho mani. A di dze yi mfye okyata eni yee eyi, odi nu ali ito iso okwulewo, alono ngwi a mina duu.

⁷ Ono ngwi a ngyelu obwende mgbi ama ma, mmbwaba ongwu nto mi ishe odondu ba na ka gblika yi ama, di ngha ma yi mfye di ngwo ma.

⁸ Ikwo mgbi ama ka tila la ingofe mgbi ongbodzi ogalu, ngwi a li kwu mi ambe

gbɛɛ, iSodon yi Igyibiti, imbe ngwi a kye Otse mgbi ama kpaa gbokwo ekwatsi nani.

⁹ Mi egbe eta do itsitsi, ali inggise mi agwo, ondudze, yi ese ka kyidi ikwo mgbi ama kpaa ka fwa gbɛɛ ni a ka kye ma ndzi ba.

¹⁰ Imba mgbi ese ka tsatsa mi ikye ma, di gha ewoma umba, ikyekye oyegbo efa ntone nu ese iso.

¹¹ Kpaa ngwi i wa nye egbe eta yi itsi ne, mmye kye mbi Imgbasho wa kaka ma, man a kyato dzekunto, idzidzi si kwulu ama ndi mani.

¹² Ta oyegbo efa ntona fwo ela okwukwo kye esho le nya ma gbɛɛ, <<Luba esho na.>> Ngwi a le lu esho ne, engyikyili mgbi ama toke le di ma.

¹³ Mi obyi na yeye ese suusu man onyi mi ikye iwyo mgbi ogalu na dzili. Inggise kwulu idubu egyafa mi ese osuusu nani, ne i kwulu ama nwato ma ewo, a di kye oshewo nu Imgbasho ongwu esho.

¹⁴ Ibi ongwu fan nye waali; ongwu ta kyema dzikan-dzikan.

Agba ongwu gyafa mani

¹⁵ Ongyeso ongwu gyafa fo agba mgban, man ela ama okwukwo to mi esho le gbɛɛ: <<Esuto ongwu ese yee esuto mgbi

Otse mgbi eyi yi iKrestu mgban, o dika kyuuto nghataa imbise gyegwu.>>

¹⁶ Man engyukwo nghi osudene, ama nsoto itsuuto mgbi ama mi inai Imgbasho ma tukwuke kye ikye weese di sunu Imgbasho.

¹⁷ A le gbɛɛ:

<<Eyi ta abu angba,

Otse Imgbasho onghaangha,
Ongwu ndze onene di teyi dze,
ikyekye abu ky kyelu mfye
mgbi abu okwulewo
di wita okyuuto.

¹⁸ Ese gbeka buntse;

ikyekye ono itingga mgbi abu gyo.

Ono gyo ogbo emi
ikwukwo ikwo wa,
odi nu engbido mgbi
abu ama ogbese umba
beyi emi osaan mgbi

abu yi ama nsunu iyi mgbi abu mani,
ama ongbungbe yi ama nshewo duu;
odi dzili ama ndzili ese mani.>>

¹⁹ Ta a kwulu ozu okwukwo osunu Imgbasho mi esho, man mi idzidze ozu okwukwo osunun na, a di imu mgbi ondu odzeedze mgban. Man mmbwo naabo ba, imbe le kwadu, akpala le gbo, ese le suusu, mmbwo akwutse okwulewo di kya.

12

Ongyaa na beyi Ozumenyi

¹ Ambe okwukwo okwulewo to mi esho: ongyaa kye ono wo ewo dafi angwuto, yi

ofyia mi atafɔ mgban beyi okpapyi mce iwyoedefa mi ikye mbon.

² O dze yi ifewo ne imba ogboogbo yi owulewo mgbi imba non makwo to dafi o le mbongwɛ mani.

³ Ne ambe oka di to mi esho: ozumenyi omuma okwukwo ndze yi ikye nghi egyafa yi agbe nghi iwyo beyi okpapyi egyafa mi ikye mbon.

⁴ Odu mgban kye fyalu onyi mi ikye eta mgbi mce di kye ma ngwuta luba ese. Ozumenyi na kwulese dzekiyayi ongyaa nle gblimba nani, ikyegbɛɛ ni ongwu kye ongwɛ na gye mi ono ngwi o mba yo.

⁵ O mba ongwongyulo, nka kye ese duu teyi yi okwuta uto ashashi. A kye lafwan ongwɛ lu mbi Imgbasho ka soke itsuuto mgban.

⁶ Ongyaa na si tsinya lu okwese mi imbe ngwi Imgbasho me dzanke ngwi a ka gbewebyin ofyia ngwusefa don efa mani.

⁷ Man ika kyee mi esho. Imaikye yi engyeso mgban gblika yi ozumenyi nani, ozumenyi yi engyeso mgban kpaa di gblika yi ama.

⁸ Kpaa ozumenyi fyumfye me ba, man a dze yi imbe mi esho wuba.

⁹ A kye andefe ozumenyi na ngwuta luba ese, ifa tugbe ngwi a kwun di olodu hona iSatan, nkye ese duu wende nani. A kyon ngwuta luba ese yi engyeso mgban.

¹⁰ Ne ani fwo ela okwukwo mi esho gbɛɛ:

<<Onene owato-wato yi mfye yi esuto mgbi Imgbasho mgbi eyi, yi mfye mgbi iKrestu mgban ba wa. Ikyekye ongwu nle du ongwufabo mbi emi ongwuneyi nya Imgbasho ono yi otu ma, a kyon ngwuta luba ese wa.

¹¹ A nghan mi eyi mgbi Ongwummala beyi elodze mgbi ama okyo obwende mani; a di oshishe mgbi ewoma kpa ma itukwu nyese ba, nghan a kye onbukwo nu eba.

¹² Nghanema ama nto esho tsatsa na!

Kpaa ahoo mbi ese beyi onekyoo, ikyekye olodu lu ese mbi ema!

O mbwo yi itingga, ikyekye o ye gbɛɛ ono mgban le gbu ba.>>

¹³ Ono ngwi ozumenyi difwi gbɛɛ a kye ongwu ngwuta luba ese ne, o si wita olo ongyaa nmba ongwongyulo na onya.

¹⁴ A kye asha mgbi uyee okwukwo nghi efa nu ongyaa na, ikyegbɛɛ non bulu lu okwese mi imbe ngwi a me dzeke ikyon nani, imbe ngwi a ka gbekabyin mi onova eta do itsitsi, ngwi ozumenyi na ka to gbe ba mani.

¹⁵ Ne ifa na tuye eni mi ondu mgban dafi ekyoo mani lukwu ongyaa nani, ikye ni eni gben lu.

¹⁶ Nghaduu ikpese ya ongyaa na abo okwulu ondu mgban kye ekyoo ngwi ifa na tuye ni ondu na mbe.

¹⁷ Ta ozumenyi si kyittinga kpakpa yi ongyaa nani. Nghanɛ o wuta ika yi eto mgban ama nsisi duu. Ama nsunu ola mgbi Imgbasho di kwudzekɛ mi obwende mgbi iYesu mani.

¹⁸ Man ozumenyi na si kwudzekɛ mfyan mi onekyoo.

13

Mmbwaba efa ntonani

¹ Ta ozumenyi na tɔ mi ekyoo dɔkɛ mfyan. Ani di di mmbwaba tɔkyɛ onekyoo. O dze yi agbe ngbi iwyo beyi ikye egyafa, yi okpapyi iwyo mi agbe mgban ntonani, ma mi ali ikye mgban duu, o dze yi iyi ofya Imgbasho ito mi ele.

² Mmbwaba ngwi ani di ma lu ishafwan, kpaa o dze yi afɔ dafi afɔ mgbi mndi di dze yi ondu itɔ mgbi ugaba mani. Ozumenyi na kye enepɛ mgban nu mmbwaba na yi itsuuto beyi mfye okwulewo.

³ I dze dafi ikye mgbi mmbwaba na oka dze yi ifwa okwukwo mi ele, nghaduu ifwa na myɛ. Nɛ i kwulu ese duu ewo man a kyeɔd mmbwaba nani.

⁴ Inggise duu sunu ozumenyi na ikyekye o kye mfye nu mmbwaba nani, a sunu mmbwaba na di byita gbɛɛ, <<Li emɛ gyo yi mmbwaba nɛ? Li emɛ ka kye afɔ twɛsɛ gblika yan gbɛ?>>

⁵ A nu mmbwaba na ondu ogbo elodze mgbi ewo okyile esho yi ito ofya Imgbasho, odi kyo mfye mgban mi egbe idubu onyi, ideli efa yi ngwuseta.

⁶ O kwulu ondu ofya Imgbasho ito, di mben iyi, yi imbe ngwi o dze beyi ama nto esho duu.

⁷ A nun mfye ogblika yi emi osaan di ngha ma. A di nun mfye mi ikye ali udze, inggise, onduɔdɛ beyi ese duu.

⁸ Ama ngwu a lo ma iyi mi afɛ mgbi Ongwummala duuse ni a ta ese ba duu, ka sunu mmbwaba nani.

⁹ Inggise ndze yi adɔ yo, no fwo.

¹⁰ Inggise ama ndze gbɛɛ
a ka kwu ma ofyɛ yo,
li ofyɛ ngwi a ka kwu ma.

Ama ndze mbiso a ka
ngwo yi okwusunkli yo,
li mi okwusunkli ngwi a ka ngwo ma.
Ungwɔnɛ mina onyɔtse okwu-kwu yi
itukwu oshiishi beyi okwudze mi otsitsi
mi aye mgbi emi osaan.

Mmbwaba nto mi ikpɛsɛ mani

¹¹ Nɛ ani di mmbwaba oka, tɔkyɛ ikpɛsɛ. O dze yi agbe ngbi efa dafi ongwummala, kpaa o gbɔdɛ dafi ozumenyi mani.

¹² O li kyo ali mfye mgbi mmbwaba ongwɔ ababo na duu gbikyon, di li nu ese yi ama nto ele duu sunu mmbwaba ongwɔ

ababo, ongwɔ ifwa mgban okwukwo myɛ nani.

¹³ O di kyo ambe ama okwulewo ogbagbadzidzi, onoola tɔ mi esho ba ese ni inggise duu di.

¹⁴ Mi ikye ambe ama ngwi a nun mfye gbɛɛ non kyo gbikye mmbwaba ongwɔ ababo nɛ, o kpagya inggise ama nto ese nɛ wo. O wo ma ola gbɛɛ nu ma tuo adagye ikye okye mmwe nu mmbwaba ongwɔ ma tanmmya yi okwusunkli kpa ka dze oshishe nani.

¹⁵ A nun mfye okye mmyɛ wo adagye mgbi mmbwaba ongwɔ ababo nani, ikyegbɛɛ non gbɔdɛ odi ngwo ama nfwa osunu adagye na mani.

¹⁶ O di si ali inggise duu, ama ogyengye yi ama oshewo, emi aludu beyi emi adze, ama nbyabo ewoma beyi ofyɛɛ, gbɛɛ nu ma gbe ambe mi abugye hona ebeshu mgbi ama,

¹⁷ ikyegbɛɛ ni inggise onyi kpaa ka gya ungwɔ hona kye ungwɔ gya ba, sede non dze yi ambe, ngwi li iyi mgbi mmbwaba na naadi mmbwo ngbikye iyi mgban mani.

¹⁸ Ungwɔnɛ mina ozoyeye. Inggise ndze yi ine odiidi yo, no kye gbɔlu mmbwo mgbi mmbwaba ntonani, ikyesine li ambe mgbi inggise. Ambe mgban li egyin egyin egyin.

14

Ongwummala yi emi idubu ideli onyi ngwusefa don ene ntonani

¹ Nɛ ani ndine, ta mi iyayi mbi ani Ongwummala dze, kwudzekɛ Ungwɔ idzayɔn, ama nto biyan li ama ngwu a lo iyi mgban beyi Otson mi ebeshu mboma mani.

² Man ani fwo adu kye esho dze dafi agwudu mgbi eni ofɛ-ɛɛ beyi adu mgbi akpala okwukwo. Adu ngwi ani fwo ma dze dafi mgbi ama ogbla ozuna le gbli ozuna mgbi ama mani.

³ Ta a shashi ofufe mi iyayi itsuuto yi atta owamye ngbi ene beyi engyukwo ntonani. Inggise onyi kpaa yagba kpayi ashi ma ba, sede li inggise idubu ideli onyi ngwusefa don ene ngwu a dula ma wato mi ese ma ta.

⁴ Ntone li ama nmbe ewoma yi engyaa ba mani, lubana a kye ewoma dze saan. A li kyeɔd Ongwummala ali imbe ngwi o ke duu. A gya ma gyaagya mi idzidze inggise di kye ma fife nu Imgbasho beyi Ongwummala dafi ungwogye ofufe mani.

⁵ A fwo onya omwaamwa mi ondu mgbi ama ye ba; a dze yi obube ba.

Eso mgbi engyɛsɔ etɛ

⁶ Nɛ ani di ongyɛsɔ oka le bulu mi esho, o dze yi eso mgbi oshishe gyegwu ogbɔɔgbɔ ndze mi ikye mgbi inggise ama nto ese nɛni, yi agwo yi onduɔdɛ beyi ali inggise duu.

⁷ O gbo mi ela okwukwo gbɛɛ, <<Mio Imgbasho di kye okwɔkwɔ nun na, ikyesine obyɪ mgban ogbiikwɔ ma gyo wa. Sunu ongwu nta esho yi ese, onekyoo beyi imbe eni le lu nani.>>

⁸ Ongyeso ongwu fan kyedɔ di gbɛɛ, <<Anghodzi iBabyilon bulu wa, nene li ogalu ngwi nu ese duu fya mi amah mgban nani.>>

⁹ Ongyeso ongwu ta kyedɔ ma di gbo mi ela okwukwo gbɛɛ: <<Inggise nsunu mmbwaba yi adagye mgban di gbe ambe mgban mi ebeshu naadi mi abo yo,

¹⁰ ongwu kpaa ka wa eneekwɔ itingga mgbi Imgbasho, ngwi a kye yaoke mi abumfye mi ibwe itingga* mgban nani. A dika nun iso yi ola ofufu odaka mi inai engyeso osaan beyi inai Ongwummala.

¹¹ Man iwu iso mgbi ama ka du nghataa gyegwu. Onya dzema ba otu yi onɔ mbi ama nsunu mmbwaba na beyi adagye mgban, hona mbi ali inggise ngbe ambe mgbi iyi mgban duu.>>

¹² Ungwɔne mina itukwu oshiishi mi aye mgbi emi osaan ama nngyo ola mgbi Imgbasho di kwulesɛ mi otsitsi mbi iYesu mani.

¹³ Ne ani fwo ela kye esho gbɛɛ, <<Kye lolu ungwɔneni: <<Ogbumse li emi ikwukwɔ ama nkwalu mi ifu Otse wita onene ngkataa lu iyayi.>>

Onodzi gbela gbɛɛ, <<En, a ka tonya mi idɔ mgbi ama okyɔkyɔ, lubana okyɔkyɔ mgbi ama ka kyedɔ ma.>>

A she ese dafi a li she eto neni

¹⁴ Ani ndine, man akpa gbosa mi iyayi mbi ani, ne ongwu nsɔdze mi akpa na ma li inggise ndze <<Dafi Ongwe Inggise mani>> yi akata abashi mi ikye beyi agebe ogyigye mi abo mgban.

¹⁵ Ne ongyeso oka tase mi ozu okwukwo osunu Imgbasho si wa inggise ngwu nsɔdze akpa na ela gbɛɛ, <<Kyelu agebe mgbi abu wita oshe, ikyekye onɔ oshe-she gyo, lubana eto mgbi ese nye wa.>>

¹⁶ Nghane ongwu nsɔdze akpa ma si ngwi agebe mgban mi ese man kyi shelu ese dafi eto mani.

¹⁷ Ongyeso oka di tase mi ozu okwukwo osunu Imgbasho mi esho, ongwu kpaa di dze yi agebe ogyigye.

¹⁸ Ongyeso oka kpɔɔ, ongwu nle di mi ola, kye mi iwashi wa wa ongwu ndze yi agebe ogyigye na ela gbɛɛ, <<kyi kyelu agebe mgbi abu ogyigye na kye shelu awawa ekwɔ onaana mi ese, ikyekye eto mgban obube nye wa.>>

¹⁹ Ongyeso na ngwi agebe mgban mi ese man kye shelu awawa ekwɔ onaana obube

ntonani. O gbe ma ngwuta yaoke ishe imbe ngwi a kye afɔ jiye ma[†], otso itingga mgbi Imgbasho.

²⁰ Ishe ngwi a kye afɔ tɔdɔ ma ma dze ifu ogalu ba. Ne eyi si fe tɔ mi ishe na shigbo me o dɔ mmya onbukwɔ, fe lu dafi imai ideli onyi yi ngwusene sini.

15

Engyeso egyafa yi iso egyafa

¹ Ani di ambe oka okwulewo kpakpa mi esho; engyeso ngbi egyafa yi iso egyafa emi olele, ikyekye yi iso ntone itingga mgbi Imgbasho ngye.

² Ani di di ungwɔ ndze dafi onekyoo idzinggi ngwuo yi ola, mi ele ma inggise ama nngba mmbwaba na ika beyi adagye mgban yi iso mgbi iyi mgban ma kwudze to ele. Ali inggise mgbi ama byi ozuna ngwi Imgbasho gbe nu ma mani

³ di shashi mgbi iMose onghidɔ mgbi Imgbasho beyi ashi mgbi Ongwummala gbɛɛ: <<Ogbagbadzidzi beyi okwulewo li ungwɔ

mgbi abu okyɔkyɔ,

Otse Imgbasho onghaangha.

Ofe mgbi abu li otsitsi yi oyeye, Uto mgbi ese duu.

⁴ Li eme ka tsio abu ba, Otse,

di kye mmwe nu mi iyi mgbi abu ba?

Lubana li abu yuo le saan.

Ese duu kawa sunu abu,

ikyesine ali mgbi abu osaan tsotɔ wa.>>

⁵ Ngwi ungwɔ ntone nye ne, ani di a kye kwulu ozu okwukwo osunu Imgbasho mi esho beyi iTabenako Obwendɛ nani.

⁶ Mi ozu okwukwo osunu Imgbasho na, engyeso egyafa tɔ yi iso ngbi egyafa. A wo angwuto ondlendle gbosine kwɔ yi okpa abashi bwato igee mgbi ama.

⁷ Ne onyi mbi atta owamyɛ ngbi ene ntona kye uga abashi egyafa nu engyeso egyafa ntona yi itingga mgbi Imgbasho mi ele kyeɛ, Imgbasho ndze oshishe gyegwu neni.

⁸ Ne iwu mi okwɔkwɔ beyi mfye mgbi Imgbasho gbe ozu na sɔ man inggise onyi kaka ele wuba nghataa iso egyafa mgbi engyeso egyafa ntona mbwumbwo.

16

Uga itingga mgbi Imgbasho egyafa

¹ Ne ani fwo ela okwukwo kye mi ozu okwukwo osunu Imgbasho le gbo yi engyeso egyafa ntona gbɛɛ, <<Ke ka kye uga itingga mgbi Imgbasho egyafa ntona yangwuta mi ese na.>>

² Ta ongyeso ongwu ababo ke ka kye uga mgban yangwuta mi ese, man indza

* 14:10 14:10 Ibwe itingga tso gbɛɛ, a ka gye iso ngwi Imgbasho li nu ama nkyitingga mani † 14:19 14:19 Awawa ekwɔ onaana na a li gbe yaoke ishe kye afɔ tɔdɔ ma ikye okye kalu eni yee eneekwɔ

okpekpe yi owulewo gbofwe to mbi inggise ama ndze yi ambe mgbi mmbwaba di li sunu adagye mgban mani.

³ Ongyeso ongwu fan kye uga mgban yangwuta mi onekyoo, man i kyata yee dafi eyi mgbi inggise ikwukwo mani, ta ungw oshishe ama nwoto onekyoo duu kwulu.

⁴ Ongyeso ongwu ta kye uga mgban yangwuta mi ekyoo beyi ibu, man a yee eyi.

⁵ Ne ani fwo ongyeso ongwu nle di mi eni ma gbæ:

<<Abu li emyemye mi ikwo ntoneni

abu ndze onene di teyi dze,

abu Imgbasho Osaan,

ikyekye abu dze yi mfye

ogbiikwo mi ito ofe neni;

⁶ lubana a dze eyi mgbi emi osaan

mgbi abu yi ama ogbæse,

abu di kye eyi nu ma wa dafi

i gbuo yi ama mani.>>

⁷ Man ani fwo ela nu uka mi iwashi gbæ:

<<En, Otse Imgbasho Odatu,

ikwo mgbi abu li oyeye di li otsitsi.>>

⁸ Ongyeso ongwu ne kye uga mgban yangwuta kyike on, man a nu on o mfye odze inggise ola yi otsetse mgban nani.

⁹ Olola nkwarewo na to ma ta a fya iyi Imgbasho ongwu nle di mi ikye iso ntone ne ito, kpaa a fwa okyatitukwu di kyile iyi mgban desho.

¹⁰ Ongyeso ongwu da kye uga mgban yangwuta mi itsuuto mgbi mmbwaba nani, ta iifu byakpa kyi gbelu esuto mgban so, man iso nu inggise wita ole la ewoma aba mi ide

¹¹ di fya Imgbasho ongwu esho ito mi ikye iso beyi indza mgbi ama nani, kpaa a fwa okyatitukwu mi ungw ngwi ama pepe kyo mani.

¹² Ongyeso ongwu gyin kye uga mgban yangwuta mi ekyoo ogbagbadzidzi iYufreti nani, man eni mgban si ngwo ikye ome ofe mi ikye uto ama nkye mi onosa mani.

¹³ Ne ani di onodzi ibwubwe nghi eta nto dafi alio mani; a to mi ondu mgbi ozumenyi, to mi ondu mgbi mmbwaba di to mi ondu mgbi oyegbo atsika.

¹⁴ A li onodzi emese tole kyo ambe okwulewo, a di li tase ke mbi emi uto mi ese duu, okwu ma kwake mi ikye egbe ika okwulewo mgbi Imgbasho onghaangha nani.

¹⁵ We di iYesu gbæ, <<Dii, ani ka ba dafi emumyi mani! Ikyese ka dze yi inggise nkwasisa di gbe angwuto mgban toke biyan, ikye ni ongwu ka kye ibiba di kye iba mgban dese ba mani.>>

¹⁶ Ne onodzi ibwubwe ntona kwu uto kwake mi imbe ngwi a li kwun mi ondu iHibru gbæ Amagidon nani.

¹⁷ Ongyeso ongwu gyafa ma kye uga mgban yangwuta mi awo, man ela okwukwo

to mi ozu okwukwo osunu Imgbasho mi itsuuto, le gbæ, <<I ngye wa!>>

¹⁸ Man mmbwo naabo, gbaadu, akpala gbo ese di suusu kpakpa. Ese osuusu onyi kpaa gyo yi ongwune waba wita mi on ngwi a ta inggise nghataa ba oneneni, Ese osuusu ne timbi ngha duu.

¹⁹ Ogalu okwukwo na gha aye eta, ta ogalu mi ese duu gbobu. Imgbasho we Angbodzi iBabylon man kye ibwe eneekw o itingga mgbi ongwu kye nun.

²⁰ Ali ibu duu tsebyulu, ungwwo kpaa a di ma wuba.

²¹ Akwutse mmbwo nshe ngwi undo ma me ideli onyi kye esho wa le gye inggise. Man a nya Imgbasho agya mi ikye iso mmbwo akwutse nani, ikyekye iso na kwulewo kwuba.

17

Owagbai beyi mmbwaba

¹ Onyi mbi engyeso egyafa ama ndze yi uga ma ba wa gbo yi ani gbæ, <<kwaa, n ka tso abu ado okwookwo mgbi andefe owagbai ongyaa, nsodze ikye eni ibyibyi neni.

² Uto emi ese ne li kyo amah yan, imba mgbi ese di li fya mi eneekw amah mgban.>>

³ Ne ongyeso na kye ani mi Onodzi lu imbe okplagada. Mmana ani di ongyaa sodze mmbwaba omuma bletete a lo ito ofya Imgbasho kpatse ewo mbon, o di dze yi ikye egyafa yi agbe iwyo.

⁴ Ongyaa na me ewo mi angwuto omuma vluvlu beyi omuma jaan hini, dile kwo yi abashi, ikwutse onyina-nyina beyi ikwutse okwokwo mi ifu mgbangyilole. O kye inumbe abashi ngwi ungw ama okpekpe beyi ungw ama otsiidza mgbi amah mgban woto ele ma byidze abo.

⁵ A lon iyi mi ebeshu gbæ: ANGBODZI IBABYLON, ONO OWAGBAI DUU BEYI UNGWO AMA OKPEKPE MI ESE.

⁶ Ani di dafi ongyaa na wa eyi mgbi emi osaan le fya mani, eyi mgbi ama nle kyo obwende mi ikye iYesu.

Ngwi ani din ma i kwulu ani ewo kpakpa.

⁷ Ne ongyeso na nya ani gbæ: <<Kysine ngwi i kwulu abu ewo? N ka nu abu osa mi iba mgbi ongyaa na beyi mgbi mmbwaba ngwi o le to, ndze yi ikye egyafa beyi agbe iwyo nani.

⁸ Mmbwaba ngwi abu di nani, teyi dze, onene o dzema wuba, dika wa tase mi ikplishe di lu mi odzili-dzili mgban. Ka kwulu inggise ama nto ese, ama a teyi lo ma iyi mi afe mgbi oshishe ba kye mi on ngwi a ta ese ma ewo, mi on ngwi abu di mmbwaba nani, ikyekye o teyi dze, onene o dzema wuba, nghadu o dika waba.

⁹ Ungwōne mina ozoyeye. Ikye egyafa ntone li unggwo egyafa ngwi ongyaa na sɔdze efu ntonani.

¹⁰ A di li uto nghi egyafa. Eda toma wuba, onyi kale kyuuto ma, oka ma ba wa ba; kpaa non wa ba yɔ, li kyeme ngwi o ka kyuuto mi ongwono gwee ta.

¹¹ Mmbwaba nteyi dze, kpaa onene o dzema wuba na, li uto ongwu gyata. O dze dafi egyafa ntonani, kpaa o le ba ikye ni a wa dzilin kyoon.

¹² Agbe iwyo ngwi abu di na li uto nghi iwyo ama ntu esuto waba, ama nkawa gbɛ mfye dafi uto ononyi yi mmbwaba na di kyuuto mi ongwono gwee mani.

¹³ Oweka mgbi ama li ungwonyi, a dika kye owekwo beyi mfye mgbi ama nu mmbwaba nani.

¹⁴ A ka gblika yi Ongwummala, kpaa Ongwummala ka ngha ma ikyekye o li Otse mgbi emi otse di li Uto mgbi emi uto, ama ndi kye yi Ongwummala ma, li ama ngwu a kwu ma ela kwu-kwu, sadu-sadu ma, a di li ama nkwardze mi otsitsi.>>

¹⁵ Ne ongyeso na nya ani gbɛ, <<Eni ama ngwi abu di ngwi owagbai ongyaa sɔdze ele ntona, li inggise, ibyi inggise, agwo beyi onduɔze.

¹⁶ Mmbwaba beyi agbe iwyo ngwi abu di na, ka di owagbai ongyaa na tanyi. A ka non yee abubo di non dze ibiba; a ka gyon ikpewo di kyon toola.

¹⁷ Lubana li Imgbasho nu uto ntone duu tsɛwɔdze ungwonyi di gbela kye mfye mgbi ama nu mmbwaba nani. A dika kyungwone nghataa elodze ngwi Imgbasho gbo ma ka mbwumbwo.

¹⁸ Ongyaa ngwu abu di na li ongbodzi ogalu nle di mbi ali uto mi ese duu.>>

18

Ese ogboogbo mgbi iBabylon

¹ Ngwi ungwone wa nye ne ani di ongyeso oka kye esho le ba ese. O dze yi mfye okwulewo, man okwɔkwo mgban nu ese gbosa.

² O feela mi ela okwukwo gbɛ: <<Oblu-blu! Oblu-blu li Angbodzi iBabylon!

O yee ude emese beyi imbe mgbi ali onodzi ibwubwe beyi imbe mgbi ingwuno ama ntsiidza di kyilitukwu.

³ Ikyesine ese ama okwukwo tsatsadu wa fyehye amah mgban. Uto emi ese ne kyo amah biyan, man ama okyummya mi ese ne yee emi aludu mi ikye imina mgban obube nani.>>

⁴ Neta ani fwo ela oka kye esho gbɛ: <<Tase mbon na, emidani,

ikye ni ema ka waabo mi ali ibwubwe mgban na ba, adzi ni ema ka wo iso nka ba mbon ntona ba mani;

⁵ lubana ali ibwubwe mgban kwutoke shigbo to esho, Imgbasho di we ungwɔ ibwubwe mgban.

⁶ Nun dafi o teyi nu abu mani; kpan mkpa dudo mi ungwɔ ngwi o teyi kyo mani.

Yawn ungwɔ owaawa mi ibwe no dze mgban ma wo.

⁷ Nun iso yi owulewo kpakpa dafi o nu ewon okwɔkwo beyi oshishe omyee-myyee mani.

Ikyesine mi itukwu mgban o tsaabo igɛge gbɛ,

<Mmene ani sɔdze dafi Apodza mani; ani li owakwade ba, ani dika kye abo tiko kpaa ba.>

⁸ Ikyenghanɛ, iso ka gban so: ikwongye yi abo otiko yi ootse yi owulewo

beyi onenbwa omba enbwa ka ba mbon mi egbe onyi.

Ola ka kyon gye, lubana Otse Imgbasho ogbon ikwo ma datu.

⁹ Ono ngwi uto emi ese ne ama nkya amah biyan di kyo oyabo mi omyee-myyee mgban di iwu mgbi ola ogyeegye mgban yɔ, a ka tsukwu di kye abo tiko ikyon.

¹⁰ Iso mgban ka wo ma imio, man a ka kwudze fyata le gbɛ:

<<Aho! Aho, ogalu ogbagbadzidzi, Eye iBabylon,

ogalu mfye!

Mi obyi onyi ta Imgbasho fwo abu ikwo waana!>

¹¹ Ama okyummya mi ese ne ka tsukwu di kyelela ikyon, ikyekye inggise onyi le gya ma okye wuba

¹² okye abashi yi iyudza onzundze okwɔkwo yi akwutse osunse mi ifu mgbangyilole beyi akwutse itagwude; angwuto ondlendle, angwuto omuma shinishini yi angwuto ovelevele yi angwuto omuma jaan; ali ito afutse ama ogbungbe beyi ali ito idabo ngwi a kyo mi eve mnii duu yi ekwo ama ofyumfye mmya yi itigbla yi iyudza beyi ikwutse osunse;

¹³ okye akwukwu mgbe, mgbi otse oge iwu, engyie ofyunfyummya ogbungbe beyi ofufu otse otoola, eneeekwo beyi engyie olivi, ofumbu osuse beyi alakama; mnda yi mmala; mmya yi ungwɔ ogbe okye sha ma; yi emi ofyee.

¹⁴ <<A ka gbɛ, <Ungwɔ osuse nmina abu otu duu ma lu dze abu ta wa. Aludu beyi okwɔkwo mgbi abu duu byulu, o ka ye tu ma wuba.>

¹⁵ Ama okyummya ungwō ntone nē, ntu aludu mbon ma ka kwudze fyata, yi imio ewo mi iso mgbān ogyeegye. A ka tsukwu di kyelela

¹⁶ di kwu-ela tō gbēe:

<< Aho! Aho, angbodzi ogalu,
nmewo mi angwuto ondlendle,
angwuto omuma shinishini beyi omuma jaan,
dile kwō yi abashi, akwutse osunse yi akwutse
osunse mi ifu mgbangyilole!

¹⁷ Mi ongwono gwee neta,
onikyo aludu mgbi ogalu nē bulu ngye!
>

<<Ali inggise ama ofa iwudza eni, yi ama odzagaba mi iwudza eni duu, yi ama okyido mi iwudza eni, yi ama okyummya nye ongi onikyekyoo duu, ka dzeke mbo-tunto mbyoo.

¹⁸ Ni a wa di iwu oduudu mgbi ogyola-gyola mgbān ma, a ka gbobakwō gbēe, <Ogalu oka teyi dzema dafi angbodzi ogalu nē jo?>

¹⁹ A ka gbe abo dikye, le tsukwu di kyelela gbēe:

<< Aho! Aho, ongbodzi ogalu,
imbe ngwi ama ndze yi iwudza eni mi ekyoo okwukwo duu
yē emi awuya ikpewo aludu mgbān!
Mi ongwono gwee ta, o bulu waana!

²⁰ Fline won na, emi esho!
Tsokwa won na, emi osaan yi ama ogbikye iYesu beyi ama ogbēese!
Imgbasho fwon ikwō mi ungwō ngwi o kyo yi ema ma wa.>>

²¹ Ne angbodzi ongyeso kyi kyelu ofishi nshe dafi onikwō okpinangwō mani kye ngwuta woke ekyoo okwukwo, si gbēe:

<<Yi ito abumfye nani
a ka kye angbodzi ogalu iBabylon
ngwuta lu ese,
a ka din wuba.

²² A ka fwo ela ozuna beyi ungwō og-boogbo, yi oca ofofo beyi agba ofofo, mbi abu wuba.

A ka tu inggise idabo
onyi mbi abu wuba.

Ela inangwō okpaakpa
ka dede mbi abu.

²³ Osa ipitila ka tsoto
mbi abu wuba.

A ka fwo ela obongyaa
ofufe beyi ongyaa ofufe mbi abu wuba.
Ikyekye ama okyummya mgbi
abu nose nga mi ese duu.

O nu ese duu boofe mi obudei mgbi abu.

²⁴ A tu eyi mgbi ama ogbēese yi emi osaan,
beyi inggise ngwu a
ngwō mi ese duu mbon.>>

19

Atsa mi esho

¹ Ngwi ungwōne wa nye nē, ani fwo ungwō dafi agwudu otseetse mgbi ibyi inggise mi esho le wulu gbēe:

<<Tse Imgbasho!

Owato-wato yi okwōkwō beyi
mfye li mgbi Imgbasho mgbi eyi,
² ikyesine ikwō mgbān li otsitsi di li ayin.

Lubana o ngwō angbodzi owagbai
ongyaa

ongwu nkye ese kyi mbee yi
amah mgbān ogboogbo na ikwō.
Imgbasho yile mkpa kpan ikyekye o ngwō
engbido mgbān.>>

³ A diye wulu gbēe:

<<Tse Imgbasho!

Iwu nto mbon na lu
esho gyegwu-gyegwu.>>

⁴ Engyukwo osudene beyi atta owamye
ngbi ene lake ese di sunu Imgbasho, nsodze
itsuuto nani. A gbēe:

<<No dze nga,
Tse Imgbasho!>>

⁵ Ne ela tō mi itsuuto na, le gbēe:

<<Tse Imgbasho mgbi eyi,
ema engbido mgbān duu,
ema nli mion,

wita mbi ama oyeyikpa nghataa
lu mbi ama onghaangha duu!>>

⁶ Ne ani fwo ungwō dafi agwudu mgbi
ibyi inggise, dafi okadu-kadu mgbi eni beyi
onikyo akpala, le wulu gbēe:

<<Tse Imgbasho!

Ikyesine Otse Imgbasho mgbi eyi
Onghaangha li utō.

⁷ Ni eyi tsatsa di she ewo ta di nun mmwe!
Ikyekye eba okwokyiikwokyi mgbi

Ongwummala gyo wa,

ongyaa ofufe mgbān ma
wewo dze le fe-fe.

⁸ A kye angwuto ondlendle,

nkwōkwō di gbosine,

kye nun gbēe no kyi wo.>>

(Angwuto ondlendle nē, li ambe mgbi ali
osaan mgbi emi osaan.)

⁹ Ne ongyeso na nya ani gbēe, <<Lo gbēe:
<Ogbumse li ama ngwu a bōo ma oga
ongwi onode mgbi eba okwokyiikwokyi
mgbi Ongwummala mani!> >> O di kiyayi
gbēe, <<Ntone li elodze otsitsi mgbi Img-
basho aani.>>

¹⁰ Mi odze nē, ani gbese lanke iyayi ikye
osu nun. Kpaa o nya ani gbēe, <<Ka
kyo nga ba! Ani kpaa li ongbido ung-
wonyi yi abu beyi engwunabu ama nkyo
obwende mi ikye oyeye mgbi ama mbi iYesu
mani. Sunu Imgbasho! Lubana itodze mgbi
oyegbo yo, li onu obwende ngbosa mi ikye
iYesu.>>

*Ongye oto mmya dɔdɛ
mmya onzundɛ*

¹¹ Ta ani di esho kwulu ladɛ man mmya onzundɛ kwudɛ mi iyayi mgbi ani, ongye otɔn ma a kwun gbɛ Oyeɛ beyi Otsitsi. Yi emyemye o li gbiikwɔ di gblika.

¹² Ine mgban dɛ dafi ola onaabo mani, okpapyi dile kwuba mi ikye mgban. A lon iyi mi ewo ngwi inggise onyi kpaa ye ba li ongwu yuon ta.

¹³ O meewo mi angwuto ngwi a kye tswoke eyi, ma iyi mgban li Elodɛ Imgbasho.

¹⁴ Oblakwutɛ emi esho le kyedɔn, le to mmya onzundɛ di wo angwuto onzundɛ, ondlɛndle gbosine.

¹⁵ Okwusunkli ogyigye ngwi o ka kye kwɔdɛ esɛ to mi ondu mbon. <<O ka kye ma teyi yi okwuta uto ashashi.>> O ka nu itingga okwulewo mgbi Imgbasho Onghaangha to, dafi a kye afo jiye awawa ekwo ni eni to mi ele neni.

¹⁶ A lo iyi dɔdɛ angwuto mi oba agya ita mgban gbɛ:

UTO MGBI EMI UTO BEYI OTSE MGBI EMI OTSE,

¹⁷ Ne ani di ongyeso kwudɛ onɔ, o kwu ingwunɔ ama nle bulu mi esho duu ela okwukwo gbɛ, <<Ba wa kwakye yi eka mi onikyo oga ongwɔ onɔdɛ mgbi Imgbasho ne na.

¹⁸ Ba na adzi ni ema gye mmbwe mgbi emi uto yi emi agyegika yi emi anghodzi inggise yi mmbwe mmya yi ama oto ma yi mmbwe mgbi ali inggise duu, ama nbyi abo ewoma yi ofyɛ yi ama oyeyikpa beyi ama olongbo duu.>>

¹⁹ Neta ani di mmbwaba na beyi uto emi esɛ ne yi ama oblakwutɛ mgbi ama kwakye yi eka ikye ogblika yi inggise oto mmya na beyi obyi oblakwutɛ mgban.

²⁰ Kpaa a kyi bwalu mmbwaba nani, beyi ama ogbɛɛɛɛ atsika ama nkɔ ambe ama okwulewo ikye mgban mani. Yi ambe okwulewo ntonɛ, o kpagya ama ngbe ambe mgbi mmbwaba di sunu adagyɛ mgban ma wo. Ama efa duu, a gbe ma ngwuta woke uto mgbi udola nle gbe yi ofufu odaka mi ele.

²¹ Ama nsisi ma a ngwɔ ma mi okwusunkli nto mi ondu mgbi ongwu nle to mmya mani, man ingwunɔ duu kwakye gye ikwo mgbi ama di kwoolo.

20

Onova idubu onyi

¹ Ta ani di ongyeso tokye esho le ba esɛ, byi ungwɔ okwulu ikplishe di byi itse okwulewo mi abo mgban.

² O kyi bwalu ozumenyi, ifa tugbe nani, ongwu a li kwun di olodu, naadi iSatan nani, di tan itse mi onova idubu onyi.

³ O kyon ngwuta woke ikplishe nani, kye tukwulu di kyi kwobe ikye otukwun ofe ole kpagya esɛ wo nghataa ni onova idubu onyi na wa ngye se. Ni ungwɔ na wa nye yo, li kyeme a kawa dulun mi itse mi ongwono gwee.

⁴ Ani di itsuuto, ama nsoto ele ma li ama ngwu a nu ma mfye gbɛ nu ma gbiikwɔ. Ani diye di oshishe mgbi ama ngwu a dɛ ma ikye mi ikye obwende mgbi ama mi odɛ iYesu beyi ikye elodzimgbasho. A sunu mmbwaba na naadi adagyɛ mgban ba, a di gbe ambe mgban mi ebeshu hona mi abo mgbi ama ba. A ye wa dɛ oshishe di kyuuto yi iKrestu mi onova idubu onyi.

⁵ (Emi ikwukwɔ angbeka nsisi duu kyɛɛ mi ikwu ba nghataa onova idubu onyi na ngyɛ.) Nene li okyɛɛ-kyɛɛ mi ikwu ongwɔ ababo mani.

⁶ Ikyese beyi osaan dɛ yi inggise ama nwodɛ mbi ama nkyɛɛ mi ikwu ongwɔ ababo nani. Ikwongye ongwu fan dɛ yi mfye ikye ma ba, a ka li ama ofife mgbi Imgbasho beyi mgbi iKrestu dika kyuuto biyan mi onova idubu onyi.

Ika ngha iSatan

⁷ Ni onova idubu onyi na wa ngye yo, a ka she iSatan adi mi obawi.

⁸ Ta o ka to lu oka kpagya esɛ ngwi a kwu ma di iGogu beyi iMagogu wo mi ayese ene ntoneni, ikye okwu ma kwakye gblika. A mbwo dafi mfyian mi onekyoo mani.

⁹ A gbɔfwe kpatɛɛ esɛ di lawo imbe emidi Imgbasho lato beyi ogalu nkpan itukwu nani. Nghaduu ola kye esho ba esɛ wa kye ma gye.

¹⁰ Ta olodu, nkpagya ma wo ma, a kyon ngwuta woke uto ola nle gbe yi ofufu odaka, imbe ngwi a teyi kye mmbwaba na beyi oyegbo atsika ngwuta woke nani. A kale nu ma iso otu yi onɔ nghataa gyegwu.

Ikwo ongwɔ oleɛ

¹¹ Ne ani di itsuuto onzundɛ nshewo yi ongwu nsɔdɛ ele mani. Esɛ yi akpeshe tse dzata imbe ngwi o dɛɛ mani, nghaduu imbe dzɛma ngwi a ka ke ba.

¹² Ani di di emi ikwukwɔ, ama nshewo beyi ama ogyengye, kwudɛ to inai itsuuto nani, ta a si kwulu afe kwuba. A kwulu afe oka, nli afe mgbi oshishe nani. A gbɔ emi ikwukwɔ ikwɔ mi ungwɔ ngwi a kyo ngwi a di lon mi afe ntona mani.

¹³ Ekyoo okwukwo gbe emi ikwukwɔ ama nwoto mbon nu, ikwongye beyi endzi kpaa gbe emi ikwukwɔ nto mboma ma nu, man a gbɔ ali inggise ikwɔ mi odzɛɛdɛ ungwɔ ngwi otsungwon kyo mani.

¹⁴ Ne a kye ikwongye beyi endzi ngwuta woke uto ola. Uto ola ne li ikwongye ongwu fan mani.

¹⁵ Inggise ta ngwu a lón iyi mi afe mgbi oshishe bayo, a kyón ngwuta woke uto ola nani.

21

Ijerosalin ofufe

¹ Ani di di esho ofufe yi ese ofufe, lubana esho ongwí ababó beyi ese ongwí ababó nye wa, ekyoo okwukwo kpaa di dzema wuba.

² Ani di Ogalu Osaan, iJerosalin ofufe nani, tó mbi Imgbasho kye esho le ba ese, a man dafi ongyaa ofufe ngwu meewo sunse saan mi ikye oban mani.

³ Man ani fwo ela okwukwo kye mi itsuuto na gbée, <<Onene osososo mgbi Imgbasho dze yi inggise, o dika dze yi ama. A ka li emidan, Imgbasho abuon ka dze yi ama dika li Imgbasho mgbi ama.

⁴ O ka kyi fwo lu ma etse mi ine duu. Ikwongye ka dzema wuba naadi elela okyokyo hona akwo omaama naadi owulu-wulu, ikyesine ungwó ama ogbugbe nye wa.>>

⁵ Ongwu nsodze itsuuto ma gbée, <<N le nu alungwo duu yee ofufe! >> Ta o gbée, <<Kyi lolu ungwone woke ese, ikyekye elodze ntone li elodze ogbekabyi ele, a di li otsitsi kpaa.>>

⁶ O nya ani gbée: <<I ngye wa. Ani li Ababó yi Olele, Owita-wita beyi Ongyengye. Ali inggise ngwu ekweni kwun duu, n ka nun eni mi ibu, eni oshishe non wa ayayi.

⁷ Inggise ngwu ngha yo, ka gyokwude ungwóneni, ani ka li Imgbasho mgbán o dika li ongwani.

⁸ Kpaa ama omio yi ama onoyeye ba yi ama ngbe abo wo idza yi ama ongwó inggise yi ama okyo amah yi ama okyo obudei yi emi angwula beyi ama omwonya duu, imbe mgbi ama ka li mi uto ofufu odaka ogbe-gbe. Nene li ikwongye ongwu fan waani.>>

⁹ Ne onyi mbi engyeso egyafa ama ndze yi uga nmbwo yi iso ongwí olele egyafa ntona ba wa nya ani gbée, <<Kwa, n ka tso abu ongyaa ofufe, owa Ongwummala mani.>>

¹⁰ Ta Onodzi kye ani teyi lu mi ungwó okwukwo oshigbo, si tso ani Ogalu Osaan, iJerosalin, tókye mbi Imgbasho mi esho le ba ese.

¹¹ I kwo yi okwókwó mgbi Imgbasho, ma okwókwó mgbán dze dafi mgbi ashua owo onbukwo, dafi ikwutse onyina-nyina, gbosa saan dafi idzinggi nle dze nyina-nyina mani.

¹² Dze yi oka ogbagbadzidzi, nshigbo yi onufe ogalu ngbi iwyodefa, beyi engyeso iwyodefa le ngyo onufe ogalu ntonani. Mi onufe ogalu ntona, a lo iyi agwo mgbi emi

iSrai iwyodefa ntone onyonyi mi ali onufe duu.

¹³ Onufe ogalu li ngbi eta mi onosa yi eta mi aca yi eta mi agwudu beyi eta mi onode.

¹⁴ Ikpishi mgbi ogalu na dze yi akwutse ngbi iwyodefa ngwi a wo itozu mi ele, mi ali ikwutse itozu na, a lo iyi mgbi ama ogbikyé Ongwummala iwyodefa ntona onyonyi mi ele.

¹⁵ Ongyeso ngbódze yi ani ma dze yi agida abashi omba ungwó ikye omba ogalu nani, yi onufe mgbán beyi ewishi mgbán.

¹⁶ A mbe ogalu na dafi aye ene mani, dafi ngwi i tunto ma, li ngha ngwi i tsee kpaa aali. O mba ogalu yi okwuta na si difwi gbée di li imai idubu onyi yi ideli ene mi unto, i tsee di shigbo kpaa ngha.

¹⁷ O kye mbalu ikpishi mgbán man i shigbo dafi okwubo ideli onyi ngwusefa don ene mi ombaamba mgbi inggise owamye, ngwi ongyeso na le kyido ele mani.

¹⁸ A mbe ikpishi na gbosa dafi ikwutse onyina-nyina, beke yi ogalu abashi kyoon, gbosa dafi idzinggi mani.

¹⁹ A me ita ikpishi mgbi ogalu na ingwinda yi ali ito ikwutse osunse duu. Ita ongwí ababó li ikwutse onyina-nyina, ongwu fan li onbyinbyi vluvlu, ongwu ta li onzundze puu, ongwu ne li enotse indrakpakpa otsururu,

²⁰ ongwu da li akpaló opuu, ongwu gyin li akpaló ogloglo, ongwu gyafa li indrakpakpa onyina-nyina, ongwu gyata li enotse ama nkwaye nyina-nyina, ongwu gyane li enotse ndigyo nyina-nyina, ongwu iwyo li indrakpakpa odzakpakpa, ongwu iwyodonyi li ayakwule onzundze, ongwu iwyodefa li omuma vluvlu.

²¹ A me onufe ogalu iwyodefa ntona mi enotse mgbangyilole, ali onufe duu a man mi mgbangyilole onyi. A me onwofe mi ogalu na mi abashi kyoon, gbosa le dze dafi idzinggi mani.

²² Ani di ozu okwukwo osunu Imgbasho onyi mi ogalu na ba, ikyekye Otse Imgbasho onghaangha beyi Ongwummala li ozu okwukwo mgbán.

²³ Ogalu na mina ono naadi ofyia gbée no tse hona fyia mi ele ba, lubana okwókwó mgbi Imgbasho li nun osa, Ongwummala di li ipitila mgbán.

²⁴ Ese ka kyikye mi osa mgbán, uto emi ese dika gbe okwókwó mgbi ama ba ele.

²⁵ Egbe onyi kpaa a ka yile onufe ogalu mgbán tukwu ba, ikyekye otu ka dze imbe na ba.

²⁶ Ese duu ka gbe okwókwó yi mmwe mgbi ama ba ele.

²⁷ Akponyi kpaa ungwó okpekpe ka kaka ele naadi inggise nkyungwo ayiwi hona ungwó onya ba. Nghaduu li ama a lo ma

iyi mi afe oshishe mgbi Ongwummala ma ta ka kaka ele.

22

Ekyoo mgbi oshishe

¹ Ne ongyeso ma tso ani ekyoo mgbi eni oshishe, gbosa dafi idzinggi mani, le fe kye mi itsuuto mgbi Imgbasho beyi mgbi Ongwummala

² nye lu idzidze angbodzi ingofe mgbi ogalu nani. Mi ali aye mgbi ekyoo na ekwo mgbi oshishe kwodze ele, nli wa owawa ita iwyodefa, di li wa owawa mgban ali ofyia du. Afe mgbi ekwo na di dze mi ikye ongyelu ese ootse.

³ Ikamba onyi ka dze ogalu na wuba. Itsuuto mgbi Imgbasho beyi Ongwummala ka dze mi ogalu nani, engbido mgban dika sunun.

⁴ A ka di ine mgban, ma iyi mgban ka do ebeshu mgbi ama.

⁵ Otu ka dzema wuba. A ka mina osa mgbi ipitila hona mgbi ono wuba, ikyesine Otse Imgbasho ka nu ma osa. A dika kyuuto nghataa gyegwu.

⁶ Ongyeso ma nya ani gbæ, <<Elodze ntone li elodzimo di li otsitsi. Otse, Imgbasho mgbi onodzi mgbi ama ogbeese, do ongyeso mgban gbæ no kwulu iba tso engbido mgban ungwo ama nka kyo dzikan-dzikan kyeme mani.>>

IYesu ye kyema

⁷ <<We gbæ, Ani ye kyema dzikan-dzikan! Ikyese no dze yi inggise ngwu ngo elodze ama nto afe ne mani.>>

⁸ Ani, iJon, li ani fwo di di ungwo ntone aani. Ono ngwi ani fwo di di ma ma, ani lake ese mi iyayi ongyeso ongwu nkye ungwo ntone le tso ani ma ikye osunun.

⁹ Nghaduu o nya ani gbæ, <<Ka kyo nga ba! Ani kpaa li ongbido ungwonyi yi abu yi ama ogbeese beyi ali inggise ngwu ngo elodze mgbi afe ne duu. Sunu Imgbasho yuon!>>

¹⁰ Ne o nya ani gbæ, <<Ka kye elodze ngwi a yegbo mi afe ne ne da ba, ikyekye ono ma dze kwækwæ.

¹¹ Inggise okyo obube no kiyayi okyo obube, ongwu itukwu le kplekple no kiyayi odze yi itukwu kplekple. Nghaduu inggise ama okyo osuse ka kiyayi okyungwo osuse, inggise ndile saan no kiyayi ole saan.>>

¹² <<Dii, ani ye kyema dzikan-dzikan! Umba mgbi ani dze yi ani, n dika kye nu ali inggise mi odzeedze ungwo ngwi otsungwon kyo mani.

¹³ Ani li Owita-wita yi Ongyengye, Ababo yi Olele, Otiita yi Odundu.

¹⁴ <<Mse no be ama nkyi salu angwuto mgbi ama, ikyegbæ nu ma wa tu ofe ogye ekwo mgbi oshishe di tu ofe onye mi onufe lu ifu ogalu na ewo.

¹⁵ Ama nto ogalu mi ese ma, li obwe yi ama okyo obudei yi amah ibwubwe yi ama ogbwongwo inggise yi ama ola angwula beyi ama ngwu onya omwaamwa kpa ma di li kyungwo ama ntishi ba mani.

¹⁶ <<Ani, iYesu, do ongyeso mgbi ani eso ikye okye obwendæ ne nu ema mi ikye okwakyè mgbi ama onoyeye. Ani li akpa yi eto mgbi iDavedi, di li oshebe ongwu ikyegbe nani.>>

¹⁷ Onodzi beyi ongyaa ofufe gbæ, <<Kwa! >> Ma ali inggise nfwo odze ne no gbæ, <<Kwa!>> Ali inggise ngwu ekweni don, no ba; inggise ndi mina, no gbe umba mgbi eni oshishe ayayi.

¹⁸ Ani iJon kwo ali inggise nfwo elodze ngwi a yegbo mi afe ne ado: Ni inggise ta mbwo ungwo mi ele, Imgbasho ka mbwo otsungwon iso ngwi a lo mi afe neni.

¹⁹ Ma inggise ta ndi mwa elodze mi afe ngwi a yegbo ne ngwuta, Imgbasho ka kyi kyelu aye umba mgbi ekwo mgbi oshishe beyi ogalu osaan mgban, ngwi a lo ma mi afe ne mbon.

²⁰ Ongwu nkyo obwendæ mi ungwo ntone ma gbæ, <<Een, ani ye kyema dzikan-dzikan.>> No dze nga. Ba, Otse iYesu.

²¹ Elela mgbi Otse iYesu no dze yi emi ongwe Imgbasho duu.